

PRINCETON UNIVERSITY LIBRARY

DUPL



32101 037602214

3473
.195
368

EX LIBRIS
A. TRENCLENBURG.

2850.6.

~~XIV 2850.6~~

Elizabeth Foundation,



LIBRARY

OF THE

College of New Jersey.

Johann Georg
Sries.

159469g

DANIELIS GEORGII
MORHOFII
ORATIONES
ET
PROGRAMMATA,
IN

CELEBERRIMA HOLSATORUM
ACADEMIA KILONIENSI

publicè proposita utraque:

Nunc Amicorum rogatu, &
cura Filiorum, collecta, ac
publicata,
cum

Indicibus necessariis.

HAMBURGI,

Sumtibus GOTOFREDI LIEBERNICKELS,

Rudolfstadii, Typis HEINRICI URBANI,

Anno MDC XCIX.

MORRIS

ET

CELLERIMA HORTATUM
ACAD. MA. HORTATUM

38. HORTATUM HORTATUM HORTATUM

38. HORTATUM HORTATUM HORTATUM

HORTATUM

HORTATUM

HORTATUM

HORTATUM HORTATUM HORTATUM

HORTATUM HORTATUM HORTATUM



NOBILISSIMO, AMPLISSIMO, atque EXCELLENTISSIMO

VIRO,

THEODORO
DASSOVIO,

Hebrææ ceterarumque Orientis Linguarum

Professori Witemberg. Celeberrimo,

Patrono Fautorique maximo.

Colenti jam mihi vestratis Academiae Musas, VIR CELEBR-
RIME, quo eodem tempore hæc, quas vides, pagellas prelo subiciebat Typo-
gra-

3473
1958
368

a 2
48266

graphus, è re nostra videbatur fore, si illas Nomini Tuo præ ceteris ego fraterque nuncuparemus. Sunt quidem istæ ex schedis paternis depromptæ, sparsimque olim, prout temporis ratio postulavit, conscriptæ; nunc autem in justiformam opusculi redactæ, tituloque, ut arbitror, convenienti insignitæ. Pleraque spectant hic ad Artem Oratoriam: cujus quanta sit in persuadendis hominum animis vis, tum clarissimi viri olim probarunt, tum usus & quotidiana certe experientia

entia etiamnum testatur. Omnino enim plus inest ponderis huic rei, quam vulgus hominum existimat; quod non scholarum duntaxat umbraculis contineatur; verum ad Tempia & pulpita sacra quoque, ad fora & curiam late pertingat, ubi egregia multa fieri quotidie videmus ab iis, qui ad interiores eloquentiæ recessus penetrarunt. Est enim oratio ceterarum scientiarum quoddam veluti vehiculum, efficitque, ut in omni disciplinarum genere præclare cogitata aptis

concinnisque verbis effer-
ri queant. Hinc ea non im-
merito inter omnes prope
scientias, quibus se huma-
num ingenium jactare po-
test, regium sibi & nomen
vendicat & locum. Neque
exiguam sane operam in
hoc studiorum genere
quondam posuerunt Græci
pariter atque Romani; &
maiores nostri, veterum sa-
pientiam imitati, nihil fere
prius & antiquius credide-
runt, quam ut ii juvenes, qui
ad spem summæ cujusq; di-
gnitatis alebantur, animos
ad hoc studiorum genus af-
fer-

ferrent instructos probe ac
perpolitos. Cum igitur hoc
volumen ejusmodi sit, ut a-
liqua saltem ex parte tanti
cultorem boni juvare pos-
sit; utpote cujus orationes,
quas continet, & program-
mata, non adeo infelici in-
genio, (invidiatamen & ja-
ctantia absit) neque plane
insuavi orationis genere,
conscripta esse, docti judi-
carunt; edere illud, publi-
ciq; juris facere ausi sumus.

Verum, cur potissimum
ad Te contendat hic liber,
tuumque illud nomen præ-
ferre publice gestiat, mira-
beris

beris fortasse; nos tamen
haud paucæ, tum privatæ,
tum publicæ causæ, hoc ut
propositum insisteremus,
persuaserunt. Quis esset,
cujus in fide tutelaque hic
liber securius versaretur?
qui profecto, quod glorie-
tur, habet, cum Tuo quasi
præsidio eruditorum sese
judicio sistens plane causa
cadere non possit: tum ipse
Tu quoque non solum hoc
studiorum genus magnifa-
cias, sed etiam in aliis am-
plecti soleas, prolixissime-
que fovere. Equidem pro-
be

be memini, me aliquando
ex Te de dictionis ele-
gantia differente audivisse,
Te imprimis his humanita-
tis studiis delectari; Cum
non delecteris tantum, sed
& optime iis ipse sis imbu-
tus, qui per ipsos XII. annos
Poeseos munus, communi
quodam vinculo Professori
Eloquentiæ conjunctum,
summa cum laude in hac i-
psa quondam Academia or-
nasti. Ad hæc accidit quo-
que peculiare quoddam in
me, majorem natu, offici-
um, qui me, in Academia
vestrati viventem, summa

benignitate amplexus, in
numerisque in me benevo-
lentiae documentis, Te mi-
hi amicissimum esse, testa-
tus es, ac subministrandis
praesertim libris studia mea
non parum adjuvisti. Quod
idem felicitatis genus fra-
ter quoque meus, qui Deo
volente huc aliquando
profecturus est, sibi poterit
polliceri. Qui quidem futu-
ro studiorum suorum com-
modo tantum sibi Virum si
devinciet, gaudebit; ego
vero, me ingrati animi cri-
men melius effugere non
posse, existimabo, quam si
pu-

publicum ejus rei signum à
me exhibeatur.

Expositis quæ ad hujus in-
stituti rationem pertinere
visa sunt, superesset, ut mo-
re eorum, qui aliquid nun-
cupant, in laudes tuas di-
grederemur; sed animus
Tuus ita comparatus (id
quod mihi ex eo tempore,
quo Tuo convictu sum u-
sus, innotuit) ut laude di-
gnus esse malis, quam co-
ram ac velut in os laudari:
Neque enim tam, quod lau-
dabile est, facis, ut videaris
facere, quam ut aliter face-
re haud possis: multo minus
cum

DEDICATIO.

cum iis facis, qui ex literarum humanissimarum studiis nil nisi fastum ambitionemque imbibere, & dictatorio quodam vultu, verbisque, laudem sibi & gloriam conciliare magno conatu consueverunt. Non meminerunt illi, pavonis instar Æsopii inflati homines, ea in re summam esse laudis positam, si nil gloriemur: neque hoc ii facere necesse habent, qui paulo majori cum solertia literas excoluerunt, quippe quos vel nolentes fama gloriaque sequatur. Cum itaque Tu, ERUDITISSIME VIR, longe aliter sentias, in modestiam Tuam nos peccare videremur, si meritis Teque dignis laudibus merita Tua efferre auderemus. Quare hunc in sermonem non sumus ingredi, in quo non paulo facilius sit initium quam exitum reperire; tacite potius Te Tuamque insignem

DEDICATIO.

signem eruditionem veneraturi. Neque enim ejusmodi virtus Tua est, quæ pudore Tuo modestiaque celari possit; in lucem erumpit illa, Teque in scio Tibi famam ac nomen dudum comparavit. Præcones testesque hujus rei non paucos habemus: Et, ne longe abeamus, testis est illa, in qua vivis, Academia, cujus ipsa quoque auditoria, pulpita, subsellia laudibus Tuis resonare videntur: testium loco omni exceptione majorum scripta Tua sunt, quibus nulla livoris, nulla calumniæ vis quid unquam nocere valebit. Pervasit eorum fama per omnia tum gentis Tuæ, tum exterorum quoque ora, adeo quidem, ut omnes ore confiteantur uno, Te habere, quod aut doctiores admirentur, auditores exteri vero tanta laude celebrent, ut certare videantur. Quæ omnia cum adhuc se modum habeant,

DEDICATIO.

beant, eo facilius laudatione nostra
carere poteris, Tuæ certe virtuti non
suffectura : nihilque adeo, quod ad-
damus, supererit, nisi ut opusculum
beati Patris nostri eo, quo soles, vul-
tu, mente, manuque suscipere, ac tu-
eri velis, unaque benevolentiam il-
apt: lam, seu potius amorem, quo me
Ben: maorem natu huc usque prosequi
dignatus es, in posterum quoque sar-
tum tectum conserves ; certus inte-
rim, pro Tua Tuorumque salute ac
flore, nunquam non apud Deum
ambos supplicaturos esse

Celeberrimi Nominis Tui

observantissimos

Casparum Danielem	} Morhofi-	
&		os, Fratres,
Friëdericum		germ.

THE HISTORY OF THE
LIFE OF THE
LORD OF THE
TREASURY

IN PARLIAMENT ASSEMBLED.

BY
JAMES O'NEILL, ESQ.

ORATIONES.

THE HISTORY OF THE
LIFE OF THE
LORD OF THE
TREASURY
IN PARLIAMENT ASSEMBLED.
BY
JAMES O'NEILL, ESQ.



In Inaugurat. Academ. Kilon.
d. 6. Oct. 1665.

*Reverendissemi & Serenissimi Prin-
cipes ac Domini, Domini mei Clementissimi; Illu-
strissime Comes, Viri Munerum, Generis, Do-
ctrinae laude incluti, tuque nobilissima Juvenum
Corona.*

DUm publici omnium audiun-
tur plausus, dum undique tot
lætantium vocibus, gratulan-
tium votis, urbs ista, & hæc
subsellia perstrepunt; dum
in hoc novo Palladis delubro,
in hoc Musarum Parnasso nihil non sonat lite-
rarium, dum doctissimis eruditissimorum vi-
rorum Orationibus aures vestrae detinentur,
mea hîc facilè filere poterat infantia; nisi par-
tes dicendi mihi imponeret, & muneris mei
ratio & sacrosancta parendi necessitas. Erum-
pat ergo nunc vox ista, Serenissimi mei Prin-
cipsis munere mihi concessa, quam hæsitantem
publici plausus provocant & evocant. Proce-
dam nunc è mediis umbris in illustrem hunc
lo-

locum, atque Serenissimæ huic luci imbecilles
& ad Solis istius radios caligantes oculos ex-
ponam. Etenim, si, ut est in fabulis, Phœ-
bi Parentis aspectum non tulit Phaethon, si Se-
mele unius Jovis fulgorem non sustinuit, quid-
ni hæc oculorum acies perstringatur ad ipsius
nostri Phœbi intuitum, & ad tot nostros Joves
Jovisque satellites? Quemadmodum vero Per-
sæ solem orientem, ita & Te, Clementissime
Domine, oculis quidem conniventibus, hu-
millimis tamen votis veneror orientem Parn-
nasso nostro Solem seu Apollinem. Tu enim
& Cimbrici tui Orbis sol, & Parnassi nostri A-
pollo, ipso isto tuo ortu, atque adeo sub ipsam
regiminis tui felicissimi Auroram, fidem feci-
sti veteri verbo, quo Musis amica dicitur Au-
rora. Senferunt, Serenissime Domine, sen-
ferunt Musæ nostræ Auroram tuam sibi ami-
cam & majora sperant à meridie tua, quam per-
petuam nobis servate o' superi, nec ullo un-
quam tempore ad occasum vergentem! Atque,
ut apertius eloquar, Tu, Serenissime Domine,
quod orbis miretur, quod postera secula lo-
quantur! augustissima demum imples Divi
Tui Parentis de erigendâ Academiâ desideria.
Quanta hæc pietas! Tu quæ olim temporum
difficultas exclusit, exequeris consilia, sub ipsis
imperii tui auspiciis. Quanta felicitas! Tu
populi tui & Rector & Doctor Sapientiæ sacra-
rium illi exstruis. Quanta munificentia! Tu
denique de omnibus bene mereris. Quanta

gloria! Mihi sanè fato ad hanc vernaculam tibi gloriam destinatus & quodammodo natus videris, quâ tu vivus vidensque ut beneficium aliquod numen salutaris, ipsamque ante mortem audis immortalis. Dum enim alibi Muxæ vel pelluntur, vel fame conficiuntur, vel pede profano conculcantur; Tu exules sinu tuo recipis, tu liberalibus impensis alis, tu quassatas erigis: Dum plurimi hodie tam averso à literis animo sunt, ut in ejus perniciem conjurationem Catilinariam jurasse videantur, dum Cyclopes & Therisitæ, vel potius boves, nisi quod non mugiant, divinissima studia pro futilibus & inutilibus raptant, easque funditus extirpatum eunt, Tu eas à contemptu vindicas, regioque habitu decoras sistis. Dum alibi in hoc turbarum Oceano vel cum fluctibus luctantur, vel inter scopulos colliduntur, Tu naufragas tutissimo tuo Kiloniensi portu suscipis. Tu Parnassos & Pindos erigis, quibus in Cœlum eatur, sed sine Θεομαχία. Officinam Tu hic statuariam erigis, in qua Cimbriæ tuæ novæ sculpantur Virtutum imagines. Cumque Holsatia vernaculo suo nomine à lignis & lapidibus dicta credatur: erunt hic Phidiæ & Polycleti, qui è quovis ligno Mercurium Patriæ sculpant, non statuas tamen quascunque sed Memnonias illas vocales, quæ ad Solis tui ortum animentur, ne, quod aliquando de Roma dicebatur: lapideum in eo fuisse populum, quia tot fermè
ibi

ibi statux, quot cives, nobis quoque objiciatur; erunt Deucaliones, qui omnem lapidem movebunt, ut lapidibus istis humanam formam inducant. Chemicam officinam aperis, in qua plumbea & ferrea juvenum ingenia sublimiori quadam μεταμορφώσει mutantur in aurea, eaque non Vulcanio, sed divino quodam igne cœlitus lapso, Promethei cujusdam operâ ab omni fece humanâ excocta. Quod insignis quondam Chemicus, se pharmacis suis hominem ab ipsis incunabulis arti suæ traditum immortalem effecturum jactavit, id verius nunc de Te dicetur; ut qui istis Sapientiæ pharmacis, quæ mentibus hominum propinas, id efficis, ut vitam vivant verè immortalem: ~~Si enim, teste Seneca, vita absque literis mors, literati soli vivere, soli censendi sunt immortales.~~ Balnea hic parantur è fontibus Castaliis, quibus, ceu lustrali quâdam aquâ ignorantix & vitiorum maculæ eluantur: Æthiopes verò non dealbantur. Hortos hic novos condis, & si fas ita vocare, Paradisum quendam, è quo quatuor illi quatuor Collegiorum fontes perpetuâ scaturigine in terras tuas deriventur. Hic cavebimus, ne vel stillicidiis premantur, vel uredine infestentur arbores, ne in degeneres ramos abeant aut sylvescant; ne pugnaces fraxini, aut contumaces ilices inter Apollinares laurus & pacificas olivas reperiantur, ne, ut in fabulis legimus, è fungis iterum enascantur homines. Operam dabimus, ut *Sylvæ sint*

Principe dignæ, ut potius Camœnarum locus, quam Martis, aut lascivorum Faunorum hic adaptetur. Lucum Dodonæum adeo religiosè à gentilibus cultum tradit Diodorus Siculus, ut nefas fuerit ex eo excindi arborem, quæ in profanos usus cederet, è quo non nisi res sacræ, ut caduceus Mercurii, hasta vel clypeus Minervæ, Herculis clava, sceptrum Regum Spartanorum, Virgæ Areopagitarum formari debebant. Talis est ille Musis nostris sacratus locus & lucus, à quo profanæ manus & bipennes arceantur, è quo excendantur divinæ Virgule, quæ mysteria tam divina, quam humana in lucem protrahant: è quo formetur caduceus Mercurii, qui animos hominum inflectat & demulceat: hasta & clypeus Minervæ, quibus Dea Musis & Marti nata barbariem fuget literasque ab invidiæ telis defendat: Herculis clava, quæ vitiorum monstra pessundet, Cerberos, Dracones, Hydras literarias ejiciat & obtruncet: Sceptrum, quæ populum in ordinem redigant: Virgæ & fasces quibus armetur Justitia, quos Judex in malignos expediat. Excrescat hic Virtutis ille ramus aureus Poëtarum scriptis celebratus, qui nunquam è stirpe sua ita recidi potuit, ut in locum prioris alius ei per omnia similis non succreverit. De Aftyage Medorum Rege relatum legimus, visam sibi in somnis fuisse vitem, quæ è pectore suo excrescens per amplissima regna palmites diffuderit multosque populos obumbrarit. Hæc

Academia tua, Serenissime Domine, hoc Autumni tempore, ipso isto Octobri mense, quo
Mitis in apricis coquitur vindemia saxis,
enata, Vitis illa frugifera est, in pectore, in sanguine tuo plantata, cujus rami non per tuas tantum, sed & per alias terras & populos se diffundunt, sub cujus umbra hospitari gestient liberalia studia, eorumque cultores seduli, cujus liquore plusquam Castalio inebriari volent non Bacchi sed Musarum alumni. Poteram hic, forte non adeo ineptè usurpare illud Sacri Vatis Ezechielis dictum: *Mater hæc nostra, quasi vitis in sanguine tuo plantata est, frondes ejus & fructus creverunt, & factæ sunt ei virgæ solidæ in sceptrâ dominantium.* Formare enim hæc Mater nostra poterit, tam illos, qui sceptris præsumunt, quam qui subsunt, tam qui parere possunt, quam qui imperare. Quod Augustæ Cæsarum familiæ omen fuit auspicatum, id sua quadam ratione nobis quoque esse potest. Quemadmodum enim Aquila in gremium Liviae recens Augusto nuptæ lauri ramum demisit, qui plantatus ingens sensim lauretum dedit, è quâ sylva triumphaturi furculum decerpebant, qui sub finem triumphi iterum plantatus germinabat: quâ virente Sylva, floruit quoque domus Augusta, quâ arescente, ipsa ejus gloria exaruit: Ita nunc sublimem istam Romano Germanicam è laureo suo ferto decerptum hunc lauri ramum in gremium tuum, Serenissime Domine, demisisse dicam, quem

Tu nunc terræ tuæ infigis, qui felicibus auspi-
ciis, tam divinis, quam tuis in ingentem ex-
crescat sylvam, è qua Triumphatores nostri li-
terarii frondes suas decerpant, quæ plantatæ
alias iterum frondes infinitâ successionem pari-
ant, ut in omne usque ævum lauretum hoc no-
strum vireat, & nunquam exarescat. Progermi-
net in isto luco Pygmalionis illa Oliva aurea
numerofissimis è Smaragdo fructibus onusta.
Olea hic fœcunditatis, truncus aureus emi-
nentiæ erit symbolum, fructus è virente
Smaragdo floridæ & vividæ virtutis simula-
chrom. Cœlum terris tuis imponis, Serenis-
sime Domine, in quo Tu tanquam Sol istum
ἐγκυκλοπαιδείας Orbem perpetuis imples ra-
diis continuoque cursu absolvis: nec fine so-
lis tui beneficio florere possumus cum Vere,
messes dare cum æstate, fructus colligere cum
Autumno, semina fovere cum hyeme. Hic
Tu à Te ipso, Astra à Te, Terræ tuæ à Te &
Astris lucem capiunt. Procul autem esse ju-
bes, quæ in ipso aspectu exstingvuntur Meteo-
ra, infaustos Cometas, ignes fatuos, capras
saltantes, Dracones volantes, aliaque pulcher-
rimi istius Orbis tui decora. Quod Gallorum
est de Scholâ Parisiensi elogium, primogeni-
tam illam esse Regis filiam, id verè nunc de no-
vâ nostrâ Academia dicimus. Filia hæc tua
est, quia publicus omnium Pater es, & verè
nunc Patriæ Pater dici potes: quod eam Cim-
bria tuæ genueris filiam, quæ in ipsis suis seris

nepotibus tot nobis gignere potest Patriæ Patres, qui te primum suum Parentem uno ore celebrabunt omnes, & augustum tuum nomen per omnium seculorum memoriam diffundent. Alius fortassis mallet Conjugem dicere, quæ se Tibi

Connubio junget stabili propriamque dicabit.

Properat scilicet in amplexus tuos divinæ pulchritudinis Virgo, SOPHIE, illustres tuos toros anticipatura. Quæ in re admirabilem Te suspicit orbis: Nam cum alii eò tempore vel thalami curas potiores habuissent, vel alias sectati fuissent voluptates: Tu tamen, Serenissime Domine, prætulisti æterna illa caducis, quia ipse ad æternitatem factus, quia ipse divinus, animusque tuus alia agere non potest, quam quæ divina spirant. O felicissimum, SOPHIES & CHRISTIANI ALBERTI connubium! O fecundissimum! Quanquam enim illa Virgo sit, munificentiam tamen tuam, gravida, Jovis instar, è cerebro, obstetricante toto Musarum choro tibi edet charissima illa, pignora, proque liberis libros Orbi & luci ostendet. Atque hujus tam illustis negotii gloria tanta est, ut Orbis eam vix capiat, longè quidem major, quam si Oceanum jungeres pontibus, aut Pyramidibus & colossis erectis metireris famæ tuæ magnitudinem: Omnes enim apices, titulos, prætextas & trabeas transcendit. Frustra vestes palmatæ, triumphales currus, frustra insanæ saxorum substructiones

nes in comparisonem adducentur. Quod si Lyfimachus olim occupatâ Thraciâ cœlum se hastæ cuspide contingere gloriabatur: Tu nunc non hastæ cuspide, non vertice cœlum ferire, sed pedibus mihi calcare videris. Glorietur Cæsar, quod tot hominum millia ferro flammaque exstinxerit; Pompejus M. captis oppidis castellisque mille quingentis se efferat: Tu non cruentam istam gloriam sectaris, non homines exstinguis; sed regis, imo novos quodammodo gignis formasque literarum & sapientiæ studiis. Non tu Urbes exscindis, castella diruis, sed Heliconam novum exstruis; unde non aliquot seculorum fama ipsa Tibi nascitur **ÆTERNITAS**. Pro parte hæreditarius est Tibi studiorum amor. Quem enim latet quanto favore Domus Cimbrica Musas semper amplexa fuerit? quis ignorat, quantos Divus tuus Parens in eas sumptus fecerit? quod splendidissima illa Bibliotheca, lauta illa stipendia, admirandæ istæ Sphæræ testari possunt, quibus similes major ille orbis non vidit, & quibus ego fati aliquid semper subesse credidi. Cum enim alii Principes & gentes pignora sua habeant, quæ ostentare soleant: Cum Romani ancilla cœlo lapsa; Scythæ securim, Phialam & Sagittam; Galli lilia & ampullas jactent: Cimbri Principes Orbem totum possident soli, qui ad eorum quasi nutum volvitur & revolvitur. Verum enim verò, quanta etiam fuerint Divi tui Parentis in literatos beneficia, voto tamen

Academiae erigendae excidit ipse, & nunc à Filio istud impleri lætantur sanctissimi ejus Manes. Cui Tu gloriae nunc solus servaris, qui ita Musas tractas ita foves, ac si unicus & summus esses seculi Musagetes, ut nunc in Te uno Majores omnes vivere, quæque in alios diviso alveo derivata bona, in Te uno meatu collecta fluxisse videantur. Solent morum Magistri ideas fictorum quorundam Heroum, aut Hercules aliquos proponere, ad cujus typi intuitum generosa Mens parturiant. Sed ea quidem in Te cura erat supervacua: Si enim vel omnes Majorum ideas tollerēs, animus tuus se ipsum sibi fisteret pro imagine. Fecit enim Te ipsa Natura Principem, neque Diadumenis illis coronam capiti ex utero connatam jactantibus similis censeris debes, vel, iis qui à sanguine mutantur purpuram, quæ ipsa sæpe magno sanguinis pretio constat, qui exprimitur de venis populorum. Excussisti tu sponte tuâ Majorum cineres, si quas forte ibi reperires scintillas, quibus præferendas populo tuo faces posses accendere. Sed majores in Te ipso alebas flammæ, quæ nullâ ambitionis aurâ ventilatæ sponte se exerebant, omnemque Virtutis materiem consumeabant. In ipsa illâ primâ tuâ pueritiâ ductæ jam erant lineæ, quibus Virtutum tam paternarum quam infitarum effigies poterant includi. Vulgaris & plebejarum mentium fors est surgendo crescere: At tu qui jam in cunis eras.

ma-

magnus, noluiſti, nec potuiſti major fieri, niſi Te demittendo. Quâ quidem Virtute, ut præcipuâ in Principe, & primâ, ceu quodam vinculo cæteras omnes adeo Tibi obligavi, ut nodo quodam Gordio tecum connexæ, nunquam poſſint à Te vel Alexandri cujuſdam, vel ipſius Martis gladio diſſolvi & divelli. Quemadmodum enim Orbis Univerſus in chartam anguſtam compingitur, ut in oculos diſtinctius poſſit incurrere: ita tu quoque à teneris didiciſti minor fieri, nullo majeſtatis diſpendio: ut te capere potuerint oculi imbecilles. Quæ humanitas tua tantum genuit in Civium animis erga Te amorem, ut jam non certius aliquod ab armis præſidium, quam ab illorum animis debeas exſpectare, nec aliud munimentum, niſi quod intra pectora illorum tua mens, quæ in illis vivit, circumſcribitur. Quis vero divinum illum animum Tuum nobis depinget? Ut enim cælum indefeſſâ rotatur vertigine; ut maria perpetuis æſtibus ſunt inquieta; ut Sol orbem ſemper obit: ita animus tuus nunquam ceſſat, nunquam feriat, ſed ſemper in Heroicas illas & regias Virtutes agitatur. Cum enim multis pœnitendorum ſucceſſuum mater temeritas aſſideat gubernaculis; tibi adſiſtit optimarum actionum præceprix Pietas & Prudentia. Quæ muta eſt in terris Themis, tuo ore loquitur: Quæ cæca eſt, tuis oculis videt. Amas autem illos, qui è terris profugam de cælo deducunt,
gra-

gravissimos scilicet Consiliarios, quibus aures non tantum das, sed & lingvam, animos & manus. Hæc cum accuratius perpendo, Pyrrhus aliquis mihi videris, qui Diis gratias egit, quod primò Regem se fecerint, inde, quod animum Regium dederint, quod denique Cyneam, Virum acrem consilio, & potentem eloquio concesserint. Singula illa Tibi non vota sed fata sunt: Principem enim Te Deus fecit, dedit animum Regium, dedit denique Cyneam, perillustrem tuum KIELMANNUM, cujus incomparabili prudentiâ, cujus svada, ceu Herculis Ogmii catenâ animos tuorum, & dirigis, & devincis: cujus consiliis Tu, Serenissime Domine, primum inductus, immortalẽ fruis nomini tuo gloriam, dum Musis novum Helicon exstruis. Proscribitur â plerisque aulis Veritas; vel si adest, silentium fovet plusquam Pythagoricum, nec vel in loquacissima causidicorum turba Patronos invenit; Adeo omnes sunt ranæ Seriphix: Verum apud Te illa non filet, Te Judice loqui, audet, etiam sine Patrono. Raræ sunt istæ aquilæ vel lynces, qui radios ejus rectos capiunt; pluri mi malunt reflexos; multi cæcutire amant in crepusculo; multi mendaciorum nebulis se involvant nebulones. Tu vero illam in lucem portahis, & quia Serenissimus es, serenam amas: odisti noctuas illas, quæ illam oderunt, vespertiones qui illam fugiunt. Tu nudam illam Virginem statuis, quam alii è conspectu suo

fuoremovent, turpiter verecundi, quam vestibus tegunt, cujus os persona obducunt, ne vel vultus illi apertus videatur. Non admittit græculas adulationes gloria tua, quæ solida est; non alis in sinu tuo Sinones istos & Vertumnos, qui ut vestitum; ita & sententiam habent, aliam domesticam, aliam forensam, & qui quasi rotæ figulorum in omnes partes convertuntur. Omnes intra ordinis gyros tenet summa Virtus Justitia, quæ adeo tua est, ut in Te habitare, velut in cœlo suo videatur. Bonos tibi cives formas, te ipso, tuosque mores certissimam illorum facis disciplinam: Tam enim absurdum Tibi est Principem esse solutum legibus, quam in dirigendo navis cursu gubernatorem non hæere gubernaculo. Imò quia Princeps es, vivis secundum leges, nec aliter te Principem esse posse, credis: quem & Legis exemplum & ideam vis haberi. Quanta verò est ista liberalitas tua, quâ erga sapientiæ cultores & Doctores uteris, quæ tibi cum ipsis Academia annis crescet, vicetque posterior semper priorem. Id enim cum ipso summo Numine habes commune, ut dum tu beneficia largiris, munificentia tua inveniat, quæ largiatur. Detrahis splendori & pompæ, ut splendidiores sint Musæ, nec in Martis alumnos erogabis, quod debetur Musarum cultoribus. Leonis Imperatoris vox tua erit, qui svadentibus, ut Eulogio Philosopho destinatum stipendium in mi-
li.

Item solveret, respondit: *Ultinam liceret meo tempore, quæ militibus dantur, in Professores Artium erogare!* Nec pœnitere Te istarum impensarum poterit, quæ infinitâ erga singulos utilitate rependuntur. Ut enim Soli non decedit, quod dispensat in fidera; nec Arbori, quod in ramos; nec capiti, quod in membra; nec cordi, quod in venas: ita Erario tuo nil perit, dum artes illas alis, quæ Viros tibi prudentes forment, quibus si impletur Respublica, lucrari etiam ex illis poterit. Solius enim prudentiæ opus est, cumulare Pelopis talenta, Crassi pecunias, Cræsi thesauros: Et solus, me quidem iudice, hanc ditescendi artem docere vel poterat vel debebat Philosophus; sapientissimus autem Thales ipso exemplo docuit. Verum ea omnia tanta sunt, ut leviter tangere nefas sit; omnia dicere velle temerarium: imprimis homini ad eam rem non instructo, & cujus umbra non capit tantam lucem. Satis nunc sit, si dixerò, in Te, Domine, complexum esse omnium virtutum, quas si ordine panderem, citius me dies hæc, cujus jam bona pars abiit, deficeret, quam illustria rerum argumenta. De Parrasio fertur: illum Atheniensem pessimum Zeum ita delineare potuisse, ut ~~invidum, avarum, ferocem, iniustum, amentem ipsa pictura exprefferit.~~ Sed redivivus ille vix umbram tuarum virtutum penicillo assequeretur, quam calamus nullus exprimit, nedum meus. Alias ea res linguas, alios Ora-

tores postulat, quam me, qui Cicadæ isti similis sum, quæ in Eunomii insignis Cytharædi lyrâ confidens suavissimos fidium concentus strepera voce malè imitabatur. Illa potius optimorum Oratorum ingeniis & seculorum linguis reservanda, nec intra unius ingenii terminum finienda. Quin, si nihil aliud de Te memorari possit, quam ista Academiae institutionis gloria, sufficeret pro æternitate occupandâ, & dum ea diceretur, omnia, nisi fallor, simul dicerentur. Non enim potes non amare sapientiam, cujus Sacrarium exstruis. Ea autem est, quæ omnem Virtutum chorum, divina omnia & humana, cælum & terras complectitur. O diem lætum omni annorum memoriâ celebrandum, quo tanta Musis fecisti otia; imò quo totum orbem tibi devinxisti beneficiis tuis! Demarathus Corinthius cum Alexandrum, profligato Dario & devicto Oriente, in folio Darii sedentem videret, lacrymans præ gaudio exclamavit: O infelices Patres nostros, quibus tale spectaculum videre non licuit! Ego vero felicissimum tuum Parentem infelicem non dicam, magna tamen eum puto caruisse lætitiâ, cui optabilius fuisset spectare hæc præsentia, quam expectare futura. Vides, Domine, quam trahat splendor ille tuus illustrium Virorum oculos, quantum hæc festivitas collegerit confluxum tam spectatorum, quam studiosorum, ad hanc Panegyrim, tanquam ad Olympicam aliquam celebritatem concursantium, qui

qui eo facto non tuæ tantum Cimbriæ, sed omnium populorum negotium geri ostendunt, quorum omnium pectus, haud secus ac scenam & theatrum tuis implevisti laudibus. Circumspice affusa lateribus tuis gratulantium agmina: vide collectam hinc inde turbam, jam præcedentem vias, jam gratâ & blandâ quadam vi illas obstruentem: perspice vultus, qui mera gaudia loquuntur: vide, quas flammæ pectora à sole tuo incensa alant, quam faustis ominibus universi Cives tui adventantes Musas excipiant & amplexentur. Vide, quam aures arrigantur omnium ad istos tympanorum strepitus, ad istum tubarum clangorem, qui jam non Marti, cujus ante aliquot annos funestissima imago & rura obambulabat & oppida, sed Musis gratissimam indicunt festivitatem. Omnes nunc tantæ rei dignitatem subrostranos & subbasilicanos, juvenes & senes, in circulis & semicirculis passim prædicantes audias. Admirantur omnes magnificum illum apparatus, augustam illam & planè regiam pompam, venerantur sceptrâ illa, quæ Musis nostris, augustiore, ni fallor, ritu, quam quo Consulibus olim Romanis fasces & secures, præferuntur. Omnes Magnæ illius Matris nostræ Academix Megalesia mihi celebrare videntur. Nam potiori jure Magnam illam Matrem, Animorum obstetricem, dicam, quam Romani suam illam Matrem Terram, corporum nutricem, quam è Phrygiâ advectam magno apparatu in Urbem

recipiebant. Quemadmodum vero illam omnī effusā civitate Scipio Nasica, raræ virtutis juvenis optimusque, (talem enim Oraculum poposcerat) in ædem Victoriæ maximo omnium plausu pertulit: Ita nunc Te, Serenissime Domine, Optimum nostrum, addo & Maximum, Senatu tuo universo magnoque procerum numero stipatum hanc Deā hanc, Matrem nostrā recipientē, inque hanc ædē augustam cultui ejus solenni sacratam deferentem vidimus; quam & nos Victoriæ Ædem appellare possumus, in quā tot contra barbariem & ignorantiam obtinebuntur Victoriæ, tot celebrabuntur triumphi, tot victores publicis decorabuntur laureis. Imò Capitolium aliquod mihi fingo, in quod olim quoque Triumphatores deducebantur; quod licet Jovi sacrum, habebant tamen & alia numina sibi exstructa delubra, Menti quoque fanum dicatum fuit: Ita & in nostro illo Capitolio vario numina variarum scientiarum nomina sunt, ad quas non nisi per Bonæ Mentis fanum pergimus. Ingredere, Domine istud Capitolium non elephantis cum Pompejo, non cervis cum Aurelio, aut Leonibus cum Antonio vectus. Non Te humeris inferemus, uti Tullium quondam ejus populares, non manibus, ut Romani Severum Imperatorem: verum animis & oculis (modestiore utique & gratiore pompâ) te gestatum, in hunc locum deducemus. Ingredere: sed parietes illi, quos lustras & illustas, vix tantam lu-

lucem capiunt: Pavimentum hoc servabit sibi impressa illa benevolæ humanitatis tuæ vestigia: crescet cum tempore loci religio, crescet cum affectu cultus, atque ad posteros transibit. Magna profecto nostra nunc est felicitas, cum à Te non solum possideamur: sed ipsi nunc Te præsentem possideamus. Nobis Te dedisti, dum omnium imples oculos, omnium animos tuo desiderio occupas: ita, ut nostra apud Te possessio plena sit obsequii; tua, apud nos plena reverentiæ, quam Tibi præsentem exhibemus, quam absenti integram servamus. Sed erramus, si absentem dicamus, cujus præsentissima benignitas semper nobis adsistit, cujus manus nos defendunt, cujus oculi nobis prospiciunt, & aliorum invidiam & fascinantes oculos amoliuntur, cujus animus semper in civium animis erit, & in cujus animis deò nos omnes sumus, ut à Te, quasi à Mente quadam, quam totam in toto corpore, & totam in quâlibet ejus parte hospitari sapientes ajunt, inspiremur, moveamur & agamur. Solem illum communem siderum & terræ Principem aliquando nox nobis aufert, sæpe nubes involvunt, sæpe Luna illi opposita nobis invidet; semper tamen ejus vires sentimus in mundi inferiora propagatas, vel tùm, cum ille maximè abesse creditur, qui si aliquando serenus prodierit, lætior apparet, minus gratus futurus, si semper fulgeat. Ita & Tu, Domine, postquam vires tuas semper sensimus, nunc

vultus tui lucem objicis, quæ animos magna quidem voluptate perfundit, id tamen cum sole commune habet, quod temere intuentium oculos occæcet. Poteras tu quidem, è longinquo res nostras moderari: sed maluisti Te nunc nobis ostendere, ut quanti Tu Musas nostras facias, videamus; Tu quanti nos te faciamus, videas. Tu umbratica nostra studia in tuam lucem producis, quæ non aliunde quam à Te lucem possunt capere. Tu eximio tuo splendore vigilatas noctes nostras illustras, ut jam non solum Ἑγυπτα καὶ ἡμέρας, sed & noctes Atticas polliceri possimus. Quæ latuerunt hactenus pulvere Palladio ingenia, tuâ liberalitate ex arenâ literariâ in aream gloriæ evocabuntur, spes eorum non florebut, verum in præsentia tuâ, velut ad faciem Solis constitutæ excoquentur, & ad maturitatem pervenient. Tu novam aliquam Urbem, novum aliquod asylum, non ut Romulus infamibus quibusvis & depositæ spei mancipiis, sed meliori juventutis flori, sed ingeniis in spem publicam natis aperis, nec tuis solum civibus sed & peregrinis. Et Cives quidem tui in magnâ lucri parte deputabunt, quod nunc possint habere Præsentes suas Deas, Musas, quas non inde ab Athenis Atticis, aut è longinquo, inter sollicita & anxia Parentum vota, & rei familiaris dispendia, domumducere debeant, sed jam domi suæ natas, vernaculas, hospitasque inveniant, novam erigentes in Kilonio Coloniam. Nec enim

nim adeunda illis tot pericula, quot Ulysses quondam subiit, ut diversa hominum noscant ingenia: hîc securi discent honesta sectari, fugere turpia, & populorum mores Historia illis vivis coloribus quasi in tabulâ quâdam depictos exhibebit. Peregrinos autem alliciet jam per tot secula cognita, & nuper ad Moscovitas, Persas & ipsos Indos delata Cimbriæ fama, tum & ipse loci genius, cui nihil eorum, quod trahere hospites possit, deest. Habet Cimbria, vetustas & ab omni ævo celebratas familias, habet tot lato clavo insignes optimates, generosissima pectora, Viros Marte & Arte incomparabiles, qui excelsa animo & magnificentiâ omnia summa, humanitate summâ omnia etiam infima complectuntur, quorum vel sola conversatio & exempla erudire poterunt. Habet Cives denique omnes ad hospitalitatem, & civilitatem quodammodo natos. Habet præterea pulcherrima ista Urbs, Holsatiæ ocellus, commune totius Cimbriæ, nunc Musarum, quoque forum & emporium gratissimos secessus, rura cultissima, nemora suburbana, quæ Tempe quædam dixeris, ut nulla deesse possit occasio, quæ severiorum studiorum intervalla honesto dispungat otio. Adduntur istis sylvis gratissima maris littora, ubi cum Lælio & Scipione post graviores curas conchas legas & umbilicos. Nihil deest eorum, vel toti Regioni, vel huic urbi, quæ Natura, vel ad necessitatem, vel ad suavem vitam homini largiri

potest, ut quæ aliis terris divisa dedit bona, in hanc cumulasse omnia videatur. Quæ cum omnium oculis sint exposita, non opus est meâ commendatione hîc demonstrari. Hæc omnia peregrinos ab omni parte huc vocabunt, ut omnes nova ista civitate donari, & novæ hujus tuæ Urbis dici Quirites velint. Imò Circës quandam fabulam agit nostra hæc Cimbria contrariis virtutibus: Humanitate enim, sua optimisque moribus (quod aliàs sæpe factum) hoc ab exteris impetrabit, ut cum hîc vivere cœperint, aliâ in patria se natos esse obliviscantur. Atque his omnibus id obtines, Serenissime Domine, ut æterna illa fama, quæ Divo Parenti tuo apud exteros crevit, tibi apud exteros altius latiusque excrescat, dum dominascitur; vix intra Orbis fines terminetur, quæ intra Cimbriæ tuæ limites surgit. Nascitur sub Septentrione nostro Musarum mons, novus Parnassus, quem Magneticum appelles licet, (quales sub septentrione montes reperiri tradunt Rerum Septentrionalium Scriptores) ad quem occulto quodam instinctu rapiantur, ingenia literas amantia. Et sanè magnum aliquod de Septentrione nostro augurari soleo, quod mirâ divinæ providentiæ lege semper eò se converterint imperia, cumque Imperiis literæ, quarum connexa fata videntur. Fervent nunc omnium studia sub rigidio isto Septentrione, etiam eâ tempestate, quâ frigere solent omnia: nam calent omnium affectus

fo-

folis tui radiis inflammati. Stat supplex studiosa Juventus seminarii hujus futura seges, Tibique ac Patriæ consecrat studiorum fructus. Illa nunc tota in flammæ honestæ æmulationis & eruditionis abibit: nec ullus illorum est, qui non optimè hîc usurpet, quod Dido pessimè: *Sic sic juvat ire sub umbras*, & per istas Musarum umbras ad æternam Famæ lucem. Nemo illorum tuâ face prælucente, nobis manu-ducantibus longum hoc literarum iter ingredi refugiet: Et quamvis multi viæ pertæsi, statim in ipsa portâ deficient, ut Galbæ cantherius: tuis tamen auspiciis & nostro ductu lubentissimè absolvent. Quamvis multi ingentem illum Oceanum, tot syrtibus scopulisque, tot ingeniorum naufragiis fatale horreant, & in ipso littore moras nectant: multi etiam adeo languido sint stomacho & animo, ut, postquam navem conscenderint, & paululum provecti sint, toti statim nauseent requirantque continentem; tuo tamen fidere afflati, tui Favoris favoniis subnixi, felicissimum demum literarum portum, in hoc Cimbriæ tuæ portu se sperant consecuturos. Et videor mihi videre ex hoc sacrario, tanquam ex Equo Trojano prod-euntes tot Proceres, qui terrarum orbem imperio premant, tot generosâ nobilitate illustres, literarum ornamento jam illustriores, tot Papinianos, tot Galenos, tot in erudito pulvere Archimedes,

Qui totum radio describant gentibus orbem.

Hinc præfectos suos capient Respublicæ, Magistratus Civitates, Judices tribunalia, Cyneas & Nestores Aulæ, Oratores Cathedræ: Absque verò literarum beneficio tot bardos & fungos videas in Republicâ, Strumas in Curiâ, tot Damas & Vappas in Civitate. Nec docta hic solum, sed & armata Pallas erit, poteritque inter ipsas literas succrescere bellator juvenis: quem Philosophus docebit mortem contemnere, quod præcipuum est in Milite, armorum autem usum peritissimi artifices. Novam intra hæc urbis pomæria Romam, novas Athenas reductas videas, cumque iis tot magna veterum nomina. Hic tanquam in speculâ collocati omnia perlustramus secula, per quæ vitam ducimus, non nostris sed mundi annis. Hic quasi in ipso æternitatis gremio, in ipsâ sapientiæ arce sedem nobis sumimus, eo vallo muniti, quo grassanti stultitiæ adspirare fas non sit. Hic de imperio orbis terrarum sedemus iudices, & publicorum Consiliorum arbitri. Hic in ipsos Judices merum illud & magnificum exercemus imperium, leges præscribimus ipsis Legibus, Censores ipsos sub censuram vocamus, & vel sine populi suffragio. Hic utrumque Fortunæ vultum securo spectabimus animo, extra inferioris mundi contactum positi: hic nos ipsos extra nubem contemplabimur, animosque nostros divinarum & humanarum rerum pascemus cognitione; quæ omnia nostris objicientur oculis, nostris claudentur parietibus.

rietibus, nostris occupabuntur calamis. Hic est ille non Martius, sed Musarum campus, in quo acies nostræ contra barbariem & ignorantiam disponentur, in quo, Apollinis nostri præsidio freti, victoriam reportabimus. Et nescio fanè, an non hic agmen ducere debeat Philosophia, cujus auspiciis validissimi in aciem producentur Exercitus. Qui in Errorum caligine versantur, ab illâ lucem accipiunt: illa illustres facit, ejus radiis perfusa mens se ipsam perspicit, ejus ardore incensa pellit ignorantiam, & quæ per cuniculos irrepere vitia. Quod sine sole dies est, id sine Philosophia & artibus liberalibus vita: Tolle illum ex orbe; & induces perpetuam noctem, omniaque in chaos suum relabentur; tolle has ex animis, & spissam induces ignorantiae nubem. Humana meritò vocantur nostra illa studia, quia mores ferinos ejiciunt, nec sinunt esse feros: Divina vocentur, quia homines faciunt, quæ qui spernit, nec humanus amplius est, nec homo. Quot enim in nobis affectus habemus, tot alimus feras, quibus nisi frena imponat Sapientia, in earum formas & mores abimus μεταμορφώσεσιν plus quam Ovidianâ. Liberae sunt & liberales illæ artes, quæ nec Tyrannos metuant, nec faciunt; nec servitutem imponunt, nec subeunt: Ab iis enim libertas est, per eas dominamur; & nobis ipsis: quia Artibus Liberalibus servimus liberè; & aliis: quia liberi per Liberales Artes esse nondum didicerunt;

magni tam servitio, quam imperio Reges. Absque iis verò togata, tunicata & palliata sumus mancipia, & miserrimam servimus servitutem, quodque de Claudio Cæsare fertur, in magnâ vernarum familiâ omnium vernæ sumus. Ne Vitiorum barbaries & Solœcismi nos abripiant, cavebit Grammatica. Illa manu-ductrice operam dabimus, ne præsentis temporis fastu turgidi, præteriti obliviscamur, de futuro securi. Illa eum, qui se plus quam perfectum somniat, ad imperfecti gradum dejiciet, & contrâ ex eo omnibus numeris perfectum faciet. Adversus Sophismata & Strophas muniet Dialectica, & ut rationem vitæ subductam habeamus, docebit: ut si cui præmissas formaverit prudentia, conclusionem non extorqueat fortuna. Si exultantes affectus nostros æqualitate aliquâ temperabimus, Musica exemplo suo docebit: quæ sonos elatos tono humiliore coercet, dura mollibus miscet, mollia duris. Si curvi aliquid in nobis est, corriget Geometria, quæ teretes atque rotundos, id est: Viros Bonos efficiet, quorum animus velut orbis quidam est, qui nec sinu imprimi-
tur, nec angulo excedit. Astronomia animum nostrum quasi Sphæram quandam agitabit, quæ Divinam Mentem pro Sole, Virtutum omnium complexum pro Stellis habebit. Si ad Virtutis lumen nondum confirmavimus oculorum aciem, Optica hæc Solem illum videntem sistit, ad cujus radios cœcutiunt noctuæ,

nec

nec vitii umbram patietur irrepere. Præclara ista omnia sunt & magnifica, quæ non prædico, sed ferè polliceor, velut *μάρτυρ ἐκ Διὸς δέλτων*, & certiora mihi ista sunt auspicia, quam quæ ex alitis volatu, sinistro oscinis cantu, aut extis & fibris pecudum petebantur. Funestas verò illas, arculas & inebras aves, quæ frustra nostra turbare conantur auspicia & malè ominari non desinunt, parum moramur. Quicquid enim obstrepant istæ parræ; quicquid latent Hircaniæ canes; quicquid rudant Arcadiæ greges, quicquid ululent Lycaoniæ lupi, quicquid grunniant Ætoliæ porci, nostræ tamen Academiae sua constabunt fata, omni seculo perennatura. Hæc omnia Te dispensatore, DOMINE, nobis obveniunt bona: Prolixius ille beneficiorum tuorum ordo è munificentissimâ dextrâ tuâ promanat, ut mortalium omnium vivat ingratisissimus, qui non gratam saltem vocem in observantiæ pignus afferat. Ruunt ergo in amplexus tuos Musæ, quarum gaudia, quæ concepere, intra pectoris ripas se non continent, sed in merostriumphos exundant: Et quis sistat tantum votorum torrentem? Omnes ad Serenitatis tuæ gentia provolvimur, & submissas agimus gratias, cui hunc spiritum, hanc vitam, hanc vocem debemus. Omnes Tibi, vitam precamur, & de nostris annis tuis singuli addimus, quanquam immortalem te potius optemus, ita ut nunquam subtraharis mortalibus. Omnes non aliter se su-

osque salvos optant, quam ut te salvum videant, cujus salute se vivere credunt, qui Te magis quam aerem spirant, idque solum vivunt, quod tecum sint, vel coram, vel absentes per animi simulacrum. Devovet se Tibi totam Academia, quæ se dignam tanto Parente sobolem ostendet, cujus licet adhuc messis in herba sit, poterit vel hâc hyeme lactescere, brevi in culmum surrectura. Omnes Deum Ter Optimum Maximum veneramur, ut hæc nobis gaudia velit esse propria, ut in Patriæ immensam utilitatem, ut in perennem sui gloriam cedant, ut Serenissimam Cimbricam domum in perpetua surgere sinat incrementa, non nisi cum Orbe isto finienda. Faxit is, ne Otia nostra literaria, vel temporum injuriis, vel Marte turbentur. Malè enim convenit togæ cum fago, & quantum illa diffundit; tantum hoc rescindit lacinia. Faxit, ut securi tuo vivere possimus præsidio, Domine, qui auream amas libertatem, sed sine Marte ferreo, & velut è portu quieti spectemus alias in sanguinis diluvio eheu! naufragas gentes. Ego vero, qui totus tuus sum, me totum Tibi commendo: Neque enim hic exprimere possum, quantum Tibi debeam: quod dum tento, stupet calamus, hæret lingua, & magnitudine beneficiorum attonita. Te sacro tantum veneratur silentio; aut, si quas ea voces proferre posset, leves tantum, quæ data porta, protrudit gratias. Interim, quamdiu inter homines ero, & hâc

au-

aurâ, non meâ, sed tuâ vescor, tuis audebo rebus, imparem licet, occupare calamum. Æquum enim est, ut quemadmodum me non finit Serenitas tua obscurum, finat & pium esse, ut reflectam ignem, quem perstrictus hausi. Accipies autem non invitus & serena fronte, memoriæ perennis conditores calamos, & gestarum rerum servatores custodesque chartas, unicos thesauros nostros, quos Tibi, ut Domino offero servus. Cum enim omnia debeantur, furtum me facere putarem, si quicquam meum ad te non destinarem.

Prodeat nunc ultimò in conspectum tuum Musa mea; quæ, quia beneficiorum tuorum compedibus se devinctam agnoscit: noluit libero sermonis schemate, sed vinculis metricis ligata coram augusta tua facie comparere. Verum dum ea & pedibus & compedibus suis in tuam tentat ire gloriam, in ipso statim laudum tuarum limine tot invenit, quæ illam morentur elogia, ut si jam in ipsa se conferret penetralia, ceu Labyrinthi cujusdam ambagibus implicita exitum vix inveniret. Videbatur sibi in quodam ÆTERNITATIS delubro versari: cujus valvis hæc auro inscripta verba:

CHRISTIANUS ALBERTUS DUX HOLSATIÆ CLEMENTISSIMUS.

Quæ dum accuratius intuetur, Phœbeo quodam & fatidico correpta furore, quot literas, tot fere sub iis latitare videt oracula, quæ disiectis hinc inde elementis inque alia verba dispositis, quasi numine quodam digitum intendente statim patuere, erantque ista.

LEX, HELICONA STRUIS, MU- SIS DANS SECLA, TIBI THESAURUM.

Mirata illa ipsis etiam literis quædam inesse fata vel omine longè quidem certiora, quam quæ vel sinistræ Jovis manubiæ, vel tripudium solistimum, aut pecudum extrata faciunt: hoc seu Poeticum seu Grammaticum sortilegium sacro quodam silentio summâque cœpit pietate venerari. Nec dubitabat jam amplius, quod prisci Sapientiæ Magistri docuerant, ipsa nomina signa esse rerum, cumque iis occulta quadam ratione connecti: Id autem jam pro certo habebat: uti in Principe omnia, ita & nomen illi sacrum esse, è quo jam plura didicerat, quam si Jovis inspexisset diphtheram. Dum vero ulterius illi immorat, ut hæc de singulis

lis Anagrammatis membris illi carmina
sponte quasi sua properabant ad numeros,
quæ explicarent latentia in illis mysteria:

LEX, LEX, LEX,

TE LEGEM, DUX MAGNE, voco. LEX
viva tuorum es,

Et PRINCEPS isto nomine SUMMUS eris.

Quod corpus sine mente, quod est sine lumine mundus:
Id populus foret, id Rex sine Lege foret.

Quem Regem vocitas, hac Regem Lege vocabis.

Lex regat ut Regem, Rex regat inde gregem,

Et Rex sit Legi, Regi Lex consona: mutus

Rex sine Lege foret, Lex sine Rege foret.

Majestas in Lege sedet: si dempseris illam,

Lex sine Lege foret, Rex sine Rege foret.

Te LEX: Tu LEGEM formas, dicique mereris

LEX, LUX, DUX, Populi MENSQUE

SALUSQUE tui.

HELICONA STRUIS.

Quis tibi Parnassus, quis surgit ad æthera Pindus?

Optime, quem PRINCEPS nunc HELICO-

NA struis?

Stat Mons iste Tibi, quo cælum scandere mentes

Æthereæ possint, sideraque ipse petas.

Stet mons iste Tibi, Cælum hic Tibi fulciat Atlas!

Ætna sit, & flammis æstuet usque novis.

Hinc Tibi surget honos, nobis fortuna: nec istum

Quem struis hic montem, destruet ulla dies.

Dum

*Dum struis hunc montem, Te PRINCEPS MAXI-
ME, magnum
Fortunæ & Famae dicimus esse Fabrum.*

MUSIS DANS SECLA

*Tu Musas, DUX MAGNE, foves, nova secula
nobis*

Efficis, ô secli gloria summa tui.

Aurea fac nobis, fac sint argentea Musis

Secula, ne noceant ferrea secla cave.

Sic mollem trahimus per ferrea secula vitam:

Sic nostro vives munere; nosque Tuo.

*Tu Musis dare secla potes, DUX MAGNE: sed
istæ,*

Quæ dederis possunt reddere secla Tibi.

TIBI THESAURUM.

*Tu Tibi Thesauros, nova nunc Æraria condis,
In sacro Musis Mercurioque loco.*

Sic tibi crescit opum cumulus cum fœnore: Musis

Quas dederis, solas semper habebis, opes.

Persarum gazam spectavit Cimbria quondam:

Nunc Cimbrum spectet Persaque & Indus opes.

Hos pedestris mea Musa, & compedibus
tuis ligata, pedes ad pedes tuos deponit,
ô Sacratissimum Caput: satis quidem intel-
ligens; quam vile illis pavementum sub-
sternat, quibus vel ipsa astra se præbeant
calcanda. Hæc de Nomine tuo carmina

No-

Nomini Tuo offert, Domine, multis illi obstricta nominibus, quæ nullo unquam tempore exsolvet, cui multum accedit nominis de tuo Augusto Nomine Quod Tibi Tuæque Domui Serenissimæ felix sit & æternum! quod sera posterorum memoriâ celebretur, quod Musis nostis, quæ nunc à Tuo Nomine vocari gestiunt CHRISTIANO-ALBERTINÆ per omnia secula extollatur!

De Causis, ob quas multi ad minus solidam aliquam Sapientiam perveniant.

d. 22. Jan. 1666.

*VIRI Munerum Amplitudine, Generis splendore, Doctrinæ laude incluti, Tuque
lectissima Juventutis Corona!*

Dum omnia fervent & perstrepunt mercantium turbis, dum tot merces undique apportatæ emptorum oculos & loculos provocant; commodè temporis hujus solennitatem, quo Mercurii sacra colunt

omnes, nos quoque celebramus. Neque enim Mercatorum tantum, sed & literatorum Patronus audit Mercurius, ut nunc duplici fungi possit munere, & celebre hoc Holsatiæ emporium, sit emporium etiam literarum; nostrisque Musis suæ quoque agantur nundinæ. Non jam inter nummorum tinnitus fileant plectra, non in Pluti domicilio claudatur Phœbi sacrarium, nec solæ tabernæ & mercium promptuaria: sed & Parnassi pandantur penetralia. Cur enim Musis turpe sit mercantium & Nundinarum nomen? cum ipse Juppiter cæterique Dii institores audiant, quia omnia vendant laboribus: Cum ipse Plato, ubi de constituendâ Republica laborat, mercatores non tam eos adscisci vult, qui res corporeas pretio emant vendantque, quam illos, qui animi cultum, scientias artesque honestâ mercede aliis divendant: Cum omnis nostra vita, si Pythagoram audimus, similis sit mercaturæ, nundinasque nunc agat totus orbis. Exposuerunt ergo jam merces suas; vel potius mercedes & præmia literaria, in hoc bonarum artium emporio, in publicis his Parnassis Nundinis, in hoc bonarum mentium theatro Theologi, Jurisconsulti, Medici: Cur ergo nostras hic non publicè ostentemus Philosophi? Nullâ tamen aliâ mercede, aliove pretio, quam quo Dii sua bona, nostra hæc vendimus præmia; virtutem vendimus virtute, cum Virtus ipsa sibi sit pretium solaque merces, ut non tam emptio hæc quam

quam permutatio sit nominanda. Adfunt, nunc SEPTEM EXIMII VIRI, qui à summâ SERENISSIMI NOSTRI PRINCIPIS munificentia exspectant, quæ laboribus suis sibi quodammodo compararunt præmia, quæ mea manu mox tradenda. Cum vero *χερσὶν αἰνέειν τοις* sacra illa tractare non deceat, nec illa sub pallio, vel rustico quodam apparatu tradenda: quædam pro more veteri præfabor, in eo quoque morem imitatus mercatorum, qui cum verbo uno vendere possint omnia, verbis tamen excentis fastidiosè & ad indignationem usque emptorem onerant licitando. Circumspicienti autem mihi commodum argumentum, de quo nunc verba facerem, me rem optimè acturum putavi, si quædam in medium afferrem, quæ nascenti Academia videri poterant oportuna, quamvis scirem me acta, agere, id est, dicere de re tot eruditorum calamis tritâ, & plurimos, quos hæc tangit Oratio, acta acturos, qui publicos & veteres errores, potius errabunt, quod meliora moniti verè sapere velint. Dicam tamen, & clarè dicam, me dicturum de causis, quæ multis impedimento sunt, quo minus ad solidam aliquam sapientiam perveniant. Quæ cum temporihuic & novæ nostræ Academiae sit convenientissima materies, & instans jam merus meridies me brevem esse jubeat, facilem à vobis omnibus & singulis mihi polliceor audientiam.

Cum omnibus omnino, qui aliquem voto-

rum suorum finem consequi contendunt, multi sint exantlandi labores, multæ concoquendæ molestiæ, iis præcipuæ, qui Musarum sacra, & castra sequuntur, agmine quasi factò, tot obveniunt pericula, tot incommoda, tot obstant impedimenta, tot curæ istos ἐγκυκλοπαιδείας circulos turbant, tot moræ *stantes in curribus* *Æmilianos* & studiorum stadia deproperantes meta & palma speratâ excludunt, ut mirum non sit, si multi, non ad studiorum solùm, sed & ipsius lucis tædium detruderentur. Eamus per omnes literatorum classes, excutiamus omnes quercus, omnes laurus, perumpamus omnem Parnassum: inveniemus hic non aureum montem sed arenosum scrupisque confutum: neque jam in antro Corycio dormienti, quod de Hesiodo fabulantur Poetæ, obveniet sapientia. Quantis ambagibus itur in Theologiæ sacraria? Nam (ut de scientia tantum nunc dicam) quanta hic sunt molimina in fundamentis bene ponendis, quibus superstrui possit hæc structura, & antequam pulcherrima, illa Coronis feliciter possit imponi. Perreptanda omnia Orientis Regna: excutienda tota Hellas, tot librorum exercitus in subsidium vocandi: tot vasta volumina pervolvenda, & pene ediscenda: cum tot Hæresium Hydris pugnandum, quibus, quò plura decusseris, eò plura succrescunt capita. De Vita autem ipsa quid fiet? quibus fortunæ nimbis terga subducenda? quanta de nobis ipsis sumenda supplicia,

ut

ut æterna evitemus? quod imperium & plus quam merum exercendum in affectus nostros? quam multa concoquenda stomacho non Spartano, sed Christiano? Interroget jam aliquis Jctos, qui secundi ab istâ suâ Reginâ sunt: an Murcia sternat ad Astræ tribunal? Et eandem illi cantilenam canent. Quam vasta hic omnia? quantum maris æquor orandum? quanta voluminum moles? quanta jurium, quanta factorum rerumque varietas? quibus non tam explicandis, quam enumerandis integrum consumeres seculum, & in quibus ipse Hercules laborem inveniret decimum tertium. Recinenda quoque nobis est vetus illa Amelii querela: Jurisprudentiam multorum camelorum onus esse. Sed adde nunc omnes ex Indiâ elephantos, ex Arcadia asinos, & vix ferrent. Expugnanda horribilia illa Glossatorum agmina, verè Augiæ quoddam stabulum, è quorum fœdibus, quod in Ennio fecit Virgilius, aurum exsculpendum est: ne nunc de infinitis aliis dicam, quæ comitantur eum, qui verum Jctum ipsâ actione & vitâ velit exhibere, qui in hoc turbarum Oceano tempestatibus seculi ubique fere jactabitur. Sed & Medici suos patiuntur manes: Quamvis enim illi inter angustiores humani corporis terminos versari videantur; latius tamen illorum extenduntur limites, quam ii forte credunt, qui ab illorum adytis absunt longius. Eruendi illis è carbonibus suis thesauri, ne dehinc pro-

thesauris carbones inveniant. Perrumpenda totius Naturæ penetralia, atque ex ejus claustris producenda, quæ ad hominum salutem, facere posse videbuntur, infinitæ molestiæ concoquendæ, antequam artis suæ certam consequantur experientiam. Cum Philosophis vero omnium agitur miserrimè, quibus longè augustiora & diffusiora sunt studia: Illis enim non iste solum Orbis pro libro est, & utramque facit paginam: sed ultra illum, extra sidera, extra Solis Lunæque vias, extra omnia, quæ sub sensum cadunt, eundem, divina omnia, & humana perquirenda, ut profecto, qui solidam illorum acquirere scientiam velit, Sisyphi volvere saxum videatur: Adeo hic varia, adeo tricis intertexta, adeo nodis plusquam Gordiis obsepta, non Alexandri cujusdam gladio: sed mentis acumine secandis.

— Hæc quotidie nobis versantur ob oculos incommoda, hæ querelæ in omnibus recinuntur triviis: sed pauci sunt, qui illarum difficultatum causas vel perspiciunt, vel si perspiciunt, magnopere emendare allaborant. Sed video ego hic & exhibeo Tricipitem quendam Cerberum ad fores sapientiæ excubantem: monstrabo omnibus monstrum hoc informe, ingens, quod trium capitalium vitiorum tabe adeo inficit mentes humanas, ut ex eo contagio morbos trahant pene immedicabiles, quibus dehinc alii corripuntur, qui hætenus purioris Sapientiæ sunt cultores. Quare velim unusquis-

quisque tam foribus & Limini Sapientiæ præfixum, quam menti suæ infixum habeat vetus illud: CAVE CANEM, & quidem TRICIPI-TEM. Atque utinam hic aliquis reperiat — Hercules, qui Cerberum hunc, ab inferis productum, eò catenis ligatum remittat. Nos certè annitemur, ut tria ejus capita, tribus orationis capitibus amputemus.

Primum Capitale vitium est, cum quo colliditur hæc mea Oratio, vocatur IGNAVIA, feralis omnis Sapientiæ, bonæ mentis, omniumque Academiæ pestis; Quam, uti multæ scelerum sunt viæ, duplicem facio, *Otiosam & laboriosam*. Quod mirum forte nonnemini videbitur, qui inter otium & ignaviam non aliud discrimen admittet, quam est inter Maronem & Virgilium, aut inter ensen & gladium, tantam autem putabit labori cum ignaviâ intercedere discordiam, *Lupis & agnis quanta sortitò obtigit*. Sed si illi rem omnem rectius intueantur, facile videbunt paucos esse, qui ita Murcia se totos manciparint, ut in nihil agendo subsistere illorum animus possit, si animum tamen habere dicendi sunt, qui ne minimum quidem ejus sensum habent; sed qui potius in ipsâ suâ ignaviâ strenui sunt nequitia Heroes. Monstro enim simile esset reperiri hic tale aliquod monstrum vel belluam, qualis illa apud Indos, cui PIGRITIÆ nomen indiderunt Lusitani, quæ lento ventris adipe humum verrens nunquam in pedes surgat, cui si fustes im-

pingeres vel totam contunderes, nihil aliud effeceris, quam ut ingenio suo tardam artificio tuo reddas tardiores. Plurimi potius ita sunt animati, ut quemadmodum multi operam dant, ut cum ratione insaniant: ita isti, ut in summâ ista ignaviâ videantur laboriosi. Est quoddam Hippocratis oraculum: *Κόποι αὐτόματοι φεράζουσι νόμους* lassitudines ultrò obortæ morbos arguunt. Quis vero non credat morbos trahere mentem ad bonarum artium studia nauseantem. Quis dum pigritiæ veteris adeo sepultos videt omnium animos, non morbum tantum, sed & fata literarum summa instare auguretur? quibus istam Parasiti Terentiani naniam pene occinas:

*Exsequias bonis literis quibus est commodum ire,
benè tempus est!*

Apparent sanè nonnunquam sub studiosorum nomine, planè eo indigni: sunt in illorum numero Numeri, Ventres, Plautinæ Familæ homines, Terræ filii & in Voluptatum cœno se volutantes Scrofæ & Suilli, folles Epicurei, otio somnoque diffuentes Stertini, Veri Antipodes, quibus dies somno, nox comessationibus consumitur, quibus ego quosvis cerdones meliores æstimo. Heroes illos Tricongi-os dicas, Conviviorum nautas & poculorum remiges, qui non uno aliquo mense, sed integro anno & seculo sua celebrant Saturnalia & calicum Quinquatria, qui malunt bibendo quam loquendo græcari, & quibus ipsum vi-
vere

vere nihil aliud est quam bibere. Nihil illi sub pectore aceti habent, nisi quod fortè illic è continuo vini haustu residens acorem quendam, contraxit. Nihil illi aliud, quam *μυσπολεῖν* (ut pulcherrima Hesychii in re turpissimâ voce utar) didicerunt. Quæ furda Parentum nomina dixeris, cum malè audiant, nisi clarè satis, si non de die, saltem de nocte audiri velint. Ne enim aliquis silentio Pythagorico illos obstrictos credat, non illud io Pæan! sed Eleleu & Evohe suum eructant, ut vastiori gutture, vix clamarit à Diomede vulneratus Gradivus Homericus; qui tamen novem & decem milium pugnatorum clamores voce horrendâ exæquavit. Ranarum vitam illi vivere videntur, quæ quò magis bibunt & in humido vivunt, eò magis coaxant, suumque illud κεκκεκῆξ ingemnant. Militant quoque sub Ignaviæ vexillis, Venerei nepotuli & Sardanapali quidam, qui laxatis cupidinum frenis, per omnes assiduè ganeas bacchantur. Sunt qui se credunt ludo lusuque posse inclarescere, *si regna vini sortiantur talis*, qui nunquam manus de tabula vel chartâ lusoriâ tollunt, in quâ perpetuos suos triumphos agunt. Sunt qui turpissimâ quâdam vitæ securitate omnia præterita, instantia, futura pari oblivione dimittunt, nullo consilio vitam exigunt & semper se ipsis fiunt deteriores. Sic teritur tempus, perduntur sumptus, & quod omnium optimum maximum est, bonus animus, & in primâ hâc &

tenerrimâ ætate mille modi addiscuntur, quibus jucundè pereatur. Hinc consumpto maximam partem patrimonio, quod ex ejus quasi naufragio enatavit, vix pro tolerandâ vitâ sufficit, ut sæpissime ad incitas & mendicitatem redigantur jam fero nimis parci. Hinc fit, ut nunquam seriò studiis incumbant vel assideant, quorum cupiditas volat, animus pendet, ignorantia vero stat firmis impacta radicibus, aut si ingenii promptitudo nonnunquam compensat defidiam, ἐφύμερος quædam in illis gignitur scientia, quæ cum die & oritur & occidit, ut Cadmæis istis militibus uno die natis, armatis & truncatis non sint absimiles. Eos noctu nitentes cicindelas dicas, quæ ad clarissimam solis lucem evanescent. Statue eos ad ipsam Sapientiæ lucem, nocturæ erunt, nec ferent istos radios. Fac conversentur cum doctis, & omne id quod ibi geritur, non aliter spectabunt, quam Tamyras vel Tiresias Apellistabulam, aut statuam Polycleti. Quis vero ingenuus ferat hos Bæotiæ colonos & vervecum è patria cives? Meliora certè de vobis sperare possumus juvenes Optimi, qui hætenus cane pejus & angue fugitis illam pestem. Ne patiamini ista carcinomata pulcherrimo nostro insidere Corpori, ne, quod ait Persius, *fibris increseat optimum pingve*, ne menti vestræ fiant insidiæ, aut ullum vobis ab illis sit periculum. Dum enim inter vos illi erunt, facilè aliquos vestrum in suas partes trahent, quod illis tam

est

est in proclivi, quam agnorum gregem quò velit ducere, facile est verveci sectario. Quam verò pulchrè pendebunt tum turdi illi, qui ab hac Voluptatis transfennâ escam petunt! Fugite hanc voraginem, hunc hiatum, in quo tot periere Curtii. Non tam ad Medusæ, quam ad Voluptatis adspectum exhorrescite, O Juvenes: Cum enim illa adspectu suo in lapidem mutare feratur homines; hæc pessima Siren vel lapides in ceram emollit, adeò ut rigida etiam Virtutis pectora, quibus robur & æs triplex circumdatum credas, cerea sint in quodcunque flecti nequitia genus. Quibus vero Ignavia & Voluptas animum semel obsedit, ii jam omnes honesti fines transfierunt, ut vitia semper succedant vitiis, & facto agmine Virtutem omnem expugnent. Quemadmodum enim, si ab alto monte deturbes saxum, primò quidem illud lentè movetur: at impetu semel dato, per præcipitia fertur, nec ulla vis sistitur: Sic qui ab optimo illo Virtutis statu in Voluptatis declivia semel motus, repente in deterrimum potest evadere. Quod si vero Otia amatis, amate literas, quæ vera animis nostris dant otia, ut & Græcis locus ille, in quo ista studia pertractantur, ab otio nomen inveni-
nerit. Paradoxon vos docebo: Solam Ignavi-
am esse laboriosam; Virtutem vero, Diligentiam,
studia literarum pulcherrimum fovere otium, & sum-
mam in iis esse animi quietem. Quod si ægrum
lecto affixum videmus, eum in otio versari, &
quam

quam maximè quiescere & pigrum esse facile omnes credimus: cum tamen *laborare* ille dicatur, & verè quidem: Nam vel ipsa illa molestia, corporis cruciatu & suâ patientiâ fatigat, & fatigatur. Et quid magis potest esse laboriosum quam ferre miseras, quas necessario parit animus nullâ Virtutis luce illustratus & otiosus, qui vel in eo fatagit & laborat, quod ignavissimum ventrem, in quem totus pene concessit, sustineat & circumferat.

Quemadmodum vero corpus animo est ignobilius; ita & morbus ignaviae & luxuriae corpori potissimum & ventri suos debens natales levior est, præ capitali isto solius animi morbo PHILAUTIA, qui ideo gravior est, quod medicinam propter animum corruptum non admittat; ignavia autem ab animo nonnunquam possit admittere. Alterum hoc Cerberæ caput est, alterum Capitale vitium, quod eò magis perniciosum est, quo illud occultius se ingerit perque cuniculos in animos irrepit. Quo contagio semel infecti doctorum animi, se jam super omnem eruditionem evectos Sapientiae regnum occupasse credunt, cum tamen sub affectato Sapientiae titulo ignorantiam aliquam splendidam invehant. Hi cum è fontibus Castañis tanquam canis è Nilo biberunt, & Oceanum literarum tam facile emensut Hercules in poculo: cum Disciplinas uno forte in compendiolo omnes non adeò didicerunt, sed vorarunt; cum pugno Dialectices se

se percutere & Rhetorices palmâ alios depal-
mare norunt, id est: cum oris dicacitate quâ-
dam & argutandi promptitudine in fortuitam
aliquam sapiendi excreverunt audaciam; tunc
illos tantos in simpulo fluctus movere videas,
quales non rerum pater Nereus in toto Ocea-
no. Non profecto mirum est, si isti in tantis
tenebris tam multa turbent, & qui duces illos
sequuntur, in magnis versentur erroribus.
Continuo enim, qui ab unica illâ veritatis & sa-
pientiæ viâ declinant, in partes scinduntur va-
rias, atque ex rursus in partes alias, quæ ita
inter se implicantur aliosque implicant, ut ci-
tius in Cretæ labyrintho exitum, in Gordio
plaustro lorisque caput, in Cimmeriis tene-
bris lucem, in Scyllæ & Charybdis æstu tran-
quillitatem invenires quam hic veritatem, aut
quod pectus possit satiare. Hinc tot strigosis
& macilentis quæstionibus tempus teritur, quæ
ipsa dehinc explicatione operosâ fiunt impli-
cationes, ut quò quis ingeniosius ineptire pos-
sit, eò majorem Sapientiæ laudem reportet. In
quamcunque te vertas partem, occurret tibi

Pergula Pictorum, veri nihil, omnia ficta.

Disputatur, dubitatur, concluditur: Unus ait;
alter negat; alter deliberandum censet. Ca-
nuntur classica, pugnatur, bella geruntur de
re nihili plus quam civilia; quibus evenit sæpe
quod apum præliis, ut

*Hi motus animorum, atq; hæc certamina tanta
Pulveris exigui jactu compressa quiescant.*

Theatrum aliquod dixeris unum talem hominem, qui tot vanissimas intuetur imagines, atque illis pascitur, ut solus turbam facere possit, similis Abydeno isti,

Qui se credebat miros audire tragædos,

In vacuo solus sessor plausorve theatro.

Similes istos dicas illi apud Euripiden Alexandro, qui pro Helenâ inanem Helenæ effigiem rapuit, vel pueris, qui puppas & mutas effigies pro rebus ipsis sectantur. Quin Ixionis aliquam fabulam ludere mihi videntur. Ut enim ille pro Junone nubem amplexus Centauros fertur genuisse: Sic isti dum pro solidâ sapientiâ inanem ejus speciem amplexantur, nihil animo nisi mera monstra concipiunt. Ut ille radiis rotæ districtus pendensque sine fine circumagi fingitur: ita hi vano labore suspensi & nusquam mente consistentes, dum in istâ rotâ altius volunt eniti, semper relabuntur in priora, manifestâ cerebri & mentis vertigine. Ferenda esset hæc infania, si intra privatos parietes delitesceret, si in Scholastico pulvere tantum reperet; Sed in lucem quoque ire audet & in secula. Nec eo contenti sunt temerarii illi, quod hirundinum more, quicquid in buccam venit, garriant; chartis illinenda sunt somnia illa & somnurnæ imagines: nec tot fungi nascuntur unâ pluviâ, quot libri nunc uno die. Quemadmodum nulla apud Judæos olim Virgo, quæ non mater esse cuperet: ita & nostris scriptoribus intolerabilis planè res est Vir-

gi-

ginitas. Omnes virginem chartam perdere, inque illam è mentis utero, nullâ obstetricante Minervâ, abortire gestiunt. Comparare, illos possis tenuioris fortunæ hominibus, qui adeo abundant liberis, ut cum egestas illis paterna subvenire nequeat, cibum ostiatim quærant: Ita homines isti in summâ tenuitate ingemii longè plurimos tamen animi fœtus edunt, quos cum Typographi ægrè foveant & educant, vulgo passim obtruduntur. Hæc cum perpendo, dubitare mecum soleo, an gratiæ debeantur Germaniæ nostræ, quod prima hanc artem invenerit: Ex quo enim plumbei isti apud literatos dominantur typi, plumbeum, ex ferreo factum fuit seculum & plumbea stupidaque capita tot plumbea extuderunt monumenta. Quibus si Lectores vel Emptores forte accesserint, pro thesauro non nisi carbonem inveniunt, quos chartis ille vit Typographus. Premitur totus fere orbis istis Typographorum prælis, & quemadmodum Tarpeja quondam scutis oppressa: ita nunc Veritas, decumanis istis libris, quibus velut scutis & clypeis defendere se debebat, comprimitur & opprimitur. Ingrediatur nunc aliquis librariam officinam cum lucerna Diogenes, & si olim in maximo hominum cœtu non homines invenit, sed sterquilinia; nunc inter vastissimas librorum moles meram inutilium & futilium, verborum colluviem inveniet. Lupanar aliquod ingredi mihi videor, in quo tot se offerant

rant venalia prostibula, titulos quidem inveni-
ens, sed desiderans libros. Plurimi ex se
gignunt, ut aranæ: Pauci mella è floribus col-
ligunt, ut apes. Illi quam felicissimè monstra
sua, non imploratâ Deâ Nixiâ in lucem protru-
dunt: Hi inter acutissimos dolores pulcherri-
mos fœtus ægrè enituntur. Illi in modum Ca-
nis festinantis cœcos pariunt catulos: Hi more
elephantæ per decennium & amplius fœtum in
utero gestant, usque dum omnibus numeris
absolutum edant. Non tot Autumnus de ar-
boribus dejicit folia, quot chartarum folia mit-
tunt Autumnales istæ in Germaniâ nundinæ,
non tot veris tempore renascuntur, quot in
vernæ nundinis prodeunt folia. Sed folia!
ventosis verborum foliis agitata, grandes in
folio & à foliis libri, sed fructuum admodum
parci. Sed unde remedium isti malo quæren-
dum? Conclamata hic quidem res erit, nisi in
ipsis statim primordiis obviam illi eatur.
VERITATEM sectemur, illam nobis pona-
mus ob oculos, sic in opinionum labyrinthos
non delabemur: ad illius pulchritudinem fa-
cile expallescet aliorum scriptorum fucus. Pul-
cherrima quidem Divæ istius facies est; sed E-
ruditi, vel ut rectius dicam, Sophistæ, qui vel
ebur atramento candefaciunt, eam atramen-
to defœdant & calamis compungunt: Sepiæ
Pisci illi sunt similes, quem ajunt effuso atra-
mento aquam turbare, ne videatur & capiatur:
ita illi tenebras & nebulas sibi offundunt, ne
de-

deprehendatur in iis sub superbâ aliquâ scientiâ latens ignorantia. Sed quis mihi, dices, Veritatem è profundo suo eruet? Erues, si seriò rem geras. Fabula tibi hic quædam quasi cum Proteo agenda, cum quo veritas quodammodo comparari potest. Qui veridicus quidem est:

—— novit namque omnia Vates,
Quæ sint, quæ fuerint, quæ mox ventura trahantur;

habet tamen suas infidias vultque abscondi: nam,

Omnia transformat sese in miracula rerum
 Tu vero — *somno aggrediare jacentem*
 Vim para, & fortius illum prensa, ne elaboratur:

Nam quantò ille magis formas se vertit in omnes

Tanto, nate, magis contende tenacia vincla
 preme iterum iterumque. Sic

—— *cum nulla fugam reperit fallacia, victus*
In sese redit —

& palam eloquetur omnia totumque pandet negotium. Ut verò expeditius in eo negotio verferis, velim artem prius discas, quæ priora illa re dediscere doceat, aut largiore aliquo Lethæi fluminis haustu saburram vanissimarum cogitationum ex animo eluas.

Tertiam jam expedio securim tertio capiti, quod DISCORDIAM voco, vix absque armata manu impugnandum. Horridum e-

nim est cataphractum, pro lingua vibrans siccam tetricoque aspectu fulminat.

Dii talem terris Cimbris avertite pestem!

Hæc sive juvenum se ingerat animis, sive Doctorum se subselliis immisceat, sive aliunde obveniat, semper turbas movebit, semper destruet & diruet, mutabit quadrata rotundis, sursum deorsum vertet omnia, Hactenus hæc quidem in omnibus Academiis audiuntur querelæ: Castra immigrasse in Academias, nec jam amplius Musis, sed Marti litari, plusquam militarem dominari apud omnes licentiam, quæ quidem non falso ita spargi, sæpius dies docuit, & tristissimi casus. Non puto incognitum esse, quam sæpe propter studiosorum tumultus, Academiæ funditus sint subversæ, neque enim ex Africâ tantum (quæ semper aliquid monstri peperit) sed vel ex ipsâ nostra Germaniâ hæc exempla peti poterant. Nobis adhuc pacata & tranquilla sunt omnia, & quæ magna felicitas nostra est, etiam in ipsis his nundinis. Nam & meliora nobis ab indole vestra pollicemur, Optimi Juvenes, quam ut illam infra has sordes velitis abjicere, & porro speramus. Probe meministis non bene misceri pulverem literarium & arenam gladiatoriam: loca Musis destinata ab otio & tranquillitate nomen invenisse; Musas ipsas feminas imbecilles fingi, quibus cum plectris tantum res est, non verò cum hastis vel gladiis, quæ Castaliis quidem fontibus, nullo verò sangvi-

ne tinguntur. Si qui hic asperi erunt Morychi & rixosa capita, illi potius ad Antipodes eant, qui nobis obversos habent pedes, ne hic capita inter se collidantur, vel ad Thraciæ urbem, *πονηρόπολιν*, vel cum ista barbarie suâ ad ipsos barbaros. Quid nostro Ordini objici possit, non video: nam tanta hic animorum conjunctio, tanta morum facilitas, honestissimaque æmulatio, quæ omnem invidiam, omnes similtates excludat. Non erunt inter nos, qui latronum truculentorum instar grassantur per æternitatis semitam, quique in latissimâ illa viâ progredi non possunt, nisi in alios arietent, vel planè eos de gradu dejiciant. Longè aberit à nostris sacris hoc hominum genus, quod Nigrum vocat Satyricus, quos iis similes dicas, qui sepia atramentum lucernæ addunt, ut ii, qui forte circumstant, continuo videantur Æthiopes: Pari modo illi famæ sui luci quandam calumniarum fuliginem immiscent, ut soli suâ luce splendeant, reliqui verò omnes appareant Nigri. Quare præclaro & prudenti profecto factum est consilio, quod Pacem habeamus inter symbola nostræ Academiæ, quod nobis ut tutelare aliquod numen colatur. Illa tranquillitatis mater, securitatis clypeus, publici boni radix, præclara virtutum nutrix: illa vinculum erit, quo colligabuntur hujus corporis membra: illa anima erit, quâ spirabit, quam si dempseris, vivum erit cadaver, vivum quidem; quod sibi vivant singuli; cadaver.

quia reipublicæ vivere defierunt, & ab illa compage, sine quâ salva esse nequit, singuli recesserunt.

Verum jam satis nos debellando hoc monstro; me dicendo; Dnn. Auditores, audiendo; vos vero Dnn. Candidati, jam dudum vincendo credo esse fatigatos, ut mihi de fine Orationis & de auditorum tædio evitando circumspiciendum: Vobis autem Triumphatoribus laurus imponendæ. Non inter Vacunæ aut Martis potius, quam Musarum alumnos vos numerari voluistis. Non fuere inter vos Metii, qui sibi ipsis visi pulcherrimi, non Narcissi, qui suam in Castalio fonte imaginem perditè amarint. Vos istos Euripos artium feliciter estis emensi, Omnes angulos Parnassi scrutari didicistis. Vos jam in rerum causas perrupistis, nec causando moras ullas vobis fecistis. Vos *infiniti* immensitas non coniecit in tædia, non in *vacuo* egistis supervacua. Non *locus* vos pertraxit in devia, nec in *loco* vobis desipere dulce fuit, quos jam sapientia facile primo *loco* numerat. Vos ita *temporum* momenta expendistis, ut *præterita* ne ceteretis *futuris*, omni rei & negotio literario *præsentes*, in *tempore* omnia ageretis, *tempori* obsecundantes, quantum licuit per *æternitatem*. Omnia denique ita egistis, ut vobis bonis & strenuis Parnassi nostri Quiritibus jure quodam debeatur ista laurus, quam mox vobis sum impositurus.

Antequam vero idâ me fieri possit, prius sum-

summus APOLLO noster Lauriger REVERENDISSIMUS ET SERENISSIMUS PRINCEPS compellendus. Cum verò is vices suas cesserit, Viro Admodum Reverendo & Amplissimo DN. CHRISTIANO KORTHOLT SS. Theol. D. & Prof. celeberrimo, nunc ad Te mea convertitur Oratio MAGNIFICE DN. PROCANCELLARIE, eâ quâ par est observantia, totius Collegii Philosophici nomine rogans, uti septem hos Reverendos & Eximios viros, quorum nobis satis perspecta & explorata Eruditio, DN. HENRICUM Störning / Pastor. ad æd. S. Spirit. DN. LAURENTIUM FRISIUM, Pastorem Bredensem. DN. JOHANNEM Schymied / Pastor. Birtensem. DN. JOHANNEM MAURITIUM, designatum Pastorem Hustroppensem. DN. CASPARUM URSINUM Islebensem. DN. DAVIDEM HARBERDING Rostochiensem. DN. JACOBUM DORNKRELLIUM Lunæburgensem, publicè Philosophiæ Doctores, quos Magistros vocamus, creandi & renunciandi potestatem concedas. Quod insigne beneficium tam totum nostrum Collegium, quam ipsi hi Candidati gratisimo agnoscent animo, qui omnia sua obsequia & officia sanctè pollicentur.

RESPONSIO DN. PROCANCELLARII.

Speſtabilis Dn. PRO-DECANE.

Proſpero fato accidere reor, ut e veſtigio, quo iſt-
hanc reliquit Medicus cathedram, tu conſcendas

eandem Philosophus. Medicinam quippe & Philosophiam sorores esse dixerunt quidam Sapientes, alteram corporis, alteram animi conservatricem. Et est revera, quemadmodum Medicina Philosophia quædam corporis, sic Philosophia medicina animi: Dum non tantum mentem humanam inscitie rubigine exuit, & jucunda mirabilium rerum cognitione imbuit, verum etiam appetitum in ordinem cogit, evulsis vepribus sentibusque inordinatorum affectuum, ut secum ipse homo in gratiam redeat, ut & domi quisque bene vivat, & publicæ tranquillitati consulat. Taceo, ex alio insuper capite cognatus sibi esse Medicinam ac Philosophiam, ob insignem videlicet usum, quem altera præstat alteri. Etenim artem suam Physicæ quodammodo subordinari, eique & subiectum (ut in scholis loquimur) & principia referre accepta, Medici non negant. Unde Galenus neminem Medicum agnoscit, nisi eundem Philosophum; & in curando dicit aberrare, quicumque aberraret in cognitione rerum. Quanquam id peculiare non sit Medicinæ, quod à Philosophia suo quodam modo dependeat. Sane & Jurisconsultus, cum de ratione legum, quæ earum est anima, quæque sola dissidentium interpretationum arbitra, quæritur, non nisi ad sacrum hoc asylum confugit. Quinimo, si de Legibus, non modo interpretandis, sed, quod magis est, rogandis aut abrogandis agatur, hinc oracula petenda & expectanda erunt. Et licet Theologiæ non æque dominetur Philosophia, ut Leges ei, quemadmodum Juris peritiæ & arti medendi, præscribat, optime nihilominus & de ipsamet meretur, quando modum rectè tractandi res divinas, easdemque legiti-

ti.

time docendi, & adversus hostes, qui magnis animis, neque nullis instructi armis, sepe agmine facto irruunt, valide defendendi suppeditat, adeoque nobile perquam servitium summæ illi & sanctissimæ disciplinarum præstat. Equidem non desunt hodieque, (uti defuere nunquam) qui,

*Verecun in Patria carassoque sub aëre
nati,*

honestissima sapientiæ studia superciliose despiciant, eademque Juventuti reddant suspecta; optantes nimirum omnes sibi esse similes, ut communibus ignorantie tenebris ipsorum inscitia involuta mortales lateat, justamque reprehensionem effugiat. Bonum interim factum, quod Philosophiæ dignitas à fece hominum & ultimis Mysorum minime dependeat, neque stulta & stolidi eorum, qui cerebrum in calcaneo gerunt, ipsa curet judicia. Certe nova huic nostro Athenæo non possum quin eo etiam nomine gratuler animus, quod Philosophantes Musas adeo experitur propitias, ut etiam in præsens, ubi primum augustiora ejus solenniter exercentur Privilegia, ipsi septem publice se nobis sistant Viri eruditione insignes, ob sedulam sapientiæ bonisque scientiis navatam operam, testimonium ac præmium suorum laborum petentes & expectantes.

Quos quidem ut tacito quodam applausu, sat scio, excipiunt, quotquot adsunt omnium ordinum spectatores: ita, ne diutius capeffendorum Βεγαβείων Spes ipsos ac desiderium detineat; autoritate S. Romanæ Cæsareæ Majestatis, jussuque & voluntate Reveren-

diffimi Serenissimique Principis ac Domini, Dn. CHRISTIANI ALBERTI, Electi Episcopi Lubecensis, Haeredis Norwegiae, Ducis Sleswigae, Holsatiae, Stormariae ac Dithmarsiae, Comitum in Oldenburg & Delmenhorst; Academiae nostrae Rectoris Magnificentissimi, Domini nostri Clementissimi; Tibi, Amplissime & Consultissime Dn. DANIEL-GEORGI MORHOFFI, Philosoph. & U. J. Doct. Eloquentiae ac Poëseos Professor, Pro-Decane item nunc & Promotor Spectabilis, Ego permitto, ut praesentes illos Reverendos Eximiosque viros, HENRICUM nempe Störningi ad eadem Spir. S. apud nos Pastorem, LAURENTIUM FRISIUM, Pastorem Bredensem, JOHANNEM Schmiedt Pastorem Birtensem, JOHANNEM MAURITIUM, designatum Pastorem Hustropensem, CASPARUM URSINUM, Islebiensem, DAVIDEM HARBERDING, Rostochiensem, JACOBUM DORNKRELIUM, Lunaburgensem; ut, inquam, MAGISTROS sive DOCTORES PHILOSOPHIAE recepto more ac solenniter illos renuncies, simulque ipsis tribuas omnia Jura & Privilegia, quae summo isti in Philosophia gradui quaeque ratione adhaerent: cetera DEum orans ac venerans, ut, qua jamjam ornabuntur praesentes Dn. Candidati, dignitas illa, ille novus titulus, cedat cum primis in ipsius Numinis gloriam, Ecclesiae reiue publicae emolumentum, & majorem Universitatis nostrae Splendorem; Dnn. autem Magistrandis non modo honorificus sit, verum etiam salutaris!

CONTINUATIO DECANI.

Ego vero tam Reverendissimo & Serenissimo
PRIN-

PRINCIPI, RECTORI ET CANCELLARIO
nostro MAGNIFICENTISSIMO, quam Tibi
Magnifice Dn. PROCANCELLARIE, Colle-
gii universi nostri nomine gratias ago habeo-
que, quas concipere possum maximas, pro
clementissimè & benevolè concessâ illa pote-
state, quâ mox, more usitato, defungar, si vos
Dnn. Dnn. CANDIDATI solenni jurejurando,
præeunte verba Ministro publico, tactisque
sceptris prius vos obstrinxeritis.

FORMULA JURISJURANDI.
Minister publicus Ad DNN. CAN-
DIDATOS.

Vos Dnn. Candidati Philosophiæ, an-
tequam promoveamini in Philosophiæ
Magistros & Doctores jurabitis:

Quod Serenissimo PRINCIPI RECTO-
RI ET CANCELLARIO hujus Academiae
MAGNIFICENTISSIMO debitum cultum
& honorem deferre; Quod Academiae Ki-
loniensis & Facultatis in eâ Philosophicæ ho-
norem, & commodum ad quodcunque ho-
noris evecti fastigium, quærere & promo-
vere; damna vero avertere: Quod deni-
que ita vos in doctrinâ & vitâ gerere velitis,
ne quid dedecoris inde vel Academiae huic
inclutæ, vel Facultati in eâ Philosophicæ ac-
cedere possit: SIC VOS DEUS ADJUVET!

CONTINUATIO DECANI.

Ergo quod cedat in summi Numinis gloriam, quod Ecclesiæ, quod Reip. quod Academiæ huic salutare: Quod denique ipsis Candidatis felix faustumque sit. Ego DANIEL GEORGIUS MORHOFIUS U. J. D. Eloq. Et Poet. Professor Ordinarius in hoc actu Prodecanus & Promotor Te

Dn. HENRICUM *Störning* / Kilonio-Holsatum, & in Patriâ Pastorem ad æd. Sp. S.

Dn. LAURENTIUM FRISIUM, Abela-Holsatum, Pastorem Brendensem.

Dn. JOHANNEM *Schmied* / Pastorem Birtensem.

Dn. JOHANNEM MAURITIUM, Tondera-Holsatum, Designatum Pastorem Hustropensem.

Dn. CASPARUM URSINUM, Islebiensem.

Dn. DAVIDEM HARBERDING, Rostochiensem.

Dn. JACOBUM DORNKRELLIUM, Lunæburgensem.

adeoque vos omnes & singulos, Philosophiæ Doctores, five Magistros, creo, creatos renuncio & publicâ voce proclamo, talesque vos ab omnibus haberi & salutari volo, in nomine Sacrosanctæ Trinitatis Patris, Filii & Spiritus S. Confero vobis item omnia illa jura & privilegia, quæ gradui isti ac titulo, tum de jure & consuetudine communi, tum speciatim vigore diplomatis Cæsarei sub nuperam Academiæ hujus nostræ inaugurationem publicati, sunt connexa.

Nunc ad ritus illos, quos ad splendorem solennitatis Antiquitas addidit accedo. Ac primum quidem vos *in cathedram hanc superiorem voto*, ut intelligatis, vobis docendi & disputandi potestatem jam publicè esse concessam. Hic murus, quamvis ligneus, pro veritate vobis esto aeneus. Sed hic librorum egetis subsidio, sine quibus nihil solidi agitur in studiis. *Aperio* hos libros, ut discatis, nec vestra tantum somnia aliis propinetis. *Claudo* iterum, ut sciat, ipsique non tam in libris, quam libri sint in vobis, & ut fiatis ipsi librorum receptaculum & Bibliotheca ambulans. *Pileum* vobis impono, quod libertatis est symbolon. Liberi sunt Sapientes (nostis Stoicorum effatum) stulti soli serviunt. Quemadmodum vero ille non alatus (neque enim Mercurii galerus est) ita monet, ne vos Dædaleis Eruditionis alis extolatis. *Annulum* digitis vestris impono, cujus interventu matrimonia firmari solent. Capite
er.

ergo hunc annulum pronubum, quo Philophia
se vobis

Connubio junget stabili propriamque dicabit.

Hos amores, ut eò certiores sint, hoc *amplexu*
obsigno, quo admonemini, ut discordiam,
quæ errorum mater est, fugiatis, concordiam-
que potius amplectamini, quo arctis collige-
tur Sapientiæ Unio. *Faces* demum vobis præ-
ferri vidistis, quibus monemini, illustrem vo-
bis porro vitam agendam esse, quæ aliis suo
exemplo prælucere, & vobis ipsis ad gloriam
faces præferre possit.

Quod superest, Deum T. O. M. submissè ve-
neror, ut novos illos honores proprios vobis
esse sinat & auspicator, is vestra studia & confi-
lia eò dirigat, ut ex honore hoc vestro magnum
nascatur Academia huic ornamentum, ma-
gnum Ecclesiæ & Reip. præsidium. Reliquum
jam esset, ut recens creati Magistri nostri speci-
mina quædam publice eruditionis suæ ede-
rent: Sed cum illustris auditoris patientia diu-
tius non sit protrahenda: tu tantum nunc, Re-
verende & Clarissime Dn. M. HENRICE *Stör-*
ning / tam nostro quam publico o-
mnium nomine solennes
gratias agito.

PA-

PANEGYRICUS

IN

NUPTIIS AUGUSTISSIMIS
REVERENDISSIMI & SERENISSIMI PRIN-
CIPIS ac DOMINI,

DN. CHRISTIANI
ALBERTI,

Postulati Coadjutoris Episcopatus Lubecensis,
Heredis Norvvagiæ, Ducis Schlesvvigæ, Hol-
• satiæ, Stormariæ & Dithmarsiæ, Comititis
in Oldenburg & Delmenhorst/

Domini sui Clementissimi,

Rectoris Magnificentissimi,

ET

SERENISSIMÆ PRINCIPIS ac DOMINÆ,

DN. FRIDERICÆ

AMALIÆ,

SERENISSIMI ac POTENTISSIMI REGIS
& DOMINI,

DN. FRIDERICI III.

Daniæ, Norvvagiæ, Gothorum, Vandolorum
- Regis, Ducis Schlesvvigæ, Holfatiæ, Storma-
riæ & Dithmarsiæ, Comititis in Olden-
burg & Delmenhorst/

Domini sui Clementissimi

FILIAE,

Principis ac Dominæ suæ Clementissimæ,

publico Universitatis Kiloniensis nomine dictus

Mens. Decembr. 1667.

PRO-

PRORECTOR
ACADEMIÆ KILONIENSIS,
CHRISTIANUS
KORTHOLT,

S. Theol. D. ejusdemque Professor
Ordinarius, & Facultatis suæ hodie
Decanus,

LECTURIS SAL.

MUSÆUS, Poëta elegantissimus, Le-
andri & Herûs describens amores,
pro infaustis minimeque durabilibus
earum plangit nuptias, quod nullis
celelebratæ fuerunt tripudiis, nullis epithala-
miis condecoratæ.

ἦν γάμου, inquit, ἀλλ' ἀχόρευτο, ἔην
λέχτο, ἀλλ' ἄτερ ὕμνων,

ὅδ' ἐ πολυσκάρθμῳ τις ἐπ' ἐσκήρηνσε χορείῃ.

Scilicet mos est jam inde ab antiquo, idque
terrarum ubique receptus, ut inter publica o-
mnium gaudia conjugalis coalescat societas.
Hinc Romani suum ingeminabant TALAS-
SIO, hinc suum Græci HYMENÆUM lætis-
simis vocibus iterabant. Quin apud ipsos
CHRISTI cultores consuetudinem jam olim
frequentatam, ut cantu, cymbalis, tibiis, con-
ubialia festa personarent, vel ex Ambrosio

& Chryſoſtomo, magnis illis priſcæ Eccleſiæ luminibus, diſcere in proclivi. Quid? exemplum epithalamii, in feſtum nuptiale HONORII Imperatoris eo tempore a Claudiano concinnati, hodieque extat, quo, inter alia, Cæſarem ſic affatur Poëta :

*Cum Tibi protulerit feſtas mox pronuba tædas,
Quæ, tali devota toro, quæ, murice fulgens,
Ibit in amplexus tanti Regina mariti?
O mihi ſi liceat thalamis intendere carmen
Connubiale tuis!*

Sed & aliquanto poſt celebratas MAURITII Cæſaris nuptias ab hymnis commendat carminibusque Nicephorus Calliſtus. Nec minus, qui vixit circa initia noni a nato Sospitatore ſeculi, Aponius, indicium facit, fuiſſe iſtâ hac ætate, qui *modulamine dulci potentiam ſponſi & pulchritudinem ſponſæ collaudaverint*: ſicut idem comprobât, qui ſub ejusdem ſeculi exitum ſcripſit, Remigius Antifiſiodoreniſis. Atq; hæc expedentes Muſæ noſtræ Holſaticæ, quando ſuum APOLLINEM, Reverendiſſimum, inquam, Sereniſſimumque Principem ac Dominum, DN. CHRISTIANUM-ALBERTUM, Ducem Slesvvigæ, Holſatiæ, &c. &c. Dominum noſtrum Clementiſſimum, Conjugali ſibi vinculo neſtere viderunt Sereniſſimam, Principem ac Dominam, DN. FRIDERICAM AMALIAM, Sereniſſimi Potentiſſimiq; Principis ac Domini, DN. FRIDERICI III., Daniæ, Norvvegicæ, Gothorum Vandalorumque Regis,

gis, &c. &c. Domini nostri Clementissimi, Filiam, Principem Dominamque nostram Clementissimam; nihil, quod ad augenda gaudia hæc connubialia a se quidem conferri posset, sibi duxere prætermittendum. Dictus proinde est lætitiæ publicæ proximus dies Jovis: quo ab hora ante meridiem nona, interprete Oratore suo, Viro Clarissimo Amplissimoque Dn. D. DANIELE GEORGIO MORHOFIO, Panegyrico sermone, quique svaviorem hunc reddet, Musicorum concentu, & epithalamis, ex Gloriosissimi Statoris sui, Nutritii munificentissimi, Magnificentissimique RECTORIS, nuptiis istis concepta gaudia, simulque devotionem testabitur subjectissimam, & vota pro novi hujus conjugii incolumitate solenniter nuncupabit ACADEMIA nostra CHRISTIAN-ALBERTINA. Quanquam vero, dum commune est istud e Patris patriæ nuptiis enatum tripudium, neminem fore arbitramur facile, qui non vel suopte motu huic actui sit interfuturus; ne tamen nostro desimus officio, omnes omnium ordinum viros honoratissimos, ut præsentia sua Panegyrim isthanc splendidiorē reddere velint, majorem in Modum rogamus. P. P. Kilonii, die X. Decembr. clb lbc LXVII.

*MAGNIFICE DOMINE
PRORECTOR,*

*Generosissimi Domini, Viri Admo-
dum Reverendi, Nobilissimi, Consultissimi, Am-
plissimi, Clarissimi, Tuque Nobilissima Studio-
se Juventutis Corona, Auditores omni-
um Ordinum Honoratissimi.*

Si, quam est fecunda hujus temporis læti-
tia, tam mihi facunda contingeret Oratio,
nullum profecto, Patres Academici, esset
periculum, ne vel vos benignâ istâ spe,
quam de me concepistis, excideretis, vel e-
go gravissimæ isti, quam mihi imposuistis,
provinciæ impares afferrem lacertos, aut vires
ingenii mei, quas perquam novi exiguas, in
extremum temeritatis discrimen adduceren-
tur. Quis enim vestrûm est, qui non intelli-
gat, quam sit grave & arduum, festiva ejus diei
aptâ oratione exprimere gaudia, quo æterno
fœdere universa coalescit Cimbria, contracto
inter CHRISTIANUM ALBERTINUM, Do-
minum nostrum Clementissimum, & FRIDE-
RICAM AMALIAM, Magno Danorum Rege
prognatam Principem matrimonio, quo non
splendidissimæ solum Principum familiæ, sed
tot etiam gentes, atque adeo totius septentri-
onis populi indissolubili inter se nexu copulata
comprehenduntur? Nam sanè, si quis un-
quam in Cimbrorum fastis albo notari lapillo,
E aut

aut posteritati commendari debuit dies; is est, quo Cimbriæ felicitas ad summum perducta, fastigium in augusto FRIDERICÆ AMALIÆ sinu molliter conquiescit, Regalis thalami fulcris sustinetur, & Amoris nodo plusquam Gordio ita adstringitur, ut nullo unquam tempore dirimatur, aut seculi injuriis incidatur. Et hæc quidem singula ita omnium animis obversantur, ita sensus omnes occupârunt, ut compositioris etiam animi homines incredibili isto & impatienti gaudio quasi lymphati linguas diffunderent in jubila, manus explicarent in applausus, pedes erigerent in tripudia, omnes denique pulcherrimum illum diem salutarent, quo speciem aliquam reviviscentis, quasi Reipublicæ videre sibi videbantur. Quod cum longè latèque flueret gaudium, etiam ad nos permanavit; cujus magnam partem jam tum animo frequentabamus: quamvis serò quodammodo, nec attemperate satis tributa, ejus exsolverimus, morem illorum imitati, qui cum debent non respondent ad tempus. Neque enim abesse ab his sacris debuerunt, Musæ nostræ, quæ ut Serenissimi nostri Principis clementiâ primum hîc ducere spiritum cœperunt, & proprias has perpetuasque sedes ejus beneficio possident; ita omnem movere, Heliconæ, omnem in Apollinis sui thalamos exhaurire Hippocrenen, omnes denique voces gratulationibus impendere non cessârunt, nec in se quicquam humillimorum studiorum por-

porro patientur desiderari. Quare laudabili profecto comparatum est à vobis consilio, Patres Academici, ut hoc ipso in Musarum sacratio, hoc ipso è loco, quo præsentem Ducis nostri vultum ante ipsum hoc biennium adoravimus, è quo tum omnes felicibus nostris præsagiis & votis augurabamur, quod nunc æterno Divini Numinis consilio confectum esse, videmus, sanctissimi ejus connubii festivitas à publico vestri affectus interprete, quem me esse voluistis, deprædicaretur. Ego verò, qui nunquam aliàs vestram auctoritatem defugio, & nunc quidem hanc datam mihi dicendi potestatem in honore & beneficio ponere queam, in tam arduo tamen officio invitatus quodammodo vestro obsequor imperio; dubius certè & in varias agitatus partes à me ipso dissideo. Ut enim hinc animos dejicit suscepti muneris difficultas, cui facile vel exercitatisimus quisque succumberet: ut retrahit rei, de quâ dicturus sum, majestas, quam tenui oratione complecti velle & injuriosum esset & temerarium: ut terret virium mearum imbecillitas, quam nemo prudens unquam ostentavit in publico: ita ex adversâ parte stimulos addit muneris mei ratio, quæ monere videtur, ne ullâ in parte ab illâ recedam; aurem vellicant publici omnium plausus, quæ occultâ quâdam vi sensus nostros feriunt, ipsaque voces nostras timidas tacito increpant convitio & vel invitas provocant; animat hinc vestra benevolentia, quæ ut

nostro ore publice loqui non est dedignata ; ita tot linguis suis unam hanc armare , tot vocibus unius succurrere hominis infantia videtur. Accedit deniq; his omnibus , quod publicæ pietatis nomine meam quoque non obscurè possim profiteri , cui cum illa nunc patrocinetur , majori loqui incipit fidentiâ , intempestivam rata verecundiam , quæ ingratum silentium indecoræ præfert orationi , & illam leniter ex intimo pectore spirantem simplicitatem , prænantante summis in labris grandiloquentia averfatur. Quin verò esto crimine me non posse absolvi , quod Principis tanti , cujus jam aliquot annorum gesta omnem superant facundiam , augustos thalamos ~~opidanâ aliquâ & in-~~
~~conditâ~~ Oratione amplecti cupiam ; cum promptiorem immodesti amoris veniam sperem , quam modestæ impietatis , cujus abs nobis culpam detestamur. Præterea si quid rectè sentio , non potest in tanti Ducis laudibus , quas animo percurfas & prope decantatas habemus , in tanta rerum fœcunditate sterilis & infacundus esse Orator , quæ cum per se splendorem habeant , ipsi Orationi , ut eam verborum luminibus non frequentemus , lucem inferunt , nec illam à mortali ingenio mutuantur. Cumque illarum tanta sit magnitudo & sublimitas , nihil de illis dici humile potest , nulla in sermone egestas oborietur , ut non aliunde earum amplificatio , quam à simplici nar-

narratione debeat deduci. Et istæ quidem, quæque aliæ illis sunt continentes causæ, ita sunt comparatæ, ut facile hoc quoque in argumento Oratoris personam tueantur, nec alii nobis colores, quibus se commendet, vel audientiam nostra sibi faciat oratio, magnoperè sint circumspiciendi. Enimverò jam mihi videre videor A. O. animos in vobis non sine immoderatione quâdam erectos, ora in me obversa, aures cupidas, vultus vestros tacito quodam gaudio occupatos & vocem hanc publicam mihi quasi imperantes. Sentio vota mea vestris juvaris quodammodo elici, omnium amores in publicos Cimbriæ Amores conspirantes video; ut ridiculus profectò essem, si, quod jam ante facere vos video, multis demum obtestationibus, ut audire me velitis, contentius à vobis efflagitarem. Quis præterea inter vos tam inhumanus haberi velit, qui non statim ad Amoris nomen emollescat? quis tristis iste Cato, cui Venus illa Cimbrica non arrideat? quis iste ferreus, cui Cupidinis tela saltem aures non stringant? cui faces istæ animos non accendant? cui ipsæ denique hæ Charites, quas loquimur, videri queant ingratae? Adeste vos Genii, vos Amores, ut nectare vestro delibuta verba mollius influant, ut telis vestris armata aculeos relinquunt: Adeste vos Musæ, quas hic lateri meo vicinos conspicio suavissimisque hymenæis mihi præludite, ut vestro inspi-

rata numine aures mentesque omnium mea
effascinet oratio.

(Hic interjecti concentus Musici)

Quotiescunque Cimbriæ nostræ felicitatem, cujus maxima pars hujus temporis festivitate continetur animo meo recolligo, toties Divini Numinis exosculor consilia & factorum vim religioso animo tacitus adoro; toties nullum Serenissimo Principi auspicatius illucere potuisse tempus animadverto, quam hodiernum illud, quo ad amplitudinem ejus & gloriam divinitus quædam adjuncta fortuna videtur. Si enim in illud cogitatione revolvimur, quo post cælo illatam Divi sui Parentis gloriam rerum primum potitus imperii tractare gubernacula cœpit, quo ut salutare aliquod fidus turbatis Patriæ rebus affulsit; nemo quidem tum exstitit, qui non in illo Maximi Parentis virtutes omniumque retrò Principum imagines redivivas agnosceret, qui non enervatæ Reipublicæ ab isto Atlante robur, ac propè extinctæ vitam promitteret: nemo qui non ab ejus diei gloriâ supremam Patriæ salutem pendere existimaret. Ut vero hæc negari non debent, & vel in dubium sine impietatis crimine vocari nequeunt, nos certè ultrò largimur; id tamen uno ore mecum fatebuntur omnes, quod parum constans illa, quæ uno tantum pede conquiesceret parumque duratura felicitas videretur. Quem-
ad-

admodum enim illam nascendi fors dederat, ita moriendi necessitas abstulisset, eodemque tumultu & gloria nominis & Cimbriæ fortuna componeretur, si nemo, qui memoriam tanti nominis ab interitu & oblivione temporum, vindicatam æternitati assereret, relinqueretur. Sed & viventi nullum parari tutius munimentum thalamo, nullum præsentius adjungi præsidium, quam Amoris poterat, nullum tam validè latus defendere satellitium, quam blandissima aliqua Venus Prætorianis quasi pharetratorum Cupidinum cohortibus circumfusa. Quo denique jure magnificum illud Patris Patriæ nomen tueretur Princeps optimus, nisi & Patrem se aliquando ostenderet iis in filiis & nepotibus, quos eodem Patrum Patriæ nomine supplex Cimbria salutaret? Cumque à bono Patre familias (si Xenophonti credimus) nihil distet bonus Princeps, quâ in re sollicitius ille versaretur, quam in matrefamilias sibi adsciscenda, sine quâ nec subsistere magna illa familia potest, nec ampliari, nec prospera aliqua rerum successio sperari. Atque ex eo facile quoque intelligimus, quam nec hujus diei felicitas cum illâ comparanda sit, quâ primus inter Cimbriæ Principes nova Musis fecit otia, nova illis regna in florentissimo hoc loco erexit. Quanquam enim æterna istius operis fama omnium seculorum monumenta, Mausolea, Pyramides & insanas substructiones longo post se relinquat intervallo, & vel sola o-

mnium temporum memoria occupanda sufficiat; proprius tamen & privata vitæ rationem & Reipublicæ rectionem istæ contingebant curæ, quibus omnium saluti prospiciebatur. Et ipsæ nostræ (arbitror) intercessissent Musæ, ne mortalem haberent Apollinem, quem solum augusti alicujus connubii beneficio in immortalium posterorum serie sibi spondere poterant immortalem. Quod si augurari nobis licet, non sine bono factum est omine, quod Musæ, ceu Divæ quædam pronubæ ab illo prius susceptæ, quæ pectori ejus tot Veneris dolis Cupidinumque telis hætenus inconcusso cum ipsa Venere conspirantes occulto quodam afflatu blandissimos illos amores inspirarent. Quid verò si divinâ aliquâ futuri amoris præfensione, DUX SERENISSIME, tum mentem Tibi affectam fuisse dixero, cum pro Symbolo PACEM Musis nostris dares, oleæ ramo & copiarum cornu decoram? Quam enim illa aliam quam tuam significavit FRIDERICAM? quæ ut amabili Pacis nomine toti Cimbriæ, ita & Musis nostris adoranda. Agnoscimus Te Dominam Deamque nostram, FRIDERICA, Te Irenen nostram veneramur, in symbolis nostris jactamus: Te sacrorum nostrorum custodem usurpamus: Tuum in larario nostro simulachrum reponimus: Tibi sceptrum nostrum, in quibus tua circumfertur imago, substernimus: Tuis oleis laureas nostras inclinamus: Tuum illud copiarum cornu fecundissimâ hæc anni tempe-

pe-

pestate in nos effusum gaudemus. Nam ipso in tempore hoc, quod Cimbris multorum successione annorum, ipsique Serenissimo nostro Principi auspicatum fuit, æternam illam factorum manum, quæ temporum & seculorum intervallis imperiorum momenta metitur, observamus: quasi cum ipsâ rerum naturâ, cujus tum vis illa vitalis per totum mundum pertinens variis opibus mortalium censum auget, incrementa sua fortuna Cimbrica quodammodo partiatur. Autumnus iste fuit (ut jam remotiora prætervehar) qui Tibi, CHRISTIANE ALBERTE, Patriam, primam illam Sponsam tuam sociavit: Autumnus iste fuit, qui secundam illam Sponsam Sophiam, vel si prout unâ mavis novem, Musas Virgines desponsavit: Autumnus iste nunc est, qui tertiam Tibi Sponsam FRIDERICAM AMALIAM illam è Codano mari ortam Venerem in thalamum tuum deduxit. Cumque ex prioribus istis Conjugiis tot inveneris & susceperis liberos, quot hinc in sacrosanctam parendi necessitatem tibi rerum mater natura nasci voluit, quotque hinc ingenia ad fertilium tuorum agrorum similitudinem perennis fœturâ famæ luxuriantia subnascuntur: sperabimus jam, quod non ex alitis volatu aut oscinis cantu, nec e tripudiis solistimis, aut affectione siderum, sed eadem freti factorum indulgentiâ prædicimus Autumnum illum, quo FRIDERICA tua magna à nobis Mater; Tu verò augusto & glorioso

so Patris titulo publicis omnium acclamationibus saluteris, Cimbricaque ista Fortuna, quam Te nemo unquam parentiorem habuit in tuto collocetur. Nam quis non omnia fausta ominetur, cum in ipsâ Tychopoli atque adeo in ipsius Fortunæ sinu divini operis primordia jacta sint, ipsis manum jungentibus fati, ipsâ hîc conspirante Venere & Fortuna, quæ tamen numina alius uno tantum nomine hîc appellaret, cum nec munus suis distincta videantur. Fortunam Homerus, (ut à celebratissimo Scriptore Pausania accepimus) Oceani fecit filiam. Quò fortassis respexerunt navium in mari fluctantium picturæ, quæ in Templi Prænestini pavimento conspiciebantur. Ex eodem originem suam trahere Venerem uno omnes ore Poëtæ fabulantur, quo innuitur, quodammodo, quam maritimis istis limitibus & Oceani proventibus Fortuna Cimbrica contineatur. Quorsum etiam apud Romanos Veneris & Fortunæ templa fuerunt contigua, quorsum vota ipsi Fortunæ ab amantibus facta? ferta & corollæ à recens nuptis suspensæ? Quorsum Cupido alatus illi appingebatur, nisi ut arctius illud Veneris & Fortunæ contubernium indicarent. Sed nos quidem inepti sumus & levitatis alicujus notam non effugimus, quod à profanis Gentilium sacris lucem aliquam sacrosancto huic Amori quæramus. Facessat hinc Fortuna, quam insanam, mutam, brutam, cæcam saxoque volubili instantem fingunt

gunt Poëtarum fabulæ: nam lynceam, illam perspicacissimam, immutabilem & divinam, dicemus. Potiori nos jure Te, Serenissima, FRIDERICA, prodeuntem ex Tychopoli tua Fortunam Deamque veneramur, & omnia illa cognomina, quibus illam veterum salutavit superstitio, Tibi non sine religione aliquâ transcribimus, eodemque sed convenientiore cultu exornabimus. Age ergo fabricemus nobis ex divina tua imagine fortunæ aliquam statuam. Hanc Bupalus delubris ædificandis & simulacris fingendis apud Græcos solertissimus artifex Smyrnæis primus omnium specie fœmineâ, capite globum ferentem, manu Amaltheæ cornu tenentem repræsentavit. Nos Fortunam picturi Tuum nobis simulacrum fingimus. Orbem illum, quem ad majoris mundi leges incomparabili artificio agitatum inter pignora sua asservat Cimbria, illud ex ære monumentum ipso ære perennius capiti tuo imponimus: neque enim pedibus subjicimus, cum constantem Te & immotam velimus. Idem vero Amaltheæ cornu, quod ut Irene in nostris gestas insignibus, dextræ asimili planè ornatu inferimus. Te FORTUNAM sub fœminea specie VIRILEM, cui templum Ancus Martius dedicavit, quod ad Victoriæ parandam fortitudinem & viriles animos largiretur, appellabimus: cum nec in Te Heroidum Cimbricarum Virtutes, quæ Romanis & Viris & Viribus non sine æterno urbis æternæ dedeco-

re,

re, superiores fuere, consensisse credo; exemplo certè suo CHRISTIANUS ALBERTUS testabitur, quem vel inermi Tibi victas porrigere manus videmus. Te PRIMIGENIAM propriamque Cimbriæ FORTUNAM, quæ à Serrvio Tullio ejus ut creditur amasio, cui ipse quoque thalamos exstruxerat, nomen illud invenit, nuncupabimus: cumque à gignendo illa ita dicatur, tum maximè, cum primigenius aliquis tuâ in aulâ ludet Ascanius, isto Te nomine efferemus. Te PRIVATAM, Te PUBLICAM FORTUNAM, cui publica privataque omnia dedicamus, à qua omnium & singulorum fortuna suspenditur, habebimus. Te cum Pindaro PHEREPOLIN Civitatum nostrarum Conservatricem; Te SALUTAREM salutabimus, cum hîc salutis confirmandæ accedas, tuâque salute nostra contineatur. Te OBSEQUENTEM dicimus etiam cum dominaris, cumque Amor in nostris obsequiis Tibi imperat. Alii Vitream sibi fingant; nos Te AUREAM, quæ aurea nobis tempora reducat, quam non cum Imperatoribus Romanis in larario, sed in thalamo suo reponat CHRISTIANUS ALBERTUS. Quod si olim LOCORUM FORTUNAS commenti sunt Romani; Tu ad eorum exemplum non aris tantum nostris focusque præsidebis; non viarum, ædium; non tuæ Cimbriæ tantum: sed totius septentrionis, qui tuis amoribus, uno quasi orbe colligatur, omniumque FORTU-

TUNARUM FORTUNA celebraberis. O faustum illum Autumnum omnibus veris & æstatis floribus coronandum! quâ in tam auctâ & lautâ parte nostra est Cimbria! O fortunatum illum Jovis diem gemmis & auro notandum! quo Fortuna Cimbrica in FRIDERICÆ AMALIÆ concepta thalamo ad omnem posteritatis memoriam propagabitur. O felicem Veneris illam noctem! quâ nova nobis exorta lux ipsum splendore diem provocavit, omniumque siderum faces exstinxit: quæ efficiet, ne oblivionis nocte CHRISTIANI ALBERTI nomen prematur. O horam illam auspiciatissimam! quæ nobis ætatem novam promittit ipsisque in Sponsorum amplexibus integra secula emetitur. O admiranda æternæ sapientiæ decreta! ô arcana Divini Numinis vestigia! quæ in ipsa rerum gestarum serie pasim deprehendas. Divino profecto consilio est, quod florentissimâ in ætate, quæ aliis omnium Voluptatum genere diffluit, eo Vitæ statu, quo in immensum excurrere adsolet humana licentia, eo fortunæ culmine, ad quod velut ad metam, quandam publicam tot illustrium amorum tela collineant, non præmaturis Cupidinum ignibus ustulari aut inconsulto aliquo amore abripi Optimus Princeps potuerit: sed refrenatis incomparabili exemplo illecebrarum istarum stimulis mediam ferme illam vitæ humanæ ætatem, quam rigidi quidam temperantiæ exactores & tristes Patruī præscribere, nec ipsi

ipsi fervare solent, expectare prudentissimus Cunctator maluerit, quam præcipiti aliquo consilio illuc amores suos dirigere, quò fata non destinarent. Magnum quoque divinæ excitationis argumentum apparet ex eo, quod post longam istam in amore moram spesque omnium solitariis annorum tædiis fatigatas, subito amoris ille ignis ut fulgur aliquod è sicca nube eruperit, adeo ut omnem suspicandi solertiam præverteret, nec prius, quam re prope modum confecta, fama ad nos perveniret. Quo in negotio divinus ille impetus conspicitur, qui ut moræ impatiens temporum momentis adstringi se non patitur; ita igneas illas & divinas utrinque mentes impulit, ut jam amarent, antequam consilia amandi susciperent, prius votis suis potirentur, quam id publice constaret. Dum enim multi alia omnia agi existimant, dum de gravissimis Cimbriæ negotiis vel deliberari vel disputari credunt, ad quæ expedienda magnus ille Principis & Cimbriæ suæ Nestor & Cyneas KIELMAN-NUS mitti putabatur: ecce statim vestigia ejus insequitur DUX noster SERENISSIMUS, & subito Amor quasi DEUS quidam è machinâ apparuit, totâque scenæ facie in Veneris theatrum immutata, nihil jam triste vel severum sonat, omnia plausibus complentur, omnia FRIDERICÆ AMALIÆ amplexibus involvuntur, osculis obsignantur. Quasi scilicet eâ re tacitis quibusdam impulsibus totam

Regiam familiam Tychopolin, jam olim FRI-
DERICI Regis Amoribus illustrem, adire com-
pulerit solertissimus Amor, ut nova illic se præ-
fide celebrarentur comitia, ipsisque Principi-
bus leges præscriberentur. Intelligitis, opinor,
A. quam omnia hîc singulari fato fuerint, nec
forte quâdam aut incertis casuum, sed divinis
omnia in Principum amoribus gerantur auspi-
ciis, quam diversis & à sublimiori aliquâ men-
te incussis motibus ista Heroum pectora præ-
vulgaribus animis incalescant. Neque enim
hîc aliquis eandem ludi fabulam existimet,
cum Corydon Phyllidos suæ amoris ambit:
sanctiores multo illæ curæ sunt, tantumque
omnem privatorum sortem supergrediuntur,
quantum divini impetus humanas appetitio-
nes & conatus antecedunt. Non solet vulgo
majorem agere orbis histrioniam, quam in A-
moris theatro, in quo ut quis ingeniosius de-
lirat, cumque ratione insanit, ita belle sibi fe-
stivus videtur, & scenam quam optimè credi-
tur exornare. Quas enim ineptias otiosus
excogitat amator, ut Glycerio alicui placeat?
quibus aucupis & lenociniis inducuntur ani-
mi? demulcentur aures? quæ insidiæ struun-
tur? quibus cuniculis subruitur pectus? Pluri-
mi cum mentis oculis non utantur, sed cæco
quodam affectu in cæcum ferantur Cupidi-
nem, in sola forma obstupefacti hærent, cum
de ea tamen æquè inter amantes conveniat, at-
que inter Philosophos quondam de summo bo-

no, & sæpiſſimè Parides iſti, elegantiarum ſpectatores fallantur, dum pro egregiâ aliquâ ſpecie imagines ceruſſatas, & pro Junone nubem, quod ajunt, amplectuntur. Cum illis agi quædam Pygmalionis fabula videtur, qui ut ipſi ſibi ſtatuum confecit, quam miſerè deperire, cœpit: ita illi formas ſibi fingunt, quibus ſibi pulchri & ſaperdæ videantur. Illis jam non ſerio, ſed ludo jocoque aguntur amores, nec eorum fructus aſſeqvuntur: quia enim non tam virum quam maritum agere contendunt, egregiè ſibi gratulantur, quod domi alere poſſint aliquas pupulas, ſpeculi conſultas, Melitæas catellas, glires, quibus non tota hyems, ſed totus annus dormitur, quæ domi compreſſis ſedent manibus & diem humeris protendunt, cum quibus perpetua celebrare poſſint, Floralia. Alibi Mopſo alicui Niſa datur tetricque & fuliginofi Vulcani thalamum bella quædam Venus aſcendit. Alibi fœtida quædam & edentula anus nitido alicui & cincinnato Narcifſo, non Junonis Cinxie, ſed Mone-tæ auſpiciis, jungitur, & vel ex graveolentibus oſculis bonus lucri odor captatur. Alibi rigido & affecto ſeni juvencula in thalamum deducitur propediem ei funus ductura, & propter ſordidam in amore cauponationem ipſius naturæ leges evertuntur. Alibi ephebi in Venerem catuliunt & cum vix nuces reliquerunt pueri, eas ſpargunt mariti: veriti fortaffis, ne vel mors illis thalami gaudia, vel extremus dies an-

antevertat. Multis, queis Veneris illa myrtus non nisi laureis intertexta arridet, per chamos in Cathedras scanditur & tribunalia, foliusque ambitus causâ Sponsa ambitur; quasi vero, quemadmodum Comitum Habsburgensium oscula difertos facere credebantur; ita, uxoris alicujus basia doctos aut peritos reddant. Scilicet non in Poëtarum tantum fabulis, sed nunc quoque viâ lactea in cœlum itur, nec tam ex lucubrantium lucernis quam ex nuptialibus tædis gloriæ faces accenduntur. De istis Amoribus, quibus passim exardet hominum vulgus, vera sunt jacta in omnibus Philosophorum monumentis convitia, qui tamen ipsi in partem aliquam hujus stultitiæ sæpe venerunt, nec supercilia sua & barbas Cupidinum telis subducere potuerunt. Illorum, si quid rectè judico, Amor morbus quidam est, &, si Platonem audimus, opinio alicujus boni: ut si quis lippus plumbum aurum esse existimet ejusque desiderio vehementer torqueatur. Valeat vero lutulenta illa Venus, quæ, ut è spumis nata subitoq; isto fervore ebullit, postquam deferbuit, in spumas iterum & aquas dilabatur. Faceffat hinc cæcus iste Cupido, quem nos Argum oculatissimum in Cimbricis Amoribus sensimus. At enim jam olim duplicem aliquam Venerem exhibuerunt sapientissimi veterum Philosophi, quarum altera Vulgaris plebejis vacat amoribus, ad turpes concubitus irritat, & se vorum pecorumque,

congressibus patrocinator; altera verò Cœlestis Heroum thalamis miscetur & ab ipsis fati decretos amores exequitur. Sanctam hanc appellat Seneca, almam Maro, Parcarum imperatricem Euripides, Omnium rerum genitricem Orpheus, Harmoniam & Uraniam in Bæoticis Pausanias, Cœli filiam, matre carentem Plato, animam divinissimam Plotinus. Hunc amorem respicit Ascræus ille Vates, cum Cupidinem illum suum describit antiquissimum & pulcherrimum Deorum, quem alii informem mundi materiam distinxisse & superiora inferioribus connectere docent, quem ipsum illum Deum vocant insidentem omnium penetralibus, omnium rerum conservatorem. Quid verò aliud, quam supremam illam mentem, ipsum illud æternum numen sub his nominum involucris intelligamus? quod cum vim quidem suam per omnium hominum negotia diffundat, potissimum tamen in Principum curis, animis, affectibus se exerit, quibus ipsius populi res arctissimè implicantur. Propius scilicet aliquod & sublimius divinæ potentia cum Principibus intercedit commercium, quam vel stupor, vel malitia quorundam capit, eorum consiliis miscetur, eorum cogitationes dirigit, per oculos istorum prævidet, per manus illorum in orbe hoc operatur: ita ut tota divina sit & sanctissima illa Principum disciplina, omnisque illorum vita auspiciis sublimioribus ducatur, omnes impetus præ-

præsentis impulsu numinis concitentur. Quis ergo Principum amoribus Deum neget pronubum? quibus universa non solum populi salus, sed & aliarum gentium, quas fœdera illa tangunt, securitas superstruitur, ad quorum genium temporum momenta simul cum ipsa, fortuna convertuntur: quis non ultra privatorum sortem æstimaret? Cum enim Dei vires in terris obeant Principes, ejusque imaginem inter suos circumferant; quis non videt, quam ille divini amoris radius majori & pleniori aliquâ luce in proprios feratur animos, qui speculi instar primam ejus imaginem recipiunt lucemque reflexam ad nos remittunt. Præterea animus iste Principum nobis imperantium magis quam in cæteris totus in eam, convertitur partem, quam Stoici & Plato imperantem vocant: quare imaginem illam divinam quam proximè exhibent, & à sensuum vulgarium contagione immunes Numinis impulsui se magis accommodant. Non aliâ quam divinâ illâ mente æthereisque ignibus vestrum animi, SERENISSIMI PRINCIPES, agitati fuerunt, & idem illud Numen pectus vobis obsidet, idem in suavissimis oculorum scintillationibus ludit, in amantium vocibus sonat, inter amplexus vestros includitur. Non hîc ad Nasonis alicujus præcepta amores exigebantur; non impenso pretio aut magnis jacturis extorquebantur; non falaci opus fuit facundiâ, qua effascinaarentur animi; non oculi

hic in amore duces, ut in privatorum amoribus: sed mentis illa acies & consiliorum perspicacitas, quæ aspectu solo non contenta etiam prospicit in amore, quid sibi, quid Reipublicæ ex usu sit, quid posteritati. Neque enim oscula ista & amplexus inter duos tantum terminantur, sed cum istis totæ gentes totæque civitates eodem vinculo constringuntur, eademque fœderum religione sibi obligantur. Nam profecto fœderum illorum, quæ ipso naturæ & sanguinis nexu ineuntur, quæ divinis sanctionibus stabiliuntur, major est pietas & reverentia: cumque quodammodo æterna dici possint, si in mortalitatis solatium thalami fœcunditas accesserit, certior & magis immutabilis eorum est ratio, quam quæ fortuitis conventionibus solius utilitatis gratia contrahuntur. Quemadmodum scilicet societas ista naturalis, quæ inter patrem & filium, maritum & uxorem intercedit, societatis civilis est fundamentum, sine quo illa non consistit; ita nec ille, qui societatis civilis caput est, sanctiori magisque necessario fœdere potest adstringi, quam quod natura, inter conjuges instituit. Quod Antisthenes olim dicebat: Uxorem ducere, deberi & Naturæ & Patriæ, id præ omnibus de Patriæ Parente verum est. Quamvis enim in universo humano genere cœlibem vitam non toleret Natura, ne tota ipsa tollatur, & communis hominum conciliatio evertatur: quamvis etiam parum diligens Patriæ

triæ civis sit, qui de civitate propagando curam non gerat; parum tamen hinc universæ rerum naturæ vel toti civitati detrimenti expectandum, si unus vel alter privatorum à re sit uxoria omissior. At ille qui Patriæ Pater audit omnibusq; in illustri loco ad exemplum positus se uno omnes continet, arctiori hîc vinculo Naturæ & Patriæ tenetur. Quod cum bene perpenderent Lydi, eam tulisse legem refert in præceptis connubialibus gravissimus autor Plutarchus: ut necessario Reges essent, mariti: quæ tam sanctè observata fuit, ut si vivis excederet Princeps, superstite filio, qui per ætatem imperii gubernaculo jam erat aptus, non admitteretur, quam uxorem duxisset. Quod si forte Regis conjugem mori contingeret; ex eo statim tempore, & quamdiu vacuo in thalamo dominabatur autoritate regiâ imperioque exutus est: quasi præesse civitati non posset, nisi domi etiam fixæ & uxori imperitaret. Magna profecto & intolerabilia illa convitia & crimina sunt, quorum reos peragit, Romanos solitariam vitam sectatos Augustus Imperator in luculentâ illâ oratione, quam nobis Dio consignavit. Jam Viros esse negat, qui nihil virile exhibeant; jam Civium & Romanorum nomine ne appellare quidem dignatur, per quos, quantum in illis est, Civitas pereat, Romanum nomen extirpetur. Homicidas vocat, qui illos non gignant, quos nasci ex illis conveniebat: impios, quia nomina & ho-

nones majorum subvertant: sacrilegos, quia ortum gentis, quem à Diis immortalibus traxerant, abolere intendant, templa & aras eorum evertant; cum eos, qui colere Deos debebant, non gignant: Patriæ denique Proditores, quod civitatem dissolvant, eamque sterilem & inanem hostibus tradere videantur. Quid acerbius dici poterat in Cives, cujus magnam partem vereor, ne quis in ipsos etiam Magistratus rapere possit, si illud naturæ patriæque tributum, quod omnium hominum, quam maximè debent exsolvere, publicè mala nomina, intermittant. Quantà ergo gloria efferendus SERENISSIMUS noster PRINCEPS? quantis illi nominibus adstricti sumus? quod Cimbriæ suæ non inviderit illā felicitatē quam jure quodam suo poscere videbatur, & vota omnium non tam impleverit, quam superaverit. Eat illa dies in secula! in annalibus libris ad seram posteriorem seriem transmittatur! quo illud Serenissimorum Amantium, par, magno totius Cimbriæ bono, dextras junxit, quo priorum temporum lacrymæ ex oculis nostris effinguntur, quo secretis malis omnibus adest cumulata bonorum complexio. Omnium seculorum memoriam occupent veneranda illa CHRISTIANI ALBERTI & FRIDERICÆ AMALIÆ nomina, quibus nihil unquam sociavit elegantius natura, quorum laudes nullum satis ingenium concipiet, linguæ nullæ explicabunt. Quid enim in tantā

tu-

tuâ fortunâ, PRINCEPS MAXIME, quid tanto in rerum culmine à nobis proferri queat, quod non præconia nostra supergrediatur? Si sublimes illæ animæ, à quibus Tu non interruptâ serie descendis, hîc nominandæ: si augustæ tuæ domus splendor, quæ præter cæteros Princeps fortunata, totque prudentiæ & antiquitatis documentis robusta, delineandus; nihil fanè tam magnificum & eximium dici à nobis potest, quin omnem etiam conatum nostrum rerum exsuperet magnitudo. Si affinitates, quibus non Principes solum, sed & potentissimos Tibi Reges habes obstrictos, percensendæ, si denique in omnibus illis, quæ domum tuam Regiis etiam titulis illustrem exornant, habitare diutius, & plena manu illa in astra ferre conarer, non horæ alicujus opera, sed seculi labor esset infumendus, & augustum orationis solum nulla satis facundia emetiretur. Ut verò omnia hæc summa quidem, sed extra Te posita sunt; ita parum ad te pertinere credis, cum in alis tuis esse virtutibus magnus, quam alienis; quamvis omnium Majorum virtutes in te non tam alienæ quam nativæ sint, & ita sint singulæ, ut videantur singulares. Ea est in Te earum conspiratio atque societas, ut non una absque aliarum consortio subsistat, omnesque in Te quasi in sacrario quodam ac delubro adorentur: quibus magistris ad vitæ veritatem propius accedis & præclaras illas imperandi artes, quas semper in Te fitas esse in-

telleximus. Earum tamen omnium fructum, nec Tu ipse, nec nos satis capere videbamus, nisi plenissimam earum possessionem FRIDERICA AMALIA admissa fuisset, cujus Tu easdem virtutes eodem jure possides, quo Illa tuas, quæ in Te geminæ uno illo amoris vinculo cohærent: ut, cum Illa in Te vivat; Tu in illâ, iidem vos agant impetus, eosdem in animis vestris thalamos illæ fortiantur, quibus uberior earum leges ad posteros propage-
tur. Assurgit ad tam augustum FRIDERICÆ AMALIÆ nomen universa Cimbria, & velut Helicen aliquam & Cynosuram Arctoo cœlo lapsam veneratur. Quam si nunc præsentem, liceret intueri, nemo sanè dubitaret, quin ipsa Virtus, quam fœmineâ aliàs specie pingimus, quam optimè illâ FRIDERICÆ AMALIÆ habitudine totâque corporis compositione nosceretur: Frons serena & in placidam exporrecta clementiam inscriptos sibi affabilitatis characteres, quos ipse duxit expressitque Amor, ostentat: ipsa absque supercilio supercilia gratissimâ deprimuntur modestiâ & arcum quen-
dam triumphanti in genarum purpurâ Virtuti suspendunt. Istis infidere oculis pro pupulis Charites, & quædam illic reconditæ amorum faces ardere videntur, quibus animos in sui reverentiam rapit: Pectus istud magnæ animæ capax, totaque FRIDERICA AMALIA nihil aliud quam vivam aliquam Virtutis imaginem repræsentat. Ingredere, HEROINA, Cim-
bri-

briam tuam, non bonis avibus, non felici aliquâ fiderum compositione, sed tuis auspiciis, & tui vultus, velut fideris alicujus afflatu, sensibus Te nostrisingere, omnium animos occupa, omnium amores Tibi obstringe. Affer in thalamum Sponsi tui divinam illam comptissimi tui corporis majestatem, cumque ea, omnia gentis tuæ decora, omnes Maximi tui Parentis & augustæ Matris virtutes. Ingredere arces nostras, Parnassum nostrum, velut, quædam arcium artiumque Dea Minerva. Ingredere silvas nostras Diana, in quibus arbores Dodonæarum quercuum instar vocales laudes nomenque tuum sonabunt. Ingredere, rura nostra & agros Ceres, eosque jam tum omnis generis frugibus fœcundos adspectu tuo redde fœcundiores. Ingredere denique totam Cimbriam, FRIDERICA, & isto nobis nomine Maximum tuum & SERENISSIMI nostri PRINCIPIS Parentem, utrumque FRIDERICUM exhibe, quorum ille præsentia auspicio; hic, cum jam mortalium rebus exemptus sit, divinitatis suæ interventu res nostras in suo tam genero, quam filio moderentur. Tibi opes nostræ affluunt: Tibi divina humana omnia nosque totos consecramus, qui tuis in osculis amamur, tuis amplexibus implicamur, tuo isto annulo, quo tuus se Sponsus Tibi devinxit, velut arctissimo & non interrupto duarum gentium vinculo, continemur. Salve, DOMINA! Salve Patriæ MATER! quo ge-

minon nomine geminus Te noster affectus; hinc Reverentia; illinc Amor salutat, qui animos ad obsequia promptissimos tam variè afficit, ut cum utrumque se debere intelligat, neutrum tamen rectè exequatur. Cum enim adsumus humillimam exhibitori reverentiam, impedit amoris nimii fiducia; cum amorem offerimus, Reverentia sacræ tuæ Majestatis horrore impulsæ intercedit. Illa in genua submisso poplite procumbit? hic etiam amplexui tuo se sistere laterique assidere non veretur. Illa vel tertiatis præ metu verbis vix Te compellat, vel solo tantum silentio veneratur, & in ore vultuque tuo acquiescit; hic importuna loquacitate totum se tibi expectorat, nec aptius aliquod, quam Matris nomen invenit. Sed facile, opinor, amoris vehementiæ ignoscas, Domina; Cumque & Tibi Princeps ille Affectuum & Affectus Principum Amor etiam in nostris servitiis dominetur, amoris nomen præferes, Teque uno omnium ore & affectu Matrem appellari Patriæ permittes. Quo titulo nescio quàm pulchrè nobis blandimur, jam animo quasi præcipientes illius diei gaudia, quâ novos aliquos Hectores & Hercules-CHRISTIANO ALBERTO tuo largiaris, in quibus Cimbria solatium inveniat, Parens munimentum, familia præsidium & securitatem. Sperabimus ex Te utriusque sexus Principes, Fridericos, Christianos, Adolphos, Amalias, Sophias, Eleonoras, omniaque ista nomina, quo-

quorum æternæ laudes in annalibus nostræ gentis leguntur. Nos interim impatientibus votis, quæ nunc in condito habemus, impellimus illud tempus, quo augustum pectoris onus fiat gratissima ulnarum sarcina, illæ mobiles cunæ perpetuum jacent Reipublicæ fundamentum, illæ fasciæ certissima imperii pignora custodiant & involvant, blandissimi illi vagitus omnis facundiæ ora recludent, omnium provocent acclamationes. Horum Bonorum omnium, quæ vel possidemus, vel exspectamus, quæque omnia inter se apta sunt & connexa, originem, si à DEO discefferimus, Tibi, Rex Maxime, FRIDERICE, adscribimus, cujus benigna voluntate inusitatoque amore, quo omnes prosequeris Amor & delictum humani generis, effectum est, ut arctiore illo fœdere jungantur, quos ipsa natura & imperii finibus & sanguinis jure conjunxerat: unde nunc non minus nostrum omnium, quam tuorum Pater salutaris. Non poterant, tuo augusto judicio, fœcundius repullulasce-re Cimbricæ illæ toto orbe pervagatæ virtutes, quam si eadem in stirpe depacti furculi latius lætiusque se diffunderent, unde uberiores fructus tota Cimbria habeat percipere. Quemadmodum scilicet lucis ille fons & origo sol (cujus quandam imaginem circumferunt Principes) terras istas, à quibus propius ejus absunt radii, magis calefacit, magis fœcundat: ita Tu, quamvis bonitatis tuæ radios quoquo ver-
sum

sum emittas, viciniorem tamen Tibi Cimbriam præsentiore fovere lumine voluisti. Te Duce (nam vel ipso tuo nomine pacificum aliquem Numam præ te fers) in FRIDERICA tua, cognomine Filia IRENE illa rerum optima Pax tranquillitasque publica aras focosque defendet, agros mactabit, oppida firmabit, Rempublicam totam nulla jam sui parte nutantem fulciet, omnium denique animos occupabit, ut nihil relinquatur simultatum, omnis ultrò citròque discordia exulet, rapta, alio vorsum studia reducantur, omnium iniquorum conatus elidantur. Quæ omnia cum apud animum reputo, hoc quoque in negotio DOMINUM illum, qui Tibi in ore semper & animo, tuis nostrisque rebus PROVIDISSE animadverto. Patere, REX MAXIME, ut aliquid, quod non levis quædam adulatio, sed pietas ipsa expresit, edisseram. Agnosco Te Regio illo auspicio propius contingere immortale illud & æternum Numen, quod Majestatem tuam secundiore armat præsidio; quò magis sanctioribus adversus DEUM studiis summum illud Fortunæ mysterium mereris, illud imperiorum munimentum, quod sine armorum potentiâ firmum, sine armis victoriam, cum armis armorum regimen, pugnandi vim ac virtutem conciliat dispensatque, quod non ex cœlestium orbium vertigine, sed ipso ab animo tuo suspenditur. Tu, DOMINE, (ut illa Senecæ, quæ in Nerone malè respon-

sponderunt, de tuâ fortuna rectius pronunti-
em) unus ex tuis placuisti electusque es, qui
Dei vice fungatur, in cujus manu fortuna sta-
tusque omnium repositi, cujus ex responsis
lætitiæ causas populi urbesque concipiant,
quorum nulla pars, nisi volente Te propitio-
que floret. In hac tamen rerum facultate non
ira Te ad iniqua supplicia compulit, non te-
meritas hominum & contumelia, quæ sæpe
tranquillissimis pectoribus patientiam extor-
sit. Nemo unus homo uni homini tam charus
fuit, quam tu populo Cimbrico magnum lon-
gumque ejus bonum, ut omnibus tuis civibus
hæc exprimatur confesio: se esse felices, ni-
hilque bonis illis accedere posse, nisi ut sint,
propria: ad quam illos cogunt securitas alta,
affluens, jus supra omnem injuriam positum,
& lætissima Reipublicæ forma, quæ tuas virtu-
tes in Primo Regni herede, incomparabili Fi-
lio, inque posteris tuis nunc reddit immorta-
les. Nos sanè illud beneficium, quo Cimbros
Tibi universos obstrinxisti, gratâ mente agno-
scimus, ejusque consilii DEUM, qui tum Ma-
jestatis tuæ animum infederat, in Te autorem
veneramur, cujus sanctissimum numen etiam
atque etiam imploramus & appellamus, ut,
Te publico egregio diu superesse velit domus-
que tuæ tueatur æternitatem. In sonuère in-
terim omnium acclamationes humillimæque
voces eorum, quorum oculis Majestas tua ob-
servabatur, quique istam mirati in Te sunt hu-
ma-

manitatem, quod beneficium illud tuum non conferre solum nobis, sed & afferre decreveris, dum non CHRISTIANUS ALBERTUS sponfam suam, sed Tu eam in Mariti domum, cum universâ Regiâ familiâ manu tuâ deducis, ipsisque Generi tui sistis amplexibus. Quâcunque incedis, quò oculi inciderunt, viæ magnâ hominum multitudine & gratulatione florentes, applaudunt. Adsunt honestissimi lateris stipatores, Cimbricæ flos Nobilitatis, insignes ad laudem Viri, genere incluti, Marte & arte illustres. Occinunt è muris & aggeribus displosa cum ingenti fragore tormenta, illa terrestrium Deorum fulmina, sed innoxia: Omnes denique viri, pueri, puellæ, senes ad tuum conspectum, velut ad salutaris alicujus fideris exortum, accurrunt, vias obstruunt, cupidiusque ambientes penè prensant, penè ulnis suis excipiunt, Omnes & Majestatem, summam & mistam illi communitatem suscipiunt, quâ ita Te blandum & benignum omnibus ostendis, ut eum demum honorem, quem aliis exhibes, tuum esse existimes. Nostro certe in solo infinita beneficiorum tuorum mesfis metitur, cujus sementem Tu in Patriâ tua feceras: ibi radices illæ defiguntur; hîc fructus illarum uberrimos colligimus. Inter publica ista gaudia, dum omnes studiorum suorum, fatagunt, & quod se illis in præsentî tempus dat festiva in lætitia degunt, Musis quoque nostris nihil votis suis prius aut antiquius fuit, quæ

quæ pro tua non solum, sed & communi domus Cimbricæ, jam uno nomine appellandæ, incolumitate conceperunt; quamvis fortuito illa, ut solet in re subita & immenso gaudio fieri, tam in animo, quam sub manu nascerentur. Nunc tacita & in sinu nostro enutrita, lætitia in publicas has voces prorumpit. Gratulamur Tibi, REX MAXIME, de tanto Genero, quem, si vel optio data fuisset, è magno rivalium numero elegisses. Gratulamur Tibi, PRINCEPS SERENISSIME, de tanto Socero, quo nec major Tibi nec fortunis tuis auspiciatior obtingeret: & de tali Marita, qua non ipsa Natura, non Virtus quicquam finxit elegantius, nec ipsa tua desideria invenire potuissent. Gratulamur Tibi, FRIDERICA AMALIA, de isto conjuge, cujus fortuna singularesque virtutes ultra Principem abeunt. Gratulamur denique nobis omnibus & singulis de omnibus & singulis, quæ in nobis quasi fasciculo quodam stipata colliguntur. Gratulamur ipsis Musis nostris, quæ in Te, REX MAXIME, Patronum; in Te, DUX SERENISSIME, Patrem; in Te, FRIDERICA AMALIA, Dominam & Matrem inveniunt. Quod si olim Cadmi & Harmoniæ nuptiis etiam Musæ cum reliquis Diis interfuerunt, quorum alii lyram percusserunt, alii tibias inflarunt: ita nec in connubialibus sacris tuis, CHRISTIANE ALBERTE, qui Cadmus quidam, & literarum in Cimbria tua propagator jure me-

meritoque diceris, illæ filebunt. Erigitur ergo ad publica illa solennia Academia tua, quotque hîc in negotia misisti literaria, quot hîc tuo beneficio liberalium artium studiis inficiuntur & in hoc scientiarum quasi mercatu bonas literas præstinent, tuum prodire in conspectum & hâc te alloqui voce videntur: O nostræ fundator quietis, ô sapientiæ instaurator, ô Pater, qui ita nos tuis obsedisti beneficiis, ut quocunque pedem ponimus, iis insistamus, in ea incurramus; Hic tibi restabat gloriosissimæ vitæ actus: Hæ Tibi extremæ partes impositæ erant, quæ nunc cumulatissimè à Te implentur: Hoc summum erat illud beneficium, quod Cimbria tua & tuæ præterea Musæ sperare poterant, in quas magna quoque illius fortunæ pars derivatur, quibus integra ab isto die secula nascuntur, quæ istis amorum tædis illustrantur: Acclamamus Tibi cum universo populo Cimbrico, quod olim Octavio Puteolanum suum prætervehenti à nautis & vectoribus coronatis & thura libantibus acclamatum est: Per illum se vivere; per illum libertate, & fortunis suis frui. Uno omnes ore omnia bona dicimus & fortunas tuas laudamus & quantum in nobis erit, memoriæ consulemus posterorum, ut tantum illis exemplum ne subtrahatur. Nos interim varia tua beneficia, quæ majora sunt, quam ut dissimulari debeant, in intimum pectus depangimus, in quo velut, perpetuis quibusdam tabulis nomina nostra,

patebunt magno tuo Nomini obstricta. Quæ inter penates & domestica Numina in Musæis nostris tua hætenus culta imago est, non solâ amplius conspicietur, sed FRIDERICÆ Tuæ juncta adorabitur, à quarum gemino conspectu tenebræ nostræ & umbratica studia illustrabuntur, quarum vultibus, velut testibus quibusdam & hortatoribus in spem æternitatis arrecti, per scientiarum hoc curriculum, velut quædam Circensium spatia, sine tædio circumducemur. Procedunt & ordine insequuntur Divæ, quot hîc in novo hoc sacrario tuo inquilinas constituisti, inter quas prima comparet purissima syndone vestita RELIGIO, quæ Te, CHRISTIANE ALBERTE, Defensorem veneratur, inque Te & dulcissimâ Conjuge sublimes illas virtutes, quæ nos recta via ad beatissimam superiorum sedem ducunt, admiratur. Illa est, quæ dextras jungere jubet: illa fœdere amoris ante aras suas vos devincit: illa amores vestros Amori Divino commendat, ad quem velut ad Helicen aliquam & Cynosuram illi convertuntur: illa pro vestra salute ferventissimas DEO preces allegat: illa sanctissimas voces, quas in ipsa rerum natura æterna lege recondidit DEUS, occentat; CRESCITE ET MULTIPLICAMINI! CRESCITE! ut per omnem seculorum memoriam stirps vestra in immensum excrescat. CRESCITE fortuna, viribus, opibus, animis, in æterna Patriæ incrementa. MULTIPLICAMINI! ut

G qui

qui populos tenetis imperio, populos integros
in posteris Patriæ gignatis. **MULTIPLICA-**
MINI ! ut omnium salus, quæ in geminis vo-
bis consistit, in omnibus multiplicetur. Pro-
dit hinc **ASTRÆA** cumque eâ tot justitiæ sa-
cerdotes, qui cum doceant, quomodo jus cui-
cunque suum tribui debeat, ita nunc ipsi vo-
bis votorum suorum tributa tribuunt, laudant-
que in vobis & exoptant illam à Justiniano suo
laudatam philosophiam, quæ humano gene-
ri immortalitatem artificiosè inducit. Gratu-
lantur illi sibi Patriæque, quod hoc individuo
inter vos vitæ consortio utriusque Cimbriæ
populi socientur, quod ista divini atque hu-
mani juris communicatione, divina humana-
que jura omnibus conserventur. Succedit,
HYGIEIA amorum vulneribus, quæ Cupidi-
num tela fecerant, medicinam factura, sed
bonis verbis & carminibus, quorum hîc magna
est efficacitas, & **FRIDERICÆ AMALIÆ** ali-
quando obstetrices manus admotura. Illa,
TeCHRISTIANE ALBERTE, summum ex
hoc conjugio Patriæ Medicum vocat: quod,
ex quo vulnera ista priora consanaverunt,
præsentius salutis publicæ servandæ remedium
adferre vix potuisses. Neque à Te, illâ judi-
ce, velut à Medico valetudinis publicæ tan-
tum, verumetiam ut ab Aliptis, virium & co-
loris ratio habetur: ut jam non salva tantum
nobis sit Patria, sed & pingui illo & affluenti o-
tio fruatur. Illa morbos, quantum poterit,

à vobis proſcribet , perpetuam vobis & robuſtam ſanitàem largietur , & ſi quod immortalitatis parandæ pharmacum excogitari poſſet , illud non invideret. Ultimo denique loco noſtra comparet SOPHIE, pulcherrimarum ſatellitio Divarum cincta , quæ catenis ſuis , quas pro inſignibus gerit , vos illigat , ut quos commune duarum gentium tenet vinculum , commune artium quoque vinculum nobis obſtringat. Inter ejus ſatellites primam ſe exhibet illa quæ ultra naturam abit ſcientia : quæ ut à ſenſibus vulgaribus quam longiſſimè abeſt , & inter Socraticas nubes ſummasque rerum ideas verſatur tota : ita , cum in vultum veſtrorum contemplatione defixa hæret , humana vos transcendere , & divinarum ſeparatarumque mentium indolem & felicitatem accedere crederet , niſi Amor conjungeret , & mortalium rebus ſuperi vos non inviderent. Ideas tamen Principum & Virtutum omnium in vobis & communem aliquam populi naturam ſingulatim collectam videre ſibi videtur , quam , quia pluribus ineſſe apta nata eſt , in ſeros nepotes extendi velit. Nec jam rerum Domina illa vocari valde expetit , cum vobis rerum Dominis quos ſibi ſumpſit titulos pleno jure tranſcripſerit. Nec in vobis tria illa , quæ in rebus omnibus requirit , deſiderat : quos Amoris illa UNITAS adunat , Virtutum VERITAS jam perfecit , ſœcunda denique BONITAS , quæ ſe ipſo non contenta totam ſe aliis impertit , in

civium amorem, in proluxa denique posteritatis curam impellet. Adest hinc illa Naturalium rerum contemplatrix Doctrina; quæ cum de vobis philosophari instituit, ad Empedoclis præcepta omnia exigit, cui Amor primum facit omnium rerum principium; Litem verò (alterum illud) ex illustri hac Amantium Scholâ, ad Sauromatas usque & Indos, imo ultrâ Naturam ablegat. Illa tædas vestras ignibus suis auget, auris inspiratis ventilat. Illa ex hortis suis flores spargit, è sylvis laurea ferta vobis suspendit, thura adolet, odores adhalat, è terræ visceribus vectigales gemmas eruit, ex aquis uniones piscatur, omnes denique sinus suos excutit, quæque in imis recessibus abdita habet, protrahit, ut muneribus suis vos impleat. Vacuum enim, quod semper abhorret, etiam ab aula vestra, ærario, thalamo, cujus propriiores habet curas, proscribet. Quæ Morum philosophiam profitetur, non alias Virtutes quærit, quam quas felicissimo connubio in toros vestros pro dote uterque adduxistis, quæ laudatissimâ illâ mediocritate non consisterent, nisi in summa hæc pectora incidissent. Illa pro faustissimis amorum auspiciis summum illum Finem, maximum illud bonum, quod individuum illam corporis animique voluptatem secum trahit, quodque in FRIDERICA Tua, velut virtutum quâdam parente consecutus SERENISSIME PRINCEPS, es, gratulatur. Architectonica illa & imperatrix Disci-

disciplina tota vestra est, quæ præsidium ex vestro thalamo, cui universa Reipublicæ cura superstruitur, expectandum esse docet; in cuius, ut ita dicam, territorio FRIDERICAM ipso Principi imperare, ipsis in osculis decreta figere, ipsis in amplexibus leges præscribere, jubet. Quæ in numeris & mensuris occupata est, Mathesis vestrorum quoque amorum init mensuram, quorum tantam illa æqualitatem observat, ut omnibus absoluti numeris dici possint; quanquam in virtutum vestrarum finibus ponendis de defectu artis conqueratur. Neque enim tam in cælo quam in frontibus vestris felicissimos illos adscendere adspectus videt, qui animos quasi fascinant, inque eos fidereâ quadam vi influunt: in oculis vestris ipsa habitare astra credit, quæ salutarem illum Patriæ suæ fulgorem spargant. Si inspectis cæli tabulis de Veneris compositione pronuntiandum; illam septimi domicilii, (quod vocant) ipsiusque conjugii auspiciatissimi præsidem inveniret: quæ omnia magnopere augur aliquis jactaret, nisi ab istâ, quæ in thalamum CHRISTIANI ALBERTI deducitur, Venerere, certiora, quam à Bactrianorum fabulis & imaginariis Planetarum dominiis, auspicia expectaremus. Illa omnes vos in amore lieneas, omnia tulisse puncta lætatur, amplexuum vestrorum helices metitur, ad votorum vestrorum amussim fortunæ dirigi rotam cupit: illa teretes vos & rotundos

dos videt, quales Viros bonos (quidni & matronas ?) Venusinus esse vates voluit: illa famæ vestræ & triumphanti in vobis Amori pyramides eriget: annos nobis detrahet, vestris apponet, ut ex singulorum vitis integra vobis secula colligantur, infinito bona omnia numero admetietur, &, quod sola potest, in vobis omnia omnibus demonstrabit: si demonstrari debent, quæ media in luce posita, omnium patent oculis, nec tenuissimi nostris coloribus vel umbris illustrantur. Non abest ex illarum numero omnium famula, Dialectica, quæ quamvis extremum occupare soleat; audet, tamen, sed sine solæcismo in ipso petere Principe principium: & quamvis in privatorum conjugiiis contingere casibusque subjici plurima videat; hîc tamen omnia necessariis fatorum rationibus ex se invicem cogi sentit; in immenso autem amore vestro definiendo, nihil operosis artis suæ præceptionibus juvari se intelligit. Illa copulâ sua vos necteret, nisi ea quæ inter vos intercedit, firmior esset, quam ut istis verborum vinculis indigeret: vehementer autem sibi plaudit, quod pulcherriam enunciationem: CHRISTIANUS ALBERTUS AMAT: Famam sonare docuerit, quæ brevissimorum verborum exiguo spatio multò continet maxima bona, quæ in omnes diffunduntur. Quorum omnia genera de vobis universè affirmat, cum nihil vobis ipsa negasse Natura videatur. Quia verò in illustri

stri vestro conjugio summâ omnia ratione aguntur, ratiocinationi cuidam illud comparat; quæ cum ita instituatur, ut positis quibusdam, diversum aliquod sequatur: ita ex uno compositis thalamo, CHRISTIANO ALBERTO & FRIDERICA AMALIA, aliquid ab illis diversum, præclaram aliquam sobolem, magnum Patris incrementum, magnum Matris delictum elici nimium quantum exoptat. Non defuerunt quoque studiis suis Historia & Eloquentia, affines Divæ, quæ cum pene solæ Principibus ancillentur, consiliis eorum familiarius se misceant; nec à thalamis Principis sui hîc discesserunt. Illæ calamos & linguas in laudes vestras aptabunt, è noctibus vestris integra secula contextent, omnique cavebunt opere, ne nocti suæ illustria in vobis exempla permittantur. Et nescio, an non magnæ matres dicendæ sint, quæ vos in ipso æternitatis thalamo ad omnem seculorum memoriam concipient, dum vos in vestro magnas Patriæ spes concipitis. Tandem & Poësis magnorum pedissequa Heroum, meritis suis amores includere vestros conatur pedibusque celerrimis appropinquans alta voce exclamat:

Pande Musa, pande montes,
 Et sacros reclude fontes.
 Sparge rores, necesse flores.
 Et sonoras tunde chordas.
 Vos Amores ventilatas

*Hinc & hinc movete tædas,
Hinc & hinc movete pennas,
Hinc & hinc ciete plausus!*

Gratiosa CHRISTIANO FRIDERICA jungitur

*Euge! nunc letissimorum
Advola corona Cimbrum,
Maximoque FRIDERICO,
Qui suâ descendit Arcto,
Et tuos salutat agros,
Et tuas invisit urbes,
Poplites submitte flexos,
Supplicique plaude dextra.*

Magnus ecce! CHRISTIANO FRIDERICUS jun-
gitur.

*Magna salve FRIDERICA,
Fonte tineta Gratiarum,
Et novem decus Dearum,
Aureo serena vultu,
Regio decora cultu,
Igneis micans ocellis
Cimbricas accende flammæ,
Cimbricos ascende lectos.*

Ecce! nunc in CHRISTIANO FRIDERICÆ jun-
gimur.

*Lux amœna, Lux serena,
Ter quater beata salve,
Consciis statuta fati
Maximis sacrata Divis,
Omnium petita votis,
Fulgidis notata gemmis,
Mollibus revincta myrtis,*

Omnibus festiva vicis.

Tu reductam nunc perenni jungis Arcton vinculo.

Nox venusta , Nox benigna

Ter quater beata salve ,

Luce nunc illustris ipsa ,

Cimbricis micans ab astris ,

Omnium fecunda votis ,

Omnium facunda linguis ,

Osculis signata tantis ,

Regiis serena tædis.

Tu novum reducis Orbi Cimblico nunc seculum

Vive ! Vive ! Par beatum ,

Et toris nobis ab istis

Mille nunc toros refunde ,

Mille funde CHRISTIANOS ,

Mille funde FRIDERICOS ,

Mille nobis conde secla

Mente nunc vovemus unâ.

Ore nunc sonamus uno :

FRIDERICE , CHRISTIANE , FRIDERICA Vivite !

Hæc illa effusissimo gaudio , intermistisque
jubilis cecinit , quæ Tu jurata ejus Soror , Mu-
fica , (nam & Te in aliquam ejus festivitatis ad-
mitti partem æquum est) suavissimis exprime
concentibus : Illæ vero non periturae utique
voces non aures tantum nostras circum sona-
bunt , non intra parietum horum includen-
tur angustiam , sed omnium diffundentur
linguis , omnium animis circumfe-
rentur.

De Intemperantiâ in Stûdiis, & Eru-
ditorum, qui ex eâ oriuntur,
morbis,

*cum magistratum Academiae Kilo-
niensis adiret, mens. April. 1669.*

QVando in religiosissimo hoc loco, in
ipso Æterni Numinis conspectu, in
isto Illustrium & doctissimorum Vi-
rorum confessu, in hoc ornatissimo
suggesto me versari intelligo; quando sacro-
sancti jurisjurandi, quo me modò obstrinxi,
animo recurrit memoria; quando hic mihi sce-
ptrorum splendor objicitur; quando epomi-
dem istam purpuream humeris meis incumbe-
re sentio: is mihi animum religionis horror,
perculit & consternavit, ut ille, quem hac in
sede consistere, & apud vos esse videtis, vix a-
pud se esse videatur. Quoties pallium hoc,
Auditores, quod septem Clarissimorum Viro-
rum & nuper admodum Clarissimi mei deces-
soris humeros dignissimè ornavit, mihi que jam
octavo circumponitur, intueor; toties ab illo
ruborem in genas mihi reflecti sentio, ut quod
honoris habetur symbolum, idem quoque sit
perpetuum pudoris mei documentum. Neq;
fanè me fugere tenuitatis meæ conscientia po-
test, quam res ipsa, ut ego non profitear, lo-
qvitur, & cui magnificis cum nominibus non

usque adeò convenit: neque si muneris mei partes respicio, Is sum, qvi sceptris debeam ad-moveri, ad gratisima Musarum mearum vin-cula potiùs condemnandus: quibus ut solvi me ægerrimè aliàs fero, ita nunc quoque ab earum complexibus, ad insuaves occupatio-nes, nolim facilè, si per me stet, abduci. Ac quamvis nihil horum attendi abs me debere, aliquis arbitretur: erant tamen causæ profectò gravissimæ, quas nominare hîc non attinet, ob quas dignitatem illam deprecaretur aliquis, & in beneficio reputaret, si ad alios devolveretur. Veniebat & hoc in mentem, quod, cum tantâ diligentîâ & fide omnia gesserit Clarissimus De-cessor meus, nihil mihi videam ampliùs, quàm summam æmulandi difficultatem relictam. Verùm quando meo hîc stare arbitrio non per-mittitur, dum & Serenissimi Principis ac Cle-mentissimi Domini nostri auspiciis, & vestra Academici Patres voluntate, munus hoc mihi imponitur: age ergo jacta esto alea, & divini Numinis gratiâ, Clementissimi Principis nostri auxiliò, vestro autem Patres Academici confi-liò, provinciam hanc tam arduam suscipia-mus, proque virili nostrâ ornemus. Aderit, conatibus actionibusque nostris, quem sub-missis precibus simpliciter nunc apello, æter-ni sui Spiritûs afflatu Deus Optimus Maximus; quæ sanctissima spes animum mihi contra, quascunque difficultates erigit & confirmat: Solatur prætereà vester quoque favor & bene-

volentia, quæ sub onere hoc titubanti prudentiâ suâ & consiliis subveniet: ut hoc mihi defensore, his consultoribus nihil magnoperè metuendum esse videatur. Cùm autem ex antiquo more boni ominis gratiâ aliquid sit dicendum, quod ab instituto non sit alienum, vel eâ in re ad Te Decessorem meum, Vir Clarissime, quem invitum adeò ab hoc loco dimitto, respicere, tuaque legere vestigia volui, ita tamen, ut ea, quæ marum sint partium eâdem operâ involvam. De Intemperantiâ & morbis dicturus sum, quorum ad Te spectant negotia, quod ut de tuo mihi liberalissime concedas, est quod etiam atque etiam peto: sed de iis tamen, quæ à studiis oriuntur. Eâ verò parte, magis ad me pertinent; quanquam & vestras interdum manus postulant, cùm non pauci inter illos sint, qui helleboro vestro; multi, febres præsertim, & hinc orientia ægrîsomnia, venæ sectione indigere videantur. De quibus cum pro exiguitate temporis dicere apud vos cogito; video quidem quàm multa mihi præterire, aliqua vero cursim exsequi necesse sit, & in iis tamen ipsis explicandis quantum ingenii mediocritas succumbat; nisi humanitas illa vestra, de quâ (neque enim mutus vestri me fallunt) jam securus mihi esse videor, Orationi audaciam, audaciæ veniam promptissimam largiatur.

Quotiescunque in mentem venire solet illius temporis, quo frugalitatem Reip Romanæ

olim Cæſarum luxus excepiſſet, & ſimul penſius
mecum conſidero, quàm penè eadem habue-
rint fata literæ & bonarum artium ſtudia: to-
ties luculento exemplo didici, quod & pruden-
tiſſimis quibusque & ſagaciſſimis crebrâ anim-
adverſione perſpectum eſt, ab ipſo temporum
ingenio, & ætatum inclinationibus, tum ani-
morum, tum conſiliorum & literarum momen-
ta ſuſpendi. Nam ſanè qui communis erat re-
rum omnium morbus, ipſique propemodum
intestiſtus ætati intemperantia, ita arcanâ qua-
dam virulentiâ etiam animos omnium afflârat,
ut ubique caput exſerens, nihilque intactum
relinquens, ex cõgitationis omnibus eluceſceret,
ipſis in verbis atque adeo omni in doctrinâ de-
prehenderetur. Eadem verò tempora nobis
jam eſſe reduc̃ta, nemo ibit inficiâs, poſtquam
expulſâ pridem ſuperiori ætate barbarie & i-
gnorantiâ, quæ cathedras & ſubſellia occupa-
verat, nova aurei cujuſdam in literis ſeculi fe-
licitas effulſit, quæ nunc eadem per veſtigia
relabi, & à culmine ſuò in quo conſtiterat inci-
pit dimoveri. Cujus rei aliam nunc, quàm
quæ tum fuit, cauſam nominare neſcio, ſci-
endi ſcilicet quandam intemperiem & doctri-
næ luxum, vires & exemplum à communi ſe-
culi noſtri malo capientem. Quemadmodum
enim, poſtquam à priorum temporum ſobrie-
tate & temperantia deſcivimus, nihil eſt eo-
rum, quæ ad vitæ commoditatem ſunt inſtitu-
ta, quod non ſtultitiam aliquam immani ſum-

ptu patiat, ita nunc quoque cum studiis comparatum est, ut nihil placere possit, nisi quod superbâ aliquâ ambitione, & plus quam meretricio fūco corā seculo nauseabundo compareret. Non sufficiunt jam ædificia, quibus contra aëris inclementiam nos muniamus, nisi oppida intra domos exstruamus, quæ magnâ sui parte ab oculis tantum habitantur: Non corpus modicâ nec indecorâ tegere veste placet, nisi laciniis diffuat, nisi aurô illusa undique ferreo seculo ruborem incutiat. Quando apud magnates mensa instruitur, non ad cœnam sed ad scenam accedere videmur, tot dapes velut in orchestram prodeunt, & palato nostro quasi quædam fabula paratur, cui ipsa rerum elementa sunt tributaria, & non rarò ipsa hominum pericula apponuntur. Simillimis profectò nunc apud plurimam literatorum partem moribus vivitur, postquam simplex illa & infucata animi cultura è medio sublata, & liberalia non solum studia, sed omnes vitæ civilis exercitationes contagio hoc laborare cœperunt, ut nihil penè jam amplius virtutis & artium veritate honestateque, sed per officii quandam simulationem omnia gerantur. Quis non in exiguâ & minutissimâ etiam scientiæ parte, vel amplissimè se habitare, & vel orbem possidere existimet, qui vix literarii pulveris pugillum teneat? Quis non purpurâ suâ aut splendidâ aliquâ togâ omnem se involvere & quasi in sinu gerere doctrinam putet, cujus tamen nu-

di-

ditas è misère cohærentibus centonibus undiq; prospectat? Qvis non robustos etiam & solidos sapientiæ cibos devorâsse aut concoxisse sibi videtur, qvi lacte vix nutriri incepit? Adeo scilicet pervulgata illa vitia literariam quoque Rempublicam infestant, & animos occultis quibusdam cuniculis irrepunt; quibus remedia sunt omni conatu quærenda, anteqvam illa validius contrâ medicam manum insurgant: quanqvam illam jam nunc vix agnoscere videntur. Quandoquidem verò morbum nosse suum nec dissimulare prima ad salutem via, Medico autem accuratiùs illum inquisivisse, præcipua curationis pars est: nihil quidem aliud nos nunc agemus, qvàm ut propiùs eos excutiamus literatorum morbos, qvi ex sciendi quadam intemperie suam trahere originem creduntur, medendi operâ illis ipsis relictâ, quibus eos eorumque causas ob oculos ponimus. Est enim verò, ut in corpore humano, ita & in animo & literario orbe intemperantia omnium, quos nominare quidem possumus, morborum causa, qvi non alio qvàm hoc fonte derivantur. Hujus intemperantiæ, quod mireris, princeps causa est ipsa jejunitas, & profunda quædam rerum & studiorum inter se connexorum ignorantia: quæ cum animum, qvi per hunc scientiarum orbem circumduci debebat, obsidet, uni alicui arti ita affixum tenet, ut præ immodico in illâ studio cæterarum hujus orbis partium oblitus, angustis unius

ter-

terminis omnem sapientiam metiatur. Nam cum primum non nisi uno & simplici nomine appellaretur omnis divinarum humanarumq; rerum scientia, nunquam defuerunt præclara in gloriam seculi & publicam salutem nata ingenia, quæ simplici & planâ viâ ad sapientiam grassantes, eam integram & incorruptam minori negotio occuparunt, quàm qui nunc in aliquâ ejus particulâ sibi vindicandâ tam operosè defudant, totqve in diverticula à regiâ viâ distrahuntur & penè discerpuntur. Nunc autem cum Respublica literaria in suos quasi ordines & tribus divisa, & velut agrariâ lege, aratroqve circumductô suis singulis artibus possessores certiqve domini sint assignati, singuli suâ quasi quadrâ vivant, & suas sibi res habeant, accedente imprimis ambitione, in factiones & partes dilabuntur. Innata scilicet & hac in re animis nostris est dominandi libido, nec facilè ullus est vel exiguæ etiam artis doctor, qui non illam præ omnibus efferre contendat, & inter partes officii sui numeret aliis eam anteferre. Si Grammaticos, superbissimum hominum genus, interroges, multos hîc Palæmoni similes invenias, qui secum natas secum morituras literas impudenter asseverent, & vel alios in ordinem redigere non vereantur: totam autem Philosophiam rectius longe Historicorum & Poëtarum, quos manibus assiduè terunt, quàm Aristotelis & Platonis libris doceri dejerabunt.

Philosophus sibi sapiet, nec alios facile in aliquā sapientiæ possessionem admittet, Oratorum & Poëtarum pigmenta spernet: Hi verò ut barbarum averfabuntur. Theologus alto supercilio despiciet reliquos. Jurisconsultus solum se, si Ulpiano credimus, geret veræ nec simulatæ Philosophiæ affectatorem, & cum L. Crasso apud Ciceronem omne disciplinarum & artium genus duodecim tabularum legibus, si Diis placet, statuet contineri. Atque has oriiri similitudines & liticulas necesse est, cum per familias suas distincti suis vivunt auspiciis, & ut vastius habeant imperium, limites proferre, & vel aliunde rapta & quomodocunque corrasa, rebus suis, nimia sciendi intemperie, in immensum adjicere laborant. De quibus omnibus nunc pressius nobis est & accuratius per singulas partes agendum. Quemadmodum autem bifariam considerari solet omnis doctrinæ artiumque ratio: nam vel sola in rerum contemplatione defixi, intimæ veritatis imaginibus animos pascimus, vel ipso in exercitio & operatione versamur: ita utrobique mali vis se exerit lateque propagata omni ex parte diffunditur. Porro aliæ sunt artes, quæ viam ad rerum ipsarum cognitionem sterunt, & sciendi instrumenta Philosophis supeditare dicuntur, quarum cum prima soleant esse studia, primâ hic peccatur intemperantiâ. Plurimos enim videas his rebus affixos in ipso limine non sinè aliquâ an jucunditate, an stu-

pore totâ penè vitâ suâ hærentes, similes fabro, qvi de instrumentis sibi comparandis mirum in modum sollicitus, non ut eis aliquando utatur, sed ut illorum aspectu vel possessione solâ sibi gratuletur. Agmen eorum ducunt Grammatici, in sermone eliminando occupati, magno semper in pretio habendi, si rem suam agant, nec aliorum limites invadant. Verum nulla doctrinæ pars nugarum est feracior, ob doctorum suorum intemperiem, nec in solentio-rem in cæteras dominatum affectat. Quia enim dum verborum apices in omni scriptorum genere venantur, multa illis hæret rerum, sed confusa admodum notitia, quâ deinde turgidi omnibus se controversiis perpetui Dictatores ingerunt, nihil sibi impervium, nihil tam sublime habent, quò pertingere sibi nō posse videantur. Satis opinor intelligitis A. de quibus loquor: Critici illi sunt & Antiquarii, sed semidocti & minorum gentium (neque enim Erasmos, Grotios, Scaligeros, Vossios aliosque Heroas hunc in censum refero) quorum de superbia tot sunt eruditorum querelæ, quibus nunc aures vestras nolo obtundere. Scilicet hi Reges sunt illi & Principes, hi Lexicorum Imperatores, quorum nutu gubernantur omnia, & qvi unicè ab omnibus observari volunt: Cumque jam Romanum exspiraverit in Imperatoribus imperium, ad se unâ cum lingua illud hæreditario quodam jure pertinere putant. Nihil ab istorum aliquo quasi-

veris, ad quod nō respondeat, aut Grammaticis
tricus involvat, ne aliqua, etiam illa quæ non
sunt, nescivisse videatur. Non alios etiam
scriptis orbi erudito se ostendunt, in quibus ad
minutissimas usque minutias, è seculorum te-
nebris insanâ sed obscurâ diligentia erutas de-
scenditur. Quod quidem non sic accipi ve-
lim, quasi antiquitatis studia, quæ nemo ni-
si barbarus averſatur, improbare contendam,
qui ipse eas magni semper habui & aliis com-
mendare consuevi: sed modum in eâ re esse
tenendum, & hanc intemperiem coërcendam
statuo: ne dum illam judicii vim, quæ inutili
illo labore non leviter affligitur, in rebus exi-
guis, & ad bonam mentem nihil profuturis ex-
haurimus, tum cum illa in seriis promenda est,
à nobis ipsis destituti ab aliis aptiora sentienti-
bus rideamur. Annon diligenter conquisita
sunt & religiosè servantur monumenta etiam
vilissima, nummularum, lapidum? Annon
immedi de ludis, circis, nuptiis, funeribus
libri conscripti sunt, è quibus, cum opus est,
ad satietatem petere licet, ut profectò ina-
nis & superstitiosa sit opera, illis inqvirendis
immorari. Quid enim in fece & rubigine an-
tiquitatis ætatis nostræ animique florem con-
sumemus, cum tota nobis se pandat rerum
mater natura, tot se offerant rerum priscis in-
cognitarum inventiones, quibus operam im-
pendere multò foret utilius & honorificentius.
Non possunt iidem hunc intemperantiæ mor-

bum dissimulare, cum ad interpretandos autores accedunt. Quàm hîc illos tumultuari, rixari, dubitare, opinari, conijcere, ædificare diruere, quadrata rotundis mutare videas: quâ in cumulandis ad quævis obvia, locis, quos vocant, communibus, communia plurima & tritissima sectari, imò illuc planè nō pertinentia, nō sine fastidio animadvertas: ut Bacchi illa κέρνικον, in quo papaver, triticum, allium, hordeum, pisum, ervum, cicer, lens, faba, avena, carica, mel, oleum, vinum, lac, quin etiam illota ovis lana congerebantur, legentibus videantur. Et illi quidem homines satis se consecutos esse gloriæ autumant, si ut pro librorum helluonibus ab imperito vulgo habeantur, totam ubique bibliothecam in commentariis ostentent, quos postquam legeris, ne sensum quidem auctoris, qui in tantâ sylvâ anxie quærebat, fueris affecutus, animum verò tot rerum indigestarum congerie impeditum planè referas & intricatum. Multi istorum hominum, idcirco, ni fallor, bonos mihi legere autores videntur, ut errata in illis inveniant: quod per inde est, ac si quis iter ingrediatur, ut scrupis aut lapidibus incurrat. Paucissimos invenias bonos autorum medicos, qui corrupta restituant, ægra sanent, vulnerata cicatrice obducant: longè verò plures, qui latronum & carficum instar integra mutilent, sana & recta contorqueant, & quemadmodum Procrustes corpora longiora amputando, breviora extendendo le-

Et o suo aptabat, omnia ad ingenii sui vel capacitatem vel angustias examinent vel exanimant. Haftenus illos in domo suâ adorti sumus, viamque etiam in foro suo errantibus monstravimus; iidem verò infeliciter etiam alieno in regno jus suum exercent. Cùm ex eorum genere aliquis quancquam aliàs cæterorum gloriam eruditione supergressus, in Prudentiæ Civilis arenam descendisset, Regumque causas egisset, statim animadvertit seculi sagacitas, quàm impares afferret laceratos, nec istis rerum argumentis, quæ causam hanc satis decerent, pugnaret. De quo non semel conqvesti sunt Viri gravissimi, qui alio defensore tempora egere illa, judicabant. Quoties cum Jurisconsultis manus conseruit, toties medius deprehensus, nunquam sine atroci vulnere dimissus est. Astrologiæ vanitatem cùm diffuso admodum volumine impugnat, magna tibi certè ex hoc hiatu promittas: cùm tamen si rationum momenta inter se contuleris, vehementer ea corvos ludant hiantes: nam vel è Grammaticorum armamentario deprompta tela, statim ubi figuntur, hebescunt, vel si quæ rem ipsam ferire poterant, levia sunt, & à scopo, vi ineptæ illationis, aberrant. Quare, si quidem rebus omnibus se integros incolumesque velint Criticorum filii, aliorum præstantium virorum exemplis, sibi quid ex usu sit discant, nec temerè aliorum cedant vineta, qui illis sylvas suas & horrida

tesqva non invidebunt. Temperantius res suas agant, nec aliâ fini, quàm ut gravioribus disciplinis ingenia præparent, sibi que & aliis interiora sapientiæ adyta aperiant. Neque enim sola ista doctos faciunt, sed doctrinæ potiùs fucô animos imbuunt, quos cum isti ingenii sui acie diu limârunt, denique prius atterunt & confringunt, quàm acuunt. Nec solido aliquo cibo ista omnia pectus saturant, sed putido & ventoso tantùm distendunt: nihil lucis mentibus affulgent, sed tenebris potiùs involvunt, ut si quando in rem ipsam veniendum, si salubrioribus patriæ consiliis subveniendum, noster domi non sit, & in alium orbem delatus sibi videatur. Verum eos tandem ut dimittamus, tempus nobis aurem vellicat, si tamen prius summi literatorum suo seculo Principis J. Cæsaris Scaligeri, de Grammaticorum grege elogium, quod inter carmina ejus reperitur, illis oggesserim:

*Plus pœnitet me temporis, quod impendi
In Grammatistas & leves locutores,
Vanas Poëtarum atque perditas nugas,
Quàm barbarorum, quæ leguntur in libris.
Hæc est mearum totta summa summarum:
Stultum ac supinum plumbei que diliri est,
Rebus relictis consenescere in verbis.*

Altera nunc me vocat Oratorum classis & Eloquentiæ studia, quorum in vita communi omnibusque in negotiis sacris, civilibus, familiaribus usus tam longè lateque patet, ut potissim-

simam ætatis nostræ partem in his censeam insumendam. Nam cum cæterarum disciplinarum in se bonarum & laudabilium usus interdum intempestivus & intemperans in reprehensionem incurrere possit; Eloqventia tamen abs se necessaria semper est, & omni in causa requiritur, ut nunquam possit culpari, nisi ab inepto ingenio, nec cum opus est, nec cum modo usurpetur. Nec desunt (quam singularem quorundam artem non dissimulabo) qui ideò impensius sermonis student culturæ, ut, quando speciosâ hac veste publicè comparent, majorem in omni doctrinæ genere de se excitent opinionem, & sententiarum suarum adstipulatores facillimo negotio inveniant. Ipse facundiæ parens Cicero vix haberet, cur in cæteris Philosophiæ partibus magnoperè gloriaretur, nisi quæ in libris suis disputavit, eloqventiæ suæ luce illustrasset. Quod si verò vitia, quæ in Eloqventiam non pauca irrepererunt, intemperantiæ adscripserit aliquis, non repugnaverim: cum negari nequeat, sæpè, ut intemperans seculum est, intemperantes esse hominum lingvas, & ultra civilis dictionis simplicitatem modò inaniter turgere & diffuere, modò præcipitibus & hiantibus sententiis frangi: quanquam à perversâ in Scholis informatione magnâ ex parte quicquid eâ in re peccatur, manare certum sit. In diffuso illo & ventoso dicendi genere, quod plus sonat quàm sapit, vix salis aliquan-

do micam in toto verborum Oceano reperias, quæ extra alveum & litora feruntur, & à fine suo quàm longissimè recedunt. Quæ non nisi per longas ambages ingenii quodam æstro ac furore quaquaversum sine lege, sine ordine agitata peregrinatur oratio, sui fastidium præmittit, antequam molestè expectata aures illabatur, ac aërem potius flagellare, quàm animos ferire consuevit. Vidistis aliquando majores illas literas ingeniosi alicujus Scriptoris manu exaratas, quàm multis illæ linearum ductibus, & quodam quasi labyrintho implicentur, omnique ex parte ceu reticulis quibusdam obtexantur, cum post anxiam illam ac aliquot horarum operam, nihil amplius quàm *ἀλφω* & *βῆτα* legatur. Hæ literæ Asiaticæ Orationis vobis faciem quàm elegantissimè depingent, quæ verborum magis fecunda quàm rerum, cum diu inani auditores expectatione torque- ret, & nescio quid augusti minaretur, tandem ex illa quædam promit, sed magno sermonis apparatu incrustata. Ex adversâ parte regium Eloqventiæ paludamentum in lacinias con- scinditur, dum coactæ in turbinem sententiæ, velut fatua quædam è pelvi fulgura vibrantur, quæ, cum in animos descendere nequeant, solis sensiculorum quibusdam illusionibus de- tinent Auditorem, & leviter sui admiratione aures titillant. Unde oritur ea sæpissimè ob- scuritas, ut Divino potius aliquo in conjectan- dis sensibus, quam interprete opus esse videat-
tur.

tur. Affinis Eloquentiæ Poësis est, sed numero syllabarum pedumque mensurâ, & dictionis habitu diversissima: quam parcius attingere, svaferim ei, qui civilibus negotiis aut aliis severioribus studiis se destinavit. Qui enim, absque illo impetu, quo Musarum aguntur filii, ad eam accesserit, magno primum labore macerabitur, ut versus aliquot componat: qui si etiam ultrâ mediocritatem assurgant, vix operæ pretium fecerit, ut delicati jam sæculi plausum mereatur: fin verò ingenitâ quâdam propensione ad poëmata pangenda feratur, videat, ne blandissimâ carminum vi quasi effascinatus illic hæreat, inter ipsas metamorphoses mutatus, vel In campis Elysiis, aut in Parnassii jugis oberret animus, cum in necessariis magis studiis illum habitare oportebat. Non aliam ob causam sapientissimus Imperator Antoninus libro, quem de rebus suis scripsit, Diis gratias agit, quod non magnos progressus in Poëticâ fecerit: metuebat enim ne ista studia, se præpeditum detinerent. Eisdem fortè rationibus inductus Balzacus, Vir inter Gallos doctissimus, idemque Poëta elegans, in præclaro illo, quem de Principe patriâ linguâ conscripsit, libro asserere non dubitavit: Quod si, integra aliqua natio Dialectices vel Poëseos morbo laboret, frequentioraque sint Sphærarum & Astrolabiorum, quàm aliarum rerum magis necessariarum commercia, non procul à ruina sua abesse censenda sit. Hæc verò non eò dico,

quasi Poëtas è literariâ Republicâ planè ejici velim, sine quorum lectione docti nomen nemo tuebitur, & quos viro secretioris prudentiæ arcana rimanti multis modis prodesse posse, certissimum est. Quin tulit hæc ætas non paucos, Poëtas summos, qui tamen nec ad res gerendas inepti, nec ad illustria munia obeunda ingenio impares accesserunt; sed summâ cum gloria iisdem defuncti fuerunt. Quibus exemplis illorum hominum calumnia facilè retunditur, qui in ipsa scientia, nec potius in infano ejus studio ac intemperanti usu, cui prudentior aliquis facilè moderatur, crimen, quod iis impingunt situm esse existimant. Et his tamen imputationibus effici illud solet, ut vel nulla vel mala cultoribus suis bonæ literæ lucrentur præmia, barbari autem & semi docti homines de illis ubique triumphent. Nemo tamen hæc in re, ut autumo, impurum Epicuri os audiet, qui homo minimè bonus & nequam, Poëtas tamen virorum bonorum consortio excludere ausus est, dum viro bono ac sapienti, sed quem ex ingenio suo informat, omne Poëseos studium interdicit: quo longè saniora sensit Strabo, qui bonum Poëtam, nisi vir bonus sit, fieri posse negavit. Mitto plurima, quæ ad hunc locum pertinere posse videbantur, cum ad ipsam rerum cognitionem, de quâ amplius dicere debemus, nobis sit prope-randum. Est verò in universum de contemplationis studiis id tenendum, nihil illis esse divi-

divinius, & ad perficiendam mentem & sibi ipsi quasi reddendam præsentius remedium: in quibus tamen, si cum modo non verferis, aut pro veritatis luce sophismatum nebulas, ut ille in fabulis pro Junone nubem, amplectâris, facile ex insano illorum amore pro genuinis sapientiæ ideis notionum centauros & Chimæras, monstrosos nugatum & impiorum dogmatum fœtus sis suscepturus. Quin non rarò ipsa etiam innoxia horum studiorum tractatio multum intemperantiæ adjunctum habet, dum animus à rerum civilium contubernio in se ipsum vocatus, & quasi carcere quodam detentus, nunquam liberos ad prudentiæ negotia spiritus afferre potest. Quare nisi per muneris sui partes incumbat, vel in honesto & liberali otio quis constitutus spernere ambitus seculi queat, nunquam svaferim, ut aliter quàm in quantum ex iis ad utilitatem publicam referre potest, in iis versetur. Hinc inter perdita ingenia à Cardinali Perronio, in excerptis istis, quæ consignârunt Puteani Fratres, numerâtur, quæ uni alicui è sex istis se applicant, quadraturæ circuli, multiplicationi cubi, perpetuo mobili, lapidis, quem vocant Philosophici, præparationi, Astrologiæ divinatrici, & Magiæ: quod illa omnia hominem sibi ipsi quasi fuerentur, & judicii vim infringant, quæ magis perficiatur in rerum civilium magni alicujus imperii tractatione. Plura his addere potuisset inutilia Philosophiæ crepundia, quibus pue-

rilem in morem multi se olim hodieque oble-
ctant, Philosophorum, quibus eò magis inge-
nii vis in rerum civilium usu retunditur, quò
sunt illa sibi ipsi & onerosa magis & inutilia.
Primatus jure quodam Philosophiæ, quam vo-
cant, primæ conceditur, quæ quò subtilius ab
omni materiâ & singulari rerum statu abstra-
here animum jubet, eò longius ab aliorum ne-
gotiorum commercio peregrinatur. Magna
hujus omnem in partem patet vis, perque to-
tum istum literarum orbem diffunditur, ut u-
nâ cum Dialecticâ, quæ illi affinitate juncta,
& quam proximè hæret à latere illud, quod in
fabulis Poetarum decantatum est, Ariadnes fi-
lum in rerum cæterarum labyrintho erranti
subministrare videatur. Superiorum tamen se-
culorum hominumque in istis studiis intem-
perantissimorum vitio factum fuit, ut illæ dire-
ctrices scientiæ ipsæ inextricabili labyrintho,
quàm simillimæ redderentur: Nam cum sum-
mus Philosophorum Parens Aristoteles lucu-
lenter hîc facem prætulisset, illi pressiora ejus
vestigia dedignantes, per diverticula in sylvas
& tenebras dilapsi, ita umbrosis & spinosis du-
bitationibus, quæstionibus omnia involve-
runt, ut si suos ipse redivivus Aristoteles vide-
ret discipulos, seipsum in illis desiderans non
Philosophos, sed Scholarum quosdam rabulas
& tintinnabula inveniret. Quam enim, Deus
bone! sterilibus & cucurbitariis contentioni-
bus immensa videas impleri volumina! quàm

ætumnosis laboribus de nihilo aliquo scribitur, disputatur, contenditur! ut cum hæc lego, cœnæ Heliogabali adfidere mihi videar, in quâ fistilia, lignea & marmorea fercula, oculos fortè, minimè verò pectus saturatura apponebantur. Invenimus etiamnum in literatorum numero Domitianos, qui inter religiosa Musei sui silentia, cum tu in mysteriis illos sollicitos suspiceris, non nisi muscas captent & stylo configant. Sunt, qui, ut Heliogabalus ex tota urbe; ita ex omni scientiarum orbe araneorum telas colligant. Sunt Caligulæ, qui ut devictum sibi literarum Oceanum ostendant, inania quædam conchylia in triumphum ducant. Hi tales cum serium nihil sapere aut viris digna agere queant, puerili studio malunt.

Ædificare casas, plostello adjungere mures,

Ludere par impar, equitare in arundine longâ,

quàm voces viro sapiente dignas promere, consiliis Rempublicam adjuvare, solertissimis inventis vitæ communi succurrere. Et videas tamen non nunquam ad internecionem usque bella illis de re nihili geri, magno ardore nec minore etiam ambitione & fastu, quæ domi non componuntur, sed alias etiam propiores disciplinas simul involvunt. Ad hanc intemperantiam credo respexit Cardanus, cum in libro de utilitate ex adversis capienda de Primæ Philosophiæ studio dicit, quod hominem faciat ambitiosum, ingenio turbulento & ancipiti, callidum, cæteras disciplinas negligentem;

nam

nam verum & genuinum ejus usum nemo sanus his criminationibus impugnet. Cæterum si ex utilitate, quam Vir Civilis inde habere queat, potius quàm ex aliâ fini æstimandum sit, paucis, quod Neoptolemus ille Ennianus dicebat, ut hîc philosophetur, autor illi fuerim: nam planè non attingere, & ipsum Viro Civili, quem nihil, quoad ejus fieri potest, ignorare decet, est indignum. Venio nunc ad Philosophiæ naturalis & Mathematicum studia, divina, regia, magnifica, gloriosa, quæ non delectant tantùm & perficiunt mentes viri sitientissimas, sed immensâ utilitate suâ, omni invitâ, omnibus in negotiis se exerunt; siquidem non intra otiosas tantùm speculationes suffocentur, sed ad operationes ipsas procedant. His fontibus & agrorum cultura, & medendi ars, & si quæ necessitatibus humanis aliæ subveniunt, derivantur. Quò verò major fuit eorum studiornm, naturalis imprimis Philosophiæ, superioribus seculis ignorantia, eò fecundior intemperantia passim fuit Autorum, qui naturam non tam è naturâ quàm è cerebri sui angustiis depromptam fastidiosis commentariis magis intricarunt, quàm explicuerunt. Nunc verò cum sentire incipiunt, quàm sit, stultum unius autoritate Philosophi, hominis tamen, & sæpè etiam errantis naturæ operationes definire, viam ingressæ sunt, non jucundam solùm, sed & honorificam illustres animæ, quò & rigidissimis per ignem experimentis, & sa-

sagacissimis observationibus Naturæ sacrarium felicius expugnarent. Neque possunt nunc studia illa segnius procedere; postquam tot, solertissimi viri in indefessam naturæ indagationem Regiis auspiciis conspirârunt. Et vidimus profectò intra exigui temporis spatium, plus incrementi studia hæc, quàm integris olim seculis sumpsisse. Non requireret fortè à nobis aliquis, ut omnia, quæ dici hîc de variis in natura, medendi arte, & mathefi novis observationibus & inventis possunt commemorare: nam integris illa libris & annalibus orbi exponuntur, nec modicâ aliquâ oratione possunt, comprehendi. Malim quoque aliis varios illos errores, ex sciendi intemperantiâ illis in disciplinis ortos, discutiendos relinquere, præsertim cum infinitus eorum numerus sit & magnis voluminibus à scriptore non uno detegantur, quàm hîc nimis multus inveniri. De Chimico & Astrologico studio multorum voculas audire mihi videor, indignius, quàm par est, ea tractantium; nam reperias etiam nunc nonnullos, stupore nescio an malitiâ omnem Chemicam, artem improbantium, quibus & aliàs & nunc quoque à doctissimo Daniæ Medico satisfactum arbitror. Astrologia, in primis illa, quæ circa hominis temperamenta, morbos, agrorum proventum & similia versatur, non adeò incerta est, totque documentis probata, ut in naturam iniquum oporteat esse, qui aliter sentit: quamquàm is, qui è Philologorum numero in-

infeliciter Astrologos adortus est, ne quidem temporum illas variationes, fluxus & refluxus maris, incrementa & decrementa humorum, sideribus adscribere velit, quæ sanior tamen, aliquis vel manibus palpet. Verum hæc, quæ dico, nolim tamen eò quis rapiat, ac si superstitionum quarumcunque suscipere in me patrocinium velim, à quâ culpâ non abesse video Morinum Gallum, facundum cæteroquin & doctum Astrologiæ defensorem, qui eo in libro invictam illam Gustavi Magni fortitudinem, non tam animo ejus excelsò, quàm gladio, quem sub certâ siderum compositione fabricatum, variisque Planetarum characteribus insignitum casu nescio quo se accepisse, gloriatur, majorinè dicam insaniâ, an in sanctissimos manes injuriâ adscribere non veretur. Sed relinquamus suos Astrologis orbes æthereos, & cum Socrate, qui Philosophiam, primus ex astris in terras, urbes & domos deduxit, eam disciplinam videamus, quam Regiam scientiam, summus ejus Doctor Aristoteles vocat, & quâ omnem omnino vitæ humanæ prudentiam comprehendit. Scilicet hæc illa est A. O. quæ populos immanitate barbaros, moribus feroces, sensu discrepantes, componit, animat, regit ac movet. Hæc Viro Civili directricem prudentiam largitur, quâ omnes eventus Reipublicæ, prospiciat: Sapientiam, quâ honesta ab inhonestis, ab inutilibus utilia discernat: Magnanimitatem, quâ re-

religionem in templis, pietatem in civibus, concordiam in consiliis, justitiam in foro, felicitatem in eventis tueatur. Non unâ autem ratione illa considerari potest: namque vel præceptis tantum continetur, vel ipsam actionem deducitur, cujus quidem gratiâ præcipuè illa docetur, & ex qua unicè illa à prudentibus spectatur. Nam cum scire levius aliquid sit, quam esse, nec vel in cathedris aut inter amicos philosopho illo & magnifico ore disertum esse adeo laudabile sit, quàm virtutem illam, quam profitemur, in vita exercere, meritò hoc præ illo æstimabitur, & boni viri titulus viri docti elogio præferetur. Audiamus hîc monentem Senecam: *Magno, ille inquit, impendio temporum, magnâ alienarum aurium molestiâ laudatio hæc constat. O hominem literatum! simus hoc titulo rusticiores contenti: ô Virum Bonum!* Audiamus illum, ô Mei, ne ejusdem querelas, quod postquam Viri docti prodierunt, boni jam desint, nostro exemplo adfirmemus. Peccari autem utrinque intemperantiâ quadam potest: nam qui ex libris illam & rerum gestarum monumentis petunt, iis mihi similes videntur, qui magnam armorum copiam undique anxie conquirunt, non ut iis adversus hostem aut pro patriâ utantur, sed ut armamentarium domi habeant, & benè instructum, & bellè ornatum, quò hælectare, se & ostentare aliis possint. Qui verò in Republicâ versantur, & civilibus negotiis impliciti in rem præsentem utilissima præcepta deducunt.

I du-

ducere laborant, sæpe ingenio extra virtutis limites egresso in malas artes incidunt, quarum nunc magistri ubique triumphant, & cum plausu etiam seculi se efferunt. Cæterum eos, qui custodes gubernatoresque civitatum Res communem utilitatem continentes, quas publicas vocamus, opere ipso tractant, non unius intemperantiæ incuses. Quidam enim illorum studiis, quæ à vitæ consuetudine & ab agendi efficacitate abstinent, nimium sunt dediti, cum nihil magis cum negotiis pugnet, quàm otium literatum, & nihil quidem vivi homines sperare sibi ab isto habeant, qui non nisi cum mortuis novit conversari. Alii ita abs bonis literis alieno sunt animo, ut in earum perniciem conjurationem iniisse videantur. Cum enim ipsi indocti ad res gerendas vocentur, nec desit illis Aristippi alicujus ingenium, & cæcus quidam fortunæ favor, omni operâ laborant, ut in consilii societatem cooptentur sibi quàm simillimi, qui mutuas inde in calumniandis bonis literis operas jungunt, quasi nullus earum in Republicâ usus, aut omnis animi vigor & vivacitas iis interficiatur. Quos, si conscientiam eorum interroges, plùs sæpe occultis literarum subsidiis adjutos invenias, quam quis credat, vel illi ipsi fateantur: qui ne id quidem, quod dextrè & feliciter affectant, sine civili aliquâ doctrinâ tacitè in eorum actiones se diffundente, & à rerum gestarum experientiâ acquisitâ exequuntur. Hinc tot errores tam in-

Republicâ benè regenda, quàm in partibus ejus administrandis videas, quos oriri necesse est, cum illi eâ in sede collocati, quos omnem disciplinarum complexum attigisse oportebat, perspicere nequeunt, quos tribunalibus, quos cathedris præficere dignè satis possint: de quo tamen, nisi me omnia fallunt, Viro Civili imprimis erat cogitandum. Quare cum confesum alicujus Senatûs, à tali quodam bonæ mentis jurato hoste institutum videas, signiferum aliquem intueri possis, in quo nonnisi stupido tauro, vel cornu ferienti capro, vel rapacissimo leoni, vel virulento scorpio locus conceditur: cum interim Hercules, vel Cepheus, vel Perseus aliquis ad eorum pedes recumbit, totusque Semideorum ordo excluditur. Præclara Prudentiæ Civilis propago est Jurisprudentia, pulcherrima non solum, sed & latè patens disciplina, quæ non levi etiam intemperie laborat propter cultorum ejus quorundam intemperantiam. Sunt, qui ex legibus solis sapere satis sibi putant, neque ad æternum illud jus, quod animis nostris ipsa natura insemnavit, ipsæ gentes communi suffragio probârunt, & Philosophia nos docet, respiciunt. Invenire hîc est tenebricosa quædam Rabularum ingenia, qui Philosophiam à Jurisprudentiâ infelici sejungunt divortiô, cumque ipsi majestatem ejus non satis capiant, nec à quâ matre augustissima filia procedat, angustis illam litigantium subselliis circumscribunt, & reciprocis al-

tercantium latratibus determinant, formularum potius cantores vocandi & leguleji quàm Jurisconsulti. Est præterea non obscurum, intemperantiæ indicium ista fastidiosorum, commentariorum multitudo, ista quæsitæ sententiarum novitas, supervacuarum quæstionum vanitas, quibus explicandis integrum impenderes seculum, & in quibus Hercules ipse laborem inveniret decimum tertium. Expugnanda horribilia illa Glossatorum agmina, e quorum fordibus aurum, quod in Ennio fecit Virgilius, exsculpendum est: Tot denique contrariæ leges conciliandæ, quas vel falsa quorundam invexit opinio, vel otiosa & iners quorundam subtilitas excogitavit. Malunt enim nunc viâ confragosâ & asperâ ingredi plurimi, quàm planâ & simplici, & febriculosas aliquas ostentationes rerum copię & sensuum gravitati anteferre. Quare videas sæpe incomparabili & juventutis & temporis dispendio frigidis quibusdam nugis chartas onerari, aut paginas infinitis testimoniorum numeris turgidas lectoribus velut offam in os objici, paucos nodos solvi; plurimos verò etiam in scirpo quæri. Quemadmodum jam hâc ex parte superstitiosâ quorundam legum observantiâ peccari dicas; ita ex alterâ longè perniciosior error eorum se oggerit, qui non cerris legibus, sed solis Juris Naturæ & Gentium communissimis præceptis, quæ interpretantium libidini hinc patent, jura & sententias dicunt definiendas.

At

At ii non perpendunt, quàm salutare Philo-
phi sit monitum, ut quàm paucissima Judicis
arbitrio, plurima, & si fieri possit omnia legum
functionibus relinquantur. Quis non videt,
quam multa & penè innumerabilia percensere
orando queamus, nihil tamen argumento no-
stro alienum, aut præter negotium acturi, si
accuratè cogitateque ea omnia, quæ in no-
strum cadere institutum poterant, persequa-
mur: sed & modestiæ studendum & tempori
consulendum est, cuius certibus finibus meam
orationem, ne infinitè fluat, sentio circumscri-
bi. Intellego tamen, quandoquidem ipsèmet
mihi necessitatem ejus rei imposui, de præci-
pui istis morbis, quæ intemperantiam hanc
consequuntur, adhuc esse dicendum: qui licet
sint numero non pauci, uno tamen è fonte pro-
manant omnes, quem superbiæ nomine ap-
pellabo. Est verò nec illa unius generis pro-
ingeniorum, quæ in studiis versantur, habitu-
dine: Quemadmodum enim Philosophus
quosdam naturâ servos, alios verò Reges no-
minat; ita etiam literatos homines observes
regio quodammodo & habitiori spiritu per o-
mnia profundissima agitari, alios verò nativâ
quasi & ingentâ tarditate humi teneri, alio-
rumque sententias servili quodam obsequio
venerari. Utrique hominum generi sua est
superbia: illis quidem è vastitate doctrinæ,
quam ex toto scientiarum orbe collegerunt: his
ex intemperanti minus, & quidem exigui studii

cultu, cæterorum verò grassissimâ ignorantia, vel tumultuariâ aliquâ cognitione excitata. Illi, ut non sunt omnium temporum Phœnices, sed inter literatos Rhodio illi Colosso similes, cujus ne digiti quidem mensuram minores statux assequebantur: ita meritò summo in honore à cæteris minorum gentium Diis habentur: quorum tamen nominis gloria erroribus etiam palpabilibus ad omnem solet posteritatem patrocinari. Talem jure quodam jam ab ævo suspexerunt Philosophi Aristotelem, virum incredibili & divinò propemodum judicandi vi omnia complexum, quem ego tamen cum viro quodam docto humanæ intelligentiæ finem, absolutionem naturæ postremam, qui summo Dei consilio mortalibus sit expositus ad intuendum, ut eo duce ac magistro scirent, quicquid humanus animus cogitatione assequi potest, nolim fœdissimâ adulatione appellare. Non fert jam instituti mei ratio, ut elenchum errorum texam, quos in Aristotele omnes, nisi vel insigniter stulti, vel impii etiam sint, agnoscent: nam non est exiguus eorum numerus: Illud saltem dissimulare nequeo: non esse, cur Philosophiam ejus naturalem (alia enim non adeo impugno) pro oraculis aut divinis effatis habeamus. Ea tamen quorundam est pervicacia, ut errores etiam manifestos ejus non dimittant. Risum tenere non potui, cum in Licetum, Philosophum & Peripateticum insignem de viâ, quam vocant, la-

lacteâ disputantem incidens Aristotelis de eâ sententiam (qui inter meteora eam refert) cum Mathematicorum scholâ ita conciliare observarem, ut duplicem eam faceret, cœlestem aliam, aliam verò aëriam, quam posteriorem ille inter meteora referri dicebat. Vidi non semel, qui aërios Cometarum natales, contra omnes Mathematicorum evidentissimas demonstrationes, omnemque fidem, obstinatè & cum convitiis etiam defenderent. Vidi qui corporum effluvia contra rationes, imò contra manifestos sensus negarent; negaturos etiam intra oleam vel extra juglandem duri aliquid esse, si negasset Aristoteles, vel oculos opinor sibi effossuros, si aliter quàm Peripateticè rerum naturam intuerentur. Verum ignosci tamen his erroribus potest, si Philosophiæ fines non egrediantur, nec in sublimiores scientias, atq; adeo in ipsum Theologiæ sacrarium irrum pant, quod non prioribus tantùm seculis sed hodieque fieri, maximo Ecclesiarum incommodo, sæpissimè experimur. Solet enim plerumque plus in religione turbarum esse ab illâ doctorum, quàm imperitorum hominum superbiâ, qui comprimere animos suos & sedare arrogantiam nonnunquam consuevêre. Quanquam & illi, præsertim si ingenio asperiori sint, ac abollæ alicujus autoritas accesserit, intolerabiles, nec Ecclesiæ solùm, sed & Reipublicæ omnibusque cordatis graves & intratabiles inveniantur. Non potest autem te-

merè gravior orbi erudito ab illis accedere molestia, quàm ab ineptâ istâ librorum scriptione, cui, quò quis illorum est imperitior, variaque & tumultuariâ lectione confusior, quam maxime indulget. Etenim cum in Chao aliquo informi scientiarum semper habitant, quod, quia luce istâ mentis destituitur, nunquam in orbem justâ & aptâ proportionem distinguitur & efformatur, nihil quidem inde quàm meræ tenebræ & umbræ possunt expectari. Si quis enim illis Vulcanus securi caput aperturus sit, pro pulcherrimâ aliquâ Minervâ tenebricosam ejus noctuam prodeuntem: intus verò in cerebro intestina lingvarum, scientiarum artiumque bella, totque notionum & conclusionum velut ventorum ex Æolio utre erumpentium luctas spectaret. Nec possunt illi per ingenii sui turbas animadvertere, nihil esse tumultuariâ lectione & nimis multâ bonæ menti perniciosius, quæ cum mille oneratur & gravatur minutiis facultatem, quæ meditando se exerit, vel atterit, vel planè etiam exstinguit. Quare nemo miretur, à monstris ingeniorum non nisi monstra librorum in lucem produci, quæ tennerrimè tamen ab illis amari, & magnâ cum ostentatione seculo videas commendari. Nemo illorum operæ pretium putaverit, uno aliquo libro orbi innotescere, nisi Bibliothecas omnes, omnes impleat pluteos, & integris operum centuriis, totâ foliorum myriade ineptissima lucubrationum suarum somnia doctioribus

bus ridenda exponat. Nulla oritur animo cogitatio, quæ non statim voluminis alicujus res sit, nec illius cum Isocrate in nonum annum premendi, sed citius quàm pyrum vulpes comest, jam confecti, in quo ex omni verborum habitu, quæ non apto inter se ordine procedunt, sed velut in turbâ aut seditione populi fieri solet, omni ex angulo convolant, & ut apud Theocritum est ὡς εὖνθ' ὡς ὕες, ille festinantis anhelitus apparet. Atque ut diffusioribus paginis libri turgescant (nam id unicè illi curant) tot otiosè dicta otiosè repetuntur, auctorum myriades laudantur, tot testimonia eaque satis spissa ad rem nihili probandam, nec ubi opus est, adducuntur: quæ si dempseris, vereor, ne cum magnâ illis solitudine in theatro suo sit conflictandum. Quoties talibus interdum in libris plusquam Ulyssæis erroribus mihi peregrinari contingit, Auditores, in Africam mihi delatus videor, quam undique pulcherrima cingunt & vastissima flumina, ut magna tibi inde promittas: cum intus nonnisi steriles arenas & infinita monstra deprehendas, quæ inter timidus ambulans viator pulveris nimbo penè suffocatur. Nam fallunt, plerumque titulo emptores, ut Pharrasius picto velo spectatores, quem cum mirè illi ornent: jam enim tropæa, triumpho ante victoriam indicia; jam columnas caduci operis fulcra, & nescio, quæ vultus imitantia signa ferarum splendidè depingunt; jam minio, quo

triumphantes olim ora solebant , frontem libri, in perpetui credo pudoris testimonium oblinunt: ut tu, qui omnia ista spectas, magnam rem agi juraveris, qui propius tamen admissus, ut in pictorum pergulâ, veri nihil omnia ficta offendas. Quis non illorum est, qui præ nimia viduitatis impatientiâ cum Didone hîc exoptet: Saltem mihi parvus in aula luderet Æneas! Adeo improlem intellectum omnes fastidiunt, qui cum bonæ mentis semine destitutus generare abs se nequeat, alienos partus vel adoptat vel furatur. Iste enim ubique nunc mos invaluit, ut vel optimi cæteroquin scriptores ab hac culpâ non adeo immunes sagaciores quidam invenerint. Possem & ego Autores aliquot nominare, celebratissimi aliàs nominis, nisi famæ eorum parcerem: qui cum in opere aliquo versati fuerunt, adeo dissimulant libros ejusdem argumenti, sed peregrinâ lingvâ plenissimè scriptos; cum tamen lecti & descripti auctoris indicia ubique prodantur, ipsumque Auctoris nomen uncialibus literis in frontispicio libri comparens novas frondes, & non sua poma mirari videatur. Non potest profectò raptor aliquis Cacus tam profundè quædam abscondere, quin Hercules ejus legens vestigia, in ipsâ illum spelunca suâ adoriatur: nec corvus adeo tacitè furtivis pasci pabulis, quin clamore suo noscatur. Est verò non simplex illa furandi ars, sed multis instituitur modis: quosdam enim illis autolycis dicas simillimos, qui

qui ingeniosè admodum ungulas suas tegunt: quorum furta frustrà etiam per lancem & lici-um quæfiveris: rudiores verò alios & manifestos raptores, quorum quò insolentior audacia, eò præsentior pœna est. Sed priorum dolos & technas investigare non fortè inconveniens erit vel ab instituto nostro alienum. Nam sunt, qui pauca & exigua quædam multis subducunt, ac iterum alio habitu & formâ componunt, & inter se implicant: similes illis, qui nummos non rapiunt integros, sed eos circumcidunt: quo parum quidem nummi pretio de-cedit, multum tamen lucri è præsegminibus in unam massam conflatis, acquiritur. Illis quoque, ut artes suas celare melius possint, hoc in more esse videmus, ut nunquam ejus quem describunt, vel verbo mentionem injiciant, vel etiam convitiis, ubi id commodè possunt, proscindant, ne quis amicè adeo illos conspi-rare, & uno interdum ore loqui suspicetur. Et hi quidem ingeniosius furantur; alii tutius, qui latrociniis etiam furta sua celant: dum enim metuunt, ne eorum aliquando rei agantur, superstitibus, quibus convinci poterant, docu-mentis, bonos autores & nihil meritos flammis in cineres redigunt, ne vel ex eorum ossibus ul-tor aliquando exsurgat, quod veterum Philo-sophorum multos fecisse memoriæ proditum est: nunc enim Typographiæ beneficium eo-rum conatibus obsistit. Quanquam & illa, nunc aliâ ex parte plurium furaces & intem-pe-

rantes calamos provocet, ut Viri cujusdam doctissimi sententiam non adeo improbem, fecundiorum Atheorum post inventos typos natam segetem statuentis, plusque nunc cum minus scribitur describi, quam olim nunc manu omnia scriberentur. Hæ fraudes plurimam partem ex illâ lectionis intemperie, velut à stirpe quâdam excrescunt, dum obvia quæque in scriptionis argumentum obtorto collo rapiuntur, plurima non intellecta pravâ quadam imitatione deflectuntur ab iis, qui dum Simii aliorum fieri volunt, fiunt Asini, splendido tamen titulo, ceu pelle aliquâ leoninâ involuti. Scilicet non ineleganter literarum studia bonosque autores horto variis floribus confito quis comparet. Quemadmodum enim alii solo eorum aspectu; alii odore delectantur; alii eos depingunt; alii fæta inde & corollas conficiunt; alii succum exprimunt; alii aquas eliciunt: solæ verò apes mella ex iis sugunt: ita & vario ingenio diversisque finibus vulgò in literis versamur; paucissimi autem sunt, qui verè iis uti apum instar norunt, ut dulcissimos earum fructus non ipsi solum delibent, sed alii quoque persentiscant.

Verum nescio quomodo fit, ut quò in literariâ illâ intemperantiâ percensendâ & examinandâ hæreo diutiùs, ipsa mea eodem intemperantiæ morbo laborare videatur Oratio: cuius vos exitum A. O. tacito abs me convitio, nî fallor, efflagitatis. Nec extricabo me temerè:

adeo enim multa sunt, quæ dicentem penè ob-
ruunt: nisi vim lingvæ inferens omnem istum,
qui mihi nunc feritur, sermonem è vestigio
abrumpam. Quod faciam, si vos paucis hor-
tatus fuêro, Juvenes Optimi, ad quos præci-
pue omnia ista pertinent, ut rem vestram navi-
ter agatis, & quas habetis in manibus artes, eo
ardore, qui generosa incendere pectora solet,
persequamini: eâque temperantiâ, ut spretô
rerum inutilium & frivolarum labore iis vos
artibus mancipetis, quas maximè vobis intelli-
gitis accommodatas, quarum ex amicâ in vobis
conspiratione magna in Rempublicam emolu-
menta dimanant, ipsique è lucubrationibus ve-
stris, è quibus multi fuligines & fumos colli-
gunt, vobis illustres gloriæ faces accendatis. Id
tamen meminisse etiam vos oportet: illam in
studiis temperantiâ ad vitam ipsam quoque
transferendam, ut ad mores temperantissimos
vitam componatis, ut tamen in conspectu Dei
& societate honestorum hominum, non verò
in Cyclosum Republicâ vos vivere intelliga-
mus: & ut denique, quæ optima esse potest ve-
stra temperantia, legibus, quas modò vobis in
memoriam revocavimus, obtemperetis. Quan-
quam Vos ita animatos malimus, ut quondam
Aristoteles fuit, ex quo cum quæreretur, quid
Philosophiæ studiis esset consecutus? hoc, in-
quit, ut quæ alii legibus facere coguntur, ego
sponte meâ faciam. Agite ergo, ô mei, quan-
doquidem Viri Maximi vestigia insistere & vos

oportet, ita vos gerite, ut leges istæ magis spirant in animis vestris, quàm in chartis legantur: ut ingenii quadam sublimitate & virtutis rectitudine, legibus istis majores innoxie eas glorioseque contemnere queatis. At enim, video, Juvenes Optimi, nec sine magno voluptatis sensu intelligo, altius dicta mea descendisse in animos vestros, itaque comprehendisse, ut gratuler jam nunc mihi istam bonæ mentis alacritatem, quam in oculis florere vestris video, & cujus jam fructus animo mihi videor præcepisse. Nolite committere, ut per vos inquietiores sint Musæ meæ, & studia mea turbentur, quæ ab humanitate nomen invenerunt, humanoque & comi vos continebunt imperio, humanissima etiam obsequia vestra sibi pollicentur. Monstrate vos sub Philosophi sceptris Philosophos, i. e. homines, qui vel sibi relictæ & nullis legibus coerciti iusta, quæque & virtutis veritatem sectentur. Permittite Oratori, ut vobis persvadeat: Poëtæ, ut vinculis suis vos obstringat, non istis servilibus, sed quibus ne liberrimi quidem homines obligari detrectent. Nolite denique, facere, ut qui apud se vestram agit causam Orator, per vestram culpam eâ excidat, spesque, quam ille de vobis concepit egregia, ipsis in incunabulis suffocetur. Quod ergo superest, æternum Numen veneror, ut divini sui Spiritûs gratiâ clementissimè nos respicere, & augustum hoc sapientiæ sacrarium, Serenissimumque

que ejus Autorem, incomparabilem Patronum, cæterosque fautores omnes, tum & urbem hanc Musarum alumnam, utrumque Senatam benignè tueri & conservare ne dedigne-
tur. Idem denique meos, quos afferro fortè oneri huic impares lacertos, potentissimâ dextrâ suâ firmet: idem & labores vestros, Juvenes Optimi, in sui gloriam Reique publicæ emolumentum educet, & divinum pacis bonum, quò duci pectora Deo, mancipata amant, animis vestris largissimè infundat. Fiat mi Deus! Fiat.

De Viro Bono, ad mentem Philosophorum gentilium,

in actu Promotionis Philosoph.

menſe Oct. 1669.

CUM his diebus de Magistratu abituro non verba solum in publico facienda mihi essent, sed aliis insuper negotiis pene opprimerer, accidit, quod planè non sperâram, ut præclari isti, quos præſentes hîc videtis, Philosophiæ Candidati meam quoq; Decani operam in conferendis sibi Magisterii honoribus honestè efflagitarent: Cum ergo non tam in arenâ Martiâ, quam in ipso hoc literario pulvere, & stanti pede in uno, dicendi capiundum esset consilium, primùm in mentem

tem venit oratorum deferere leges, ac in ipsa
poëtarum castra convolare, in quibus jam
tum medius versabar. Rerum enim tum gra-
vitate tum multitudine interceptus penè coge-
bar hoc initio Poëtarum more Musarum opem
implorare, ut mihi præirent verba facturo; aut
aliquem deducere per machinam è cælo De-
um, qui aperiat illico viam, quam impeditam
mihi esse videbam | ac salebrosam. Verum,
quoniam id Oratori agere novo exemplo non
licet, Regem illum imitabor Evandrum, qui
Æneam humili ac stramineo excepturus ho-
spitio satis habuit inopiam profiteri suam, &
divinum hospitem ad divitiarum contemptio-
nem adhortari, quarum intra illa mapalia nul-
lam esset omnino copiam inventurus.

*Aude hospes, inquit, contemnere opes & te quo-
que dignum*

Finge Deo, rebusque veni non asper egenis!

Quo & vos alloquio, *Hospites Amplissimi*, salu-
tare mihi posse videor, non tam Evandro,
quam illi similis præfecto, qui Carolum IV.
extemporali aliquâ & festivâ excepit cœnâ,
cujus mentionem facit diligens rerum Van-
dalicarum scriptor Crantzius. Cum enim ille
arci cuidam, cui tenuis erat proventus, præ-
positus esset, & Cæsar nihil ante præmonito su-
perveniens cum regio comitatu apparare men-
sam juberet, subito ille id consilium cepit,
ut, cum alia in promptu non essent, porcorum
aures & caudas abscissas bene coctas & condi-
tas

tas apponeret. Quo urbano hominis ingenio adeo delectatus fuit Cæsar, ut statim lautiore illum conditione donaret. Idem profecto mihi nunc evenit, qui non delicias, non mellitos verborum globulos, non dicta, sesamo & paparere sparsa, sed leve aliquid, ut ita dicam, Orationis minuta, porricas, & præfecta, qualia horarum aliquot parare mihi opera poterat, delicatioribus appono auribus, quæ, cum meis destituantur, vestræ humanitatis obruantur condimentis. Dicam ergo de argumento ab hac re, quam agimus, fortassis non alieno, de VIRO BONO scilicet, qualis ille in Gentilium Theologia & Philosophia nobis depingitur: dicam autem ita, ut non tam verborum elegantiam anxie conquiram, ordinemque eorum & doctam inter se compositionem institutam, quam rerum secus veritatem & utilitatem. Vos vero, *ô optimi Auditores*, quo nomine merito vos appello, quandoquidem inter bonos benè agere oportet, boni consuletis quicquid de bono Viro pessimus Orator, Vir tamen, ut arbitror, bonus dixerim. Ego vos solenni illâ formulâ, quâ DEos olim solebant, obtestor, *Velitis esse Boni*, id est, propitii, Favoreque vestro dicentis senectutem sublevare.

Cum titulus *Boni* primario SOLI OPTIMO MAXIMO competat, nihil est, quod ad hanc addi bonitatem possit. Sed cum & omnibus rebus creatis à Deo inditus sit, cætera quidem suo

modo, homo vero divinæ voluntati conformem se exhibens BONUM ostendit. Præclare Seneca: Bonus Vir sine Deo nemo est. An potest aliquis supra fortunam nisi ab illo adjutus exsurgere? Illi dat consilia magnifica & erecta. In unoquoque bonorum Virorum (quis Deus incertum) habitat tamen Deus. Quod cum summus Philosophus Plato multis in locis docuisset, in Menone, circa finem, Laconum testimonio confirmat. Lacones, inquit, quoties bonum quendam Virum commendare volunt: Divinus hic Vir, ajunt. Divinus itaque Vir bonus dictus, & quidni? quò enim perfectione majore ad Deum quid accersit propius, eò magis divinum, eò magis bonum. Diogenes Bonos Viros simulachra Deorum dicebat. Quare & solennis favorem Deorum implorandi formula erat: Velint esse Boni, sui propitii & non irati, de quo Brissoni-
us in Formulis suis agit. Quemadmodum ergo Deos vocarunt Bonos; ita & defunctos, quod jam ipsæ animæ corporis exutæ vinculis perfectione suâ magis ad divinitatem accederent, Bonos vocasse credam. Quod enim conjiciebat Plutarchus, Quæst. Rom. circa votum Romanorum, quo petunt, ne quis dominatorum bonus fiat, dum varias ipse enarrat conjecturas, illa quidem satis bona videtur: Aut, inquit, quoniam venusti & boni dicuntur, qui mortem cum vitâ commutarunt, hoc voto obliquè precantur, ne quis domesticorum
mo-

moriatur. Atque hoc alienum putare nemo debet. Nam in fœdere Arcadum cum Spartanis factò scriptum esse Aristoteles testatur, neminem Tegeatarum debere bonum redigi (i. e. interfici) si auxilii causà rebus Lacedæmoniorū studeat. Boxbornii verò conjectura ad hunc locum, qui scilicet putat, votum illorum fuisse, ne nascatur ignavæ simplicitatis homo, non adeo placet: quod enim mortui *boni beati* dicti, satis constat. Pers. beatulos, Horatius felices vocat. Præterea ipsi Manes eo nomine Boni dicti. Est enim *Manus* vel *Manuus antiquis Bonus*. Ita vocatos à Latinis esse exemplo Arcadum, Vossius in libro de Idololatriâ existimat. Sed ut à diverticulo hoc revertar ad id, quod primò instituebam, Bonum non dici, nisi qui adspiratione, inhabitatione, & impulsu numinis agitaretur. Ea vetustissima veterum Philosophorum & Christianorum fuit sententia. Hierocles in egregio ad carmina Pythagorica commentario: Est idem, rationi rectæ parere, atque Deo. Natura enim, quæ rationis est particeps, illuminationem sibi sortita ea complectitur, quæ præfinivit lex divina. Nec discrepat à Dei sententiâ animus, qui secundum Deum se habet, sed divinitati atque fulgori (à quo illuminatur) intentus ea facit, quæ facit. Ex illorum ergo sententiâ non est Bonus Vir, nisi à Deo illuminatus. Multa de intellectu agente seu adfistente veteres dixere Philosophi, & Judæi, quos citat Seldenus de Jur.

Nat. & Gent. Hebr. quæ huc quadrant quam optimè. Antoninus, τῶν εἰς ἑαυτὸν, animam dicit agentem ea, quæ Genio seu dæmoni, quem Jupiter in præfectum & ducem unicuiq; dedit, placeant. Ea autem est illa divinæ naturæ particula, scilicet unius cuiusque mens & ratio. Dæmonem illum aliqui, ut jam dictum est, intelligentiam externam, aliqui ipsam mentem nostram dixere. Præclarè Seneca : Sacer intra Spiritus sedet malorum bonorumque nostrorum observator & custos : hic prout à nobis tractatus est, ita nos ipsos tractat. Quare Vir bonus & beatus, εὐδαίμων dictus, hic est, qui bono geritur dæmone & genio. Clemens Alexandrinus, Stromatum lib. 2. ex Platone : Αὐτὸς δὲ ὁ Πλάτων τὴν εὐδαιμονίαν τὸ εὖ τὸν δαίμονα ἔχειν. δαίμονα δὲ λεγέσθαι τὸ τῆς ψυχῆς ἡμῶν ἡγεμονικόν. Consentit cum hoc Antoninus : Εὐδαιμονία ἐστὶ δαίμον αἰγαθός, ἢ αἰγαθόν. ubi deesse putat Gatakerus in Annotationibus vocem ἡγεμονικόν, loco illo Clementis motus. Sed cur non potius per illud αἰγαθόν intelligas summum bonum? quâ voce sæpe utitur Aristoteles absolutè sic sumpta. Propriè enim εὐδαιμονία hæc notat. Sed & hoc verum est, per Dæmonem illum etiam mentem nostram notari, quam Marcus Antoninus, nunc Dæmonem, nunc Deum suum dicit. Apulejus de Deo Socratis : quodam significatu & animus humanus, etiam nunc in corpore, situs, Dæmon nuncupatur. Unde nonnulli arbitrantur, εὐδαίμονας dici beatos, quorum

rum Dæmon bonus, i. e. virtute perfectus est. Inde apud Latinos bonam mentem solemus precari, eamque in viris probis & bonis laudare. Seneca in Naturalibus quæstion. Quid est præcipuum? Non admittere in animum, mala consilia, puras ad cælum manus tollere, nullum petere bonum, quod, ut ad te transeat, aliquis possit amittere, optare, quod sine adversario optatur, bonam mentem. Hanc Propertius Deam facere videtur, dum ita, compellat: Mens bona, si qua Dea es. Hæc ex Theologiâ de Viro Bono constant, quæ satis sunt præclara, nec Christiano homine indigna. Ipse Deus O. M. bonitatis idea perfectissima dicitur; & ad illam componi debere omnia, quæ ad bonitatem & perfectionem aliquam adspirant, nosque eo anniti debere, ut conformem illi vitam nostram reddamus, in illâ traditur. Quemadmodum ergo Deus summè bonus est, ita omnis bonitas ad illum tendit tanquam principium. Quemadmodum ille unus est & simplex: ita omnia tendunt ad illam unitatem & simplicitatem, quod Jamblichus de Pythagoreis supremum omnis felicitatis terminum vocabat: τὸ ἐνὸς Θεουργικὸν ὅτι τέλει πάσης θεωρίας. Omnia divisa mala sunt, quæ verò in Deo unita, bona; & vir bonus non est, nisi cum Deo unitus. Pulchra sunt eam in rem illa, quæ habet Cl. Alexandrinus: Deus, inquit, est impatibilis, iræque expers & cupiditatis, & non per eam est

metus expers, aut declinat, quæ sunt molesta & gravia; neque fugit Deus timorem, sicut nec concupiscit. Quoniam verò, qui Deo adhæret, unus spiritus afficitur cum illo, mysticè apud nos etiam dictum est illud Pythagoricum: *oportere hominem fieri unum*. Ad explicationem ejus præclare faciunt, quæ differit Origenes Adamantius, explicans ista verba, in Cantico Annæ: Erat vir unus. Nos, inquit, qui adhuc sumus peccatores, non possumus illum titulum laudis acquirere, quia unusquisque nostrum non est unus, sed multi. Et post aliqua: Vides, quomodo, qui putatur, unus, verè non est unus, sed multi, sed tot in eo personæ esse videntur, quot mores conspiciuntur. Imitator Dei justus, qui ad imaginem ejus est conditus, unus etiam ipse, cum ad perfectum venit, appellatur. Quin & ipse, cum in virtutis summâ constiterit, non mutatur, sed unus permanet semper: Nam dum in sceleribus unusquisque versatur, per multa dividitur, & in varia dispergitur, & dum in multis est vitiorum generibus, dici non potest unus. Fallor, an huc spectet illa Latinorum loquendi ratio, quando homo *multus* dicitur, ut apud Plautum: Heu, Hercule, hominem *multum* & odiosum! quod quæ multa sunt, plerumque mala. Absolvit ergo virum bonum simplicitas. Ita vanam ostentationem à virtute solo *simplicitatis charactere* distingvit, Vellejus, ubi de Flacco Pomponio, viro con-

su-

sulari, ait, quod natus sit ad omnia, qui rectè facienda sunt, *simplicique virtute* merens potius, quàm captans gloriam. Ita summè laudat alium, quem *simplicissimum ducem* vocat: iterumque de alio dicit: Vir in tantum bonus, in quantum *humana simplicitas* intelligi potest. Hic simplicitas pro omnium virtutum complexu accipitur. Petrus Faber in Semest. ad Tit. de Just. & Jure, per illam vocem Justitiæ, Verecundiæ, Bonitatisque officia designari existimat. Sic apud eundem Vellejum *Simplicitatis nobilissimæ juvenis*; & iterum, *simplicitatis generosissimæ vir*. Atque hæ appellationes Viro bono accidere ratione numeri posse videbantur. Accidunt & aliæ ratione temporis & mensuræ. Illius ratione appellatur antiquus; Quod enim primum est, optimum est, quoniam ab illo omnia. Sic ipse Deus O. M. dicitur *Antiquus* sacris literis, passimque apud Auctores laudantur antiqui mores, antiqua virtus & fides. Ita Tacitus de quodam: Prisco vultu, habituque moris antiqui, & ejus æstimatione rectâ severus. Ratione mensuræ Vir bonus tetragonus, s. quadratus, dictus est Pythagoræ & Platoni: Item & Aristot. Ethic. lib. i. cap. 10. Vir hic beatus, inquit, quem tibi informo, planè omnes casus feret, eosque pulcherrimè ac moderatissimè, ut qui verè & ex animo Vir bonus sit, & inculpatè quadratus. Hujus appellationis rationes varias dare aliquis possit; quemadmodum enim figura quadrata perfecta

Quadrata est, dum continetur quatuor lineis æqualibus, & quatuor æquales habet angulos, ut, quomodocunque vertatur, semper se eodem modo habeat: sic etiam Vir bonus ac felix sibi semper similis est, & inter varios fortunæ casus eandem semper æqualitatem servat. Adde, quod quaternio ipse numerus perfectus sit, Pythagoreis imprimis sacer, de quo videatur Carolus Bovillus in Lib. de Numer. perf. & Pet. Bungus in Myster. numeror. Quibus ab auctoribus memorantur fusius, quæ à Platoniciis de numero Harmonico & proportionibus animæ dicuntur; imprimis vero apud Pet. Bungum, ubi quaternarium animæ progressum ex proportionem triplâ, & quaternarium corporis progressum ex proportionem duplâ numeris demonstrat. Sed Architas non in tetragono, verum in circulo posuit animæ finitionem, quare & Virum bonum teretem & rotundum vocat Horatius, & Ausonius in carmine de Viro bono: perfectissima enim rotunda forma est, quam Manilius vocat formam divis simillimam; Aristoteles miraculum miraculorum. Verum omnia hæc allegorica sunt; neque enim homo verè rotundus, neque anima verè rotunda dicitur, quanquam Angelo cuidam ovali animas separatas figurâ definire placuerit. Atque omnia illa, quæ hætenus disseruimus, eò tendunt, ut demonstrent, quomodo bonus Vir, & mens bona tota ad similitudinem summi boni debeat esse composita. Vinculum autem, quod

quod animum hominis ad Deum convertit, amor est; unde amorem definit Dionysius Areopagita, quod sit Circulus à bonô in bonum perpetuò revolutus. Uti enim à Deo incipit & illicit, perfectæ pulchritudinis rationem præ se fert; ut autem in mundum transeat, amor dicitur. Omne autem pulchrum bonum est, & ideo amatur, quia bonum est. Maximus Tyrius Serm. II. Quod pulchrum est, id neque exitiosum unquam, neque lubricum, neque flagitium aliquod efficit. Notat Augustinus in Lib. de Civit. Dei, in sacris literis bonos dici speciosos & pulchros; quod de ipso Salvatore nostro dicitur, quod fuerit speciosus præ filiis hominum: supra quod pulchrè commentatur Roa singul. lib. 3. Cap. 5. Vir bonus pulcher est, & à summo pulchro mediante amore attrahitur, quo amore deinde necessario etiam ad æqualem suum fertur. Præclare hîc præ cæteris Simplicius: Pura charitas amicas animas in unitatem conjungens est pulcherrima præparatio ad conjunctionem divinam. Primò amamus Deum, & deinde amicos propter nos ipsos: Inimicos vero propter se. Ita jussit Pythagoras, referente Jamblichio, Amicos ut Deus colere, cæteros ut feras demulcere & placare. Omnes itaque Viri boni pro cognatis & consanguineis habendi. Sic Plutarchus, in Lib. de Alexandri virtute, Alexandrum mandavisse suis, scribit, ut mundum pro patriâ agnoscerent, castra pro arce & præsidio, bonos pro co-

gnatis, malos pro peregrinis. Geminum huic est illud Plinii Junioris in Panegyri ad Trajanum: Hunc tibi proximum, hunc conjunctissimum existimes, quem optimum, quem Diis similitimum inveneris.

Si jam à Deo, principe & summo bono, discedimus, inveniemus famulam illam s. manu ductricem, *Virtutem*, quæ nos ad illum ducit. De hac Plato: Deus, inquit, cum se in medio exemplar omnium bonorum proposuisset, humanam virtutem, qua homo similis Dei aliquo modo redditur, parandam concessit his, qui Deum sequi possunt: neque major est alius fructus, quem ex Deo possit capere homo, quam quod imitatione pulchrorum & bonorum, quæ naturæ divinæ insunt, virtute potitur. Virtutum autem primam fortitudinem nominamus, quæ plerumque virtutis vocabulo notatur, unde & Græcis à Viro ἀνδρεία dicitur, atq; hæc jam extenditur ad omnia ea, ad quæ virtus ipsa. Quod fit apud Clementem Alexandrinum, Lib. 7. Stromatum, apud quem munus fortitudinis est, non solum ut casus perferat humanos, sed ut resistat etiam & voluptati, & cupiditati, & dolori, & iræ, & universæ omni rei, quæ nos sive vi, sive fraude quâpiam illicit. Hinc credo factum, quod ipsa fortitudo ab ipsa bonitate nomen invenerit. Antiqui enim *fortem* dicebant pro bono, unde *fortis*, qui bonus & frugi. Apud Græcos Vir fortis interdum absolute ἀγαθός dicitur, possemque

que exempla hujus penè multa producere, nisi temporis brevitatem prohiberemur. Eodem modo vox probus apud Autores semilatinos pro forti toties usurpata invenitur, & probitas pro fortitudine. Gulielmus Brito Lib. 8. Philippid. supplebat numerum probitas immensa. Ubi Barthius in Comment. plurima alia ejusdem seculi scriptoribus producit. Hinc inter titulos summos ille referebatur, *Vestra probitas*; Sic veteres Germani nobiles Equites *Gudemanns* vocabant, quod notat Vir doctus ad Nortonii Origines Marcanas. Hinc fortè factum esse arbitror, ut etiam pulchri appellarentur, quod & boni eodem nomine dicantur; ita pulcherrimum vocat Æneam Virgilius, Achillem & Hectora Homerus. Apud Græcos vox καλός & pulchrum & fortem significat. Cum ergo à plurimis primaria virtus fortitudo sit habita, mirum non est, quod Silius Italicus primam in campis Elisiis sedem viris fortibus, secundam viris justis assignaverit. Ita enim ille:

Cingunt regna decem portæ, quarum una receptat

belligeros durâ Gradivi sorte creatos:

Altera, qui leges posuere atque inclyta jura gentibus. — —

Gymnosophistæ & Druydes tribus illis virtutibus, Pietate sc. Justitiâ, & Fortitudine; totam continere Philosophiam videntur. Diogenes Laërtius in proœmio: Ajunt, Gymnosophistas

atque Druydas obscure ac per sententias philosophari, colendos Deos, nihil mali faciendum, & exercendam fortitudinem. Pergamus itaque nunc ad Justitiam, alteram illam boni Viri virtutem, quandoquidem fortitudinem absolvimus. Hæc à Deo etiam immitti statuebatur. Præclare Plato in Thæteteto: Deus nusquam & nullo modo injustus, sed quam justissimus, nihil ei similis, quam justissimus homo. Plenius hoc explicat Philo in Lib. de somniis: Deus, inquit, non dignatus sensui se ingerere, suum verbum auxiliare mittit virtutem amantibus, id medetur morbis animæ, sacra præcepta seu Leges nunquam antiquandas statuens, & ad hæc exequenda invitans, atque etiam more prædotorum robur ad invictam habitudinem promovens. Verissime itaque Josephus: *Abs quo stat Jus, ab eo Deus.* Inde non sine causa Jamblichus felicitatem viri boni in justitiâ positam esse autumat, cujus hæc sunt verba: Hanc sententiam firmiter retinere oportet, bonum quidem Virum, si temperans ac justus sit, felicem beatumque esse, si is sit magnus atque robustus, si parvus atque imbecillus, si dives, si etiam pauper sit: si autem Cynarâ aut Midâ divitiis magis abundet, sit verò injustus, ille & miser est & anxiam vitam transigit. Atque hinc illud naturale jus à Deo nostris animis inscriptum, quod cum naturale dicimus, divinum vocamus. Quid enim aliud, inquit,

quit Seneca, est natura, quàm Deus & divina ratio toti mundo & partibus ejus inserta? Jus naturæ à Deo datum est: Divina lex est, & ratio mundo & partibus ejus fortiter & suaviter inserta, sic perpetua, eo quod imperantis vim omnem prævenit, ultrò se subjicientium, utilitate juncta voluptas. Quandoquidem ergo Justitiæ Virtus adeo etiam gentilium animis infidit, non deficiunt etiam in veterum Philosophorum numero, qui ejus certissima non solum in hac vitâ, sed etiam post fata, promissere præmia. Uberrimè eâ de re differit Plato in X. de Republ. ubi ait: Viro bono & justo sive inopiâ, sive morbo, sive cæteris, quæ mala putantur, circumvento, omnia cessura in commodum & bonum, ζῶντι ἢ καὶ ἀποθανόντι, viventi aut mortuo: Verisimile esse, ejusmodi hominem, qui justè vivendo similem Deo se reddiderit, non negligi à simili sui Deo. Quod ipsum Aristoteles in Moralibus imitatus est. Idem in XII. de Republ. Esse, inquit, quemlibet nostrum immortalem vocatum animum, huncque ad Deos alios proficiscentem redditurum rationem tremendam horribilem formidabilem scelerato, probo autem placidam. Hæc quidem ille. Cui consona sunt, quæ de Campis Elisiis & inferorum pœnis apud Poëtas non solum sed & Philosophos traduntur. Nec fortassis ab hoc loco alienum erit, si, quæ Legibus civilibus ob probitatem præmia conceduntur, memoremus. Sunt enim

nim ob probitatem animi singularem, eximiamque virtutem, contra Juris regulas multa constituta. Inde illa jura, quod pupillorum arrogatio permittenda sit tutoribus, qui sanctissimâ affectione ducti, ut adoptarent; quod interdum & ditiores adoptare permittatur pauperiori, & si quæ alia Legibus Romanis sunt statuta. Hinc apud Persas factum est, ut vita ante acta proba simul cum delicto in æstimationem veniret. Unde Cicero in Sullam: Omnibus in rebus, quæ graviores majoresque sunt, quod quis voluerit, cogitaverit, admitterit non ex crimine, sed ex moribus ejus, qui arguitur, est judicandum. Eam esse causam, putat Muretus Commentario in Lib. 3. Annalium Taciti, quod primus liber Accusationis in Verrem sit de anteactis, quatuor reliqui de ipso crimine repetundarum, ut prior vita argumento esse possit, ad crimen aut confirmandum, aut diluendum.

Reliquum est, ut etiam de officiis viri boni ad mentem Philosophorum veterum aliquid disseramus. Est vero inter illa præcipuum, ne unquam vel verbis, vel factis superbum se gerat. Hinc illa Epicuri effata in X. Laërtii Libro: Non affectatis orationis flosculis usurum, nec gloriam captaturum ex verbis,

— — — *Quæ bellè tangere possunt*

Aures, & lepidò quæ sunt fucata sonore,
ut est apud Lucretium. Et imprimis quidē à Stoicis neglectus ille sermonis fuit captatus apud
La-

Lærtium de Diogene exstat, illum eos, qui ex oratione gloriam quærerent, *τεῖς ἀνθρώποις*, ter homines, h. e. ter miseros, appellasse. Quare & ejusdem Epicuri effatum est, Virum bonum Poëmata ignoraturum, nedum aliqua elaboraturū. Quod si ergo Epicureorum standum sit sententiæ, vir bonus non esse deberet Poëta, cum tamē longè aliter docuerit Strabo, non posse bonum Poëtam fieri, qui non prius fuerit Vir bonus. Hujus generis plura sunt alia inter Epicurea de viro bono effata à Diogene notata, qualia sunt illa: multa quidem agat vir bonus, sed occupatum se non jactet vel simulet; nihil cum apparatu agat; domi vestitu eleganti non utatur, sed illa quidem fusius differere nihil attinet: sunt enim ea non ita comparata, ut viri boni officia statim absolvant. Verissimè Seneca: Vir bonus tam cito nec fieri potest, nec intelligi, & fortasse tanquam Phœnix semel anno quingentesimo nascitur, nec est mirum ex intervallo magna generari. Nunc vero dolendum est, in secula incidisse, ubi bonitatem laudare penè ducitur opprobrio, in tot pessimorum hominum colluvie. Tanto olim in pretio fuit Viri boni titulus, ut vix major fuerit; Senecæ verò jam tum tempore rusticus is titulus audiebat, quem ille tamen omnibus præfert. Magno, inquit ille, impendio temporum, magnâ alienarum aurium molestiâ laudatio hæc constat, ô hominem literatum! simus hoc titulô rusticiori contenti, ô Virum bonum! Ita

ille. At nunc eò res rediit, ut & hanc querelam nostram facere cogamur, quod, dum docti esse inceperint, defierint boni. Sic quod virtuti debebat viam sternere nomen, vel adeo cum ea esse conjunctum, ut ne quidem discriminis aliquid inveniretur, nunc pene ad everendam illam natum est. Meliora fanè speramus de illis, quos hic in illustrem hunc locum adducimus, veræ nec fucatæ Philosophiæ candidatis. Nihil illis ab ineunte ætate pietate, verò omnium virtutum fundamento fuit sanctius; cui præclaras illas animi dotes, quas satis perspectas habemus, superstruxerunt: de doctrinâ vero eorum, & eximia eruditione, quam tam publicis, quam privatis examinibus exploravimus, publicè hic testamur, luculentisque documentis ipsi testabuntur. Sistimus hic primum Virum reverendâ dignitate conspicuum LEONHARDUM PEGMANNUM, Serenissimi Principis Ernesti Güntheri Aulicum, & urbis Sunderburgi Pastorem vigilantissimum, cujus vel ipsum sacrum, quod per tot annos gessit, munus abs se loquitur, qualis is debeat æstimari. Neque enim homines aut ignavos, aut indoctos ad tantas vocamus dignitates; ea tamen fuit ejus modestia, ut, dudum dedita sibi doctrinæ præmia nunquam impatienter ambiret, nisi quod nunc, Serenissimo Principe ejus ita volente, honestè demum petere honestissimam illam, quæ ex ingenio, virtute, & industriâ paratur, laudem in patriâ

Academiâ voluerit. Siftimus & DIETERI-
CUM TONNEMACHERUM, Theologiæ &
Philosophiæ eximiè doctum virum Juvenem,
cujus bonam indolem jam ab eo tempore, quo
hujus Academiæ studiis initiari cœpit, norunt
inter nos laudaruntque plurimi. Nihil qui-
dem omisit earum rerum, qui ad studia sua,
ornanda, animumque excolendum facere,
posse videbantur. Audivit Professores legen-
tes, disputantes, publicamque & privatam,
plurimis probavit industriam: Ut nihil qui-
dem ei deesse visum nobis fuerit, quod ad so-
lidam è literis gloriam parandam poterat perti-
nere. Quare utrumque facultatis Philoso-
phiæ collegium dignissimum judicavit, cui su-
premos illos in Philosophia honores, quos mo-
destè petiêre, gloriose deferret. Quia verò
publicâ autoritate niti decet hos titulos, Sere-
nissimusque Princeps vicariam potestatem
concesserit Viro admodum Reverendo & Am-
plissimo Dn. Petro Musæo, S.S. Theologiæ
Doct. Pr. Pr. Celeberrimo: ad Tuam jam Ma-
gnificentiam appello, Magnifice Dn. ProCan-
cellarie, maximoque à Te Precibus, tum Col-
legii nostri, tum meo, ac Dnn. Candidatorum
nomine contendo, ut potestatem summos in
Philosophiâ Magisterii honores Dn. Leonhar-
do Pegmanno, tum & Dieterico Tonnema-
chero tribuendi, facere ne dedigneris. Quod
insigne beneficium tam totum nostrum col-
legium, quàm ipsi hi Candidati gratissimo a-

L gno-

gnoscent animo, qui omnia sua officia tibi sanctè pollicentur.

(ProCancell.)

Ego verò tam Reverendissimo & Serenissimo Principi, Reſtori & Cancellario nostro Magnificentissimo, quàm tibi, Magnifice Dn. ProCancellarie, Collegii universi nostri nomine gratias ago, habeoque, quas concipere possum maximas, pro clementissimè & benevolè concessâ illâ potestate, quâ mox more usitato defungar, si vos, Dnn. Candidati, solenni jurejurando, præeunte verba ministro publico, tactis Scepbris prius vos obstrinxeritis.

(Juramentum.)

Ergo, quod cedat in summi Numinis gloriam, quod Ecclesiæ, quod Reipubl. quod Academia huic salutare, quod denique ipsis Candidatis felix faustumque sit, ego D. G. M. D. Eloq. & Poës. Prof. in hoc actu Decanus & Promotor, Te — — — Te — — — adeoque vos geminos, Philosophiæ Doctores sive Magistros creo, creatos renuncio, talesque Vos ab omnibus haberi & salutari volo in nomine SS. Trin. Patr. Fil. & Spir. S. Confero vobis item omnia illa jura & privilegia, quæ Gradui isti ac Titulo tum de Jure & consuetudine communi, tum speciatim vigore Diplomatis Cæsarei sunt connexi.

Quoniam vero prudenti placuit Antiquitati, hujus honoris publici collationem solennitatibus quibusdam ac ceremoniis reddere splendidiorē, iisque jam

renunciatos Magistros sui admonere officii ac muneris; easdem quoque hoc tempore adhibebimus. Et primum quidem vos in Cathedram hanc superiorem voco, quo intelligatis, licentiam vobis fieri docendi, disputandi, Philosophiamque & Artes liberales, quas didicistis hactenus, explicandi. Libros Vobis trado, & quidem apertos, ut cogitetis, assidua lectione doctrinam esse confirmandam & amplificandam, vosque, qui vivi jam estis Magistri, mortuos etiam hos, multosque in consilium vocare debere. Eisdem iterum, claudo ut vel extra illorum usum Philosophi esse ne desinatis, bibliothecamque animo etiam circumferatis. Pileum vobis impono, quod libertatis est Symbolum. Liberi sunt Sapientes; nostis Stoicorum effatum; Stulti soli serviunt. Monemini ergo his Insignibus, quod ab Ignorantiæ servitute ac vinculis debeatis esse immunes. Annulum digitis Vestris impono, qui vicem hic arrhæ sustinet, qua Vobis Sophiam vel bonam illam mentem, quam Deam Veteres dixisse audivimus,

Connubio jungam stabili propriamque dicabo. Hos amores, ut eò sinceriores sint, hoc amplexu obfigno, quo admonemini, ut discordiam fugiatis, concordiamque potius complectamini, quo arctius colligatur Sapientiæ unio. Denique & faces vobis præferri videtis, quæ indico sunt, lucere coram hominibus vestram & probitatem & doctrinam debere, ut videant, Vos honore literario, quo modo estis ornati, dignos esse. Sic denique has gloriæ faces appellabo, quas lucernæ lucubrantibus præferte.

Quod restat, Patrem Luminum, à quo omnis

donatio bona, & omne Bonum perfectum, Apostolo teste, descendit, submisit veneror, ut novos illos honores prosperos Vobis velit esse & auspicias. Is honestos vestros eò dirigat conatus, ut magnum hinc Ecclesie presidium, magnum nascatur Academiae ornamentum. Ceterum ne mutæ personæ in hoc produta proscenium esse videantur, placet ut more recepto à singulis aliquid cruditæ ac ingenii specimen edatur. Quare Tu Vir Reverende, Clarissimeque Dn. Magister Pegmanne, ad Questionem, quam optime indolis puer Tibi proponet, respondebis: Tu verò, Clarissime Dn. Magister Tonnemachere, solennes gratias tam DEO, quam universo huic inclyto confessui, ages. &c.

De Otio Sapientibus dando,
*cum Magistratum Acad. secundum
 adiret, mens. Apr. 1677.*

CUM ante ipsos hos octo annos, quartò ab Academiâ conditâ, octavo mihi Pro-
 Reçtori hæc circumponeretur purpura, hæc sceptræ anteirent, totus hic confessus aplissimus bona verba funderet, tota hæc concio acclamaret, non exiguam felicitatem & honoris partem vestris mihi suffragiis consequutus videbar, cum florerent altissimâ pace res nostræ, ipsi innoxii sine metu ætatem ageremus, & honesto illo laudabilique otio fru-

eremur. Circumferebamus tū regiam hanc purpuram, veram splendoris nostri testem & comitem & augustum lātissimæ festivitatis pignus. At nunc ô quantum mutata ab illo die tempora! cum in tantâ rerum conversione, in istâ Patriæ calamitate, idem mihi munus offertur, nescio quis animum horror percellit, illumque & sibi, & ei, quam administrandam, suscipiet, provinciæ subducit. Quid enim animi nobis in publicâ hâc tempestate fore creditis? quis sceptrorum iste inter arma circumstrepentia splendor? quis purpuræ huius color? cui tenebras noctemque ipsam facile offundat temporum nostrorum injuria? ut parum certè absit, quin splendidus ille ornatus in pullum luctuosumque convertatur. Hæc quoniam animum in varias partes versabant, consultius fortassis fuisset, non suscipere in se, quod tam grave videbatur, onus, manusque ab eô abstinere, cui lacerti humerique nostri succumberent. Sed cum & imperio Principis Serenissimi parendum esset, & vestris, Patres Academiæ consiliis non refragandum, ne vel inobedientiæ, vel immodestiæ crimen incurreremus, collegimus nos, & illius vestræque voluntati etiam nostram non inviti adscripsimus. Ita enim cum animo nostro reputabamus, levius fore, quod bene patienterque ferretur onus Vobis præcipuè C. H. in maximam oneris partem venientibus, illoque animos addente, qui honestorum consiliorum laborumque & autor est

& consolator. Accipiamus itaque è manu Tuâ C. H. tradita nobis Sceptra, Teque præeuntem in hoc stadio, vel exemplo Tuo firmati sequamur. Quoniam autem in more positum est, ut ejus muneris auspicia oratione aliquâ solenni capiantur, neque nobis committendum videbatur, ut quicquam ejus, quod ad ornandum hunc diem pertinere posset, desideraretur. Hæc tractanti animo cum commodum quæreretur argumentum, occurrebat aliquod ab hoc atroci & difficillimo tempore alienissimum, & in pacatiora Reipublicæ nostræ tempora rejiciendum. Quod si persequerer, ut institutum erat, verebar ne mihi occinerent aliqui Martialis illud:

Ecce tacent omnes, Ne vole, dic aliquid.

Scilicet tu verba nunc fundis sapientiæ & philosophas sententias loqueris? tu soccos inferis in Tragœdiam? tanti scilicet erat, cum armis obsidetur Civitas, te cum Diogene volvere dolium, ne otiosus videaris. Verum quoniam nec spes meliorum temporum omnis decollavit, & nobis tamen intra regna nostra manendum est, ~~exuamus nunc metum omnem~~, & quasi in speculâ aliquâ, aut intermundiis Epicuri constituti in nos ipsos descendamus à turbâ semoti, & hanc, quam in signis nostris ostentamus pacem, saltem in umbrâ & pulvere nostro superstitem veneremur. Dicam itaque, ne vos suspensos diu teneam, de otio Sapien-
am,

am, ut primum, qui Sapientum nomine habendi sint, hinc quale illud otium esse debeat, tum qui in Rempublicam ex eò fructus redundent, ostendam. Quod cum facio, tantum de otio Vestro A. H. etiam nobis ut largiri velitis contendo, quò hæc non ingrata Vobis fluat Oratio. Nos id operam dabimus, ne otio Vestro patientiæque, dum de otio verba facimus, abuti videamur.

Ac primum quidem, cum Sapientes voco, non eos me intelligere credite *μετῶρες*, & in nubibus inanibusque captandis occupatos homines, aut qui bello societati humanæ indicto in latebras quasdam se abscondunt: non Thraſones illos literarios, qui in exiguâ modicâque doctrinæ parte regnum aliquod se possidere existimant. Tantum enim à verâ absunt sapientiâ, ut omnes anteire stultitiâ existimem. Quod eos attinet, qui in speculatione omnem suam voluptatem reponunt, illi quidem reprehendendi non sunt, si iis scientiis animum pascant, quæ saturare pectus solidâ aliquâ rerum cognitione possunt: quò nihil in vitâ accidere frivolius honestius jucundiusque homini posse, nemo familiarior Musarum hospes inficias ibit: Sed qui speculationibus suis immerſi limitesque veræ Sapientiæ egressi in vanas mentem imagines evocant, & sterilibus quibusdam commentis sibi ipsis & seculo imponunt. Quæ enim stultitia est, bonas & succiplenas Virgines Scientias curaturâ tam ineptâ facere junceas,

&, ut ad perfectionem reducantur, omnem
ipsis sanguinem & spiritum intercludere, ut
pro vivo spirantique vultu cadaverosa earum
facies ostendatur. Nisi utile est quod facimus,
stulta est gloria, doctissimus ille fabulator age-
bat. Idem in iis Scientiis etiam spectari debet
non ideo discendis, ut his velut picturis inani-
bus animum pascamus, compressis sedentes
manibus, aut ignavô otio torpentes: sed &
ad vitæ necessitates, ad commoda humani ge-
neris respectandum est homini Philosopho,
qui non degenerem orbis & Reipubl. suæ Ci-
vem se profitetur. Nolim ego, qui cum Ana-
xogorâ amplissimo patrimonio se exuat; aut
cum Thalete aurum in mare abjiciat, ut sibi &
studiis possit vacare toti; aut cum Democrito ad
sepulchra abeat inter cadavera inque silen-
tium regno tranquillius philosophaturus; aut
cum sordido aliquo Diogene circumcurset,
cæterorum omnium subsannator. Sunt, ut o-
mni hominum generi, ita & huic sui morbi,
svaves illi & lepidi, à quibus sanari se ægerri-
mè nonnunquam ferunt, sed ab iis cavendum
tamen est illis, qui confirmationem habent,
animum, & rectius, quid ex suô, quid ex o-
mnium hominum usu sit, intelligunt. Scili-
cet non veræ sunt scientiæ, vel saltem non ve-
rus earum usus est, nisi prudentiâ quâdam sint
temperatæ. Ea enim ubi abfuerit, fieri facile
potest, ut, cum modum non tenuerimus, id
consequamur, ut cum ratione insanire vulgò
cre-

credamur. Per Sapientiam nostram potius cerebrosi, quam per Prudentiam nostram cordati. Quandoquidem verò duplici ex causâ disciplinarum constet ratio: nam sunt aliquæ ex illis, vel solummodo luminis gratia, ut ille in se ipso spectatur, aliquæ ob utilitates, quas in vitam civilem inferunt: ita illæ præcipuè nobis excolendæ & in omni vitâ frequentandæ: ex his tantum hauriendum est, quantum vel instituto nostro, vel muneri, vel quibuscunque rationibus nostris conducere putemus. Quis nescit, à summo universi hujus Opifice in mundum quasi in possessionem quandam nostram nos esse missos? Missi autem sumus, ut tria hæc discamus: quomodo mundus ille conditus, quid in illò fiat, quid fieri à nobis debeat. Primi istius contemplatio tota divina est, & ad Deum ducit viâ plus quam regiâ imò divinâ. Quid enim jucundius est, quid majori fructui, gloriæque esse potest, quam divinorum considerationi operum se immergere, & mentem, quâ spectabilis ille mundus panditur, jam per ipsas Solis astrorumque vias circumducere, jam ipsis terræ penetralibus immittere, jam in se defessam fatigatamque reducere, & in illâ vivam quandam Dei & majoris mundi imaginem speculari. Hanc sibi Philosophia naturalis fiderumque Scientia partem vindicat: alterum illud docet nos Historia rerum gestarum, Scientiæ Prudentiæque quasi quædam administra: tertium ex disciplinæ, quibus ad Humani-

nitatem, bonos mores, salutem tam civilem, quam æternam informamur. Hæ sunt, quæ non delectant solùm, sed & mirificè profunt Scientiæ, quarum qui omnino rudis est, ita, in hoc mundo vivit, ut, quare in illo vivat, non intelligat. Sed dici tamen vix potest, quàm crassa, quàm profunda earum rerum in vitâ hâc hominum versetur inscientia, ut longè feliciorem hâc parte existimem, quæ tantô locorum spatio à nobis semota est, Sinensium gentem, immeritò nonnullis barbaram vocatam, quæ naturæ cujusdam indulgentioris motu incitata tantam in his Scientiis voluptatem capit, ut extra illas nulli Scientiæ vel arti pretium statuatur. Naturalium rerum contemplationi magnâ animi contentione incumbit, in omni Mathematices genere exercet industriam, in Historiâ scribendâ fide & diligentia omnes superat populos. Nam publicis stipendiis semper illic aluntur homines ad eam rem facti & constituti: quod in suâ gente suo tempore regi Galliarum commendabat summum Galliæ decus Budæus, non leve in ejus omissione Gallici nominis opprobrium versari ratus. Moralis civilisque doctrina tam altas in illorum ingeniis radices egit, ut jam ab ungviculis ipsis intelligant doceanturque, quæ parentibus debeant, quæ majoribus, quæ magistratibus, quæ æqualibus officia, quibus ita certant, ut prodigiis similia videantur, quæ eorum notata sunt exempla. Quibus si doctrinæ cœlestis gratia accesserit, quid

quid addi ad consummatam & perfectam hominum felicitatem posse Vobis videbitur, ? Quod ceteras illas artes attinet, quas minutior aliqua hominum industria è prioribus, velut radicibus quibusdam, propagavit, aut aliqua fvasit vitæ civilis utilitas, ne illas quidem ignorari à Sapiente nostro velim, sed ita tamen exerceri, ne ad indigna se demittat, aut illam ingenii vim in molestis quibusdam negotiis & liticulis frangat. Seligendæ tamen ex iis semper sunt ac potiores habendæ, quæ intellectum ornant, ac judicandi facultatem juvant, quàm quæ ad phantasiam referuntur. Quanquam omnia, qascunque etiam in partes verset animum, illud mentis Sapientiæque lumen percurrere debeat. Nam quoniam duabus rebus à reliquò animantium genere oratione rationeque distingvitur homo, ac iis pernoscitur, tum utique perfectissimus quisque judicandus est, cum maximè hæ duæ res in eo absolutæ sunt. Itaque totus omnium disciplinarum, complexus ad Sapientem nostrum velut fundus aliquis pertinet; quem possidere quidem totum inque potestate suâ habere potest, cum in unaque ejus parte habitet, eamque præ ceteris colat impensius. Sive ergo de jure respondeat, sive ad populum verba faciat, sive bonos Autores à situ tenebrisque vindicet, sive novi aliquid ex ingenio suo parturiat, ita se in iis omnibus gerere debet, ut pompæ etiam & splendoris in disciplinis decorus sit ostentator, nihil

autem in illis omnibus inepti, sapientiæ verò accuratæque solertiæ plena omnia deprehendantur. Quæ omnia non nisi à compositâ mente & intra se ipsam collectâ, ac à tumultibus remota institui efficique posse nemo non intelligit. Otio itaque abundare Sapientem oportet, eâ scil. animi quiete, per quam ipse quidem, non planè sit inficiens, sed ab humilibus sordisque curis revocatus in acerrimâ atque attentissimâ cogitatione sublimium rerum totus defigatur. Tale enim Sapienti nostro otium esse dandum, amplius nunc dispiciendum nobis est. Detur ergo otium Sapienti non ignavum ac delicatum, quale Epicuri Schola sectabatur, non sordidum, quale Cynicorum, non triste & ineptum, quale est eorum, qui cum Sapientes videri volunt, & magnificis passim irrefragabilium & mirabilium titulis salutantur, nihil aliud faciunt, quàm ut in exiguo fundo multos labyrinthos commenti in orbem discipulos suos ἀπὲρ παίδας circumducant, & quasi Ixionis cujusdam rotæ illigatos frangant. Detur ergo Sapienti otium, sed liberale, sed ingenuum, sed honestum & Sapiente dignum, & cujus in Rempubl. fructus & utilitates diffundantur. Quoniam autem Scientiæ quædam in iis rebus versantur, quæ æternæ sunt, sublimes, altè reconditæ, in quarum magnitudinem cum se inicit animus & intendit, ita longè latèque peregrinatur, ut penè, quo insistere possit, non inveniat: faciliè intelligimus

mus, eò majore quiete otioque opus esse, quò magis à vulgi commerciis remota sunt, in quibus felices illæ animæ occupantur. Qui DEum ac divina opera contemplantur, naturæ maxima arcana rimantur, pondera proportionisque corporum investigant, æternas naturæ leges ex abdito eruunt, magnas illi res moliuntur, non operâ quâdam desultoriâ, aut in turbâ peragendas; sed in secretissimis penetralibus, & Numine quasi inspectante & sciente, perpetuâ omni in vitâ cogitatione, extundendas. Scilicet illi sunt, quas summus è Lycéo Philosophus nobis describit ut genios facie humanâ indutos, vel potius DEos inter homines versantes, qui velut Reges & Dictatores quidam perpetui, nec legibus Reipubl. tenentur, cujus ne quidem partem constituunt, cum eis sint superiores, &, ut uno verbo omnia comprehendam, Sapientes & Philosophi. Nulla potest in his contemplationibus nimia esse opera. Nam, (si Senecam audimus) non cum vacaveris philosophandum est; omnia alia negligenda, ut huic assideamus, cui nullum tempus satis magnum est, etiam si à pueritiâ usque ad longissimos humani ævi terminos vita protenditur. Eiusdem præceptum hoc est: Omnia impedimenta dimitte & vacæ bonæ menti, nunquam ad illam pervenit occupatus, exercet Philosophia regnum suum, dat tempus, non accipit, non est res subcesiva, ordinaria est, domina

na est, adest & jubet. O felices illos si otio suo frui possint, si intemeratum, si sanctum sit: quod ut esse possit prospiciant illi, qui prospicere debent, ne quid detrimenti capiat Respublica; nam ut in magnâ familia prospicere omnibus debent, ita eas artes debent tueri, quibus Societatis Solus, & reipublicæ tranquillitas innititur. Ut enim benè non potest esse corpori, si animo malè est: ita valere non potest civitas, cui mens sua vel emota est, vel aliquâ ex parte laborat: mentis autem nomine appello non eam tantum potestatem, quæ rerum summæ præest, sed & ejus ministros, in reipubl. regendæ partem vocatos, qui bonis consiliis, salutaribus inventis rem communem sustineant, & velut in perpetuis excubiis se impendant. Quos autem esse oportet Sapientes, aut è Sapientum Scholâ velut ex magno quodam regno provinciis suis immissos. Quare qui opibus pollent Reges aut Magnates in illud curas cogitationesque omnes impendere debent, ut sua præstantissimis ingeniis magnâ diligentîâ delectis præstantur otia honesta & literalia, quibus illi innutriti augeant rempublicam magnis successibus, spiritusque illi omnes impendant, de vitæ necessitatibus securi. Præstantur verò sua Sapientibus otia, si quam amplissimâ illi dignitate sint, iisque se præmiis honestari intelligant, quæ educere & velut rore quodam pascere illum animi vigorem possunt: si
non

non modicè & sordidè habeantur, si opulenta ditiaque stipendia, si magna operæ pretia mereantur. Instituta huic fini in omni cultiori gente quidam fuere Sapientum collegia, qualia florere apud Græcos, & quorum imaginem exhibent Academia, scholæ regiæ, quæ ipsò suo nomine otium liberale illud profitentur. In quò tamen si à monitis istis disceditur non ipsæ tantum turbantur, sed ipsæ etiam respublicæ magnâ sui parte labefactantur. Non ignorabat ejus moniti utilitatem magnus idem sapientissimusque Angliæ Cancellarius Baco Verulamius, cujus ego suffragatione cur non triumphem? Cui incomparabilia in universam Sapientiam, tam literariam quàm civilem, merita æternum nomen, immortale genti suæ & omni nobilitati exemplum pepererunt. Nam in doctissimis de augendis Scientiis libris, quos Regi suo inscripserat, ubi defectus erroresque Academicos detegit, in hæc verba prorumpit: Quæ à me recitari, à vobis verò audiri, in hoc præcipuè argumento non est tædiosum. Improbo vel maximè tenuitatem stipendiorum, Prælectoribus sive Artium, sive Professionum, (præsertim apud nos) assignatam. Interest enim imprimis progressui in Scientiis, ut Lectores in uno quoque genere ex optimis instructissimisque eligantur: utpote quorum opera, non in usum transitorium; sed ad sufficiendam sobolem scientiæ in secula adhibeatur. Id fieri nequit, nisi præmia & conditiones tales.

constituantur, quibus eminentissimus quisque in eâ arte planè contentus esse possit: ut illi demum grave non sit in eodem munere immori, neque Practicam cogitet. Quocirca Scientiæ ut floreant, Militaris lex servanda Davidis: Ut æqua esset pars descendenti ad prælium, & manentis ad sarcinas; Sarcinis malè aliter prospectum erit. Sic Lectores in Scientiis sunt tanquam conservatores & custodes totius literarii apparatus, unde praxis & militia deinceps scientiarum instruatur: proinde æquum est, ut merces ipsorum lucra Practicorum ex æquare possit. Aliter si patribus scientiarum præmia non constituantur satis ampla & luculenta, eveniet illud:

Et patrum invalidi referent jejunia nati.

Hæc ille in Anglicis Academiis desiderabat, in quibus tamen Professionibus suis non adeo tenuia stipendia, si cum aliis conferantur, numerari nos novimus. Eandem fortè ob causam, Bœclero teste, æqualia tam in Argentoratensi quàm Upsalienfi Academia omnium artium Professoribus salaria sunt constituta, scilicet lucri cupidine commoti à Statione suâ discederent, ut in alienas partes non sine aliorum molestiâ involarent. Est ita Auditores, est ita profecto! nunquam pejus habere rem Sapientum omniaque studia, quàm si ad mercenariarum, & sellulariarum artium conditionem abjiciantur, idque otium, quod honestum illis & liberale esse debet, præmiorum tenuitate in-

intervertatur. Nam qui paulum honestioris ingenii sunt, ad famem perpetuasque miseras plus quam adraſteâ neceſſitate condemnantur; qui paulum ab animi rectitudine declinant, hoc velut auctoramento, dum lucro ſunt intenti, ad improbas artes impelluntur, vel ſegnius ſaltem agunt, quæ ſibi ſunt agenda. Adeo malus in noſtris rebus ingenii largitor venter eſt. Quid magis infamat Theologiæ ſanctiſſima ſtudia, quid magis affligit, illa quam lucri illa ſacra fames? Jam tùm ipſe Salvator noſter ſuo tempore mercenarios illos animarum Paſtores notabat. Jurisprudencia auguſta illa & in ſolacium humanæ neceſſitatis exculta diſciplina, quam caſta illa integraque erat, cùm principes urbis homines, opibus & potentiâ florentiſſimi, & in ipſis Philoſophiæ ſacrariis enutriti, reorum cauſam agerent, de jure reſponderent, nullâ mercede ſollicitati, imò lege cinciâ à mercede capiendâ abſtracti! Triumphabant tùm eâ gloriâ Catones, Pollio- nes, Meſſalæ, Aruncii, Tullii, & ad domos eorum, velut ad Deorum quædam delubra, gratuita fundentium oracula accedebatur. Simul ac verò certis penſionibus æſtimata fue- re patrocinia, ſordibus oblita Diva caſtiſ- ſima, fraudibus locus datus, & hodiè rabulis in prædam penè tota ceſſit, eâ maximè parte, quâ mercenaria eſt, & in nundinationes per vim vel dolum convertitur. Cùm primum,

ante quinque hæc ſecula quaſi ex inferis ex-

citaretur Jurisprudencia, agmine quasi facto ad eam, velut ad vellus aliquod aureum aut prædam aliquam proruebant omnes, cum ad honores & opes cumulatissimas hanc quasi regiâ viâ grassari se posse crederent. Regnabat tùm ubique barbaries, è quâ velut è spissâ nube emergebant nonnunquam ingenia præstantia, quæ hanc Studiorum fatalem penè conversionem non satis æquis oculis intuebantur. Vivebat tùm in Angliâ seculum suum, supra hominum fidem, rerum mathematicarum & naturalium Scientia admirabilis Rogerus Baco, qui cum Theologorum Philosophorumque castra deserere videret, magno conatu se huic hominum morbo quasi epidemio opposuit, indignè præterea ferens, non jam amplius Philosophos, ut moris tùm erat in Academiis, rerum potiri, sed primas ubique occupare legum Romanarum Professores. Eadem quoque Matthiæ Parisiensis, non ignobilis historici, querela fuit: ita enim ipsa ejus verba habent: Temporibus sub eisdem liberales artes in mechanicas penè fuerunt conversæ propter lucrum, ut verè possit dici, Philosophia prostat, & in pretio pro meretrice sedet: & jam ferè omnes Scholares intactis Grammaticis rudimentis, autoribus, & Philosophis ad leges properant audiendas, quas constat non esse de numero artium liberalium: artes enim liberales propter se appetuntur, leges autem, ut salaria acquirantur. &c. Non poterat ab inge-
ni-

nio suo impetrare istius temporis quasi Phœnix quidam Petrarcha, ut amœnitate literarum bonarum relictâ se Studio legum Romanarum totum addiceret, quarum tamen auspicia integro septennio, quod jussu parentis impenderat, optimè illi cesserat. Post mortem tamen ejus nuntium huic misit Studio, cumque Cynus, Jctus clarissimus, ad prosequendum illud adhortaretur, in hæc verba rescripsit: Studium ad quod me hortaris, servile officium reputo, & mancipium omnibus se præstant, qui illo utuntur; & si paterna non foret reverentia, (à me) non acceptum. Quis est, qui non dicat, hæc jura venalia esse, & ad benè recteque vivendum longè aliis Studiis esse inferiora? Quid ad faciendum Virum bonum ista conveniunt? Sed quis non videt, ad virtutem consequendam nihil pertinere? Sed cupidum magis mendacem, iracundumque hominem reddunt. Longò post tempore Vir & genere & meritis in literas multis, idem que juris Romani interpres è primis, eandem non defuit cantilenam canere, cum ægerrimè ferret ad Reip. munia non Viris doctissimis, non illis ex elegantiori Jctorum familiâ, sed sordidis quibusdam & mercenariis hominibus aditus patere, cum ita scribit: Juris Civilis ac Pontificii non dico prudentibus, sed utcunque consultis, spes certarum capturarum proposita est ad cancellas forenses oberrantibus. Queis & ipsis, cum forensẽ laborem cœperunt,

à togatorum ordine emigrare statim licet, si fortunam nati sunt adminiculatricem, ad tribuna-
liaque scandere, & in subselliis liliatis enitesce-
re. Ex nullâ autem ferè vel disciplinâ vel nati-
one homines tot evadere videmus, non suâ vi,
non propriâ, non justâ magnitudine grandes,
quasi quidam grallatores. Nam ut hi calapo-
dibus sublati incessu prægrandi giganteam
proceritatem mentiuntur; sic illi in summis
magistratibus altisque cothurnis honorum
constituti summi sibi viri multisque videntur
esse. Hæc illi, Viri sanè suo tempore præstan-
tissimi deturbato per mercenaria studia scien-
tiarum artiumque liberalium otio quereban-
tur: quæ non in ignominiam Amplissimi Or-
dinis quis à me dicta interpretetur, sed de ho-
minibus miseris & jejunis & formularum can-
toribus, legum Romanarum non tam Docto-
ribus quàm Decoctoribus, quarum Majestas
Philosophiæ ac elegantiorum literarum bene-
ficiò ita post illa tempora revixit, ut splendo-
rem olim Romanæ Jurisprudentiæ æmulum
longè lateque vibraverit. Quanquam id fateri
tamen debemus, inter Scientias reliquas nul-
lam magis Sapientiæ bonisque literis obesse,
qui Jurisprudentiam, cum è liberali illâ & regiâ
transit in mercenariam. Illa enim ut Philoso-
phiâ bonisque literis maximam partem conti-
netur, ita hanc etiam ab Idiotis vel certè Inge-
niis non magnis magnæ tamen apud populum
authoritatis, felicissimè expediri posse vide-
mus.

mus. Unde quò conspectiora, eò magis noxia in vulgus sparguntur exempla. Budæi tempore cum plerique istorum hominum sordibus suis rure & inficetiis meris oppleti honorum subsellia quasi sua quædam sibi patrimonia rapiebant, rei indignitas illum movit, ut egregio libro Philosophiæ causam ageret, quò nomine omnem sapientiam & elegantiores literas complectabatur, & ipse regius consiliarius, ac libellorum supplicum Magister, supplicem ad Regem libellum, pro impetrandis & honoribus & stipendiis in bonas literas elocandis scriberet. Quem amare, quem legere librum debent, qui bonam mentem amant, & bonas literas, & pulcherrima illa otia, cujus velut classico excitata Gallia dignius postea, pretium literis iis statuit, quæ Sapientiam comitantur. Eruta è tenebris sunt antiqua sapientiæ & pietatis monumenta, à Viris doctissimis nativo suo splendori restituta: applicuerunt iis animum viri principes, vel subsidiis suis literatorum otia foverunt: honoribus illi aucti, patrimonia in eos splendida, è beneficiis, ut vocant, Ecclesiasticis collata: ut illi in fortunato & florentissimo otio extra rei familiaris curas, extra lites & jurgia, solius culturæ animi incumberent. Quò factum est, ut maximus esset pulcherrimorum ingeniorum, amplissimusque ex omni Sapientiæ genere librorum proventus: ipsis certè Italis, qui tantis, quas possidebant, opibus, tam liberali otio ad

ineptam potius superstitionem abusi palmam, si non præripuisse, dubiam tamen reddidisse viderentur. Nolo quicquam de Germanis dicere, apud quos, si tam opulenta præstantibus Ingeniis darentur otia, si Principum Magnatunque favor ex æquò conspirarent, dubium nullum est, quin omnes, quotquot sunt, nationes anteire literarum celebritate possimus: cum olim & nunc in re non adeo lautâ constituti homines docti, multis prætereâ etiam negotiis immerfi, præclarissimis Speciminibus ipsos Gallos Italosque provocarint, invidiam certè eorum & insignia, velut ab hostibus extorta, testimonia etiamnum promereantur. Multa, ut ipsi opinor intelligitis, *Auditores*, tacita relinquenda sunt, quoniam temporis ratio habenda, idque nobis agendum est, ne in otio isto nimis nos laboriosi, aut vestris auribus nimium facere negotii videamur. Nam si singula sapientiæ genera percurrere ac percensere nostrâ oratione velimus, multa de illis, multa de otio, quod ipsis dandum, restarent dicenda. Itaque misis illis, cum iis nunc agemus, qui honorifica illa Sapientum Otia, non tacitis tantum convitiis pungunt, sed per ora hominum traducunt, & publicis ludibriis exponunt: Ac si infrugifera illa, imò noxia, sint reipublicæ, ipsique homines sapientes non probè satis affecti ad munus fungendum repariantur. Quam nequissimam calumniam ut frangamus, notemus primum, eam profectam

Etiam esse ab istiusmodi hominibus, qui cum ipsi cæci sunt, aliis lucem invident, & suæ stultitiæ ab obstinatione suâ quærunt auctoramentum. Ut verò hominibus imperitis nihil est injustius, ita in hac causæ nostræ luce, tenebriones illos, bellos, si Dis placet, iudices, jure, legibusque depellemus. Ac primum de iis videamus scientiis, quæ in contemplatione solâ subsistere creduntur. Ex scil. hoc telo primæ petuntur, quasi scil. animum enervent, à rebus gerendis abducant, & inani otio velut tabe quâdam consumant. O stuporem, ô inscientiam! Nam ut de voluptate tam sanctâ, tam jucundâ ac propemodum divinâ, quæ ea studia comitatur, nihil omninò dicam; non enim saturant istæ delitiæ tam bruta pectora, & sunt, suæ Arcadibus glandes, & asinis cardui relinquendi: Fructus eorum studiorum in Rempublicam redundant uberrimi, si tractentur illa ab Ingeniis non proletariis & mercenariis, sed illustribus, sed regiis, & ad tam sublimia negotia ab ipsâ naturâ factis, & curâ solerti exquisitis. Ab hoc fonte, si nescitis, ô miseri, fluunt salutaria illa inventa humanæ necessitatis subsidia, quorum in pacis bellicque temporibus usus se exerit longè maximus, ut barbari, imò ad societatem colendam sine earum præsidio inepti existeremus. Cum in pulvere suo Archimedes speculatur, ipse quidem otiosus apparet, sed quàm salutaria illa patriæ otia sunt, quam periculosa hosti, ipse eventus

testatur. Infinita à me commemorari possunt, totque hodiè documenta loquuntur, quanta expectari possint à Viris beato quodam in otio constitutis: cum à maximè occupatis & alia agentibus tam pulchra tam præclara quotidie excogitari videamus. Quinimò si vel maximè opus externum post se non relinquat sapiens, non ille deses aut nihil agere putandus est, cujus speculationes actiones, & quidem longè ceteris perfectiores, vocat Aristoteles. Depone hoc apud Te, Seneca ait, nunquam plus agere sapientem, qui cum in conspectu ejus divina, atque humana venerunt. Quales non modo non contemnendi, sed velut cælo quidam missi heroës in exemplum humano generi, ut in hos, velut in speculum, intueantur, constituendi sunt. Verum ad Reip. negotia tractanda sunt inutiles. Id illi curant scilicet, quasi in eo positæ sint sapientum fortunæ aut eorum desiderio angantur illi magnoperè. An credat quis, eos, qui acie mentis dispicere, tam remota à sensibus possunt, quotidiana illa & ante pedes posita non comprehendere, si oculos animumque in illa convertere dignentur. Falsum quinimò illud crimen est, statimque concidet & extingvetur, si & veterum & nostrorum temporum consulamus exempla. Annon apud Græcos res magnæ & memorabiles à Philosophis sæpè gestæ? annon legislatoribus Philosophis optimæ constitutæ Respublicæ? quas factiosi postea homines opibus cum-

mu-

mulandis & tyrannidi suæ stabiliendæ intenti
vel turbarunt vel everterunt. Annon ex So-
cratis disciplinâ Alcibiades prodiit? â vitiis qui-
dem ille suis non planè ob ingenii pravitatem
derelictus, tanti tamen Viri cultura ad tot Vir-
tutis prudentiæque specimina institutus. Ex
eodem ludo, vel ipsomet fatente, Xenophon
pugnandi & imperandi illam artem didicit,
quâ Artaxerxis innumeras penè copias ad in-
terneccionem prostravit, tot provinciis Patriæ
suæ restitutis, Non fuisset negotiis Reipublicæ
obeundis impar Plato, ejusdem Scholæ disci-
pulus, si regibus ambientibus obsequi voluif-
set, nec corruptæ tum passim respublicæ, quas
Dis votisque suis relinquendas statuebat, ab
hoc consiliô illum dimovissent. Annon Ari-
stotelis monitis plus se Alexander debere,
quam parentibus suis, fatetur, nunquam abs-
que illô fuisset terrarum orbis imperium ad-
epturus. Sed neque nova nostroque seculo na-
ta defunt exempla. Magnâ me voluptate per-
fundit, cum inter Venetorum res gestas lego,
quantâ animi vigilantia Paulus Sarpus, homo
incredibili ingenio abditissima naturalium &
mathematicarum rerum arcana complexus,
eâdem facilitate tantæ Reipublicæ consilia or-
dinaverit, quantâ prudentiâ gravissimas, quæ
illi cum Pontifice Romano intercedebant, lites,
fuerit moderatus. Ac pulchrum fanè erat in-
tueri, quam ab unius Monachi, hominis nec
potentis nec opulenti, nec lucra captantis, sed

honesti & sapientis viri, svasionibus penderet Senatus venerabilis; quam intra angusti Musei parietes summa reipubl. negotia in secreto cum purpuratis Patribus volutarentur. Quod si tam præfrictæ frontis esse pergent nonnulli, ut fructus illos otii literarii amplissimos non persentiscant, ii superiorum nostrorumque temporum fata expendant. Perpetuum scil. bonarum literarum cum Reipubl. fatis fuit consortium, adeo ut illis vel negligentius habitis, vel in exilium missis caderent de culmine suo Respublicæ, iis vigentibus & illæ florent, vel amœnâ in pace optimè imperatrices, vel in belli tempestate potentissimæ victrices. Nemini puto nostrum in cognitum est, quæ fuerit superioris seculi felicitas, cum renascentibus literis Ecclesiis sua libertas rediret, earumque salus firmaretur, & magistratus à viris integris ac probitate peritiâque suâ spectatis administrarentur, simulac verò sordida ingenia & mercenaria cum decrescantibus literis rempublicam invaserunt, quasi quandam scabiem pulcherrimo ejus corpori affricuerunt, in quò non extremum, ut proverbio dicitur, sed summum scabies illa locum sæpius occupabat. Non potest, *Auditores*, non potest condignis factis præconiis cohonestari illud Sapientum otium, bonarum mentium fomes, artium pabulum, cos ingeniorum, obstetrix pulcherrimorum fœtuum, quò unò quicquid felicitatum contingere sapienti Viro potest, continetur.

tur. Revocemus nunc ergò animum, eumque intra se collectum ad otia sua reducamus. Collocavit etiam nos in otio literario Serenissimus noster Princeps, illudque & liberali satis & honestum munificâ in nos manu contulit. Amplexemur illud etiam inter luctuosa hæc & turbulenta tempora, dumque aures publici illi tumultus & tempestates circumstrepunt, intra nos ipsos recedamus, & in animo nostro quasi in solio quodam suo reponamus. Vos autem, *Cives Academici*, ad quos præcipuè spectat hæc oratio, ut hæc nobis otia vera sint otia ad Sapientiæ modestiæque præscripta instituta, videte, ô mei, ne abs se satis turbulenta tempora per Vos reddantur turbulentiora. Tu verò, O. M. DEUS, cujus otia nostra gloriæ serviunt, tu animis nostris illabere, tu otio nostro sanctissimam illam pacem Tuam adspira, Tu Principem nostrum Serenissimum è mediis fluctibus, è circumstantibus undique tempestatibus in portum, è turbis ad otia illa optatissima & Principe digna, quibus nostra continentur, manu potentissimâ reducas. Sic altâ aliquando voce inter triumphos hymnosque nostros Tibi acclabimus: DEUS nobis hæc otia fecit!

De Literarum in Republ. utilitate,
cum ProRectoris Acad. munus tertium
susceperet, die 5. Oct. 1684.

CUM in publico hoc confesso verba mihi
facienda intelligerem, omnesque ingenii recessus excuterem, ut argumentum à loci hujus religione non alienum, & solennitati huic consentaneum, & doctis auribus non indignum investigarem: Ex me in his animorum, temporumque fluctibus circumvenerunt difficultates, ut & res ipsa, de qua dicerem, mihi deesset, & verba ipsa dicentem deficerent, cujus neque principium caperet oratio, neque exitum inveniret. Quis enim Eloquentiæ locus esse possit, cum Vox ipsa intercluditur! Quas hic voces nostras jactabimus, qui ad perpetua propemodum silentia, damnamur? Quid animi ostendemus? quos lacertos vibrabimus? quæ latera opponemus, ubi omni spe, & præsidio orbamur, animi dejiciuntur, nervi inciduntur, spiritus comprimuntur, fauces ipsæ eliduntur. Videtis, Auditores, quem in locum res nostræ reductæ sint, qui non modo succum & sanguinem, sed & colorem omnem, speciemque amisimus. Conjicietis opinor: Quis in hac rerum conversione ac perturbatione mihi sensus, quid animi Sceptra Academica tractanti esse possit, cum omnium calamitatum, in quibus diu versamur
ma-

maturitas in hoc tempus propemodum omne
eruperit. Nam etsi ad breve quoddam tem-
pus, quibusdam levamentis animum solati fui-
mus, cum pacis illa species se nobis ostenderet,
refedit tamen illius mali vis, & nunc demum
ita ingravescit, ut si non ipsum Musis exitium,
Saltem miserrimi temporis propagatio, quæ ad
exitium satis est, ipsis expectanda esse videa-
tur. Quemadmodum qui feбри corripuntur,
si, ut caloris vim infringant, frigidam biberint,
primum quidem refocillati, ac à morbo recre-
ati sibi videntur, deinde multò ampliorem ab
his induciis factum morbum deprehendunt:
ita & hoc nostrum malum nunc vehementius
ingravescit, cum non solum externis periculis
circumsideamur, sed & in venis, atque visce-
ribus nostris inclusam aliquam tabem per sen-
tiscamus. Recordamini nunc mecum veterum
temporum, quotquot in nostro Ordine super-
estis, qui nascenti Academix obstetricias ma-
nus admovistis: Vivitis enim, atque in illa tem-
pora vestra hæc ætas incidit, ut cum tot virtu-
tibus Spectatos, tot artibus, & scientiis no-
bilitatos, tot meritis insignes, famâ, honori-
bus, quidni addam & opibus florere oporteret,
tum vivere etiam puderet, atque pœniteret.
Conferte jam veterum temporum fortunam,
ac gloriam, cum horum temporum injuriis,
moribusque perditis: florebant tum Res no-
stræ, nunc illæ destitutæ, afflictæ, everse: Erat
suus literis decor, & splendor, nunc alta illarum
con-

contemptio ac despicientia. Non deerant iusta laboribus præmia, non præmiis æquitas: Quid nunc exspectes nisi damna, & rei familiaris naufragia? Non tum animis, & ingeniis aberant honorum pabula; nunc illa vel corpori subtrahuntur, imò, si dicere fas est, perpetua illis jejunia indicuntur. Potestne, Vestram, ego fidem testor, *Patres*, Vobis hujus vitæ hæc lux, aut hujus cœli spiritus esse jucundus, cum inter continua pericula, ac insidias positis quicquid increpuerit pertimescendum, &, ne simplex miseriæ genus sit, cum extremis necessitatibus conflictandum, in sordibus, & domesticis malis indignè consenescendum. Atque, utinam foris tantum advenirent, quæ nos premunt incommoda! Conjiciuntur sæpe in nos (nam cur ea mussitare, aut dissimulare velimus? occultæ quorundam petitiones, quas cum non prævideamus, nullâ declinatione, & ne corpore quidem, effugere possumus, ut, si ex illorum voto, ac arbitrio res gerenda sit, non Natalia Academiae hodie celebranda, sed funus propediem ducendum videatur. Sunt enim, qui ut ipsi à literis averso sunt animò, & ex illorum hominum familia,

— — — — — *Qui rem faciunt, rem, Si possunt rectè; si non, quocunque modò rem: ita earum doctores, & quicquid sancti, eruditique, aspernantur, & apud inscitam plebem traducunt, neque ullas graviores jacturas, quam quæ his impenduntur, existimant. E-*

nim

nimverò non ferenda est hominum illorum improbitas : nam quis adeò vecors, adeò segnis est, ut rei hac indignitate non irritetur ? Ergo qui vel gladiò jugulum, vel sicà latus petunt, nos ne voce quidem vulnerabimus ? Verum ne maledictis quis me certaturum existimet, non tam illos in iudicium vocabo, aut actionem adversus illos, quam quilibet è populo, ut in publico delicto, poterat, institutam ; sed publicè me ostensurum susceperam, quantæ ex literis, & Academia hâc, divino & Serenissimi Principis beneficio, utilitates in provinciâ Holsatiam, in omnes ejus ordines, denique in urbem hanc reddudent. At cum tanta hujus rei vastitas sit, ut modica oratione omnia non possint comprehendi, unam tantum ejus partem attingam, & de Literarum in Republica utilitate generatim atque universè agam, ea, quæ de Academia nostra speciatim dicenda sunt, alteri occasione reservaturus. Quo in argumento versanti idem pene convitium ingeri poterat, quod non nemini justitiam olim laudaturo, quam nemo unquam vituperaverat, nisi in eo seculo viveremus, quò ipsæ virtutes patronis, ac defensoribus indigere videntur. A Vobis autem O. O. A. H. etiam atque etiam contendo, ut cum de re gravissima, addo & ubere, & copiosa, quantum intra horæ spatium ex isto cumulo compingi potest, dicturi sumus, paulisper abducere à communi do-

Transili
Phyl
Dece
vix

ad dolorem animos, oculosque velitis, quo & auribus, & animis vestris nostra illabatur oratio, & si non sua virtute, saltem, & causae dignitate, & Vestro favore sustentetur.

Si ab Ovo nobis ordienda sunt omnia, *Auditores*, (faciendum enim hoc est, quoniam nobis cum illis res est, qui quid est communi vitae usu, quid est suo sit, vel non intelligunt, vel per animi pravitatem intelligere nolunt) illud primum omnium respiciam, quod respiciendum in omni vita, in negotiis nostris, atque in omni societate civili nobis proponendum est, summum scilicet illum finem, cuius gratia omnia instituuntur, cui omnis nostra virtus tendit, cui omne, quod in nobis est, militat, ac fatebimini certe, ab hoc summo fine orationis nostrae principium esse arcessendum. Primum, quis est inter vos, *Auditores*, imò quis est, ut rectius dicam, inter Tirones, qui ignoret, id esse in Republica praecipuum, inque omnes valere partes, quod felicitatem ejus efficit non solum, sed & auget, & conservat, quod per totum civitatis corpus diffusum ipsi nervos, robur, vires largitur, & quasi mentis instar regit, & moderatur? Etenim cum ideò convenerint homines in societatem, ut bene sibi esset, & mutuò illò vinculo nexi promptiora haberent ad felicitatem sibi parandam subsidia, ut indigentiae suae subvenirent, alerent familiam, liberos in posteritatis curam susciperent, virtutes inter sese exercerent, denique suam populi que sa-

salutem, quæ mutuis nexibus illigata est, ope, studio, consiliis omnibus assequerentur; brutum certè hominem, & vesanum esse necesse est, qui non omnia, quæ ad illum scopum tendunt, subsidia amplectatur. Jam verò omnes Rerum publicarum partes circumspicite, quibus illæ crescant initiis, quibus augeantur, & in optimo statu conserventur: Quis est adeò à rerum usu remotus, ut Sapientiæ hic locum, primum dandum esse ignoret? Prudentiâ, & peritiâ legislatorum primo surrexerunt imperia, hinc ut in officio continerentur omnes ordines, ut magistratus curam susciperet civium, Cives quoque sua munia rectè tuerentur, ut sacra, humanaque omnia rectè administrarentur (etsi interdum naturæ bonitas hoc præstat) tamen virtutum præceptis, & disciplina longè præstantius ordinari, quis est, qui ignorat? Quibus inter se bene compositis, quis non felicitatis omnis initia & gradus literarum studiis contineri fateatur? quis non iis in Republica opus esse largiatur? Cum illa vitæ conciliatio hoc quasi coagulo temperetur, ut quo quis bonorum morum præcepta accuratius observet, eò majores vitæ civilis fructus percipiant. Longa esset instituenda oratio, si singulatim omnia persequi in animum inducerem. Si enim quam latè patent omnia Rerum publicarum momenta, tempora, partes, consilia, eventus, jura, hos civilis felicitatis percurrere modos omnes & rationes velim, dies

me citius deficeret, quam verba & rerum argumenta. Sed quid opus soli facem accendere? Neminem enim inter vos existere arbitror, cui hæc non sint luce meridiana clariora, qui non studia literarum felicitatis omnis in Republica semina cupidè amplectenda esse judicet, solemque è mundo tollere, qui salutari hoc vitæ præfidiô Rempublicam exuere, & in ignorantia tenebras conjicere non vereatur.

Verum, quemadmodum illi, qui in tabula alicujus regionis summa lineamenta oculo fugiente percurrunt, nihil de situs commoditate, nil de portuum amplitudine, nihil de urbium splendore, cæterisque, quæ ad civitatem vel ordinandam, vel ornandam pertinent, cognitum habet: Ita neque nos volatica ac superficialia hujus felicitatis contemplatione, quæ à literarum studiis originem suam ducit, omnia illa, quæ in Rempublicam ab his redundant, bona comprehendemus. Ac quoniam civitas non quâ parte lutea est, quâ marmorea, qua aurea & gemmea, spectari solet, sed qua humana; ad civium salutem omnia, in republica referri debere, nemo est, qui non intelligat. Sive enim imperio præfint, sive potestatem aliorum reveantur, mutuis imperandi, parendique legibus obstricti, ad omnes ex æquo hanc literarum felicitatem pertinere exploratum est. Et quidem quod ad Magistratus attinet, nemini divinam Platonis vocem incognitam esse existimo, qui omnes

Imperantes volebat esse philosophos, vel saltem philosophorum ope, & consilio uti: quod de civibus omnibus sua quadam ratione verum est, non quod Philosophos esse omnes velim, aut velut in Republica Stoicâ sapientes; sed qui tantum philosophos audiant, & illam in se principem partem iis doctrinis excolant, quæ in vita civili beatos reddant, & ad Reipublicæ onus sustentandum efficiant promptiores. Cogitate jam cum animis vestris, quomodo, ut singuli homines, ita populi ac integræ civitates sint educandæ, quibus imbuedi moribus, ut frena patiantur, & beatum illam in societate vitam, qua possunt ratione, assequantur. Sive enim è barbaris, & rudibus hominibus primum formanda est Respublica, quasi pædagogia quadam ducendi sunt, ut legibus bonis assveſcant, ut virtutibus animum excolant, ut scientiis, & artibus Reipublicæ profuturis se exerceant; sive in jam constituta republica recto talo stant omnia id operanda primum Magistratui est, ut peritiam tanto operi parem adferat, ita se omni in vita prudentem & incorruptum, ita se erga omnes animatum ostendat, ut esse cives suos cupit, ita illos in ordinem redigat, ut mutuis officiis se invicem, totamque reipublicæ molem sustentent. Hic verò pietas bonique mores, quasi solum quoddam, civilibus virtutibus subſternendi, quibus nisi inædificata cætera sint, nisi horum quasi Spiritu contineantur, omnia

Pietas

¶ sua mole collabentur. Quomodo enim ho-
¶ mines verebitur, qui nullâ in DEum reve-
¶ rentia ducitur? Quomodo civis boni partes
¶ exsequetur, qui viri boni personam nondum
¶ induit? nisi quamcunque etiam Latronum,
¶ & Cyclopum Rempublicam solo metu sufful-
tam sola illâ vi persistere posse arbitramur. Ne
¶ quid insolentius geratur providebit modestia;
¶ ne in periculis animum despondeamus, ani-
¶ mabit fortitudo; ne libidine, luxu, omnique
¶ flagitiorum genere res nostras evertamus, pro-
¶ hibebit temperantia; ne verbis factisque læda-
¶ mus innocentes, abstrahet justitia: Omnes
¶ denique cum inter se junguntur, quæ cognati-
¶ one se contingunt, virtutes, validioribus so-
¶ cietatem vinculis constringent. Illæ præsta-
¶ bunt, ut à rebus gerendis absit furor & auda-
¶ cia, à maturis & circumspectis consiliis igna-
¶ via, à secundis rebus impotentia, ab adversis
¶ desperatio: Omnia denique ad felicitatem,
¶ quæ à bona mente ac literarum studiis profi-
¶ ciscitur, conspirant. Ex illarum penu, quic-
quid est virtutum & morum, depromitur, quæ
illam animi principem felicitatem generant,
quæ, quò altiùs in singulis radices defixit, eò
latiores ejus fructus, omnium Civium ordines,
posterique, quorum è virtutibus majorum,
tanquam femine, propagatur felicitas, per-
fentiscent. Nam non solum ipsa literarum,
¶ studia parant felicitatem, sed si quæ nobis divi-
¶ nitus oblata est, conservant, bonis semel ac-
qui-

quisitis constantiam largiuntur, & quasi perpetuâ quadam custodiâ, ne illa nobis elabantur, observant. Quid? quod auctiora nobis per illa sunt omnia, non animi solum, sed & quæcunque alia bona. Accedit enim ad cumulum cumulus, & è quotidiano Sapientiæ incremento felicitas nostra accrescit, novasque eundo vires acquirit. Sive enim generis splendor nobis sit, literis illustrabitur; Sive opes & divitiæ, per prudentiam amplificabuntur; Sive honos & dignitas, novam illis lucem longiusque duraturam literarum studia circumfundent. O sanctissimam bonorum omnium parentem Sapientiam! ô felices, & nullô fatis præmiô efferendas literas! Quis non toto animo, omni spiritu, nervis omnibus vobis incumbat? quis se non totum vobis, suaque omnia tradat? quis non pietate, amore, affectu vos colat, & veneretur?

Intelligitis opinor, cum felicitatem in Republicâ literarum studiis contineri ajo, nihil excogitari ab humano ingenio posse, in quo non partem aliquam felicitatis insignem positam esse existimem, quod non à literarum studiis, velut à fonte quodam, propullulet, saltem magnum ab iis accipiat vel adjumentum, vel ornamentum. / Et si verò multa sunt, quæ æstimare homines solent, istamen, qui maxime laudis cupidine ducuntur, ut eminere omnibus cupiunt, ita nobilitatem, quâ à plebe sejunguntur, in præcipuis vitæ humanæ bonis

referre solent. Hujus nobilitatis cum in omnibus Rebus publicis magnum ponatur pretium, vel ab armis, & virtute militari, illam arcesse-
re solent, vel à literis, quas geminas ad illam vias agnoscunt. Dabimus illis etiam, ab armis esse nobilitatem, sed illam, quæ ab animi nobilitate minimè sejungenda sit, & hanc velut helicen aliquam, aut Cynosuram respiciat. Non itaque literæ tantum veram nobilitatem conciliant aliquibus, sed & illis ipsis, qui virtute bellica se sperant honores consecuturos. Etsi enim ad rei militaris gloriam & bellicarum rerum scientiam, & consiliorum, manuumque promptitudo, denique & felicitas quædam accedere debet: Tamen, ut hæc omnibus numeris sint absoluta, doctrina & disciplina, quæ virtutes omnes continent, solum quasi aliquod & fundamentum nobilitati sternent, & coronidem imponent. / Qui in pacato Reipublicæ tempore ad clavum sedent & pacis artibus rempublicam moderantur, iidem turbatis quoque rebus ope, consilioque subveniunt. Utrobique certe literarum studiis opus est, quæ non togatis solum, sed & armatis heroibus nobilitatem, gloriam, triumphos, paludamenta, & tiaras circumponunt. Perspiciate omnium gentium historias, omnium annalium excutite monumenta, & à literatissimis Principibus summa orbis imperia constituta deprehenditis. Quis nescit, quam armis imperium amplificaverit Cyrus, & ille tamen non bellica tantum

tum peritia celebris & spectatus, sed virtutibus /
omnibusque doctrinis excultus fuit, ut hunc /
Regibus in exemplum Xenophon proponere /
non dubitaverit. Quicquid Græcia fuit, per /
Athenas fuit, unde velut è Phidiæ alicujus offi- /
cina, non Apollines tantum, sed & Martes for- /
mati, totque Imperatorum virtus mirificè am- /
plificata fuit, ut haberent semper, quos non /
suis tantum rebus præficerent, sed & quos ali- /
is gentibus educarent. Tot sunt Heroum, /
exempla, qui nova Imperia vel instituerunt, /
vel collapsa instaurarunt, quod illi armis non /
tantum, sed literis maximè effecerunt. Alexan- /
der Magnus omni doctrinâ Aristotelis institu- /
tus ad imperium venit, & tantas res gessit, tam /
brevis tempore tam præclaras, quod sine sapi- /
entiæ prudentiæque adminiculis quis factum /
crediderit? Julius Cæsar omnibus artium præ- /
sidiis instructus fuit, scientissimus non solum, /
sed & eloquentissimus Princeps, adeo ut & ad /
Grammaticas tricas demittere se non dubita- /
verit, quibus se contaminari nostri polituli he- /
roes crediderint. Quod sibi Carolus Magnus /
nomen peperit, non tam armis, quam literis /
est assecutus, qui non Rex solum, sed & Doctor, /
ac Præceptor populorum suorum fuit; à quo /
quicquid Ecclesiasticæ disciplinæ, quicquid /
Scholasticæ Sapientiæ per Germaniam, & Gal- /
liam ad hæc usque tempora propagatum est, /
propullulavit. Non ergo à literis solum descen- /
dit nobilitas, sed quæ alia quacunque ratione

parta est, nisi studiis & artibus, velut, fulcris quibusdam, sustineatur, ruere illam necesse est, vel Saltem insigniter labefactari. Tolle illa, & Nobilitatis splendor omnis peribit, virtutes degenerabunt in vitia, fortitudo in furem, prudentia in temeritatem & audaciam, mutabitur, temperantia in luxus & libidines, iustitia in fraudes & rapinas, omnis honesti species in scelera ac flagitia convertetur. Quod si nascendi forte nobilitas obtigit, nulla erit nostra in alieno bono gloria: Neque enim peregrina virtute, ut alienis plumis, nos ornabimus. Tum vero proprium hoc perpetuumque nobis erit bonum, si ipsi majorum virtuti nostram junxerimus, nec proavorum rebus præclare gestis, sed iis, quæ ipsi laude digna fecimus, nitamur. Quando itaque nobilitatis maxima est habenda ratio in republica, ea enim splendorem, ea vigorem addit; quis non videt, in honore habendas esse literas, ut fidelissimas nobilitatis omnis & gloriæ procreatrices, & conservatrices.

Verum, nisi me omnia fallunt, obstrepentes mihi hic audio Mercurii pullos, eos scilicet, qui lucro tantum suo inhiantes virtutem vel planè contemnendam, vel saltem post nummos ponendam esse arbitrantur. Quid enim, ajunt, inanibus umbris & titulis reipublicæ molem sustentabis? Ergo literarum studia efficiant, ut salva sit respublica? ne quid illa detrimenti capiat, illa providebunt? Nescis ô bone, quid

quid valeat nummus, quem præbeat usum, tardus utilium provisor nubemque pro Junone amplectens, & umbras captas, cum rem facere, rem sectari, rem congerere, rem cumulare deberes. Sanguine suo impleri, nervis tendi debet civitatis corpus, siquidem durare illud, & ætatem ferre velis: quibus subtractis ex sanguine erit cadaver, omni spiritu, succo, vita, & vitæ colore destitutum. Non vident illi homines, qui ita sentiunt, quam misere, errent, alios decipiant, ipsi decipiantur. In sapientia, prudentia, artibus, si nescitis, sitæ sunt opes, ut singulorum, ita & Reipublicæ; nec animi tantum divitiæ, sed & illæ, quarum ad omnes necessitates usus est. Solò certe ingenio vivitur, cujus è fœcundo sinu omnes illæ artes, qui humanam indigentiam solantur, eique omni quæstus subveniunt genere, promanant. Ingenio profecto, artibus disciplinis indigemus, ut reipublicæ proventus indagemus, indagatos ad publicam & singulorum utilitatem referamus, prudentiæ opus est, ut rectè dispensemus. Annon videmus, quam medias sint inter opes inopes Barbari, qui etsi divitiis, quas fodinæ, quas maria, quas sylvæ subministrant, circumfluunt; tamen cum rudes sint artium, quæ ad civilem vitam animos præparant, iis uti ignorant, & cum felicissime vivere possent, miserrimam tamen, minusque commodam quomodounque vitam tuentur. Quid scilicet Barbari, quid agrestes homines,

nullisque doctrinis imbuti de fructibus & proventibus terrarum judicent, nisi aliquo Philosophiæ naturalis, ac Mathematicarum disciplinarum sapore tincti. Philosophi sunt, qui fundis sterilibus culturâ subveniunt, maria efficcant, & in novos alveos deducunt. Hi terræ viscera rimantur, atque ex illis opes eruunt. Hi navium fabricam, atque omne, quod ab illis dependet commercii genus, docuerunt. Hi terræ proventus per vanas machinas, totq; ingenii molimina, in tam varias formas convertunt, ut novæ hinc semper ditescendi occasiones nascantur. Si qui hodie rudes sunt, & tamen iis utuntur artibus, cum suo non possunt, majorum fruuntur ingenio, perque illorum solertiam suæ subveniunt necessitati, ut vel hinc constet, olim tamen ab ingenio humano excogitatas esse artes, quibus nunc fortunas nobis fingimus. His etiam addere nostra consilia poteramus, si eodem essemus ingenio instructi, quod cum defuerit simplicioribus olim hominibus, inter Deos retulerunt, qui singularibus inventis humanæ necessitati subvenerunt. Cui denique ignotum est, in isto variarum artium complexu esse Chrematisticam, quæ tota, quanta est, ab hominis sapientis ingenio arbitrioque dependet, & Philosophiæ practicæ pars non contemnenda est, ac diligentius, quam vulgo fit, etiam in Academicis excolenda, unde quis fortunæ suæ fabricer, modo velit, semper esse possit. Quod si

paratae jam sunt divitiae, & à majoribus congestae, iisdem artibus, eadem prudentia, imò majori, conservantur non illae solum, quae singulorum, sed & quae omnium sunt, ac universae civitatis. Hic sane omnia ingenii, omnia artis arcana in subsidium vocanda, ne divitiis semel partis excidas, aut illae vel per malam administrationem, vel per fortunae iniquitatem intervertantur. Ut proventuum ubertatem, continuis accessionibus augeamus, Oeconomices non solum peritia, sed & ceterae artes, quae è naturali Philosophia, & Mathematicis disciplinis proficiscuntur, efficient. Ars enim naturae addita tot, tantaque operari potest, ut mille operarios fatiget, omniumque industriam & diligentiam in commerciis versandis, in opibus colligendis exerceat. Nam vel terram novis fructibus ferendis adfvefaciet, ut qui Serici & Nicotianae culturam in Europam intulerunt; vel ex iis ipsis fructibus nova quodam ratione lucrum aliquod exsculpet. Sylvae sunt, & ligna? Circumspiciendi sunt fabri, qui varia ex iis ad usum & ornatum conficiant. Abundat terra metallis? Praesto sint operarii, qui materiam in varias formas, ut opus ipsum materiae pretium superet, elaborent. Ovium, lanæ, & serici copia est? Infinitae texendi rationes excogitari possunt, in quibus omnibus nihil est, quod non ad ingenium, & artem referatur, longaue propagine vel ex ipsis Philosophorum scholis descendat. Majori itaque

in pretio, si sapimus literarum studia habebimus, quæ non otiosos tantum & inertes homines, ut quidam clamitant, efficiunt, quæ non svavibus tantum picturis animum pascunt, sed vim suam in omnia vitæ civilis momenta diffundunt, ut eorum fructus ab aliis quidem præcepti ad omnes dimanent.

Multa magnaue sunt, quæ in literarum honorem dissertavimus, ut illarum in republica utilitatem ostenderemus; faciunt illa cives felices, nobilitatem & gloriam illis conciliant, opes & divitias largiuntur. Quid ab his amplius postules? quid majus requiras? Imo verò majora sunt, quæ ab his sperare possumus, bona. Nam quotidiana illa sunt, quæ diximus, beneficia, neque vitæ nostræ tempora egrediuntur. Proveniunt ab illis beneficia, quæ etiam, cum fuimus, nobis durant, & singulorum mortalitatem quadam Reipublicæ immortalitate solantur. Quis est inter vos, A. (nam, ut opinor, satis ipsi hujus rei gravitatem cognoscitis) qui non liberos & nepotes suos suis oculis, imò animâ suâ magis charos habeat, atque ut ipsis etiam in longitudinem consulatur, ac perpetuò bene sit, vel suæ quid felicitati detractum malit? Verum tantum abest, ut imminuenda idcirco parentum felicitas sit, ut potius à liberorum fortuna & salute nova capiat incrementa, novisque successibus & præfidiis augeatur. Quorum educationi cum prospiciunt literarum studia, nihil adeò in vita humana amplum

plum & jucundum est, quod non præ hac voluptate contemnas. Quemadmodum boni patres familias non præsentì tantum tempori consulere debent, sed & futura prospicere; nam in hyemem illi, & multam annorum feriem, reponunt, unde sustentent familiam: Qui agrorum & hortorum curam gerunt, cum oblati fruuntur, etiam in annos sequentes semina colligunt, & ad posteritatem arbores plantant: Ita in Republica puerorum educatio omni præstat potentiâ, omnes census divitiasque supergreditur. Hinc Viri, hinc Cives boni, hinc ad rempublicam bene administrandam & sacra & humana ritè obeunda, nova, semper sufficitur soboles. Hinc ad pacis & belli negotia rectè tractanda novi Hectores, & Achilles, ad consilia novi Mecænates, ad universam denique Rempublicam novi Atlantes, & Hercules, quasi è Polycleti alicujus officinâ, prodeunt. Unde verò hæc in Rempublicam bona, nisi à literis, earumque Doctorebus? Permite sibi rempublicam, non sit, qui in spem posteritatis juventutem formet; pro Regibus nascentur Tyranni, qui vi, qui armis, qui libidine omnia agant, qui nihil hominis præter speciem habeant: pro civibus fera orientur animantia, quæ mutuis in sese viribus ruant, & velut Cadmei fratres, sine lege modoque in se grassentur: nulla religionis cura, nulla legum reverentia, nihil sanctum, nihil inviolabile, nullus artibus honos,

nulla

nulla bonis præmia, omniaque quædam fatali ignorantia ac malitia absorbentur. Fac disciplinæ & artes floreat, jam in novos quasi homines renascentur cives, redibit templis, & aris religio, legibus reverentia, animis virtutes, virtutibus honos, omnes denique rectius vitæ civilis munia tuebuntur. Tota scilicet in scholam convertetur Respublica, ubi perpetuis majorum exemplis ad virtutem provocentur minores: minores, præcepta cum lacte ipso à teneris ungviculis, velut semina quædam, concipient, unde aliquando nova virtutum exempla progerminent. Neque tantum bonos & felices efficiunt literæ liberos, sed ubi semel probè edocti sunt, ut semper tales sint efficiunt. Conservant enim in pueris hæc omnia, quæ majores in seminarunt, vitia extirpant, vel saltem, quod hortulani prudentes facere solent, prohibent ne intercupressos hæc lolia caput exserant, & virtus iis suffocetur; ignorantiam profligant, ut in scientiis artibusque, quas semel perdidicerunt, persistant, iisque in publica commoda utantur. Quod si à nonnullis peccatum in educatione est, studia literarum huic malo subvenient, idque efficient, ut, qui naturâ boni sint, nova semper augmenta acquirant, & ad gloriæ fastigium per omnes gradus enitantur. Quibus Indoles ad scientias & artes egregia est, illos literæ ita excolunt, ut eò adspirent, quorsum sibi relicta ingenia non pertingunt: O quam præ-

prædicem vos, bonæ literæ? Quibus vos elogiis ornem! quâ veneratione prosequar! Parentes Reipublicæ cives generant; Vos bonos efficitis, non viros solum, quod ultra omnes titulos est, sed & cives. Hi vitam largiuntur & naturam, Vos ingenium gignitis, Vos bene vivere, Vos secundum Virtutem operari, docetis, Vos naturæ artem magistram inducitis. Hi animal sensu præditum formant, Vos hominem ratione ornatum, tot animi opibus instructum, in vitæ civilis theatrum producit. Per vos regna firmantur, reguntur Respublicæ, tenentur Imperia; Vestris habenis legibusque, totum hoc corpus constringitur. Quis itaque adeo vecordis est animi, ut insignem literarum in Republica usum non sentiat, ac intelligat, non animis, oculis, imò manibus comprehendat?

Ast obganniunt hic nonnulli nobis aliqua, qui non modo necessarias ad rempublicam bene gerendam literas negant, sed & summè noxias ajunt, adeoque omnem illum animi vigorem, omnem agendi vim & efficaciam his extinguvi arbitrantur, cum solam illam naturæ bonitatem & indolem omni disciplinæ præferendam esse existiment. Verum his quidem hominibus nil esse stultius ipsa res, ut nos non loquamur, clamitat, qui, si rem rectè reputes, docere scilicet homines volunt, quomodo intelligendo nihil intelligant, aut cum ratione, insaniant. Etenim quam illi bonam indolem
fi-

sine disciplina vocant? quid est, quod idoneos reddere homines ad res magnas gerendas possit? cum qui solâ naturâ nitantur, cæteris autem deficiant rerum bene gerendarum instrumentis, idem in rebus præstent, quod in negotiis perficiendis cæci, mutili, claudi, & manci solent. Miseros nos, si unicam ad omnia naturam ducem habeamus, neque illam arte, doctrinâ, industriâ adjuvemus. Circumspicite omnia naturæ opera, quid est in iis, quod hominum usibus accommodatum sit, nisi arte quadam præparetur, & ad maiorem perfectionis gradum deducatur? Ad glandes nobis redeundum esset, nisi panis confectio- nem ars docuisset: Aquam cum brutis animan- tibus biberemus, nisi vinum industria homi- num invenisset. Omnia scilicet rudia & invo- luta suppeditat natura, expolit ingenii huma- ni solertia, & ad commodiorem usum compo- nit. Quem illi scilicet hominem nobis forma- bunt? Quam Rempublicam? An Cyclopicam? in quam nemo neminem audit: an Americanam aliquam, & Barbaram? quæ vix à pecudum stabulis differt. Non est tanta indolis, inge- niique nostri felicitas, ut nullis adjuta admini- culis & bene agat, & recta sequatur. Nullum adeò fœcundum adeò pingve solum est, quod sine culturâ fructus ad vitam sustentandam, necessarios proferat: nisi enim cultura accesse- rit, littus arabis. Tractanda tellus variis ar- tibus est, subigenda, domanda, semina in-
iper-

ſpergenda, arbores implantandæ, ut felices illi ſucci, quibus humana valuntur corpora, è terræ viſceribus provocentur. Permite ſibi, ſuæque naturæ agros, & lolium infelix, ac ſteriles dominari avenas videbis. Degenerabunt omnia, & vix pecori in paſtum cedent. Quid eſt igitur in homine ſolis naturæ bonis inſtructo, quod illum ad Rempublicam idoneum efficiat? cum nihil ſit, quod ejus indolem regat, & moderetur, quæ incertâ lege, ut non audiens habenas currus, feretur. Nam quæ ille per diſciplinæ præcepta non didicit, per experientiam, variis è caſibus, temerariò quodam impetu, & longinquò, imò periculoſo, itinere conficiet. Sed illa ſtultorum magiſtra eſt, & magnis imperitiæ jacturis vindicare ſolet; cum ſapiens omnis fortunæ faber ſit & caſus imperitiæ plebi inexpectatos, vel quia præcepit, declinat, vel, quia declinare non poteſt, in reipublicæ commodum convertit. Quod non fieri, niſi ab homine omnium temporum, dierum, horarum, & rerum poteſt. Quare qui ſine doctrina quicquam ſe conficere poſſe putant, iidem ſine nervis ambulare, ſine alis volare, ſine ſpiritu ſe vivere poſſe, exiſtimant: in rebus verò novis ſemper hærebunt, horrebunt, palpitabunt, & cum vero conſilio deſtituantur pravè agendo omnia corrumpent. Quandoquidem, ipſo illo Sole, clarius illa literarum in Republica neceſſitas elucet, neminem è Vobis eſſe arbitror, qui

non nostræ sententiæ suam quoque adjungat, atque eò vehementiùs studiis incumbendum, esse existimet, quò magis illorum splendor, animos tantâ pueritudine flagrantibus laceffit. Hanc enim jucunditatem ac fravilitatem, quæ è literis proficiscitur, summa est, omnesque totius terrarum orbis voluptates antecedit, seposuimus, & ab illa parte, quâ utilitatem ostendunt, vobis exhibuimus. Quod si itaque summam in Republica felicitatem non efficiunt solùm, sed & custodiunt, literæ; si per illas gloriæ nobilitatisque fastigium ascendimus, & honores partos tuemur; si opes, divitiasque, quas ardentibus votis exoptamus omnes, his artibus & congerere, & cumulare, & ad perpetuas nostrorum fortunas bene collocare discimus; si denique non nobis tantum, sed & liberis nostris per has bene est, si illos in patriæ spem, familiæ præsidium, gloriæque avitam possessionem, alere, educare, atque omnibus virtutum præceptis confirmare possumus: Quis non illa sibi per omnem vitam studia sequenda esse existimet? per quæ omnes felicitatis humanæ gradus se assecuturum speret? Versamur hic in ipso literarum regno, quod publico bono Serenissimus noster Princeps, ac Dominus Clementissimus, constituit, unde in patriam nostram tot, tantique fructus propullularunt, quos singulari Oratione, quando publica dicendi occasio nos invitabit, proponemus: Pecora sunt, ac ignavi homines,
qvi

qui illas utilitates non persentiscunt; insigniter improbi, qui dissimulant vel contemnunt; Nequissimi, qui molitionibus suis hoc bonarum mentium seminarium eversum eunt. Nusquam à quoquam vel hoste publico & atroci everfas accepimus Academias, communis, atque adeò generis humani, causa est juventutis bona educatio, quam qui subvertit, ipsi humanitati bellum indicit, & divinam aliquando manum vindicem experietur. Vos autem, ô juvenes, in quibus illi virtutum igniculi, illi bonæ mentis stimuli, velut in vagina inclusi latitant, agite, exserite illos, atque illis maturè studiis animum imbuite, illis virtutibus, quæ studia comitantur, doctrinam omnem vestram excolite, ut & vobis non solum sapere, sed & reipublicæ, patriæque sapere, discatis; In illam enim redundare debet, ad illam velut ad scopum, & metam tendere debet omnis, quæ vobis infumitur opera: in quibus cum spes suas posuerint parentes, Patriæ patres, omnesque illi, quorum interest, vos esse salvos, doctos, incolumes, nobiles, omni sapientiæ & prudentiæ disciplinâ subactos, in illud nervos, spiritus, studium, omnemque vestram industriam conferetis, ut illi, qui nunc rerum summæ præfunt, & laudabili sapientiâ Rempublicam moderantur, non degeneres sibi nepotes aliquando successuros si non videant ipsi saltem animò præcipiant, & hoc novo gaudio spes, vota, studia, desideria sua erigant

atque solentur. Videte, ne tempora nostra, qui satis per se misera, inquieta & turbulenta sunt, novis calamitatibus per culpam vestram augeantur, & mihi inter tædia perpetua sint, transfigenda.

Nunc Te, Deus O. M. unde omnis in hominum mentes illabitur sapientia, suppliciter imploramus, & appellamus, ne exstingui patiaris, quas hic incendisti bonarum artium faces. Tuum hoc, Pater optime, munus est; qui, ut divini tui Spiritus charismata olim effudisti; ita & in nobis, quicquid pium, sanctum, honestum, imo quicquid tuum est, ut æternæ tuæ lucis radios, digitoque tuo mentibus nostris inscriptos, conservabis, neque committes, ut per malitiam nefariorum hominum exstirpentur. Tuo, *Deus Optime*, præsidio nitimur, Tu in nostris castris præsidiisque versaris, Tu in juriarum esto ultor, fortunarum propagator, causæ nostræ defensor, salutis nostræ restitutor. Tu, si in hoc dicato tibi domicilio omnia nostra consilia ad tuam gloriam patriæque salutem spectaverunt; si nullam ad rem, nisi ad officium & veritatem, omnes nostræ curæ, vigiliæ, cogitationesque laborarunt; si tuæ civitati cives, tuo electo gregi Pastores, tuis aris templisque custodes educavimus; si Tribunalibus & Consiliis præsides, & judices, si scholis bonarum artium Doctores in gremio, ac sinu nostro enutrivimus; si afflictis patrocinia, ægris solatia admovimus; si denique ad omnes di-

disciplinas viam præivimus, ingenia formavimus; Tu, inquam, fartos, tectosque, ab omnique damno & detrimento sinceros integrosque conserva! Tu hostium nostrorum animos nobis confice, atque novum illis & benevolum ingenium indue; Denique, in quo summa salutis nostræ vertitur, Sereniss. nostrum Principem, ac Dominum Clementiss. unicum rerum nostrarum post Te statorem ac præsidem, salvum nobis incolumemque præsta, idque effice, ut nobis Dominus optatissimus, nos Domino clementissimo, & civibus Pater, patri cives, ut dignitas illi pristina, fortunæ amplissimæ, denique nosmet ipsi nobis restituamur.

De fructibus in Holsatiam Kiloniumque urbem ex Academia. redundantibus,

Pro-Rector quartum, mense

Apr. 1687.

QUoties hunc ego locum conscendo, & omnis cultus genere apparitissimum, & hujus ædis sanctitate religiosissimum, & auditorum frequentia ornatissimum; conscendi autem nonnunquam, cum vel magistratus capiundi abdicandive gratia,

tia, vel in honorum erogatione verba ad vos facerem : toties ego, cum veterum temporum in mentem mihi venire solet, & nova cum illis compono, in varias animum partes verso, nunc quidem maximè adeo à se ipso dissidentem, ut præteritorum memoriâ jam gaudere, jam dolere; præsentium conditione perturbari, futurorum hinc spe recreari, illinc metu torqueri videatur. Ac sane, si ad præterita referre animum velimus, quis est amplissimo vestro Ordine, ii præsertim, qui feliciter nascentem Academiam conspexere, ac vivi videntesque illius lætitiæ testes fuerunt, quorum non totidem, nunc sunt, quot Thebarum portæ, vel divitis ostia Nili, cui jucundas ea tempora dent recordationes. Mihi quidem illorum imaginem oculis sisto, nescio quâ voluptate animus perfunditur, solentque ea animo obversari, quæ de surgente Carthagine divinus noster, Maro cecinit; ubi *pars fura magistratusque legunt, sanctumque Senatum; alta theatris fundamenta locant alii, immanesque columnas Rupibus excidunt scenis decora alta futuris.* Instruebatur enim tum illud famæ in Cimbris theatrum amplissimum, adornabatur illa officina, in quâ exciderentur illæ civilis sacrique Ordinis columnæ, in quâ Mercurii, & scenis & seclis decora alta futuris efformarentur. Neque minori tum laborabatur industria, quam illic, ubi cum apibus comparatione institutâ pulcherrimis rem coloribus depingit, nosque, qui hic de-

do-

doctorem Republicâ erigendâ solliciti eramus,
hodieque sumus, illos apum labores æmulaba-
mur, & nunc quantum in nobis est, æmula-
mur,

*Qualis apes æstate novâ per florea rura
Exercet sub Sole labor, cum gentis adultos
Educunt fœtus, aut cum liquentia mella
Stipant, & dulci distendunt nectare cellas;
Aut onera accipiunt venientum, aut agmine factò
Ignavum fucos pecus à præsepibus arcent.
Fervet opus, redolentque thymo fragrantia
mella.*

Eduximus scilicet jam tum ab illo tempore,
fœtus nostros, volitavimus per illos scientia-
rum campos, flores libavimus, mella stipavi-
mus; an fucos omnes à pabulis nostris ejeceri-
mus, nunc quidem non dixerim; nostrâ certe
culpâ nullos adduximus. Ac sane bene me-
minimus illorum temporum, quibus & fuci
nobis & crabrones fuere molesti, quorum illi
ad perdenda pabula, quæ bonæ apes college-
runt, nati; hi ipsis quoque apibus bellum in-
dicere consueverunt. Nam, proh DEUM
immortalem! quanta ex illo tempore rerum
facta conversio? quæ Reipublicæ inflicta vul-
nera? quæ nostro fundo calamitas illata! Ut
cum hæc animo perpendo, & tota hæc provin-
cia & nos huic fortunæ rotæ illigati, quasi al-
teri Ixiones circumacti videamur. Divino
tamen beneficio accidit, ut adversus tot tem-
porum & fortunæ insultus salvi in hunc diem

peristeremus; etsi mihi, quoties per interval-
la Sceptra Academica resumsi, Virgilianus il-
læ Melibœus, qui *post aliquot sua regna videns*
miratur aristas, animo obversari videbatur. Ac
propemodum evenisset nobis, quod illi, qui
jam pecori suo valedixerat:

Ite meæ, quondam felix pecus, ite capellæ;
nisi DEUS nos respexisset, & optimi Principis
consilio servati fuisset. Alterum quidem
Melibœi congerronem Tityrum

Libertas, sed sera, tamen respexit inertem,
Candidior postquam tondenti barba cadebat,
Respexit tamen, & longo post tempore venit.

Verum nos ne quidem longo illo tempore Pax
aurea respexit, tot votis nostris sollicitata, tot
consiliis quæsitæ, ut multis canities nequic-
quam sperantibus obrepserit, aliqui hæc tur-
bulenta tempora cum æternâ beatæ pacis se-
de commutarint. Et ne nunc quidem, quid
futurum sit, novimus, qui animo inter spem
metumque suspensio, quorsum fata denique,
nostra exitura sint, expectamus, atque ita ex-
spectamus, ut vel salutis nostræ, cum extrema
quævis, ut fieri à metuentioribus solet, nobis
proponimus, interdum diffidere incipiamus.
Quæ inter hos rerum turbines protracta ætas
plerorumque est, pene jam vitæ portum pro-
spicit, & nunc pene, ne in portu ipso naufra-
gium faciat, extimescit. Sed meliora, DEO
duce, nos sperabimus, & sperare vos, Patres
Academici, jubeo, illis vos Æneæ verbis pau-
lum

lum immutatis, quibus socios suos è naufragio superstites alloquitur, compellaturus: hæc enim, nescio an quodam sortis Virgilianæ genio, cum inter has meditationes, Æneida forte aperirem, obtutui se nostro ingesserunt.

O Socii, (neque enim ignari sumus ante malorum)

O passitam multa: dabit DEUS his quoque finem!

*Vos & Scyllæam rabiem & Cyclopea tela
Experti, revoke animos, mæstumque timorem
Mittite: forsàn & hæc olim meminisse juvabit.
Durate, & vosmet rebus servate secundis!*

Erigimus ergo animos, & nunc tandem suis nostrisque reddendum rebus Principem nostrum clementissimum, post devorata tot annorum tædia, post tot fortunæ insultus, tot temporum injurias & tempestates, expectemus. Non destituet preces nostras DEUS, expugnabimus tandem Cælum, & si quid veri mens nostra auguratur, aut si quid vati vestro permittitis, videor mihi videre illum diem, quo compositis Patriæ Patrum animis, sedibus avitis restituantur, civium plausu excipiatur, in Musarum suarum amplexus ruat Serenissimus Princeps, nosque in his subselliis præana illi canamus, vota pro salute ejus nuncupemus, toti in triumphos & júbila, è quibus meam quoque mihi partem vindico, diffuamus. Hæc me spes sceptris Academicis, & Serenissimi Principis autoritate, & vestro, Patres, consilio

admotum, solatur, ut, quod nunc humeris meis impositum onus est, eò lubentius subeam, quò magis illa mihi felicitate blandior, fore, ut hæc meis commissa curis æstas diuturnæ tandem calamitati finem imponat, initiumque novæ paci, tranquillitati, securitatiq; publicæ largiatur. Ego nunc, quod mearum est partium, vestris, Patres Academici, consiliis adjutus, aggredior, accepturus illos honores, quos mihi Decessor meus tradidit, cujus ista in hoc munere gerendo fides, industria & prudentia nobis spectata est; ut, nisi legibus & consuetudini parendum esset, vix alio successore opus esse videatur. Quoniam vero ejus capere primordia oratione aliquâ solemus; id enim vel auspicii gratiâ fieri æquum est; dignumque tam illustri auditorio argumentum circumspicerem, subiit animo, quod dudum, cum ante hos quatuor annos Magistratum adirem, pollicitus eram. Nam cum de necessitate literarum in Republica tunc verba fecissem, simili occasione de fructibus, qui in Holsatiam, atque adeo ipsam hanc urbem ex Academia redundant, me dicturum promisi. Quod nunc mihi faciendum proposui. Nam, quemadmodum felices Virgilius agricolas judicat, sua si bona norint; ita in aliis quoque rebus accidere solet, ut quotidiana nobis bona ignorentur, neque illo pretio, quo debent, æstimentur. Ne quid de eo dicam: esse sæpe homines adeo insigniter improbos, eaque mentis ad omnia,

cœcitate depravatas, ut, quæ communi humani generis commodo salutari consilio inventa, aut divino beneficio concessa sunt, non tantum non agnoscant, sed ingratissimo animo & ore aspernentur, fœdissimisque convitiis proscindant: illis non absimiles populis, qui Soli Orienti maledicta ingerunt, occidentem tripudio omnique lætitiæ genere prosequantur, digni fane, qui nocti suæ perpetuisque tenebris relinquantur. Quare ingrediar nunc illum, dicendi campum, spatiosum fane ac quam vastissimum, in quo se jactet hæc nostra & prope modum exultet oratio, ita tamen, ne infinite vagetur, tribuenda, ut primum de utilitate, deinde de jucunditate, hinc de gloria, uberri-
mis Academiæ fructibus, dicam, qui in totam hanc Provinciam atque hanc Urbem, gratissimam Musarum nostrarum sedem, omnesque adeo cives promanant. Quod cum facio, tantum abest, ut molestus vobis esse verear, ut ineptum me fore existimem, si vos precibus obtundam, ut aures de re tam gratâ, tam amœnâ dicturo commodare velitis: nisi forte non tam rei, quam Oratoris fastidio ducti, copiosiore elegantioreque huic argumento linguam optaveritis: quam, si illi non præsto; neque enim tam magnifica mea vobis promittere potest tenuitas; id saltem mihi nunc permittetis, ut, quod nobis ingenio deest, & argumenti gratiâ & vestrâ per benignam interpretationem suppleatur.

Capitulum:
12. 12.

Ac primum quidem, cum de commodis institutæ in Cimbrorum gente Academiæ verba facturum sum, nihil hic de literarum utilitate, in Republicâ generatim & universe nunc dicam, cum eâ de re uberrime alia occasione dixerim. Nunc ea tantum, quæ propius nos tangunt, & quare patriæ de insigni illâ accessione gratulari debeamus, diligentius excutiemus. Agnoscendum est, gratoque animo deprædicandum divinum illud consilium, quo incitatus primum Serenissimi nostri Principis Divus Parens Academiam sibi proposuit, Filius tandem, paternæ gloriæ hæres novæque propagator, felicissimo ausu perfecit. Quo enim gentem suam majore lætaret beneficio, quam illo, quo divinæ humanæque sapientiæ æternum illi extraxit domicilium, ut jam Cimbria suas quoque in Kilonio Athenas videret; ut non eminus tantum & peregrinas, sed suas quoque domi Musas & gentiles haberet & veneraretur. Nam certè cum Holsatiæ nostræ nihil ad beatam illam ubertatem deesset, omniumque rerum copiâ illa abundaret: nam & cælo benigno temperatoque fruitur, & utriusque maris opes ipsa quasi in sinum ejus effundit natura, & pingvissimo solo copiosæ fruges, & tot in fontibus, stagnis pisces, tot in latissimis pascuis armenta educantur, tot in varios usus & fructus sylvæ adolescunt; quis non ingenia civium, quasi quoddam solum, in quo variæ virtutes artesque in patriæ gloriam, in Reipublicæ usum excre-

scant,

scant, omni genere doctrinæ putet excolenda, omnibus ornamentis decoranda? Quis animorum nostræ gentis jam à tot seculis vigor fuerit, cum domesticis testibus virtus nostra destituatur, vel ipsorum hostium annales & monumenta loquuntur. Senserunt Romani, illi orbis Domini validas non solum virorum, sed & feminarum Cimbricarum manus, non armis tantum illorum, sed & prudenti consilio impugnati. Stabat jam in præcipitio illa Romanorum fortuna, ac collapsa Cimbrorum armis fuisset, nisi fata intercesserint, ab ipso interitu revocarint. Fuerint tum Romanis barbari nostri, fuerint prædones illis & latrones salutati, ego, si sylvestri virtuti culturâ quadam subventum tunc fuisset, ipsis Aretalogis Romanis, magnificis suarum rerum ostentatoribus, virtutum suarum magnitudine facile caliginem inducturos existimârim. Neque sane, quo præ Cimbris multum glorierentur, habent Romani, quos ego nostris & nobilitate gentis & antiquitate minores judico, si non omnino falsa sunt, quæ de nostrorum hominum in Italiam coloniis, jam ante ipsam urbem conditam eò missis, non obscurâ hariolatione observari. Tanta est & populorum, & urbium, & fluminum, & nominum cum Cimbrica gentis nominibus affinitas, ut hæc mihi attentius contemplantis sæpe admirationem excusserit: nemo verò casu ac forte fortunâ ita contigisse persuasurus sit. Quas meas conjecturas etsi forte superciliosi quidam censores contem-

tem.

tempserint, ego tamen aliquo numero habendas minimeque contemnendas existimo; cum non tenui aut jejunâ aliquâ dissertatiunculâ, sed vel integro libro ejus rei veritatem me asserturum confidam. Cum ad recentiora tempora ventum est, quæ non è nostrâ gente virtutis specimina in illa, quæ in Britanniam deducta est, coloniâ videmus? Postquam enim illic Christianæ religionis sacris imbuti Principes aliquâ sapientiæ luce illustrarentur, saluberrimis non solum legibus Rempublicam fundarunt, & bonas artes è silentio & tenebris protulerunt, sed & ad amplissimum, quantum per illa tempora licuit, fastigium eduxerunt. Vel unus Ælfredus, quem cognomento Magnum vocarunt, illustri omnibus exemplo erit. Nam, ut Spelmannus in ejus vita testatur, maximus ille post assertum à Danis regnum non solum ejus instaurator & velut novus fundator fuit, legibusq; omnia circumscripsit; sed & Scholas, Academias instituit, artes & disciplinas reduxit; ipse multa carmina, rhythmos scripsit, apologos, fabulas, ænigmata, quibus barbarus ille populus & erudiebatur & deliniebatur, inter maximos sui temporis poëtas numerandus. Hic ille est, Auditores, cui non tam παλιγγενεσίαν suam, quàm natales, debuit illa toto orbe celebratissima Oxoniensis Academia, quem non tam Regem & Dominum, quàm Parentem suum & Doctorem merito in hunc diem celebrant Angli,

omnique honoris cultu prosequuntur. No-
ster certe ille fuit, Cimbricoque Sangvine ori-
undus: cujus utinam vestigiis insisterent, qui
hodie populis præfunt, Principes! & flore-
re imperia bonis legibus, cives bonis mori-
bus, Scholas bonis artibus, omnes ordines bo-
nis ad posteritatem niti exemplis videremus.
Qui ita animati sunt Principes, veri sunt illi
Philosophi, sub quibus beatas fore Respublicas
Plato judicabat, sine illis fatis suis permitten-
das. Durat illa in Cimbrorum animis virtus, &
per majorum manus tradita ac ad nostri tem-
poris Principes propagata est, in seculi nostri
gloriam, in patriæ salutem, in civium felicitatem
natos. Ne quid de Serenissimi nostri Prin-
cipis majoribus dicam, quorum in annalium
nostrum monumentis decantata bonitas est,
spirant hodieque in animis civium immortalia
FRIDERICI merita, ob oculos versantur,
CHRISTIANI ALBERTI, Domini nostri cle-
mentissimi beneficia, è quibus præcipuum il-
lud est, quod gentem suam primus Academiae
bono ornaverit, omnium & civium & postero-
rum æternis laudibus efferendum. Primus er-
go ille est, quem Patris, quem Apollinis sui
nomine nostræ salutant Musæ, cui sua illæ re-
gna, sua sacra, sua otia, & quicquid sibi cha-
rum amplumque est, debent. Quare ad illum
laborum nostrorum primitiæ illo jure perti-
nent, quo ad dominum arboris, quam sua
manu plantavit, fructus; horti, quem primus
pa-

paravit, areolisque & arboribus distinxit, proventus; agri, quem sua quis semente concevit, annona. Horum fructuum, etsi non eadem omnium maturitas sit: nam & illi suo demum tempore, ut ipsa occulto arbor ævo crescit, proveniunt, neque una nocte; ut fungi, nascuntur, siquidem ætatem superare, & ad posteros perdurare debeant: tamen & jam inde à primâ Academiæ ætate aliquos, & nunc elapsâ jam pene quartâ seculi parte uberiores indies ex illâ fructus, velut in horrea quædam, feræ aliquando ætati profutura, reponit. Quemadmodum morâ aliquâ opus est, ut cum terra coalescat radicesque agat arbor, quæ firmata deinde per aliquot annos inter imbres, pruinas, procellas, nives stirpe in flores se induit, ac diu optatos tandem fructus protrudit: ita ubi primum in consociationem aliquam concrefcere cum civibus cœperunt nostrorum animi, iis lapsu annorum artibus & doctrinis prima nostra juvenus imbuta est, quæ ad cathedras, tribunalia, scholas viam sternerent, ut nunc tandem vivi plerique ac superstites nostras illis immissas quasi colonias, nostro illo fundo educta germina, videamus. Non dicam nunc de exteris, ad quos non exigua nostri quoque fundi messis pervenit; nam nec in vicinia tantum, sed & aliis in populis, præclaris, tam in Republica, quam in Ecclesia muneribus præfecti sunt, qui nostræ industriæ non parum se debere fatentur. Neque defuerunt, qui &
fa-

famâ & meritis optimorum in hâc literaria Republica Doctorem excitati, amplissimis propositis præmiis ad illustres planè eximiasque dignitates eos evocarint; cum non digniores, quàm in celeberrimo hoc nostro collegio se inventuros existimarent. Primum in hâc Academia Antecessorem, & variæ doctrinæ, & Jurisprudentiæ gloriâ celebratissimum, ad summum Imperii nostri tribunal evectum meminisse plerique possumus: qui, ut huic Academiae, dum hic doceret, insigni ornamento fuit, magnumque sui desiderium nobis reliquit, ita in hunc usque diem illustri Spartæ suæ ita præest, ut vel nunc quoque, cum noster amplius non est, ejus memoria decori nobis esse videatur. Fuit ex eodem ordine consiliis Imperialis urbis vicinæ admotus; alius in potentissimi Electoris aulam, tum ad consilia, tum ad medicas curas, concessit; alii in Antistites Præsulesque Ecclesiarum hinc excitati; & nunc quidem ipse Princeps noster Serenissimus felicissime eorum utitur consiliis & operâ, qui Academiam hanc doctrinis antea famâque illustrarunt. Hic in novas semper spes alii succrescunt, novi ex eadem arbore ramî, quorum avulso uno alter non deficiat, semper propululabunt. Quare ut nostrorum temporum proventibus literariis nunc Dominus Clementissimus fruitur; ita securæ ætatis omnis, quæ ex illis efflorescet, gloria, omnes illæ nostræ laureæ & palmæ ad unum hunc, velut ad

Autorem, Fundatorem, Ducem, Architectum, non aliter quam ad fontem suum rivuli, ad Solem suum radii, ad stirpem suam furculi referentur. Maeste, ô Serenissime Princeps, hoc tuo munere; maeste illis, qui ex eo Tibi redundant, fructibus, maeste illâ, quæ Tibi domi nascitur, gloriâ; sed quæ ita domi nascitur, ut quasi cum Solis circuitu per omnia tempora, omniaque locorum spatia semper renascatur, ac immortalem nominis Tui memoriam per nostrum, quæ patet, orbem hunc seculaque futura circumducat. Glorientur alii hominum cædibus & triumphis, Tu novos Tibi gignis, Tu formas sapientiæ studiis, Tu novos de barbarie & ignorantia triumphos agis. Alii Pyramidibus & colossis famæ suæ magnitudinem metiantur; tuæ in doctorum chartis & animis Pyramides atque statuae, non marmoreæ, non aureæ, sed virtutum coloribus pictæ, sed amoris cælo exsculptæ excitantur. Exscindant alii urbes; Tu urbium servatores efficis: diruant castella; Tu propugnas: vastitatem agris inducant; Tu in excolendis laboras: bonis miseros exuant; Tu artem, quæ suum cuique tribuat, defendis, & ægrè tamen aliis, ut tuum Tibi tribuere velint, persuades. Congerant sibi alii è spoliis æraria; Tu, dum in literas literarumque cultores exhauris, quas illis largiris, opes tibi cumulas, aliisque longe pretiosioribus commutas. Suam sibi alii habeant famam, suas illi ædificent è populorum

ruinis fortunas ; Tu tuam in populorum salute salutem, infelicitate felicitatem quæris; & cum civium animos lucraris, non Cræsi talenta, non Attalica regna tuis vel divitiis vel gloriæ anteponis.

Nunc me ~~Civium ordo vocat~~, quorum utilitatibus hoc consilio maxime prospectum est. Nam etsi multa sunt, quæ beatam facere Rempublicam creduntur, uberes agrorum proventus, pascuorum felicitas, commercia cum aliis gentibus instituta: tamen illa, quæ regendæ Reip. per se inserviunt, studia, aut quæ ad juventutem educandam pertinent, quorum Academia fontes integros propinat, illa omnia, quasi continere videntur. In Civium ordine ut primo loco sunt genere illustres, qui propiore Principem gradu contingunt, cæterisque quasi in exemplum propositi sunt; ita præcipuos ex Academiâ fructus sentiunt, unde veræ nobilitatis fomites subministrantur, sive illa ab armis, sive à literis sibi præsidium ac ornamentum quærat. Qui è moralis, qui è civilis sapientiæ fontibus haurire volent, hic perpetuam illorum scaturiginem invenient. Qui in lætissimos latissimosque Historiarum campos deduci cupient, ubi prudentia variorum eventuum exemplis spectata quasi quodam theatro proponitur, duce suo non destituentur. Quæ in Principum aulis, in deliberantium subselliis, in animis hominum expugnandis regnat, & in omnibus vitæ civilis negotiis o-

mne fert punctum, Eloqventia, quâ non levi-
 ter tincti esse debent, qui ex illo ordine ad Prin-
 cipum & Rempublicarum consilia adspirant,
 hic quoque, quod in omnes partes valeat, ha-
 bebunt. Qui denique ad divinæ humanæque
 Jurisprudentiæ sacra propius admitti flagi-
 tant, habebunt, quæ consulant, oracula, &
 quorum illi præceptis ad omne palæstre civilis
 genus instruantur. Non dicam de lingvis vul-
 garibus, quarum ad vitam civilem magnus u-
 sus est, ut Nobili homini & ad Reipublicæ ne-
 gotia aliquando admovendo illæ sæpe & orna-
 mento & adjumento sint. Non desunt, qui
in his commodam quoque operam præstent,
peritissimi Magistri, & in patrii sermonis socie-
tatem exterarum quoque linguas adsciscant.
 Et hæc quidem exercitationes ingenii, hæc cur-
 ricula mentis sunt, in quibus qui versari velit,
 & velut in Phidiæ cujusdam Officina elimari,
 domi sibi nasci videbit, quæ alii impensis ma-
 ximis, magno sæpe & valetudinis & vitæ peri-
 culo extra patriam ægre investigant & conqvi-
 runt. In corporum si qui occupari veluit exer-
 citiis, quæ non negligenter habenda sunt homi-
 ni nobili, siue illum armis, siue principum
 subselliis fata destinaverint, siue in hominum
 elegantiorum consortio illi vivendum sit; il-
 la docentur ab istis Magistris, qui ingenii so-
 lertiâ & usu vel omnibus in eo genere palmam
 dubiam reddunt: Maximum hoc sane patriæ
 suæ, magnum suo ordini bonum, si quidem
 æqui velint esse iudices, neque ignota omnia

& peregrina pro magnificis habeant, agnoscent, cum in patrio suo solo illas bonæ mentis fruges nasci vident, quas maiores nostri aliunde multa cura & sollicitudine importare consueverunt: cum habent domi, quos in consilium adhibeant, quorum operâ utantur, quos filiis moderatores præficient, & cum quibus, si amœnitates studiorum sectari velint, familiarius conversentur. Quid enim accidere generosi menti gratius possit, quam istis in studiis versari, quæ non meliores tantum nos faciunt, sed & mirificâ animos voluptate perfundunt. Quoties ego hæc animo repeto, quasdam quasi Athenas in hac urbe mihi depingo. Nam ut illa Græciæ urbs clarissima, non solum & literarum & doctissimorum hominum, sed hominum, sed & nobilitatis eruditæ commune quasi forûm fuit; ita hæc nostra quoque, si parva licet componere magnis, & nobilitatis & doctrinæ quoddam domicilium est, in quo uterque ordo quasi simul habitat, & è tota provincia ad societatem vitæ convocatur, & ex variis ingeniis excellentissima quæque libantur.

Venio ad cæteros è civium ordine, quorum plerique, qui opibus non adeo abundant, certis circumscribere limitibus filiorum suorum studia solent. Nam vel Theologicæ doctrinæ, vel Jurisprudentiæ, vel Medicæ arti destinant, & philosophiarum præceptis imbui ac præparari eorum animos volunt. Hi, si quidem

intelligunt, quæ sibi filiisque suis maximè sunt accommodata, causas habent gravissimas, quare & DEO & Principi Serenissimo gratias agant immortales. Quantum enim hoc beneficium est, in viciniam mittere filios, ubi omni doctrinæ genere erudiantur, quos velut è specula Parentes semper observare, ac, si forte in lubricâ illâ ætate se paulo extra numerum moverint, redigere in ordinem possint; quibus mature & consilio & auxilio adsint; quorum commodis & saluti non è longinquo, sed ex propinquo, & quasi suburbani, prospiciant, rebusque ac studiis certâ lege ordinandis moderentur. Quod si pristinorum temporum felicitatem nobis, restituto Principe, reduxerit DEUS, non amplius clausos illos liberalitatis fontes videbimus, quos in egentiores non solum cives, sed & alienigenas, hic Patriæ nostræ Parens diffuderat, ut exiguis & pene nullis sumptibus viverent, qui studiorum gratia hic commorabantur. Quo ex insigni beneficio cum maximum præcipue fructum patria caperet, vel eo nomine sibi filiisque suis gratulari debent cives; qui licet parum in opibus suis præsidii habeant, eum tamen Principem habent, qui ne paupertatem quidem bonæ menti inimicam pati potest, atque adeo nullam bonis ingeniis viam, quâ eniti possint, præcludit. Non possunt illam suam felicitatem æstimare rectius Cimbri, quam ex aliarum gentium infelicitate, quæ à consortio Academicarum paulum

re-

remotiores, vel patriæ glebæ affixos tenent suos, omnium rerum & artium rudes, vel in exilium potius, quam in Academias, mittunt. Illic pro virtutibus sæpe discuntur vitia à prava consuetudine, à malis conversantium moribus orta, & quasi contagio quodam in cives propaganda: pro bonis artibus nequitia & fraudes, pro doctrinis errores, velut è turbidâ sentinâ hauriuntur. Cum studiis invigilare credunt filios parentes, illi otio diffluunt, per popinas vagantur, in lustris hærent, & in temulentiam & luxum Parentum opes, quas illi genium defraudando anxie corraferant, profundunt. Qui boni, vel saltem non mali, homines tamen exiverant, redeunt sæpe plusquam Circæâ μελαμορφώσεσιν in porcos, canes, tigrides, asinos conversi. His certe periculis & incommodis maximam partem immunes sunt, qui in conspectu suo filios habent patres, eorumque mores & studia propioribus consiliis dirigunt. Illi vero postquam semel vitæ Academicæ ac libertati adsveti sunt, vel alio jam confirmato iudicio, ac in primâ palæstrâ fatis spectati, securè transmittentur, ubi firmiora jam vestigia ponant: vel absoluto hic studiorum curriculo, iis, quæ virtus eorum meretur, muneribus admovebuntur. Qui ad certum vitæ genus studia sua non instituerunt, sed ligurientibus & pitissantibus similes in illis Musarum deliciis versati sunt, quod cæteris ad vitam præsidiiis redundarent; vel in medio studi-

orum cursu substiterunt, quacunque sorte sua contenti, id tamen consequentur, ut commodis moribus sint, ac viri civisque boni officio recte fungantur, ab indoctis suspiciantur, à pravis metuantur, à bonis impensius amentur. Quod si omnium civium classes perambulemus, quocunque illi loco & ordine sint, non erunt, ad quos illi fructus nostri non pertineant, ac, si non messes, certè aliqua ex iis spicilegia reponant. Qui sacris præfunt, hic publicos pietatis veræque religionis custodes habent, qui excubias agant, inque omnes partes vigiles oculos convertant, ne quid Ecclesia detrimenti capiat: habent, quos in dubiis arduis rebus adeant, quorum sententiam explorent: habent seminarium, unde effectis stirpibus novæ succrescant. Tribunalia, Magistratus, Advocati, Judices inveniunt, quorum præsidio in ambiguis nitantur: habent, quò confugiant rei iniquitate litium ac causidicorum oppressi: habent cives, unde judices judicumque parastatas, legum custodes, interpretes, vindices arcessant, in quorum sinum negotia sua deponant. Omnibus denique his, qui à nobis sperari possunt, fructibus succum suum & vigorem cæteræ artes impertiunt. Omnia enim sine philosophiæ ansis mutila & manca sunt, ac sine illâ vacillant, titubant, collabuntur. Ejus insignem in omnibus Reipublicæ partibus usum cum alia occasione copiosius exposuerim, nunc quidem acta non agam.

Id tantum dicam, eâ bonæ doctrinæ sapientiæ-
que ubertate tot viris eruditis ad aliorum invi-
diam abundare patriam nostram, ut non sit,
quare aliis supplicatum eat, aut sua aliunde
ornamenta quærat, quæ suis ipsa dotibus, suis
ipsa ingeniis quotidie magis magisque enite-
scit. Neque enim, ut existimo, patriæ tantum
fines, sed exterarum quoque terras nominis no-
stri famâ implevimus, &, quod sine jactantiâ
dictum velim, cum aliis contendere possumus.
Crescunt & nobis domi sylvæ, unde laureas de-
cerpamus, unde columnas & tigna excidamus.
Sunt horti, inque iis arbores, & quæ nativos
fructus ferant, & quæ novas frondes & non
sua poma mirentur. Nobis quoque illi fontes
fluunt, quibus explere animos sitientissimos
possumus, quibus agros nostros irrigemus,
quibus fœcundæ segetes excitentur; ut non sit,
quare aliorum rivulos multum desideremus.
Si ab animi bonis discesserimus, quæ Acade-
mia patriæ præstat, nec illud spernendum est,
aut pro nihilo ducendum, servari patriæ per A-
cademiam illas opes, quas olim in vicinos effu-
dimus. Etenim si magnum vectigal parsimo-
nia est, quare patriæ non potius bono, quam
aliis gentibus erogemus, quas divitias conges-
simus? Neque enim exigua pecuniæ summa,
quotannis in alias terras à juventute nostra ex-
portabatur, quæ aliis lucro cederet, cum nunc,
præterquam quod nostros ipsi fontes resorbe-
mus, alios in nostrum fundum derivemus, ut

duplici commodo pro damno multiplici fruamur. Arrigite aures, ô Cives, qui virtutem post nummos ponitis, qui in quæstum omnia confertis, ejusque causa animum ad artes & partes malas sæpe adducitis, qui è fœnore, navibus, agris, pascuis, mercibus reditus corraditis: non vestræ, quas possidetis, sunt divitiæ; nostræ illæ sunt, nostræ opes, quæ de principatu cum vestris contendunt. Habeat patria vestra portus commodissimos, exportentur, importentur utroque mari (hos enim in totum terrarum orbem exitus habemus) omnis generis merces; impleant vobis agelli modici integra granaria, affluant stagna lacusque piscibus, pascua armenta alant, pecorumque fructus opimos subministrent: nos eas vobis merces parturimus, quæ pectus saturent, quæ mentes deliciis suis pascant, quæ opulentis sunt lucro, potentibus firmamento, nobilibus ornamento, civibus præsidio, egenis subsidio, miseris solatio, omnibus adjumento. Quid enim per DEUM ex omni illo divitiarum opumque cumulo est, quod cum nostris conferri thesauris possit? An gemmæ, latronum præda. An merces, piratarum spolia? An naves, ventorum ludibria? an metalla, rubiginis pabula? an vestes, tinearum epulæ? an palatia fulminum irritamenta? an servi in fugam proni? an pecora, quæ vitio aëris occumbant? Æternum est, quod possidemus; immortales sunt illi fructus, quibus patriam locupletamus; quos non tem-

po-

poris spatia intervertant, non latrones subducant, qui aëris injurias contemnant, neque in ipsa morte destituant. Cumque cætera omnia quasi per quandam rapinæ speciem nostra esse videantur: nam montibus gemmæ & metalla, agris fructus, sylvis naves, libertati servi subtrahuntur; vestes spolia animalium, pecora, partus matribus subducti sunt; & mille illa omnia modis, hereditate, emptione, permutatione possessores mutant: nihil profecto est, quod possessionis nostræ jus labefactare nobis possit. Ut enim è nobis hæc nata sunt, ita nostra nunquam esse desinunt: nullum habemus hujus nostræ gloriæ socium, nihil sibi ex illo jure alii decerpunt: sed tamen & vestra sunt, & ita tamen vestra, ut nos eorum dominio non excidamus. Tu quoque merito in maximam horum fructuum partem vocari debes, optima Musarum nostrarum hospes, Kilonium, & pulchritudine ædificiorum, & frequentia hospitum, & comitate civium, & publico quasi fidei Holsaticæ foro, nunc quoque nostro incolatu inclyta & nobilis. Nam, etsi male vulgo habitare creduntur, qui in falsuginosa vicinia habitant, ut nos intra duo hic maria positi, Balthico verò vicinissimi; tamen & salubri illa aurâ recreamur & nostra felicitate, quæ ex eruditâ conversatione nascitur, grato illo ingeniorum sale, quo illa ad æternitatem condiri solent, non caremus. Quemadmodum ergo, qui igni propiores sunt, citius incalescunt,

qui

qvi ad ripas Nili habitant, fertiliores agros colunt, qvi solis luci expositos hortos habent, primos, cæteri secundarios fructus colligunt: ita omnia hæc, quæ enumeravimus, commoda primitiarum quodam jure ad urbem hanc ejusque inquilinos pertinere videntur. Quid enim addi ad hanc felicitatem potest, cum pueros severâ suâ disciplinâ eductos, bonisque moribus artibusque præparatos, parentes in sua tenere custodiâ ad illam ætatem possunt, quæ suis uti consiliis, suo niti remigio, & sine cortice natâre possit. Patent illi disciplinarum campi, quos sub optimis ducibus emetiatur, quam primum è domestica informatione dimissus adolescens majori se palæstræ aptum senserit. Vivit ille sub parentum arbitrio positus, qvi ætatis mores, facile, ubi sibi relinquuntur, in socordiam & licentiam degenerantes, emendent; in ordinem errantem redigant, pedeque inoffenso in illis, quæ decurrit, stadiis ad propositam sibi metam perducant. Nam, qvi in loca alia mittuntur, cum cælo plerumq; animum mutare solent; &, cum à patriâ, à parentibus discedunt, à se ipsis & à bonâ mente sæpe discedunt, suorumque spes & vota misere eludunt. Hic vero in conspectu suo ante oculos filium habet pater, interest studiis, consiliis, in rem præsentem venit, urget assiduitate suâ labores; operas ac dies metitur; ut fallere ejus providentiam ac curas, etiamsi velit, non possit filius. Idem denique agit, quod si-

sibi à patre factum Horatius prædicat, qui maximas pro tanto beneficio illi gratias gratisimus filius agit: quod in exemplum sibi tam parentes, quam filii proponant:

Ipse mihi custos incorruptissimus omnes

Circum doctores aderat. quid multa? pudicum

(Qui prius virtutis bonos) servavit ab omni

*Non solum facto, verum opprobrio quoque
turpi.*

Non dicam nunc de sumptuum insigni compendio, cum intra domesticam parsimoniam subsistens paterfamilias, ideo neq; meliore oleo caules ungat, neque rei familiaris naufragia sibi metuat; nam immanes sæpe bonorum jacturas facere solent, qui in exterarum Academiarum filios mittunt parentes, ut ab illa plaga ægrè convalescant, neque lacunam hanc tam facile expleant. Qui in tenerâ ætate constitutis liberis duces moderatoresque quærunt, florem hic juventutis habent, unde eligant, quos suo instituto commodos existimant. Nam cum sollicitâ illi cura ex aliis conquirendi Academicis essent, nunc illorum facultas optabilis est, ut vel ultro se offerant, qui suorum studiorum gratiâ hic commorantes sumptuum compendium è puerorum informatione aucupantur. Est & illud minime silentio prætereundum, neque postremo loco inter hujus urbis utilitates, quæ ex Academia illi obveniunt, recensendum, non è totâ tantum provinciâ, sed & aliunde, quasi in cumulum conferri illas pecunias, quas
non

non modicas quotannis hic impendunt, qui ad hunc locum velut ad mercatum bonarum artium confluunt, non certe omnes in illo Ofelli rustici apud Horatium ludo instituti, quibus

— — — — — *cum sale panis*

Latrantem stomachum bene leniat,
aut qui pro quæstu sumptum facientes, defraudare genium velint, ac si uno quadrante minus locupletes essent, neqviores sibi viderentur; sed quorum intemperantia sæpe alii fruuntur. Accedunt his quæ è nostro ordine huc migrarunt familiæ, & ea non solum, quæ illis numerantur stipendia, sed & suas opes non rarò in vitæ necessitates absumunt. Quorum si quis inire ac subducere rationes accurate velit magnam profecto è singulis in unum collectis summam confecerit, quæ in cives tota tandem redundat. Nunquam ergo fortunis nostris invidébunt, si non exiguam suarum partem in nostris sitam esse cives intellexerint, & quamdiu res nostræ florebut. Florere autem illæ non desinent, quamdiu publicæ calamitates (quod DEUS prohibeat) omnia non turbant ac evertunt, & idonei muneribus præficiuntur Doctores, quorum spectata omnibus virtus & doctrina sit, ac qui nominis sui fama in hoc quasi theatrum evocent sui admiratores. Non sane tranquillo navigamus, sed aliquot procellis pene submersi fuisset, nisi DEUS rebus nostris providisset. Qui tueri suos non desinet,
at-

atque à cervibus illas, quæ nobis imminet, tempestates avertet. De altero Serenissimus noster Princeps, & qui consiliis præsumt, videbunt, qui; ut in ipsis Academia incunabulis celeberrimos è Germaniæ Academiis Doctores huc arcessiverunt, ita semper omni in id curâ cogitationeque incumbent, ut eos habeamus, velut adhuc habuimus, qui amplissima ad externos & posteros virtutis & doctrinæ exempla transmittant. Id quoque amplissimus hujus urbis Magistratus pensi habebit, ut, quantum in ipsis est, quas hic nobis fata ostenderunt, sedes quietæ sint, ac nos cum Musis nostris urbem hanc non tam pro hospitio, quam pro patria habeamus.

Multa enumeravimus, A. commoda, quæ in patriam & hanc quoque urbem Academia causa redundant: sed ea ita sunt comparata, ut, cum illæ quæ è cæteris rebus proveniunt utilitates, cum aliquâ interdum molestiâ conjunctæ esse solent, nostræ exquisitissimâ voluptate refertæ sint, sive antecedit eas, sive comitetur ac consequatur. Vel ipsa illa fructuum copia & ubertas jucunda est, ut homini pecunioso & opulento de magno tollere acervo, & de fonte potius, quam de fonticulo haurire sive est. Ac primo quidem illa voluptas ad Serenissimum Principem referenda est, quæ ex opere ejus profecta ita divinum istum animum reficit, ut, si à Reipublicæ populique salute discesseris, nihil sit, quod magis ipsum oblectet, quod

quod ipsi frequentius obversetur, cujus ille deliciis pascatur, quam Academia, adeo, ut in sermonibus de illa sæpe institutis, quasi in peropportuno aliquo diversorio requiescat. De Patriâ quid dicam, quæ non minori afficitur voluptate, quam ille, qui ad vitæ munia obeunda in diligenti rerum contemplatione, in opere expediundo & mente acri, & lingua flexanimâ, & manu valida expedite utitur. Hæc enim Patriæ præstat Academia. In studiis denique ipsis quanta est, quam vel Reges nobis invideant, suavitas, & quâ cum ipsis contendere possimus? Ac sane ex aliorum infelicitate nostram facile felicitatem metiemur. Habeant Tyranni suam sibi potentiam, habeant homines opulenti sibi sua talenta, suos fundos, sua regna; habeant homines voluptatibus dediti suas sibi delicias, veneres, amœnitates; non invidemus illis, quicquid habent opum & illecebrarum: nos in Sapientiæ regno triumphos agimus, & in animis ac memoria hominum immortalitatem exspectamus. Nos veram animi voluptatem persentiscimus; illorum peribit omnis memoria, vel in perpetuo dedecore versabitur: nobis durabunt æterna virtutis nostræ monumenta, ac cum seculo ipso certabunt. Depingat nobis in tabula ex omnibus totius orbis formis Venerem aliquam Apelles, nulla venustior nobis amœniorque facies erit, quam illa Virtutum & Sapientiæ imago & species, quæ succum san-

gvinemque omnem è bonis literis traxit, vultumque augustissimum ostendit. Multa de ideis, multa de pulchro suo Platonici; Literæ nobis veras ideas ob oculos ponunt, & formam omnibus humanis pulchriorem. Evigilate ad has voces meas, si qvi estis laudabiles nostrarum Musarum Pamphili, Juvenes Nobilissimi, altiusque in animum vestrum admittite! Intendenda mihi vox est: (Vereor enim ut hoc, quod dico, non perinde intelligi possit, atque ipse animo meo verso) Evigilate ad has delicias, ô Juvenes, irruite in hujus Veneris amplexus! Ad regnum vos voco, ad Sceptra. Procul hinc calices, cululli, alex, taxilli, chartulæ lusoriæ, tela, enses, ingloria militum togatorum arma & instrumenta: ad purpuras, laureas, diademata ipsa vos voco. Annon videtis, quot molestias subeant, quæ fanda, infandaque moliantur illi, qui regna affectant, nihil enim dominandi libidine frivarius est. Venerunt ad solium homines ex ipsis sordibus à fortuna protracti, quos ingenita quædam virtus & sublimior prudentia illa in sede collocavit. Hi, quando tot populos ad nutus suos paratos circumspiciunt, cum se tot satellitum famulatio stipatos vident, cum leges omnibus, nullas sibi præscribunt, cum de hostibus victorias & triumphos reportant; quis non intimis animi sensibus demulceri credat. Regnum est Sapientiæ possessio, & plus quam regnum. Hos, si dicere fas est, uno Jove minores

res dicemus. Quare non profecto ineptias egerunt Stoici, cum sapientem suum solum Regem, nobilem, divitem dicerent. Imperium horum est non tam in corpora, quam in animos, quo nihil potest esse sublimius, nihil jucundius. Hos illi occupant; in his illi non brevi aliquo vitæ spatio, sed in omnia secula triumphant. Ac fingat sibi aliquis regnum quoddam Sioicum, aut solis civitatem; & eveniret ita, ut optant nonnulli, ut sapientes aliquem in locum secederent; annon hunc Regem crearent, illique se subjicerent, quem in omni sapientiæ virtutumque genere excellere nossent? Regem hunc appellarent, cui infidet virtus, consilium subministrat prudentia, quem diademate suo vestit sapientia, cui purpuram suam circumponit justitia, cui omnis eruditio doctrinaque, & quicquid est è literatis minorum gentium, se substernit. Illis ergo supersunt gloriæ maximifructus, qui utilitati voluptatique, quæ è studiis percipiuntur, ita sunt innexi, ut sine utilitate gloria non consistat, hæc vero illi semper comitetur: jucunditas autem utriusque, quasi vinculum, ita inter se hæc duo conjungit, ut sine jucunditate utilitas in gloria, gloria inutilis & infrugifera esse videatur. De gloria ergo mihi dicendum est, quæ omnium bonorum complementum est, & ex hac virtutis ac honorum sede in Principem, Patriam, Cives, nos denique omnes, & vos, ô Juvenes, immortalis illius gloriæ candidatos & heredes, proma-

manat. Loquentur annales nostri, diffundetur per omnium seculorum memoriam illa, Serenissimi Principis virtus, quâ sapientiæ bonisque artibus prospectum voluit, ac inter illustria illa Historiarum nomina, quæ studiis obstetricias manus admoverunt, Theodosios, Fridericos, Carolos Magnos, Ælfredos, Ludovicos, Julios, Albertos, Christiani Alberti nomen à seris nepotibus celebrabitur. Patria autem nostra, quæ ante hos Academia natales tot illustria Orbi literato sidera immisit, Ranzovios, Calixtos, Cypræos, Cluveros, Lathe-ros, Meieros, Laccenios, Vorstios, Ruaros, Alardos, Jonssios, Dresemios, Schævios, Schvvaningios, Finckios, Rosebohmios, pluresque alios, quorum nomina recensere nunc supersedeo: quos non illa ex hac officinia Joves, Apollines, Mercurios non unius Phidiæ manu sculptos expectabit? Orientur etiam è nobis (cur enim de fecundissimo & solo & populo desperemus?) Melanchthones, Gerhardi, Cujacii, Donelli, Sennerti, Paracelsi, Gassendi, Conringii, Böcleri. Nam de superstiti- bus, & qui ante paucos annos vivere desierunt, nunc nihil dicam, quorum pervulgata apud omnes fama est, ne pudori illorum gravis sim, quorum aliqui hic nobis adsident, aliqui absunt, aliqui defunctos cognatione attingunt. Illorum beneficio & nunc patria nostra cæterarum in se gentium ora convertit, & cum isti novam prolem suffecerint, posterorum immor-

talibus præconiis extolletur. In hujus gloriæ possessionem vos ego, ô Juvenes, palam nunc meâ oratione evoco, clarâque voce compello. Vobis illæ feruntur fruges, à nostrâ illa semente amplissimas aliquando in vobis messes patria exspectat. Versantur vobis ob oculos virtutis & doctrinæ exempla; intuemini in has imagines, & ex iis novas virtutum ideas, quasi è speculo, concipite! Ille fulgor est, qui animos novâ luce illustrat: illi ignes, illa fulmina sunt, è quibus in flammæ ac incendia vestri se fomites diffundant. Alexandri imago Cæsares gignit, Militiadis tropæa Themistoclem excitabant; Viri sapientiæ & eruditionis honore conspicui suo exemplo plures invitabunt. Hinc videmus jam ab omni ævo ab unius sæpe hominis ingenio revixisse omnem sapientiam. Unus aliquis signum sustulit; secuti sunt longo agmine præeuntem magistrum multorum seculorum discipuli. Plato aliquis cœlo delapsus est? fasces illi submittit tota Philosophorum natio. Aristoteles velut novum aliquod sidus exoritur? prodeunt ex ejus Scholâ Alexandri, prodeunt tot gentium, tot seculorum Philosophi. Quid per Germaniam & vicinas Academiâs singulorum virorum doctorum exempla in animis juvenum præstiterint, notissimum est. Superiori seculo annon è Philippi Melanchthonis & Erasmi ingenio pene totus orbis Germanicus novâ literaturâ imbui cœpit? quid in pietatis & do-

ctri-

Etrinae studiis non effectum est Lutheri meritis? Quot praeclara ingenia orbi literato formavit Josephi Scaligeri summa eruditio? Non quidem in nos sumus, qui cum illis comparari Heroibus velimus, nam modestius, de nobis sentimus, sed nunc quidem illi simus, qui sumus.

Quales nos Patria custodes DI genuerunt:

Vivent fortè etiam post nostra tempora, qui nos doctrina, virtute, meritis antecellant: quibus ut non invidemus, ita non defuturos speramus, qui, si quid nostrae est vel virtutis vel gloriae, candidi iudices non dissimulabunt. Nos quidem nunc illa solemus nos voluptate, habere & nos etiam alibi amatores, forte & admiratores nostri, ut neque foris peregrini & hospites simus. Vobis certè, qui Reipublicae futurae effigiem vivi repraesentatis, omnis nostra opera deservit. Optamus nobis, qui velut apum examina nos semper circumfluant, rogent, prensent, & velut è fonte quodam semper haurire velint, jacentibus & ignavis animis stimulos, promptis & cupientibus alas addere parati. Vos in animum vobis revocate, non vobis solum, sed & parentibus, Patriae, cognatis & liberis aliquando vestris, vos hic vivere, & studiis incumbere. Non vestri tantum hi studiorum fructus sunt, sed & ad familiam & patriam pertinebunt. Quid suavius est, quam si patriam nostro nomine honorari videamus? si de natalibus nostris certent civitates,

ut de Homero; si nostrarum virtutum causâ civitas illustretur; si parentibus gaudia excitemus. Nullum certius ad filios transit patrimonium, quam gloria. Si enim & illi patriis virtutibus insistant, cum fœnore quodam augebitur: si novas non adjecerint, paterni tamen nominis memoria illos tuebitur, & in aliquo felicitatis gradu, in secundis tertiisque, si ad prima adspirare non possint, collocabit.

Sed me nescio, quomodo & rei, de quâ dico, svavitas, & argumenti ubertas, & mei ipsius, & temporis, & vestræ, Auditores, patientiæ immemorem abripit, ut in cursu orationis, velut Atalanta aureorum objectu malorum sistar aliquando & hæream, neque illam, quam mihi proposui, metam contingam. Propior certe ipsi nunc sum, & quoniam cum studiorum omnium, tum orationis meta ante oculos est, manu velut injecta apprehendam, ac finem orationi meæ imponam. Vos vero, ô Juvenes, animo hæc vestro sensibusque imis, quæ dixi, reponite; ac si qua est æterni Numinis religio, si qua Clementissimi Principis reverentia, si qua Magistratus & Legum observantia, si qua Patriæ & Parentum veneratio, si qua pietatis, honestatis, recti & decori cura est, in animum vestrum descendite, & quid Deo, Principi, Patriæ, Parentibus, nobis, vobis denique ipsis, & posteris debeatis, vobiscum perpendite. In illa estis ætate constituti, quæ ut in vitium flecti cerea est, ita ad virtutum fastigium, si-

si spiritu & vigore suo uti velit, facile enitetur, aureaque in nostris Hesperidum hortis mala decerpet: Sunt, qui vos manu ducere velint hodegetæ; sunt qui monitis & consiliis adstant, in viam errantes reducant, illustribus exemplis invitent & impellant; Exspectant, vos Ecclesiæ antistites, tribunalia Judices, cathedræ Doctores, Subsellia Principum Consiliarios, Urbes Consules & Senatores, Scholæ Præceptores, tempora corrupta emendatores, Patria propugnatores, Cælum denique, si ipsi velitis cives & possessores: in certamina hic descendite, sed de literis, de virtutibus, de bonis moribus! Comestationes institute, sed librorum helluones, sed dulci doctrinæ mulso temulenti; in gynæcea venite, sed Musarum, virginum, quæ noctes suas & amplexus liberalissime vobis indulgeant. Denique si quid gratia apud vos valeo, rogo; si quid auctoritate, hortor, ut quietam mihi esse hanc æstatem velitis, meque Doctoris potius, quam Judicis fungi munere permittatis. Nihil mihi, nihil nobis omnibus gratius erit, quam si nullum vestrum nomen in tabulis nostris legatur, nullo vestro obulo fiscus ditescat, nulla vel umbra vestri in judicio appareat, atque ita vitam institutis, qualem vos, si loco nostro essetis, institui illam optaretis. Tu vero, ô Cœlestis Pater, qui omnium nostrorum bonorum fons & origo es; Tu æterna Patris Sapientia, JESU CHRISTE; Tu omnium Doctor artium, Divine Spiritus,

Tu æterne Deus, cui omnis nostra industria laborat, cui & primitiæ & omnes nostri fructus debentur, in quo omnis nostra voluptas conquiescit, cujus gloriæ omnis nostra, si qua est, gloria servit; Tu proprias has Tibi vindicamus, Tu sedes nobis quietas effice, atque omnes à nobis tristioris fortunæ tempestates averte; ut semper hic sint, qui & pro aris & pro focis pugnent, qui templis tuis lucernas accendant, qui tribunalibus tuæ justitiæ lances appendant, qui tuæ sapientiæ rivulos per gentes & secula diffundant, unde in Tuæ gloriæ Oceanum illi relabantur. Tu fac, ô Domine, ut, qui absente jam per septennium Serenissimo Principe totidem strigosa Pharaonis pecora representavimus, illo nobis reddito lætiore vultu arva niteant, ac opimioris specie vetus illa macies absorbeatur: nobis quoque, qui in signis tantum nostris pacis imaginem hætenus representavimus, nunc ipsa, quanta quanta est se videndam sistat, in amplexus nostros ruat, & ex ubere illo cornu suo necessitatibus nostris subveniat, res angustas amplificet, naufragiū veteris jacturam refarciat, merentibus præmia tribuat, omnibus denique ea, quæ ad vitam & hominis, & eruditi, tam sustentandam, quam ornandam pertinent liberalissime largiatur.

DE
A U R O
O R A T I O ,

ipsis Kalendis Septembribus
in Auditorio majori

KILONII

habita,

Anno M DC XC.

*ad exempl. ab ipso Autore
editum.*

Nobilissimo Amplissimoque Viro
**FRIDERICO BENEDI-
 CTO CARPZOVIO,**

Singulari omnium literarum ornamento,

S. P. D.

**DANIEL GEORGIUS
 MORHOFIUS.**

Cum ea, quæ in auri laudem *χρυσῶ χρυσό-
 τεργ.* scripsit Vir clarissimus Majoragius,
 recudi facerem, idem me impetus invasit,
 ut similis argumenti orationem ipsè scribe-
 rem ederemque. Hanc ut tuo nomini, Vir Amplissi-
 me, inscriberem, multa me impulerunt. Nam si ar-
 gumentum respicio, haud equidem scio, an cuiquam
 convenientius dari munus possit. Qui recte de lite-
ris & literatis judicant, te inter τοὶ ἀσκήσαντα χρυ-
σῶ χρυσῶς merito veniuntur. jam dudum enim li-
 terarum elegantiorum singulari cultu, & insigni va-
 riarum rerum scientia, ita innotuisti, ut nemo in-
 ter Italos, Gallos, Anglos, Belgas, qui aliquo eru-
 diti nominis honore effulgeat, temere reperiatur, qui
 non in suis te habeat, & illam, quæ è communibus
 Musarum sacris contrahi solet, amicitiam tecum reli-
 giosè colat & observet. Quare nihil impensius, ni-
 hil enixius curas, quam ut tua Viris doctis studia
 atque officia probes, teque totum eorum utilitatibus
 im-

impendas. Horum in numero etsi extrema cauea,
sedeo, dignus tibi tamen visus sum, in quem benevo-
 lae tuae voluntatis propensio extaret, tot mihi argu-
 mentis spectata, tot honestissimis de me apud tuos,
 apud externos, judiciis confirmata, ut nisi grato eam
 animo agnoscerem, improbum Officiperdae nomen
 mihi subeundem sit. Vel nuper adeo, cum elegi-
 am in Viri incomparabilis MARQUARDI GU-
 DII obitum scriptam minutiore charactere recuden-
 dam curares, ut facilius ejus ad externos esset depor-
 tatio, luculentum affectus tui specimen ostendisti.
 Qua de re ita ad me scripsit amicissimus noster
 MUHLIUS, ut tuas ille virtutes, tuumque erga
 me amorem, mirifice extolleret. In ere ergo tuo
sum: quo ut liberare me possim, imaginario hoc Au-
 ro tibi satisfactum existimes velim. Parum quidem
 in seculo hoc ferreo aurei est: nam in ora & fron-
 tes ferreas ubique incurrimus, & si quid aurei ostendi-
 tur, ita suberatum est, ut arugo undique perluceat.
 Tu vero, Vir optime, ferruginoso huic & aeruginoso
 seculo te ὀλόχρυσον praestas: & ego, quoad ejus fieri
 potest, operam dabo, ut quanquam arcis loculisque
 absit aurum, animo tamen nunquam abesse videat-
 ur. Vale & favorem mihi tuum conserva.
 Dab. Kilonii è Museo meo, ipsis Kalendis Septembri-
 bus Anni M DC XC.

BENEVOLO LECTORI

S.

QUæ hic tibi fistitur Oratio, Lector benevole, plane ad exemplum Majoragianæ orationis scripta est. Quemadmodum enim, dum aurum laudat ὁ εἰρων Majoragius, mira festivitate vitiiis omnium ordinum, præcipuæ cleri Romanī, illudit: ita & ego, qui eadem premo vestigia, ad eundem scopum tendo. Quæ hic ergo simulate de ordine facro dicta sunt, eosdem, quos Majoragius intelligit, Gryphes χρυσοΦάγες designant, qui omnes sibi solis aurarias natas putant: ne quis maligne mentem meam interpretetur. Quis enim vir honestus bonis piisque in vinea Domini operariis dignam mercedem, quis tenuem illam mediocrem fortunam invidet? Verum ἡ ἑξω χρυσοΦιλία & φιλαργυρία adeo in vulgus innotuit, ut vel domesticorum convitiis verberetur, & aspericre, quam Majoragiana est, strigili depecti mereatur. Nec sane ipsi Majoragio usque adeo à suis vitio verti potest, acriori illa vitia sale defricuisse, quæ primam defectioni fenestram aperuerunt. Cæterum hominum vitia,

*quæ redeunt iterum atque iterum spectanda
theatris,*

in apricum produci & atro carbone notari, ne-
mo ægre feret, nisi qui corvis veniam dan-
dam, columbas vero vexandas existimarit.
Quibus ita acquiritur, ita possidetur aurum,
ut ex Horatii (*) monito funem potius sequa-
tur, quam ducat, nullos Satyræ ungues & den-
tes pertimescent. Forte etiam non deerunt,
qui mihi occentabunt:

*Insani sapiens nomen ferat, æquus iniqui,
Ultra quam satis est virtutem si petat ipsam.*

Denique & hoc monere visum est, me, ut in
Declamationibus fieri solet, multa ad ornan-
dam causam attulisse, quæ non serio nec ex a-
nimi sententia dicta sunt: aliud enim pugna-
re, aliud ventilare est. Tu vero, Benevole
Lector, bene vale, nosque ama.

(*) Lib. 1. epist. 10.

PRO-

PROGRAMMA INVITATORIUM.

CRAS AURUM (Cives laudanti plaudite!)
laudo,

Quod laudare levis, non dare, Svada po-
poteft.

Non hoc nos Auri & Vatum pater unxit
Apollo:

Quanquam uno proles nata parente su-
mus.

Hoc Reges donent Auro sub Rege. Sed ipse
LAUDABO ; resonat Nympha jocosa:
DABO.

Fallis inepta! Aurumne dabis, quæ ven-
tus & aura es?

Ut mala respondent nomina, verba dabis.
Non implent loculos, ut hiantia carbasa,
venti;

Non arcas, quicquid tinniat ille, sonus.
Vos date nunc nobis aures Aurove benignas
Et si non nostri, saltem amor hujus agat.
Aurum prima sonat Peitho, summa exit in
aurum.

Aurum ego, non lapides hirtaque verba,
loquor.

Ergo verba dabo, meliore sed uncta metallo.
Aurea si dederim, non male verba dedi.

ORATIO DE AURO, & ejus laudibus.

CRedo vos, Proceres Civesque Academici, mirari, quibus ego causis inductus impulsusque fuerim, ut, cum Majoragii, præstantissimi viri, auream de auro orationem explanare constitui, novo atque insolito more, ut in re magna & memorabili fieri solet, ampla præfatione eam cohonestandam, vosque, Auditores ornatissimi, ad ejus lectionem quasi præmuniendo existimarem. Verum concidet illa vestra miratio, si ejus rei, quæ laudatur, majestatem animo reputaveritis. Illa enim quasi in regali folio posita, ut profanum vulgus odit & arcet, ac rustico quodam impetu incurrentes repellit; ita non sine ceremoniis & religionibus, perque gradus quosdam, hospites cultoresque suos admittit, nec sine verborum pompa salutari cupit. Quemadmodum enim, qui potentissimos Principes adituri sunt, primum in vestibulis hærent, servulos prensant, proxenetas & pararios circumspiciunt, omnia secum verba commentantur: ita & aurum, quod ut omnibus mortalibus ita ipsis Regibus imperat, reverenter nobis habendum, ac omni orationis cultu, omni observantia, omnibus verborum ornamentis decorandum scitote. Est præterea ipsi auro arcana quædam insita vis, quæ ut animos

mos mortalium mirifice demulcet, & ab ipsis pene sensibus ad sui contemplationem abducit; ita & meam blando illo fulgore mentem fideravit, ut Majoragii premens vestigia, ejusdem simul genio impulsus, ad ejus laudes decantandas convolare. Quod enim Poetarum dulcissima carmina legentibus accidit, ut numeris illis extra se rapti, eodem plane animorum sensu imbuantur: eadem, quæ illi fingunt, quasi oculis cernere videantur: idem mihi nunc contingere non dissimulabo, cui gemino quasi & Majoragianæ orationis, & ipsius auri, fascino animus excantatus est, ut in auri laudibus efferendis secundas a Majoragio partes sibi tribuat, post uberrimam ejus messem nova hæc spicilegia tentaturus. Quin & ipse (fatebor enim) inter auri amatores nomen meum profiteor, sed qui amore casto, philosophico, innocentissimo in illud impellar, formæ ejus, ut idææ cujusdam Platonice, attentissimus spectator & admirator. Nam ut vel arca conclusum possideam, vel ab ipso possidear, non multum laboro: neque per illam animi ac studiorum meorum integritatem licet, quibus bonæ illa mentis soror, nostri ordinis hominibus cognata, comitari plerumque consuevit. Sive enim Philosophum, sive Oratorem, sive Poetam me vocetis, nullus ad aurum parandum idoneus mihi titulus est. Philosophi enim solo se obtutu oblectant, & in auri, quod nunquam possederunt, contemplatione, ut Argi-

vus ille in navium & mercium, quas suas cre-
debat esse, svavisimo spectaculo acquiescunt.
Oratores vero & Poetæ, illi aurea & aureæ æta-
tis verba, hi aurea carmina fundunt, sed quæ
auro obryzo non accenset monetarius, & qui-
bus sibi minime satisfactum fœnerator Alphi-
us existimarit. Nunquam vel fando auditum
est, in illis montibus, quibus Musæ habitant,
aurifodinas fuisse a quoquam indagatas; qui
sterilibus lauri frondibus quidem abundant,
sed inter steriles suas arenas illud una liquida,
litera imminutum aurum non pepererunt. Etsi
enim inter laurum & aurum magna esse affini-
tas videtur; ita tamen a se distant, ut illa um-
bram quidem sine fructu spargat, hoc & lucem
largiatur, & in luce omnium ponat. Vos de-
nique si respicio, Juvenes lectissimi, neminem
e vobis fore arbitror, qui aurum odio Vatiniano
prosequatur, aut cum Aristippo in mare abji-
ciendum ut inutilem faburram putaverit: etsi
forte inter vos non sunt, illa in ætate, quæ con-
sulere in longitudinem non solet, qui sciunt,

quid valeat nummus, quem præbeat usum,
aut qui singulis Idibus pecuniam relegunt, ut
proximis Kalendis ponant; erunt tamen, ut
autumo, qui non quidem præ cæteris amafi-
is, sed inter illas, aut illarum causa, bellulam
nostram Chrysidem, aurum innuo, sibi aman-
dam arbitrentur. Quare vel saltem eam ob
causam auri laudes non inviti audietis, quod
carere illo minime positis, si genio illi, quem

R in

in Pamphilo suo Simo, in Æschino Micio Terentianus describere, obsequi velitis. Nam qui ad Euclionis ingenium vos accedere crediderit, nã ille gravi vos injuria affecerit, de qua ad Prætorem in jus adire fas esset; aut vos, si auri nimia vos cupido tangeret, litem æstimare possetis. Adeste ergo, Juvenes optimi, auresque mihi de auro oranti commodate, qui nunc quidem non ferream vocem aut ora ferrea, ut Poetæ solent, sed aurea illa a Diis poposcerim, aut χρυσόστομος, id est, aurei oris homo esse malim, ut scitula, politula & plane aurea, quæ Majoragianæ simillima sit, oratione Majoragio quasi secundarius orator accedam. Non celabo vos horribile secretum, Auditores, quod mihi Majoragii nomen lynceis intuenti oculis Delius, ut puto, augur, ipse auri pater, prodidit, nulli vel Chrysippeo acumini postponendum. Vertamus illas in voce MAJORAGIUS literas, quales μεταμορφώσεις non poeticas, sed grammaticas, mirifice amare, versificatores nonnulli solent, ac manifesteprehendemus, quam in ipso ejus nomine AURI IMAGO abscondatur, si ultimum e nomine sibilum dempseris, qui ab Ennio aliisque vetustis Poetis absorberi nonnunquam solet, & nescio quo sono satyrico exhibilare hominum vitia videtur. Quis ergo nativis adeo coloribus depictam ab illo auri imaginem miretur, cum ipse oraculo grammatico auri imago, quæ tamen cum cauda illa satyrica incedat, salutetur,

omnique illa luce omnes hominum ordines tam belle, tam eleganter, inauraverit? Quod si ad illam aureæ lucis imaginem adspirare nos oratione plumbea non possumus, saltem instar cicadæ, quam in aurea Apollinis cythara confedis fabulantur, suavissimos concentus stridula voce imitabimur, & vera auri ista imagine vel plumbeam vel æream orationis nostræ faciem incrustabimus. Vos modo id mihi concedite, ut, quemadmodum Hippomenes Atalantæ currenti auro sparso moram injecit, ita hoc meo qualicumque auro animos mihi vestros per horæ spatium adjungam: quod quidem non de manu in manus tradetur, sed ore prolatum auribus vestris excipietur.

Cum illi, qui dignitatem majestatemque rei, quam laudant, verbis extollunt, natales ejus exquirere sollicitius soleant, idem & mihi faciendum animadverto. Quæ in re etsi Majoragium præire video, segnius tamen ille negligentiusque eo in negotio versatur, quod nobilitatis tantæ originem non ex iis sedibus deducat, unde deduci debere, istis argumentis, quæ ipsum auri fulgorem superent, declarabo. Hic mihi ipso orationis limine cum istis terræ ac luti progeniem dicere non verentur. Hin tot jejunorum hominum frigidæ declamationes ortæ, qui à studio auri colligendi homines dehortantur, quod illud natura ab humano usu remotum animis operaq; nostra indignum esse voluerit, cum intra terræ horrendos specus, te-

nebrasque nulli mortalium, nisi insanam vim admoverit, pervias abdiderit. Non defunt, qui ipsi Plutoni ac inferorum regno omnem, quanta per tellurem dispersa jacet, auri vim in patrimonium adscribant, & ab ejus possessione humanum genus quasi perpetuo interdicto excludant. Id vero plane nefarium ac sceleratum facinus est, ad cujus improbitatem nihil addi posse videtur, quod, qui ipsi infano auri amore clanculum exardescunt & cruciantur, perque insidias & technas corradunt, nunquam auro expleti, foris tamen simulata aliqua & versuta tristitia strenuos se auri contemtores jactitant, quod toties pseudothyro intromiserunt: His scilicet rugis, hoc supercilio, hoc importuno vultu, populo imponunt, cum, si palam istum auri amorem profiterentur, ingenuitatis laudem ab omnibus reportarent. Quis ferat Senecam, illum è Stoa, si Diis placet, Philosophum, qui domi ad summam Neronis invidiam auro immersus, tot conviciis innocentissimum aurum infectatur, ipsamque rerum naturam fugillat, quæ non auro majus, quam quod detrahi possit, pondus injecerit? Magnifica & sonora passim sunt illa ejus verba, quibus virtutes in auri dedecus extolluntur, cum & auro suus, suus virtutibus, honos sit, neque ab auro ulla in re virtutes dehonestentur, quædam vero earum sine auri interventu minime exerceri possint. Sed hos malitiæ suæ relinquamus, non verbis sanandos, sed verberari.

ribus coercendos: ad cæteros illos hominum insipientissimos nostra redit oratio, de quibus merito Satyrici illa pronuncies:

O cæca hominum mentes, o pectora cæca!

quibus ille ab auro fulgor sanctiores illos natales suos ultro non ingerat, nec radiis suis velut exserto digito ostendat. Quis tam tardus, tam expers sensus, tam ab omni mente derelictus est, ut hoc non animadvertat, non intelligentia percipiat, non ipsis pene manibus palpet? Aurum, si nescitis, o deliri homines, non terræ, sed cæli progenies est, quod ego nunc confecturum me promitto: vos modo, quo rem deducum, attendite. Cum universam hanc mundi machinam creaturus summus rerum, conditor & gubernator Deus, primum in informem massam, maria, cælum, terram, astra, omnia, compegerat; singulas dehinc naturas suis sedibus sejunctas explicaturus atque exornaturus, cælum a terræ spissitudine, lucem a tenebricoso corpore, divisit, quæ per immensos orbes agitata prima illa rotatione in lucidos cæli globos abiit, repetitis deinde vibrationibus, ac continuo ad solida allapsu, puriorem ejus partem in congenerem, nec externa specie sibi dissimilem, formam convertit. Hinc natum est aurum, non illud, quod fornacibus nostris excoctum in fulgidissimam illam massam conflatur, sed longe nobilius ac divinius. Non enim cum illo comparandum aurum est, quod manibus hominum tractatur, quo indi-

gentiam nostram solamur, ex quo nummos cudi-
dimus, quod in bracteas diffusum corporibus
ad tenebras illorum illustrandas inducitur: :
quanquam & hoc cœlestem illam originem
specie sua ostendat, & auro illo primævo, qua-
si parente, gignatur. Varia sunt auri genera,
per gradus suos (ut cum Philosophis loquar)
formales distincta, de quibus mirabilia nobis
narrant veteres Judæorum magistri, septem e-
jus genera constituentes. Verum hæc myste-
riis affinia sunt, & sapientiæ reconditæ plenissi-
ma, neque ad nos nunc pertinent, qui ad po-
pularem auri usum tantum respicimus, hoc ta-
men in loco, cum de auri nobilitate disquiritur,
minime nobis dissimulanda. Id ergo vos nota-
re velim, quam primum lux in hac rudi indi-
gestaque mole agitari cœpit, aurum in terra
natum esse, veram ejus primamque sobolem,
quod in hoc telluris globo externo illo arena-
rum, lapidum, luti, cortice tegitur, in sole
vero & globis cœlestibus in summam raritatem
attenuatum, massa tamen congenere, tenace,
fluida interserta, in se perpetua gyratione con-
volvitur. Lux ergo aurum æthereum est; au-
rum lux est, ex arcano cœli & terræ conjugio
in corpus terrestre, quod tamen cœleste esse
non desinit, ut ipsis sideribus terra aliqua cœ-
lestis inest, inspissata. Hanc lucis & auri affi-
nitatem ipsæ sacræ literæ exprimunt, cum ea-
dem voce, qua aurum significant, cœli quoque
serenitatem appellent. Nam cum apud Jobum
le-

legitur: *מִצְפּוֹן זָהָב יֵאָחֵז* *ab aquilone aurum venit*, nonnulli hoc ita interpretantur; ab aquilone venit aurea lux, id est, serenitas purissima; quia venti aquilonares nubes dispellunt. Nos quidem huic interpretationi litem non movemus, quæ isto sensu mirifice sententiam nostram illustrat, non tamen ignari, alio quoque, nec cuivis obvio, sensu accipi illa posse, qui tamen nobis non adversetur. Id Latini quoque veteres probe intellexere, qui *Auroræ* nomen ab auro esse voluerunt: quod Germanis quoque nostris suboluit, qui *auroram aurum in ore tenere* vulgato proverbio dixerunt. Nam, ut Varro nos docet, *aurora dicitur ante solis ortum, ab eo, quod ab igne solis tum aureo aer aurescit*. Quot verba hic auditis, tot rerum pondera, aut, ut rectius dicam, mysteria sunt, ex intimæ arcanæque Philosophiæ adytis deprompta. *Ignem solis* vocat, quem nos singulari quondam Dissertatione in sole demonstravimus, & qui ejusdem cum lucis naturæ particeps est, quod vel Hebræi vocibus illis *אֵשׁ* & *אֹר* declarare voluerunt, quorum illud lucem denotans in apice punctum tenet, hoc quasi in ventre conclusum gerit; quo lucis natura tenuior, ignis vero crassior & inspissata innuatur. Lux enim ignis attenuatus; ignis lux in corpus densata est. Utriusque naturæ particeps aurum est, quod non immerito *αἰθόμενον πῦρ*, *ignem urentem*, Pindarus vocat, inque ipsis lucere tenebris ait. Ab illa Hebraica voce, sive lucem si-

ve ignem velis, ipsa Latina illa *aurum* descendit, quæ obscuro illo sono, ut hodie Italica vox *oro*, efferebatur. *Ignem* præterea *aureum* nominat, quasi aurum ex igne, & sol ipse ex auro constaret. Neque enim fortassis inepta & absurda sunt præstantissimi Philosophi Honorati Fabri argumenta, qui solis globum ex auro fuso compositum arbitratur. *Aërem* denique ipsum *aurescere* dicit, quo viam ostendit acutulis illis, qui in ipsa aurea aurum venantur, & arcana arte mirabilibusque machinis educere, laborant, ac Promethei instar soli ignem suum, id est aurum, furantur. Quæ si vera sunt, ut vera esse aliqui contendunt, habent, quo solari jacturas suas possint Chymicorum filii, cum aurum suum in fumos & auras extenuarunt: spes enim, quæ agricolas alit, & quemadmodum in extrema Pandoræ pyxide, ita in furnorum fumariis resedit, illis superest, fore, ut aliquando cum amplissimo fœnore ex illa auræ aurifodina ad se rediturum sit. Nam si auræ afflatu equæ gravidæ factæ sunt, forsitan & fornaces suas auro per auram imprægnandas non insipienter speraverint.

Intellexistis, opinor, quam late auri nomen pateat, quam se a cœlis ad terram extendat, perque omnia rerum abdita diffundatur. Quod cum sentiant multi, non sine causa, ut scilicet ostendant, quo desiderio potissimum laborent, omnia auro illinunt: nam & arma, palatia, pocula, vasa, libros, clypeos, fercula, insignia,

&

& quid non? tenui auri bractea inducunt, ut, quantum licet, totum hunc orbem, in quo vivunt, habeant aureum, ejusque fulgore tenebras orbis dispellant, & tanquam solis radiis illustrent. Nam illos Suillios aut Stercutios, vel ex Imperatorum numero, qui ventris aut vesicæ onus auro excipere non veriti sunt, ex auri cultorum ordine, ut homines profanos ac sacrilegos, exesse jubebo. Vos tamen vel ex eo animadvertetis, quanta auri dignitas nobilitasque sit, quod omnia sua luce involvat, & quasi imperio suo contineat, ne ipsis quidem Regibus exceptis: qui cum coronas aureas capiti suo imponunt, vel ipso hoc facto se, qui omnibus imperant, auro tamen subjici ostendunt, ut, cum vulgo non nisi Deum & gladium superiorem agnoscere credantur, nunc tamen ipsum aurum, cui sua sæpe imperia debent, superius agnoscant. Interrogate jam ipsos sensus vestros, & cum pleraque in hoc orbe auro tecta & incrustata videtis, vestris cum animis reputate, quam ad ipsam lucis naturam auri majestas accedat. Annon enim miraculo proximum est, adeo sine laceratione sui diduci aurum posse, ut minutissima ejus pars magnam corporis molem tegat, & ingenita sibi luce conspicuum reddat? Interrogate artifices, ac ab illis discite, tertiam grani partem, quo vix tangi minutius aliquid possit, in centum ac triginta quatuor pedum filum tendi posse; quod nemo crederet, nisi experimento

quotidiano jam innotuisset. Hic vero mirabilem illam lucis naturam recognoscite, quæ, ut extra materiæ tarditatem posita longe lateque & quasi in ipso illo nutu diffunditur, ita, materiæ juncta, & cum ipsa concreta, ne nunc quidem naturam suam exuit, sed, quantum, per materiæ lentorem licet, eam secum dispergit, latius etiam sparsura, si humana solertia particularum tenuissimarum vestigia crassioribus instrumentis assequeretur. Nam de mirabili illa per artificium ignis attenuatione, nunc non dicam, qua unum auri, non vulgaris, sed Philosophici, granum pene infinita, aliqua & divina vi fœcundatur, ut vel mille, argenti vivi libris illam auream lucem infundat, quæ sanctioribus Sapientum scholis sunt reservanda. Ubi sunt jam illi amentes, & fatui, qui aurum, ut illi in solem injurii Æthiopes, convitiis proscindunt, & divino consilio intra terræ viscera abditum, ne humanis usibus pateret, nugantur? An ignoratis, o stolidi, sapientissimum Deum ea, quæ præstantissima sunt, in occulto posuisse? ne indignis illa scilicet diriperentur, sed homines labore suo indagarent: nam, ut vetus verbum est, *Dii vendunt dona sua laboribus*, ut vel *nucleum nemo esse possit, nisi nucem fregerit*. Ergone divina beneficia adeo maligne atque adeo in Dei injuriam interpretabimur, ut, cum illa nobis non obtrudantur, nos compressis sedeamus manibus, donec fors aliqua vel Θεός ἀπὸ μηχανῆς

no-

nobis objecerit, ne videlicet divinæ voluntati homines inepti refragari videamur? Solem, è mundo tollunt, qui aurem è commercio hominum, velut alterum solem, proscribunt, neque animadvertunt, omnes, quotquot in hoc orbe vivunt, homines ad auri, tanquam cœlestis alicujus doni, custodiam quasi divino consilio destinatos. Ac sunt sane illi non tantum in Deum, auri opificem & largitorem, sed in omnes terrarum dominos, injurii, qui, cum suam auro imaginem imprimunt, ejus cultum hominibus commendant, & à sua majestate venerationem illi conciliant: quam lædere quodammodo dicendi sunt, qui aurum in dias lunis auras prolatum execrantur. Hos homine, si mihi animadvertendi in illos facultas darer, in carcerem detruderem, & loris cædi jubem, recitato ad singula verba aureolo illo Vgilii versu:

*Discite justitiam moniti, & non temnere
Divos!*

Divos vo? quid hæretis attoniti? Divos, inquam, est, nummos aureos, qui Deos ipsos in cœsede, ut postea audietis, collocarunt, atquædeo plusquam Divos, Divos inquam, Dorum Imperatorum, Pontificum, Principum Heroum, imaginibus insignitos, quorum qui etiamnum vivunt, & auro suo fruuntur qui ob præclara merita jamdudum auri patre cœlo scilicet, sunt recepti. De quo dubitare fas esset, cum apud gravissimum au-

torem Plutarchum Gryllus ad Ulysssem dicere non erubuerit, *illum Diis maxime charum esse, qui auro abundaret.* Et quidni esset? cum & aurum ipsum Diis in pretio & honore haberi, noster nos docuerit Majoragius, qui & ipsi *aurei* vocantur. Plerumque enim amare eos solemus, qui eadem nobiscum amant. *Solis filium* illud plerique Philosophorum salutant, ejusque charactere designant. Sappho quoque *filium Jovis* dicere verita non est, de quo nunc eo minus dubitandum videtur, quod aurum fulmina spargere sciamus, unde & *fulminans* dicitur: ut vel eo ipso non degenerem se patris sui filium ostendat, quem ut *tonantis* nomine passim Poëtæ appellant, ita nunc auro quoque nostro hunc titulum, velut cum Jove ipsi communem, concedant necesse est. Ac fuere sæpe, & nunc sunt, qui graviora auri fulmina in familiis, domibus, fortunis everfis, magno suo malo senserunt. Nam quod populos excindit, urbes evertit, non ferrum aut ignis sulphuratus, sed aurum est. Sed & ipsum Jovem in aureum imbrem mutatum Poëtæ tradiderunt, ut in Danaes sinum illaberetur: qui si iterum in aurum liquari velit, omnes, quotquot sunt, Danaæ & Pamphili sinus suos, vestes, vasa, manus, forte etiam ora ipsa, panderent, tam gratum hospitem avidissime excepturi, aut plane devoraturi. Nam cum *Jovis omnia plena* dixit Maro, hujus illi Jovis aurei omnia plena mallent. Novimus & in deliciis fuisse Diis aurea donaria

ria, quorum templa passim auro, non facto tantum, sed & rudi, exornata fuere. Nam, ut Diodorus Siculus de Gallorum veterum sacellis & delubris prodidit, multum in illis auri in honorem Deum passim disseminatum jacuit, quod nemo (tanta ejus religio fuit!) ut rem sacram contingere ausus est. Veniant nunc, & non per sacella aurum spargant, sed in aris & in thesauris reponant, vel ipsi Jovi custodi & vindici; tanquam cum Diis ipsis in amore, rei divinissimæ certaturi auri amatores eriperent, majori sibi, quam Diis, usui futurum. Cræsum mille lateres aureos ad aram Apollini Delphico exstruendam misisse accepimus: nunc vero vel ipsi Iro, si quid haberet, aurum Cræsi ditissimi eriperent. Adeo amor ille auri cum tempore crevit, adeo aurea ista religio ubique dominatur, ut ego sæpe mirer, cum, adeo altis radicibus aurum mentibus hominum infederit, ut vel somniantibus & concumbentibus ejus memoria obversetur, nunc non nasci aliquando homines ungvibus aureis præditos, ut puero dentem aureum in Silesia natum fuisse tradidere. Sed ferreos illos esse oporteret, qualibus gryphes, nisi fallor, armatos nonnulli fabulantur, cum aurei ad rapiendum nec firmi satis nec acuti videantur. Non dum omnia, quæ auri excellentiam vobis demonstrent, enumeravimus. Cœli sobolem, Jovis filium, Diis carum aurum diximus. Majus aliquid & admirabilius audietis. Tanta,

aurum potentia & divinitate est, ut ipsos Deos faciat cœloque suo donet. Non enim jam Jovis filius est aurum, ut Sappho dixit; sed Jovis ipsius Deorumque omnium pater, non quidem patratus, sed patrator. Cum Drusilla, Caji Cæsaris Caligulæ & soror & concubina, moretur, fuit Livius Geminius senator, qui in cœlum euntem se vidisse, interque cæteras Deas majorum gentium confedissee, sacramento asseveraret; execratione addita, si sciens falleret, se omnes Deos, Deas, & ipsum Drusillæ numen infestum & implacabile habiturum. Quid fit? Decernit Senatus, ut staret in Templo Veneris aurea, ut pari religione cum Deum matre cole-retur, ut Panthea nominaretur, ut per ejus Numen juraretur. Quid ergo dicetis, Auditores, impulisse Livium Geminium, ut hæc jurejurando testaretur? quid Senatum, ut crederet? viginti illæ drachmarum myriades, quæ Livio Geminio de publico solvebantur: divina scilicet illa auri potentia effecit, ut à Livio Geminio consecraretur, & hujus testimonio nixus Senatus illam pro Dea veneraretur. Sed ne quis Caji Caligulæ hanc dementiam interpretetur, eadem jam ante in Octaviano Augusto *ὑποθέωσις* instituta, quem Humerius senator se in cœlum volantem prospexisse, ac intra penetralia Deorum receptum juravit. Igitur Patres ipsi tanquam Deo templum & flamines decreverunt. Livia vero Humerio pro tam insigni testimonio ducenta & quinquaginta drachmarum millia numeravit. Hæc omnia Romuli quidem

dem exemplo ita acta fuisse certum est: sed hic auri illa majestas intervenit, qua impellente factum est, ut non solum ex auro, sed ipso auro, factos Deos Roma adoraret. Quæ si Hesiodi ætate contigissent, præcipuum ille auro in Theogonia sua locum tribuisset. Quandoquidem ergo, ut vidimus, Auditores, cœlesti origine prodiit aurum: quandoquidem Diis carum, Deosque ipsos facit: cur Archiepiscopis, Episcopis, Prælatis, quos adeo ob auri cupiditatem extollit Majoragius, vitio habeamus, si, quæ sua, quæ cœlestia sunt, curent, ac singulari in aurum amore ferantur? Nam cum aurum amant, lucis se filios esse scilicet ostendunt, cujus progenies aurum est: ad cœlestem Solymam, quæ tota ex auro est, quia ex auro est, toto pectore adspirant, cum jam tum in terris amœnam ejus faciem in auro suo, velut in typo, speculantur, viamque ad illam hoc auro suo duce & phosphoro indagant. Ejus tam præcclari tam nobilis argumenti vim Majoragium non assecutum fuisse miror, qui solícite adeo causam illorum agit, & adversus fatuos illos & ineptos auri contemtores ac sacri ordinis insectatores defendit. Quare, Auditores optimi, nec ipso illo, de quo loquor, auro contra cari, arrigite ad auri adspæctum aures, & quemadmodum veteres ad lumen illatum exclamare solebant, καὶρε φίλον φῶς! ita auro acclamate, basia illi ut dulcissimæ amasiæ figite, nec oculos tantum illa voluptate pascite,

aut

aut extrema linea, ut Comicus loquitur, amate, sed ipsis oculis vestris, ut in thalamo dulcissimo, recondite & componite, non sterili illo & infœcundo, sed unde certissima felicitatis pignora vobis polliceri possitis. Nam etsi Pacificompsem aliquam, & vel Helenam ipsam, in thalamos vestros intuleritis, ne Salus quidem ipsa vos servaverit, nisi illa Caja vestra cum Pythagora aureum vobis femur ostendat, id est, ut ego interpretor, aureo latere inopiam vestram suffulciat, & velut gallina Æsopica, ova vobis quotidie aurea pariat, vel, ut planius loquar, aureorum nummorum cumulo obrutos beatos reddat. Hactenus illam auri nobilitatem a cœlo, ab astris, a Diis, Auditores, deduximus: nunc ad illa, quæ nos propius attingunt, ad primum illum terræ incolam Adamum veniemus, & quæ ipsi cum auro cognatio sit, dispiciemus. Neque enim cum vulgo existimare debetis, e vili illo luto, quod pedibus calcamus, nobilissimum Adami corpus fuisse compactum. Terra illa purpurea fuit, illa scilicet, quæ auro natales præbuit, & quam auri divini nomine efferunt, qui arcana ista altius rimantur. De quo etiam musitant nonnulli veteres Judæorum magistri, qui, cum gentis suæ scita & lingvæ secreta interpretantur, præ cæteris audiendi sunt; nunc tamen vel e Christianis sunt, neque contemnendæ autoritatis, qui eorum sententiæ non solum accedant, sed & rationibus non omnino vanis confir-

firmatum eant. Totum ergo illud corpus, (audite singulare mysterium, Auditores) totum, inquam illud corpus, quod ex istis ossibus, illa carne, illis nervis & febris, isto sanguine congestum a Deo est, cum e nihilo ab illo potuisset produci, ex ipsa illa prima auri materia productum est. Quod cum e nihilo ab illo potuisset produci, ex ipsa prima auri materia productum est. Quod cum ita se habere illi testentur, neque nos negaturi simus; quis est adeo perfrictæ frontis, adeo iniquus rerum æstimator, ut illum auri amorem, quod intestinum homini & domesticum est, quod ipsis illius fibris, sanguini, pectori, visceribus, ingenitum est, animo extirpare, ipsique rerum naturæ, atque adeo humano generi, bellum, indicare jubeat? Quod sane qui fecerit, aut si quis ipse adeo averso ab auro animo fuerit; nã is non genuinam se Adami sobolem, sed vel à Præadamita aliquo, aut, quod potius duxerim, è Deucalionæorum lapidum jactu progenitum ac procreatum se ostenderit. Nam, ut vel ex intermundiis Epicuri, aut ex Lunæ orbe ad nos descenderit, aut tanquam tertius è cælo Cato ceciderit, minime credibile videatur. Quare, cum nemo, vel ipsis sacris litteris testibus carnem & sanguinem suum odio habuerit, an nunc demum gentilitium illum, auri amorem, qui cum sanguine nostro concrevit, exuemus? an aurum, quod *ipsum mortaliū sanguinem* Vates Ascræus eleganter non

minus quam vere appellavit, è generis humani confortio, in Deum hominesque injuri, proscribemus? Honestius de nobis, deque toto humano genere sentiendum est, quam ut in hoc tanto, tam atroci, tam singulari, flagitio deprehendi, ac ipsius naturæ jura subvertere velimus. *Est hæc, Auditores, ut cum Tullio meo loquar, non scripta, sed nata lex; quam non didicimus, accepimus, legimus; verum ex natura ipsa arripuimus, hausimus, expressimus; ad quam non docti, sed facti; non instituti, sed imbuti sumus;* ut cognatum nobis, & quodammodo parentem nostrum, aurum, certatim amemus, omnibusque honoris, oculis complexu teneamus, & velut in beneficum aliquod sidus intueamur, Neque tantum hoc naturæ instinctu, sed & majorum exemplo faciamus, qui quo propius ab ortu & divina cognatione abfuerunt, eo magis auro addicti fuerunt: ut & tota illa, qua viverent, ætas *aurea* diceretur. De illa pluscula Majoragius è Poetis narravit, eamque, quibus potuit, laudibus extulit. Sed multo sunt majora, quæ & auri præstantiam arguunt, & hominum, qui auro suo ad vitæ felicitatem uterentur, singularem sapientiam testantur. Nam cum ea vitæ innocentia essent, ut ad familiarem conversationem Deus ipse admittere non dedignaretur: aurum vero non aliam ob causam, quam ob excellentiam divinasque ejus virtutes, amarent: non immerito viri sapientissimi cœlesti, quod ex auro paratur,,
phar-

pharmaco vitam à moribus immunem, & ad tot secula propagatam, duxisse suspicati sunt. Quæ si vera sunt, ut multi nobis persuadent, primo, si ab humana mente discesseris, loco reponendum aurum, & post divina præ cæteris amandum, nobisque in eo colligendo ac cognoscendo omni tempore, omni conatu & spiritu, laborandum est.

Multa magnaque sunt, quæ de auri præstantia diximus, plura etiam dicturi, si omnia istius generis, quæ copiose Majoragius disseruit, enumerare animus esset. Nunc ea tantum elegimus, quæ ille omisit, & quæ tamen maxime excellunt. Sed cum & illa à superstitiosis nonnullis argui suspiciose possint, ad unum, illud & præcipuum causæ nostræ munimentum accedamus, quo tueri se Præsules, Prælati, Archiepiscopi, & cujuscunque ordinis Religiosi possint, si forte à sanctulis nonnullis impugnentur. Nemo est è vobis, qui ignoret, Salvatori nostro sanctissimo, cum primum nasceretur, & ingrati illi Judæi oculos animosque ab illo averterent, à Magis ex oriente venientibus, cum dignius illo munus non invenirent, aurum cum thure & myrrha fuisse oblatum. Neque illos cum auro suo rejectos fuisse legimus, sed insigne hoc regiae dignitatis axioma, vel, ut quidam volunt, divinitatis argumentum, habitum fuit. Nam divinitatem auro significari, interpretes nonnulli volunt, ut, cum in Cantico sponso caput ex

optimo auro esse dicitur, divinam illo naturam intelligendam arbitrantur. Quare, Auditores, in illo Magorum, qui rerum divinarum atque humanarum scientissimi erant, iudicio acquiescamus, eoque loco & numero, quo illi habuerunt, aurum habeamus; quod illi quasi quoddam divinæ lucis, totiusque orbis, simulacrum & compendium, rerum omnium Parenti optimo maximo in suæ subjectionis signum, in amoris arrham, in venerationis documentum, quasi primitias quasdam exhibuerunt. Nam cum thus & myrrham illi addiderunt, quæ in fumos dissipari solent, ut, cætera hujus orbis vana, caduca, præ illo immortali, solido, firmo, atque adeo divino, auro innuerent, universi tamen hujus compagem, tum quæ fluxum & instabile, tum quæ firmum & perenne est, in hoc dono respexerunt, ita ut ad ejus autorem referrentur, ejusque supremo dominio crederent universa. Deinde cum, sublato in cælum à gloriosa resurrectione Salvatore nostro, sancta hæc civitas ejus in terris à primis conditioribus conderetur; quid tum factum fuerit, optime, ut puto, meministis. Nam qui tum in cœtum illum confluxerunt pii homines, agris, domibus, omni-que supellectile vendita, aurum illud, quod ex eo collegerant, ad Apostolorum pedes, memorabili generosæ charitatis exemplo, deposuerunt. Adeo nec illo tempore sacra sine auro consistere potuerunt, neque charitatis of-

officia, quæ & ipsa auri voce notari solet, sine auro exercentur. Utinam his exemplis saperent improbi homines, qui sacro ordine indignum neque satis honestum esse arbitrantur, cum in corradendo auro Antistites nimis laborant, & qui eos ob auri copiam apud vulgus in invidiam adducunt, ac avaritiæ iniquissima suspicione gravatos acerbissime traducunt. Quid enim? an illos, qui pingvia victimarum præciiebant, ut Domino offerent, à pingvedine terræ, quæ aurum est, præcipienda arcebimus? adeone, cum tota terra Domini sit, omniaque, quæ ejus ambitu continentur; ministros ejus possessione excludemus? Quare gaudete hoc vestro bono, ô Præsules, macti estote hoc præsidio, idque operam date, ita res vestras institute, ne vobis hæc auriprærogativa, quod vel ex ordinis prærogativa vobis debetur, (& quis Herculi clavam eriperet? ego vero ineptus sum, qui memores moneo) unquam è manibus extorqueantur.

Reliquum nunc est, Auditores, ut, cum de auri dignitate & excellentia plura quam Majoragius, ac fortasse vobis ante inaudita, dixerimus, nunc ejusdem insistentes vestigiis, de insigni ejus potentia & utilitate (in qua ille orationis parte amplissima spatia confecit) quædam illi indicta, nec vulgaria, in medium afferamus. Ac primum vos, tum sapientissimi Regis Salomonis, tum Siracidis judicio præmonitos velim, (libenter enim sacra oracula confu-
lo) ne ab auri colligendi studio unquam desi-

statis. Nam de Salomonis (qui ipse magnam auri vim sive maritimis commerciis, sive arcana quadam scientia congeffit, & illustri omnibus exemplo est) aureis dictis, ut multa in sententiam nostram adduci possint, nunc unicum id potissimum explicatius proponam, cum ad formicas homines ignavos, inertes, rerum suarum incuriosos, ablegat. Quid hoc ad aurum, dicetis, Auditores? Statim hoc faxo intelligatis. Formicarum varia esse genera forte audivistis, e quibus illæ cæteris præferendæ sunt, quas in India reperiri Herodotus & Strabo testantur: nam & magnitudine & sapientia minutulas istas, quæ in pulvere suo de granulis sollicitæ sunt, longe antecedunt. Ac sane, cum de re aliqua loquimur, ad ea, quæ in quoque genere optima sunt, respicere solemus. Illæ vero formicæ ne e grana & silvarum minutias, sed aurum, prudentissimo consilio colligunt, adeoque, singulari naturæ instinctu, quid ex usu hominum sit, suo exemplo docent, merito, ut ego puto, a Salomone in exemplum nobis ponendæ. Et illæ quidem tantam auri copiam comportare solent, ut Indi singulari venationis genere illis insidias struant. Nam ternos camelos singuli jungunt, mares a lateribus, quos frenatos trahunt, feminam in medio, quam inscendunt, atque ita ad aurum tendunt, cum ferventissimus est æstus: siquidem tum formicæ sese occultant. Ubi ad locum venire, culeis, quos attulere, completis, ocys-

me

me fugam capeſſunt, tanta pernecitate, ut, niſi viam, ad quam formicæ congregantur, anticipent Indi, nemo eorum ſit evaſurus. Narratur & apud Suidam Athenenſium cum formicis, aurum cuſtodientibus, de auro pugna, ſed infeliciter tentata. Diſcamus ergo, Auditores, diſcamus vel a formicis, (ſi ipſi non ſapimus) quomodo aurum non congeramus tantum, ſed & pro illo ſervando omnibus viribus pugnemus. Cumque vel brutis animantibus ille ſenſus inſit, ut auri fulgore capiantur, eo magis homines intelligentia præditi ejus amore incendi debemus. Nam & Siracides auro & argento homines conſervari ſapientiſſime judicavit. Quare, ſi ſalvos nos velimus,

hoc opus, hoc ſtudium parvi properemus & ampli,

quomodo aurum, felicitatis noſtræ præſidium, mature colligamus. Seqvamus hoc Siracidis monitum, neque res noſtras tantum, ſed & omnem rempublicam hoc fundamento ſubnixam credamus. Nervus ejus aurum eſt, quo totum hoc corpus regitur. Tolle e nobis nervos, neque movebimur neque progrediemur, ſtupidi & trunci: vexentur illi noxiis humoribus, ſequentur paralyſes, vertigines, convulſiones, non lateri bene, non ventri erit, neque manus neque pes officium faciet, ſed omnia concident ac collabſcent. Aufer aurum e republica, & pacis & belli munia deſtituentur: nudabuntur urbes præſidio, cathedræ docto-

ribus, tribunalia iudicibus, cives excident, commerciis, omnia affligentur, concutientur, labefactabuntur. Quare optime intellexerunt, quantum reipublicæ momentum in auro sit, Imperatores, qui Fortunæ aureæ simulacrum in larariis suis coluerunt. Ut enim Fortuna aurea fabri opus fuit, ita aurum Fortunæ faber est, & privatæ & publicæ, nec sine illo quicquam in republica expediri potest. Aurum est, quod ipsis Imperatoribus imperat, quod terrarum dominis dominatur, rectores regit, duces ducit, leges rogat & abrogat, jura ponit, fœdera jungit, animos componit & disjungit. Quæ quoties ego attentius confidero, toties Homerica illa fabula animo obversatur, quæ ille Deos Deasque omnes, una aurea catena, inter cœlum terramque suspensos, nobis depingit. Ad tribunalia ventum est, illud cogitemus, poma esse aurea, quæ Eris, litigantium Dea, spargit, raro litigantium, plerumque iudicum & causidicorum, bono, qui ex his pomis undique vel detergent quid, vel abradent, vel exterebrabunt, vel tota, si possint, absumunt. Ipsa quoque, quæ illis præsidet, Astræa vel ideo bilancem venientibus offert, ut aurum illi imponant, ad cuius gravitatem illa causarum pondera examinentur. Cæcam esse credo, quod, ut in veteri verbo est, auri splendor strabones vel cœcos facit. Gladio vero illo pro auro suo tanquam pro aris & focis pugnat. His nunc moribus plerumque in re-

pu-

publica vivi, his artibus omnia dirigi, quis adeo stupidus est, qui ignoret? Nam, qui e Platonis republica nunc æstimavit homines, aut ex ejus ingenio refingi velit, ut imminutæ mentis homo rediretur. Quam enim bellum, quam lepidum hoc est, cum Plato, homo minime, quidem malus, sed parum catus & sapiens, Magistratus suos omni auro & argento vult esse vacuos, atque adeo ab illorum attactu, ne contagione aliqua videlicet inficiantur, sibi cavere jubet? Et, quod magis ridiculum est, ne ex auro quidem & argento bibere, non tecto recipere, permittit. Quid ergo fiet miseris illis Ephoris? An illi, cum aliis jus dicunt, ipsi esurient? Nimirum poma illis e Tantali hortis apponit. Ait, auro esse debere contentos, quod a Diis animis ipsorum infusum est, ne corruptibili illo auro & argento polluantur.

DI te, Plato magne, Deaque

Bellum ob consilium donent tonsore;

vel, si mavis, solistitio, ut copiosius animo tuo aurum infundatur. Nam quod tu nobis aurum narras? illud scilicet, quo nemo unctiores caules habuit; nemo focos fulgidiores vidit: illud scilicet, quo Stoicorum schola superbit, qui solos se sapientes, reges, nobiles, divites, esse gloriantur, etiam cum

fundo nummus suspirat in imo.

Ad hanc Platoniam rempublicam relegandus omnino esset, si nunc viveret, plenus ille ruris Curius, qui raparum prandia Samnitum auro

præferre veritus non est, quod tamen vel ab ipsis Regibus propemodum adoratur; ut illic in Idearum regno auro Platonico pascatur, id est, ferias esuriales celebret, & perpetuo raparum desiderio torqveatur. Nam cum vel pueri, quid æra lupinis distent, norint; illam, quid aurum rapis præstet, omnino ignorasse dicent. Sed hos homines tristi suæ sapientiæ relinquamus. Vos vero, o Auditores, si sapitis, felices vocabitis, quos aureo ramo suo fatidica illa Sibylla beavit. Aureus ille ramus est, quo inferorum portas perrumpimus, quo cœlos adimus, quo per honorum subsellia circumducimur, quo animos nobis in amoribus conciliamus, quo familiarium fata firmamus, quo fortunas nostras certa in sede collocamus; nam, ut tota respublica, ita singulorum domus, auro fulciuntur. Uxores vobis jungetis? primæ hic auri partes sunt, primæ in procis, primæ in sponsis, primæ in maritis. Primum amoris condimentum aurum est: primum primæ noctis, raptæ virginitatis (nisi alius raptor antecesserit) præmium aurum est. Junonem, sive Pronubam, sive Cinxiam, sive Nixiam colatis, Monetæ quoque nomine appellari mentote: quam ne iratam habeatis, omni vobis studio laborandum est. Usque adeo falsus est Vates, cum dixit: *Sparge marite nuces*; aurum dicere debuisset. Non frustra Cupidinis tela aurea finxere Poetæ. Visebatur apud Thespienses Amoris simulacrum, cujus alæ auro
il-

illita fuerunt, ut totum operis artificium illo auro obscuratum fuisse Julianus in oratione sua secunda queratur. Sed ad amoris naturam, sagacissimus ille artifex allusit, cujus nullæ essent alæ, nisi ab auro quasi acuerentur. Nam etsi per se tardigradum ac testudineum aurum est, mirabili tamen virtute, ut negotiis omnibus, ita amor, alas suspendit, ut, quo irreperere vix ausis, aquilino volatu expansisque alis involes, omnibusque ventis secundis, omnibus velis & remis feraris. Hæc figurato a me sermone dici vos opinamini; neque ego inficias ivero. Quid vero dicetis, si reapse illam auro vim inesse probavero, ut & se aliaque sibi addita quasi quibusdam alis extollat? Novam scilicet volandi artem, per tot secula frustra tentatam, novo & inaudito auri magisterio docebimni, ut jam vobis non humi rependum sit amplius, sed sublimi ferire fidera vertice novi Bellerophontes queatis. Quæ tu nobis somnia, quæ portenta narras, dicetis? Sed quæso vos obtestorque, Auditores, ut ad illa, quæ e Jovis diphthera mysteria nonnulli describere, animum advertatis. Aurum in cœlestem ac igni solari æmulam naturam summo artificio redactum ea pollere virtute ajunt, ut perpetuo motu agatur, corporaque sibi annexa pro ponderis ratione moveat atque impellat. Atque ut eo minus in dubium arcana illa ineffabilia vocetis, ea vobis in memoriam revocate, quæ de Abaridis Philosophi Scythæ sagit-

gitta aurea memoriæ prodita accepistis. Hanc ille ab Apolline, vel, ut alii malunt, a Pythagora accepit, ea virtute præditam, ut cum ipse sagittam jacularetur, ille quasi sagittæ suæ appendix, quæ illa præiret, ferretur, omnesque quos vellet populos ales viator adiret. Quam ob causam *αἰθέρα* ipse dictus est, & iis, quas peragravit, regionibus multa oracula fudit, variaque, quæ illis evenerunt, prædixit. Hæc vero sagitta, si Hierophantis quibusdam credere fas est, eo ipso tempore, quo petasatus ille & alatus Mercurius arctissime Soli junctus fuit, Sagittario ortum stringente, & Pegaso culmen tenente, in Vulcania officinia fabricata fuit. Per me quidem cuivis ex ingenio suo narratis vel demere vel addere fidem licebit; neque enim cum quoquam ideo in arenam descendam; id tamen credatis velim, multos vel hodie esse Equites tales auratos, qui orbem terrarum omniaque regna aureis sagittis circumvolitant, quibus omnia adyta percurrunt, omnes scopos feriunt, omnia castella expugnant, cum nihil omnino sit, quod non sagittis aureis succumbat. Quis ergo Cupidini, Deorum potentissimo, aureas alas recte additas, ut in Thespiensi illo simulacro, negaverit? quem vel ipsum sagittis aureis mortalium expugnare pectora Poetæ prodiderunt. Nullum inexpugnabile munimentum fore judicabat Philippus, quo asinus auro onustus possit penetrare; quæ non Veneris castella ex-

pu-

pugnent asini, toti, quanti quanti sunt, aurei? Si pecora vobis tondenda sunt, illas Ægonis oves, quæ vix ossibus hærent, mittite, sed, ut aureas Phryxi oves tondeatis, videte: aut, si in capras incideritis, in illas ut incidatis videte, quæ aureo illo Amaltheæ cornu insignes sunt, unde, tanquam inexhausto quodam penore, omne frugum bonorumque genus affatim atque ubertim suppullulet. Nam ut cornuum illud suspiciosum nomen vos viros constantes ac fortes minimeque superstitiosos terreat, ne quidem suspicabor. Vitam vero jucundissimam ac omni voluptatum genere affluentem transigetis, ubi semel vos ille fortunæ aureæ rivus in auraverit, albæ scilicet gallinæ, quæ ova aurea pariat, non filios, sed maritos. Mature quoque reti aureo plusquam Neroniano piscari discetis, probe ad artem chrematisticam instructi; illam præcipue, quæ in fœnore aurum collocat, ut

nummorum nummos, Et qui nascuntur ab illis,
fœcundo vobis puerperio edat. Quanquam non desint, qui & ipsos pisces suos aureos in nassam auream trahant: à quibus tanquam à contagiosis hominibus vobis cavendum erit. Mille præterea ditescendi artes sunt, quas ceu digitos ungvesque nosse interest. Earum non paucas, præsertim in testamentis captandis. Tiresiæ umbra apud Horatium Ulysses docuit in libri secundi satyra quinta, digna profecto,
quæ

quæ tota auro scribatur, quamque auri amatores legant relegantque sæpius totamque omnino perdiscant & exhauriant. Illud certe celeusma multorum auribus insonat:

Rem facias, rem,

Si possis, recte; si non, quocunque modo rem.

Hanc auream sententiam uncialibus illi literis, non tabulis sed mentibus inscriptam circumferunt: hæc noctes diesque illis obversatur. Congerite ergo, quantum potestis, aurum: non intercedo, si recte: quin potius hortor, & impello, omnem movete lapidem, nummos aureos in vitæ usum seponatis: qui tota oratione mea nihil aliud ago, quam ut excitem dormientes, incitem currentes; si qui sunt, qui hoc in negotio dormiunt, nec potius, audito auri nomine talaria quærentes, vel Dædaleo remigio, vel Jovis quadrigis, omni accipitre Pegasoque velociores, ad auream hanc metam contendunt. Sed unum est, à quo vos omni dehortari studio velim, quod

repetens iterumque iterumque monebo:

ne in illum, qui huic aurum corradendi studio comitari solet, morbum incidatis, quem *ἄσθμα* Græci, auruginem Latini & morbum regium, in aurei, ut puto, coloris honorem appellant: qui cū in corpus incidit, ita illud inficit, ut tota facies omniaque membra auro illita esse videantur, & frequenti auri intuitu (quo & ipso auri vis firmatur) curari solet; sed in animum ad-

admissus, in *χευσομανίαν* cum maximo salutis nostræ periculo degenerat.

Dii talem terris avertite pestem!

Aurum comportat, qui illo morbo correptus est, per varias artes, licitas, illicitas,

*angue trahit, quodcunque potest, atque addis
acervo,*

perpetua ejus fame vel potius *βελιμία* laborans. Non, ut sibi bene sit aut aliis: non, ut cuticulam curet: non, ut in magnificentiæ liberalitatisque instrumenta convertat; sed ut solo auri adspectu pascatur, & ad hoc metallum damnatus, trabalibus quasi clavis affixus sedeat, atque adeo totus illi incumbat. Ideoque animo inter perpetuam cupidinem & metum suspenso,

congestis undique saccis

Indormit inhians, & tanquam parcere sacris

Cogitur, aut pictis tanquam gaudere tabellis;

Exanimisque metu vigilat noctesque diesque,

Formidatque malos fures, incendia, servos,

Ne se compilent fugientes.

Libenter enim recito illa Horatiana, *tum quod elegantissima sint, tum quod aliqua huic malo medicinia e lepidissimis ejus Satyris peti possit. Quam misere cum re sacra, quam misere cum re publica agitur, si vel homines sacri ordinis, vel reipublicæ ministros, furor ille invaserit: a quorum ingenio nullum unquam flagitium aberit, nemini fidorum, cum
in

* e Lib. I. sat. 1. vers. 70.

in se ipsos sint injurii. Domi genium defraudabunt, foris populum; atrum panem ex hesterno jure stomacho latranti objicient,

Vel cum farrata fumosum sinciput olla;

*Durum olus, aut fatuas, fabrorum prandia,
betas:*

aut omnes illas artes exercebunt, quas venerabilis illa Societas, quæ a subula nomen habet, (*la famosissima Compagnia della Lesina*) mirabili solertia extudit, ac veluti leges candidatis suis (sordidatis debebam dicere, quia sordium disciplinam profitentur) præscripsit. Quæ in disciplina ita profecerunt nonnulli, ut insigni accessione augere ista amplissimorum Patrum istius Societatis senatus consulta & τεχνήματα possint, vel ipsos Eucliones novas auri cumulandi artes docturi. Quanquam plerumque fieri solet, ut, quod hac ratione corraferint aurum, Tolofano illi auro simile fiat, & ad alios, qui horum hominum insania fruuntur, possessores perveniat. Vidi aliquando talium hominum ingenium lepida imagine in vicinæ Civitatis curia depictum. Inter alia vitia avaritia sub Euclionis tenacissimi senis habitu delineabatur. Nummos ille aureos, quæ fieri poterat, rapacitate, uncis manibus, constipare in loculos capacissimos videbatur: qui tamen omnes pertuso eorum fundo non advertenti excidebant. Cujus picturæ adspectu ita animus meus delectabatur, ut in hos versiculos, quos vobis recitare non gravabor, subito prorumperet;

Non

*Non abes hinc technis armatus & ore protervo,
Euclio, cui nulla est frons, neque sancta
fides.*

*In nummos biat unca manus: nam colligit au-
rum*

Fænore, perfidia, litibus, arte, dolis.

*Tu, quanquam populus te sibilat, ut tibi plau-
dis!*

Cum male congestas arca flagellat opes.

Sed fædum est, digito monstrari & dicier:

Hic est,

Juris hic humani est institor atque sacri.

Sæpeque ringentem loculis quæ mergitur istis

Postico fugiens præda fefellit herum.

Non sibi grata legunt Hyblæ mella volucres,

Non, Harpyja sibi quod rapit, usque rapit.

Non dape furtiva gaudebit corvus: ab esca,

Quam petis, ipse malum tu tibi, Turde,

cacas.

Non male pecuniam serpenti comparat inge-
niosissimus Vates, quæ splendida imagine ser-
pentis instar fallens, postquam crumenæ aut
manuum calore incaluit, virus in animos ho-
minum effundat. Cujus sententiam ut con-
firmem, aurum ipsum serpentem esse dico, ex
argento scilicet vivo, omnium metallorum
matre, natum. Ille ipse Mercurius, ut ser-
pentum insignibus delectatur, ita serpens ipse
est, qui terræ pulverem vorat, quo in aurum
commutatur. Ejus contactu sublimes homi-
num animi ita dejiciuntur, ut in serpentes de-

generent, humique repere incipiant. Jam vero, ut in veteri Græcorum proverbio est: ὅφιν αἰν μὴ φαγῇ ὅφιν, μὴ γεννῆσεται δράκων. *Serpens nisi devoret serpentem, nunquam erit draco.* Quot ergo serpentes ex illo genere deglutientes creditis, ut quis draco fiat, qui thesauris suis incubare possit, & serpentis Epidaurii instar eos perpetuo custodiat & observet? Nam, quod cervæ solent, illos e cavernis suis serpentes aureos, ubi ubi illi delitescant, dulci eorum afflati odore, emunctæ scilicet naribus homines, rapaci illo spiritu attractos devorabunt. Nemo tamen hæc a nobis in auri contumeliam dicta existimet, sed in homines ineptos, bono auro male utentes. Nam vel ex ipso auri abusu summa illa dignitas & potentia auri elucet, quæ tanta est, ut solo fulgore animos hominum fascinet, sibi que totos subjiciat, & a desperatissimis morbis ad sanitatem pristinam, ac ab ipso orci limine quasi in vitam reducat. Vidi ex illorum, quos modo nominavi, hominum genere aliquem periculoso morbo pene enectum, quem flosculi illi ex Hesperidum hortis, quos rosas nobiles vocare solemus, cum ipsi ostenderentur, mirifice refocillabant, ut animam illam nudulam, vagulam, blandulam, jam in procinctu stantem & fugituram, in vitam revocarent. Non ignotam credo vobis esse historiolum, quam Venusinus ille vates* nobis memoriæ prodidit. Affluebat auro & argento Opimius, qui tamen

Ve-

* Lib. II. sat. 3. vers. 142.

*Vejentanium festis potare diebus
Campana solitus trulla, vappamque profestis.
Quondam hic lethargo grandi est oppressus, ut
beres*

*Jam circum loculos & claves letus ovansque
Curreret. Hunc medicus multum celer atque
fidelis*

*Excitat hoc pacto: mensam poni jubet, atque
Effundi saccos nummorum, accedere plures
Ad numerandum: hominem sic erigit: addit
& illud:*

*Ni tua custodis, avidus jam hac auferet beres.
Agnoscite jam mirabilem auri efficaciam, quæ
omnium herbarum, verborum, lapidum, vir-
tutes supergrediatur. Quid fit? Exilit bonus
ille Opimius profundo illo somno, velut ful-
mine aut tonitru excitatus, vigilesque in o-
mnes partes oculos circumferens: Men', inquit,
vivo? corvos sic delusus hiantes, heredes sci-
licet suos, qui jam spe bolum hunc devorave-
rant; nisi stultus, particulæ alicujus de auro
amittendæ metu remedia negligens, vitam vo-
lens projecisset. Cum enim medicus illum
compellaret:*

*Deficient inopem venæ te, ni cibus atque
Ingens accedat stomacho fultura ruenti:
Quid cessas? agedum! sume hoc ptisanarium
orizæ;*

ille statim trepidus quærens:

*Quanti emta? parvo. Quanti ergo? octo as-
sibus;*

hanc tandem in se decretoriam sententiam pronunciat:

Eheu!

Quid refert, morbo, an furtis, pereamne rapinis?

atque ita cum auri suavissimo nomine in tenues auras spiritus ejus discessit, post fata draconis alicujus corpus ingressurus, quo perpetuam thesauro suo custodiam præstet. Huic historię adeo similem, ut nec ovum ovo similius esse possit, Janus Nicius Erythræus * consignavit, ubi Hispani alicujus vitam & mores sub *Euclyonis Juriconsulti* nomine vivis coloribus depingit; nisi quod in feliciorē catastrophē fabula exiverit. Injuriam facere elegantissimi auctoris manibus viderer, si nitidissima ejus verba meis, χρύσεια χαλκείων, commutarem. Quare totam illam, ut calamo ejus expressa est, recitabo: Hispanus ille (quem *Euclyonem Jurisconsultum* vocat) juvenis Romam se contulerat, ut ibi negotiaretur; hoc est, ut ex labore studioque, quod ad res aliorum conferret, rem suam strenue augeret. Itaque ut mos est eorum hominum, statim clerici vestem & ornatum accepit, cœpitque nonnullorum suæ nationis commissa sibi negotia studiose diligenterque peragere; verum, ex mercede, quam consequēbatur, vix tantulum decerpebat, quod esset ad vitam parce ac duriter agendam satis; sed quantum necessitatibus naturæ detrahebat, tantundem nummorum acervo, quem cumulare instituerat, addebat. Qui acervus

cum

* Pinacotheca tertia num. XXXII. p. 115.

cum jam satis ex sententia excrevisset, statuit, advenisse tempus, quo liberalius sumptui genioque esset indulgendum. Itaque famuli unius famulaeque operas conduxit, & largius mensas coepit instruere; ita tamen, ut singulis diebus non amplius quam quinis obolis carnes, & binis olera ac poma, in coenas ac prandia coemenda mandaret. At cum saepe in potentiorum aedes se conferret, ut negotiis sibi commissis operam daret, furtim, & tanquam per cuniculos, ejus in animum irrepserat ambitio; quod videret, iis praeter ceteris honorem haberi, qui caudam traherent, quos vulgus Antistites vocat; statuit, parsimonia, cui tanquam uxori, quo nullum est arctius vinculum, haerebat, nuncium remittere eamque suas sibi res habere jubere, ac novas cum ambitione affinitates societatesque contrahere. Itaque dedit operam, ut ad eorum numerum adscriberetur, quos aula Referendarios appellat, quique, nisi simul superioris alterius ordinis munere fungantur, nigra tantum veste utuntur. Atque ut eum, quem inscenderat, honoris gradum pro dignitate tueretur, rhedam equosque coemit, & circumpedes quatuor, qui se sectarentur, mercede conduxit, ac varia veste ornavit. Usque illi sumptus visi sunt Euclioni neutiquam graves, donec, amicorum salutationibus & adulantium gratulationibus inflatus, intumuit. At postquam favor ille, tanquam flatus, hominem defecit, quo elatus in altum fuerat; continuo, quasi de caelo delapsus, decidit, tanquam in lutum, in memoriam sordium antiquarum, in quibus olim totis vestigiis haerebat. Itaque in otio, quo sua eum ambitio perduxisset, cum animo reputans

cogitansque, jam sibi hordeum, fœnum, avenam, quæ equos aleret, emendam, circumpedibus quatuor mercedem, cibum, vestemque præbendam, curandum ut equi ungvis ferro subactum haberent solum, laxiores ædes conducendas, sumtuosius mensam instruendam, aliaque ejusmodi, quæ omnibus fere horis crumena animam interciperent; hæc igitur sedulo in animo versans, ea molestia affectus est, ut ex ægritudine in morbum inciderit. Advocatur medicus: accurrit. At ille, qui naturam & consuetudinem hominis nosset, cui medicinam adhibere debebat, continuo, quo morbo laboraret, intellexit: atque, Præsul, inquit, reverendissime, gravis hic est morbus, ut video, qui te invasit; nec longius abes a periculo: quamobrem magnopere tibi laborandum est, ex eo ut convalescas. Ita est, ut loqueris, ait egrotus: fer igitur opem: equidem angor, crucior, differor doloribus, partem mihi viscerum abripi sentio. Medicus, qui expulso, carere eum febris, non ignorabat, risum tenere vix poterat, atque: Bono, inquit, animo es: jam reperisse me arbitror, quod bonam hujus morbi partem a te dejiciat: missos fac duos ex iis famulis, quos circa te habes: postridie revertar, ut videam, equid præsidii fuerit in hoc pharmaco, quod tibi propino. Ille, cui nihil tam erat cordi quam sanitas, non procrastinat, sed statim, ex medici præscripto, duorum hominum sumtu, hoc est, non minima se ægritudinis illius parte, levat. Revertitur medicus; rogat, ut valeat? ut medicamentum illud eum juverit, quod jusserit sumere? Bene, respondet Euclio, sed non tamen se usque quaque ex sententia valere. Vin' tu, inquit me-

medicus, huic stulto auscultare, neque medico amplius egerè? Loquere, ait ille; audio lubens; nam nihil est, quod magis misere cupiam. Igitur, subdit medicus, reliquos duos famulos domo, quantum potes, abige, & mutare coloniam jube: tum auctione facta, equos, rhedam & rhedarium quoque ei, qui licitetur, addicito: atque ad veterem vivendi rationem, multo hac salubriorem, quasi postliminio revertere. At Euclio: O medicum singularem! exclamat, neque jam cum Hippocrate & Galeno comparandum, sed Æsculapio etiam ipsi & Apollini anteferendum! ut ad intima ejus morbi penetralia se intulit! ut rationem, qua illi occurrì possit, invenit! Vix biduum intercessit ab hoc sermone, quem cum medico, habuit, cum rheda equisque divenditis, & rhedario ac circumpedibus, qui tantum illi morbi creaverant, in malam rem jussis abire, domum vacuum fecit, seque in perpetuum omni molestia dissolvit; atque octo illos annos, quibus deinceps vixit, ita sano fuit corpore, ut sua causa nullus medicus, vel ramento saltem plumbeo, factus sit ditior. Videris, Auditores, quanta auri potentia sit in animis subjugandis; nam si viles & serviles illi sunt, despotice illis imperat, ut vel in perpetuum carcerem serva illa pecora compingat: si voluptatibus ducuntur, magis effeminatos reddit, illamq; Circes magiam æmulatur, quæ in asinos, porcos, canes, non ficta, sed vera μεταμορφώσας transmutat: ubi in regales animos incidit, regiae fortunæ participes reddit, seque ipsis atque arbitrio eorum totum permittit. Ite nunc

divitiarum contemtores, ite auri mastiges, & præfricta ista fronte auri summam potentiam negate, quod ad sanitatem sæpe reducit homines, quod, ipsis sui stultis possessoribus sapientius, stultitiam illorum sæpe redarguit, cum, vel modestiam & temperantiam animis ingenerat, vel pœnis corrigit, vel se ipsum abusi-
bus hominum subducit. Itene nunc, qui figuris imaginibusque nullum esse efficaciam contenditis; nam plus illæ Imperatorum, Regum, Principum, imagines auro impressæ in animis hominum omnibus in negotiis operantur, quam ipsi illi Principes vivi, armati, loricati, galeati, cataphracti, omni sua vi omnibusque machinis effecturi sint. Hæc sunt illa sigilla magica, quæ amorem svadent, terrorem incutiunt, amicos alliciunt, hostes avertunt, sua rebus publicis Palladia præstant. Nolo per omnes hominum ordines orationem circumducere, quod magna eloquentiæ ubertate fecit Majoragius: saltem pro nostri ordinis hominibus pauca loquar, quos ab auro facile superari posse ait Majoragius, proposito eam in rem Alciati exemplo, qui eo vela det, quocunque auri flatus spiraverit. Itane vero, Majoragi, tua nunc ipse vineta cædes? Nam quod de Alciato dicis, ad omnes non pertinet: & tu quidem parcius ista viris objicienda memineris, quorum latera ille Astrææ gladius defendit, nec deerit illis, quo causæ suæ patrocinentur. De cæteris ridiculum profecto est, auro
su-

superandos, quibus nemo catapultas & arietes aureos admoturus sit, & qui in felicitatis parte reputare possint, quod nulla, etiamsi maxime velint, auri per malas artes congerendi sibi occasio sit. Quare & de me ipso omnia honesta polliceor, & pro omnibus, quos subsellia illa occupare videtis, sponforem me interpono, qui, quantum ex vultibus illorum auguro, facile me indemnem præstabunt. Illud tamen hic dissimulare nequeo, si viveret nunc Majoragius,

nostrum fato delatus in ævum,
 novos illum mangones & auri aucupes etiam, in Musarum regno deprehensurum. Est enim Sophistarum genus, qui cum Græculis esurientibus omnia se scire jactant, in cælum ipsum, si aurum ostenderis, ituri. Hi omnes disciplinas & artes, quantum illarum est, quas vel nunquam vel male didicerunt, ubi a regia via prius juvenes abduxerint, ἐκ Διὸς δέλτων se tradituros pollicentur, ut brevissimo tempore, tanquam aurea Abaridos sagitta, per amplissima scientiarum spatia circumducantur. In temporis enim compendio omne lucrosæ artis præsidium est, ut breviori circuitu messes illæ aureæ in orbem redeant. Sed longe illis stultiore juvenes ad obvolutum esca hamum certatim accurrunt, & ab his Pantominis decipi auroque suo emungi cupiunt, vel novo postea auro artem dediscendi redempturi, vel fera ac inutili pœnitentia præcipitem stultitiam luitu-

ri, aut, si istis scopulis adhæserint, novo postea ignorantia præsidio rempublicam beaturi. Verum hos cum magistris discipulos sibi sapere, vel, ut rectius dicam, delirare & libenter miseros esse, jubeamus. Cæterum ab omni ævo duum generum homines eruditi fuere, quorum aliqui omnem suam, si quam habent, sapientiam in quæstum convertunt, institoribus in republica literaria non dissimiles, qui vel foro vel aliis hominum necessitatibus operas suas addicunt. Plerique eorum intra illos carceres, quos rei familiaris amplificandæ & auri congerendi industria illis præscribit, subsistunt, neque mundi intelligibilis curas ad se pertinere arbitrantur. Sunt alii, qui vel tenui vel mediocri stipendio, cui tamen multi etiam invideant, conducti, bonæ doctæque mentis ornamenta unice sectantur; iis tenebras juvenum animos imbuunt, vel aliquid, quod ad posteros duret, cum valetudinis rei que familiaris detrimento commentantur. Quantillum est, si cum cæterorum talentis contuleris, quod illi lucrantur, quibus liberi sæpe in spem esuritionis educandi sunt. Fuere illa secula, cum oratoribus talenta in mercedem constituerentur; cum statua e solido auro ponerentur Gorgiæ Leontino; cum viginti talentis orationem unam venderet Isocrates; cum Sannazario pro sex versiculis sexies mille aurei darentur. Nunc miseri poetae & oratores, etsi toti aurei sint, aureaque carmina scribant,

non

non nisi aurum Platicum & poeticum pro
præmio reportant, quod nescio quomodo vo-
laticum est, neque manibus palpatur, neque
oculos, cum ne oculis quidem apparet, imple-
re potest. Quamquam & sæpe plumbeos, vel
potius luteos, versiculos nummis aureis à ma-
gnatibus honoratos viderim, quibus Catullus
illud suum:

O seculum insipiens & inficetum!
merito acclamaret. Adeo omnis illa Poetarum
fortuna non aurea, sed vel plumbea, vel vitrea
est, quæ vel pedibus conculcetur, vel inani fra-
gilique splendore refulgens aureos illos Phœbi
radios, ne in aurum densius constipentur, vel
transmittat, vel reflectat. Vivebat superiori se-
culo, cum literæ primum e longo illo veterino
excitarentur, ab orco quasi in vitam revocatæ,
Franciscus Philelphus, vir doctus, non exigua
e literis elegantioribus famam consecutus,
ut & Equitis aurati & Poetæ laureati titulos re-
portarit, non Martius tantum, sed & Pegasius
Apollinis eques; quem eqvestribus titulis or-
nari, summum hodie scelus esset & immanis
injuria. Sed bono illi Equiti tota pedestris for-
tuna fuit, & quæ præterea misere claudicaret.
Adeo enim auratus ille omni auro caruit, ut
post obitum, nisi omni illa tenui supellectile
culinaria prius vendita, non esset, quo terra
conderetur. Quare ex isto celebratissimorum
vatum numero svavissimus ille Joannes Secun-
dus in illa Pecuniæ regia, quam aliquando in
fo-

somniis vidit, graphiceque descripsit, Poeta
ipse præstantissimus, unum tantum alterumque
Vatem in isto comitatu vidit, sed qui, ut
ait,

longe prius abjecere Poeta

Squalentem vafri faciem, crinesque tiara

Laurigeros vel Punico texere galero,

Mentitaque Deum taciti sub imagine fallunt.

Nihil ergo reliquum est, quam ut cum ipso
in justissimas has querelas erumpamus:

O Vatum gens infelix, frustra que profani

Contemtrix populi, frustra nutrita sub antris

Pieriis, frustra choreis admissa Dearum,

Lucrorum roseis in vallibus antiquorum;

Si vobis infesta manet Dea maxima, cujus

Concussus sceptro terræ tremit orbis, & omnis

Regia turbata mugit procul Amphitrites.

Fugit nescio quomodo aurum philosophorum
& poetarum consortium; amplexibus se illo-
rum subtrahit, quibus tamen nemo innocentius
aurum tractat; fugit illud migratque

illuc, unde negant redire quicquam,

scilicet in Euclionum arcas, in æruscatorum,

in piratarum & nundinatorum forensium lo-
culos.

Nunc quoque ipso illo momento dul-
cissima illa AURI IMAGO, quæ tota hac ora-
tione oculis animoque obversabatur, sive illam

Majoragii mihi manes in miserint, sive alicun-
de è civitate Solis ad nos advolarit,

Prensantem ne quicquam umbras & multa vo-

lentem

*Dicere deseruit, tenuesque recessit in auras,
Par levibus ventis volucrique simillima vento.*
Quandoquidem ergo omnes illi dicentis spiritus obtorpuere, quid nunc restat, quam ut omnem hunc de auri laudibus sermonem ab-rumpam? Quod faciam, si prius vos, Patres Civesque Academici, mea, quæ ad exitum tendit, oratione compellavero. Vos quidem, Patres conscripti, eo loco non estis, ut montes aureos vel talenta cumulare queatis; sed mediocri fortuna contenti, sapientiam, qua divinam, qua humanam, quæ omni auro potior est, profitemini. Hujus si mercedem dignam expectatis, fallimini: nam illa inæstimabilis est; si laboris vestri solatium, habetis Principis optimi liberalitate, quo vitæ necessitates sustentetis. Et fuerint forte nonnulli, qui, si sibi regnum daretur, vos illo, quod mentibus vestris insitum est, auro cum Platone contentos esse jusserint; hos sibi sapere, sibi rapere permittite, de illorum vel aurugine vel æruginе securi. Sint multi, statux illi apud Danielem non absimiles, qui cælo capitâ alta & aurea ferentes, æratum pectus habeant, ferreos pedes, quibus omnia, luto voluptatum immergi, conculcent. Sint sæpe plumbei homines, plumbeis meritis, qui auro, qui beneficiis obruantur. Vos in virtute vestra, in recte factorum conscientia, & in incorrupto orbis eruditi & posterorum judicio confidite, qui bene meritis præmia, mortuis immortalitatem
non

non denegabunt. Vos vero, ô Juvenes, quorum animi in illa Promethei officina nunc primum excoqvuntur, videte, ne lingua tantum aurei sitis,

introrsum turpes speciosi pelle decora;

sed quomodo animos, quomodo mores aureos habeatis, discite, ut perfectam illam elementorum contemperationem, quam in auro prædicant Philosophi, exprimatis, ut nihil in vobis subæratum sit, ut denique totos vos aureos exhibeatis. Varia enim ingeniorum natura & indoles est: sunt ærea, ferrea, plumbea, sunt denique vitrea, quæ non nisi splendore & tinnitu, id est; inani fama & loquacitate levibus ingeniis æstimantur. Vos vero, ut ad auri naturam accedatis, operam date; cuius vel ipsum Germanicum nomen vobis ad virtutis viam facem accendit. Ex illo si una absit liquida litera, bonitatem vobis illud, imo ipsum DEI nomen spectandum exhibet. Liquida, vero litera, voci huic immersa, charitatem illam in vobis excitabit, qua aurum hoc in egenos diffuat, ut & coram hominibus lux illa aurea luceat, atque adeo ipsi Deo ad sacrificium præbeatur. Ipsa quoque auri natura & indoles aurem vobis pervellit: cuius cum exigua pars in amplissima spatia distenditur, vos, ut virtus vestra se totam ad alienas utilitates porrigat & explicet, admonere videtur. Quare, ex sanctissimi Salvatoris præcepto, vel cum injusto Mammone amicitia vobis contrahenda

da est, ut piorum hominum necessitates vestrarum opum ubertate fulciantur. Quod nisi feceritis, vereor, ne in illum locum perveniat, ubi auro illo potabili, quo Crassus a Parthis exceptus fuit, excipiamini. Quod si divini præcepti nostræque doctrinæ memores aliquam etiam auri partem in Dei gloriam erogabitis, in miseros fratres derivabitis; cœlestis illa Civitas, quæ tota auro strata, aureis mœnibus cincta, ædibus aureis exstructa, vos, hic in terris justos auri possessores, illic perpetuos aureæ sedis inquilinos expectabit.

M. ANTONII MAJORAGII
PHILOCHRYsus
SIVE
DE LAUDIBUS AURI
O R A T I O

Qua omnis generis hominum, præ-
cipue Ecclesiasticorum, vitia false
traducuntur.

Inter *avēndora* Autoris Mediolani reperta,
& Ultrajecti ANNO clb Ibc LXVI
primum edita,

nunc recusa,
cum præfatione

D. G. M.

SUIS IN ELOQUENTIA AUDITORIBUS

S. P. D.

DANIEL GEORGIUS
MORHOFIUS.

Quam optimus dicendi magister Aristoteles enthymematum doctrinam tradidit, eam compendio quodam vobis, Auditores optimi, me proposuisse meministis. Nemo illi in hoc doctrinae genere praefendus est: neque alium sibi in hac via ducem elegit Tullius, qui omnium sapientum judicia omne eloquentiae regnum occupavit. Nam Aristotelicum & Isocrateum aliquid, spretis vulgaribus praeeptionibus, in Oratore suo se expressisse ipse gloriatur. Quare, qui hos Duumviros, Aristotelem & Tullium, illum in praeeptis, hunc in exemplis & praeeptis, sibi non proponit, nae ille, quid sit eloquentia, omnino ignorat. Utriusque praeepta commentariis ita ornavit praestantissimus vir, M. Antonius Majoragius, ut nova perfudisse luce videatur. Quid enim ejus in libros Rhetoricorum Aristotelis, in Oratorem Tullii, commentariis plenius & perfectius, quid politius est? Quorum vix memoria hodie in Rhetorum scholis superest, non fontes hos nitidissimos, sed putidas novorum hominum lacunas, consectantium. Erat vero Majoragius accerrimo vir & divino ingenio,

U

non

non ad docendum tantum comparatus, sed & in dicen-
do ita promptus, ut suæ ætatis oratores præcipue τῷ ἐν-
δυνάμει superaret. Extant præclara ingenii
ejus monumenta, & in brevi isto vitæ spatio (nam qua-
dragesimum ætatis annum vix implevit) adeo numero-
sa, ut ipsum annorum numerum excedant, si in lucem
edantur, quæ in doctorem Virorum bibliothecis deli-
tescunt. Pauca enim illa, quæ typis divulgata sunt,
præter orationes nemini incognitas, vix ab oblivione
vindican- tur. Sed & orationibus ipsis desunt nonnul-
le, certo, ut autumo, consilio omisse. In his est au-
tea plane de laudibus Auri oratio, quæ Philo-
chrysus ab ipso inscribitur, adeo lepida, adeo sal-
sa, ut nihil elegantius, nihil in hominum mores acri-
us, scribi posset. Sub auri enim laude ipsos Ponti-
fices, purpuratos Patres, & Religiosorum ordines, non
oblique tantum pungit, sed & stricto gladio aggre-
ditur. Unde facile subolet, qua de causa vel ab ipso
Autore vel aliis suppressa sit; ne videlicet vel in mole-
stias se conjicerent, vel perniciem capiti suo arcesse-
rent. Hinc factum esse existimo, ut Catalogo operum
Majoragianorum, qui commentario in libros Rhetori-
corum Aristotelis premittitur, in postrema editione
expungeretur hæc oratio, cujus tamen in Catalogo pri-
oris editionis mentio facta fuerat. Eruit illam e-
schedis Autoris diligentissimus talium deliciarum in-
dagator, ὁ νῦν ἐν αἰγίοις, Marquardus Gudius,
cujus e bibliotheca illa Ultrajecti Anno M DC LXVI
prodiit, ista tamen exemplorum paucitate, ut frustra
nunc in officinis quarantur. Quoniam vero, ut in
veteri verbo est, δὲς καὶ τοῖς τὰ καλὰ, ne mire-
mi-

mini aurum, quod inter τὰ καλὰ principatum tenet, ejusque laudes, iterum à me produci. Illam ego orationem nostræ, ut puto, ætati nostrisque moribus convenientissimam, vestro, Auditores optimi, nomini inscribo, ut encomiastica orationis, in re omnium votis desiderata, insignem hunc typum habeatis: cujus ego artificium lectionibus publicis ostendam. Quod cum facturum me promitto, veminem e vobis fore arbitror, qui non aureis illis promissis excitetur. Quis enim non ad auri nomen aures arrigat Pamphilus? quas non sine causa patentissimas Midæ affinxerunt Poetæ; quod non solum auri tactu manus, adspectu oculi, sed & aures suavi hoc nomine saturentur; aliquid certe auro affine, vel ipso vocis sono, acutioribus Grammaticis habere videantur. Saltem imbre verborum aureo auribus vestris influet hæc oratio; cum ipsum aurum, simulac in manus deponitur, aut è longinquo ostenditur, mirifice animis hominum irrepit, & omnium enthymematum fulmina & pondera fulgore suo antevertat. Nam si gemmæ & metalla quibusdam Naturæ consultis per solam irradiationem vim suam in corpora exercere creduntur: cur non eandem auro in expugnandis animis vim inesse credamus, ut mirabili illa luce mentes nostras fascinet & constringat? Multa auro licent, in seculo præsertim hoc ferreo, in quo & ferreæ frontes & ærata petora aureis manibus facile succumbunt. Omnia enim ad se sacro quodam magnetismo rapit aurum, ut nulli unci ulli harpagones fortius trahant, & illa Jovis aurea catena omnis Civitatis sphaera convolvi videatur. Quare non sine causa in hymnis suis ἀπ' αὐτῶν τοῖς

χρῶν αὐτῶν aurum vocavit Orpheus, & divinus ille
 Plato in animorum fabrica potiozem auro locum tri-
 buit, ut vel ideo ob cognationem radiis auri mentes
 nostræ quasi in occursum ferantur. Lux enim auro
 concreta esse videtur, quæ per hunc orbem, atque a-
 deo mentes nostras, radiis dispergitur. Sunt qui so-
 lis ipsum corpus, vel ex auro fuso, vel nobiliore Che-
 micorum tinctum, constare arbitrantur. Qui si a-
 liquid è vero vident, ac calor solis per orbem terra-
 rum sparsus ad viscera etiam nostra penetrat; quis
 neget jam illius amorem ab ipsa natura inspirari, &
 aurum jam non amplius per translationem sangui-
 nem mortalium, sed ipsum sanguinem verum aurum
 vocandum? cum & sanguis ab auri colore non mul-
 tum discedat, sed purpura tincturæ aureæ æmula
 ipsum aurum antecedit. Non dicam nunc de iis, qui
 omni auræ inesse aurum nescio quibus argumentis per-
 suadere laborant, ut jam minime illa in aëre piscatio in-
 ter stulta opera referenda sit, nosque, cum auro vesci-
 mur, ut Poëtæ loqui solent, ipso vesci auro videamur.
 Sed nos ad Majorugium nostrum redimus, ne in mes-
 sem ejus auream falces nostras mittamus, qui jure quo-
 dam suo aures nostras oculosque sibi postulat. Nus-
 quam mihi elegantior ille, quam in laude luti & au-
 ri visus est. Illa inter editas ejus orationes compa-
 ret: hæc à me nunc luci redditur. Ac sane gemi-
 narum rerum laude quodammodo philosophari mihi
 visus est noster, qui universam rerum naturam, qua-
 tenus missioni illa subjacet, à primis rudimentis ad
 extremum ejus complementum complectitur. Nam

Et à congenere sibi luto aurum in naturam illam compingitur, ut nos docent, qui arcana hæc profundiore ingenio rimantur. Ille vero non in luto suo minus quam in auro aureus est. Quanquam erunt fortassis, qui auro, utut rudi, gravari, quam luto, utut erudito, conspergi malint. Sed tamen Et hoc luto si arum habet, ut Et os multis oblinat, Et multorum animis luto ac pice ipsa tenacius adhareat. Quod ne vobis contingat, etiam hac oratione cavebitur, quæ salibus suis Et aqua quasi chrysulca facile, quæ adhaferint, sordes eluet, Et innocentius vobis auri desiderium instillabit. Valete. Dab. è Museo meo, sub finem feriarum Canicularium Anno clb lxx xc.

M. ANTONII MAJORAGII
PHILOCHRYsus, SIVE
DE AURI LAUDIBUS
ORATIO.

C. 13. **S**I quid unquam, Proceres, in dicendo amplissimum, summaque attentione dignissimum, vobis audiendum esse censuistis, nunc adeste animis & favete lingvis, omnemque animi, si quam habetis, molestiam deponite, ut hanc, inauditam quidem antehac & inusitatam, sed ut spero jucundam, orationem meam audientes, mentes vestras mecum pariter exhilaretis. Non enim aut ex Philosophorum disputationibus res aliquas severas, tetricas, & horridas, quales post diuturnas animi trutinationes pallecentes eructare Stoicos decet, ut ex Jurisconsultorum litigiosis & controversiarum plenis commentariis, somnium aliquod vobis exponendum asserimus; sed ex omnium fere nobilissimorum ac vestri similium hominum opinione ac sententia depromptam orationem, quæ tanta vos oblectatione, jucunditateque repleat, ut, quæcunque dixerò, plane aurea fuisse judicetis. Nam quo potissimum alio nomine, quæ mihi de auro dicenda sunt, significantius appellem, profecto non invenio. Jam video Proceres, ex vobis plurimos ad auri nomen erectos & attentos, ad hi-

hilaritatem vultu composito conticeſcere, & aſpice, ſi quid vobis aureum afferam, expectare. Verum ne fortasſe ſpes, quæ pleroſque mortales ludificari ſolet, vos etiam fallat, bene intelligite quid pollicear: non enim dixi me vobis huc aurum attuliſſe, ſed ejus eximias ac prope divinas laudes velle commemorare. Quæ tametſi vobis ita notæ ſint, ut nihil unquam melius edidiciſſe videamini, tamen, quia nunquam publice (quod ſciam) aurum fuit in concione laudatum, hac inſolita dicendi ratione credo vos ita relaxaturos atque recreaturos animos veſtros, ut nulla unquam vobis oratio ſvavior aut jucundior fuiſſe videatur. In qua primum illud a vobis, Proceres, deprecabor, ut, quoniam vos frequentiſſimos ad hanc concionem meam concurriffe video, nemo veſtrum aut obſtrepat, aut diſcedat, priusquam hujus inſtitutæ orationis finem audierit. Non enim dubito, quin, ſi veſtros animos diligenter adverteritis, non tantum quæ primo loco dixero, ſed etiam quæ poſtremo, vobis & gratiſſima ſint futura, & maxima vos admiratione repletura. Ac mihi quidem, cum ad auri præſtantiam & amplitudinem mentem refero, parum abeſt quin hoc tantum oneris, quod ſuſcepi pene viribus meis impar, veniat in mentem deponere; cum autem ad humanitatem & modeltiam veſtram oculorum aciem reflecto, quæ tanta eſt, ut, ſi quid etiam fortasſe minus oratione dignum effudero, facile ignoſcat, iterum

me ipsum colligo, vobisque me injurium esse judico, si tam dignam auribus vestris orationem, & rei tam præclaræ laudes, prætermittere animum induxerim. Sic enim existimare debetis, non me vobis rem aliquam cæteris similem, sed toto genere longe præstantem, exornandam huc attulisse, quæ nulla unquam, neque major, neque amplior, neque magis ab omnibus omnium ordinum hominibus expectanda fuerit. Quid enim auro præclarius? quid utilius? quid pulchrius? quid amabilius dici aut excogitari potest? Verum, ut inde oratio mea profiscatar, unde principium aurum habuisse compertum est, de prima ejus origine mihi primo dicendum esse existimo, quod dum facio, quæso vos, ut hætenus fecistis, diligenter attendite.

Rerum omnium procreator atque rector & gubernator Deus, cum Divinæ mentis capacem hominem initio mundi fabricasset, ne sine duce, forte passim belluarum more vagaretur, & nullam cum genere suo societatem, nulla commercia, nullos contractus haberet, rem etiam multo diviniorum, quæ animum atque mentem hominis regeret, & quocunque opus esset impelleret, invenire voluit. Itaque ex purissimis aquæ, & terræ, parentis omnium, medullis aurum, fulgentissima atque exoptatissima specie, sicuti nostis omnes, conformavit. Quod quanto ex puriori atque nobiliori materia quam cætera conflatum est, tanto etiam re-

li-

liquis omnibus, quæ procreata sunt, excellentius, ut paulo post intelligetis, atque divinius est. Videbat enim omnia prævidens atque præfentiens Deus, nisi mortalium mentibus aurum tanquam aurigam dedisset, quod eas quasi freno cupiditatis coerceret, futurum, ut a recto tramite aberrantes, non aliter atque indomiti ac præferoces equi, non tantum in genus suum, sed etiam in auctorem & parentem insurgerent. Quod quamvis ab immortalis Deo tempestive provisum sit, terrigenas tamen Gigantes accepimus tam immane scelus tentare non exhoruisse, ut aurum, tam præclarum & tam admirabile Deorum munus, aspernati in ipsum Deum ferocitatem suam converterent, atque illum de cælo atque de sede sua deturbare conarentur. Sed postquam divum pater atque hominum rex ob insanos illorum tumultus horrenda fulmina jaculari coactus est, tanto dignas scelere pœnas pependerunt. Namque alius sub Inarime Campana, alius sub Ætna, Siciliensi defossus jacet. Qui si auri nobilitati contenti novas res moliri non aggressi fuissent, illius ætatis aureæ, quæ paulo ante præcesserat, participes esse potuissent. Nam post aurum procreatum Deus optimus maximus humanum genus, quod ipse formarat, ab incommodis omnibus, quantum in se fuit, incolume conservare voluit. Quam rem cum aurum facillime præstare posse intelligeret, maximam auri copiam illius ætatis hominibus liberalissime con-

cessit. Itaque felix illud atque beatum seculum, quod primum omnium a Deo conditum fuit, ab auro deduxisse nomen accepimus, ætatemque illam primam, singulare eximiaque felicitate conspicuam, id quod omnibus fere notum est, *auream* fuisse nuncupatum. Cujus quidem ætatis laudes cum omnem dicendi facultatem exsuperent, & cum nemo fere sit tam rerum ignarus, qui non earum partem aliquam vel ipse legerit, vel alios narrantes audiverit, non est animus studiose persequi: quoniam ad ipsius auri laudes enumerandas mea festinat oratio; tametsi quicquid de illa felicissima ætate dici potest, id totum ad auri laudem pertinere videatur, cum totius ejus felicitatis atque beatitudinis aurum fuisse causam nemini dubium esse possit. Itaque facere non possum, quin aliqua saltem quasi per transennam ab aliis commemorata de illa ætate recenseam. Sic enim Poeta noster ingeniosissimus in primo Transformationum libro de illa suaviter cecinit:

*Aurea prima sata est ætas, quæ vindice nullo
Sponte sua sine lege fidem rectumque colebat.*

*Pœna metusque aberant, nec verba minantia,
fixo*

*Ægre ligabantur, nec supplex turba timebat
Judicis ora sui, sed erant sine judice tuti.*

Et quæ multa divinitus ab eodem Poeta sunt ibidem decantata. Sed forte melius Hesiodus, quem hic noster imitatus est: cujus verba liben-

bentissime recitarem, nisi scirem, multos ex vobis non libenter Græcari solere, nisi forte in conviviis. Quamvis autem transmarinam illam: Venerem Latinis auribus reddere difficile sit, tamen ut ab omnibus intelligatur Hesiodi sententia, dabo operam, Proceres, ut saltem crassius & clarius eam interpreter. Sic autem commode reddi posse videtur:

*In primis genus humanum, cui nomen ab auro
Formarunt Divi cœlestia tecta colentes.*

*Quippe homines illi, Saturno rege, fuerunt
Ut divi, queis nulla animum mala cura preme-
bat.*

*Non gravis ærumna, aut illos morosa senectus
Aut labor urgebat: similes plantæque manus-
que*

Semper, & addebant alacri convivia mense.

Expertesque mali soliti decedere vitæ,

*Ac velut a somno domiti, illis optima quæque
Semper erant.*

Quantum igitur ætas illa aurea felicitatis habuerit, ex his versibus intelligere facile poteritis, Proceres, cum audiat is ejus temporis homines toto vitæ suæ curriculo non, ut nos, in plurimis miseriis & calamitatibus, sed tanquam Deos immortales vitam omnem suam in summa animi tranquillitate degere solitos, ac non solum nulla rerum necessariarum oppressos penuria, verum etiam in maxima rerum omnium copia atque abundantia fuisse, nullam unquam curam, nullum laborem, nul-
las

las ærumnas, nullam denique senectutem, pertulisse: quicquid gaudii lætitiæque dici aut excogitari potest, illis semper adfuisse, & cum hac tam felici tamque beata vita longo tempore floruissent, dulci tandem ac suavi somno domitos vitæ suæ diem solitos fuisse claudere. Quid illa felicitate beatius, quam nulla unquam tristitia diminuit? quid fortunatius, quam ne mortem quidem sentire venientem, omnium ordinum mortalibus fato destinatam? O fortunatos nimium homines, si bona sua cognovissent! Nam posteaquam auro non contenti, quasi majorem possent efficere felicitatem suam, argentum & æs & ferrum effodere cœperunt, heu calamitosam ac miseram sortem! ab illa tanta beatitudine deciderunt. Itaque propter insanos hominum conatus & insatiabilem cupiditatem effectum est, ut ætatum & conditiones & nomina semper in pejus ruerent, ac retro sublapso referrentur: nam post illam prorsus felicem ac beatam, de qua diximus, *auream* ætatem, multo æstimatione & fortuna minor *argentea*, deinde hac etiam deterior *ænea*, postremo omnium pessima *ferrea* subsecuta est. Quæ quantis malorum fluctibus abundet, cum omnes intelligatis, quid me opus est commemorare? cum præsertim hanc orationem meam, ut initio pollicitus sum, non tristem aut severam, sed amœnam ac jucundam, esse velim. Sed cum hujus ferreæ ætatis homines maximas & gravissimas longo tem-

pore calamitates experti fuissent, tandem errorem suum agnoscentes totis viribus in pristinam illam atque auream ætatem remigare conati sunt. Hinc adeo factum est, ut pueri, juvenesque, senesque, & omnes denique cujuslibet ordinis homines, omni studio, cura, diligentia, toto corpore, atque omnibus (ut ajunt) ungviculis, quantum possunt auri congerere studeant. Existimant enim futurum, ut, si labore atque industria sua maximam auri vim compararint, in pristinam illam ætatis aureæ beatitudinem aliquando revertantur. Sed sero, dicitur, Cumani sentiunt, & Phryges sapiunt. Rara est enim eorum felicitas, qui sibi tantum auri comparare possint, ut ad ejus ætatis conditionem proxime videantur accedere. Sed ut omnibus, qui præstantissimum hoc, sive Deorum immortalium sive parentis omnium naturæ, munus omni studio sibi quærendum esse arbitrantur, ostendam, quam divinam, quamque rebus aliis omnibus anteponendam, rem expetant, paulo diffusius auri laudes explicare constitui. Nam optima quidem res aqua est, sed aurum, ut splendidus ignis nocturno tempore, magnificis longe divitiis claritate præcellit. Hæc est sapientissimi Poetæ Pindari divina sententia, qua nobilissimas illas cantiones suas exordiri voluit, omnibus, ita me aurum bene amet, & muris & parietibus inscribenda. Quid enim auro divinius esse potest? Hoc vix dum nati pueri tractare

re gestiunt, hoc incipiunt adolescentes admirari, hoc juvenes unum quam fieri potest avidissime congerunt; ipsi vero longo rerum usu periti senes hujus studiosissimi sunt, & omni cura atque diligentia custodiunt; hoc nunquam, nisi maxima coacti necessitate, manibus suis elabi sinunt. Ex quo profecto facillime intelligi potest, quanta sit auri præstantia: cum seniores homines, qui longæ ætatis beneficio rerum fere omnium naturam præclare intelligere potuerunt, hoc unum ex omnibus elegerint, quod ament, quod colant, quod observent, quod denique omni diligentia sibi custodiendum existiment. Quod cum faciunt, meo quidem judicio, sibi ac rationibus suis optime consulunt. Nam quanto ad acquirendas opes ætas illa senilis infirmior est, tanto justius est, eos, qui senio confecti sunt, ad aurum conservandum in usus vitæ necessarios majorem curam adhibere.

Sed jam diligentius & accuratius de singularibus auri laudibus sigillatim edisseramus. Primum igitur mihi videtur de ejus nobilitate, deinde de potestate, tum de felicitate, quam affert hominibus, esse dicendum. Tanta est enim ejus nobilitas & excellentia, ut quædam mihi maxima dicendi facultas, quæ solet iis adesse omnibus, qui in alicujus rei exornatione versantur, exepa esse videatur. Omnes enim qui rem aliquam egregiam laudare contendunt, unam aliam, aut parem aut non ita multo

to minorem, inveniunt, quam cum ea quam exornant conferentes ostendant, quanta sit, inter eas differentia. Qua certe rerum collatione maxime crescit & efflorescit oratio. Nam ut purpura, quod ajunt, juxta purpuram optime dijudicari solet, & ex unius purpuræ collatæ vitio virtus alterius clarius enitescit: sic in omnibus rebus ex similium comparatione, quid in aliqua potissimum excellat, facile dignoscitur. Sed quid ex omnibus ego, quod cum auro conferri possit, inveniam? Quid est, in omni rerum universitate, tam eximium, aut tam admirabile, quod, si cum auro comparetur, non statim vel deterrimum esse videatur? Ponite, ante oculos ignem aquam, quibus omnium animantium vita maxime continetur, quis non confestim judicet, aurum esse longe præstantius & excellentius? hæc tamen illa duo sunt elementa, quibus omnia, quæ vivunt, acceptam vitam referre debent; quibus præter aurum nihil magis est necessarium. Unde quidam non inscite vulgatum illud proverbium ita pronunciare solent: aurum aqua & igne magis necessarium. Olim etiam exilio damnatis aqua & igni solitum interdici fuisse legimus, propterea quod his duobus elementis omnia putabant humanæ necessaria contineri. Nec injuria: nam ex fumorum Philosophorum sententia ab aqua & igni cuncta procreantur, quod etiam Ovidius affirmat:

Quippe ubi temperiem sumfere humorque, calorque,
Con-

Concipiunt & ab his oriuntur cuncta duobus.

Horum igitur elementorum alterum propter nobilitatem jam olim cœlo receptum est, summaque locum sibi legit in arce; unde etiam sideribus ac stellis universis lumen præstare creditur. At vero aurum supra Jovem etiam ipsum, & omnes alios Deos, jampridem ascendisse manifestum est; quo fit, ut a plerisque mortalium pro summo Deo colatur. Aqua cæteris omnibus videtur elementis imperare, nam terras inundans eas absorbet, ignis impetum superfusa penitus extingvit, ipsum etiam cœlum atque aerem sibi vendicat. Sed illud multo mirabilius est, aurum omnia dignitate superare, omnia ditioni suæ subjugare, mortalium etiam mentibus, quibus nihil est in terris divinius, dominari: non privatos solum, sed etiam Reges, & Imperatores, & Pontifices suo arbitratu regere, & quocunque velit impellere: tristitias omnes e cordibus hominum eximere, summasque lætities secum semper apportare. Quid quod ipsum etiam cœlum, ut non sine causa sapientissimi viri Poetæ scripserunt, aurum aliquando penetravit, & ibi omnia suo nomine decorata voluit aurea nuncupari, quoniam nullum nobilibus nomen inveniebatur. Jovem autem in auri pluviam conversum cœlum ultro relinquere, in terras descendere, turres irrumpere, in amicæ gremium fluere coegit. Quid horum simile fecit unquam ignis aut aqua? Quid? an, quemadmodum auro, sic

a.

aqua & igni possunt omnia redimi? Quis tam rerum ignarus est, tam insipiens, tam stultus, qui potius aquam aut ignem quam aurum habere velit? quis pro aqua & igni, sicuti pro auro, maxima quæque pericula adeat? quis non auri talentum malit, quam ignis quantum Em-pyreum cælum continet, aut aquæ Atlanticum mare? Vincant igitur ignis & aqua nobilitate & virtute cætera omnia, dummodo ab auro superentur. Nam quis ignorat, ab igni, qui cætera consumit omnia, ne minimam quidem auri particulam perdomari posse? quanto enim magis igne torretur, tanto melius expurgatur, & magis elucescit. Merses illud idem aurum in aqua, multo pulchrius eveniet. Illud autem multo manifestissimum & apertissimum est argumentum, aurum rerum omnium esse nobilissimum & præstantissimum: si quis enim affatim aurum possideat, quæcunque alia voluerit, facillime sibi comparare poterit; at contra, si quis cæterarum omnium rerum copiis affluerit, non ita facile magnam auri vim comparabit. Non est igitur quod diutius in collatione rerum commorer, cum nihil prorsus ex omnibus, imo neque omnia simul auro conferri digne posse videantur. Neque enim monstrosas illas contentiones mihi refellendas esse censeo, quibus inepti quidam & insulsi homines uti non erubuerunt, qui nescio qua furoris (ut opinor, obcæcati caligine, ferro terram exerceri, vites amputari, domos

exædificari, construi Deorum immortalium templa, finibus nostris hostes arceri, securam per ferrum hominibus vitam præstari, & omnibus denique humanis usibus utile ferrum esse; cum interim (si credendum eis est) aurum ad nullum horum idoneum aut aptum inveniatur. O nimium dignos homines, si tamen homines sunt, & non crassæ potius pecudes; qui ferro isto suo multum abundant, aurum vero non modo nunquam possideant, sed ne quidem quantum valeat agnoscant. Quis enim agricolam quotidie terram exercentem, & ruri miseris modis habitum, domino fundi censeat esse præponendum? Quis materialios artifices, & hujusmodi viles & abjectos homines, regibus & imperatoribus censeat esse nobiliores, quod hi non sint ad serviles artes idonei, illi vero in hoc artium genere multo cæteris antecellant? Atqui prodigiosi isti rhetores, cum ferrum auro præponunt, longe etiam absurdiorum collationem faciunt. Quis non intelligit omnium eorum, quæ ferrum efficit, aurum esse dominum, nonne? quicquid a ferro longissimo tempore fieri potest, si præsens aurum fuerit, temporis momento possidebit? quis adeo stupidus est, qui nesciat quam paucis auro quanta ferri massa commutetur? Sed næ ego dementior, qui in tam apertis ineptiis refellendis tempus frustra conteram. Unum est, (ut verum fatear) unum in omni rerum natura, quod auro præ-

præter cætera proximum esse videatur; sed tamen longo proximum intervallo. Id autem argentum est: cujus maxima certe nobilitas est atque potentia, ut auri vices frequenter obeat, & ad se amandum complurimum mentes allicere soleat. Sed quanto satellitibus rex, & militibus imperator præstat, tanto profecto aurum argento nobilius est. Quod quidem vobis notius esse arbitror, quam ut sit argumentis explanandum. Quare si, quod secundum est, ab auro tantopere distat, quid illi conferendum inveniemus? num virtutem? num gloriam? num famam? num honorem? Quæ post argentum etiam relinquenda esse, nemo vestrum esse qui dubitet, existimo. Nam ut præclare scriptum est ab Horatio:

Quærenda pecunia primum

Virtus post nummos.

Reliquum est, ut, quoniam nihil, huic tam admirabili & præstanti naturæ dono quod digne comparari possit, invenitur, illud per se, quantum dicendo efficere possumus, exornemus: quod omnes præter cætera omnia mirifice diligunt, & ardentissime concupiscunt: cuius causa reliqua universa despiciuntur ac pro nihilo habentur; quod ut acquirant homines, nulla prorsus pericula reformidant: quid? quod divinis atque humanis legibus, quicunque aliquid sapere videntur, antiquius habent: quid? quod ob aurum solum nostris temporibus in honore ac pretio solent homines haberi:

hoc qui possident, soli nobiles appllantur. Age vero, quis non ejus rei miretur excellentiam, qua si careant reges & principes, jam non amplius reges & principes, esse sed mendici, videantur? quæ si cui penitus ignoto & terræ (quod ajunt) filio copiose benigneque affluerit, illum ex humili atque abjecto confestim clarissimum & maximum principem efficere possit? Unde merito dignitatum atque amplitudinum omnium quasi formam & perfectionem quandam aurum appellare possumus: nam eo præsentem cuncta decus atque amplitudinem suam retinent, absente vero statim omnem honorem ac dignitatem amittunt. Jam vero non mediocriter illud etiam admirandum esse arbitror, quod simul atque natum & inventum fuit aurum, non solum omne genus humanum, sed etiam Deos omnes immortales, in sui amorem atque admirationem convertit. Itaque non satis sibi felices esse Dei videbantur post repertum aurum, nisi eo affatim uterentur. Nam & ædes sacras auro potissimum insigniri voluerunt & vehementer sibi placent atque gloriantur, cum suas ex auro conformatas imagines & simulacra conspiciantur. Quid quod etiam in supremo cælo Deorum palatia sedesque omnes esse aureæ dicuntur? Quod Ovidius testatur, cum inquit:

Regia solis erat sublimibus alta columnis

Clara micante auro.

Quod

Quod si quid etiam antiquitati credendum est, illa Græcorum ac Trojanorum tantopere celebrata pugnata, quæ sempiternam Homericæ poesi gloriam comparavit, quæ post homines natos nihil unquam præclarius gestum fuisse legitur, non aliam ob causam, nisi propter auri nobilitatem, exorta est. Quis enim non vel legit vel audivit inter illas tres Deas, Junonem, Palladem & Venerem, propter insigne quoddam aureum pomum, quod pulchrioridebatur, de pulchritudine natam esse contentionem? Cum enim immortales Deæ speciosissimam illam ac fulgentissimam aurei pomi faciem vidissent, ejus amore atque desiderio tantopere exarserunt, ut nihil non sibi faciendum esse censerent, quo voti compotes fierent. Itaque nudæ ante mortalem hominem consistere non erubuerunt, ut ille judicaret quænam esset earum pulcherrima, cuique pomum illud adjudicandum esset. Sed cum ille justissimo judicio secundum Venerem litem dedisset, raptâ postea Veneris ope atque auxilio Helena, bellum exortum est. Cujus quidem rei si vera fama est, nemini dubium esse potest, quin aurum nobilitate cæteris omnibus rebus antecellat, quod etiam Deas, quibus nulla felicitas deest, ad se amandum pellexerit. Sin autem incertum hoc est, & ab antiquis auctoribus confictum, tamen etiam ob hoc ipsum auri nobilitas elucet. Neque enim unquam homines sapientissimi, nisi de re omni-

um pretiosissima atque optima, Deas inter se contendisse tradidissent. Sed quid ego pluribus verbis auri nobilitatem persequor? cum uno tanto argumento, quanta sit, ostendere facillime possum. Aurum enim nobilitate sua non tantum reliquis rebus omnibus, sed etiam Deis ipsis, quibus nihil est excellentius, antecellit. Quid obstupuistis, Proceres, & vestros in rugam vultus contraxistis? An hoc vobis fortasse videtur incredibile? Quid si vobis testibus ita esse convicero? Negatis? At jam faciam, ut aperte fateamini. Primum illud mihi vobiscum arbitror convenire, Deos omnium esse nobilissimos. Si quid igitur invenire poterimus, quod à se ducto nomine totam Deorum immortalium nobilitatem repræsentare possit & æquiparare, nonne illud etiam Deis ipsis nobilius esse judicabitis? Video mihi vos omnes annuisse. Agite ergo, Proceres, attentis animis hæc verba mea percipite: vos enim hodie maxima sollicitudine liberaturus sum, quæ vestros animos, ut ego quidem sentio, continenter & magnopere conturbat. Quamvis enim aurum, sicuti dignum est, plus quam Deos ipsos a vobis amari certo sciam, tamen neque illud ignoro, superstitioso quodam timore vos continenter premi, qui Deos auro putetis antecellere. Verum, quantum ista vos opinio fallat, audite. Hoc nomen *aureus*, quod ab auro deducitur, cum Deis adjungitur, annon omnem vobis Deorum nobilitatem ex-

pri-

primere videtur? annon quotiescunque Deos *aureos* appellamus, aurum Deis excellentius esse judicamus? Quid excogitare præstantius aut magnificentius auctores rerum possunt? qui, cum Deum aliquem vehementissime laudare atque exornare contendunt, non eum alio nomine quam *aureum* appellare consueverunt. Ita *sol aureus* dicitur a Virgilio, & *Venus aurea*, & reliqui Dei pasim *aurei* nuncupantur. An vero ignoratis, Proceres, eam esse laudationis legem, ut aliquid potius laudibus affingatur, quam eis quicquam detrahatur? Nam quid esset absurdius, quam si, cum aliquid nos laudare velle profiteamur, ejus deinde laudes dicendo minuamus? Quare perspicuum est, nos, cum Deos *aureos* nominamus, aurum Deis ipsis esse nobilius affirmare. Quid in cæteris omnibus rebus? Nonne, cum aliquid maxime pretiosum ac pulchrum significare volumus, illud statim *aureum* appellamus? Non est igitur quod amplius quisquam de auri præstantia dubitare possit, cum jam aperte docuerimus, nihil usquam tam pretiosum inveniri, quod auro comparari dignum esse videatur; sed rebus omnibus tam divinis quam humanis aurum antecellere, ab omnibus ardentissime diligi, a Deis etiam vehementer amari, denique longe Deis ipsis nobilius ac præstantius esse.

Dixi de auri nobilitate, nunc de ejus potestate pauca dicam. Neque enim minori potesta-

te quam nobilitate præditum est; sed tam potens atque imperiosum est, ut omnia, quæ in terris, quæ in mari, quæ in cælo nascuntur, ditioni suæ facile subiciat. Quis enim non videt, nihil tam firmum ac munitum esse, quod aurum non facillime possit expugnare? Quis ignorat, auri potestati non modo frumenta, vina, commeatus omnes, prædia, possessiones, villas, sed etiam civitates, atque homines ipsos esse subiectos? Quis non intelligit, aurum quovis fulmine potentius munitissima castella subvertere, saxa perrumpere, firmissimas urbes dissipare, hostes aut opprimere, aut totis finibus exterminare? Quid quod etiam animos hominum, quibus nihil fortius aut sagacius est, ita suo arbitrio versat, ut omnibus in rebus suæ subiciat potestati? Sed de illis, qui aliquid sapiunt, dicam alio loco, Proceres, & ita dicam, ut nihil unquam vos libentius aut gratius audivisse judicetis. Nunc illud videre operæ pretium est, quam miseris modis animum quorundam sui cupidorum, & uti nescientium, quasi ludens aurum afficiat; qui posteaquam magnam ejus copiam per fas atque nefas in arca congesserint, nullam deinde temporis particulam conquiescere possunt, sed dies atque noctes amittendi metu cruciantur; quorum vitæ clarum exemplar in Euclyone sene facetissimus Poeta Plautus nobis expressum reliquit. Hi tritis vestibibus, & terque quaterque sartis calceis, in publicum prodire non verentur:

cibarium tantum panem, aut si quem etiam vilio- rem cibum reperiunt, gustate contenti sunt: si quid forte paulo largius aut latius in hospitis alicujus adventu consumserint, illud inedia postea resarcire student: liberis suis omni studio sordes conantur easdem inspirare: suam vero frequentius arcam solliciti revisunt, atq; in ea sepultos una cum toto corde nummos, quemadmodum Tantalus poma, mirantur & abstinere: solo auri conspectu, non aliter atq; picturam intuentes, oblectantur, neque ullum eis penitus usum tanta auri congesta copia præstat. Interim tamen dolis, astutiis, fraude, calliditate, perjuriis, socios atque amicos auri congerendi causa circumvenire student: denique non famem, non sitim, non frigus, non calorem subterfugiunt, modo aliquid auri corradere alicunde possint, quo tamen nullo unquam tempore persruantur. Hos equidem homines, etiam ab ipso auro (si quis ei sensus inest) vehementer irrideri & contemni arbitror. Cum enim alios omnes adventu suo beatissimos ac felicissimos efficiat, hos omnium solos non modo non felices, sed etiam miserrimos reddit. Sed ad rem nostram redeamus, & exemplis omni luce clarioribus auri summam esse potestatem ostendamus. Quis igitur tam incredulus esse potest, qui divinis literis & sententiis fidem non adhibeat vel maximam? Certe & si qui tam impudentes inveniuntur, qui sacris libris non credere audeant,

vobis tamen maxime providendum est, Proceres, ne, si a vita atque institutis majorum nostrorum, & a Pontificia credulitate religioneque, discesseritis, factiosi atque hæretici videamini. Sed si bene vos novi, huic uni sacram literarum testimonio, quod producturus sum, facilius credetis, quam reliquis omnibus, quæcunque & in antiquis & in novis legibus nostris scripta sunt. Sic enim etiam sapientissimi viri, Sacerdotes, Monachi, Cardinales, Episcopi, Pontifices, omnes denique religiosi faciunt, nec injuria, cum nullis firmioribus aut certioribus exemplis, nec ulla majori auctoritate, potestas auri demonstrari possit, quam sacra Scripturae testimonio, cui non credere maximum est & scelus & dementia. Legite ergo decimum Ecclesiastæ caput; ibi hanc vere auream sententiam invenietis: *Pecunie obediunt omnia.* Quod exemplum clarius, aut quod apertius testimonium, dici vel excogitari potest? Sic enim colligite mecum, Proceres: aurum (ut omnes intelligunt) pecuniarum omnium principatum & quasi regium dominatum obtinet: pecuniis autem omnia (quod nos sacra litera docent) obediunt: ergo non solum universa reliqua, sed etiam ipsas omnes pecunias, auro parere atque obedire necesse est. O patrone mi, aurum, here mi, domine mi. Jam me non pudet tui amatorem dici, & servum esse fidelissimum, tum te tam potens & amplum esse videam. Jam tibi perpe-

petuo servire gestio, cum tibi serviant universa. Tua tanta vis ac potestas est, ut non tantum terras & cœlestem regionem tibi omnem subjicias, sed etiam adamantinas inferorum portas penetres. Quod bene Græcus quidam Poeta, nostri ordinis homo non infimus, animadvertit, cum jambicum illum scriberet:

Χρῦσος δ' ἀνοίγει πάντα κ' αἶδ' πύλας.

Hoc etiam Poetarum principem Virgilium, haud dubie cognovisse crediderim, qui cum secum ipse diutius magnam auri potestatem esset admiratus, quod scelestissimum illum Jovis hospitalis violatorem Polymnestorem tam aperte prodidisset, tandem quasi lætabundus exclamare non dubitavit:

*Quid non mortalia pectora cogis,
Auri sacra fames?*

Sed proli cæcas ac temerarias hominum mentes! Imperiti quidam nimisque audaces literatores divinam hanc summi Poetæ sententiam suis commentationibus invertere ac deturpare ausi sunt; cum enim *sacram* auri famem Poeta noster dixisset, dementes isti Grammatistæ (pudet etiam me tam insignes eorum ineptias referre) *detestabilem* & *execrandam* interpretati sunt. O facinus insipiens & animadvertendum! An etiam, cum *sacros* Deos appellamus, audebitis homines infantissimi stultissimique *destabiles* interpretari? Sed valeant istæ falsæ commentationes vestræ: nos ex ipsius Poetæ factis sententiam hanc aperiamus. An, qui
pro-

propter solam auri famem atque cupiditatem, patriam suam (quod omnes sciunt & ipsemet confessus est) relinquere non dubitavit, eam deinde, postquam voti compos effectus est, detestabilem ausus fuisset appellare? Minime, minime, inquam; *sacram*, id est, *sacro-sanctam* intelligendum est. An, si damnanda esset aurifames, & sitis, & cupiditas, Pontifices nostri, viri omnium sapientissimi sanctissimique, petasati Patres, quos Cardinales vocant, Episcopi, Sacerdotes, Monachi, Bardocucullati, denique religiosorum omne genus, aurum tantopere desiderarent? Non eo dementiæ perventurum quemquam existimo, ut aurum condemnare aut aspernari velit, cum summos nostræ religionis Antistites, atque adeo Monarchas, nihil non auri comparandi gratia moliri videat. Nuper enim quendam amicum meum summa auctoritate, fide, religione virum conveni, qui pridie ejus diei Roma venerat, quæ civitas propter auri cultum atque venerationem, & alias semper, & hoc maxime tempore, omnium sapientissima religiosissimaque judicatur; ubi (quod equidem vehementissime laudo) quam plurimos nostri ordinis summos auri cultores comperiisse se dicebat, qui propter auri desiderium ac amorem plurima patrare non dubitant eorum, quæ istis fortasse fatuis & superstitiosis hominibus scelestæ esse videantur. Sed propter rei tam pretiosæ tamque potentis acquisitionem nihil cuiquam

quam scelestum aut turpe videri debet, cum præsertim aurum ejus esse naturæ perspicuum sit, ut, cum semel ad sese hominis animum atque mentem allexerit, tanquam optimus imperator eam postea regat, atque ita volentem & cupientem imperio suo objiciat, ut nihil aliud quam de se cogitare sinat, nullum rivalem patiatur, reliquarum rerum omnium amorem depellat. Itaque fit, ut auri pulchritudine mens allecta plurimum illi honoris tribuat, eo mirifice delectetur, illi cætera omnia postponat. Quod cum Propertius elegans Poeta cognovisset, auri nomine nescio qua cum animi dulcedine delinitus, quinquies illud appellans, ita proclamare non dubitavit:

Plurimus auro

Venit bonos, auro conciliatur amor.

Auro pulsa fides, auro venalia jura,

Aurum lex sequitur, mox sine lege pudor.

Vult igitur aurum solum imperare, dominari, reliqua omnia, quamvis eximia, ut virtutem, honorem, gloriam, ditioni suæ subjici. Quod mihi quidem justissimum esse videtur. Illud enim verissimum est quod Poetarum pater atq; princeps Homerus sapientissime scriptum reliquit:

Οὐκ ἀγαθὸν πολλοῖσι κυρῖναι, εἰς κοῖραν

ἵστω,

Εἰς βασιλεύς.

Quibus miseriis humana mens affligeretur, si duobus aut pluribus dominis servire cogere-
tur?

tur? Nunc, quæ uni servit auro, creditur esse beatissima. Quare, quod paulo ante dicere cœperam, in florentissima sapientissimæque civitate Romana, quæ quondam imperium orbis terrarum longe lateque tenuisse dicitur, quo tempore ditior etiam auri fuerat, quam nunc est, licet ejus nunquam fuerit amantior, vix unum aut alterum invenietis, qui non omnibus nervis auro servire contendat. Summos enim habent duces, quos imitentur ac sequantur. Nam nostra tempestate sacrorum principes, quos balbutientium puerorum imitatione Pappas appellaamus, cum illius ætatis aureæ sanctissimos mores & religionem perlegunt, adeo sanctitatis ac religionis ardore succenduntur, ut, si liceat ea secula revocare, vehementissime concupiscant, & pro viri parte nitantur, ut saltem domus sua suorumque cognatorum, affinium, necessariorum, auri copia fiat aurea. Quamobrem totos se immergunt auro: quicquid dies noctesque cogitant, id totum aurum est: huic uni student: in hoc vigilant; ad hoc omnibus viribus incumbunt. Quod si fortasse Bacchus lætitiæ dator eam optionem, quam olim Mydæ Phrygum regi dicitur obtulisse, Pappis nostris liberam concederet, illud sine dubitatione summa cum alacritate protinus exclamarent:

Effice, quicquid

Corpore contigero, fulvum vertanuur in aurum.
Et prius (ut existimo) fame tabescerent, quam
con-

conditionem hanc peterent immutari. Tanta est auri virtus & potestas. Quod si forte, proceres, Papparum cubilia, cœnationes, atria, porticus, vestibula, totam denique regiam videritis, tum credo lætitia vobis cor ipsum exultaret. Nihil non auro politum, nihil non magnificum. Quid quod etiam mulas auro stratas videmus? perinde quasi pecudes etiam ipsæ præstantiam auri sentiant. Sed, quibus tandem artibus hoc tantum auri sibi comparent, vobis jucundissimum esset audire, Proceres; namque inde magis etiam auri potentiam agnosceretis, cum videretis illos ab auro regi, quibus omnia divina atque humana regenda tradita sunt. Sed hæc quoniam non admodum ad rem nostram faciunt, ab aliis malo quam a me cognoscatis. Habent quidem Christum in ore frequentissime, qui se auro quodammodo contrarium & paupertatis ducem ac exemplar præbuit, quem si sequerentur, eos in ordinem nostrum admittere non possemus; sed viri sapientissimi memoria tenent, ipsum etiam Christum pecunia proditum fuisse, quod sibi ne accidat, magnopere pertimescunt. Itaque maximos auri cumulos undiq; congerere student, ut, si forte contigerit, eos ab aliquo satellitum suorum prodi, possint auro te quam citissime redimere. Si quis autem roget, ubi fidem habeat, quam sacræ & humanæ literæ tantopere commendant, ut per eam solam nos affirment cœlestem illam ac beatorum sedem,

fa-

facile consequi posse? illud egregium Satyrici Poetæ dictum respondebunt:

*Quantum quisq; sua nummorum servat in arca
Tantum habet & fidei.*

An vobis in hoc damnandi esse videntur? Non opinor; etiamsi quibusdam in cogendo auro paulo cupidiores quam æquum sit esse videntur. Nam & pietatis & Christianæ religionis sæpissime obliviscuntur, & relicta sacrorum administratione bella suscipiunt. Sed omnino mendose reprehenduntur: nam justissima tantum bella gerere solent; nempe contra illos, qui decimas & primitias, quibus sancta sustinetur ecclesia, persolvere nolunt. Hoc Patres sanctissimos, maximeque venerabiles, quibus divino jure primitiæ debentur, non sine summa ratione commovet: neque enim aliter vitam ducere possent. Nam verissimum illud est, quod ait Hesiodus:

*Χρήματα γὰρ ψυχὴ πέλεται δειλοῖσι βρο-
τοῖσι.*

Humano generi namque ipsa pecunia vita est.

Quamobrem etiam inviti bellare compelluntur, ut sacrilegæ nationes, quæ decimas non solventes illis vitam eripiunt, funditus evertantur. Illud fortasse requiretis, quomodo nullis armis, nisi divinis officiis, exerciti Pappæ præliari possent? Cognoscite, Proceres, non enim sine causa quæritis: nam non ipsi prælia gerunt, sed ipsorum aurum; cujus, in armis etiam, sicut in reliquis rebus omnibus, summa

ma potestas est. Jam vero, quemadmodum, summæ res administrantur, si diligenter cogitare volueritis, credo vos facile perspecturos, auri vim esse maximam. Nam in arce religionis auro reguntur universa; nihil ibi speretis, nisi manibus auro gravissimis. Omnia Romæ cum pretio. Qui plurimum auri secum attulerit, is securus esto, se, quicquid optaverit, facile consecuturum. Quod ut facilius credatis, audite quid eleganti carmine Petronius cecinerit:

*Quisquis habet nummos, secura naviget aura,
Fortunamque suo temperet arbitrio.*

Multa loquor, quidvis nummis presentibus opta,

Et veniet; clausum possidet arca Jovem.

Veniat ergo Romam, vel quo magis ei libuerit, bene nummatus, confestim ei regiae valvæ recludentur, eum omnes alacri vultu venientem excipient, ei gratiam & favorem suum omnes & pollicebuntur & præstabunt, brevi tempore dignitates amplissimas, opima sacerdotia, consequetur, plurimum auctoritatis & potestatis habebit. Nec interim, quinam sit ille, quem omnes tantopere suscipiunt, quisquam sibi exquirendum esse cogitabit, summo loco natus an terræ filius, probatis moribus an profligatis, doctrina præditus an a Musis aversus. Hæc jam nihil ad rem facere prorsus existimantur; aurum est quod omnia regit, omnia dispensat, omnia transigit, omnia componit. Illud ve-

ro quamvis fortasse vobis ridiculum esse videbitur, tamen a me in dicendo prætereundum esse non arbitror, quod aurum tanquam Prometheus quispiam imminutas corporis partes restituit. Si quis enim aut altero captus oculo, aut claudus, ut testibus carens, aut quovis alio membro spoliatus, ad sacerdotii dignitatem, aspirarit, quamvis per jus pontificium tales non liceat in sacerdotum numerum aggregari, præfens tamen aurum facile jus pontificium frangit, & membra supplet mutilata. Sed fingite nunc aliquem singulari eximia virtute, præditum, & expolitum omni doctrina virum, qui sacerdos fieri velit, & ei defit alter tantum testium; si aurum illi defuerit, sit Numa licet ille religiosior, Aristide justior, Aristotele doctior, domum sine sacerdotio redibit. Sed hoc (ut dixi) ridiculum; illud vero multo omnium gravissimum & præstantissimum, quod etiam sub terras ad eas animas, quæ torquentur in tartaris, a principibus in religione viris compertum est aurum potestatem suam transmittere, quæ statim eas inde liberet, & ad superos recta perducatur. Nec illa parva auri potestas est, quæ consceleratum quemvis hominem ab omni supplicio pœnaque liberare facile potest, modo manibus auri plenis diploma plumbatum impetravit. Quid quod aurum in annorum multa millia peccandi sine pœna timore indulgentiam facile, cum voluerit, obtinet? Nam præterita scelera non tantum aurum,

rum, sed etiam argentum modicum, duabus aut tribus indulgentiæ bullis coemtis, delere, facillime potest. Verum hæc fortasse silentio præstat involvere, ne quis fatuus aut ineptus, quæ nos in auri laudem dicimus, in Papparum contumeliam dicta judicet. Ad alias potius religiosissimas personas, in quibus aurum jam imperium suum confirmavit, transeamus. Tanta est enim auri vis & potestas, ut, quos ecclesiæ Cardines appellamus, eos labefactatos a propria sede dimoverit, & imperio subjugarit. Qui certe nunc multo melius & stabilius totam religionis machinam sustinebunt, postquam auro fundati sunt. Nam quomodo quæso religionem sustinere possent, si præ paupertate se ipsos sustinere non possent? Illud nimirum nunc operæ pretium scireque est contemplari, cum sublimes per urbem stratis auro mulabus provehuntur, rubra causia conspicui; quam certe fulvam melius effinxissent, ut esset insigne domini sui auri, satellitibus undique stipati, ut ipsis etiam regibus invidiam movere possint, tementibus præ mollitie genis. Atque ut majori auctoritate digni videantur, templa Deorum peniculamentis terram verrentibus ingrediuntur, quod alias, cum multo minus quam nunc homines saperent, vix in mulierculis tolerandum esse videbatur. Inde domum regressi, post Sallares & Sybariticas epulationes, clandestinæ dominæ sinibus excipiuntur. Quas omnes eis

voluptates ac delicias aurum præstare quis ignorat? Jam vero propter aurum eo usque sapientiæ nostro tempore perventum est, ut, quam plurimi summam Tibarenorum & admirabilem doctrinam præclare intelligant, & omni diligentia exercere studeant, quos memoria proditum est in risu & ludo summum bonum constituisse. Nam sanctissimorum Cardinalium domos morionum & aleatorum plenas invenietis, quibus vicissim pro libidine sua delectentur. Præterea nostra tempestate reperiuntur, qui sexcentis Philippeis scortum unum conducere non dubitent. Sed unde illis auri tanta copia? Non aliunde certe, quam ex plurimis & ditissimis sacerdotibus, quæ etiam auro venati sunt: ita aurum ex auro, ut semen ex semine, nascitur & exuberat. Nemini igitur dubium esse potest, auri potestatem esse maximam, qui sacrosanctos illi magistratus tam cupide servire videat. Quid? magis ne difficile est in eis auri potestatem agnoscere, quibus olim cura fuit, sacris initiatos invisere, afflictos consolari, sacerdotum errata, si qua erant, emendare, bonos eligere, malos abdicare? Minime vero. Nunc enim multo majorem nacti felicitatem opima tantum sacerdotia, unde magnam auri copiam hauriunt, invisere solent. Ex quo factum est, ut Episcopi quasi auri exploratores nominentur. Sunt enim mitra bicorni decorati, cujus pars illa prior, quamvis aliud olim significare credebatur, nunc

nunc tamen aurum indicare perspicuum est, posterior autem argentum. Hoc modo auri atque argenti, quibus plane devoti sunt, insignibus exornati tanquam pro templis & aris, ita pro auro atque argento, dimicant. Cum vero cursu revoluta quatuor anni tempora venerunt, in quibus sacris initiandi congregantur, ita se gerunt Episcopi, ut summum auro, quem meretur, honorem atque reverentiam, exhibeant. Nihil enim aliud eos, qui sese ad sacerdotii dignitatem ingerunt, interrogare solent, nisi quantum auri possideant, quot habeant prædia, quale & quantum patrimonium, quot sint eis beneficia sive præbendæ? sic enim appellant eas præfecturas, quas a Pappa sacerdotes auro redemerunt, nempe a præbendo, vel quod ipsi pro eis habendis aurum præbuerint, vel quod illæ sacerdotibus aurum præbeant. Qui se maximas atque amplissimas habere possessiones dixerit, plurimumque auri possidere, statim eum benignissime excipiunt; nam ab huiusmodi clericis, quibus est auri satis ampla copia, præter statutum atque ordinarium tributum, quod ab initiandis exigunt, non vulgarem etiam mantissam expectant. Itaque alacri vultu: dignus est hic (inquit,) qui admittatur, & sacerdos creetur. Sed quid, si literarum non magis peritus sit, quam germen (quod dicitur) Aradicum? aut si non magis honestatem curaverit, quam a fots quilibet? hoc nihil impedit. Aurum enim præfens

etiam illum Aquinatis poetæ Peribomium & doctum & honestum reddere potest; at vero doctrina bonique mores sine auri præsidio nihil profunt. Quid autem de Sacerdotibus cujusque generis loquar? quas tanta auri cupiditate flagrare notum est, ut ad missas, quas vocant, devorandas, perinde quasi ad operas, pretio conducantur, & ipsius Christi corpus atque sanguinem auro vendant? Quid quod bis aut ter uno die lucri causa sæpissime missantur? Deinde quot rixæ? quot seditiones? quot discordiæ? quot clamores inter presbyteros exoriuntur? dum primitias, aut decimas, aut annua menstruaque salaria, pro missationibus suis exigunt, atque inter se partuntur. Persæpe etiam non alia de causa litigant, nisi quod eorum aliquis confessionem peccatorum audierit ab homine, qui sub alterius sacerdotis imperio fuerit, vel tanquam vultur tri-duo cadaver ante præsenferit, quod providus negligenti surripiat; hinc præcipue solent gravissimæ contentiones exoriri, ut a jurgiis ad crucis baculos sæpe veniatur. Sed fortasse requiretis, Proceres, cur de hominis confessione, aut de cadavere, dimicandum esse censeant. An vero ignoratis, ex istis confessionibus & cadaveribus maxima illis vectigalia provenire? Nemo confitentem gratis audiverit. Confessos vero pro peccatorum absolutione pœnas aureas pendere jubent. Sed in funeribus maxima præda spes eis constituta est; hinc enim

uberrimi fructus emetuntur. Nuper audiivi sacerdotem quendam, qui dolebat artem suam (ita enim appellabat) esse pessimam, propterea quod homines raro morerentur. Hæc est aurea charitas. Cum enim aliquis fato concedit, priusquam ejus cadaver sepeliunt, de mercede sua pacisci volunt, nec ullum penitus humo condi patiuntur, nisi prius soli pretium sibi numeratum viderint. Quod si forte quis ita pauper sit, ut olim Agrippa Menenius, aut Valerius ille cognomento Publicola, is præda canibus & corvis relinquetur. Usque adeo mori miserum est, nisi aurum possideas. Cum vero contra tantas mortis injurias aliquis magna auri vi munitus vitæ suæ diem clauserit, tum vero lætissimum videre est parochum, trepidare, ne parum magnifice funus appareatur, sursum ac deorsum cursitare, mortui cognatos & affines adhortari, ut in eo funere sibi famam immortalem acquirant, nec modico auro parcant, ut illius animam in cælum recta subducant; id futurum (inquiet) si septimum, trigessimum, anniversarium officium, divi Gregorii missas ipse celebret, quo feliciter impetrato, statim in ipso funere duplicem sibi mercedem dare jubet. Hæc enim jam lex est, & jus ex consuetudine factum parochis omnibus. Deinde pro feretro in quo cadaver jaceat, pro pallio quo opertum fuit, grandem sibi pecuniam numerari jubent. Interim atratus mortui procurator omnibus se plene sa-

tisfecisse putat, cum ecce lignearum crucium multitudinem parochus in medium adfert, & majorem etiam, quam prius sibi data fuerit, pro crucibus istis pecuniam flagitat: postremo sacerdotum etiam ministri, qui, dum funus efferretur, subtiliori voce cum sacerdotibus nœnias cantillaruut, & funalia crucesque circumtulerunt, pecuniam aliquam offulam præstolantur. Nonne igitur pro cadaveribus, unde tam opima spolia proveniunt, tanquam pro focis & aris dimicandum est? Age vero, quid in concione quotidie clamant? quid populo persuadere conantur? non aliud sane, nisi pauperis parochiæ memores esse velint, ut animarum parentum, fratrum, sororum, cognatorum, affinium, misereantur, quæ torquentur in purgatorio, crebrisque oblationibus & missarum celebrationibus eas a purgatione liberent. Denique hoc unum student, in hoc incumbunt, hæc eorum maxima est occupatio, ut scilicet quam plurimum auri congerant, & sæpe minas regaliter addunt, futurum ut grandines omnia fata contendant, ut omnes fructus pruina præcipiat, ut nihil germinent arbores, nihil producat hortus, intereant pecudes, nisi sacerdotum populi magnum curam habeant: hinc iram Dei maxime concitari, quoties videt sacerdotibus suis primitias, decimas, solita suffragia, denegari. Quibus certe minis populorum mentes, quibus nihil est superstitiosius, perterrefaciunt,

& facile quocunque voluerint impellunt. Sed quorsum hæc tam multa de sacerdotibus? Ut intelligatis, Proceres, id quod in hac exornationis nostræ parte tractamus, auri vim esse maximam, quæ religiosorum etiam mentes, quibus nihil ex omni parte perfectius inveniri potest, imperio suo subjecerit. Restat etiam ex religiosis genus quoddam novum atque monstrosum, quos publice quidem *fratres*, privatim autem *patres*, appellant, vulgari vocabulo *spirituales*: quamvis sæpenumero non tantum spirituales patres inveniantur. Horum ego medius fidius incertus sum, an auri cupiditatem explicem, quæ tanta est, ut ei faturandæ non solum memorata Pelopis aut Zopyri talenta, sed quicquid in toto terrarum orbe auri est, vix sufficere posse videatur, an, quod forte melius est, illi Apollinis oracula paream:

Μὴ κινεῖν καμπερίαν, ἀνίμῳ γὰρ ἀμείναν.
 Video enim, quasi ea quæ oculis cernuntur, futurum, ut, si labyrinthum hunc semel ingressus fuero, postea, cum voluero, non possim exitum reperire. Quis enim, Bardocucillum illum frequenter excutiens, omnes quæ in eo sunt simulationum latebras investigare possit? Itaque mihi certe in trivio cogitationum esse videor. Quid enim faciam? Laudemne? quos nunquam satis damnare possem? Vituperem? qui, quicquid a me dicetur, id sibi in laudem vertere conabuntur, propterea,

quod ab auri studioſo vituperentur. Quasi vero non aurum ipſi plus quam Deum ac propriam vitam diligant. Qui cum ex acſtris noſtris ſe palam transfugas eſſe profiteantur, tamen neſcio quibus cuniculis ad eadem ſæpiſſime revertuntur. Quo majore etiam odio digni ſunt, qui, cum publice de loco ſuperiore, quantum poſſunt, auri cultores debacchentur, ipſi deinde illud idem aurum ſumma religione venerantur. Quod ſi ſuam in aurum benevolentiam & obſervantiam igenue faterentur, eqvidem eos ſummopere laudarem atque celebrarem, quemadmodum jam in aliis religioſis ſupra feci. Nunc cum id, quod pulcherrimum eſt, in ſe diſſimulent, & idem in aliis reprehendant, quis non eos merito deteſtetur? quis non omni ſupplicio vivos mortuosque maſtandos eſſe cenſeat? Verum jam omnibus fere cognitum eſt, iſtos nebulones duabus, quod ajunt, ſedere ſellis. Nam ſe tanquam ſorices ſuo ipſorum indicio produnt; cum omnia propter aurum audeant, atque ejus gratia limites omnes verecundiæ tranſierint; quippe qui jam pridem eo impudentiæ pervererunt, ut, quoscuque obvios habuerint, ab eis ſtipem non ſolum petant, ſed etiam efflagitent: qui non ſolum per compita, verum etiam oſtiatim, aurum mendicare non erubeſcant: qui totum terrarum orbem, quam ma-

gnus

gnus est, circumvolitant, ut sua faciant opima cœnobia: qui publice paupertatem professi tantum auri congerunt, ut palatiorum insanis substructionibus etiam reges ipsos ad invidiam commovere possint. Quid, quod ex illis, qui ligneos pedes habent, & qui nescio qua religionis simulatione palam aurum tangere verentur, cum interim, si fors obvenerit, aliquid mollius tangere non vereantur, invenitur aliquis, qui viginti millibus aureorum purpuream conetur a summo Pontifice causiam extorquere? Quod sane non admodum difficulter impetravit: quid enim non post aurum? Taceo testamentorum aucupia, confessionum insurrectiones, cadaverum rapinas, propter quæ cum sacerdotibus ἄσπονδον πόλεμον continenter gerunt. Alia profecto multa majora gravioraque non tacerem, nisi vibrantes eorum lingvas atque trifulcas pertimescerem, quæ tanto feruntur impetu, ut Jovem ipsum fulminum jaculatorem, Vulcanumque fabricatorem, per terrefacere facillime possint. Nam quicumque contra eorum opiniones aliquid aut fecerit aut dixerit, vel qui occulta eorum scelera patefecerit, is statim e locis superioribus, ubi suo arbitrio mugiunt, hæreticus ubique prædicatur. Quis enim ignorat, quam in Erasmus, nostri ordinis non infimum hominem, debacchati fuerint, quoniam in eorum hypocrises & scelera, ut erat homo facetissimus, quodammodo luserat? Illum enim impu-

pudentissima lingua factiosum & hæreticum ausi sunt appellare. Sed tu, credo, Erasmi calamitate doctus cautior, Alciate, fuisti, qui nihil unquam, aut certe parum, in aureis scriptis tuis hoc tam impurum hominum, vel potius belluarum, genus attigisti: quod te ideo fecisse crediderim, quia te pudeat eos nominare, qui doctorum hominum nominibus oblivionem inducere conentur. Sed (ut ad rem redeam) quanquam hoc animantium genus, qui se non homines, sed hominum patres, appellari volunt, auri cupidissimum sit, tamen nihil amplius de eo mihi dicendum esse censeo: cupio enim eos in cupiditatibus suis inverteſcerere, atque marceſcere, neque unquam auri fructum quenquam, nisi qui eos omnes strangulet, deguſtare. Quare ad alias potius gentes atque nationes, in quibus aurum potentiam suam experitur, orationem nostram convertamus: quæ mihi pars erit multo facilior & expeditior. Cum enim ipsos religionis nostræ principes, & religiosos omnes, quibus nihil absolutius esse potest, auro servire declaraverim, quid mirum vobis esse videbitur, si eandem alii viam sequantur? Quid enim aliud, quam aurum, toto vitæ suæ tempore quærunt artifices & populares? qui dies noctesque faciendis operibus invigilant; calorem, frigus, inediam, sitim patiuntur; nihil est tam durum & asperum, quod non æquo animo ferant; non alia certe de causa, nisi ut aliquid tandem auri con-

congestum in scriniis suis videntes gaudeant. Quid mercatores? qui non solum terras, verum etiam tempestatibus agitata maria, perambulant, omnibus se periculis exponunt, non ventis horridum mare pertimescunt, non si cœlum ruinam minari videatur, ignotos adeunt populos, cum exteris & barbaris nationibus quovis periculo familiaritatem ineunt, nihil denique est, quod auri cupiditate libentissime non efficiant, merces supponunt, corrumpunt, adulterant. Jam vero viri nobiles, qui prædiis & agris maxime locupletes sunt, aut quibus res pecuaria fructuosa est, frumento, vino, caseo, cellas, apothecas, horrea, studiosissime complent, donec annona cara sit, tunc auro permutant omnia, quæ prius avidè congregarant. Quid de Jurisconsultis dicam? qui auri desiderio juris nodos & legum ænigmata quam diligentissime perscrutantur, & in extricabiles plurimorum Bartolorum opiniones dissolvere contendunt, & chartis totas noctes immoriuntur, mane vero proferunt in lucem grandia consilia, quæ singula nulli mortalium minoris quam decem aut viginti nummis aureis addicant. Transeo causidicos, notarios, procuratores, qui totos dies in judiciis blaterant, & tota mendaciorum plaustra, totas naves, profundunt, causasque clientum de die in diem prorogant, donec crumenam eorum vacuum viderint, &

Nequaquam fundo suspiret nummus in imo.

Tum

Tum vero demum aut causam omnino rejiciunt, aut quavis iniqua conditione quamprimum expediunt. Quid medici, quos Aristophanes *σκατοφάγος* ab edendo stercore nominavit; nonne propter auri cupiditatem non tantum morbos, vulnera, ulcera, pustulas, carcinomata, sed etiam lotium, excrementa, merdas, intuentur, considerant, odorantur? Taceo ludi magistrorum, paedagogorum, logistarum, calamitates & cruces, qui ob auri pauxillum totos dies cum pueris infaniunt. Jam vero publici Professores, licet ipsis scientiis, qui est unus animorum pastus suavissimus, præcipue delectari videantur, tamen ab auro facile superantur, & eo potissimum se conferunt, unde major auri copia refulserit. Testis est hujus rei noster Alciatus, qui, quocunque auri flatus spiraverit, eo vela dat. Testes sunt omnes alii, quos nominatim appellare post Alciatum nefas esset, ne fortasse cum tanto viro comparari viderentur. Age vero, sanctissimum illum ordinem senatorium, qui res hominum gravissimas regit ac gubernat, quis nescit ab auro plerumque regi ac gubernari? Ac mihi quidem de his rebus sæpissime cogitanti potestas auri maxime omnium admiranda videri solet. Nihil enim a natura tam alte positum est, quo aurum non aspiret. Quid altius aut sublimius senatorum mentibus excogitari potest? Ad eas tamen si copiosum aurum accerserit, facile dominatur, & arbitrio suo sursum

ac deorsum versat. Hinc illa sententiarum ac
judiciorum fulmina, quæ totas sæpissime do-
mos & familias, auro inimicas, evertunt. Sed
qua de causa creditis, Proceres, Reges & Im-
peratores, ut de illis etiam aliquid dicam, tot
& tanta bella continenter gerere? perpetuo
subditos expilare? tam magna vectigalia quot-
annis, vel singulis potius mensibus, exigere?
Non hoc certe alia de causa faciunt, nisi ut,
quamplurimum auri possideant. Quo fit, ut,
cum gentes ac nationes imperio suo subjiciant,
ipsi deinde auro subjiciantur, & tanquam pre-
tiosa quædam auri mancipia servire non inviti
compellantur. Mira est enim auri vis, quæ vo-
lentes & lætantes homines, quocunque volu-
erit, impellit. Nam si bene consideretis, Pro-
ceres, Regibus & Imperatoribus nihil præter
aurum sapere invenietis. Cujus est enim illud
tantopere vulgatum & celebratum dictum?

Lucri bonus est odor ex re

Qualibet.

Nonne totius orbis terrarum principis Vespas-
iani? qui usque eo non solum dilexit, sed et-
iam admiratus est, aurum, ut non vectigalibus
contentus amplissimis, non ærario quod omni-
um locupletissimum, non populorum atque
nationum tributis & stipendiis infinitis, etiam
in vendendo lotio studuit aurum sibi compa-
rare. Hoc quidem certe nonnulli rerum impe-
riti, præsertim in tanto principe, non satis ho-
nestum esse censebant; sed, mea quidem sen-
ten-

tentia, valde fallebantur: lucrum enim, ut est in veteri proverbio, longe pudorem antecellit. Non igitur sibi turpe existimavit sapientissimus princeps, si cupidissimus auri judicaretur, cum exploratum haberet, omnes, qui se antecesserant, auri fuisse quam appetentissimos. Ex tot enim regibus & principibus, qui post hominum memoriam dominati sunt, nullum omnino reperietis, quem non aurum sibi servire compulerit. Sed quid dico de regibus? cum omnes possum mortales, quasi uno fasce, complecti. Nullus est enim, nisi fortasse stupidus, & ab omni humanitate alienus, cui non aurum mirifice placeat. Nam etiam illius ætatis aureæ beatissimis temporibus omnes auro serviebant, quod bifrons ille Janus, qui videt ἀμα πρὸςσω καὶ ὀπίσσω, apud Ovidium his versibus attestatur:

*Vix ego Saturno quenquam regnante videbam.
Cujus non animo dulcia lucra forent.
Tempore crevit amor, qui nunc est summus,
habendi.*

Vix ultra, quo jam progrediatur, habet.
Et quisquam adhuc dubitavit, quin illud potentissimum sit, propter quod Pappæ, Cardinales, Episcopi, divina atque humana jura, omnia despiciunt? quod etiam illi, qui paupertatem jurejurando profesii sunt, summo cultu venerantur? quod omnes artifices, mercatores, nobiles, jurisconsultos, medicos, senatores, principes, imperatores, reges, suo ar-

arbitrio regit ac gubernat? cui denique parent omnes totius orbis terrarum nationes? Neque enim exspectare vos arbitror, ut muliebre genus in medium adferam; cum vos non ignorare certo sciam, non alium apud mulieres Deum præter aurum esse, nec eas omnino sibi placere, nisi totæ aureis ornamentis eluceant, & nisi auro capillos, frontem, auriculas, collum, humeros, brachia, manus, pectus, crura, pedes, totum denique corpus, exornaverint. Date mihi mulierem, cui contigerit auri divitem esse, quo facilius intelligatis, quid in ea possit aurum; quid non sibi licere putabit? quos fastus? quas animorum inflationes præ se feret? quot pedissequarum greges? quot anteambulones? quot domi forisque deliciae? quot circa mollissimi corporis cultum fastidia? quæ in facie fucationes? quæ in toto capite luxuriæ? quæ in vestibus expressæ libidines? Omnes alias præ se contemnet, atque despuet, per plateas, per vicos, per fora, per compita, Penelopeis undique stipata procis, molli carpento provehetur, unde quaque versus oculos vibrans unumquemque diligenter annotet, & eum, cui velit annuere, & se permolendam subicere, deligat. Quin propter auri copiam omnibus se admirationi esse putabit. Quid, quod generatim omnes se ipsas mulieres auro vendunt? Quamvis enim adeo pudicæ esse videantur, ut eas Penelopas aut Lucretias existimes, tamen oblata

auri copia statim se prostituunt &, quod ait Aristophanes, τὸν πρῶτον τρέπῃσι. Nec ex omnibus aliquas tantum existimetis auro vinci posse, cæteras autem esse prorsus invictas. Non ita est: omnes sui similes sunt, nec ulla est, quæ præter insignem aliquam naturam fortita sit. An vero ignoratis, Proceres, proverbium illud a Græcis tantopere celebratum:

ἀεθέντος λύχνος γυνὴ πᾶσα ἡ αὐτή.

Sublata lucerna mulier omnis eadem est? Facite, sperent occultum fore factum suum, & eis aurum offerte, profecto vel reginas ipsas hac ratione facile expugnabitis, etiamsi Alcestide vel Artemisia castiores esse videantur. Acrisius Græcorum Rex filiam suam Danaen ferrea turre concluserat, nihil tamen illa ferrea turris obstitit auro, quo minus regiam filiam expugnet. Nam postquam a Jove plurimum auri sibi Danae promitti sensit, quamvis ex fœtu suo patri futurum exitium non ignoraret, tamen Jovem ad sese per impluvium introduxit. Ii nunc & dubita, num ab auro mulieres superari possint. Illud quidem certe maxima mihi dignum esse videtur admiratione, quod tam imbecillo generi, quale mulierum est, tantam vim aurum plerumque adferre solet, ut nullo modo tolerari posse videantur. Quod etiam Satyricus Poeta cum vehementer admiratus fuisset, in carmen illud prorumpere non dubitavit:

Intolerabilius nihil est, quam fœmina dives.

Satis mihi multa verba fecisse videor, quare sit aurum nobilitate præstantissimum, potestate maximum; restat ut de felicitate, quam adfert hominibus, pauca dicamus. Omnis enim res (ut vere & præclare cecinit Horatius)

Virtus, fama, decus, divina humanaque pulchris

Divitiis parent: quas qui contraxerit, ille

Clarus erit, fortis, justus, sapiens, etiam & Rex,

*Et quicquid volet, hoc velut in virtute paratum
Speravit magnæ laudi fore.*

Clari natales nisi propter aurum splendorem suum obtineant, protinus ad obscuros, tanquam ab equis ad asinos, revolvuntur. Virtutem & gloriam argento posthabendam jam antea docuimus. Adde quod spernitur etiam virtus ac nobilitas, nisi fuerit auro copulata. Quemadmodum noster idem Horatius aperte testatur:

Et genus & virtus, nisi cum re, vilior alga est.

Quid autem honor aut gloria mendico prodest? id certe quod equo clitellario phaleræ, aut deformissimæ fucus mulieri. Licet enim adeo claro genere natus sis, ut ipsum etiam Codrum nobilitate superes, tamen nisi fueris etiam (quod ajunt) ἡυναῖς & ἐκ βαλαντίς, tibi cum claritate & gloria tua licebit esurire. Nullus te alacri vultu excipiet, nullus te consanguineus aut affinis agnoscet. Quod si potens &

sapiens præter cæteros fueris, confestim, amissa pecunia, potentiam etiam atque sapientiam amisisti. Aurum est, quod bona secum adfert omnia, virtutem, gloriam, famam, nobilitatem, fortitudinem, sapientiam, omnem denique felicitatem, & quod vere dixit Ovidius:

Dat census honores,

Census amicitias; pauper ubique jacet.

Si forte quis Gigantum fraterculus bene favente fortuna maximam auri vim sibi compareret, hunc auri præstantia nunquam antea cognitum, tanquam ab Eteobutadis originem ducat, in omni terrarum angulo notissimum efficiet. Omnes ejus civitatis homines, in qua dives iste fuerit, etiam summo genere nati, ad eum accurrent, salutabunt, ducent, ac reducent; nullus erit qui sibi quærendum existimet, quas habeat majorum imagines, quos avos excellentes dinumeret; eum satis superque nobilem aurum efficit. Quid autem felicius ut optabilius esse potest, quam omnibus placere? ab omnibus suspici? mortales omnes amicos habere? nobilitate cæteris omnibus antecellere? Neque quenquam esse vestrum opinor, Proceres, qui non hominibus ab auro hæc omnia præstari intelligat, atque etiam longe majora, cum nullius sit tantum flumen ingenii, nulla dicendi tanta vis tantaque copia, quæ possit enarrare, quanta mortales ab auro felicitate cumulentur. Sed tamen

etiam inter auri divites aliquod discrimen est. Nam qui plus auri possederit, is & maiorem gloriam & firmiorem felicitatem consequetur. Neque enim putetis, sine causa jam pridem illud vulgo jactatum fuisse:

Quanti habet quisque, tanti sit.

Sed quid argumenti opus est? cum nos ipsi quotidie videamus, auri divites omnium esse clarissimos, & inter eos ditissimum quemque, autoritate & gratia longe cæteris antecellere? Quod nusquam sane melius quam Romæ conspicitur: ibi enim summus honor auro tribuitur: ibi Philonidas meros & Margitas, vel etiam si qui rudiores memorantur, videbitis propter auri copiam in summo dignitatis gradu constitutos: ibi propter aurum multi homines digni judicantur, qui in puppi sedeant, & Christianæ religionis clavum teneant. Unum est, ut ingenue fatear, quod in tanta felicitate positus auri divitibus timendum esse videatur, ne, scilicet aliqua portione tollantur. Non enim possunt in una re plures esse commoditates, ut non insit etiam aliquid incommodi. Sed tamen huic periculo facillime succurritur; namque omnes fere religionis Antistites quosdam habent ministros, quos prægustantes vocant, in quibus, tanquam in Caribus, singularum dapium periculum faciant, & inveniuntur fatui, qui propter aurum hoc illis officium præstent. Neque mihi sane in dicendo prætermittendum est, quantam hominibus fortitudinem aurum

afferre soleat, cum præsertim hoc ad beatitudinem pertinere nemini dubium esse possit. Quanquam, ut ipse nihil dicam, vos ipsi cognoscere potestis, quam fortes & potentes sint auri possessores, quibus ad digiti crepitum omnes obediunt. Satis est, ut alicui dicant, hoc negotium bene curato, & bene curabitur; alteri vero, veni mecum, & libentissime veniet. Quid amplius desideratis? An ipsis regibus & imperatoribus ita pareretur, nisi etiam ipsi aurum possiderent? Imo vero nullus rex esset aut imperator, nisi esset aurum. Aurum est, quod omnes adfert dignitates, magistratus, potestates, dominatus, imperia; nullus absente auro nostro tempore Pappa, nullus Cardinalis, nullus Episcopus fieri potest. Sed quid mirum? cum neque sacerdos quisquam aut clericus, nisi præsentem pecuniam, designetur. Aurum reges, aurum principes, aurum prætores, aurum denique omnes creat magistratus. Non esset inter mortales ulla fortitudo, si quis aurum demeret. Facite, sciat aliquis arcam suam auri plena melle, nihil illo fortius, nihil imperiosius dici aut excogitari potest; nullum penitus mortalium verebitur, omnia confidentissime faciet & loquetur, omnia omnibus minabitur, nec quisquam ejus verbis resistere poterit; clamando, contendendo Stentorem aut Gradivum Homericum superabit. Illud enim scitum est:

Χρυσὸν λαλῶντος πᾶς ἀπρακτεῖται λόγῳ.

Quare creditis Romanos olim totius orbis terrarum imperium obtinuisse? non aliam medi-
us fidius ob causam, nisi quia plurimum auri
congefferant, quo duce cunctas hostium copi-
as facile profligabant. Quis enim non vel le-
git vel audivit dictum illud Philippi Macedo-
num Regis? qui cum arcem quandam invade-
re decrevisset, & exploratores, quos ad eam
miserat, retulissent, eam expugnari nullo mo-
do posse, propterea quod esset munitissima, pe-
tivit ab eis: an adeo angustum haberet aditum,
ut ad eam neque asellus onustus auro posset
accedere? Voluit enim prudens Imperator si-
gnificare, nihil esse tam munitum, quod auro
non possit expugnari. Neque enim Alexander
ille Magnus tam longe lateque fines imperii sui
propagasset, neque Darium Persarum Regem
ter bello superasset, neque totam fere Indiam
ad Gangem usque fluvium penetrasset, nec de-
nique tam magna atque præclara gesta, qualia
prædicant omnes, gessisset unquam, nisi, quo-
cunque ivisset, magnam secum auri copiam ad-
vexisset. Quanta vero illa felicitas est, quod,
quicquid auri dives tentaverit, id ex sententia
succedit? quod, quicquid vel imprudenter
fecerit, id omnes homines vehementissime
comprobant? Quid? Illud quanti tandem fa-
ciendum est, quod etiam si stulte vel dicat vel
faciat quid auri dives, id ab omnibus sapien-

tissime factum judicatur? Est enim in illis probatissimis Græcorum sententiis ille venustus senariolus:

Τὸν εὐτυχῆντα καὶ Φεγεῖν νομίζομεν.

Quid? quod auri diviti quemadmodum crescit amicorum copia, ita etiam cognati, propinqui, atque affines multiplicantur, plures quotidie patrueles, amitini, consobrini, avunculi, patrui, compatres, commatres inveniuntur; qui vero nullum habent cognationis commentum, quo se in divitis familiaritatem insinuent,, ii, si forte paulo nobiliores sunt, eum fratrem charissimum vocant, sin autem inferiores fuerint, patronum aut dominum salutare non dubitant. Denique jam pridem apud Græcos tritissimum est vetustate proverbium: τῶν εὐτυχῶντων πάντες εἰσὶ συγγενεῖς. Hæc cum intellexisset sapiens ille Tragicus Euripides, ita precatus est: *Aurum ex omnibus maxime domi habere cupio: nam servus etiam, si dives fuerit, in honore ac pretio habetur; at vero liber homo, cum pauper est, nihil omnino potest efficere; quare felicitatem in auro positam esse tibi existimes.* Sed alibi longe clarus & apertioribus (ut ajunt) tibiis auri laudes canit: *O aurum, mortalibus pulcherrima felicitas! nam neque mater nobis tales affert voluptates, nec tam filii hominibus, nec tam pater charus est: quod si Venus oculis suis ita fulget, non mirum est si infinitos amores nutriet.* Quanto igitur nos studio convenit aurum acquirere, quod tantas homi-

mini felicitates adferat, ut eis nihil omnino desit ad bene beateque vivendum, qui aurum abundantissime possederint? Multi quidem genere nobilissimi fuerunt, ut ii, quos Deorum filios credidit antiquitas, Minos, Rhadamanthus, Æacus; multi fortitudine clari extiterunt, ut Hercules, Theseus, Achilles; nonnulli iustitiæ nomine celebrati sunt, ut Solon, Aristides, Phocion; aliqui dicti fuere sapientes, ut Thales, Bias, Socrates; alii denique aliis in rebus nomen clarum adepti sunt: sed cui simul hæc omnia contigerunt, ut idem nobilissimus, idem fortissimus, idem iustissimus, idem sapientissimus diceretur, præter aurum possessores neminem unquam fuisse legimus: hi soli virtutes omnes consequuntur, hi nobilitate cæteris omnibus antecellunt, hi fortitudine parem nullum inveniunt. De iustitia quid dicam? cum illam in aurum esse potestate omnes intelligant. Age vero, quis divite sapientior? quis illustrior aut gloriosior? Quot enim regum & summorum principum nomina delevit oblivio; at vero propter aurum ignobilissimi etiam sempiternam gloriam adipiscuntur. Cur enim Æsopus Tragædus tantopere memoratur? cur Claudii Cæsaris libertus Pallas? cur Narcissus ejusdem Principis libertus? cur Pythius Bythinus? cur Mamurra? cur Cissamis Cous? cur Callicrates Carystius? cur innumerabiles

alii? Quid, quod etiam modicum opportune repertum aurum æternam potest homini gloriam acquirere? Quid enim Gygi illi Platonico tantam felicitatem tantamque famam, tam subito comparavit? nonne, si quid Platoni credimus, aureus ille solus annulus, quem, cum terræ hiatus fuisset ingressus, in digito jam putrescentis cadaveris fertur, invenisse? Tantam enim aurum illud in se vim habuisse fertur, ut, qui id haberet, a nemine penitus videretur, cum interim ipse suo arbitrio posset alios conspici; quod cum animadvertisset Gyges, ad Lydorum Regem profectus eum brevi tempore & regno & conjuge & vita spoliavit. Sed certior, utpote etiam recentior, Titi Aufidii gloria, qui cum pauperrimus esset, & vectigalium particulam in Asia redemisset, inde auri dives effectus, non ita multo post ad tantum pervenit honoris gradum, ut eandem Asiam pro consulari imperio obtinuerit. Quid de P. Rutilio dicam? qui non publicanus sed longo tempore publicanorum administer in Sicilia fuit, & cum per hanc artem tam abjectam non nihil auri sibi corrogasset, Romæ consulatum obtinuit, resque plurimas præclarissime gesit. Nec te P. Ventidi, majus felicitatis exemplum, silentio prætero: qui in Asculo oppido mulas agitare primo consueveras, & a Pompejo Strabone captus in car-

carcerem conjectus es; sed nescio quæ deinde fortuna, tibi certe maxime propitia, dives auri factus ad consulatum aspirari non dubitasti, quem adeptus etiam adversus Parthos, quos nullus unquam Romanorum antea domuerat, exercitum educere ausus es, quibus felicissime devictis victor Capitolium triumphali curru celebraſti. Hæc est auri felicitas & præstantia.

Quare agite, sapientissimi Proceres, aurum totis viribus acquiramus, aurum amemus, aurum veneremur, auro post omnia ponamus. Hoc solum nos beatos facere & conservare potest: huic igitur uni studeamus, in hoc unum incumbamus, hoc manibus pedibusque petamus, quod qui possident, ii soli beatissimi esse videantur. Quis non omnia pericula subeat? quis dies & noctes non elaboret? quis non etiam vitæ discrimine aurum quærat? quod solum (ut copiose docuimus) nobilitatem, potentiam, beatitudinem, hominibus adferre potest. Certe, & si qui tam demenres sunt, ut aurum non diligant, a vobis quidem, certo scio, non solum illud diligere, sed etiam vehementer amari: quæ una de causa vos omnium, quos sol aspicit, estis beatissimi, laque sæpius a Diis immortalibus ego, id quod nunc tandem obtigit, studiose totaque mente pre-

ca-

catus sum, ut vobiscum habitare mihi liceret, & aliqua ex parte vestra felicitate perfrui : quod cum mihi summa benignitate Deorum, immortalium acciderit, alacriter jam una vivamus, optimi Proceres, & nova semper auri comparatione vitam in melius quotidie transferre studeamus.



PROGRAM-
MATA.



PROGRAMMATA

publico nomine edita.

IN FESTUM NATIVIT. CHRISTI.

PRORECTOR

ET

SENATUS

ACADEMIÆ KILO-

NIENSIS

CIVIBUS ACADEMICIS

S. P. D.

I.

SALVETE CIVES ACADEMICI; Quidni enim SALUTEM vobis, & plurimam & perpetuam dicamus eo die, quo nobis nata est ipsa SALUS, in Orbe hoc misero & maligno, in animis nostris habitatura: quam à tot seculis prædictam ipsi cœlestes nunciant genii, ac humano generi gratulantur: quam in ipso temporum complemento, quod ipse Temporum Pater ab æterno præfinierat, in lucem editam gaudemus.

O
san-

sanctissimam temporis istius plenitudinem! quo non, ut profanus olim canebat Vates, Jovis omnia plena sunt, sed quo æterno illo veroque Deo plena omnia, omnes cœlorum orbes, terra tota, ut antea virgineus illo uterus impletus erat: cujus nunc gloria implent universum hoc æthereæ mentes, quæ hymnos suos infanti Deo occentarunt. O felicissimum æternitatis & temporis connubium! quo ipsa tempore induitur æternitas, & ad annorum nobis calculos revocari cœpit: quo tempora tot votis expetita uno in momento complevit æternitas; unde ipsa nostræ æternitatis oriuntur elementa. Quare & vos monemus, O Cives, ut, quod omnium rerum primum est, in tempore veniatis, hodie scilicet, die semper nobis primo & ultimo: quo in tempore venit Æternus ille, temporumque omnium complementum. Hodie natus nobis est Servator, quem omnia sibi secula nascentem præviderunt, vos omnibus seculis natum novistis. In ejus nascentis momentum, unde omnia nostra tempora pendent, omnis nostra salus, tota denique æternitas, cogitationes vestras defigite, ut mature ac in tempore Deum, qui in tempore homo natus est, cognoscere, vosque extra tempora positos æternitati inferre, discatis. Venite itaque Cives, quærite, circumspicite, ubi positum inveniatis infantem Deum, qua ad ipsum via perveniatis, non alia scilicet quam quæ ipsa cœlo descendit. Non
in

in cœlum nobis eundem est, cui occupando montes olim Gigantes congefferant; neque enim tanto molimine opus est; relinquitte colles Gigantibus, & cum Pastoribus in valles, in specus, in tuguria, in stabula descendite, atque illic humi & ante pedes vestros positum cum cœlo ipso Deum atque orbi suo ignotum intuemini: dum ille somno sepultus jacet; totosque Decembres insanit, ac Saturnalia celebrat Roma Orbis Domina; felicior futura, si, cum populorum recensum agit, ipsum inter homines, & Cives suos Deum numerare potuisset. Fallimini, qui è Dialecticorum Scholis inter Transcendentia reponere Deum didicistis: nam ille se hodie, in terram; in sordes, in fœnum, ad pecudes ipsas abjicit & demittit. Vos Mathematici, qui rem finitam, infiniti capacem esse negatis, nunc immensum in angulo, maximum in minimo recognoscite. Vosque, o Cives optimi, quam nihili vel summa illa sint, imo hæc omnia, animadvertite: cum infra summa, infra omnia se depresserit, qui universi orbis & nunc sui ipsius est architectus: quasi tum demum omnes potentiae suæ numeros absolverit, cum se humilitate ac tenuitate sua abscondit. Non erat illi locus in diversorio, sine quo nec locus ipsi mundo, adeoque bestiarum hospitio suscipitur, quem homines a se expulerant, plus quam belluini, & eo minus humani, quo plus hominis ac humanitatis boves asinique ha-

habuerunt. Cælo suo exiens, in caulam se abdidit, ut pulsum e Paradiso hominem suo exilio in cælum reduceret: Adamum induit, ut Dei imaginem, quam exuerat, sibi iterum ille circumponeret. Descendamus in stabulum hoc, Cives optimi, & adoremus illam inter fordes sanctitatem, inter homines divinitatem, inter pecudes humanitatem, nec tamen ipsi pecudes, vel Augiæ stabula, non uno Hercule κόπερφόρῳ purganda. Defæcatus enim Regi nostro mentes adferre æquum est, qui in stabulis, inter pecudes nasci, in præsepibus ipsis jacere voluit, cum Reges in palatiis splendidissimis vivere, inter ministros ac satellites versari, in solio residere soleant: ut alium se quam hujus mundi Regem ostenderet: ut verum se pastorem & agnum hoc apparatu declararet. Pastorem dicimus, verum qui nec tonderet Oves, nec mactaret, sed ipsum se illis in pabulum præberet. Agnum, sed qui se Leonem adversus Lupos exhiberet. Videamus hic, quam ex abdito, ex ipsis latebris & tenebris humilis ista majestas erumpat. Nascitur in agro, in stabulo Deus, ubi pleniori jure totum quàm patet orbem occuparet. Pastores, antiqui illi ac innocentes κοσμοπολίται, in hanc velut Regiam suam primi evocantur. Reges ex Oriente signis quibusdam moniti advolant. Illis è divina familia destinatur nuncius: hi ex siderum grege mutum ducem sequuntur. Illi animos & vota adferunt; hi Pastorum quasi secundarii pompam etiam & splendorem addunt

dunt, ac ipsam magnificentiam regiam, ipsos thronos præsepibus submittunt: desuper novum regem stella coronat, velut solem suum, postquam nuncii vices obierat, insecutus Mercurius. Contendant huc omnes è solio suo Reges; Rex enim Regum hic habitat. Veniant è cathedra Doctores; ipsa hic sed elingvis vagit sapientia: Procedant è templis Sacerdotes; ipse in præsepibus jacet & Pontifex & hostia. Quocunque nos vertimus, plena beneficiorum, plena mysteriorum sunt omnia. O diem nullis annorum, nullis seculorum lingvis satis deprædicandum! O noctem supra omnes dies gloriosam, supra omnia sua sidera luminosam! O ipso meridie, ipso sole splendidior! nam novum illa & fulgentiorem è tenebris suis enixa est. Eat nunc alter ille Sol, & Capri cornigeri simulacrum circumferens, ad alterum orbem, ad profanas barbarasque gentes diem proferat: nostra hâc nocte, in nostrum orbem, novus ille sub Agni inermis specie reconditus Sol procedit, larvas Dæmonum dispellit, tenebras ignorantiae dissipat, nubes Mosaicas reteggit, & novum quasi mundum è veteri illo Chao format. Quemadmodum scilicet olim, cum rudem hanc ac indigestam molem tenebræ circumfunderent, una Creatoris vox, FIAT LUX! omnia in ordinem redegit: ita has Orbi nostri crassissimas tenebras, ipsa simul LUX & VERBUM Patris, mirabili suo fulgore illuminans, serenioris naturæ speciem circumponit. Quod si olim
No-

Noctem Deorum matrem fabulatores coluere Poëtæ, rectius certe nos hanc, quâ ipse natus est DEUS, noctem veneremur: sed quam noctem esse vetat tanti Solis fulgor, qui nunc oritur. Ac fane si à media nocte diei ducunt initium fideralis scientiæ periti: cur non ipsi ex illo temporis articulo, quo SOL JUSTITIÆ JESUS CHRISTUS in orbem prodiit, dies nostros ordiamur? Adeste itaque Cives Optimi, oculos animosque ad lucis illius splendorem attollite, & si qui tenebris immerfi, aut nocte sati lemures inter homines versati fuistis, ex oculis cœcitatem, è mentibus tenebras excutite, & in Orcum Noctemque suam remittite: Venit felicissima illa dies, quæ in apri- cum vos lucemque producet. Aderit vobis spiritu suo ὁ πατήρ τῶν φωτῶν & igniculos, divinæ in vobis lucis fomites, succendet. Immittet radios suos, æterna illa Parentis sui Lux, cui hymnos hodie canimus, cui preces fundimus, quam sereno ore salutamus. Vigilate, ne in tenebras relapsos somnus opprimat, & insomnia, vanæ caducarum rerum turbent imagines. Videte ut & in vobis nascatur, qui hodie nascitur DEUS: ut oriatur in animo vestro velut in cœlo suo, SOL ille JUSTITIÆ, qui fuligines in vobis discutiens Lucis vos filios efficiat, & in sanctissimam illam DEI CIVITATEM, ubi nullæ Solem abscondunt nebulæ, nullæ lucem eripiunt tenenbræ, perducatur. P. P. Kilon Id. XXV. Decembr. Anno æræ Christianæ clb lbc LXXVIII.

QUæ olim in Gentilium sacris pronun-
 ciabantur voces; quibus & silentium
 imperabatur, & ad bona verba, mis-
 sis malè ominatis, dicenda excitaba-
 tur populus: illa sanctissimo hoc die, Cives
 Academi, vobis iterumq; iterumq; occurrentia
 sunt. FAVETE LINGUIS, FAVETE ANI-
 MIS. Nam VERBUM illud, MENS PATRIS,
 cui post tot seculorum decursum anniversaria
 celebramus solennia, JESUS CHRISTUS,
 humanam sibi naturam hodie circumposuit,
 Orbemque hunc vitiorum tenebris & sordibus
 mersum, divina luce collustravit. Erigite a-
 nimos vestros, & in hoc mysterio defixos, vel-
 ut in solitudine, velut in secreto quodam com-
 ponite. Percussa religioso horrore mens in
 tanti admiratione arcani subsistit, & intra se,
 quasi abdita voces non invenit, in quas diffun-
 datur. Quemadmodum itaque quædam in-
 tacendo consistit, ex Ciceronis judicio, elo-
 quentia: ita maxima divini cultus pars submis-
 so absolvitur silentio. Qui loqui in hoc re-
 rum sacrarum ludo nondum didicistis, tacere
 primum discite; non Pythagorica sed Aposto-
 lica quadam ἐχεμυθία, velut primo tyrocinio
 imbuendi. Compescite insanas voces σπερ-
 μόλογοι: comprimate magnificos spiritus Ἀρε-
 γάλογοι: Auferte hinc verborum lenocinia vel
 Sophistæ vel assentatores λογοδαίδαλοι. Ut u-
 nius sapere VERBI magisterio aliquando pos-
 si-

fitis, elingves estote Discipuli, & vel ad Infantiam ejus, etiam sapientibus ineffabilem, obmutescite. Quæ enim vel ad vagitum ejus humana se efferat eloquentia? Vos a. quibus confirmatio rerum cœlestium sensus est, rumpite tandem, sed piis vocibus, silentia, & bona **NASCENTI VERBO** verba dicite. Quidni enim voces ipsi **VERBO** vestigales habeamus, & cum iis animos mutua affinitate inter se junctos ac jungendos, ut ipse ille λόγος, Mens simul Verbumque Patris, nostro se socians λόγῳ & naturæ, perpetuum in nobis format, si loqui ita liceat, συλλογισμόν. Solvamus illi lingvas in júbila, cujus beneficio & mutuorum solvuntur lingvæ. Procedat nostra ipsi Oratio, sed solo illo absolvenda. Cujus si exordium quæras, **VERBUM** illud est, quod erat in principio, & rerum omnium est principium: si argumenta, ipse ille λόγος est, Mens Patris, qui se ipsum & animis nostris & Orationi ingerit ἐνθύμημα ac in nobismet ipsis perorat: si finem, iterum Verbum est, infinitum illud, quod nulli emetiuntur seculorum annales, nulla evolvunt volumina, primus ille & ultimus, & si Verbum in literas resolveris, Ἀλφα illud & Ὠμέγα: quibus quasi geminis quibusdam elementis rerum natura continetur. Nascitur **VERBUM**, quod ab æterno pronunciatum, hunc orbem condidit; cumque dicto in Factum abiit. Promittebatur jam tum in Paradiso: prædixerunt Prophetæ: nunciavit,

Angelus Mariæ Virgini, ut verbo conciperetur Verbum: ebuccinavit Vox clamantis in deserto: vagienti occentarunt Angelorum chori: tota ipsius Vita Vox fuit, & ipsa quoque mors vocalis, cum spiritum poneret: qui voce illa, per quam mundi hæc machina fuerat, hominum quoque salutem consummatam proclamabat. Sed & post mortem, cum vitæ & cælo redderetur, sonus ejus longe lateque quicquid est terrarum complevit, & nunc quoque per extremos illarum recessus dispergitur. Adeo semper sibi simile fecundumque VERBUM totum illum ætatis suæ cursum, velut Orationem quandam continuam confecit, ut simul & vixisse & dixisse visus sit. Adeste, Cives Optimi, & in uno hoc VERBO, quod & docet & discitur, cœlestem illam ἐγκυκλοπαιδείαν, atque omnem illam, quæ à DEO est, sapientiam perficite, veri ab hoc λόγῳ φιλόλογοι simul & φιλόσοφοι: præ quo non nisi λόγοι sunt & deliramenta, quæ humana comminiscitur sapientia. Apud Thucydidem Diodotus vocabat τὰς λόγους διδασκαλάς τῶν πραγμάτων: Quanto nos rectius λόγον nostrum, divinum illum rerum Magistrum vocabimus, qui ipsa Veritas est, unde & Verbo apud Latinos, si Varroni credimus, sua origo est. Jaçtabatur olim Pythagoræorum illud Αὐτὸς ἔφα, quibus adeo sancta Doctoris sui erat autoritas, ut ab ejus sententia non discederent. Vobis illud infixum alte fedeat: Αὐτὸς ὁ λόγος ἔφα: Veritas ipsa dixit non solum, sed

sed & fecit. Illa ipsa Sapiencia, quæ cum sum illud *ἐγὼ εἰμὶ*, *ἐγὼ λέγω* inculcat, attendite vos VERBO & DEO, & illi, quæ se ipsam demonstrat, VERITATI. DEUM ipse definit DEUS: Ego sum, qui sum, neque enim aliter definiri potest, quam per ipsum: Ego sum; Ego dico; Ego facio. Illud scilicet VERBUM est, Sapiencia illa, quæ vocem suam audiri facit in viis, potens ille & verbis & operibus JESUS, qui cum efficacissimum illud sum *ἐγὼ εἰμὶ* pronunciaret, milites etiam armatos velut fulmine percellebat. Vera ab hoc VERBO solidaque paranda vobis Pietas, quæ plurimis hoc tempore nomen inane est, ac præter vocem nihil vivacitatis habet. Vos ipsi, hoc Doctore videritis, ne illud vitæ Verbum in ore tantum, sed ut Vitam Verbi in animis, in pectore ipso spirantem habeatis. Quod de Philosophia in Philologiam conversa querebatur olim Seneca, id in Theologiam dici nunc posse quis non videt? Neque enim illa quicquam præter Theologiam est, quæ verba tantum de DEO serere vel doceat vel discat. Multos habemus Chrysostomos, aurei oris homines, aureos montes, aurea byssinaque verba loquentes, sed paucos, qui fructum aliquem ferant, Polycarpus. Date ergo operam, optimi Juvenes, ut quod hodie humana induitur carne VERBUM, in vestrum quoque animis nascatur, sono illo suo non aures tantum stringat, sed ipsa pectoris penetralia perrumpat,

ac ubi mentes primum afflaverit, in voces prorumpat ipsi VERBO consonas. Neque enim illis, qui διφθόγγοι sunt, aut Sirenum vocibus aures commodant, aut ad insanam Babelis turbam ac inconditos strepitus obsurduerunt, hic locus est. Non amat VERBUM vel mentes vel lingvas distractas. Quæ si vobis sunt, subjicite illas VERBO, ut, quod olim indigestam rudemque orbis molem temperavit, vos quoque intra vos in ordinem redigat & componat. Invitat vos vocatque VERBUM, ad quod ablegatæ preces, velut ἔπειτα πλερένεια, vos quoque una secum in cœlos rapiunt, ipsique conjungunt. Nam si, ut apud Aristophanem est in Avibus:

τὸ τῶν λόγων ὁ νῦν τε μελεωρίζεται

Ἐπαίρεται τ' ἄνθρωπος

A verbis mens evehitur

Attolliturque homo:

quo non pertingat vel abducatur nostra oratio, præsertim æterno illo λόγῳ armata ac evocata? Facile enim & VERBUM ipsum exoramus, & per VERBUM omnia ipsosque adeo cœlos expugnabimus. Vos modo ita loquimini, ut vos non audiamus tantum, sed & videamus. Accipite pronis auribus, quas divini præcones, a VERBO nostro quasi repercussas voces quotidie vobis ingerunt, ne illi surdis narrare fabulas, aut verba facere mortuis videantur. Sic eveniet aliquando, ut quod Caro nunc factum est ac habitavit in nobis VERBUM,

BUM, et tumulis excitos illuc perducatur, ubi
 ἑνῶμα ἁρμονία, piarum mentium júbila, cœle-
 stiumque Geniorum hymni suavissimis con-
 centibus aures vestras æternum circumsona-
 bunt. P. P. Kiloni. d. XXV. Decembr. Ao.
 clb b c LXXIX.

3.

Lluxit nobis, Cives Academici, dies ille,
 quo DEUS humanâ care indutus, in totius
 orbis salutem natus est, in lucem hanc, justis
 temporum orbibus elapsis, ipsa patris sui
 Lux, & Verbum, è virginis utero processit.
 Agite ergo, dicamus bono hoc die, bona ver-
 ba, ipsi Verbo, cui nascenti aderant obstetricii
 sanctissimorum Geniorum concentus. Bo-
 nus ille dies est, quem fecit Dominus, imo o-
 ptimus maximusque dierum est, quo Opti-
 mus Maximusque Salvator laboranti rerum,
 naturæ & pereunti hominum generi sua
 nativitate subvenit. Vocabant non Græci so-
 lum καλὰς ἡμέρας sed & Latini bonos dies, quæ
 in honorem Deorum celebrabant, Saturnalia,
 Liberalia, Hilaria, Aphrodisia: & καλήμερσι
 dicebantur, qui illorum dierum studiosi erant
 observatores, ut μισοκαλήμερσι, qui profani,
 morosi, tetrici nulla festivitatis voluptate per-
 fundebantur. Adeste vos sanctiore sensu κα-
 λήμερσι, o Cives, & in hujus diei miracula ani-
 mos vestros oculosque convertite, ac effusis in

jubila lingvis, prono in pios amores pectore, tales vos gerite & ostendite, ut omnes longissime a profanis illis, qui *μισοκαλήμερι* salutabantur, abesse videamus. Eritis autem *καλήμερι*, si cum universo sanctiorum hominum cœtu, si cum cœlitum ipsorum suavissimis choris bona verba, non illa tantum in labris natantia, sed in ipsis præcordiis nata dixeritis. Elegans apud Judæorum philosophum præstantissimum Philonem vel fabula vel allegoria est: Deum, ubi hujus Universi machinam perfecerat, e Prophetarum suorum aliquo quæsisisse: ecquid sibi de opere hoc videretur; an omnibus suis numeris absolutum, an quadam sui parte laboret vel deficiat: respondisse vero illum: omnem hujus universitatis formam sibi videri undique expletam, unum autem se requirere horum operum laudatorem *λόγον* sive sermonem: illud vero Sapientissimo Creatori adeo placuisse responsum, ut genus quoddam canorum & Musicum ex una divinarum potentiarum virgine Mnemosyne produxerit. Quod si & nos piæ huic fabulæ locum relinquimus, excitanda in nobis hoc præprimis tempore illa harmoniæ vis est, laudesque Deo omnium rerum opifici cantandæ, qui ab æterno genuit Verbum omnium non hominum tantum, sed & cœlitum, omniumque orbium cœlestium, si qui sunt, concentibus celebrandum. Cecinerunt hodie aulæ æthereæ præcentores hymnos suos nato Orbis Salvatori, & Pastori-

bus

bus jam Deo cognatis, pacem salutemque annunciarunt. Hæc ad nos quoque pertinent, imo & ad Vos, o Cives Academici: flectenda in cantus lingua est, & quæ suavissimis modis verba præiverunt Angeli, omni intentione exprimenda, ut & mens & lingua vestra, cœlo consonet. GLORIA IN EXCELSIS DEO! PAX IN TERRIS! HOMINIBUS BONA VOLUNTAS. O quam suave hoc quod divinis his Phonaſcis docemur tricinium! quod cœlum cum Terra, Deum cum homine ineffabili harmonia connectit. Prima elatiorque vox Gloriam Dei ἐν ὑψίστοις canit: Infima pacem sonat in terris: media inter has bonam voluntatem hominum pulcherrima concentratione duabus illis attemperat. Cum Dei quæritur gloria, Pax regnat in terris, in hominibus bona triumphat voluntas, nulla suavior modulatio & Symphonia est, ut Pythagoricum illum Orbium hujus universi concentum præ illa fastidire, aut cum fabulis explodere possimus. Hunc nec aures nostræ capiunt, nec mentes: Illam non tam aures, quam mentes nostræ comprehendunt, & cum ejus imbuuntur tirocinio, jam tum in his terris, supra orbium inconditos strepitus vorticesque elati, divinæ voluptatis sensu perfusi, in cœlis ipsis versari sibi videntur. Quod si vero sua quædam etiam orbibus modulatio est, illa est, qua cœlos gloriam Dei enarrare, divinus dicebat Psaltes, quam canticis suis hic deprædicant Angeli, omnium etiam infantum

lin-

lingvæ extollunt. Acclamant Deo nascenti
 aulæ divinæ proceres, nostræ salutis causa tri-
 umphos illi canunt, qui super uno peccatore
 resipiscente lætantur in cœlis: & nos humi re-
 pentes homunculi, quos infinita sua gratia
 Deus respexit, non attollemus caput, ut glo-
 riam demus illi qui regnat in excelsis, excelfo
 super omnes gentes Domino? Exclamemus
 itaque exultabundi alta voce cum Paulo: Μό-
 νω σοφῶ, σωτηρίᾳ ἡμῶν δόξα καὶ μεγαλοσύνη,
 καὶ κράτος, καὶ ἐξουσία νῦν καὶ εἰς πάντας τοὺς αἰ-
 ῶνας! PAX EST IN TERRIS. Epinicion ca-
 namus, Victori Deo! Prostratus enim jacet,
 antiquus ille Draco maxima capitis deminuti-
 one, vel potius comminutione mulctatus, fru-
 stra jam in perniciem nostram intentus. Pax
 nobis cum Deo est. Sequester enim noster,
 hodie natus est, qui Deo nos conciliavit. Qua-
 re sancte custodiamus divinum hoc pignus,
 ne qua nos a Deo divellant dissidia, ut arctis-
 simo amoris & pacis vinculo & fratribus nostris
 jungamur, eo propius juncti Deo: ut denique
 in nobis ipsis, inque animo nostro pax nullo
 affectuum hostili insultu concussa regnet, &
 divinæ voluntati acquiescat. Atque ita de-
 mum BONÆ erimus VOLUNTATIS Homi-
 nes, si divinæ nostram subjecerimus. Nullus
 sine Deo Vir bonus est, ajebat ille è Stoicorum
 Schola Philosophus Seneca; nulla sine Deo bo-
 na voluntas, per quam sumus boni Viri, imo
 Christiani. E Romanis Varum gravem & bonæ

voluntatis virum depingebat Vellejus: *εὐπρεπί-
πελον* Græci dicunt: quod ut eximium Civis
boni elogium, ita & in Dei Civitate partes ab-
solvit maximas: nam qui bene & recte vult,
Deo autore bona faciet. Bonum itaque fa-
ctum, si bonam nobis mentem precemur mu-
tuo, & ut bonam in nobis conservet volunta-
tem Deus, qua ut nos bene volumus, ut aliis
bene cupimus & facimus, ita nobis bene volet
facietque Deus. Hæc pia vobis mente sunt,
recolenda hoc tempore, o Juvenes, ac præci-
nentibus ætherearum mentium choris vestra-
que pietati præmoderantibus, in eosdem vos
hymnos effundi æquum est. Quos meditatio-
ne etiam pia ante ipsum pervigilium præcipe-
re oportebat. Sed quam fœdas his diebus voces
emiserunt e vobis nonnulli. Quam discrepabat
ille vester a cœlesti Musica cantus! Illic audie-
bantur antelucana filiorum Dei jubila: Hic co-
messatorum boatibus personabant omnia.
Illic Gloriam Deo in excelsis accinebant æthe-
rei Phonaſci; Hic Baccho Eleleu suum & Evœ
acclamabant nocturni Stentores. Illic Pacem
Terris denunciabant divini Feciales: Hic plus-
quam militari barritu grassabantur Gigantum
fraterculi, clamoribus suis vel ipsam Cœlo Lu-
nam excussuri. Illic bona hominibus volun-
tas occentabatur: Hic ab ipsa bona mente dis-
cessum est. Quod si ex Aristoxeni sententia,
anima harmonia est, quam illa clamatoribus il-
lis ἀρμονία & ἀνάμικτος est! Irridebat Dio-
ge-

genes Musicos, quod chordas concinne aptarent, & mores haberent inconcinnos: quid de illis dicturus fuisset, qui Musarum sacra sequuntur, & quibus, ut Cicero ait, nihil virtutum concentu suavius esse debebat, si plusquam Bacchica Orgia & ipsa Corybantum sacra agitare vidisset. Si, quod Pythagoræis placuit, totus homo secundum melodiarum, quas edit vel audit, indolem, hujus vel illius Numinis receptaculum est: quo vos spiritu actos creditis, cum in Cyclopicas has voces & homine indignas prorumperetis? Neque enim comites vobis fuerint præcentores illi Angeli, sed vel tenebrarum ille princeps *ὁς περιπατεῖ ὡς λέων ὠρυόμενος*: vel illa

Nocturnis Hecate triviis ululata per urbes.

Exuite tandem, quicumque estis, malos illos mores, toties à nobis moniti, ne severius in illos animadvertendi nobis imponatur necessitas, ac divinis laudibus decantandis, Cantores Angelos & pios imitati homines, totos vos, quanti quanti estis, non in his tantum feriis, sed omnibus vitæ diebus impendite. Omnibus denique membris, Davidis exemplum secuti, sanctiorem istam harmoniam Deo edite. Cum illo, quando os oculosque cœlo attollitis; insonabitis: *Exultabunt labia mea cum cantavero tibi: Oculi mei semper ad Dominum.* Hinc cum manus protenditis, dicetis: *Elatio manuum mearum sacrificium vespertinum.* Cum in carnem vestram atque adeo in ossa ipsa ac interiora de-

descenditis, has ejus voces exprimate: *Caro mea exultavit in Deum vivum. Omnia Ossa mea dicent: Domine quis similis tibi? Confitebor tibi Domine in corde meo.* Ita quos corporis totius natura, figura & intentione motus ciebitis, velut cantu sonos, Deo consecrabitis, tandemque post beatum è terris excessum, cœlitum misti choris perpetuos triumphos per immensa seculorum spatia decantabitis. P. P. ipsis Natalitiorum Christi feriis. Ao. clb lbc LXXXI.


4.

QUando hodie Dei ἐνσάρκωθέν & memoriam celebramus, Cives Academici, quando divini amoris μεγαλειὰ extollit Ecclesia; illud nunc omni studio nobis agendum est, ut ad hujus contemplationem mysteriorum animos quoque nostros instituamus. Exosculemur illum Dei amorem, quem etsi non cœlorum orbes comprehendunt, non terrarum profunda terminant; cum Apostolo tamen omnibusque sanctis, ejus longitudinem, latitudinem, profunditatem, sublimitatem pio atque cœlestibus gaudiis immerso animo, quantum per nostram angustiam licet, metiamur. Novistis e Gentilium tum Poëtarum, tum Philosophorum Scholis, antiquissimum inter Deos haberi Amorem & Cupidinem, qui rudem hanc indigestamque molem primum digesserit, corpora
in

in ordinem redegerit, suis singula vinculis colligarit, suo omnia spiritu regat & moderetur. Illum in hymnis suis Orpheus mundi Architectum prædicat: illum Phœnicum Theologia, Eusebio teste, procreationis rerum omnium principium constituebat. Neque abludit Platoniorum Schola, quæ omnia Amore & Pulchro definire videtur: A superioribus enim ad inferiora perpetuus, si illis credimus, amoris fluxus est, ab his ad illa idem est, eademque per vestigia, quanquam tardior refluxus. Ut itaque reciproco amoris motu agitata natura in mutuis his amplexibus subsidat & gratissimæ quieti restituatur. Non opus est, Cives Academici, ut hæc gentilis sapientiæ vela æternæ veritati obtendamus. Neque enim solis illa radio, quod dicitur, sed ipsius Dei digito cœlestibus inscripta tabulis est. Deus ipse Amor est, quo ille titulo salutari maxime cupit, quo ille quasi charactere quodam noscitur, quem ipse, teste Apostolo, erga nos opere, verbis commendat, ut nos illum animo comprehendamus, lingvis eloquamur, amore mutuo provocemus! Quantus vero Dei amor est, qui ipse quantus quantus est, Amor est. Si secum habitare atque in arctum compingi non potest amor, immensus ille in immenso Deo est; & quis mortalium latitudinem, longitudinem, profunditatem, sublimitatem ejus assequetur? Qua orbis hic universis patet, imo qua ipse Deus, Amor ille tenditur, quanta,

la-

latitudo ! Ante omnium seculorum initia, cum neque mundus e nihili claustris prodierat, neque nos eramus, amor ille exarserat, quanta longitudo ! In terram, in stabulum, in uterum virginis, in animos hominum, imo hostium descendit. quanta profunditas ! In cœlos & supra omnes cœlos tollit tolliturque Amor ille. quanta sublimitas ! qui vel ipsa profunditate sua, cum per sublimitatem non possit, crescere videatur. Quod si Amor vulgato proverbio magis descendere quam ascendere dicitur, Dei quoque Amor primum descendit, atque ista descensione sua gloriam suam per omnes cœlos, per totum terrarum orbem omniaque secula diffudit. Cum orbem hunc condidit, in ipsam abyssum descendit, amor divinus, omniaque virtute Verbi produxit. Non enim audiendi sunt sapientuli Epicurei, qui mundum hunc & quicquid illo continetur, per particularum modum productum autumant. Ajunt vel deorsum illas moveri, vel sursum, vel ad latera, atque ex horum motuum concursu concrefcere illa corpora. Nihil illo stultius dici potest. Amor divinus (nam & illum *γῆνους* / *γῆν* cum Platone dicemus) cum se demitteret, ac deorsum moveretur, hæc corpora compegit. Agnoscite hic ejus profunditatem ! Idem cum se explicaret & ad latera diffunderet, vastitatem hanc expandit. Agnoscite hic ejus latitudinem ! Idem cum ultra cœlos cœlorumque orbes elatus est, illa nobis *ἀόρατα* & inaccessa

fabricavit. Agnoscite hic ejus sublimitatem! Primum hoc Amoris divini specimen. Sed quantum illud est ab omnibus seculis absconditum mysterium! quo nos per peccata æternum miseros, ab inferorum suppliciis æternæ salutis asseruit. Amavit Deus orbem, cum illum conderet; sed nunc ita amavit, ut & filium unicum humana carne vestitum in orbem mitteret, ut in mortis atrocissimæ supplicium pro redimendo humano genere traderet. Obstupescat hic humana intelligentia, hinc profunda admiratione, illinc religioso silentio suspensa. Neque tamen silentio abscondi illa fas est, quæ omnium Oratorum vocibus celebrari, omnium gentium, seculorum lingvis diffundi debebant. Excitemus potius lingvas in jubila etiam incondita! Prorumpant illæ gaudentium & gratulantium tumultuariæ voces: lapides ipsos solitudinesque in societatem hujus gaudii sollicitemus: quibus exemplo suo ipsi cælorum orbes, eorumque incolæ præludunt. Nunc verum illud amoris divini  veneramur, cum se ad istam humilitatem demittit. Amoris divini majestas in humilitate maxima est. Cum in utero virginis reconditur, in stabulum, inter fordes & pecudes abjicitur, cum servi specie divinitatem tegit, cum crucis infame supplicium subit, cum sepulchro componitur, quis non exclamet. *Quantus Dei erga homines amor est! Quid est homo quod memor est ejus? aut filius hominis, quoniam visitat eum?* Scilicet ut in
 sym-

symbolis suis humilitatem semper respexit Deus; nam in plantis vitem, in animalibus agnum, in avibus columbam elegit: neque in cedris aut excelsa Jovis arbore, sed in humili arbusto Moysi apparuit; ita cum homo factus est, quicquid abjectum vilissimi hominis conditio habere potuit, subire voluit, ut eo perfectior Amor esset, quo erat humilior. Illud quoque singulare in Amore divino est, quod, cum humanus amor similitudine animi & morum excitetur, ille e sola tantum bonitate processerit. Nam sui dissimilimos, peccatores, hostes suos homines amavit Deus, qui vel persecutorem suum Saulum, amore suo in Paulum convertit. Quo magis nobis opera danda est, ut ipsius similitudinem vita exprimamus, cum ille degeneres perditosque nos tanto amore persecutus sit. Dignus enim amore amor est, & ut amemur, imo cum amati simus, amabiles nos præstare æquum est. Amemus itaque Deum, ac primo omnium cognoscamus *ἡν ὑπερβάλλουσιν τὴν γνώσεως ἀγάπην*. Tantus enim ille amor est, ut stupidæ mortalium mentes ejus vim nulla cogitatione assequantur. Diligere amicos solemus homines, ob virtutem & merita; Nos vero Deus homines, æternus mortales, Optimus scelestissimos, Maximus qui nihil erant, non dilexit tantum, sed & amavit, atq; ita amavit, ut filium suum, ut unicum, ut pro hostibus daret. Quanta quam infinita Dei bonitas est! cui cum perditorum hominum facilis esset ja-

ctura, cum vel unius spiritus afflatu novos eosque innocentes creare potuisset, ne filio quidem suo pepercit, ut lapsos morti eriperet, ut hos è familia Adami perduelles servaret. Irruamus itaque o Cives eò cupidius in hos Dei amplexus, quo ille patentioribus ulnis nos exspectat. Sursum corda! Extollamus animos! Ascendat etiam Amor noster, ut descendenti de cœlis Deo occurrat, ut pectori ipsi visceribusque ipsis immergat, qui sanguini nostro inenarrabili mysterio misceri voluit, cujus ipsæ beatissimæ mentes spectaculo triumphant & exultant. Non debet intra pectoris penetralia coerceri ille amor, nimis enim angustè illic habitat, sensus ille omnes ac membra perrumpat: oculis scintillet, ut imaginem divini amoris menti fortius imprimat: aures ille aperiat, ut blandientis VERBI delicias excipiat: os & linguam solvat, *ut gustet quam suavis sit Dominus*: brachia manusque extendat, ut vel cum Thomâ amores suos palpet: pedes nostros erigat, ut in via Amoris dirigantur, vel Mercurii talaria circumposituri: pulmonibus ipsis spiret: in arteriis ipsis palpitet, ut simus Amatores *ὁλον ἁρδίοι*, *ut diligamus Dominum Deum nostrum ex toto corde nostro & ex visceribus nostris*. Non erimus inter illos Mundi Pamphilos, qui noctambulorum more cæco amore huc illuc feruntur, & in omni specie hærent, perpetui formarum inanium spectatores, qui in omni labyrintho animum circumducunt. *Dei amor suavis est*, inquit B. Augustinus) & *quietus*: nam

pectora que possidet suavitate & dulcedine replet. Amor verò seculi & carnis anxius est, & perturbatus: animas certe quas ingreditur quietus esse non patitur. Semper enim suspicionibus & perturbationibus variisque timoribus sollicitat eas. Tu itaque o Deus es delectatio pectorum & meritò. Qui intrat in Te Bone Domine, intrat in gaudium Domini sui. Hunc itaq; amemus totum toti, & è Pythagoræ præcepto Uni, nec variis votorum figuris divisi: nam cum illum amamus, qui omnia est in omnibus, nihil amare potius possumus: nulla enim humana, nulla terrena, utut splendida, utut illustria, pectus saturant, sed cor potius edunt, & animos strangulant. Æquum est ut illi reddamus, quod ipse a nobis efflagitat, *ἀντίδωρον*, Cor nostrum. Si Magi Orientis illi fructus obtulerunt, nos primitias cordis in strenam offeramus. Nos primo & ultimo, illud quod in nobis primum vivit & ultimum moritur, cor dabimus ut vitæ mortisque arbitro & qui nos vitæ æternæ asseruit, toti consecremur. Demus illi cor nostrum, quod quidem donum locupletiores ipsum datorem non efficiet, nam nullum a nobis Deo datur beneficium, nisi quod ipse paterno amore interpretari velit. Neque enim splendidum Solem fumosa facula illustraveris. Dabimus cum corde illi spiritus, ipse enim spiritus est ac pater spirituum: neque placere illi corpus; nisi corde obsequioso animatum potest. Hecatombas offert, qui columbas cum bono corde. Demus cor totum atque inte-

grum, non partem. Genuina enim mater, dividi nolebat filium. Deus quanquam amat tritum & fractum cor, non tamen vult divisum. Particulas ergo omnes vult non unam partem. Cor Deus requirit, non lingvas. Nil attinet lingua disertum, aut, quemadmodum fama à Poetis pingi solet, multis lingvis auribusque, præditum esse, nisi unum cor habeas, quod omnia capiat, e quo omnia in tot lingvas egrediantur. Vel suspiria fracta a corde fracto provenientia omnem eloquentiam superant. Non manus illi excordes placebunt. Potior, enim Scævola est in operibus bonis cum bono corde, quam Briareus centimanus sine illo. Non Capita ille tantum & cerebrum requirit, id est meditationes inanes disputatiunculas argutas. Nam quod vulpes olim in fabulis: o pulchra capita si cerebrum haberent: nos de iis dicamus: o pulchra capita si cor habeant! Quo doctiores sumus, eo magis ignorantia arguimus nos ipsos, qui in effectis eruendis copiosi, in causis succumbimus. Multum strepitus excitamus in rebus, quarum ignorantiam prodere honestius longe esset & utilius. Prosteamur potius veritatis illam & bonitatis sapientiam, quæ omnem superat scientiam, inque illa nos exerceamus, quo Deo similes reddamur. Hujus quoque in nobis altitudinem, latitudinem, profunditatem ad divini amoris exemplum spectemus. Ascendat amor filiorum ad Patrem, imo evolet. Si in illo flamma amoris

ris est, vel scintilla in nobis sit, aut reflexus aliquis a sole radius sursum ad Patrem illum luminum tendat. *Deus charitas est* (agnoscite verba Johannis) *& qui manet in charitate, in Deo manet, & Deus in eo.* Nihil amore nostro sublimius, si pulcherrima quasi ἀνθεώσας in Deum extollitur. Succedat altitudini statim latitudo & profunditas, eodem nos docente amorum Magistro Joanne: *Charissimi, si sic Deus dilexit nos, & nos debemus mutuo diligere.* Divini Amoris luce irradiata mens latiores sparget radios, aliosq; etiam infra se positos illustrabit. Quod corporibus olim in creatione insitum fuit: *Crescite & multiplicamini*, idem animis quoque nostris dictum esto. Non steriles illos sed fœcundos esse voluit Deus, qui quo plura spargent amoris sui semina, eo majori cum fœnore adolescere videbunt. Quod si Deus ipse, qui nihil a se humani alienum esse voluit, qui ipse homo factus est, tantum habet humanitatis, ut nihil neget petentibus, tantum & nos adjungamus ad humanitatem divinitatis, ut necessitatibus miserorum subveniamus, hominibusque nos nostris beneficiis, si ita loqui licet, Deos præstemus. Quod si fecerimus, fortioribus nos vinculis inter nos Deoque obstringemus, amoremque mutuum firmabimus, ut jam spiritu divino pleni cum Paulo triumphos canere possimus: *Quis nos separabit a dilectione Dei? num afflictio? num angustia? num persecutio? num fames? num gladius?* In his omnibus superamus per

cum qui dilexit nos. Certi enim sumus, quod neque mors, neque vita, neque principatus, neque potestates, neque presentia, neque futura, neque altitudo, neque profunditas, neque ulla creatura alia poterit nos separare a dilectione Dei, quæ est in Christo Jesu Domino nostro. Valete P. P. ipso Natalitiorum Festo An. clb lbc LXXXV,

5.

QUOD iis accidere consuevit, Cives Academici, qui e servitute in libertatem, e tenebris in lucem, e morte in vitam restituuntur, ut insatiabili gaudio compleantur; id nos facere multo æquius est, eo tempore, quo Orci faucibus erepti æternam salutem recuperavimus: ut omni quo possumus pietatis sensu lætitiæ hanc anniversariam testemur. Quare quod semper nobis faciendum est, id nunc præcipue agamus, ut hujus beneficii magnitudinem animo revolvamus, & in hoc mysterio omnem spiritum, omnes cogitationes defigamus. Secedamus in nos ipsos & in mentis specula constituti τὸ τῆς εὐσεβείας μυστήριον, quod Apostolus nobis aperuit, ejusque abyssum attentius intueamur. Audiamus illum e cælo tertio ἐν τοῖς ὑπερχαρίοις Doctorem, cum illud ὁμολογούμεως μέγα μυστήριον nobis proponit, in priore ad Timotheum Epistola cap. III. commate XVI; cujus ille ἀποδείξιν Spiritus S. quasi digito delineatam

tam illic instituit. Quod si ad accuratiorem, trutinam verba illa exigamus, mirifica brevitate integra illis Theologia continetur. Brevis illa de VERBO *περίοδο* quidem est, sed justa simul oratio, atque adeo omnes ejus partes complectitur; ut vix sexcentis commentariis eam emetiatis. Vel ipsum & argumenti & orationis *ὕψος* in exordio animadvertas, cum *ὁμολογούμεως μέγα μυστήριον τῆς ευσεβείας* vocat: tribus enim verbis omnes illos cati oratoris in sermone inchoando virtutes exprime re videtur: nam & attentionem a magnitudine rei provocat, & docilitatem ab evidentia ostendit: cum omnium conscientiam appellat, cum rem certissimam indubitataeque fidei esse ait: id enim vox *ὁμολογούμεως* profitetur. Mores atque affectus per veritatem, majestatem, ac pietatem, cujus ille mysterium traditurus est, declarat. Porro ipsa Mysterii vox, cum rem occultam significet, intellectui humano non pervestigandam, quæque Deum interpretem requirat, &, ut Apostolus ipse alibi *περιφράζει: τὴν σοφίαν θεῶν ἐν μυστηρίῳ ἀποκρυμμένην*: sacro horrore animum perfundit & in admirationem ac venerationem convertit. Neque tamen intra silentium nunc subsistit, hoc *μυστήριον*: quo apud Gentes abscondi falsa etiam sacra solebant, sed quoniam *ὁμολογούμεως μέγα* audit, ac Deus jam seipsum manifestarit, in populos nunc hoc præcone mittitur. Quod ut antea sanctorum Vatum oracu-

lis prædictum, divinarum mentium carminibus nunciatum, nunc a Paulo cæterisque Discipulis per orbem terrarum spargitur. Cum magnum hoc mysterium nominat, ideo magnum dicit, quod omnium gentium mysteria præ uno hoc summo, immenso nihili sint facienda: & quod imaginum & typorum mysteriis olim adumbratum, nunc in plenitudine temporis revelatum sit, omnesque ad illud populi non ut spectatores tantum & ἐπόπται, sed etiam ut sacerdotes (hujus enim tituli prærogativam ipsa ἀποκάλυψις tribuit) quam amplissime invitentur. Præterea Pietatis hoc mysterium non sine causa Paulus vocat. Ad homines enim potius, quorum saluti hoc destinatum est beneficium, quam ad Deum ejus autorem relatum vult. Quare cum divini amoris, clementiæ, sapientiæ, bonitatis mysterium dicere potuisset, majus quid sibi dicere visus est, cum pietatis mysterium nominat; ut vel ex ipso hoc nomine salutem nostram discamus. Inutile enim nobis divini amoris foret mysterium, nisi in pietatis nostræ mysterium, vita integra sanctisque moribus converterimus. Magnificum Orationis Paulinæ προοίμιον, quanta quam mirabilis illa Θέσις excipit! Θεὸς ἐφανερώθη ἐν σαρκί. *Deus apparuit in carne.* Hoc scilicet illud est à seculo absconditum, mysterium, in quo cogitationes nostræ stupent, lingua obmutescit, totaque mens nostra fatiscit. Neque enim jam amplius in si-

mu-

mulacris divinæ promissionis hæremus: sed ipse DEUS oculis nostris conspiciendus, manibus palpandus sistitur: verba ejus audivimus, vestigia terris impressa vidimus. Atque adeo ὁμολογούμενη, hæc Salvatoris nostri fuit Ἐπιφάνεια, qua se toti orbi manifestavit. Eant jam suamque ostendent Θεογονίαν Gentiles: Nos Dei ἐνσάρκωθέντος Ἐπιφάνειαν, in Christo Salvatore, unico DEI filio, celebramus. Hujus ἀποδείξεις ordine nunc adducuntur ab Apostolo, ut veritas eò sit manifestior, neque à quoquam in dubium vocari possit. Percenseamus illa ejus τεκμήρια, è quibus aliqua cum ipsa Ἐπιφάνεια sunt conjuncta, aliqua illam consequuntur; postremum verò complementum reliquorum in assumptione gloriosa consistit. Ac primas hîc tenet, character ille & sigillum Spiritus: nam ἐδικαιώθη ἐν πνεύματι, si quis illum ἐν σαρκί esse negatum iverit: ut ἐκ τῶ ἐναντίων major probationi vis & efficacia accedat. Spiritus ille divinus, qui profunda DEI scrutatur, ejus obumbratione conceptus est, qui illi in Baptismo supervenit, qui in miraculis ejus se exeruit, qui post ἀνάληψιν ejus, se in Discipulorum vertices effudit, suo ubique rei veritatem suffragio comprobavit, & vel invitis & reluctantibus, (quorum in numero Paulus quoque fuit,) fidem extorsit. Ad veritatis enim potius declarationem, quam ad justitiæ probationem, verbum δικαιοσύνη hic refertur: etsi non desunt,

sunt, qui posteriori quoque sensu acceptum velint: quod à mente tamen Apostoli alienum esse videtur. Idem quoque ille Spiritus est, qui in nobis de Christo testimonium perhibet, & nos πνευματικὸς facit, ut cum sensu non liceat, intelligentia γὰρ νοερά & illud præcipuè mysterium complecti possimus. Nam, ut ipse ad Corinthios scribens Apostolus, ait, quæ oculus non vidit, nec auris audivit, nec subierunt cor hominis, DEUS per Spiritum suum nobis revelavit: qui nunc quoque Spiritus ὁμολογούμενος tum per se ipsum, tum in Christo, in vatum oraculis, in animis nostris testimonio τὴν τοῦ Θεοῦ φανέρωσιν confirmavit. Succedunt Spiritui Angeli, quos è secunda Classe testes Paulus producit. Ex tribus enim ille Ordinibus, à cælo ad terram, Deo, Angelis, hominibus documenta illa sua conquirat. ὃ φησὶ, inquit, ἀγγέλοις, *visus ab Angelis*. Nam hominibus ille quidem ἐν σαρκί manifestatus, à mente nostra non nisi per Spiritus παιδαγωγίαν comprehensus: (quod enim non Petro: nec nobis caro & sanguis revelarunt) Angelos verò ἐν σαρκὶ ὡσεὶ suæ testes αὐτοψίας, præcones, satellites habuit. Qui tamen ipsi non intentâ adeo visione vel cognitione hujus mysterii fundum penetrarunt, ut non majore usque desiderio in contemplationem ejus ferrentur, & in illud quasi remoto paululum velo παρακύψαι laborarent. Hi scilicet arcanorum con-

sci-

scii, & divinæ voluntatis interpretes, antequam conciperetur, prædixerunt. Hi nato acclamarunt: cum Satanas tentaret, ministros se præbuerunt: hi in angustiis animi consolabantur: hi è mortuis suscitato; hi in cælum ituro comites; hi testes fuerunt: ut & hac parte ὁμολογῶντως φανερωθῇ τὰ censere possimus. Tandem ut per tres orbium & mundorum ordines ἱερομέγιστον hoc argumentum suum deducat, & veritatem illam ὁμολογῶντην & magnitudinem mysterii probaturus, subjungit illud: ἐκηρύχθη ἐν ἔθνεσι, *predicatus in gentibus*, Scilicet per Lucem & Vocem Θεοφάνεια hujus mysterii processit. Diffudit se æterna à Patre LUX, mirabili illa sibi que tantum cognita emanatione & Θεοφάνεια: patuit hinc Angelis: orbi se novo fidere prodromo ostendit: venit in mundum, ut illuminaret omnem intellectum. In principio fuit hoc VERBUM: Angeli annunciarunt: Prophetæ prædixerunt, : Apostoli prædicarunt, perque omnes populos disseminarunt. Ad homines tendit unicè, ut apud illos præcipue sit ὁμολογῶντως μέγα μυστήριον: quorum saluti infinito amore suo DEUS prospexit. Neque tamen venerabilis ille Apostolorum ordo hunc Θεάνθρωπον

Montibus & Sylvis studio jactabat inani:

sed, quod summum est hujus mysterii mysterium, & efficacissimum ad ἀποδείξιν robur, Θεοεύθη ἐν κόσμῳ, *creditus in mundo*: ut nihil jam amplius restet, quam ut ὁμολογῶντως μέγα

μυστήριον cum tripudio efferamus, & vetere illa formula: Ὅπερ ἔδει δείξαι obfignemus. Vere enim ultimum in hac ἐπιφανεῖα Fides est, per quam verè μυστήριον Ἰῆς εὐσεβείας in nobis nascitur, principiumq; Ἰῆς ἐν δόξῃ ἀναλήψεως, quā ultimo hic loco, velut ἐπίλογον orationi suæ Apostolus subnectit, ut nos ad eundem scopum collineemus; Ac credit hic quoque quasi in orbem oratio, quæ ut Θεὸν ἐφανερωθέντα ἐν σαρκὶ ἐκ τοῦ οὐρανοῦ ἐν τὴν γῆν deduxit, ita extremis verbis in cælum reducit: ut vel ex mysterii hujus consummatione, ejus exortus pateat: atque ita à meta ad carceres, spatio jam confecto, hæc ἀπόδειξις recurat. Vos jam, ὦ Cives, animos vestros totos in hac contemplatione defigite, ejusque ἀπόδειξιν vim perpendite: quæ non in *persuasibilibus humane sapientie verbis* consistit, sed in illa, quam ἀπόδειξιν πνεύματος καὶ δυνάμεως alibi Paulus vocat: hic in fronte probationum suarum collocavit. Longa nobis instituenda esset oratio, ὦ Cives, si quemadmodum etiam in vobis illud μυστήριον Ἰῆς εὐσεβείας, excitari debeat, dicturi simus. Nam procul hinc abesse debent profani & ἀμύητοι, & apud quos μυστήριον Ἰῆς ἀνομίας regnat. Hic sane in vobis etiam nasci debet, & sua quadam ἐπιφανεῖα declarari. Accedet testimonium, Spiritus, qui intra vos *de vobis ipsis, quod filii DEI sitis*, testabitur. Testabuntur Angeli in societatem & ministerium pietatis admissi. Ipsi quoque homines, quos mutuo amore comple-

plectimini, de hujus in vobis mysterii *ἐπιφάνεια* testabuntur. Fides denique ipsa omnium ordinum consensu ac suffragio *ὁμολογῶντες* DEI non filios tantum, sed & fratres confirmabit, atque in ejusdem gloriæ possessionem immittet. Valete P.P. ipso Natalitiorum festo Anno clb lbc LXXXVI.

QUI a Christo nomen ducimus, Cives Academici, hujus diei, unde omnis nostra salus est, memoriam ita celebrare debemus, ut nullum nobis sanctiorem felicioremque illuxisse credamus. Cum alii in natali die suo magna efferri lætitia soleant, quid nunc Christiani non faciamus? qui nostris natalibus perdit, per hujus, qui hodie natus est, natales, veris sumus natalibus restituti. Si natali die veteres se mutuo salutare, & hac formula: *Hodie nate salve!* fausta, sibi quæque precari consueverunt: Quidni & nos salutemus? *Hodie nati salvete!* A nato nobis Salvatore salvete! Non enim tantum ante tot, quot numeramus secula, sed ante omnia tempora, ab æterno natus est, hodieque nascitur JESUS, per quem nos ipsi hodie nascimur, vel potius renascimur. Atque utinam vel hodie renascamur omnes, qui nondum sumus renati, & cum anniversario Christi natali nostros illos, nulla morte terminandos, celebremus, ne inter hesternos promissores & perpetu-

tuos procrastinatores cadaveri nostro, quod circumferimus, immoriamur. Quod enim corpori nostro anima, id animæ nostræ Christus est: Ut illa exspirante illud in cadaver dissolvitur; ita sine Christo anima nostra tota fatiscit, tota vitiorum putredine corrupta æterna morte interimitur. Hodie ille nascitur, perpetua illa & jucundissima annunciatione. Quod *εὐαγγέλιον*, quæ bona verba (illa enim in natali die occentari olim solebant) quilibet sibi dicta putet, ut ipse nunc quoque nasci velit. Semper novum, nunquam antiquum est, quod hominem innovat. Novus ille Homo est, qui nunquam veterascit, & veram vitæ novitatem nobis largietur, ut veteris illa Adami pelle exuti, novi ipsi homines eo parente generemur, in novam vitam illo pane quotidiano adulescamus. Quem heri nudiusque tertius tot divinorum Vatum oracula nobis prædixere, illum hodie natum & in nobis renascentem celebremus, ut crastina die in cœlis ejus majestatem consanguinei, fratres, filii videamus. Si in natali suo die Genio litarunt mero & placentis, melle, oleo, thure Gentiles; nos Genio Geniorum, Salvatori nostro, non hominum tantum singulorum sed & universi hujus Genio, hoc die humanum corpus induenti, nos potius ipsos offeremus, cui auro, thure & myrrha venientes ex Oriente Magi olim litabant. Ille vero & pane & merò, carne sua & sanguine, genios nostros animosque pascit,
ut

ut ejus potius muneribus nos vivamus, quam ille nostris indigeat. Quamquam si illi cor nostrum, si animum, omnesque animi nostri vires demus, nihil illi svavius acceptiusque daturi simus. Tria olim natali suo a Genio vota, Mentis bonæ, Famæ, Fidei sinceræ Gentiles optabant. Quidni & illa a Salvatore nostro expectemus? unde bona mens in nobis, nisi ab ipsa illa prima Mente, ab illo πανταγαθῷ, a quo omnium bonorum rivuli quasi inexhausto Oceano procedunt? Unde fama nobis bonaq; existimatio, nisi a Domino gloriæ, cui gloriam in excelsis divini Phonsci occentarunt? Unde vera illa fides, nisi ab illo, qui per efficax vivæ fidei semen, nos ad novam denuo vitam generat, omnique suo spiritu perfundit. Sollicite in nativitatis suæ præsides stellas inquirebant, & ab earum revolutionibus ac configurationibus certiora sibi fata arcessebant; at alio nobis Horoscopo natales nostri æternam sibi salutem spondent. Nam quæ e Jacob oritur stella, ille Justitiæ Sol, ille ex Oriente fulgor, cum nos lucis filios generat, omni illo, si quod est, siderum fato exemptos, ipsis illis Phosphoris accenset, ut omnem Genethliacorum calculum, ipsis illorum astris majores, contemnere possimus, ipsique nobis dies, horas, annos felices efficiamus. Habeant illi suos genituræ Dominos: ille, qui hodie nascitur & naturæ & regenerationis nostræ vitæque Dominus est: Sint illis exaltata in domiciliis a se confectis si-

dera; habeant illa sua, certis sedibus distincta vel gaudia vel detrimenta: O nos felices, si in illo exaltemur, qui in terram descendit, ut nos attraheret & ultra sidera evectos, in æternitatis arce, ubi multæ sunt in domo Patris ejus mansiones, collocaret: ubi pleno illo solidoque gaudio, ab omni detrimento immunes, fruamur. Habeant illi suos in astris significantes & promissores; alia nobis signa signifer Agnus sustulit, quem agmine facto sequamur: Tenetur nobis e promisso ipsa Veritas. Servabit nobis fidem, in cujus ore nulla unquam, fraus reperta est. In maximorum Regum natalibus, quæ non olim solennia instituta, qui apparatus, quæ convivia, qui ludi & nonnunquam cruenti! Non defuere etiam hic plusquam regis cerimonis. Applausere cœlorum orbes: hymnos cecinerunt Angeli; Reges in terrorem coniecti: alii gratulatum venerunt: primitiis martyrii infantes Infanti DEO præluserunt, ut secuturis per tot secula piorum hominum cœdibus auspicio essent. At ipse Rex, cum nascitur, ad æterna nos convivia vocat, & nunc quidem, mirabili modo, in præsepi, super alimentis bestiarum jacet panis angelorum & hominum. Non aberunt nostris quoque natalibus sua solennia. Nam, si in Johannis Baptistæ nativitate οἱ περὶ τοὺς ἄγγελοι καὶ οἱ συγγενεῖς συνέχαιρον; si hic nato Salvatore gaudia, sua concentibus testabantur Angeli, etiam iidem in cœlis, omniumque beatarum mentium

cœtu, lætitiæ suæ documenta edent, si peccator veris per Salvatorem suum natalibus restituitur. Candido olim vestitu utebantur natali die veteres, diemque illum albo lapillo notabant. Nova ergo & nos byssinaque veste induamur, abjecta immunda sordidæ carnis voluptatumque toga, quali virgines animæ habitu coram throno Agni apparent, manibus palmas gestantes, & sanguine ejusdem Agni tinctæ. Induamus ipsum, qui hodie nascitur, JESUM, veram illam candidamque natalem vestem, quam commendat nobis Apostolus, sine qua ad nuptiale Regis nostri convivium indigni hospites, & vel centonibus tecti, vel plane nudi accedemus. Quod si quemcunque vitæ suæ diem, quo magna aucti felicitate erant, pro natali suo coluerunt veteres: nam cum ab exilio revocaretur Tullius, hunc natalem reditus sui diem vocabat, lætumque agebat: idemque alii faciebant, cum magnis honoribus ornarentur: quidni nos facere æquum est? quidni & nos natalem hunc diem vocemus, quo in exilium ejecti, per exulem cœlo DEum, & cœlo & paradiso restituimur: quo divinæ cognitionis jure cohonestamur. Valet omnino hic, quod Princeps humanæ eloquentiæ Cicero in Republica ab interitu conservata pronunciat: *Non minus jucundi atque illustres sunt ii dies, quibus conservamur, quam illi, quibus nascimur: quod salutis certa lætitia est, nascendi incerta conditio: & quod sine sensu nascimur, cum voluptate conserva-*

mur. O igitur omnium plausibus extollendum diem! quo conservamur, iterumque nascimur, & temporum contagio erepti æternitati vindicamur. Agite ergo o Cives, ita hos DEI HOMINIS natales celebrate, ut cum illo iterum nascamini. Delete ex animo illas veteris Adami formas quotidianas, & nova hac μεταμορφώσεις in novam Christi formam adolescite, quæ vel hodie cœlesti in vobis semine surgat, cumque tempore in plenum virilis ætatis robur excreseat. Videte, ut in vobis vivat Christus vera fide, spiret ardenti pietate, operetur efficaci amore. Moriantur veteris Adami in intellectu cœcitas & ignorantia, in voluntate peccandi appetitus, in oculis malæ libidines, in ore calumniæ & mendacia, in auribus obstinatio, in corpore ebrietas & ingluvies, in manibus rapacitas: omnia vero ita renascantur & innoventur, ut intellectu sitis ad veritatem lyncei, voluntate ad pietatem armati, memoria in mysteriorum divinorum meditatione assidui, oculis in divina luce arripienda perspicacissimi, auribus ad obedientiam omnem, promptissimi, lingvis in divinas laudes disertissimi, brachiis ad concordiam pacisque complexus, manibus ad justitiam & liberalitatem propensi. Ita nascitur nova in vobis ac divina illa forma, cujus nativa facies pietas, cujus anima virtutis imago, cujus vita perpetua Christi imitatio, cujus membra bonorum operum instrumenta sunt: ita vobiscum in vitam vestram

stram ipse DEus coalescet. DEus enim in vobis erit, quo agitante calefcetis, *ille operabitur in vobis & velle & perficere*: Ille bonus erit bonis. Si amores vestros ipsi consecraveritis, respondet ille vobis: *Ego diligentes me diligo*. Quò propiore ad illum gradu accedetis, eo propiorem vobis sentietis: *Appropinquate DEO*, inquit Jacobus, *& appropinquabit vobis*. Si de fortunis vestris ejus pauperibus largimini, audietis illud: *Date & dabitur vobis*. Quicquid denique volueritis, Rex vobis Psaltes ejus nomine occentabit: *Voluntatem timentium se faciet*. Vivetis toti in DEO, vivet in vobis DEus, ut non in terra, sed in cœlo, quanquam mortali corpore vestiti, ἱσάγγελοι vivere, & post vestrum e terris excessum, non tam mori, quam vitam continuare æternam videamini. Valete P. P. festo Natalitiorum Christi die, Ann. clc lcc LXXXVIII.

7.

AUdivistis elapsa æstate, Cives Optimi, Pacis Cimbricæ εὐαγγέλιον: Circumsonuerunt aures vestras illæ plaudentium voces, neque nunc, ut arbitramur, mentibus vestris exciderunt: Quare vel nunc ad amabile illud Pacis nomen evigilate, cujus signum Pacis ille Princeps, JESUS CHRISTUS, hodie orbi immissus, sustulit, cujus εὐαγγέλιον æthereæ mentes hominibus nun-

ciarunt: ut in animis nostris habitare tandem
 incipiat, quæ agris domibusque nostris rece-
 pta est, eamque in templis & aris nostris per-
 petuo pietatis cultu veneremur. Quod enim
 præstantius, quod divinius humano generi da-
 ri munus præter pacem possit? quæ summi Nu-
 minis indivisa comes nunc quoque cum nati-
 vitate ejus, ut certissima Θεῶν ἐνσαρκωθέντες
 tessera, descendit, & publicis cœlestium proce-
 rum jubilis proclamatur. Hæreamus paulu-
 lum in pulcherrima illa specie, pascamur blan-
 dissimo illius vultu, irruamus in ejus amplexus
 & hanc nobis Divam vitam, moribus, omnique
 bonæ piæque mentis apparatu conciliemus.
 Neque enim gratiora DEO pro restituta Patriæ
 Pace solennia agitabimus: neque hunc diem
 religiosiore cultu prosequemur. Toti terrarum
 Orbi pax ab Angelis indicitur: ac præerat tum
 maximæ terrarum parti AUGUSTUS, cujus
 auspiciis, post composita bella, diuturna pacis
 tempora inciepiebant. Nam Jani templum,
 sub ejus imperio per tot annos clausum fuit, ut
 & rubigine portæ ejus obducerentur. Nasci
 sub pacifico orbis principe voluit Salvator, qui
 pacis legibus custodire imperium, quam ex-
 tendere vi armorum maluit, & cum Orbis pa-
 cis Civilis, non perpetuæ sed temporariæ spe-
 ciem saltem ostenderet, ille veniet in orbem,
 ut animi pacem, ut æternam, sanctam hujus
 exemplo & typo delinearet, in se vero vitæque
 sua perfectissima veram illam divinamque pa-
 cem,

cem, summus inter Deum hominesque Sequenter, proponeret, suaque morte nobis obsignaret. Est & hoc inter pacis symbola, quod nascitur eo mense, cum Romæ in seculi aurei memoriam,

— — *quo sine militis usu*

Mollia securæ peragebant otia gentes,

SATURNALIA agerentur, quæ dudum ante ipsam Urbem conditam tam Italia quam Græcia, & (si Goropii Becani lib. 4. originum Antverpiensium, quem Cronia inscribit, miras in his delicias non spernimus) ipse Noachus, in Arca, eo die, quo primum juga montium ex aquis apparere cœperunt, singulisque deinceps annis, magna religione celebraverat. Unde postea cum ipso Noachi (hunc enim Saturnum & Janum esse volunt) in Italiam transitu, ejus festi diei memoria vetustissimis Italiæ inquilinis Etruscis, custodita semper fuerit & in Romanos veteres, qui Etruscos perpetuos sacrorum doctores habuerunt, propagata. Non parum quoque his rebus fidei accederet, si quæ de Etruriæ originibus Postellus singulari libro tradidit, veritate niterentur, ut sane omnibus undecunque conquisitis veri coloribus rem suam ornandam suscepit. Verum, nos sua Gentilibus relinquemus Saturnalia, & nostra illa bonæ piæque mentis SATURNALIA in ejus honorem, qui hodie veram nobis quietem ac pacem è Cœlo reportavit, qui aureū orbi seculum restituit, celebrabimus. Ad hæc

enim solennia nostra vos invitat oratio, non ad illa, quibus comeffationibus compotationibusque indulgebant degeneres Romuli nepotes, & qui à sobrio majorum cultu defecerant. Multa in Saturni honorem ab antiquissimis illis sapientibus dicta sint, qui ut pietatis sapientiæque conjunctas rationes habuerunt, ita Saturni quandam intelligentiam comēti sunt, Thronis ex Angelorum ordine subiectam, unde velut portâ quâdam, divinæ virtutes in orbem & in universum genus humanum emitterentur. Ac Hebræorum sanè veteres Magistri, cum tribus illis *Kether*, *Chochmach* & *Binah*, *Coronâ*, *Sapientia* & *Intelligentiâ* divinitatis sphæram comprehendunt, τῷ *Binah* respondentem constituunt intelligentiam Saturni, quem *Gedulah* vocant, fiderum septimi, unde Sabbathismi, quietis, pacis, tranquillitatis designatorem, nomenque שבת *ipfi datum perhibent*. Sunt qui Dei ferum illum vocant, qui divinos afflatus suscipiat, inque Saturnios suos, fideri suo subiectos, effundat. Julius Firmicus & Ptolomæus ex Astrologis egregie Saturnum suum, nullo præsertim alio influxu impeditum, characterismis describunt, ejusque genio in nativitate imbutos præ cæteris prædicant, ut qui segregati à societate & in se collecti silentio, sublimi ingenio arcana Dei & naturæ acrius perscrutari cupiant, recti sint rerum æstimatores, solidi & firmi in consilio, longa providentia, stabili sermone, animi rectitu-

tudine, intemerata fide, in amicitia integri & incorrupti, quique, ex Hebræorum sententia, cum Thronis fiant viva DEI sedilia. Non quidem nunc illa vel Hebræorum veterum, vel Chaldæorum ac Astrologorum myſteria excutiemus: ſibi illi ſuiſque ſapiant. Nos vero ſi mores hos, quales ille è Saturni Theſauris nobis depromunt, è Spiritus divini Schola expreſſerimus, ſi è mundi turbulento mari in bonæ mentis portum ſecedentes divinæ nos poteſtati permiferimus, ſi perpetuo veroque Sabbathiſmo cœleſti arcana ſpeculati fuerimus, ſi fidem Deo, amicitiam hominibus probaverimus: vera illa, Chriſtiano homine digna divinaque, ſine profanæ ſuperſtitionis contagio, SATURNALIA celebrabimus. Erimus ita, ut cum Hebræis loquamur, viva DEI ſedilia, cum Pacis ille Princeps in animis noſtris naſcetur, tanquam in cunis ſuis requieſcet. Extruamus hodie naſcenti in nobis CHRISTO nova illa Pacis regna, veri Hieroſolymitani Cives, qui veram Pacis viſionem, (unde Solymorum nomen dicitur) animo comprehendamus. Vivemus tum Saturnia aureaque illa ſecula,

— — — & vindice nullo

Sponte omnes ſine lege fidem rectumque colemus:

*Pœna metusque aberunt: nec vincla minacia
collo*

Ære ligabuntur: nec ſupplex turba timebit.

Judicis ora ſui, ſed erunt ſine iudice tuti.

Missitabant Romani mutua sibi munera, cum Saturnalia celebrarent sua. Nobis è thesauris cœlestibus optimum maximumque Pacis Donum, cumque illo Deus ipse, qui se Pacis Deum vocat, mittitur. Sit & illud inter nos Pacis donum reciprocum, qua Deo jungimur, secernimur mundo, sed ita, ut in uno Pacis Deo jungamur. Conviviis illi se excipiebant; nos mutux charitatis officiis amorem pascamus. Festum hunc diem illi luminibus accensis colebant, & cereos amicis largiebantur: nos animi nostri lucernas a Patre illo Luminum, & ab illa Luce, quæ hodie in mundum venit, accendamus, & de nostro lumine aliorum fomites & scintillas excitemus. Illi herili dignitate exulta servis ministrabant: nos in honorem ejus, qui cum Dominus Cœli & terrarum esset, servi tamen speciem assumpsit, diademata, coronas, infulas, omnes fortunæ phaleras, omnem pompam excutiamus: omnes vero, quos infra sortem nostram illorum conditio abjecit, non fraterno tantum amore complectamur, sed & omni officiorum pietatisque genere illis serviamus. Jungimur scilicet communi illo Pacis vinculo: nulloque jam discrimine, Tros Rutulusve fuat, liber an servus, habebitur: cum omnem peregrinitatis speciem, omne servitutis nomen Pacis divinæ gloria extinguat. Velint alii a victis gentibus dici, Africani, Vandalici, Parthici: inter triumphos nostros numerabimus, si Pacis alumni, aut (si splen-

splendidioribus titulis delectamur) Filii Lucis vocemur. Pax nobis cum Deo est, qui non amplius ut Zelotes inter montis Sinai fulgura, sed placido lumine descendit. Non cum lege divina bellum est: neque enim litera occidens nobis sistitur, sed salutis & vitæ verba in Pacis evangelio nunciantur. Non hic malleus petras confringens, non tonitrua insonuere; sed suavissimo Angelorum modulamine per universum terrarum orbem amabile Pacis nomen diffunditur. Quorsum ergo ruitis mortales, & in arma, latrocinia, lites insana rapti vertigine præcipitamini? Ubique enim Sophoclea illa Erynnis πολύχειρ, πολύπυς, χαλκίπυς grassatur, omnesque hominum ordines, occupavit. Vel in ipso, qui reliquis exemplo esse debebat, sacro & literatorum ordine, quid non litium sæpe ferunt, qui facundiam suam clamoribus, doctrinam altercationibus, toga sanctitatem metiuntur: qui cum lanceis ensibusque non ausint, stylo tamen venenato se confodiunt. Quid vobis fiet, Christiani Reges, & si fas est dicere, Christianissimi? qui crucem, salutis insigne, in perniciem eorum, qui per crucem servati sint, convertitis. Christianus est, qui panem porrigit esurienti: at vos esurientibus eripitis, messes integras, totque annorum labores conculcatis, flammis absumitis. Christianus sitienti pocula præbet; vos totas vindemias effunditis; Christiani præterea sanguinis helluones. Christianus men-

fæ suæ pauperes admovet, vestimentis tegit,
 tectis excipit: vos veteres colonos ejicitis, bo-
 na diripitis, incendiis, ruinis omnia miscetis.
 An surdis nunc narrantur fabulæ, cum Pacem
 cœlestes chori proclamant? An ille sonus au-
 res vestras prætervolat? Annon tot miserorum
 ejulatus Pacem vobis extorquent? Sed frustra
 quidem eam ab illis sperabimus, nisi Θεὸς ἡμῶν
 ἰνὸν Χανῆς intercesserit, aut in solitudinis nomi-
 ne pacem quæsieritis. Vos vero, o Cives, de-
 quietis, in hoc patriæ nostræ recessu, sedibus
 vobis gratulamini: vos Deo Pacis nostræ au-
 tori statorique maximo, gratias agite, atque
 ut toti Christiano orbi eandem largiatur, sup-
 plicatum ite: Vitam porro omnem ita institu-
 ite, ut a servitute cupiditatum, a dissidiis mun-
 di & carnis immunes, in illa Pace, quam hodie
 Angeli nunciarunt, quamque Salvator noster
 ipse se daturum promisit, æternum conquie-
 scatis. Valete P. P. ipso Natalitiorum festo
 Ann. clb lbc LXXXIX.

8.

Quando nati hodie Salvatoris memori-
 am anniversaria pietate celebra-
 mus, Cives Academici: animis ad
 religionem compositis, cogitatio-
 ne ad Deum conversa. hujus mysterii magni-
 tudinem, divini amoris cœlestisque Gratia
 inexhaustum fontem contemplemur, & ad ista

μεγαλῆια cum cœlestibus Geniis per orbem terrarum diffundenda lingvas acuamus, ora solvamus, omnes nervos spiritusque intendamus. Sic DEUS dilexit mundum, ut filium suum unigenitum daret: Accipiamus τὰν ἀμφοῖν tantum munus! Qui antea in Prophetis locutus est, nunc novissime istis diebus in Filio locutus est. Divino præcepto monemur: *IPSUM audite.* Hunc ille nobis Magistrum dedit, quem sequamur, quem audiamus, cujus ex ore divina oracula hauriamus, qui in viam veritatis reducat. Excipiamus ergo divinum Verbum non auribus tantum, sed & animis: frustra enim auribus excipitur, quod animo non asservatur, ut illic velut e fecundo agro in bonam segetem succrescat. Ejiciamus malorum Dæmonum voces, non ad animum, non ad aures admittamus, ne mussitantis quidem Diaboli verba feramus, cujus clamoribus alii ita obsurduerunt, ut divina illis oracula tanquam furdis fabulæ narrentur. Excipiendum nobis Verbum illud est, non ut aliquot dierum hospes apud nos moretur, non ut in angulum aliquem secedat: sed ut in nobis habitet, regnet, dominetur, ut stagnantis instar fluvii toto pectore, ore, lingua diffundatur. Qui intra ambitionis & avaritiæ suæ spinas verbum hoc suffocant, qui ad scientiæ humanæ ostentationem eo abutuntur, qui fortunarum suarum rem faciunt, sacri præstigiatores & nundinatores sunt, & cum Juda denuo Christum ven-

vendunt. Audiamus IPSUM, & illud *Αὐτός*
ἔφα animo nostro infixum habeamus, ut vel
 aurium porta aditus ipsi permittatur, a quo
 non aures tantum sed & oculos avertant Judæi,
 non intelligentes vel potius contemnentes
 verba Filii, ad quos toties per servos suos Pro-
 phetas Deus locutus erat. Quorum tamen &
 ipsi verba, apertosque sensus pessimi inter-
 pretes non recte acceperunt. Quotqvot enim
 Prophetæ fuerunt, prologi summi istius *λέγξ*
 fuerunt, longaue præfatione Verbo nostro
 præluserunt, usque dum Vox clamantis in de-
 serto, Joannes Baptista, exerto digito oculorum
 & mentis caligine laborantibus Judæis illud o-
 stendit. Quod in principio erat Verbum, per
 quod omnia facta sunt, caro factum est. Pa-
 rum enim nos juvare poterat, in principio cre-
 atum fuisse cælum & terram, creatos fuisse ho-
 mines, nisi hoc Evangelio significatum nobis
 fuisset, in principio fuisse verbum, cujus lu-
 mine ad vitam æternam illustraremur. Nulla
 hominis erat vel in hoc orbe creato, vel in tem-
 pore, vel in universa rerum natura, vel in co-
 gitationibus ejus felicitas, nisi ultra naturam,
 ultra mundum & tempus, ultra spes cogitatio-
 nesque suas in æterno hoc Verbo salutem suam
 invenisset. Illud erat mysterium a seculis ab-
 sconditum, quod in ipso Evangelii sui exordio
 S. Johannes, ceu repentinum quendam fideris
 exortum mortalibus declaravit. *In ipso*, in-
 quit ille, *vita erat*, & ab illo in mentes illa no-
 stras

stras velut inexhausta scaturigine derivatur. Nulla est vita nostra, nisi quæ in ipso & per ipsum nobis ducitur: sine quo mortis mancipia, tenebrarum filii, viva cadavera vocabimur. Vita beata, vita æterna unica vera vita est, & in solo Verbo divino absolvitur, quo vivificantur animi, quorum vita omnis in cognitione DEI & Amore divino consistit. Illo suo pane, qui de cœlis descendit, illi vivunt: hoc pane vivo & divino nutriuntur, saturantur. Amor famis instar est, quæ cœlestem hunc cibum appetimus. Meditatio concoctio, qua illum in succum sanguinem spiritumque nostrum convertimus. Quemadmodum non solum ciborum ingestione nutriuntur corpora, sed tum demum, cum in venas illorum vis diffunditur; ita DEI verbo animi nutriuntur, cum illud motibus eorum & actionibus jungitur, luminisque sui radiis adhsistit. Nunquam nisi cum luce vita est, illiusque ministerio hæc in sensibus operationibusque suis utitur. *In ipso, inquit Johannes, vita erat, & vita erat lux hominum.* Neque nos vivimus hac Verbi vita, nisi hujus quoque luce illustremur: & cum ipsa Voce Lux mentibus nostris affulget, quemadmodum olim in creatione hujus universi statim e tenebrosa ejus mole cum Verbo prima illa Lux erupit & diffundi cœpit, aut e spissa nube tonitru non sine fulgore auditur. Vivamus ita, o Cives, ut hujus quoque Verbi luce illuminemur, sine qua ne vivere quidem dicemur, qui-

quibuscunque etiam facibus ducamur, quocunque etiam vanæ sapientiæ æstu συζητηται ἡ αἰὼν ἡ ζωὴ, ut Apostolus epist. ad Corinth. I. vocat, agitemur. Veniendum nobis in possessionem horum bonorum est, quæ a Verbo nobis divino proveniunt, ut per illa vitæ æternæ spes, etiam cum hic vivimus, inchoemus. Neque enim sterilis illa ac inanis cognitio eorum nos juvat, nisi & amore eorum rapiamur, nisi divina illa sapientia pectus nostrum quoque impleat, suaque luce illustret, suo igne accendat, suo spiritu ad se convertat, volentesque & pronos impellat. Ac frui jam tum felicitate æterna incipiemus, cum ita vivimus, ac quasi in cælo, & in beatarum mentium consortio his in terris versamur, post temporis hujus decursum ad complementum ejus felicitatis perventuri. Provocemus illam lucem piis precibus, o Cives, & fomitem illi in nobis excitemus, ne in tenebris illorum deprehendamus miseri tenebriones, qui lucentem in mediis tenebris lucem non comprehenderunt. Quales ii sunt, qui nativa quadam mentis cæcitate laborant, malitiæ & nequitiae sordibus obvoluti, aut ex gentes, quas, ut Paulus ait, *Dimisit Deus ingredi vias suas.* Sed tamen & ipsis tenebris lucere illa Lux non definit: animorum hoc culpa evenit, si pauci meridiem & auro-ram ejus, aliqui tenue diluculum apprehendant. Latitant quædam æternæ Veritatis scintillæ in illis, prorumpunt interdum sapientiæ &

& pietatis radii ab circumfusa Verbi luce evocati, quorum fulgor à tenebris supervenientibus facile suffocatur, si suas ipsi tenebras ament, suæque se nocti permittant. *Deus, inquit Augustinus, semper paratus est dare lucem suam, non visibilem, sed invisibilem, sed nos non semper parati sumus accipere, cum inclinamur in alia, & rerum temporalium cupiditate cæcamur.* Deleamus ergo ex animis omnes illas tenebrarum formas, ut verbo & Luci toti illipateant. Recipiamus eum qui hodie natus est, qui locutus est nobis, Dei Filium: *Quot enim receperunt eum, dedit eis potestatem filios Dei fieri, ut luculento illo Joannis testimonio discimus.* Qui è Parentibus nati sumus, cæca quadam sorte mortale hoc corpus nacti sumus; è voluntate carnis nati. Nunc itaque cum Deo & è Deo nascamur, ut vitam divinæ similem habeamus. Qui Parentes nostri fuerunt unius momenti beneficio hoc nomen, ut nos ab iis vitam, obtinuerunt. Sed ita Pater est Deus, ut continuo in nobis agat, semper mentem illuminet, suique in nobis amorem ingeneret & conservet. Quo si titulo non exciderimus, , qui filios nos gessimus, filiorum & heredum jure aliquando in cœlis triumphabimus. Valete P. P. ipso Natalitiorum festo Anno clb lbc xc.

IN FESTUM PASCHATOS.

9.

Celebramus diem, Cives Academici, quo æterna lux mundum hunc illuminans, ipseque justitiæ Sol, Salvator noster Jesus Christus vel ante auro-ram oritur: quo è sepulchro suo ipsa vita emergens gloriosissimæ vitæ restituitur, ut mortales omnes mortis faucibus ereptos secum ejusdem æternæ vitæ & felicitatis redderet possessores. Advertite animum ad tanti sanctitatem mysterii, ~~et~~que mente tanti beneficii magnitudinem revolvite, cujus spes ad morem divinum veramque virtutem vos accendere potest, sine qua omnis hæc, quæ nobis ducitur vita, misera foret & injucunda. Magna hæc est Philosophia nostra, nec sane in triviis Sophistarum, sed divina schola, non in pulvere scholastico nata, sed è cadaverum cineribus alte eruta sapientia: quod corpus hoc ab anima sua sejunctum, in minutissimum pulverem redactum, suis iterum elementis redditum iisdem idem particulis colligi, eodemque cum anima vinculo sciamus colligari. Nihil docuit unquam hujus, quæ ab hominibus excogitata est doctrina: Nam cum mundum hunc intueretur, fluereque omnia, suisque obnoxia muta-

tationibus & corruptionibus animadverteret, ultra communem tamen naturæ legem ejusque limites proferri non potuit, nisi à DEO ipso duceretur. Quamvis enim non omnia letho finiri multi suspicarentur potius quam scirent, & de mentis nostræ immortalitate præclara quæque differerent, profunda tamen hujus fuit doctrinæ ignorantia, ut à Philosophis Atheniensium cultissimis, cum eam profiteretur Paulus, effusissime rideretur. Acciditque idem aliis in barbararum gentium oras delatis, ut referunt non semel itinerum scriptores. Quare Sancti Patres in persvadendo hoc gentibus dogmate, à quo communi adeo consensu abhorrebant, vehementer laborarunt, conquisitis undique magna diligentia, argumentis, quibus saltem non absurdum illud, aut ab ratione sana alienum probarunt. Neque enim firmioribus ea in disputatione documentis uti potuerunt, cum ea quæ docebantur non natura nota, & necessaria quadam illatione sequerentur, sed à libera DEI voluntate & potentia dependerent, quo telo illi semper hac in causa militarunt. Eleganter eam in sententiam Minutius Felix loquitur: *Quis tam stultus aut brutus est, ut audeat repugnare, hominem à DEO, ut primum potuit fingi, ita posse denuo reformari? sicut de nihilo nasci licuit, ita de nihilo licere reparari? porro difficilius est id, quod non sit, incipere, quàm id quod fuerit iterare. Tu perire DEO credis, si quid oculis nostris hebetibus subtrahi-*

tur? *Corpus omne sive arescit in pulverem, sive in humorem solvitur, vel in cinerem comprimitur, vel in nidorem tenuatur, subducitur nobis: sed DEO elementorum custodi reservatur.* Est scilicet solius hoc divinæ potentiae opus, quæ sola illud liberissima sua gratia & voluntate efficit, ut attendi hic Judæorum commenta non debeant, qui in cadavere humano superstes aliquod vitæ semen, ossiculum, quod illi Lutz appellant, non quidem quod pueri in faba, de quo multa notat in Miscellaneis suis Pocockius, invenerunt; vel rorem etiam in cælo asservari, quem in terram ex æthere descensurum, ut cum pulvere cadaverum commistus ea reficiat & reviviscere faciat, fabulantur. A quo errore non adeo immunem sentio Thomam Brovvn Anglum libri de religione Medici autorem, qui cineres hujus universi a conflagratione superstites semina corporum excitandorum, magnumque quoddam formarum chaos in se habituros contendit, non leviter ob id ab illustri Comite Digbæo, in observationibus Anglica lingua in eum librum scriptis, nec Latine, quod sciam, hætenus editis reprehensus. Erant tamen non exigua quædam Veritatis hujus in Theologia etiam gentili vestigia, quæ licet omnem rem non conficiant, indicio tamen sunt, plurimam ab omni ævo ejus rei fuisse famam, quæ primum per divinam revelationem hominibus cognita, cum sollicitè premeretur, in vulgus hinc delapsa non sine fabularum & er-

errorum admistione in animis hominum hæsit. De hujus universi per ignem *παλιγγενεσία* quid Pythagorici, Schola Ægyptia, Heraclitus, Stoici pluresque alii Philosophi docuerint, adeo notum est, nam integro pene libro de conflagratione mundi ea Hieronymus Magius inculcat, ut in his recoquendis operam ludere videamur. Memoriabilis tamen præ omnibus Senecæ locus est, quem hic adducam: *Reiectus e nostris sedibus, inquit ille, pellitur Oceanus & antiquus ordo revocabitur. Omne ex integro animal generabitur, dabiturque terris homo inscius scelerum, & melioribus auspiciis natus. Sed illis quoque innocentia non durabit, nisi dum novi sunt. Cito nequitia subrepat, virtus difficilis inventu est, rectorem ducemque desiderat. Etiam sine magistro vitia discuntur.* Alii vel ipsa naturæ vi & quasi morte aliqua totius mundum hunc interitum crediderunt, inter quos Epicurus, qui saltem in eo recte sensit, quod perpetuum eum non haberet: quanquam Christiana religio divinæ solummodo potentiæ adscribat. Alii propius ad rei veritatem accedunt, qui & eosdem homines, & eundem rerum statum reducendum arbitrantur, quod tamen temporum potius certis revolutionibus, infinita seculorum successionem semper redituris, & astrorum cuidam facto, quam voluntati divinæ imputant. Quæ doctrina ad Ægyptios, Indos & Judæorum etiam multos dimanavit. Orta hinc illa ab Ægyptiis decantata metamorphosis, qua animæ

hominum per variorum animalium corpora, & cœlestes etiam orbes peregrinari finguntur, donec corpori suo in extrema illa *παλιγγενεσία* restituantur. A quadam Chinenſium ſacerdotum ſecta, quæ Trimechau vocatur, reſurrectionem corporum credi memoriæ prodidit Ferdinandus Mendez Pinto Luſitanus in Itinerario ſuo, ſi modo fides haberi poteſt homini in aliquibus, ut videtur, non adeo bona fide verſato. Credi ab illis docet: tot annos homines ſub terra commorari, quot ſupra terram vixerunt; eis vero expletis animas illorum per continuas ſacerdotum preces ſeptennis alicujus pueri formam aſſumere, donec eas vires naſcæ fuerint, ut prius ſuum corpus poſſint inhabitare: tum vero in orbem lunæ evehi, ibique, poſtquam plures annos dormiendo conſumſerint, in perpetuam aliquam ſtellam mutari. Sunt porro & alii inter eos, qui brutis etiam animantibus pro toleratis hac in terra laboribus non immortalitatem animæ ſolum, ſed & a mortuis reſurrectionem, imo ipſos cœlos inaudita liberalitate promittunt. Ægyptios Auguſtinus *ſermone 120. de diverſis.* vel ideo reſurrectionem mortuorum credidiſſe autumat, quod cadavera ſua tam ſuperſtitioſa cuſtodiſſent diligentia, & a corruptione omni arte ſua immunes conſervaverint: Et duxit certe, hinc Plato aliquod pro immortalitate animæ argumentum. Apud eos hodieque ſingulis annis eo die, quo Salvator noſter expiravit,

ossa mortuorum resurgere, ejusque rei summam apud Christianos ejus loci fidem esse, Greaves in Pyramidographia, & in Itinerario suo Sandys tradiderunt: Quanquam prior ille sophismata sacerdotum intervenisse observaverit. Negari tamen nequit, apud Indos & quidem Peruvianos, qui ritum Ægyptiorum plurimos & ipsam etiam Hieroglyphicam ab illis scripturam acceperunt, hanc quoque sententiam de mortuorum resurrectione tenuisse, quanquam multis superstitionibus fœdatam: Cujus testis dignissimus est ipse scriptor Peruvianus l' Ynca Garcillasso de la Vega, qui ipse e Regia familia, lingua patria Regum Peruvianorum historiam scripsit, unde primum in linguam Hispanicam, hinc in Gallicam a quodam I. Baudoin translata est. Non indignum erit ea hic afferre, quæ ex Gallico hic Latina damus. *Credebant Incas, (ita appellantur Reges & qui e Regia familia) resurrectionem aliquam universalem, quamvis non ultra vitam præsentem animum erigebant, ad quam nos aliquando resuscitari sine aliqua vel gloria vel pœna aiebant. Summæ illis curæ erat securo aliquo loco unguium & capillorum custodire præsegmina. Quapropter solebant illa abscondere in fissuris vel in foraminibus murorum. Quos in terra jacentes forte capillos inveniebant statim tollebant & recondebant: unde sæpius quam ob causam id facerent ex iis quesivi. Et responsum omnes valde ridiculum dederunt. Omnes, dicebant, qui nati hic sumus, aliquando in hoc mundo reviviscemus (ne-*

que enim resurrectionis vox illis nota erat) animæque nostræ e sepulchris, cum omnibus iis quæ ad corpora nostra pertinent exsurgent. Ne autem multum tum laboris insumendum sit in quærendis unguibus & capillis, ob plurimos tumultus quos tot hominum turba creabit, eos collectos hic in uno aliquo loco reponimus, ut eo facilius tunc inveniamus. Qui unum in locum etiam sputa nostra, si fieri id possit, mitteremus. Eodem in loco idem autor è Francisco Lopez de Gomara adducit: quod cum Hispani e sepulchris Peruvianorum extracta Cadaverum ossa per terram disjicerent, ægre id tulerint, quod difficultas aliqua resurrecturis injiceretur. Laudat & ibidem Petrum de Cieca qui eadem de Peruvianis scribat. Et hæc quidem de Indis: nam de aliorum populorum monumentis non diserte adeo quædam hujus doctrinæ traduntur. Incidi tamen in vetustum aliquod Chronicon Saxonicum, lingua rudiore vernacula, ab anonymo aliquo scriptum, & cum primum typi invenirentur, publicatum, in quo Idoli alicujus Vandalici effigies delineatur, quod non obscurum resurrectionis typum exhibere videtur, nisi in dubium auctoris fides sit vocanda. Pingitur Cadaver humanum linteo indutum, lapidi insistens, manu baculum gestans flammantem: humeros leo insidet à mortuis illos resuscitaturus. Ita enim explicat Autor, & hoc Anno Christi 1116. Idololum, cui nomen a lapide FLYNS, Vandalos deserta religione Christiana erexisse memorat, quod postea

Dux

Dux Luderus & Episcopus Magdeburgensis Adelgotus dejecerint. Reperiuntur etiam, inter Islandorum fabulas vetustissimas quas Petrus Resenius edidit plurima de extremo iudicio, mortuorum resurrectione, mundi excidio sed infinitis nugis interspersa, quæ hic adducere nimis foret operosum. Verum quid attinet tenebras illas & umbras sectari, cum ipsa nunc clarissima nobis lux ob oculos versetur? Neque enim nobis nunc amplius res est cum hominibus tam imperitis & stupidis, qui gentium nugis quam divinæ veritati, totque rerum documentis, quæ in resurgente hodie Christo apparent, aures dare malint. Agite ergo, Cives Academici, perq; hujus diei memoriam eum vobis diem ob oculos sistite, quo ante ora Judicis vestri constituti extremam illam & irrevocabilem sententiam audietis. Videte, ne qui nunc tumuli lapidem perrumpit, JESUS, in pectorum vestrorum tumulo denuo exspiret, sed ita quidem vivat, ut & vos hujus spiritu agitados non vobis & vitiis, sed DEO & Virtuti vivere sentiamus. Valete P. P. Kilom d. XI. Aprilis Anno clc lxc LXIX.

 10.

Quando Vos, Cives Academici, ex instituto & observatione veteri, publica hac oratione salutamus, festo hoc die, quem DIERUM REGEM appell-

labat Gregorius Nazianzenus, DIEM LUCIS Chrysoſtomus; cujus olim in Eccleſia veteri per ipſos octo dies tenebant ſolemnia, quo effuſa omnium per domos, per vias regnabat lætitia: quid potius nunc faciamus, quam ut bono hoc die, quo bona verba dicenda nobis ſunt, PACEM vobis nunciemus: quam omnibus majorem triumphis redivivus è tumulo SALVATOR, ut optimum triumphorum ſuorum decus Diſcipulis ſuis largiebatur. Quo munere cum nihil ſanctius diviniusque ſit; quid eſt, quare non præ illo omnes Regum, Ducum, Imperatorum laureas, palmas, trophæa, atque adeo omnia gloriæ humanæ monumenta pro nihilo ducamus. Illi quorum omnis in armis & in bellica ferocia virtus verſatur, multum ad majestatem ſuam intereſſe exiſtimant: ſi quos per inſidias, fraudes, ſcelera, clades ſubegerunt populos, inter nominum & elogiorum ſuorum appendices circumferant: ſunt enim qui Africani, qui Numantini, qui Germanici, qui Britannici, qui Parthici, qui Gothici, qui Vandalici titulos oſtentant: At Noſter ille REGUM REX, cum univerſum hunc terrarum orbem, & omnem illam ἐξουσίαν τῶν σκώτους ſuis ſubjecerit pedibus, nunquam ſplendidiore ſe nobis titulo commendat, quam cum PRINCIPEM ſe PACIS proſitetur. Talem cum jam dudum non Veterum tantum Prophetarum prædixerunt oracula: ſed & qui natalitios ipſi hymnos occentarunt

Cœ-

Cœlestes Genii, cum PACIS PRINCIPEM in lucem editum scirent, gentibus omnibus natam cum ipso PACEM nunciarunt. Illi ipsi quos æternæ salutis præcones sibi elegerat, CHRISTUS, atque in omnes terras ablegaverat cœlestis doctrinæ promicondos, unam PACEM, & cum illa omnia sua & Christi secum, portant, velut divini quidam caduceatores & feciales. Quorum cum voces hodieque superstites auribus nostris animisq; illabuntur: quis non cum Paulo exclamet! ὡς ὡραῖοι οἱ πόδες τῶν εὐαγγελιζομένων εἰρήνην, εὐαγγελιζομένων τὰ ἀγαθὰ. Ipse Sanctissimus Salvator jam, terris discessurus supremam hanc Regni sui legem Discipulis statuit, cum PACEM illis SUAM, amoris sui pignus reliquit, ejusque propagatores & propugnatores designavit. Cum Pacificos omnes beatos pronunciat, ostendit, quales ipse Regni sui Cives velit: namque omnes τὰς μακρὰν καὶ τὰς ἐγγύς in bona paterna ire quasi decreto suo jubet: cum sub augustissimo illo FILIORUM DEI titulo in nomen suum assumit, & Germanitatis illis jura largitur. Quoties in olivarum monte, velut in cathedra PACIS(cujus symbolon exhibet Olea) ejus Doctor confedit! Illic principia fatalis & decretoriæ pugnæ, quæ PACEM nobis æternam triduana Victoris morte, triplicique triumpho comparavit. Neque enim Mors in vinculis eum tenere potuit, cum ipse esset, VITA: non Inferorum tenebræ implicuerunt,

cum

cum ipse esset VIA: non fraudum artifex Sathanas oppressit, cum esset ipse VERITAS: ut, itaque vel tribus potentissimis hostibus superior, non-fabulosus tricipitis Cerberi Victor, Hercules, ipsos in triumpho ducens, sibi gloriam, nobis PACEM acquisiverit. In vitam revocatus, quam ex ipso Virginis utero, eandem e tumultu PACEM, & quidem perfectam, in Orbem intulit, Discipulosque suos, ex eodem Olivarum monte ad cœlos abiturus, in ejus possessionem vocavit. Erigite animos, ad amabile PACIS nomen, Cives, PAX VOBIS! PAX VOBIS. Qua voce & vos alloqui Salvatorem nostrum credite. Nostis ipsi, qui in historia Romana non estis hospites, quo horrore in Carthaginensium Senatu bellum sinu suo effuderit Dux legationis Fabius: Pœnis enim tergiversantibus: *Quæ, inquit, mora est? In hoc ego sinu bellum pacemque porto: utrum eligitis?* Illis Bellum succlamantibus; *Bellum, inquit, accipite:* & e togæ suæ gremio in mediam curiam excussit. Vobis jam adest, Cives Optimi, qui non bellum, sed PACEM sinu suo portat: imo qui ipsa PAX est: *Αὐτὸς γὰρ ἐστὶν ἡ εἰρήνη ἡμῶν, ὁ ποιήσας τὰ ἀμφοτέρωθεν, καὶ τὸ μεσότοιχον τῶν Φεαγμῶν λύσας, τὴν ἐχθρὰν ἐν τῇ σαρκὶ αὐτοῦ:* Ut illa Apostoli ad Ephesios verba loco minime alieno commemoremus. *Quæ ergo mora est? An Pacem non accipitis? An vero ipsi bellum indicetis PACIS PRINCIPI, qui ne hostes quidem suos odisse visus est:* At quæ i-

ita pravitas esset & amentia? Quia PACEM vobis ex antiqua ipsius Magistri nostri & Ecclesiarum formula acclamamus. Eam enim jam olim in ritibus sacris usitatam fuisse docet nos S. Chrysostomus, homil. in Epist. ad Coloss. III. *Cum ingressus fueritis, qui præest Ecclesie, statim dicit: PAX OMNIBUS: Quando sermonem facit & concionatur: PAX OMNIBUS: Quando benedicit: PAX OMNIBUS: Quando jubet salutare: PAX OMNIBUS: Et rursus in intermedio: Gratia vobis & PAX.* Ideoque PAX VOBIS OMNIBUS, Cives Optimi, & hoc præcipue tempore, quo ipse PACEM suam nunciavit Christus. Accipite PACEM, atque intra vos illa PACIS divinæ regna condite. Vel ipsa voluntas, & piæ meditationes rapiant ad vos, atque intra præcordia vestra cogent e cœlis Deum. Comparebat hic JESUS in medio sancti senatus, ut Cor Corporis istius mystici: Aderit, & ille in medio vestrum *μεσίτης*, & cum illo PAX, quæ superat omnem intellectum: cujus suavissima vox non aures tantum circumsonabit, sed & pectora vestra saturabit, atque omne in vobis bellum tollet, omnes animorum motus compescet. In hoc velut Ecclesie suæ centro & nostro quies nostra est. Qui omnia est in omnibus, omnia erit in vobis; erit anima vestra ac velut in corpore & in membris suis operabitur: In vobis velut in cœlo DEUS suo habitabit: Hoc ille Rex in folio, Pontifex in templo sedebit. Hodie, Hodie, inquam, cum

vocem ejus audiveritis, accipite PACEM, nec
furdam ipsi aurem obvertite. Verum nunc,
proh dolor! cum PACEM ingeminat DEUS,
ad ARMA provocat Mundus: ut, quam adeo
sollicite nobis commendarat, post illum non
appareat PAX, aut cum ipso cœlos conscendi-
se videatur. Conjuratum est in bella: circum-
feruntur per provincias arma: vastitas agris
inducitur: omnis civibus succus sangvisque
exprimitur: cædibus, fraudibus, rapinis mi-
scentur omnia. Non miserorum preces & la-
menta, non populorum excidia, non exhau-
sta æraria, non crudelissima facinora, non ipsa
denique Salutis suæ cura ferreos homines ex-
pugnat. Quasi scilicet ideo bella suscipiantur,
ut semper gerantur; Quasi nihil humanitati
amplius relictum sit; aut ita demum ex natu-
ræ instituto vivatur, si omnium sit in omnes
bellum. Quam flagitiosam Autoribus suis non
invidemus sapientiam. Vos vero, Cives O-
ptimi, cum nulla bello, & ne paci quidem,
quam mundus dare solet, salus sit, meliora
ab Optimo Maximoque Magistro moniti, PA-
CEM cum Deo ac vobismet ipsis, PACEM
cum Magistratu fratribusque vestris peren-
nem fovete: quo genuinos vos & Dei & no-
stros Legumque Discipulos ostendatis. Una
certe PACIS ac AMORIS Lege id effeceritis,
ut nostras honeste glorioseque contemnere
possitis. Quod si nostra hæc cohortatio aurem
vobis non pervellit, illam, cujus imagine
char-

chartas nostras obfirmamus, Divam respicite, optimam maximamque Rerum Matrem PACEM. Quæ cum semper in conspectu oculisque vestris versatur, quando in insignibus nostris circumfertur, monere vos ipsa videtur: ne signorum, sub quibus togatam hætenus professi estis militiam, desertores audiat. Neque committetis vos, ut in hoc quasi PACIS regno hostiles vestri & rebelles animi deprehendantur, aut ipsa ejus imago PACIS fractæ reos, tanquam societate sua indignos excludat. Valete. P. P. ipso PASCHATOS festo ANN. clc lbc LXXIX.

II.

QUod de Memnonis statuis proditum est, eas ad solis exortum concentus edidisse suavissimos, id nobis, Cives Academici, hoc ipso die in memoriam revocamus, ut hac velut imagine, moniti religiosa discatis officia. Quid enim æquius, quid homini pio convenientius, quam ut in hymnos & jubila solvatur? non statua aliqua immobilis, sed mens æterni luminis radiis evocata; cum ante ipsam auroram, e sepulchro suo Vita, ab inferis Cælorum Dominus, e mortis vinculis Libertatis & Salutis nostræ assertor, e tenebris ac nocte sua, æternum illud Patris lumen, Sol Justitiæ JESUS CHRISTUS, in lucem prodit: ut mortales omnes, mor-

mortis faucibus ereptos, secum ejusdem æternæ vitæ & felicitatis videret possessores. Adverte animum ad tanti sanctitatem mysterii, accipia mente tanti beneficii magnitudinem revolvite; cujus spes ad amorem divinum veramque virtutem vos accendere potest; sine qua omnis hæc, quæ vobis ducitur vita, misera foret & injucunda. Neque enim audienda, que heri nudiusque tertius, e *sentietis & spinis* prodiit, scelerati Cavillatoris sapientia; qui, impio in Christiana sacrâ farcasino, ignaviæ nostræ sperata immortalitatis præmia imputat, quasi nonnisi mercede aut utilitatis tantum spe vitæ probitatem metiamur. Magna sane hæc est Philosophia nostra, nec sane in triviis Sophistarum, sed in Dei Schola, non in pulvere literario nata, sed e cadaverum cineribus alteruta sapientia: quod corpus hoc ab anima sua sejunctum, in minutissimum pulverem redactum, suis elementis redditum, iisdem idem particulis colligi, eodemque cum anima vinculo sciamus colligari. Nihil docuit unquam hujus, quæ ab hominibus excogitata est doctrina: Nam cum mundum hunc intueretur, fluereque omnia, suisque obnoxia mutationibus animadverteret, ultro communem tamen naturæ legem ejusque limites proferri non potuit, nisi a DEO ipso duceretur. Quamvis enim non omnia letho finiri, multi suspicarentur potius quam scirent, & de mentis nostræ immortalitate præclara quæque differerent;

rent; de corporibus tamen nostris in vitam revocandis, nihil illis innotuerat: ut a Philosophis Atheniensium cultissimis, cum doctrinam illam profiteretur Paulus, effusissime rideretur. Quare Sancti Patres in persuadendo hoc gentibus dogmate, e quo pleræque abhorrebant, vehementer laborarunt, conquisitis undique magna diligentia argumentis, quibus saltem non absurdum illud, aut ab ratione sana alienum, probarunt. Neque enim firmioribus ea in dissertatione documentis uti poterant, cum ea, quæ docebantur, non natura nota, & necessaria quadam illatione sequerentur, sed a libera Dei voluntate & potentia dependerent: quo telo illi semper in hac causa militarunt. Eleganter eam in sententiam Minutius Felix loquitur: *Quis tam stultus aut brutus est, ut audeat repugnare, hominem a Deo, ut primum potuit fingi, ita posse denuo reformari? sicut de nihilo nasci licuit, ita de nihilo licere reparari? porro difficilius est, id, quod non sit, incipere, quam id quod fuerit, iterare. Tu perire Deo credis, si quid oculis nostris hebetibus subtrahitur? Corpus omne sive arescit in pulverem, sive in humorem solvitur, vel in cinerem comprimitur, vel in nidorem tenuatur, subducitur nobis, sed Deo elementorum custodi reservatur. Est scilicet solius hoc divinæ potentiae opus: nam qui e naturæ virtutibus arcessunt hoc mysterium, vel inepte sapiunt, vel profane delirant. Facessant hinc cum officulo suo seminali Judæi, unde corpus novum proditurum fabulantur. Inanes*

etiam argutiæ quorundā sunt, qui in cineribus semina corporum excitandorum latitare autumant. Profanus impiusque nugator Pomponatius monstri quid alere videtur, cum in fraudem divinorum miraculorum resurrectionem corporum ad nescio quas abstrusas siderum, aut herbarum vires refert, ab illo qui earum, gnarus est, facile perficiendam; Apollonii Thyanæi in hanc rem usus exemplo, cujus tamen pleraque in invidiam Christiani nominis a Gentilibus conficta, ex perpetuo actorum, ejus, cum Salvatoris nostri actis parallelismo, non sine ratione conjecit Naudæus in libro illo, quo homines Magiæ infimulatos defendit. Erant tamen non exigua quædam Veritatis hujus in Theologia etiam Gentili vestigia, quæ licet omnem rem non conficiant, indicio tamen sunt, plurimam ab omni ævo ejus rei fuisse famam, quæ primum per divinam revelationem hominibus cognita, cum sollicitè preme- retur, in vulgus hinc delapsa non sine fabularum & errorum admistione in animis hominum hæsit. Nota sunt, quæ de hujus universi per ignem *παλλυγενεσία*, Pythagorici, Schola Ægyptia, Heraclitus, Stoici, pluresque alii Philosophi, docuerunt, sed de iisdem tamen hominibus in vitam reducendis altum apud illos silentium. Novos cum novo Orbe homines per vices suos redituros, magnus e Stoicorum familia Philosophus testatur. *Rejēctus e nostris sedibus, inquit ille, pelletur Oceanus, & anti-*

tiquus ordo revocabitur. Omne ex integro animal generabitur, dabiturque terris homo inscius scelerum & melioribus auspiciis natus. Sed illis quoque innocentia non durabit, nisi dum novi sunt. Alii vel ipsa naturæ vi & quasi morte aliqua mundum hunc interiturum crediderunt. Alii propius ad rei veritatem accedunt, qui & eosdem homines & eundem rerum statum reducendum arbitrantur, quod tamen temporum potius certis revolutionibus, infinita seculorum successione semper redituris, & astrorum cuidam fato, quam voluntati divinæ adscribunt. Quæ doctrina ad Ægyptios, Indos, & Judæorum etiam multos, imo & ad antiquissimos Septentrionum Incolas dimanavit. Verum quid attinet tenebras illas & umbras sectari, cum ipsa nunc clarissima nobis lux ob oculos versetur? Neque enim nobis nunc amplius res est cum hominibus tam imperitis & stupidis, qui gentium nugis quam divinæ veritati, totque rerum documentis, quæ in resurgente hodie CHRISTO, aures dare malint. Agite ergo, Cives Academici, perque hujus diei memoriam eum vobis diem ob oculos sistite, quo ante ora judicis vestri constituti, extremam illam & irrevocabilem sententiam audietis. Videte, ne, qui nunc tumuli lapidem perrumpit JESUS, in pectorum vestrorum tumultu denuo exspiret, sed ita quidem vivat, ut & vos, hujus spiritu agitados, non vobis & vitiis, sed DEO & Virtuti vivere sentiamus. Valete. PP. Kiloni. ipsis Paschatos feriis Anno clc lcc LXXX.

SI qui unquam lætitia singulari celebrandi sunt religiosi dies, hodierni illius nunquam ex animo delere memoriam debemus, quotquot æternæ salutis, ab illius temporis complemento, spes suspendimus Christiani. Triumphos sibi jam de JESU nostro ducere videbatur Judæorum malitia, militum furor, & omnis illa τῆς σκότης ἐξουσίας cum ultima nequitia in tumulto ejus obsignando manus imponeretur. Verum ille revulso & lapide & sigillo vitæ suæ redditus spem nostram obsignavit, & ad bonorum cœlestium hereditam velut fratres germanos evocavit. Quomagus summum illud ἀναστάσεως mysterium pia vobis mente versandum hodie est, Cives Optimi, qui ab hujus Antesignani nostri in vitam & in cœlos reditu, animos in corpora olim vestra quasi postliminio redituros speratis. Neque enim audiendum est infamæ hominum genus, qui ut voluptatum luto immergi erigere, ad cœlestia mentes nequeunt; ita hanc, quam habemus a DEO promissam resurrectionis spem cavillationibus suis labefactare non verentur. Præterquam enim quod divinorum librorum, quos violatis oculis legunt, contaminatis manibus attrectant, auctoritatem elevant; rerum naturæ ita adversari hanc doctrinam divinitus revelatam existimant, ut tanquam vanum quoddam commentum in suo nequitia ludo explodant. Est vero illis eo auden-

dentius occurrendum, quo magis incautos illi animos & Scholasticarum demonstrationum, opinionibus inflatos præstigiis suis occæcant. Ac primo quidem non adeo in aprico positam arbitramur hanc doctrinam, us absque doctore DEO, ejus injici aliqua suspicio philosophantium animis possit. Nam quæ supersunt ejus in Stoicorum scholis vestigia, latius evagantur; & quæ apud barbaras gentes, ac veteres Septentrionum filios in Eddæ, ut vocant, libris habentur ejus rei documenta, non aliis, quam sacris e fontibus, utut opinionum ineptarum sordibus incrustata, hausta videntur. Si ipsum adversus Sadducæos disputantem audimus Salvatorem, duos ille nobis cardines, quibus omne hoc mysterium volvitur, ostendit: Scripturas & Potentiam divnam, adeoque erroris illos & ignorantia arguit, qui ejus argumenti vim & efficaciam non intelligunt. Ac quanquam sacra illa anchora est, qua utendum nobis in hac velitatione: tamen ad subsidiariam quasi pugnam adversus impurissimos sciolos adducendum est: non esse illam naturæ, quam isti jactant, contumaciam, ut in ordinem se redigi ab opifice suo non patiatur, nec corpora ex iisdem particulis collecta, animis suis inquilinis, velut depositum e promptuario suo subministret. Neque vero morari nos in ipso limine debent morosæ quorundam argutunculæ: qua corpora nostra ratione una eademque dici possint: præsertim cum tantus sit ma-

teriæ sensim per ætates accrescentis decrescen-
 tisque fluxus, ut tot annis a primis ungviculis
 disjuncti, non mutati tantum a nobis ipsis, sed
 pene alii videri possimus. Ac fuerunt sane qui
 miris dubitationibus & quæstionibus totam
 hanc doctrinam ita intricarunt, ut cum in nu-
 be illa notionum suarum quasi *μελέωρι* versa-
 rentur, non invenirent, ubi pedem figerent,
 ac conquiescerent: Peruvianis non dissimiles,
 qui doctrinæ hujus, incertum unde, persuasi,
 diligentissime & ungvium criniumque præse-
 gmina, & sputorum fordes servabant; ne ad
 redintegranda olim corpora illa sibi deessent.
 Non est tam rigido capienda sensu *αυτότης* illa,
 ut ad ungves ac pilos descendamus *τερχοτόμοι*:
 cum ipsa ætatum intervalla, dum continuo a-
 liquid materiæ abradunt & adponunt, corpus
 nostrum eo pene in statu relinquant, quo de-
 cantata illa Thesei navis ferebatur; cui idem
 nomen, toties tamen mutatis tabulis, mane-
 bat. Videmus quam varie figurata exhibean-
 tur nobis corpora, quæ materia tamen una con-
 stant. Abit in glaciem aqua & in tot formas
 metalla, sola partium diversa locatione: cum
 eandem materiam corporum illa reductio o-
 stendat. Minus itaque laborandum in his mi-
 nutiis est. Quidni enim ex materia corporis
 nostri qualicunque superstitie effectum dede-
 rit Deus infinita illa agendi efficacia? Cui facil-
 limum est eundem ex hoc velut semine redu-
 cere hominem, ut e costa viri formaverat E-
 vam.

vam. Quod si naturæ & homini licere hoc voluit summus ille Architectus: ut vel e cinere novam ejusdem speciei plantam producat (id enim fieri posse docuit nos arcanior scientia,) quid non possit ipse hujus Universi dispensator supremus? Ex uno tritici grano (quo exemplo Divus etiam Paulus in mysterii hujus explicati-
one utitur) vel centena per generationem efformari novimus. Rationes jam quis subducatur illarum partium, quæ ex unico grano in spicas tot granis gravidas per tot spatia effusæ sunt & dilatatæ, Natura obstetrice exiguam, materiæ portionem adeo ingrandescere videmus: & divina potentia ex ossibus cineribusque suis revocari corpora nostra posse dubitabimus? Versantur nobis ob oculos quotidiana rerum exempla, in quarum vel generatione vel compositione plus est secretioris naturæ, quam humana mens vel cogitando assequi possit: & in his mysteriis tam arguti sumus scioli & cavillatores. Conjicite oculos in oblatam Ezechielii speciem, ac videbitis quam graphice illic depingatur corporum ex ossibus, stabili maximeque solida illorum materia, excitatio. Quæ ut prima quasi stamina duxit natura, ita ultima relinquit istius massæ, ad novi quasi corporis ideam reservata. Quorum si vel aliqua superfuerit portio, annon eadem facilitate ex illis corpus integrum refecerit DEUS, quæ ex unico grano tot alia natura producit. Nam quod in nobis ossibus inducitur, ut ex alimentorum

succis adventitium est, & mobilioribus sui partibus quotidie gliscit assiduaque perspiratione expellitur; ita a DEO, tanquam summo metatore, vel ex illis latibulis, in quæ concessit evocari, vel suppleri similis materiæ appositione potest, ut tamen ipsissimum, quod ante fuit, nobis corpus relinquatur. Quæ omnia qui attentius consideraverit, facile inveniet, quod argutatoribus istis reponat, quorum palmarium est, & in quo sibi maxime placent, hoc argumentum: Ajunt cadaveris partes quam celerrime fatiscere & dissipari: Si a bestiis devoretur aut ab Anthropophagis; in alterius animalis ac hominis succum & sanguinem converti: unde revocari in primi corporis fabricam nequeat, quod ab altero in sui partes adoptatum. Qui cum ista objiciunt, hominem non ut animal, a primo embryone per continua ætatum incrementa in istam molem porrectum, sed ut statuatam æream vel marmoream intuentur. Cum enim non possint in custodia corporis ac in eodem situ retineri partes fluidæ, emigrare illæ velut solo suo possunt, ac aliud quærere domicilium, illo iterum turbandæ, & in illum quem natura præscripserit ordinem, redigendæ. Quæ cum in vivis corporibus non efficiant, ut alius ab infante senex habeatur; an nunc tam accuratam earum in cadavere rationem habent? Quod si in viventibus determinatam aliquam molem aut figuram ad αὐτότητα illam definiendam non requirimus: quare in cadaverum mi-

minimis varieq; coagmentatis partibus anxie illa & cum omni pulvisculo conquirunt. Nec tamen illarum, utut toto cœlo oberrantium, particularum ulla metuenda jactura est. Esto denique in corporis alterius societatem assumptas esse partes corporis nostri carneas, quæ illis in alimentum cedant, ut in nobis illarum textura ex alimentis concrevit. Major est illarum etiam sic migrantium perennitas, quam quis credat, Quæ cum sensibus nostris deprehendi possint in carnibus, succis, liquoribus animalium, certo sibi genere pastorum: qui non durent, etiam cum illarum subtilitas pinguiorem sensuum facultatem excesserit. Oculos habemus, lynceos illos corporum speculatores: Quot vero illis objicere species potest Proteus ille inter metalla Mercurius? qui jam in vaporem, jam in aquam, jam in crystallos, jam in pulveres varie coloratos abit, ac nisi in pristini corporis figuram igne tortus rediret, nullam sui suspensionem nobis relinqueret. Infinita sunt, quæ adferri in exemplum possunt. Et fieri talia in animalium naturis posse quis negatum iverit? nam major inquirendi difficultas in corporibus, quæ laxioribus spatiis continentur, rei veritati præjudicare non debet. Neque tanta est materiarum diversitas, ut in unam aliquam & communem redigi naturam nequeat, a qua cum per solam motionem, figuram, situm discrepent partes illæ, ex illo velut promptuario refingi possunt. Quæ

vero faciem figuramque illam circumferunt, continua illa corporum percolatione velut in orbem lapsæ, e peregrinis etiam sedibus, quo coloniam duxerant, prioribus vindicari dominis, & ad pristina redire domicilia, ubi Opifex ille summus jusserit, possunt. Exploratum est illis, qui corporum recessus & abdita rimantur, metallici generis particulas in limpido liquore sibi junctas, sed oculo non deprehendendas, alterius metalli solo appulsu, ita turbari posse, ut uno temporis momento, velut ex alveolis quibusdam prodeuntes, suis quæque locis colligantur. Quod si hos in simpulo fluctus movere artifici licet, si reducere partes tam late divisas naturæ ope possumus: an dubitet quis, posse circumvolitantes in hoc Universi Ocreno nostrorum corporum particulas, aut aliis corporibus immerfas, in suas quasque sedes divina illa voce & manu compingi? Illud enim præcipue in omni hoc negotio respiciendum est: non naturæ quadam vi aut impulsu talia confieri posse, sed solius Dei efficacia. Cujus cum ideam impressam habeamus Philosophi, notitiam atque familiaritatem Christiani: quem cum plus posse & scire sciamus, quam per materiæ dispositionem aut motionem in natura ordinariam præstari possit: quidni corpus pristinum ex materia restituere, illique animum jungere posse credamus, qui orbem hunc terrarum, & ex aliqua ejus parte corpus humanum condidit mentemque illi inspi-
ra-

vit. Cujus miraculi non pauca specimina Historia sacra consignavit. Quis vero de potentia, quis de veritate divina dubitet? nam voluntatem suam in divinis libris declaravit Deus: potentiam infinita ejus efficacia & sanior ratio ostendit. Quare qui dogma hoc impugnant, ipso Salvatore judice, cum Sadducæis errant, scripturas potentiamque Dei ignorantes. De illis certa nobis atque explorata omnia: Huic nemo nisi effrenatæ mentis litem movebit. Ac summus profecto hebetiore ingenio homines, non modo ad sapientiam cæci, sed ad ea ipsa, quæ aliqua ex parte cerni videantur, obtusi: quam ut divinam operandi rationem, si naturæ etiam subsidio hoc in mysterio utatur, comprehendamus. Quod si enim puerilis intelligentiæ vim & notionem fugit: qua ratione inaccessorum montium altitudinem, locorum remotissimorum distantias, terrarum mariumque circuitus metiri ingenio possit artifex. Si lunæ solisque defectus ad temporum momenta prædictos; si literas ad tot passuum millia loquaces: si horarum indicatrices machinas cum stupore mirati sunt barbari rudesque, sed homines tamen & ratione præditi Americani: Quid nobis in tam profunda abstrusarum rerum ignoratione non contingat? nobis scilicet, qui in inferiori intelligentium ordine constituti, superiora illa non scientia aliqua perfecta, sed truncis claudisque opinionibus suspicionibusque attingimus. Qui orbis
hu-

hujus compagem, quam pedibus tamen calcamus, intuemur, facile animadvertimus; ut ex variis pugnantisque inter se naturis coa-
luit; ita in aliam mutari faciem posse: si aut
aqua aut ignis, quorum promptuaria illic fer-
vantur, terminis suis moti cæteris se partibus
superfuderint, aliorum fortassis orbium con-
spiratione impulsis: aut si cardine suo vel tan-
tillum hæc machina moveatur. An vero ista
accidere certis temporum revolutionibus pos-
sint: An Deus ex arbitrio solo suo fieri velit,
non est humanæ res intelligentiæ. Nobis hic
unice ad infinitam illam causam respiciendum
est, quæ illas orbium massas pro lubitu fingit,
refingit, temperat; ut nos in exilibus unius or-
bis particulis operosi sumus. In quibus quam
parum a tot seculis profecerimus, res ipsa cla-
mat. Quæ magnitudine vel exilitate sensuum
nostrorum mensuram excedunt exputare nul-
lo mentis conatu possumus. In iis vero ipsis,
quæ ante pedes sunt, & manibus tractari pos-
sunt, ubi omnes illorum angulos excusseris,
secueris, rimatus fueris, in omnes denique
facies verteris; in exteriori figura ac superficie
hærebis, fundo ipso exclusus: nam in incogni-
to principio & Θεῶν aliquo nobis tandem subsi-
stendum est. Quo cognobilior itaque Vobis,
Cives Academici, hujus mysterii sit cognitio;
excitate animos vestros & ad Dei, Doctoris Sal-
vatorisque vestri, hodie e tumultu exeuntis, di-
sciplinam confugite. Qui ut in vitam rediit

cœlos ascendit, ita viventium mortuorumque
 iudex olim rediturus est. Sic vitam vestram
 instituite, divina pædagogia ad cælestem hanc
 Philosophiam ducti, ut cum corporibus vestris,
 sed nova luce fulgentibus, tuba illa fatalis ani-
 mos, veteres illorum colonos immiserit; illi
 corporibus suis æterna societate juncti, ipsis-
 simis his oculis videant, quæ oculus non vidit,
 ipsisimis his auribus audiant, quæ auris non
 audivit, & omnia illa cœlitum gaudia, beatis
 permisti mentibus, toto pectore persentiscant.
 Valete P. P. ipsis Paschatos Feriis. Ann. cl
 bc LXXXI.

13.

QUæ fuit ad vos, Cives Academici, ex
 hoc ipso loco instituta oratio, cum
 nascenti Salvatori applauderet Ec-
 clesia, illa cumulatione nunc gau-
 dio, in triumphos, epinicia, plausus efflore-
 scit, cum in vitam redit, ut olim e virginis ute-
 ro, ita nunc e virgine tumultu iterum quasi na-
 tus, mortis atque inferorum triumphator JE-
 sus. Venerat ille tum e cœlo in terram infans
 nudus, inops; at nunc ille ad inferos de-
 scendit Heros, Gigas, ut in terram victor,
 in cœlos Deus rediret. Quod si nascenti expe-
 divimus solenne nostrum χαῖρε: quæ non ju-
 bila reviviscenti fundamus, qui ideo ad dies a-
 li-

liquot vitam posuit, ut per secula nos cum illo viveremus. Temporarium illud, at hoc immortale gaudium est: quando nos e mortali-um sorte ad immortalium gloriam sublatis, e- terræ & tenebrarum filiis, lucis filii, & cœli ci- ves designati sumus. Idoneum nacti sumus ad exercendam pietatem nostram tempus, in hoc tam splendido doctrinæ sapientiæque the- atro. Ideoque animos excitemus, o Cives, commentemur nobiscum hujus diei mysteria, totoque spiritu & nervis omnibus id agamus, ut ad nos quoque divini hujus beneficii fru- ctus pertingat. Redeundum & nobis in vitam est. Exeramus tumulo nostro caput, cumque Domino nostro reviviscamus. Neque enim vitæ hujus lux aut hujus cœli spiritus jucundus nobis esse potest, cum in vitiorum sordibus & tenebris jacemus. Cum in media luce homi- nes olim quæreret Γελασῖν & ille Diogenes, non homines sed sterquilinia invenit. Quæ- rat nunc aliquis Christianos & cadavera inve- nient, ac sepulchra, dealbata vel saltem maxi- mam in iis partem cadaverosam. Plerique e- nim Mezentii in nos statuimus supplicium, quo viventibus hominibus alligabantur cada- vera, ut funereo fœtore, lentaque contagione periret sanum corpus. Cadaverosos in sinu, in visceribus, in sanguine nostro alimus affectus, quibus immersa sanior nostri pars, ita inficitur, ut non repente avellatur vitæ, sed minutatim subducatur. Vetus illud fermentum est, quod
ex-

expurgare jubet Apostolus, ne veterem Adamum novo homini plusquam Mezentii supplicio alligatum intra nos habeamus. Illum nisi resecemus abjiciamusque mature, metus est, ne pars sincera trahatur, novusque homo veteris hujus fermenti virulentia in perniciem rapiatur. Quare rectius e Salvatoris nostri præcepto, quam olim e Pythagoræ doctrina faciet, qui id tota vita sua aget, ut unus fieri discat, ut liberet se vinculis his, corporeque mortis, ut distractum infinitis curis & cupiditatibus animum in simplicitatem recolligat. Simples enim animos & sinceros amat Deus, ipse simplicissimus; non multiplices & varios, intra quos turba est, & velut in Chao

Non bene junctarum discordia semina rerum.

Epulemur non in fermento veteri, neque in fermento malitiæ, sed in azymis sinceritatis & veritatis, tum demum recte Phase nostrum celebraturi. Phase enim transitum notat, sed a vitio ad virtutem, ab immunditie ad sanctitatem. Qui viam illam invertunt, non transeunt, sed redeunt, imo pereunt. Quod si naturam ac compagem corporis nostri intuemur, tota hæc massa carnea, ejusque partes insigniores suis quibusdam fermentis consistunt. Ut Homines nascamur, fermento generantis naturæ opus est; ut destruamur & corrumpamur, noxia se insinuant salutaribus succis fermenta. Tota denique vita nostra in continua sanguinis & humorum ebullitione, velut fermento perpetuo transigitur.

tur. Toti in fermento jacemus, sed maximam partem impuro & feculento, cujus in mentem molimina insidiosa sunt, eamque in degenerem sui naturam convertere totamque pervertere laborant. Idem significare fabulis suis Poetæ voluerunt, cum Prometheus homines e limo meliore alios, alios deteriori extruxisse fingerent; ita tamen ut animalium singulis particulas a leone, sue, vulpe aliisque desumptas intexeret. Hæc sunt illa in nobis bruta naturæ, ac pravarum cupiditatum fermenta, quibus homines animales agitamur, ut non percipiamus ea, quæ sunt Spiritus Dei. Illa expurganda & cum pulvisculo abstergenda, e præcepto Apostoli sunt, ne cœlestis in nobis natura destruat, quam sua resurrectione Christus extruxit. Nihil nisi terreum & lutosum illa spirant. Sunt enim mortis æternæ fomites, quibus illa in homines primum propagata est: æterna nunc quoque futura, nisi sua resurrectione illam absorpsisset Mortis triumphator Vitæque nostræ assertor Jesus. Eradicanda itaque sunt illa mortis semina, ejicienda illa fermenta, si velimus vitæ fieri capaces: quæ, cum tam longo intervallo natura diremerit, committi cum morte atque uno in homine habitare nequit. Faciamus, o Cives, quod faciendum in civitate præcipiunt sapientiæ civilis Magistri, & quod in Dei civitate observandum ipse Apostolus monet. Nihil magis noxium Reipublicæ est, quam illud Aristote-

te-

teli notatum MIKPON, parvum, exiguum, ex quo plurima civitati inimica enasci ac provenire possunt. Illud qua fieri potest cura, & industria reprimendum est, ne ex parvo paulatim cumulado maximum malum subito ingruat, e scintilla exigua magnum incendium exsurgat. Παρελλογίζεται ἡ διάνοια ὑπὸ αὐτῶν: *Decipitur mens ab istis minimis, tanquam captione sophistica*, inquit Stagyrtes: dum se non animadversa ac minutatim illa ingerunt, tacitis incrementis Rempublicam subversura. Obversentur & animo vestro, o Cives, aurea illa Philosophi verba: Μάλιστα τὸ μικρὸν φυλάττειν: imo ipsam Salvatoris vocem, ipsum Apostoli monitum ad animum revocate: *quod paululum fermenti totam massam corrumpat*. Videte itaque ne decipiamini, aut ipsi vos decipiatis, Soritas Sophisticos, e minimis istis accumulatos vobis neſtente veteratore Diabolo. Videte ne vel tantillum fermenti in vobis resideat, omniaque sanie, odore, contactu polluat & absumat. Hujus rei quasi quandam imaginem sistunt veteris legis cerimonix. Quo enim tempore fermentato pane vesci vetitum erat, ne pauxillum quidem fermenti, sub gravissimo supplicio, intra domum servare fas fuit. Quam leve videri poterat pomi esus! hujus tamen cupiditas, pusillum fermenti, an non omnem humanam naturam, omnemque terræ progeniem depravavit, & ad infinitas miseras abiecit? Exiguum est, punctum est, quo rectitudo

animi omnisque virtus conquiescit. In puncto æquilibrium est, extra illud casus. Punctum est & illo minus, unde hæc corporis massa coalescit, punctum est, pusillum fermenti, quo illa degenerat & in lapsum vergit. *Expurgate, o Cives, Expurgate vetus fermentum, fermentum malitiæ & versutis, imo & pauxillum illud fermenti, ut sitis nova massa.* Pascha nostrum immolatum est Christus, Agnus ille purus & immaculatus, a cuius convivio omne abesse debet fermentum. Subigite vos in massam novam, sed fermenti omnis terreni expertem, non JOVE aliquo PISTORE formandam, sed pane illo vivo, qui de cœlis venit, animandam; ipso, qui cibus noster est, Deo sanctificandam. Hoc manna illud est, quod cœlo in animæ nostræ massam depluit, novoque fermento fecundat. Non solo pane, sed verbo divino vivimus, quod & ipsum nobis est ὁ ἀρτος ὁ ἐπιζῶν, imo ille, de quo dicit Sapiens, quod sit *initium vitæ hominis*: nam illa mundi fermenta & quisquiliæ ὁ δὲν πρὸς ἀλλοτρίον. Vivamus, o Cives, Vivamus hoc pane, *epulemur non in fermento veteri, neque in fermento malitiæ & nequitiae, sed in azymis sinceritatis & veritatis*, cum alii comestationibus indulgent, cum meras mortes ex olla mundi comedunt, cum carnibus Ægyptiacis, non nisi vermium fermentis, viva cadaverum sepulchra, toti implentur. Ac erimus aliquando inter beatos illos Abrahami ac Isaaci convictores, qui *manducant panem in re-*
gno

gno Dei, qui cum Salvatore *vinum novum bibunt in regno Patris sui*, id est sola Dei visione saturantur, ut non *esuriant neque sitiant amplius*. Præcipiamus has Davidis illo vaticinio epulas: *satiabor cum apparuerit gloria tua*. Explicemus hoc profundius desiderium Augustini verbis, e pia illa in Psalmum CII. commentatione. *Non satiabor de mortalibus: non satiabor de temporalibus, aliquid æternum donet, aliquid æternum concedat. Sapientiam suam mihi det, Deum apud Deum & se Deum Patrem, & Filium & Spiritum Sanctum.* O quam solennes, quam sanctas, cum alii tota vita Saturnalia agitant, vos & nunc & olim Paschatos celebrabitis epulas! Nam Deo, & Agno, & pane vitæ saturati, divina contemplatione ebrii, perennia inter Angelorum choros jubila olim fundetis. Valete P. P. Kiloni
ipsis Paschatos feriis Anno clō lōc LXXXII.]

14.

QUando hodie e tumulo in vitam redeuntis SALVATORIS JESU CHRISTI memoriam, inter plausus & jubila piorum hominum, celebramus, Cives Academici, agite & vos hujus diei religione tacti, hujus mysterii arcana, animo sollicitius revolvite, idque operam date, ut e corpore mortis, e criminum fordibus, e pectoris vestri tumulo vel semimortuas vel cada-

verofas animas, in vitam revocetis, & vitæ Domino, æterno mortis ac inferorum triumphatori in occursum mittatis. Tora enim nunc feralis theatri scena inversa est, cumque paucos ante dies, plurima mortis imago & mœoris nubes omnia occuparet, nunc cum diluculo ipso, è tenebris altissimis nova Vitæ lux emergit, piorumque hominum mentes divina illa face sua collustrat. Qualis nunc Salvator noster & quantum mutatus ab illo! Qui mortis caligine nuper exstinguebantur oculi, nunc luce sua Solis radios superant. Cujus capiti corona e spinis plexa imprimebatur, sanguinis guttis per tempora effluentibus, illi fidereum diadema, fulgurantibus undique ignibus, circumponitur. Cui sordibus ac sputo inquinata facies expalluerat, illa cœlesti nitore nunc exsplendescit. Quæ palato morientis obrigescebat lingua, nunc vitam omnibus proclamat, omnihus Pacem nunciat. Manus clavis affixæ nova jam victoriæ ac triumphi signa vibrant, in amplexus nostros ruunt, nosque divini sui corporis appendices ad ipsos cœlos exportabunt. Qui vermi similior quam homini, nunc epulvere suo excitatus ad astra Deus effertur, non jam latronum, sed sanctissimorum geniorum satellitio stipatus, ac immortale illud gloriæ suæ regnum occupaturus. Effundamur, jam in hymnos & jubila, o Cives; hodie enim consummata sunt omnia, hodie e faucibus inferorum erepti cœloque asserti sumus, omnes
ob-

obices, omnia claustra hoc Duce nostro per-
rupimus. Quæ piorum olim fuere Vatum
vota, ut ruptis cœlis descenderet tandem Sal-
uator, illa hodie finem optatum habuere. Non
enim rupit cœlos tantum, cum in sinum virgi-
nis castissimæ illaberetur, cum ætheræ cohör-
tes orbes suavissimis implerent concentibus,
cum nova e cœlo stella prorumpens, radiis suis
natum quasi designaret: sed nunc ipsam ter-
ram, ut arctius cum cœlo connecteret, perru-
pit, & ipsas inferorum portas perfregit. Ipsæ
illam vim Numinis sentire rupes, & in ipsis se-
dibus suis convulsa tellus sepulchra aperuit,
Patribus in occursum tanti hospitis exituris. Ex
ipsa denique terra prorumpens, excusso tu-
muli lapide, cœlorum orbes Victor Triumphatorque iterum perrumpit. Erigamus ergo ani-
mos, minimeque dubia & plane explorata spe
nos solemur: ejusdem nos civitatis jure olim
beandos, & cum hoc Rege nostro æternum re-
gnaturos. Quemadmodum enim Adamus
morientium antesignanus fuit, ita CHristus
Dux est viventium: ab hoc vita procedit, ut
per illum mors in omnes propagata fuit. Redi-
it in vitam Christus, redibimus & nos, qui
membra sumus istius Capitis, ac vestigia ejus
sequimur, qui, ne nos mortem metueremus,
mortuus est, ac vitæ redditus, ut ejus exem-
plo spem nostram firmaremus. Arbor ille vi-
tæ est, nos rami trunco ejus insiti: non ferent
hi mortalitatis fructus, quos stirps illa immor-

talitatis succo pascit. Quid ergo mortis minas exhorrescimus, Cives, cum illa in novam nos vitam reducat? Qui heri vel nudius tertius cum Christo in cruce pependimus, prope diem in cœlum evehemur. Qui flagra, clavos, spinas, verbera hic nobis impacta sentimus, callum illis a bona piaque mente obducamus: erit cum his vibicibus & vulneribus velut insignibus quibusdam veterani milites triumphabimus. Ingrediamur læti lubentesque hunc terræ finum: erit cum in novas segetes germinabimus, & in flores fructusque novos excrefcemus. Irruant igitur in nos undique morbi, affligant, emacient, conficiant denique hoc corpus; depopuletur spiritus omnis febrium familia, latera tussis quatiat, lenta tabes membra depascat, medullas exsiccet, fibras contrahat, debilem facito manu, pede; ipsa denique mors oculos nobis claudat, faciem livido pallore tingat, carnes erodat; in cineres & pulveres tota hæc compages subfidat. Quid tum postea? facilis luti & sordium nostrarum jactura erit, qui Phœcices aliquando erimus, e cineribus nostris resuscitandi, & e morte nostra immortalitatem lucrabimur. Veniat utinam illa tandem dies, quæ finem ærumnis nostris imponat, quæ per totum terrarum orbem extremam illam vocem: **SURGITE MORTUI!** diffundat. Qua excitati tumulto caput efferamus, & Salvatoris nostri, non ut Judicis, sed ut Fratris nostri faciem amabilem intueamur. Sed &

vos,

vos, Cives Academici vel hodie auribus vestris fatalem illam tubam insonare credite: SURGITE MORTUI! Surgite a vobis ipsis, a malis moribus, a pravis cupiditatibus, & fermentum illud cadaverosum everrite. Ostendite denique vitam vestram in amore Dei ac hominum, ut æternum aliquando vivere possitis. VIVAMUS, o Cives, (nam quod Poëta nequitix sensu dixit, nos in pios usus convertamus:)

VIVAMUS, pia corcula, ac AMEMUS,

Furoresq; hominum scelestiorum

Omnes unius æstimemus assis.

Soles occidere & perire possunt.

Nobisne semel occidat brevis lux,

Vita est perpetua una transigenda.

Valete PP. ipsis Paschatos Feriis Ann. clc lbc
LXXXV.

15.

Qui Amoris Divini mysteria in incunabulis vobis proposuimus, Cives, cum nascentis Dei memoriam nuper celebraremus, nunc ab extrema illa amoris linea ad interiorem, & ad ipsam metam vos vocamus. Quare non tam oratione nostra, quanquam & illa officio suo deesse non debebat, sed ipsa Numinis in crucem acti, in sepulchrum illati, in vitam redeuntis imagine perculsi, ipsis illis amoris stimulis incita-

ti, omnes sensus, animos, spiritus, cogitationes in hujus mysterii contemplationem, in pietatis & religionis sanctitatem, in vota, preces & juba exhaustis. Quanquam ea amoris divini immensitas est, ut fugere intelligentiæ nostræ vim & notionem, ut obtundere, ut in stuporem vertere totam videatur. Frustra, quod in re magna & mirabili Poetæ solent, centum lingvas & ora, ferreamque vocem optaveris. Nam si tota illa rerum natura, quæ verbo fundata est, in meram se vocem resolveret; si omnia sylvarum folia, omnium herbarum flores in lingvas abirent, vix summa ejus lineamenta ducerent. Juvet itaque, o Cives, cum beatis mentibus, saltem in illa, si licet, παρα-
νοΐαι, vel e longinquo speculari, quod oculis animisque totum complecti non possimus. Sequamur illa vestigia, per quæ nos Historia de Salvatore nostro circumducit: in hanc tanquam in speculum intueamur: & amoris characteres ubique impressos videbimus. Quam ille singularum propemodum horarum expectationeangebatur, mortem pro humano genere appetiturus? Quoties ille cum Discipulis de suppliciis, de cruciatibus, de morte sua, de transitu ad Patrem sermones miscuit? Qui horum mysteriorum rudes, non nisi regna & triumphos animo conceperant. Quam ille animo toto adversus Petrum excanduit, Sathanæ illum convicio excipiens, cum de ratione salutis & vitæ suæ habenda moneret? At ille,
sup-

supplicio crucis quasi inhians: *clarifica me*, inquit, *Pater*. Nam in cruce Dominus gloriæ gloriam suam reponebat, hujus se ornari insignibus gestiebat; hinc illi gloriosum pulchrumque apud gentes nomen efflorescebat. His infinitam illam caritatis suæ vim declarabat; qui acerbissimos dolores, cruciatus, mortem denique pro nobis innocentissimam subiit. *Majorem autem dilectionem nemo habet, quam si quis animam ponat pro amicis suis*, quod ipsum vivi spirantisque Amoris oraculum est. Quare & in Cygnea illa cantione sua dulcissimus Salvator. amorem mutuum Pacemque in ultimum pignus Discipulis reliquit: *Hoc est præceptum meum, ut diligatis vos invicem, sicut dilexi vos*. Videamus ergo quomodo salutem vitamque nostram summo suo beneficio consummaverit. Nam cum sæpius ad Discipulos suos de redimendo per mortem suam humano genere verba fecisset, jamque ad extremum illum agonem omnia spectarent, quasi exemplum quoddam & specimen tanti operis in Lazaro resuscitato extare voluit: ut his quasi primitiis & auspiciis & suæ & nostræ resurrectionis imaginem repræsentaret. Nam ut disertè Salvator: *Infirmetas hæc non est ad mortem, sed pro gloria Dei & ut glorificetur Filius Dei per eam*. Morabatur Sororum vota, quæ ad ægrotantem invitaverant: quarum unica in illo spes reposita erat: Non respiciebat ad amicum cum morte conflictantem, cujus tamen memoriam

in animo & ore circumferebat. Morti denique ipsi permisit, cui vel eminus nutu uno, verbo uno mederi poterat, & gaudebat, quod illic non fuerit, ut crederent Discipuli. Funus inducitur, sepulchro componitur, jam conclamata omnia videbantur, jam cadaverofus fœtor corpus occupaverat: & ex insperato mœrore prostratis sororibus Salvator cum hoc εὐαγγελίῳ supervenit: *Resurget frater vester.* Quod cum de resurrectione novissima intelligeret Martha, dubitare amplius instituto fidei examine vetuit. Cujus aureola verba omni melle suaviora, quis non animo infixata teneat? *Ego sum resurrectio & vita, qui credit in me, etiamsi mortuus fuerit, vivet, & omnis qui vivit & credit in me, non morietur in eternum.* Credis hoc? inquit ille ad Martham: cumque affirmaret, operi se, ipsi accingit, miraculo fidem hanc quasi obtingnaturus, abit ad tumulum, aperiri illum jubet, suspensis inter hæc spectantium animis, magnâ voce Lazarum sepulchro evocat. Surgit ille & in occursum fertur Domino, funerea- rum post se trahens vestium exuvias. In amplexus ruunt sorores, in stuporem rapiuntur spectatores, celebratur omnium sermonibus miraculum, ringuntur Sacerdotum Principes, tam vitæ restitutum Lazarum, quam ipsum Restitutorem vitâ exturbaturi: Cum populus in júbila solvitur, cum Mortis & Vitæ Domino palmas suspendit, vestimenta substernit, epinicia occentat, & ad urbem magnis plau-
fi-

sibus & clamoribus comitatur. Agebat itaque post minorem cum Morte velitationem triumphos Victor in majoris victoriæ auspiciū, cumque jam animo illius voluptatam præciperet, doloris illius sensum altius ad animum non admittebat. Quo magis lætari etiam nos in illa morte quæ vitam nobis peperit, debemus, quam lacrymis luctuque afflictiari. Gaudeamus itaque potius & gratulemur nobis, ne in eandem cum gentibus reprehensionem incurramus. Hoc enim præcipuè religionem earum falsitatis argumento redarguit Julius Firmicus. *Si Dii sunt, quos colitis, cur eos annuis luctibus plangitis? si lacrymis & luctu digni sunt, cur eos annuis luctibus plangitis? si lacrymis & luctu digni sunt, cur eos divino honore cumulatis? Unum, itaque è duobus facite, aut nolite eos lugere, si Dii sunt; aut si luctu eos dignos putatis ac lacrymis, Deos eos appellare nolite, ne luctibus ac lacrymis vestris majestas divini nominis polluatur.* Non est lacrymabilis pugna, quam tanta sequitur victoria. Blandiebantur sibi Terrarum Domini Gentiumque victores, Africani, Germanici, Parthici titulis, quibus parum rei sæpe subfuit. Sed Victori nostro tituli ultra omnes Terrarum Cælorumque titulos, & cum ipsa potestate dati sunt, quorum gloria fructusque æternum durabit. Quantum est vivorum mortuorumque Dominum vocari! *In hoc enim, teste Paulo, Christus & mortuus est & resurrexit, & revixit, ut mortuis ac viventibus dominetur.* Quantum in mor-

morte Christi gaudii, quantum gloriæ est! Quid ergo nos cruciet? qui in patrimonio ejus sumus, qui viventibus mortuisque imperat. Servi ejus sumus, imo fratres sumus, sanguine ejus redempti, qui carnem nostram, velut certissimam æternæ hereditatis arrham in cœlos intulit. Illic thesaurus, illic cor nostrum est. Illic jam tum vivimus, etiam in mortis faucibus positi, si Domino vivimus, neque nos ut membra ab illo sejungimus. Hæc nos spes sustentet, affictos erigat, hæc gaudia omnem dolorem abstergant, omnem mortalitatis sensum exstinguant. Omnem hunc si qui superest nobis, veternum, omnem mortis metum dulcissima Pauli verba excutiunt: *Nullus nostrum sibi ipsi vivit, nullus sibi ipsi moritur. Nam sive vivimus, Domino vivimus, sive morimur, Domino morimur. Sive igitur vivamus sive moriamur, Domini sumus. Triumphemus hac clava nostra Hercules Christiani! quam nullus nobis Dæmon extorserit, qua mortis tela facile retundemus! Moriamur: Quid tum? Christus tota est ἀνάστασις, ipsa Resurrectio, ipsa Vita, Dominus mortuorum & viventium. In hoc Domino, in hac vita nostra, etiam cum morimur, vivimus: in hoc Triumphatore, etiam cum succumbimus, triumphamus! O inexhaustam divini Amoris abyssum, qui nos morte sua vitæ æternæ asseruit! Quare ita vitam instituiamus, ne amore illo indignos ipsos reddamus, eaque hæreditate,*

te, quam sanguine suo Deus nobis peperit, excidamus. Amemus illum, qui nos amavit: Volvamus nobiscum ac revolvamus quas benignissimus Salvator ad Patrem suum pro nobis preces fudit, cum mortis oppetendæ tempus instaret. Perpendite dulcissimas illas amoris voces, quibus tum Summus Pontifex consecrare Patri suo nos voluit. Quid vero? annon easdem cum ad dextram ejus sedet ingeminaturum creditis? *Pater sancte serva eos quos dedisti mihi, ut sint unum sicut & nos, ut & ipsi in nobis unum sint.* Ad unitatem ut omnis, ita & divinus amor tendit. Discamus etiam hic, è Pythagoræ præcepto, maturè uni fieri: expdiamus nos ab omni mundanâ multiplicitate, ut simplicitati divinæ propiores fimus: rum-pamus illa peccatorum, illa mortis vincula: distrahamur, surgamus à nobis ipsi: ut in Christo, & per illum in Patre, fide, veritate, charitate æternum coalescamus. Valete P.P. ipsis Pasch. Feriis An. clb lbc LXXXVI.

16.

QVæ hodie celebrantur Christiani Orbis solennia, Cives Academici, ea animos perfundere religione debent, ut totos se ad mysterii hujus contemplationem componant, ardentissimoque affectu gratiam Redemptoris exosculentur.

ni-

Nisi mortis ille claustra perrupisset, nisi pedibus suis Dæmonem subiecisset, nisi e tumulo victor in lucem rediisset; quæ de redemptione nostra nobis spes superfuisset? quid de æterna salute miseri homines exspectarent? Ipse tertii cœli hospes Apostolus oraculo suo hoc firmat; *Si Christus non resurrexit, inanis est prædicatione nostra, inanis est & fides nostra.* Quare mysteriorum hoc mysterium appellemus licet, quo totum hoc redemptionis nostræ arcanum obfignatur, & omnibus numeris absolvitur. Cumque de triumphatis hostibus gratulari terrarum Dominis soleamus: cum plausibus, jubilis, epiniciis eos excipiamus: quid non faciendum nunc nobis existimatis? cum ab inferorum sedibus, non Hercules monstrorum domitor, sed cœli orbisque universi Dominus victor rediit, totumque humanum genus sibi vindicavit. Excitemus animos in gaudia, & quanta possumus voce exclamemus: *Hæc est Dies, quam fecit Dominus, exultemus & latemur in ea!* Vos vero, o Cives, intuemini paulisper animis omnem illam Christi resurgentis historiam, & vel in minimis rerum momentis latitare mysteria deprehendetis. Præcipue vero ad illos qui huic negotio testes adfuerunt attendite, & vel in illis, quod acerrima contemplatione dignum sit, invenietis. Triplici illi ordine se vobis sistunt. Sunt in illis Mulieres, sunt Milites, sunt Discipuli: qui ut vitæ genere, animi indole, moribus, consiliis & rationibus sunt,

dis-

disjuncti; ita triplicem varie in res sacras animatorum hominum ordinem, quasi in speculo quodam proponunt.

Ac primum quidem, nam ab illis incipimus, MULIERES producimus, quibus singularis quædam prærogativa hic indulgetur. Mater olim mortalium Eva fuit, atque mortem orbi intulit: nunc per mulieres vita nunciatur mortalibus. Illic a muliere generis humani lapsus: hic resurrectionis spes ostenditur. Præivit olim ad mortem in horto mulier: hic e tumulto ad vitam præire videmus. Illic a Diaboli colloquiis mendacia; hic ex Angeli sermonibus veritatem discunt mulieres. Incipit hic a mulieribus fides, quæ primum in muliere defecerat. Simplicitate, mansuetudine, bonitate, modestia commendari mulieres solent. Tales sibi Deus animos flagitat: atque hi sunt, qui *περὶ ἐξουσίας* in pietate & religioso cultu obtinent: illos sibi & amicos & familiares cooptat: cum feroces milites, sepulchri custodes, procul hinc exesse jubet: Discipulos vero stultos & incredulos ad inferiora scholæ cœlestis subsellia ablegat. Mulieres in primis subsistunt: Discipuli in secundis tertiisque: Milites nullo loco & numero sunt. Mulieres ajunt & sciunt: Milite negant: Discipuli deliberandum censent. Mulieres vivere Christum dicunt: Milites de furto discipulorum mentiuntur: Discipuli suum illud: *nos sperabamus*, occulant. Mulieres veraces animas; Milites venales; Discipuli

puli disputaces habuerunt. Illæ rem & fidem; Isti rem sine fide; Hi fidem post rem tenuerunt. Quod illis *εὐαγγέλιον*, & testimonium; istis somnium & commentum; his problema visum est. Mulieres hic Lynceæ sunt, & vident; Milites fulgore excæcantur: Discipuli lusciosi visum receperunt. Mulieres blanda salutatione excepti: *Auete!* Milites quasi fulmine prostrati, *ceciderunt velut mortui*. Discipuli objur- gatione perstringuntur: *O Stulti & tardi ad cre- dendum!* Mulieres plus quam Viri audent: Mi- lites Diabolos calumniis æquant: Discipuli mi- nus quam fœminæ sapiunt. Quare in mulie- rum castra concedamus, & puram illam ac in- taminatam fidem, ringentibus nequicquam militibus ac fluctuantibus discipulis amplecta- mur. Non duris; sed mollibus ac depressis pectoribus cœlestis se gratia immergit. Cœli rore saturantur lilia & rosæ in vallibus: cum de montibus deturbantur cedri. Virgineas in- sponfa sua animas, candidas, inermes, fide, amore plenas purpuratus ille sponsus exscula- tur. In his velut speculis divinus se ipsum, pingit radius: In his serenitas est, nam in cœlo habitant; cum milites turbinibus & procellis aguntur; Doctores opinionum nebulis sunt, immerfi. Quod si sub mulieris imagine, in- eremum profugæ Ecclesia spectari velit; sece- damus & nos in illam solitudinem, nunquam minus soli, quam cum sic soli, ut tumultuan- tium militum turbæ, & disputantium conten- tionibus nos subducamus. Suc-

Succedit secunda MILITUM classis, qui sepulchro additi custodes, id quod viderunt, testes quanquam *αὐτοκατάκριτοι* fateri noluerunt. Primus ordo ut simplicium est, & tertius stultorum; ita secundus furiosorum est, & *ὅλοαῖς μανίαις* omnia agit, quos vix salus ipsa, si velit, servaverit. Huc referri debent quotquot sua vel potentia vel sapientia confisi superos suas sibi res habere jubent, nisi plane sedibus suis deturbatum iverint. Quid enim non designent hi Gigantum fraterculi, ferreae frontis, durae cervicis, saxei pectoris homines? si homines vocandi sunt, qui Centaurorum, instar plus belluæ quam hominis habent. Qui vi omnia agunt tyranni, pugnaces & atroces Harpyiæ, nulla sibi iura nata, nullas leges scriptas existimant. Ideoque nil illis sanctum & inviolabile est, nulla religio, nulla honesti cura, nulla fides, plusquam militaris, vel potius Cyclopica in omnibus licentia. Qua via illi grassantur, omnia cæsim punctim omnibusque machinis oppugnant, omnia rapiunt, tundunt, & prosternunt. Idem si sapientiæ se fundo ingerent; si

Impius hæc tam culta novalia miles habebit; nam & hic à militaribus omnia turbantur & miscentur ingeniis, quæ non hinc fundi nostri calamitas? Erunt in iis, qui cum Stoicis non solo Jove minores, sed cum Menecrate ipsi Joves haberi volent, dogmatum suorum quandam *ἀποθέωσιν* semper meditantes. Nihil

tam alte positum erit, quod illi non ratiunculis suis sollicitent; vel ipsum cœlo DEUM & superos excussuri, imo ipsum etiam Acheronta expugnaturi. Hæc scilicet fortitudinis suæ specimina militares illi animi, quos *spirituum fortium* nomine Gallica lingua appellamus, ostendunt. In illis triumphabunt Milites illi gloriosi; si veritatem tot seculorum testimoniis suffultam, tot divinis suffragiis firmatam, labefactent & convellant. Cumque maxime stulta sint, quæ jactitant; virtutes tamen & sapientias ebullire se existimant. Naturam scilicet illi ducem sequuntur: sed brutam illam, quæ capite mentes minuit & infra bestias abjicit, per coalitionem cum illis potius Centauri; quam per conjunctionem cum DEO homines appellandi. Sub ejus Naturæ signis illi militant, quæ *bellum omnium in omnes* repræsentare quibusdam creditur; in illo bellico statu, dum ita sentiunt, relinquendi; nunquam bono pacis divinæ, quæ *omnem excedit intellectum*, fruituri. Nunquam talium hominum animis se sistet, quæ hodie mulieribus se redivivam obtulit, æterna Patris Sapientia. Nam quod molles animos liquabit gratiæ lumen, Pharaonum lutosa & saxeæ pectora obdurabit, in fulmen commutatum totos prosternet. Mature ergo, qui ita animati sunt, illorum castris se subducant. Subigendus in nobis militaris Deoque rebellis animus, si triumphos e-

ti-

tiam in illo ducere velimus, qui de morte & inferis Victor hodie triumphavit.

Tertia, quæ quasi medio modo se gerere videtur, DISCIPULORUM, qui in Emauntico itinere deprehendebantur, classis est. Sub qua omnes illi Disputatores argutuli continentur, qui non nisi per *ῥαδιότης* convinci volunt, & ad sensus ipsos cum Thoma provocant: cumque ne decipiantur metuant; omnia tentanda & exploranda arbitrantur. Quare imperfecta fide & voce *ſperabamus, credebamus*, utuntur belli hi opinatores & sapientuli, quos recte stultorum titulo appellat Salvator. Qui enim prava imaginatione ducuntur *Φανταστικοὶ* & stulti sunt. Adeo qui cedri in montibus sibi visi sunt, fluctuantes in eremo arundines fiunt. Omnia in illis imperfectam fidem arguunt. JESUM vocant *Nazarenum*, quo nomine illum per contemptum Judæi appellare, solebant: *Virum* dicunt, non DEUM non Dei filium: *Prophetam*, non Messiam, nil nisi humilia & mediocria animo versantes. Hos tamen in via sua devios & errantes in ordinem summus ille Doctor redegit: qui dubitantibus ductor in tempore adfuit. Nimirum ut ægroti à Medico sanari: ita errantes à Magistro doceri possunt. Primum reprehensione; hinc informatione boni Magistri partes implevit. Nam Mosen & Prophetas explicans, suum illud: *Nonne sic oportuit?* subjunxit, quod veteris Scholarum formula *ὅτι ἐπεὶ εἶδες δεῖξαι* nos ef-

ferremus. Ergo errorum lethargo quasi sepultos excitavit: neque oculis tantum illorum se spectandum præbuit; sed in animis eorum reviviscere cœpit: ut jam non amplius suum *sperabamus* ingeminarent, sed *Mane nobiscum, Domine*, inclamarent. Monstravit se ipsum Discipulit JESUS, cum in medio illorum stans: *Ego sum*, insonaret. Qua illi voce erecti: cum eadem antea milites prosterneret. Erigamus animos nostros, ô Cives, & vel à Discipulis istis serò sapere, ut Phryges, discamus. Qui ut non nisi plagis emendantur; ita nos vel objur-gatione spiritus, & plagis justorum in viam revocari patiamur: si cum mulieribus & virginibus prudentibus obviam sponso Dominoque nostro non iverimus. Valete, P. P. in ipsis Pasch. solennibus. Anno clō lōc LXXXVII.

17.

Celebramus, Cives Academici, diem, toti orbi Christiano inter triumphos & jubila, omnibus lætitiæ documentis exigendum. Quoniam enim expleto redemptionis humanæ opere, post acerbissimum crucis supplicium, & humani generis hostes atrocissimos triumphatos in vitam rediit Salvator dulcissimus; nostra jam in illo redivivo spes firmata non mortis amplius minas, non Dæmonis insidias extimescet. Quicunque ergo ve-

ro pietatis sensu ducitur, ad Christi resurgentis memoriam, siquidem sua sibi salus ac æterna vita cordi est, pia meditatione expendendam, & hoc & toto vitæ mortalis tempore animum suum instituat. Apostolus ita colligit: *Si Christus resurrexit, etiam nos resurgemus: Si Christus non resurrexit, inanis est prædicatio & fides nostra.* Ergo in hoc cardine salus nostra spesq; omnis vertitur, quo labefactato, omnis illa evertetur & in nihilum recidet. Quod cum satis intelligerent veritatis divinæ hostes, quibus non machinis illam aggressi sunt, quibus non mendaciis oppugnarunt! Non hic cum insipientis sapientiæ doctoribus litigabimus, qui cum capitali supplicio etiam mentes nostras mulctarint, omnem hanc corporum nostrorum restaurationem svavibus somniis accensent. Quid enim facies homini extra divinæ gratiæ & veritatis fines posito? *jubeas miserum esse libenter, quatenus id facit, aut ita sentit.* Nihil ad nos *οἱ ἐξ ἡμῶν* pertinent: modo non intra ipsa Christianæ Reipublicæ viscera pestis illa doctrinæ quosdam afflaverit, ut & de animarum immortalitate & de corporum resurrectione tenuiter admodum sentiant, ut quas possunt nebulas illi offundant, dum e gentilium & quorundam sciolorum, qui ipsis gentilibus pejores, senticetis, profanas istas argutias in Christianæ veritatis perniciem conquirunt. Quod cum moliuntur, omnem operam impendunt, ut Historiam de Salvatoris nostri resurrectione,

in falsi suspensionem adducant. In quibus principatum tenet Ethices ille profanæ scriptor, Spinosa, qui Epistola XXV. Christi passionem, mortem & sepulturam literalis sensu accipit, ejus vero resurrectionem allegorice, quasi scilicet non vere illa facta, sed poetico quodam & rhetorico colore conficta, & ut non verbo dicamus, tota fabula sit. Quis enim illa Satana calumniatore digna verba sine execratione legat? *Fateor quidem resurrectionem ab Evangelistis iis narrari circumstantiis, ut negare non possimus, ipsos Evangelistas credidisse, Christi corpus resurrexisse, & ad cælum ascendisse, ut ad dextram Dei sederet, & quod ab infidelibus etiam potuisset videri, si una in iis locis adfuissent, in quibus ipse Christus discipulis apparuit; in quo tamen, salva Evangelii doctrina, potuerunt decipi, ut aliis etiam prophetis contingit.* Hæc sunt illa ex Orco ipso producta philosophemata, quibus nihil tetrius & blasphemum magis excogitari possit, unde omnis illa fidei nostræ vis, tota nostra spes & salus ab ipsis fundamentis convellitur. Et tamen salvam Evangelii doctrinam vocare audet homo insanus, dicam an impius, quæ hac interpretatione tota concidit. Ergo Paulus ipsi deceptus videtur, cum inanem suam prædicationem & fidem sine Christi resurrectione vocat? Ergo fidem illam Apostolorum, qua Christi resurrectionem crediderunt, & qua Ecclesiæ Christianæ salus unice fundatur, nefarius homo in simplicitatis ludibrium convertit, ita ut ab illis de-

deceptis totus postea Christianus orbis (id enim hinc sequitur) deceptus sit? Quis deceperit Apostolos? an simplices mulierculæ ab omni fraude alienæ? an ipse Christus? qui se resurrectum tertio die prædixerat. Nihil ergo tumultus signatus, ac per vim humana maiorem adaperitus, nihil alia divinæ veritatis documenta ipsi probant, aut aliquem ei assensum extorquent? Tota scilicet historia de resurrectione Salvatoris nostri illi

Pergula pictorum est: veri nihil: omnia ficta.

Adeo nihil ille ac illi similes homines admittunt, nisi quod sensibus suis comprehendunt, nulli historię, tot licet testibus firmatæ, fidem habituri, vel saltem in Sceptica quadam *ἀρρεψία* perduraturi. Occuparat jam olim quoque iste *ἀπορίαις* morbus Discipulorum pectora. Quam misere enim illi Emauntici viatores fluctuant! Fatentur illi quidem: *Abierunt quidam e nostris ad monumentum, & ita invenerunt, sicut mulieres dixerunt.* Testes illi e visu & auditu allegant; sed timide tamen assensum præbent. Ajunt mulieres: fidem suam interponunt angeli: condiscipuli, ad explorandam veritatem missi, angelorum mulierumque verba confirmant. Quid amplius illi requirant? Sollicite illi omnibus vestigiis rem indagant, omnes vias perquirunt, ut e tenebris, quod anxie cupiebant, eruant: omnes illi aditus excutiunt & scrutantur; omnia illi argumenta ad lancem exigunt, ne temere famam arripiant, quam,

omnibus tamen illi votis veram vellent. Scilicet, ut *res est solliciti plena timoris amor*: ita fides illis fuit inter spem metumque suspensa, ut credere non auderent, quod maxime tamen vellent, hac sua imbecillitate eo magis excusandi, quo plus amoris ille metus abscondebatur. Ac sane quis credat? cum ipsum se discipulis congregatis redivivum sisteret Salvator, quo evidentiora sui signa ostenderet, eo minus in illis fidei invenisse. Primum enim *conturbati & conterriti spiritum se videre existimabant*. Quo errore illos liberaturus cum manus pedesque perfossos ostenderet, ne sic quidem fidem ab illis *non credentibus & præ gaudio mirantibus* extorquere potuit. Novum hoc in affectuum characteribus *παράδοξον*, eodem tempore & gaudium de bono acquisito & diffidentiam de non obtinendo ostendere. Pulchre de hac discipulorum incredulitate Chrysologus serm. 81. *Votiva gaudia & cum data fuerint, vix creduntur, optata cum perveniant, dant stuporem. Hinc est quod Apostoli resurrectionem Christi celeriore quam speraverant, admirentur, & quod credunt tardius, non est perfidia sed amoris*. Et illa quidem his condonari incredulitas, ut quæ minus haberet reprehensionis, poterat. Verum plane ad veritatis sensum occalluerat Thomas, usque adeo obnixus non credere, ni ipse digitos suos illis manuum & pedum laterisque vulneribus immitteret. Non oculorum ille sensu contentus erat, qui faciem viventis toties viderat, sed cer-

certiora veritatis documenta flagitat, vivam, scilicet illam e clavorum in corpore vestigiis ἀποδείξω, interiora vulnerum, ne falli objecta specie possit, rimaturus, ut verum e sensibus philosophum se ostenderet. Hæc scilicet illi solida sapientia visa est: crassam nos dicemus: quæ non animo comprehendit, sed manibus ipsis verum palpat. Varie etiam in sanctiore Apostolorum senatu animatos videas. Fuit qui militari audacia Christi causam ageret Petrus, sed repentinus e Milite glorioso & Hyperaspiste Apostata. Fuit proditor Judas. Medio inter illos loco dubitator Thomas fuit, quem sequi signiferum videntur, qui in fidei mysteriis ad illam humanæ ἀποδείξεως amussim omnia exigunt, ac parum in eo a proditoribus & apostatis distare videntur. Quid vero ad hæc χαρὴς αἰῶνος ille Salvator noster? Bonus ille Pastor, ut stupidas ac deliras oves simplicitate sua devias in viam reducit; ita rationis cornibus petulcos capros, ac in se ipsum arietantes reluctantesque retundit & averfatur. Dubitantibus ille, ut ἐπιδείκνυται argumentis agat, se ipsum demonstrat, in se & in τεκμήρια illa sua digitum intendens. Αὐτὸς ἔφα, Ego sum. Qui jam ante dixerat: Ego sum resurrectio & vita, is nunc se ipsum redivivum suisque characteribus noscendum ostendit. Demonstratio hæc Gratia est, cum notas illas ac stigmata, quæ nostri amor ipsi impresserat, palpanda electis sanctisque suis exhibet. Respiciamus

ad hæc vulnera, o Cives, & ex illis cognoscamus redivivum nostrum Salvatorem. Quot hic vulnerum oscula patuere, tot divini amoris ubera sanguinis sui rivos in tabescentes animas infuderunt. Hæc Σωτήριæ nostri vulnera sunt, quæ ille ab ægroto orbe retulit, nostris vulneribus medelam paratura. Nam per ejus vulnera sanati sumus. Hæc humano generi promptuaria panduntur nullis feris occlusa. Hi mortis in Vita ipsa characteres sunt, quondam infamiæ notæ, nunc æternæ gloriæ insignia, & quædam Amoris signacula & tropæa. In his fodinis thesauri nostri, in hoc latere, ac prope cor nostri Salvatoris. Ergo & illic ubi thesauri nostri sunt, cor nostrum sit. Patent illic viscera misericordiæ ejus & per hæc foramina nobis affluent. In his alvearibus mella latent, in quibus gustamus, quam sùavis sit Dominus. Ex hoc quasi balsami ligno lancea compuncto sanguis & aqua effluxit omni unguento sùavior, per totum orbem odorem sanctificationis effundens. Quinque hæc stigmata sunt, nec fortassis sine causa. Nam quia nos quinque sensuum vulneribus sauciati, per has quinque plagas salutem sumus æternæ restituti. Hoc Pentagonum, hoc Penthalpha, felicius, quam illi è Magorum schola πεντάγωνα seu amuleta sua, adversus omnes Diaboli Orbisque injurias nobis suspendemus. Ingeniosus hic Pierius Valerianus est, qui sub finem lib. 47. Hieroglyphicorum, ex ipsa Salva-

to-

ris crucifixi figura, per lineas à stigmatibus singulis deductas, *πεντάγωνον* istam *ὕψους* figuram, cujus Phythagoræi quondam in epistolis symbolo usi sunt, in veræ salutis significationem depingit. Demonstratio hæc, ut diximus, gratiæ est, ab ipso nostro Salvatore instituta, qui, ut aureolum Poëtæ cujusdam cultissimi epigramma huc adducam, ita nos compellare videtur.

Fecit amor, caput ut spinarum scinderet orbis,

Pectus ut hauriret lancea, fecit amor.

Solus amor de me potuit perferre triumphum:

Ille pedes clavis fixit, & ille manus.

Sic cupis ergo animi mihi signa rependere grati,

Dilige: pro tantis sat mihi solus amor.

Amemus ergo Triumphatorem nostrum, ab ipso Amore triumphatum: idque demus operam, ut & de nobis ille triumphos agat, ac Triumphatori nos jungat. Versentur hi nobis ob oculos & per omnem vitam, & in ipso mortis limine, amoris characteres, qui aliquando, cum ille Judex venturus est, ut pulcherri-
ma sidera nos in sui contemplationem abducent. Tum vero Demonstratio illa iræ in impiis manifestabitur, *cum videbit eum omnis oculus*
& qui eum pupugerunt, & ululabunt omnes gentes terre. Et tum quidem sero hi Phryges sapient & credent, quæ pervicaci sua sapientia olim impugnarunt. Vos vero, o Cives Academici, ita sapite, ita agite ut crucifixi Salvatores characteres animo impressos vivi semper circum-
fe-

feratis, idemque qui clavis ligno affixus fuit, animis fidei clavis affixus hæreat. Sic aliquando redemptionis vestræ tesseræ & signa in illis Characteribus agnoscetis, Judicem vero non expavescetis. Valete, P. P. ipso Paschatos Feſto Anno clc lbc LXXXVIII.

18.

Quando ad dies festos pio cultu celebrandos nostra vos invitat Oratio, id præcipue eam ob causam fit, ut divinorum beneficiorum *ἐναυλον μνήμην*, quemadmodum Isidorus Pelusiota loquitur, *memoriam velut auribus resonantem* habeatis. Sunt enim divina Salvatoris nostri facinora ad salutem humani generis confecta, certis quibusdā diebus quasi conclusa, ne tantorum memoria myſteriorum ullo tempore animis nostris excideret, sed religiosa quadam disciplina singulis annis in orbem rediret, piisque ritibus celebraretur. Ac fanè qui divino honori consecrati dies sunt, ipsum beneficentissimum Numen in hæc sacra nostra quasi evocant, ut cum ipsis hominibus quodammodo festum agere diem videatur, siquidem nos è piorum hominum genere sumus, qui quotidianas intra se Deo ferias agant, quales DEO caros, probisque moribus laudabiles *πάντα τοῦ βίου ἑορτὴν ἄγειν* tota vita festos dies celebrare, Clemens Alexandrinus dicebat, ut omnem

vitæ illorum cursum *πανάγειρα* *ἀγίαν* appellat. Nunc quidem Paschatos solennia, cujus diem bonorum cœlestium *μυσάγωγιαν* vocabat Gregorius Nazianzenus, eo sanctius transigemus, si cum resurgente Salvatore vera animorum in fermento jacentium *ἀνάστασις* è D. Pauli præscripto nobis instituatur. Hi nobis veri erunt azymorum dies, si non malorum morum fermento contaminata pectora ad hæc sacra adferamus. Hæc everrere è nobis fermenta jubet Apostolus, eoque magis hic vobis laborandum est, ô Juvenes, quo majorem & promptiorem naturalibus ætatis vestræ fermentis moralibus illis fomitem subministratis. In memoriam vobis revocate, quid Polemoni acciderit, juveni ex Athenensibus ditissimo. Hic cum vino gravis, ac fertis redimitus, matutino tempore e convivio domum revertetur, homo omnium voluptatum illecebris immersus, ac Xenocratis Philosophi, Scholam, tum publicam habentis, fores apertas videret: illi se doctorum turbæ temulentus ingessit, ut saluberrimis Philosophi doctrinis temerarie insultaret. Xenocrates conversa statim oratione de modestia ac temperantia verba facere cœpit, quæ ebrii hominis animum ita expugnaverunt, ut coronam capiti detractam primum projiceret, brachiumque intra pallium reducens, composito ad attentam auscultationem animo federet: quo effectum est, ut damnata vitæ prioris turpissima consuetudine, eo ardore

re

re philosophiæ studia complexus fuerit, ut Xenocrati Magistro postea succederet. Hæc in homine temulento humana sapientia potuit, quid non divinæ in vos animosque vestros licere velitis, o Cives? Permittite ut motos in vobis pravarum cupiditatum fluctus illa componat, & vetera illa malitiæ in vobis fermenta, ejus quasi repagulis repressa, subsidant, Polemon per Philosophi orationem voluptatum fermento eripi potuit; vos Numinis evocantis dicto non parebitis? Adeone ægre sordes vestras dimittetis, ut cum scarabæis in sterquilinio semper habitantes mellificæ apis induere naturam nolitis. Quin potius meliora de vobis speramus, o Cives, & hæc vobis fermenta sollicitius excutienda proponimus. Nosse enim vos intus & in cute debetis, & latitantia illic fermenta, variorum vitiorum semina, ad ipsas usque minutias accuratius venari. Primum itaque de Fermento; hinc de Minimo fermenti ejiciendo vos monebimus. Sunt vero illa non unius generis fermenta. Quædam intra nos alimus, in sinu nostro, in sanguine, in medullis ipsis fovemus: alia extrinsecus adveniunt, variisque sensuum & affectuum portis admissa, quasi per cuniculos menti nostræ adrepunt, deque illa triumphos agent, nisi majore spiritu repellantur. Intra nos quæ intelligendi facultatem corrumpunt, fermenta sunt, quorum præcipuum superbia est: qua unica, ita mentes nostræ dementari pos-

possunt, ut ne salus quidem ipsa, si velit, servaverit. Nam quo excellentiorem ad gradum ea mentis vis evecta est, eo periculosiore vitio impugnatur, quod & Angelis & toti humano generi exitiale fuit: eoque firmiores illud radices agit, quo magis ex ipso animi fundo propullulat, nec externa quadam impressione insedit. Nullo *ἑγασμῶ* potentius animus quam illo movetur, ut fluminis hiberni instar per omnia ruat; omnia prosterнат, ac tumori suo subjiciat. Hinc in Rempublicam perduelliones, in Ecclesiam hæreses, in Scholas pravæ opiniones invectæ: Hinc virtuti omni, hinc pietati certa pernicies obrepit, ut nihil magis cum omni ætati, tum præcipue juventuti cavendum sit: cujus mentem ubi semel ista pestis afflaverit, toto illo vitæ suæ cursu quasi turbine quodam in transversum rapietur. Hinc tot non solum in pietatis & religionis sed & literarum negotio Suffeni,

— *qui longos imitantur, ab imo
ad summum toti moduli bipedalis,*

ac gigantæo illo spiritu turgidi, ne pygmæi quidem vires æquaverint. Alterum fermenti genus ad Voluntatem refertur, quæ vel a se ipsa excitata, vel externa specie laccessita pravam, intra se cupiditatem concipit, pessimorum flagitiorum semen, fomitem ac fermentum. Cui etsi contrario fermento Virtus occurrit, pudore scilicet, qui frena cupidati injicit; tamen, ita cupiditas sæpe exardescit, ut omnis ille pudor

dor deflagret, ac inimico æstu absorbeatur. Nihil attinet hic recoquere illam nonnullorum disputationem: *An homo bonus vel malus volens fiat*: cui cum se singulari libro immerfit Simon Porcius, non satis religiosæ Philosophiæ homo, ita rem omnem miscuit, ut nihil expediens omnia incerta reliquerit. Ex illo certe Philosophorum ille genere est, qui sincerum cupiunt vas incrustare, & salutarem divinæ veritatis doctrinam profanæ *ερεσδοξίας* fermento inficiunt. Frustra esset omnis ille de fermento expurgando conatus, frustra divina illa præcepta, si nihil potestati nostræ relinqueretur, si malitiam nulla nostra opera exuere possemus. Cui bono illa de purganda voluntate doctrina foret, si naturæ avertere impetus non licet? Cur denique

— — *vitium vitaveris unum,*

Si te alio pravus detorseris?

aut si potius ferrea quædam Te necessitas in omnis generis vitia detruferit. In animo nostro velut quodam fundo radices agunt illa fermenta, quas nisi omni conatu evellas,

Neglectis urenda filix innascitur agris,

bonamque sementem plane suffocat. Concupiscentiæ igitur & pravæ cupiditati obex ponendus est, qui per sensuum & affectuum faeces accenditur. Hæc est illa, quæ ut Jacobus ait, in membris nostris militat, aciem instruit, bella intestina molitur, a qua in triumpho duci & captivari se Divus Paulus queritur. O-

mnis

mnis scilicet fermenti vis in pugna & lucta, cum heterogeneis partibus conspicitur, quare commodiore voce illa concupiscentiæ operatio exprimi nequit, quam cum militare illa in nobis dicitur. Extra nos quidem illi sunt, qui cupiditatem nostram alliciunt, magnetismi, ac domestica in nobis cient fermenta; sed illis impulsu celerrime, quasi ἀντομαλα quædam, moventur animi, & in occursum ruunt. Subtile hoc venenum est, quod vel odore ac halitu, imo ipsa luce inficit. Simulac radiis oculi miscetur à pulchra specie fulgor, statim in fermentum mens abit. Illa ut vidit! ut periit! ut misera cupidine pectus æstuat! ut assiduo pruritu & titillatione vellicatur! Accedit voluptatis illa sedes caro nostra; quæ fomitem cupiditati substernit, & φωτὶ ἀντιφραγτέῳ, *lumi-
mini mentis obstruere*, Gregorio Nazianzeno dicitur. Nunquam luce sua animus pascitur, cum tenebras pravæ cupiditates offundunt. nunquam mens quieta esse potest, ubi sensuum vicinia tumultuatur, quos Basiliius eleganter κωμαίῳ, id est, *perenni agitari fluctu* dicit, ut quasi ad ventorum nutus rapiantur, neque apud se consistent. Dum extra peccandi occasionem constituti sunt, multi probi sunt & philosopha sententia, mirifice de bona conscientia animique rectitudine disertis & canoris offer illis talenta, & fidem fallent, quamprimum illis dolosæ fermenta lucis, auro vibratæ, oculos animumque subierint: ac intacta,

illa quondam & illibitata fidei & justitiæ virginitas tanto pondere misere comprimetur. E Perturbationibus, quanta animo fermenta accedunt! illæ enim ut Tullius ait, quasi furias quasdam nobis immittunt. Illas scilicet, quas Græci *πάθη*, hoc est morbos dixere, toto vitæ cursu multi sæpe circumducunt, neque prius, quam in tumultu deponunt. Perpetua illi in contentione vivunt, sua bile, libidine, velut salamandra ignibus, pasti. Nunquam illi apud se sunt, nunquam soli, etiam si in solitudine versentur; ipsi sibi theatrum in turbulento pectore fingunt, ut gratis insaniant, & furiosæ mentis agitatione extra se ferantur. Quare laborandum nobis est, ut illum, quem Democritus sapientiæ finem ponebat, *εὐθυμίαν*, animi tranquillitatem, non tam per philosophiam, quam per pietatem assequamur, & vivos illos affectuum nostrorum foetus, *κακὰ καὶ κακὰ ὦρα*, pio parricidio interficiamus. Quæ extra nos fermenta sunt, in mala conversatione sunt, quam sedulo ut omnes, ita vos præcipue, ô Juvenes, vitare debetis, ne qui per vos boni estis, alieno contagio pereatis. Quare & Apostolus, ubi de fermento expurgando ad Corinthios suos scribit, ut ab illis, qui incestus crimine contaminati erant, discedant, monet: ne illorum consortio misceantur, & aliquid mali à vicino malo in se derivent. Nimirum *Φθειρῶσιν ἡθὴν χεῖρ' ὁμιλίᾳ κακῇ*, & ab una sæpe ove in totum gregem scabies diffun-

funditur. A malo exemplo mala cogitationibus fermenta inferuntur, quæ sensim in totam massam abeunt & occultis contagiis propagantur.

Qui rerum naturalium indolem altius scrutantur, in fermentatione quandam verminationem, & ut ita dicam *Φθέραιον* sibi deprehendere visi sunt; ac animi sane nostri fermentis suis, quasi tineis & serpentibus minutatim corroduntur. Fuga à malis, prima ad salutem via est. Virginem servemus mentem, à fermentis mundi meretriciis intactam. Virginem sibi mentem postulat Deus. Nam ut Hebræis Virgo ab occludendo dicitur, ita occlusam etiam mentem nostram servemus. Custodiatur ergo nostra illa Virgo,

Ut flos qui in septis secretus nascitur hortis

Ignotus pecori; nullo contusus aratro,

Quem mulcent auræ, firmat Sol, educat imber,

ne in prostibulum per pravos aliorum mores degeneret. Si Flamini Diali apud Romanos, Plutarcho teste, attingere fermentum non licuit, nos qui summo Numini nos consecravimus, illa fermenta, vel potius fermentis malæ libidinis agitata pectora non tangamus. Illud denique agamus ut nostra fermenta excutiamus, aliena non admittamus. Non excidemus pio consilio, si ne minimas quidem fermenti reliquias in nobis superesse patiamur. Nam ut vel à minimo fermenti nobis caveamus monet Apostolus. Videndum scilicet est, ne nos in fermento simus & habitemus, aut il-

Iud nobis dominetur: ita enim illo toti tandem absorbebimur: sed in nobis fermentum est, spes expurgandi nobis relinquitur. Incipienti gangrænæ facile obviam eunt Medici: ubi paulum processerit, membri mutilatione tollitur: letalis illa erit, si sibi relictæ in viscera, in viscera fævire inceperit. Non possumus quidem illa fermentorum minima plane excutere, illas, quas Græci eleganti voce *πρωγάδειας*, perturbationum initia, dicunt: sed obniti tamen illis generoseque obfistere debemus, ne per conniventiam & indulgentiam nostram nobis ipsis ignoscentes hosti tandem succumbamus. Quis enim inter homines adeo vitæ integer, adeo ab omni labe immunis sit, ut nihil in illo reprehendi posse videatur. Tuberibus si non offendamus, verrucis ignoscendum est, quas facile, ne in tubera excrecant, prohibebimus. Etiam in pietatis scholâ optimus ille est, qui minimis urgetur vitiis, quæ ita tamen cohibenda sunt, si extirpari plane non possunt, ne in molem excrecant. Ut è pulchrarum consortio non excludimus virginem cætera formosam,

dente si nigro fieret, vel uno

Turpior ungui:

ita e piorum hominum cœtu segregandus non est, qui levi quodam errore impingit: quam ita comparatum plerumque est, ut maior insanus ægre minori; minor facile majori parcat; ut festucas aliorum lynceis oculis intu-

ea-

eamur, in trabibus nostris cœcutientes. Ne gemmas quidem & uniones sine sordibus invenimus: nec aurum sine recrementis: nam ut pura illa habeamus, igne, aqua, politura opus est, unde splendori suo reddantur. Vos vero, o Cives, ad summum virtutum & pietatis fastigium enitemini, si ne in minimis quidem erroribus vos venia dignos existimaveritis. Agite ergo, o Juvenes, (nam ad vos nostra hæc instituta est Oratio,) vel hoc festo die, quo fermentum vetus evertere jubet Apostolus *συῶν δίκην* pectora vestra purissimæ menti offerre, quo nullum gratius sacrificium etiam gentiles Philosophi agnoscebant. Videte ut illi malitiæ fermento illud virtutis pietatisque fermentum *ἐνεργητικὸν* opponatis, quod in vobis iræ, libidinis, invidiæ, *φιλαυτίας* æstus exstingvat: illum vero sincerum Dei amorem, in quo unice mentis nostræ puritas consistit, accendat. Exuite illarum rerum desiderium, quæ ipsæ perpetuo fermento agitantur, suisque obnoxia vicissitudinibus nihil in se puri & sacri habent. Vanæ sunt omnes mundi opes, & quicquid ex humanis æstimare solemus mortales. Ne ipsæ quidem fermentorum reliquiæ in hoc concupiscentiæ regno vobis prætermittendæ: adversus quas ita vobis pugnandum est, ut primæ spiritus in illa pugna partes sint; neque bonum quod in vobis semen est, spinis & sentibus voluptatum suffocetur. Videte ne in iras effervescat, in libidines despumet, quin

potius in conatus generosos, ingenuo ac sapienti homine dignos ille ætatis juvenilis fervor ebulliat. Ne qua foris irrepant fermenta, ante portas custos in vobis spiritus excubet, qui à limine ipso mature submoveat ac propellat. Opponite mali fermenti minimo veræ fidei fermentum, quæ licet sinapis tantum granum æquaverit, in arborem cum tempore, excrefcet. Implete charitatis oleo & fermento lampades vestras, quo illæ splendeant & exardescant. Quod si vetera vestra non expurgaveritis, nova Reipublicæ & Ecclesiæ ipsi fermenta accedentis, ubi ambitione, avaritia, invidia, tumultibus omnia miscebitis: Ipsi in ovile Christi, quæ nunc non extremum occupat, scabiem Pastores inferetis. Quot fiet, ut cum malis exemplis ad peccandum incitantur alii, mala exempla in consuetudinem, consuetudo in jus abeat, & nonnunquam justitiæ & pietatis larva simplicioribus imponat. Addat potius divinus amor menti vestræ alas, quales etiam animæ Plato apponit, ut e fermento, cui immerfi estis, erepti mature ad beata illa regna etiam in his terris evoletis, ac verum illud Pascha perpetuo mentis ad Deum transitu celebretis. Valete. P. P. Kilon. in Ipso Paschatis festo. Anno clb lbc LXXXIX.

19.

Qui hodie anniversaria religione in populo DEI celebratur dies festus, Cives optimi, omnium ad veram pietatem animos excitare debet: cujus jucundas utilesque recordationes nostra quoque oratione vobis, ut sæpe dedimus, ita nunc quoque daturi sumus. Quid enim ad hanc felicitatem nostram addi possit? qui per mortem Salvatoris nostri JESU CHRISTI, ejusque in vitam reditum nostræ morti eripimur, & vitæ æternæ heredes designamur. Hæc illa spes est, quæ nos in his vitæ ærumnis unice solatur: hæc jacentes erigit: hæc animo semper præfigenda est, ut in illam intenti nunquam a meta dejiciamus oculos, sed ad DEUM conversi, ejusque spiritu animati, ita hic vivamus, ne ulla nobis mors gravis incubet: ita hic mature, resurgamus, ne æterna nobis morte pereundum sit. Vivimus in hoc terrarum orbe, non tanquam Domini in ejus possessionem missi, sed hujus velut machinæ quædam appendices, aut inutilia pondera: spiritum trahimus, variis motibus impellimur, ut vivere nos ostendamus, qui tamen elementis nostris tanquam sepulchro immergi, cadavera nostra circumducimus. Vos in primis, o Cives, qui in ea ætate estis constituti, cui virent genua, rubent, genæ, robur & æs triplex circa pectus est, ne in vita illa vestra, in robore, in lacertis & nervis confidite. Non enim illa vera vita est,

2 H 4 quam

quam cum brutis animantibus communem habemus, quam aëris haustu metimur, quam cibo & potu fulcimus; sed si mentes nostræ in illo, qui ipsa vita, veritas & Lux est, velut in sinu suo conquiescunt. Utinam viveretis omnes! atque ita viveretis, ut ille vitæ sensus veræ fidei pietatisque calore se proderet, neq; mortui inter vivos deprehenderentur. Sunt ex illo hominum genere, quos atra bilis vexat, qui mortuos se esse credunt, & pro iis haberi volunt, cum tamen vivant, vitæque signa edant: at gravior eorum infania est, qui cum ipsi mortui sint, pro vivis tamen maxime habere cupiunt. Nemo non vivere se credit, cum tamen palatia, urbes, fora, collegia cadaverum plena sint, passimque lemures & larvæ & *simulacra modis pallentia miris* occurrant. Vivere illi videntur, non vivunt, ut de Claudio Imperatore, sed stolidissimo mortalium, extincto Seneca dicebat: *desuisse ipsum vivere videri*. Vidistis forte homines singulari phantasiæ morbo laborantes, qui cum sensus omnes somno sepultos habeant, vigilantium tamen munia obeant, per domos discurrant, scalas ascendant, ad ipsa fastigia sæpe enitantur, armis alios laceessant: quorum tamen non meminere, ubi e somno evigilaverint. His omnino similes sunt, qui vivere videntur, cum non vivant: ut illi vigilare, qui tamen altum dormiunt. Ille scilicet somnus gelidæ mortis imago est, ille lethargus Noctambulones istos, qui

qui non in luce sed in tenebris ambulant, & tenebrarum opera amant, occupat mortique suæ tradit. Inter hos Noctambulones ne & vos deprehendamihi, omni vobis opera cavendum est. Vigiles vos esse & circumspectos oportet, ne in præcipitia feramini. Vivendum vobis est, ne in corporis sepulchro vivo funus animæ jam sepultæ ducatis. Animæ anima DEUS est, unde omnis vita, omnis motus est. Ab eo qui sejungitur, mori incipit. Sejungitur autem, quisquis voluptatum illecebris, libidinibus, furiisque degenerem animum mancipavit. Quibus cum vitiis vestra ætas maxime tentari soleat, videndum vobis est, ne in ipso vitæ exordio, vita vestra periclitetur. Accedunt (quis enim neget?) multi ad Academias, non tanquam Athenis Musas, sed Corintho Laidas amplexuri: qui cum pietati, bonæ menti, bonis artibus consecrata pectora habere debebant, in nugis, in ineptiis, in voluptatibus velut scopulis toti hærent, iisque immoriuntur. Ac fit nonnunquam, ut qui vel sero cum Phrygibus sapere debebant, cum ætate magis desipiant, aut a virtutis via, quam olim ingressi fuerant, turpiter deflectant, ipsique Reipublicæ & Ecclesiæ adulta & inveterata vitia inferant. Adeo ut cum prudentes in vita non essent Promethei, ne præteritorum quidem annorum vitam deplorent Epimethei. Nonnulli eo vesaniæ procedunt, ut cum semel pudorem decoxere, aut frontem præfricuere,

cauteriatæ conscientiaë philosophemata, infanientem & flagitiosam sapientiam in malitiæ suæ subsidium amplectantur, ex oviculis in hircos & vulpeculas, e columbis in milvos & corvos abituri. Hi jam dudum e terra viventium excessere, toti mortui, & qui ipsi mortuos sepeliunt, & in idem mortis consortium trahunt, imo vero plus quam mortui: quandoquidem, ut Chrysostomus ait, mortuis multo deteriores sunt, qui vitiis suis immortui sunt. Cum enim in morte naturali anima separetur a corpore: in hac peccatorum morte anima separatur a DEO. Illa mors somno propior est, cum ipse Salvator Lazari mortem eo nomine appellet: sed altera illa, omni morte, quocunque illa nomine veniat, omni supplicio & cruce peior est. Parum est capite minui, libertatem amittere, in insulas deportari, ad metalla damnari, & similia, quibus mors induci civilis solet: Hac morte non tam capite, quam ipsa mente minuimur, æternum sumus pœnæ servi, non in insulas, sed in Tartara deportamur, ad inferorum consortia detrudimur. Versamur hic in Theatro ac palæstra, a summo illo Motore hic collocati, non ut fruges consumamus, sed ut continuo virtutum exercitio nos vivere ostendamus. Non vivit, qui vitæ nulla signa ostendit, aut nullos ad motum lacertos ac spiritus componit. *Univerſa hominum vita; inquit Baſilius, virtutis paleſtra eſt, ut vivere non videatur, qui ſe in virtutum paleſtra non exercuit.*

Cum

Cum vero a vitiis abscedit & virtutibus operatur animus, *tunc ille*, ut Plato quoque judicabat, *vivit & viget* : *tunc officio suo fungitur, tunc sincerus & integer esse incipit, seque imagine divina, quam gerit, dignum exhibet.* Quare vel hodie, nobis vivendum, o Cives, vel in vitam redeundum est, si in viventium numero esse defierimus. Neque enim illa, cujus memoria celebratur, Salvatoris nostri *ἀνάστασις*, ullo nos fructu beabit, nisi hic ita vixerimus, ut nihil in nos juris mors habeat, aut à morte nostra, in vitam reversi fuerimus. Multa de vita cœlitus comparanda nonnulli è Platoniorum Scholis nos docuerunt, quomodo scilicet astro-
rum vires in corpora nostra evocandæ, eorumque beneficio per bene multos annos vita proroganda: sed nos potius de vita divinitus comparanda solliciti simus, quæ non annorum longitudine, non seculorum successione, sed ipsa æternitate continetur. Ad hanc vitam omnis illa vita nostra tendit, qua si illa meta excidit, in devia & divortia dilabens, nulla est via qua tendimus, sed errorum caligine, obsepti sine duce, sine scopo vagamur:

Ille sinistrorsum, hic dextrorsum abit: unus utrique

Error, sed variis illudit partibus.

Quare ut in viam & in vitam redeamus, ad carceres ipsos reverti debemus & novæ illius vitæ primordia, quæ non è terra sed è cœlo ducitur.

Hanc

Hanc perpetua illa contemplatione foveamus & pietatis exercitio ad maturitatem perducamus. Perducemus autem, si sensuum furori paulatim rationem subduxerimus, ne illis in prædam cedat, aut velut sicariis quibusdam succumbat, si terrestri huic carnis moli cœlestes motus imprimamus. *Qui latitant & torpent* (Seneca ait) *sic sunt in domo quasi in conditorio. Horum licet in limine nomen marmori inscribas, mortem suam antecesserunt.* Quæ se in sensus efficaciter non diffundit vita morti propior est, homineque Christiano indigna: cujus & vita & lux lucere debet coram hominibus. Adeo qui hic latuit male vixit, suamque mortem antecessit. Sed tamen & hic verum est illud: Bene qui latuit bene vixit, si illa parte latere maluit, qua alii inanem voluptatum & deliciarum orbis speciem ostentare solent. Quare si se extra non quæsierit, sed in se ipsum recesserit, & illic DEO regna sua exstruxerit, ejectis vitiorum sordibus & quasi tumulto quodam compositis, in ipsa illa morte vitam præcipiet. Tumulemus in nobis illas veteris Adami reliquias, voluptates, libidines, furiarum stimulos, ut ipse in in nobis Salvator nascatur; excitemus nos ipsos à morte, ut & ille in nobis resurgat. Quod si fecerimus, ita in his terris vivemus, ut hæc vita nobis mortalis minime futura sit; sed per mortem nobis ad æternam illam vitam aditum ipsi recludemus, ubi Triumphatori Mortis JESU CHRISTO, inter perpe-

etua beatarum mentium jubila, æternum
ymnos & epinicia occinemus. Valete P. P.
pfo Paschatos festo Anno clc lxc XCI.

INFESTUM PENTECOSTES.

20.

QUod rerum vobis divinarum ex hoc loco nonnunquam inculcatur memoria, graviter sanctissimeque, Cives Academici, est constitutum. Cum enim omnibus; tum vobis præcipue opera princeps & pene omnis in pietate infumenda est, quæ unica veræ sapientiæ substernit fundamenta. Compellare autem hac in primis luce vos oportuit, qua magnæ hujus Universitatis Doctor Sanctus Spiritus, sub ignearum specie lingvarum, per Apostolorum vertices diffusus menti eorum se ingerit, & omnium gentium lingvis perorat. Novum hoc Doctrinæ genus, nova docendi ratio, qua divino adflatu serpit, in animos sapientia, & in luce circumfusa omnia sistuntur intellectui, quæ literæ & lingvæ hominum e longinquo oculis auribusque nostris ægre instillant. Insidetur a Præceptore suo animus, habitatque in Discipulis suis Doctor, qui cum in se thesauros doctrinæ habeat re-
con-

conditos, imo ipsa sit sapientia, non nisi se ipso illos informat. Indocti erant, rudes, simplices, e Piscatorum plerique familia, quos Apostolos suos Salvator noster delegerat. Simulac vero Spiritus Domini eos adflavit, vidiffes Theologos, qui divina loquerentur mysteria, docente eos Spiritu, qui omnia etiam profunda DEI scrutatur: Jurisconsultos, qui justitiam nunciarent populis, orbem terrarum, aliquando judicaturi: Medicos, qui vel tactu solo morbis mederentur: Philosophos, qui docerent sapientiam, non turgidam illam & inanem (neque enim inflat, quæ ex afflatu divino est scientia) sed æternam, quæ mundo est stultitia: Oratores non una vel altera tantum, sed omnium gentium lingvis disertos: Poëtas, qui in laudes DEI jubila cantarent: Politicos, qui ad magnam illam DEI civitatem, formandam mitterentur. Videtis quæ compendio docere possit Schola DEI Præceptore, DEO, quæ non olim tantum in Apostolis, sed & nunc quoque intra ipsa præcordia vestra aperitur, o Juvenes; ad quam nostra vos invitat Oratio, si a vobis impetrare potestis, ut in vos ipsos descendatis. Vocat ecce vos, & luculentas hodie faculas præfert ipse Spiritus, qui animæ vestræ mens est, sine qua ille in ignorantia tenebris habitat, & sua quadam morte perit nunquam in vitam reducendus. In illo vivimus, æterno mentium pabulo, & aura hac ætherea vescimur. In illo movemur,
cum

um ad pietatis officia impellimur; quiescimus, cum a turbis circumstrepentibus in bene compositam mentem secedimus, divina pace fruitori. Sedet in nobis ille pro tribunali iudex, adstat testis, intervenit advocatus: Causas nostras orat & decedit, tam gratiofus præsidio, quam rigidus iudicio. Quanto rectius nos meliora moniti dicemus, quod olim Seneca: *Sacer intra nos Spiritus sedet, malorum bonorumque nostrorum observator & custos: hic prout a nobis tractatus est, nos ipsos tractat*: Quid enim divinius ipsum Christianum os dixerit, o Juvenes? Scilicet istum Genium & Deum animis nostris adfidentem meliori quidem jure dicemus, quam Gentium Philosophi, qui Dei in habitatione & impulsu Virum bonum definiebant. Hunc intra nos DEUM habeamus, ô Cives, si boni esse velimus, seduloque operam demus,

— *ne sua cuique Deus sit dira Cupido,*
& immundus iracundiæ & libidinis Spiritus, excusso divino, dominetur. Suscipite ergo & vos cum Apostolis magnum illum hospitem, qui, dum ultra cælum empyreum abit, Sol noster Salvator, sub ignearum lingvarum specie in Apostolos, ceu nova quædam orbis Christiani fidera, & sine superstitione isto omine præsignificatos Reges, delabitur. Cordi flammulam suam esse vitæ nutricem tradunt Medicorum filii: at vos sanctissimum hunc cordibus vestris, ignem concipite, gratasque
vos

vos ignei amoris victimas, templa, aras, sacerdotes gerite. Nec Promethei furtis hic opus est; cum preces & suspiria illi sint fomites, qui spiritum hunc igneum rapiant. Quin, sponte sua illabetur ille, si vacua habeatis à furoris æstu & rerum vanissimarum fumis pectora, ad cœlestia, tarda licet, & mole sua reluctantia illa evecturus. Namque & in natura, ut impleatur vacuum, descendere levia, ascendere gravia videmus. Quanta hæc Dei clementia est! Cum habitet in luce inaccessa, ὁ πατὴρ τῶν Φώτων, lumen suum ad terræ & tenebrarum filios, quo lucis fiant filii, dimittit; igne suo accendit, non illo iracundiæ indice, quo consumpsit quondam profani ignis oblatores, sed blando, gratioso, vivoque emblemate charitatis. Suscipite, denuo vos compello, suscipite hunc Spiritum in filios Dei vos adoptaturum: susceptum ita fovete, ut sub Spiritus hujus, disciplina non in tenebris, non in scelestorum sordibus, sed in ipsa veritatis, justitiæ, modestiæ virtutumque omnium luce vos vivere videamus. Quod si vero monita ejus spernitis, impulsibus resistis, exemplo furentis nunc seculi in omnem insaniendi licentiam abrepti; adsidebit ille vobis inter tot apparitores & testes Agelos Judex & Vindex: cum vos illud Davidicum: *Quo fugiemus, Domine, a Spiritu tuo, quo ibimus?* ingeminabitis. Si a DEI, legum, Magistratus abitis reverentia; *quorsum ibitis a Spiritu Domini?* Si ad jurgia, lites,

es, pugnas? quam vos fugiet Spiritus iste,
 acis, & *quorsum vos ibitis à Spiritu Domini*, qui
 idet hæc, quotidie aurem vellicat, & de vo-
 ismet intra vos testatur? Quin abite potius à
 mundo, ab ineptiis seculi, descendite in vos
 & Spiritum illum, sublimiumque horum my-
 steriorum admiratione excitati, conscientias
 excutite, scelerum fordibus animos purgate,
 ut suavissimus denique ille hospes pleno vos
 jure possideat, aliquando in æternum gloriæ di-
 vinæ regnum deducturus. P. P. KilonI ipsis
 Spiritus S. feriis Anno clb lbc LXIX.

20.

SI quæ unquam serena orbi terrarum dies
 illuxit, ea est, *Cives Academici*, cujus ho-
 die celebramus memoriam; longe illa
 felicior, qua prima rudi huic moli lux
 immissa, suo singula ordine & colore distinxit.
 Nunc enim non corporibus, sed mentibus
 multo illa serenior affulsit, seque ipsis totam
 immergit, cum super Apostolorum vertice,
 velut in cælo suo, oriens novum in illis diem,
 dispulsis animi tenebris, ordiretur. Veneren-
 tur JOVEM suum SERENATOREM profa-
 ni idololatræ; nos SERENATOREM SPIRI-
 TUM non fronte tantum serena, sed & pecto-
 re ardentissimo excipiamus; cujus hodie
 Φωτοχυσία ab Apostolis in omnes, quotquot

capaces ignis illius fomites in nobis alimus, velut speculis lucidissimis diffunditur. Procul hinc facesse, qui libidinis æstro, invidiæ, iræ æstu accenderis, *digne puer meliore flamma*: non nisi in puras illa animas è cœlo, velut in victimas & holocausta DEO offerenda, descendit. Abeste vanis opinionum fumis & nebulis inflata pectora, alio animanda afflatu sunt, quæ sapientiæ divinæ, pietati, Virtuti se consecrabit. Quam misère humani ingenii scintillis & igniculis, sed cineri interdum dolofo suppositis, se jactitant tenebricosi Sophistæ! Non, nisi nubecula est soli opposita facula, aut si quid è vero trahit, *ὅς ἐστιν* est, diluculum, ex Ecclesiastæ sententia, tenuis ac crepera lux, præ illo æternæ veritatis solstitio. Stulta olim erat, Heracliti sententia, decidere in terram de beatorum sedibus animas: quarum, velut alitum, quibus pennæ præ senio defluxere, lapsus vidisse se testabatur in Phædone Platonis Socrates. Sed & mirabilius & verius est descendere de cœlo in animas DEUM, superfundi Doctoribus divinam specie visibili lucem, quæ mentis in illis oculos illustret, præ quibus ne Argi quidem fatis sint oculati: quæ faces ad cœli viam accendat: quæ segniores in illis igniculos excitet, & ad sublimiora, ætherea, ad ipsum *τὸν πατέρα τὸν Θεόν* & ad lucem, in qua ille habitat, inaccessam, quantum per humanæ indolis caliginem licet, abducatur. Intuemini, ô Juvenes, vivam hujus mysterii i-

maginem, excitate animos, tollite oculos, ut & hodie, ex voto coronati illius Poëtæ, *signet super vos lumen vultus sui Dominus.* Quæ cum S. Gregorius Nyssenus explicat verba, virtutes per illam DEI faciem intelligit, quibus, ut inquit *τὸ Θεῖον εἶδος χαρμηνεύεται.* Earum in Salvatoris nostri discipulis, nunc per ignem spectatis Philosophis, & flammea ornatis coronâ Magistris, longe lateque resplendent, exempla. Videtis Soles tot, Soli illi Pythagorico non absimiles, qui vitreæ naturæ, quos haufit ignis cœlestis radios, in inferiora refundere fingitur. Si Philosophum è Gentilibus sapientissimum audimus: *πάντα φύσει ἔχει τὸ Θεῖον,* inest quiddam omnibus divini, & nobis ipsis, prima Opificis nostri lineamenta, studio nostro in DEI Officina expolienda. Igniculos illos vocabat Tullius, in quibus ventilandis divinus operam ponit Spiritus. Si semina & *εἰσώματα* cum Philone appelles,

*Ignis est ollis vigor & cœlestis origo
Seminibus,*

quæ igne suo lacescita in solidas fruges ac *ὅλοκαρπώματα* tandem adolecant, & homines beatis Geniis similes forment, qui ὡσπερ Φωστῆρες, inter seculi tenebras, omnium in se oculos convertant, Divine, ut multa, argutissimus Seneca: *Si nobis animum boni viri liceret inspicere, o quam pulchram faciem, quam sanctam, quam ex magnifico placidoque fulgentem videremus!* Estote vos, simus omnes Boni, qui, ut idem Seneca, *nunquam sine DEO sunt,* sparguntque per orbem terrarum

virtutum radios, præ quibus, ut de justitia, quæ suo modo omnes comprehendit, Stagiritata: ἔσπερος, ἔω ἔγω θαυμαστός. Ut uno verbo dicamus: Filii Lucis simus, εὐγενεῖς illi, & vere, quia ex DEO regeniti, Generosi. Nam & suis ille elementis nos refingit. Terræ filii sumus, & tenebrarum, e terra prognati, in illam redituri, ignava ejus pondera. Ne humi affixi æternum jaceamus, aqua, quæ ad gignendum a natura destinata est, ad tardiores primum motus per παλιγγενεσίαν nos sollicitat. Subit hinc, segnioresque animos rapit Spiritus, ac circumpositis columbæ pennis in sublime provehit. Ut ad summa tandem evolemus, ultra Solis Lunæque vias, sanctissimo igne propellimur, non jam amplius mortales & homines, sed Θεοειδείς & æterni cælorum hospites. Hæc illa non per Poëtarum Pegasos & Cyllaros, non per Platonis volatiles currus, sed per virtutes a DEO in nobis propagatas emergendi ad cælus via est. Quæ & apud Græcos, si Philoni credimus, ab extollendo & erigendo nomen invenerunt. Anaxagoræ commentum ridetis, qui ætheris ambientis motu igneo, raptos de terra lapides, in stellas, per mirabilem & inauditam μεταμόρφωσιν commutari statuit. Sed miseros e saxo, e luto homines ultra sidera abripi, & plusquam fiderea luce fulgere, annon fidem omnem superat? Et vos tamen, o curvæ in terras animæ ad ista non respicitis, qui sero cum Phrygibus sapitis,

me-

meliorum gnari quidem, sed deteriora secuti, Mileſiis ſimiles, quos non ſtultos eſſe, ſed facere tamen ſtulta iudicabat Ariſtoteles. SURSUM CORDA, lingvis igneis e cœlo animanda! Quæ ſi inter ſe conſpirant, ut conſpirare in corpore noſtro natura jubet: o quis ex iſta conciliatione concentus! Vos videritis, ut cœleſtes illæ lingvæ cordatos vel inveniant vel faciant, ac indiſſolubilem in vobis cordis & lingvarum nexum conſervent. Nam, ut Petrus Chryſologus præclare ait: *Inter cor & linguam totum ſalutis humanæ verſatur & geritur Sacramentum.* Quod ut rectius teneatis, declarat Apoſtolus ad Romanos ſcribens: καρδία πειθεῖσθαι εἰς δικαιοσύνην, σῶμα δὲ ὁμολογεῖσθαι εἰς σωτηρίαν. His velut cardinibus fides caritasque volvitur. Cor DEO ſoli pervium vel ipſo ſilentio loquitur: Lingva hominibus cordis occulta exponit. Utriusque ad DEUM feliciffima conſpiratio eſt, ſi animus illo plenus linguam in hymnos ſolvat, & ad jubila propellat. Invitat & vos ad illa cantanda, qui hodie ſub Lingvarum ignearum ſpecie apparet Spiritus, ac ipſas Præconum divinarum lingvas facit diſertas. De igne quodam loquente, qui e terra profiliens Faum Regem præceſſerit, vocemque ediderit imperii tranquilli nunciam, Chinenſium an hitoriis, an fabulis proditum eſt. At noſter ille non e terræ cavernis progreſſus, ſed e cœlo in Apoſtolos delapſus ignis, melioribus auſpiciis, quam olim Servius Tullius,

præsignificatos in DEI civitate Reges, ipsos ut
 ut indoctos, ut ut infantes, ultra hominum
 fidem omnibus reddidit lingvis facundos. No-
 vus hic divinæ Eloquentiæ ludus, Doctore
 DEO, ipsis lingvis igneis Magistris panditur,
 o juvenes! Argumenta si quæritis, ipse se Spi-
 ritus & capiti & pectori ingerit ἐνθύμημα: Si
 λόγος dispicietis; ad æternum illum λόγον ho-
 rum fontem respicite: Si ᾗθη: non alio, quam
 illo gratiarum promicondo inexhausto, ac a-
 nimorum conciliatore, Oratores gratiosi eritis:
 Si πάθη; hic plus quam Demosthenis fulmina
 sunt, & longe divinius πῦρ ac θεέρμη (illis sc.
 orationis ardorem vocibus exprimit Aristides)
 quæ ὑπὲρ illos ἔργον ἡς nobis gignat, quo S. Jo-
 hannes olim ornabatur elogio. De memoria
 si estis solliciti; loquimini quæ nunquam didi-
 cistis, statim ab ipso tyrocinio Magistri. Ut
 pronuncietis commode; ipsæ vos juvant lin-
 gvæ. Omnia ad FIDEM faciendam, sum-
 mum hujus svadæ finem, divino apparatu in-
 structa. Consultaturi hunc & πάρεδρον & συν-
 εργόν habebitis Spiritum. Si reos vos defen-
 detis; aderit ille παράκλητος. Si in divinas
 laudes exardescetis, hoc optimi Doctore pane-
 gyristæ, pleno ore, omnibus lingvis τὰ μεγα-
 λεία τοῦ Θεοῦ, non Solis, ut proverbio di-
 citur, radiis, sed ipso DEI digito, ipsis lin-
 gvis igneis scripta & demonstrabitis & celebra-
 bitis. Quæ cum nox nocti, dies diei nunciet,
 cœli, ut semper, ita nunc tot lingvis enarrent;

vos aliquam ex illis, bonæ mentis fomite, quæ
 pio Promethei furto rapite: quæ causam in
 vobis vestram apud judicem oret: quæ inter
 Astrorum matutinarum, inter beatarum men-
 tium choros, inter ipsa illa *πῆλα ἀπὸ πῆλα*, ve-
 stras quoque voces & jubila, nullis seculis fini-
 enda, expromat. Valete P.P. Kiloni d. XXX.
 Maji Anno clc lbc LXXX.

22.

QUod rerum vobis divinarum ex hoc lo-
 co nonnunquam inculcatur memo-
 ria, graviter sanctissimeque, Cives
 Academici, est constitutum. Cum
 enim omnibus; tum vobis præcipuè opera
 princeps & pene omnis in pietate infumenda
 est, quæ unica veræ sapientiæ subternit fun-
 damenta. Compellare autem hac inprimis
 luce vos oportuit, qua magnæ hujus Univerfi-
 tatis Doctor Sanctus Spiritus, sub ignearum
 specie lingvarum, per Apostolorum vertices
 difflusus, menti eorum se ingerit, & omnium
 gentium lingvis perorat. Novum hoc doctri-
 næ genus, nova docendi ratio, qua divino ad-
 flatu serpit in animos sapientia, & in luce cir-
 cumfusa omnia sistuntur intellectui, quæ lite-
 ræ & linguæ hominum è longinquo oculis au-
 ribusque nostris ægre instillant. Insidetur à
 Præceptore suo animus, habitatque in Disci-
 pu-

pulis suis Doctor, qui cum in se thesauros doctrinæ habeat reconditos, imo ipsa sit sapientia, non nisi se ipso illos informat. Indocti erant, rudes, simplices, è Piscatorum plerique familia, quos Apostolos suos Salvator noster, delegerat. Simulac vero Spiritus Domini eos adflavit, vidisses Theologos, qui divina loquerentur mysteria, docente eos Spiritu, qui omnia etiam profunda DEI scrutatur: Jurisconsultos, qui justitiam nunciarent populis, orbem terrarum aliquando judicaturi: Medicos, qui vel tactu solo morbis mederentur: Philosophos, qui docerent sapientiam, non turgidam illam & inanem (neque enim inflat, quæ ex afflatu divino est scientia) sed æternam, quæ mundo est stultitia: Oratores non unâ vel altera tantum, sed omnium gentium lingvis disertos: Poëtas, qui in laudes DEI jubila cantarent: Politicos, qui ad magnam illam DEI civitatem formandam mitterentur. Videtis quæ compendio docere possit Schola DEI, Præceptore Deo, quæ non olim tantum in Apostolis, sed nunc quoque intra ipsa præcordia vestra aperitur, ô Juvenes: ad quam nostra vos invitat Oratio, si à vobis impetrare potestis, ut in vos ipsos descendatis. Vocat ecce vos, & luculentas hodie faculas præfert ipse Spiritus, qui animi vestri mens est, sine qua ille in ignorantiae tenebris habitat, & sua quadam morte perit nunquam in vitam reducendus. In illo vivimus, æterno menti-

ti-

tium pabulo, & aura hac ætherea vescimur. In illo movemur, cum ad pietatis officia impellimur; quiescimus, cum a turbis circumstrepentibus in bene compositam mentem sededimus, divina pace fruituri. Sedet in nobis ille pro tribunali iudex, adstat testis, intervenit advocatus. Causas nostras orat & decedit, tam benignus præsidio, quam rigidus iudicio. Quanto rectius nos meliora moniti dicemus, quod olim Seneca: *Sacer intra nos Spiritus sedet, malorum honorumque nostrorum observator & custos: hic prout a nobis tractatus est, nos ipsos tractat*: Quid enim divinius ipsum Christianum os dixerit, o Juvenes? Scilicet istum Genium ac DEUM animis nostris adfidentem meliori quidem jure dicemus, quam Gentium Philosophi, qui DEI in habitatione & impulsu Virum bonum definiabant. Hunc intra nos DEUM habeamus, o Cives, si boni esse velimus, seduloque operam demus,

— *ne sua cuiq; Deus sit dira Cupido*
& immundus iracundiæ & libidinis Spiritus, excusso divino, dominetur. Suscipite ergo & vos cum Apostolis magnum illum hospitem, qui, dum ultra cælum empyreum abit Sol noster Salvator, sub ignearum lingvarum specie in Apostolos, ceu nova quædam orbis Christiani sidera, & sine superstitione isto omine, præsignificatos Reges, delabitur. Cordi flammulam suam esse vitæ nutricem tradunt Medicorum filii: at vos sanctissimum hunc cordibus

vestris ignem concipite, gratasque vos ignei amoris victimas, templâ, aras, sacerdotes gerite. Nec Promethei furtis hic opus est: cum preces & suspiria illi sint fomites, qui spiritum hunc igneum rapiant. Quin sponte sua illabetur ille, si vacua habeatis a furoris æstu & rerum vanissimarum fumis pectora, ad cœlestia, tarda licet, & mole sua reluctantia illa evecturus. Namque & in natura, ut impleatur vacuum, descendere levia, ascendere gravia videmus. Quanta hæc DEI clementia est! Cum habitet in luce inaccessa ὁ πατὴρ τῶν Φωτῶν, lumen suum ad terræ ac tenebrarum filios, quo lucis fiant filii, dimittit; igne suo accendit, non illo iracundiæ indice, quo consumpsit quondam profani ignis ministros, sed blando, salutari, vivoque emblemate charitatis. Suscipite, denuo vos compellamus, suscipite hunc Spiritum in filios DEI vos adoptaturum: susceptum ita foveate, ut sub Spiritus hujus disciplina, non in tenebris, non in scelestis sordibus, sed in ipsa veritatis, justitiæ, modestiæ virtutumque omnium luce vos vivere videamus. Quodsi vero monita ejus spernitis, impulsibus resistis, exemplo furentis nunc seculi in omnem insaniendi licentiam abrepti; adfidebit ille vobis inter tot apparitores & testes Angelos Judex & Vindex: quando vos illud Davidicum: *Quo fugiemus, Domine, a Spiritu tuo, quo ibimus?* ingeminabitis. Si a DEI, legum, Magistratus abitis reverentia;

quor-

quorsum ibitis a Spiritu Domini? Si in lites, pugnas, cædes ruitis? quam vos fugiet Spiritus iste Pacis! & *quorsum vos ibitis a Spiritu Domini?* qui videt hæc, quotidie aurem vellicat, & de vobismet intra vos testatur? Quin abite potius a mundo, ab ineptiis seculi, descendite in vos & Spiritum illum, sublimiumque horum mysteriorum admiratione excitati, conscientias excutite, scelerum sordibus animos purgate, ut suavissimus denique ille hospes pleno vos jure possideat, aliquando in æternum gloriæ divinæ regnum deducturus. P. P. Kilon. i. ipsis Spiritus S. feriis Anno clc lxc LXXXI.

23.

Quando in hoc sanctissimo die, quo Spiritus Dei animis discipulorum, Christi infusus, doctores gentium eos constituit, nostra ad vos instituitur oratio: meminisse debetis, Cives Academici, ad aliam vos Scholam, quam quæ hætenus vobis panditur, evocari. Quotquot in orbem hunc missi sumus, quasi in ludo quodam versamur sapientiæ præceptis imbuendi. Quam ut assequamur, mature discendum est, quantum cuique credendum, quibus nos committere, a quibus cavere debeamus, ne in perpetuam quandam *ἀπορρίαν* conjecti sine duce sine lege feramur, ac, quod proverbio dicitur,

nu-

nubem pro Junone amplectamur. Triplex enim nobis aperitur Schola, eoque circumspicius nobis agendum est, ne per viarum divortia distracti, in eos casses, quibus vel ipsa falsus nos non expediverit, incidamus. Prima est MENDACIORUM Schola, ab illo instituta, qui mendaciorum Pater ab initio fuit, tam late per orbem sparsa, ut potentissimos quosvis & numero propemodum infinitos, in disciplinam suam collegerit. Hæc est iniquitatis illa & pestilentiae cathedra, à Rege Propheeta tam atro carbone notata, quam inter homines erexit veterator ille Spiritus, cujus oracula dementarunt gentes, unde pravarum opinionum venena animos hominum contaminarunt. Ut enim in corpora sævit pestis, eaque internecino morbi genere depopulatur: ita continua mentes contagio conficit quavis peste virulentior falsa doctrina. Magna est lateque diffunditur illa τῆς σκότητος ἐξουσία. Prodeunt ex hoc nequitiae ludo ἐμπαικταί, irrisores, *stulti corde, qui dicunt non est Deus*. Propululant hinc Pietatem eversuræ, Idololatria, Hæresis, Superstitio. Ponat tibi ob oculos Sapia mirificam Orbis hujus compagem, demonstret architectum DEUM, ducat, evidentissimas Providentiæ divinæ lineas: veniet ex illa Schola aliquis Epicuri filius, ac omnes turbabit tibi circulos: nam fortuito particularum fluxu hæc omnia coaluisse, nulloque ut olim compacta, ita hodie regi consilio

argutabitur. Laudet sanctior disciplina illos, qui seculo & mundo sunt dissimilimi; producet hæc Schola suos, omnis quos decet & color & res, Aristippos. In Deo, pietate, virtute felicitatem quærunt sanctiores philosophi? Hi in voluptatibus, in opibus, in honoribus unice acquiescendum docent. Cum beatos Salvator noster pronunciat pauperes, pacificos, humiles: hic omne punctum ferent potentes, factiosi, nobiles, Deo bonisque rebelles. Cum meliorem in nobis naturam recti honestique normam facit recte sentientium, pietas; hæc Schola omnis licentiæ nequitiaque coloribus infamabit, & in omnium adversus omnes bello reponet. Fugiamus ô Cives, cane peius & angve, tam infamem & flagitiosam sapientiam, quæ intelligendo facit ut nihil intelligat, quæ omnem doctrinæ vim corrumpit, sensus pervertit, homines denique non in bestias Circæ à μεταμορφώσαι, sed in ipsos Dæmonas convertit. Nam, ut Cicero, ait: Nihil sentire melius est quam tam prava sentire. Excipit hanc altera OPINIONUM Schola, in qua miseri desudamus mortales, sententiarum fluctibus huc illuc agitati, ut incerti simus semper, quo in solo pedem figamus. Illa quasi in bivio posita ambigua habet è vicina Mendaciorum & Veritatis Schola fata; prout utriusque fines miscentur. Ex quo enim Deus mundum, qui opinionibus maxime regitur, mortalium dis-

spu-

sputationi tradidit, quid muniri adeo rationum robore potest, quod non vis aliqua ingenii enervet ac infringat? Præterquam enim, quod, ut Seneca ait, *inter cætera mortalitatis incommoda caligo etiam mentium sit, nec tantum necessitas errandi, sed errorum amor*; in omnia momenta evigilat antiquus ille Draco, gentium Impostor, mentium nostrarum corruptor, qui vel τοῖς ἐπαρρηγίοις se ingerit, etiam cum nihil adversi suspicamur. Si pauca exceperis, in quibus magistros ducesque sensus habemus, in plerisque non nisi belli Opinatores & Conjectores sumus. Quis nescit quando studio inquirendæ veritatis Græcia omnis exarserit? Inquiramus apud illos, qui placitorum antiquorum historiam texuere: quot hic tricas inveniemus, quibus se mortalium sagacissimus non expediverit? Si Pythagoram interrogabimus, numeros, ideas meraque ænigmata audiemus. Si Socratem; ita ille, Cicerone teste, disputat, ut affirmet nihil, alios refellat. In Platonis libris, ut idem Cicero ait, nihil affirmatur, in utramque partem multa differuntur. Vicerit Aristoteles sagacitate sua reliquos, sed & ipsa ejus subtilitas veritati nonnunquam infesta est, ac solida esse desinit, cum se in formas suas abstrahit, ac veterem illam succiplenam doctrinam curatura sua reddit junceam. Enovatoribus si qui sunt ad aliquam sententiam quasi tempestate delati, ad eam tanquam ad saxum adhærescunt & ostentationi potius ac

am-

ambitioni suæ, quam rei ipsi ferviunt. Singula denique in hac rerum natura si excusseris, quotidiana etiam & quæ ante pedes sunt, ubi omnia rimatus sollicitissime fueris, plura fidei & suspicioni quam demonstrationi relinqui animadvertes. Relinquamus itaque hanc opinionum Scholam, quæ hominum est, & ad tertiam illam quæ Dei est, SCHOLAM scilicet, VERITATIS nos recipiamus. Quod si enim & Cicero maxime sapientis esse dicebat, veritatem ab opinione sejungere; multo sublimius nos sapere debemus, quibus præclaræ illæ facies prælucent. Hæc illa est, quam hodie Spiritus Dei aperit in animis fidelium, qui nos in omnem veritatem ducit, qui testimonium perhibet de JESU CHRISTO, per quem veritas, quique ipse est via, veritas & vita. De Sapientiæ ergo methodo frustra sumus solliciti: Hanc facile ipsa Via præscribit & in scripturis ostendit. Lux illa quæ venit in mundum, ut illustraret omnem intellectum, mentem etiam nostram, quæ lucerna domini est, ut æternæ lucis fomes inextinctus sit, illustrabit. Permittite huic vos Doctori, o Cives, & illam quæ vobis panditur Scholam etiam intra animos vestros erigite. In illos enim descendit, illis se magister ille, qui ipsa veritas est, immergit. Plus esse in Veritate quam opinione Jurisconsulti ajunt: imo omnia habet, qui hujus veritatis particeps est, cui supercilium etiam suum olim submisere, qui præ reliquis populis sapere-

re-

re sibi videbantur Græci & Romani. Illi, præsertim Stoici, quanquam in Paradoxis suis multa ponebant, quæ cum Christiana Philosophia convenirent, nihil tamen profecerunt, cum intra verba tantum omnis eorum sapientia subsisteret. Nunc vero cum Paracletus ille venit, qui testimonium de Christo perhibuit, vera illum docuisse, nos autem cum omni sapientia nostra misere insanire deprehendimus. Alia itaque via nobis incedendum est, si sapere vere velimus. Beatos alii pronunciant, qui opibus, divitiis, honoribus affluunt: Nos e Salvatoris doctrina illos beatos novimus, qui pauperes sunt & abjecti, qui contumeliis impetuntur, qui honores contemnunt. Exstirpemus in nobis profanam hanc sapientiam, ut repullulet, quam nemo principum hujus seculi novit, divina sapientia. Res suas sibi habere jubeamus Mendaciorum & Opinionum Scholas, in quibus ad vanissimas tricas, ad ambitionem, ferociam, injustitiam instituti fuimus. Plura nos sola fide, quam sexcentis conclusionibus Doctores Angelici & irrefragabiles, comprehendemus. Et ut tamen interdum in hoc mari opinionum fluctibus agitemur: videndum est ut in hoc fidei fundo figamur, nec in vortices & Syrtes abripiamur. Eveniet tandem, ut hujus Scholæ discipuli indies longius discendo exercendoque nos procedamus, atque in illos tandem Justitiæ Doctores, qui olim velut sidera fulgebunt, evehamur.

Valete. P.P. KilonI ipsis Pentecostes feriis Anno clb bc LXXXII.

24.

INter præclarissima divinæ *ἱεροφανείας* exempla, quæ sacris consignata monumentis sunt, quam illustre est, quod hodie in Spiritu sancto sub igneis lingvis effuso ostenditur! Exsurgite, ô Cives Academici, & divinum hoc animi oculis capeffite spectaculum. Novas vobis cælo faces accensas videtis, vestros etiam animos sanctissimo igne collustraturas, nisi à tenebris, quibus immerfi estis, discedere ipsi nolitis. Evigilate ad hoc, quo Deus orbem donat, solstitium. Si Solem orientem adorarunt homines impie superstitiosi, quam vos sanctius, & evectum cælo Justitiæ Solem, & has ejus cælo in discipulorum capita lapsos radios, in capita, in pectora vestra, precibus hymnisque evocabitis. Non est illa Diogenis lucerna ad homines quærendos opus. Accenditur in vobis lucerna Domini, mens vestra: ita enim Regum Sapientissimus Salomon illam vocavit: hâc viam monstrante, vos intra vos quærite: sed illam bonæ mentis flammulam, ut divini hujus ignis, quem Spiritus sanctus hodie effundit, fomes esse possit, excitate. Ille, si quis est è Philosophorum nonnullorum sententia, intellectus

vester agens sit, quo agitante in amorem Dei
 hominumque & virtutes incalescat. Neque
 enim hac sibi prærogativa, & inter cæteras
 gentes *περὸ ἑσθλῆς* blandiri Judæos fas est, qui
 suæ nationis homines solo Deo, ut intellectu
 agente, impelli; gentiles vero tantum Geniis
 quibusdam illuminari, inepte gloriantur.
 Profanam vero Cardani sententiam procul
 hinc abesse jubebimus, qui in societatem hanc
 etiam bellua trahit: quibus imminere, quas-
 que ambire eundem intellectum ille tradit,
 sed materiæ inhabilitate ab ingressu excludi,
 cum hominem intus irradiare possit. Hanc
 in se Dei lucernam, etiam è Gentium philoso-
 phis nonnulli, sed è longinquo, & ex altissimis
 tenebris, sub crepera luce viderunt. Qua-
 re & *συγγενεῖς τῷ Θεῷ*, dixerunt homines Sto-
 ici, & oracula illa, quæ Zoroastri adscribun-
 tur, ignem vocant animum à Patre luminum,
 in nos derivatum: in quibus multa sunt, quæ
 præclaram hanc doctrinam mirifice illustrent.
 Neque enim supposita illa omnia temere quis
 dixerit, cum à Platoniciis etiam Christianismi
 hostibus hæc notata sciamus. Eos in nobis
 dispersos radios, per crebra *θεωρήματα*, quasi
 speculo quodam colligamus & in penetranti-
 us lumen compingamus: ut ad Deum *τὸ
 ὡς ἀπὸ ἑσθλῆς, τὸν πατέρα τῶν φωτῶν*, ad ignem
 suum accedat propius, eo caleseat, eo illustre-
 tur. Ille ut mundum superiorem implevit,
 primæ magnitudinis stellis, Phosphoris suis,

sanctissimis geniis; ita mundum hunc inferiorem, qua humanus est, implevit lucernis tenuem quidem fulgorem sparsuris, sed ubi fonti suo junguntur novum divinumque splendorem evibraturis, & postquam è corporis tenebris discesserint, stellarum etiam purissimos ignes luminis claritate longe superaturis. Quod si sibi relinquitur ista, quæ in nobis est lucerna, tenue & exile ejus lumen est. Quæ enim sollicitudine custodiendi illi igniculi sunt? ne quæ à Deo, à Parentibus, à Præceptoribus nobis tradita lampas est, extingvatur: ne fatuarum Virginum instar, oleo illo, quibus alenda illa flammula est, careamus. Finitum nobis diminutumque lumen dedit, Deus, limitibusque, intra quos radios suos spargit, illud circumscripsit. Non solis aut, astrorum luce, qua cælum perfunderet, fulgere nostra lucerna, sed corpore hoc tenebroso includi debebat. Congeramus omnes omnium lucernas, constipemus quicquid radio- rum & luminum est: nihil illa omnia ad divinam & cælestem lucem conferent, nullum illa diem, & ne diei quidem momentum conficient. Quam cum affectaret pulcherrimus olim Geniorum Lucifer, sua luce adversus divinam elatus, de cælo cecidit in perpetuas tenebras conjectus. Quantum virgineæ puræque lucis hæc in nobis lucerna deperdidit! ex quo ultra radiationis suæ sphæram efferre illam Adamus cogitavit. Hinc scintillæ tan-

tum in gentilium doctrinis superstites ægre in solidum clarumque fulgorem enitescunt; vel si ignes sunt, fatui sunt, atque in ortu suo ut *μετέωρα* exstingvuntur. Illa ipsa anima, quæ inter stellas olim nidulabatur, nunc ægre in ipso terræ pulvere hospitatur. Omnia opinionum umbris nebulisque obsepta, neque rerum formas oculus puriore radio intuetur. Socrates in crepusculo totus jacet, neque lucerna ipsi sua quicquam præter tenebras ostendit. Id enim se scire, quod nihil sciret, agebat. Plato ad Lethes fluvium sedet, ac pristinarum notionum suarum obliviam deplorat: Aristoteles in tabula sua raso meras umbras captat: Immo ipsa tanto pretio emptæ Epicteti lampas, oleum illum operamque sæpe perdidisse testabitur. Quam exiguum illud spatium est, quo lucernæ hujus radius pertingit? Solis & astrorum vastitas illum exstingvit, ut minora lumina à majoribus absorbentur. Neque illa, quæ maxima sunt, assequitur; nec illa, quæ minima, comprehendit. Quis ad lychni alicujus flammulam atomos se visurum sperat, quarum corpuscula solari radio deteguntur? Geniorum naturas, non nisi laternæ suæ exempta, id est corpore suo avulsa recte speculabitur. Sit vero illa tenuis, dubiumque lumen spargat; injurii tamen in Deum hominesque sunt, qui hanc lucernam exstingvunt, oculos sibi erunt, ut cæcam quandam ignorantiam profiteantur Sceptici, non homines (sensum enim

ex-

exuerunt) sed hominum larvæ & umbræ, qui etiam vivi suos pati manes non detrectent. Tanta est characterum huic naturæ libro impressorum evidentia, ut vel ad lychni lumen pateſcant. Quod quanquam solem lunamque non æquat, vel diem infert cœlo, à viciniatamen suâ astrorum superans lucem, noctem, nebulasque dispellit. Qui horum nebulonum, (quo enim alio nomine luscitiosas noctuas appellemus?) vel tenebrionum Princeps fuit, Pyrrhon, Pictor, è pergula sua dogmata, in quibus veri nihil omina ficta, in philosophiam intulit. Neque enim vel in philosophiis suis ab arte sua voluit recedere, res & corpora, velut inanes eorum picturas, nihilque solidi habentes sibi aliisque repræsentans. Scilicet, cum Argi illi esse non possint, Cyclopem illum

*Monstrum horrendum, informe, ingens, cui
lumen ademptum*

omni suâ doctrina vitæque tota exprimere malunt. Quid vero faciamus hominibus illis? An libenter miseros, quatenus ita sapiunt, esse jubeamus? Non digni sunt luce, qui tenebras amant & lucem oderunt. Cum in decolores & Æthiopicos illos animos incidet lux, tantum abest, ut albi illi fiant vel esse velint, ut nigriori sibi facie plaudant. Suas sibi illi res habeant, & inter chaos suum se constringant, non lucerna illa Domini, sed furiarum facibus agitati. Vos vero, meliora moniti, Juvenes colligite, quicquid intra vos ignicu-

lorum est, excitate illam Domini lucernam, spiritusq; divini lingvis igneis, in amoris sanctissimi incendia diffundite. Quietum hoc, non tonitribus non procellis armatum lumen est, quod tum demum, cum ad fontem suum redibit, perfectum erit. *Hoc habet animus, argumentum divinitatis*, inquit Seneca, *cum divina eum delectant*: Agite itaque, & illam divinitatis speciem ipso opere ostendite. Date operam, ut siquid in vobis lucernam Domini non olet, aboleatur, nec fumis terrestribus illa suffocetur. Immergite huic vos divini amoris Euripo, ut quoniam ipsi illum comprehendere non potestis, ille vos comprehendat. Si enim quod Platonici ajunt, *voluptatis generatio est ex finiti & finiti copulatione*, quam æternarum deliciarum illecebris deliniti vitam inter mortales beatam agitabitis. Quod si Dei spiritus voluntatem sibi vestram subjecerit, refractarium illum animum in propensissimum mutaverit: Si intellectum sibi vestrum subegerit, vel τὰ βάνη τῶ θεῷ illo Duce comprehenderitis. Redeat tandem ad Dominum suum illa lucerna Domini; tendat ad sedes æthereas, unde in corpora vestra descendit: huc, quemadmodum δίοσκωρῳ illi, marini ignes, in portum perducatur. Non in luto defiguntur, quos Sol spargit, radii, sed cælo suo resorbentur. Intuemini ipsius lucernæ pyramidem, quam illa fundo quidem faculentior ampliorque videatur, pernicipiori tamen circa apicem motu, sursum semper e-

ni-

niti laboret. Pascant alii lucernas suas curarum, & ineptarum opinionum fumis: illudant hæ illis specie aliqua luminis, & vana, boni imagine; faciem tamen non præferent ad ambulandum vias Domini. Alii in terræ visceribus aurum & argentum lucerna sua investigent: Alii populari illam aura inflare, contendant: Alii voluptatum oleo inflamment: Vos divino spiritu illam animate, ut in amorem Dei tota exardescat, ut ita luceat lux vestra coram hominibus, quò *in lumine Dei videat aliquando lumen*, veram illam beatitudinem τὴν εἰς αἰῶνα ἐν Θεῷ Φωτὶ, ut Dionysius loquitur, occupatura. Adspiremus, Duce, qui in igneis lingvis hodie apparuit, Spiritu, Adspiremus ad illam luminum patriam: ubi, ut divinus vates Esaias quasi in speculo prævidit, *non occidet ultra sol noster, luna non minuetur, quia Dominus erit in lucem sempiternam & Deus in gloriam nostram.* Valete P. P. ipsis Pentecostes feriis Anni dñi lxx LXXXIII.

25.

QUod si de Deo non sine lumine loquendum, CIVES ACADEMICI; hoc præcipue die, monitum Gentilis Philosophi, ad sanctissima religionis nostræ mysteria non incommode, neque profano sensu applicabimus: quo ipse se Deus

in ignearum lingvarum luce orbi spectandum exhibuit, ipsique Apostoli τὰ μεγαλῆα τῷ Θεῷ toto & numine & lumine circumfusi decantant. Ad animum itaque & nos hoc admittere præceptum fas est, ne sine lumine, jam de Deo loquamur, sed ita & sentiamus & dicamus, ita animum & linguam instituamus, ut lucem illam divini Spiritus etiam intra nos, intra præcordia suscitata, per labia ardentissimis precibus evibrata ostendamus. Quod si nobis tenebrisque nostris relinquimur, in chaos merum abimus, perpetua nocte damnandi; nisi lux divinæ vocis, & vox divinæ lucis illud יהי אור intra nos diffundat, & e tenebrarum filiis, lucis filios generet. Acclamemus itaque divino huic lumini : χαῖρε Φίλον Φῶς! Veni sanctissima lux, & nobis te tuosque radios infunde, quibus ad virtutes, ad pietatis ardorem, ad amoris mutui flammam, ad divina officia excitemur. Illabere sensibus Principum, ut tuo igne quicquid est flagrantium odiorum & simultatum exstingvatur, ac in pacis æternæ fœdera animi coalescant. Fatali enim bellorum incendio omnia correpta non tantum, sed propemodum consumpta videmus. Dum igneæ Apostolorum verticibus linguæ infident; in Christiano orbe sulphurei ignes, & quis credat? Christiani, in vertices fratrum deflagrant. Blanda illic flammula & innoxia capita mulcebat divinas laudes celebrantium: Hic globi flammivomi capita ipsa demetunt,

mu-

muros subruunt, domos evertunt, stragibus omnia implent, & ejulantium lamentis. Illa cœlo in Discipulorum capita descendit; Hi ignes furiarum facibus incensi, neque cœlo, unde depluunt, oriundi in miserorum cervices projiciuntur. Illic leni susurro Spiritus divinus ædes impleverat. Hic vero

(ô ventum horribilem atque pestilentem!)

telorum, globorum, flammarum imbres, procellæ, turbines, quicquid obfistit hominum, & domuum una eademque ruina involvunt. Hæc cum animo nostro reputamus, quis non toto pectore his malis ingemiscat? quis non divini Spiritus præsidium in his turbis, in hoc atroci ac difficillimo tempore imploret? Neque enim frigent modo pectora omni Christiana, charitate orbata, sed furiarum flammis flagent, atque ita flagent, ut divinæ lucis igniculos omni opera atque conatu a se avertant. Nos vero placidiore lumine illo divino animos pascamus, ejusque igne, non in cædes & rixas, sed in amorem perpetuum nos animemus. Lumine nos suo irradiet divinus ille Spiritus, quo videamus lumen in lumine, Deumque pure mente cognoscamus. Quemadmodum enim ut Solem videre possimus, solis lumine indigemus; ita nec Deum, nisi ipso Deo ducamur, & verbum ejus lucerna sit pedibus nostris, videbimus. E lumine ille ignis constipetur, amor scilicet, quo in Deum & homines exardescamus, & lumen nostrum coram ipso hominibus.

que spargamus. Nam ab igne lux emanat, lux vero in ignem compingitur. Lumine divino intellectus illustrabitur, igne voluntas atque affectus nostri & purgabuntur, & efficacitatem illam Spiritus persentiscent. O felicissimum in nobis hujus Ignis & Lucis confortium, quæ æternis inter se vinculis cohærentes bona in nobis omnia operantur. Intellectus luce illa armatus, si divinis contemplationibus indulget, atque in illis plus proficit, quam qui vel per nebulas & fumos omnia intuentur, vel plane cæci sunt Sophistæ; quid non in iis quæ ante pedes sunt efficiant? Qui terræ fundum perspicacitate sua penetrare se posse putant, Lyncei, Hypsæa tamen sæpe in his cæciores sunt. At hoc lumine imbuti, omnia mentis suæ vi pervadunt, quæ in hac rerum universitate, cognosci possunt, sive sint *διὰ φύσιν*, sive *διὰ τύχην*, sive *διὰ τέχνην*: his enim tribus finibus rerum omnium ambitum Plato circumscripsit. Et quid non causarum animo assequantur, qui eam sibi lucem junctam habent, quæ olim omnia divisit, & e rudi mole in ordinem luculentum redegit. Ecce quam subita mira que *μεταμορφώσεις* e simplicibus rudibusque Piscatoribus hodie facti sunt Oratores Poëtæque disertissimi, ubi lux illa animos afflaverat. O felices hoc Doctore Discipulos! Cujus disciplinæ si & vos tradideritis, velocius hunc *ἐγκυκλοπαιδείας* orbem decurretis, quam cum Scholæ humanæ Magistri longa vos peregrinatione,

cir-

circumducunt. Qui & πολυμαθής & ταχυμα-
 θής esse cupis, (solet enim extemporales & do-
 ctiores & disciplinas sæpe non sine insigni stu-
 diorum damno sectari juvenus,) hic habebis,
 qui omnia ἐν τῷ νῦν doceat, & sine ullo quidem
 dispendio. Ideoque non tam e Zoroastrini o-
 raculi, quam ipsius divinæ veritatis monito:

Χρῆ σε σπεύδειν πρὸς τὸ Φάϑ, καὶ πρὸς
 πατρὸς αὐγὰς.

Ἐνθεν ἐπέμφθη σοὶ ψυχὴ πολὺν ἐσσαμένην
 νῦν.

*Oportet te festinare ad lucem, & patris lumina,
 Unde missa est anima, multam induta mentem.*

Qui Theologiæ sacra amplexi estis, hujus in
 vobis spiritus lumen accendite, qui in omnem
 veritatem ducat, qui profunda etiam divinita-
 tis rimetur, absque hoc futuri homines ψυχι-
 κοὶ, τὸ πνεῦμα μὴ ἔχοντες. Qui Justitiæ ope-
 ram datis, hujus in vobis lucis radios agnosci-
 te, cujus radii sunt νόμοι ἔγγονοι, atque in ve-
 stro animo Urim & Thumim repræsentant.
 Hæc ipsa lux erit in vobis lex oculata quæ
 πρὸςσω καὶ ὀπίσσω videat, quæ inter pectora
 lucet, ut inter fulgura in monte Sinai promul-
 gata est. Qui rem medicam excolitis, hujus
 beneficio luminis altius in naturæ opera vos
 immergetis. Omne denique Sapientiæ genus
 ita vobis jam declarabitur, ut monente Aposto-
 lo ad Rom. XII, 3, discatis μὴ ὑπερφρονεῖν,
 παρ' ὃ δεῖ φρονεῖν, ἀλλὰ φρονεῖν εἰς τὸ σωφρο-
 νεῖν. Ut sapere, ut agere bene velitis, monitor
 in-

intra vos residebit divinus ille ignis, qui stimulos subdet, & τὸν θυμὸν impetum scilicet illum in vobis excitabit, illud vero, quod in vobis *ἑνεσώδες* est, depascet. Rectius itaque de vobis tum dicemus:

Est Deus in vobis, agitante calescitis illo,
quam de profanis illis Vatibus suis jactabat Ovidius. Præprimis videte, ne ignes vestros, qui a pravo animo oriuntur, & impuris affectuum fumis: huic misceatis, quorum nulla inter se conspiratio est. Summo olim in Gentilium superstitionibus studio cavebatur, ne, profano igne facer, & contra profanus sacro accenderetur, quo & Phædri fabulatoris illi versiculi *lib. IV. fab. 10.* pertinent, quibus Religio furem alloqui fingitur, ex ara Jovis lucernam accendentem, illamque ad lumen suum compilantem.

*Hanc Tu scelestæ spiritus culpam lues,
Olim cum adscriptus venerit pœnæ dies.
Nam ne ignis noster facinori præluceat,
Per quem verendos excolit pietas Deos,
Veto esse tale luminis commercium.*

*Ita hodie nec lucernam de flamma Deum,
Nec de lucerna fas est accendi sacrum.*

Quanto magis nunc cum igni huic pectora vestra permulcenda permiseritis, operam dabitis, ut omnia ejiciatis furiarum & cupidinum pabula, ne illis sanctior ignis exstingvatur, & illas detis pœnas, quas Aaronis olim dederunt filii, qui cum profano igne sacrum Deo facerent,

rent, divino illo correpti misere perierunt. Videte ne ipsæ hæ feriæ vos improbis vel Bacchi vel Martis vel denique Veneris ignibus calefactos deprehendant, & igneis illis lingvis pectora & lingvas alio igne agitatae consecratis. Metuendus Vindex ille ignis est, quem in die Pentecostes Florentiæ e superiore parte templi lingvarum forma injectum, multa loca combussisse, nec ulla vi aut consilio potuisse exstingui, accepimus. Idem e Bruti Historiæ Florentinæ lib. V. Aloyf. Novarin. Schediasm. lib. VIII. c. 24. memoriæ prodidit. Vos potius fomites in animis vestris parate optima vita piisq; moribus, in quos sanctissimus ignis & precibus vestris lacesitus, & propensione sua tractus illabatur. PP. ipsis feriis Pentecostes Anno clō lbc LXXXIV.

26.

Hoc illud tempus est, Cives Optimi, ut toti rerum naturæ, ita omni Christiano populo salutare maxime & lætabile, omnibus naturæ gratiæque thesauris affluentissimum, omni religionis cultu venerandum: quo post receptum cælo Salvatorem, Spiritus sanctus in vertices Apostolorum effusus, æternæ sapientiæ luce animos illorum perfudit. Nam etsi illam Patris æterni Sapientiam, humana carne vestitam, viderent palparentque quotidie: etsi rerum sacrarum

my.

myſteria explicantem, & cœleſtis vitæ præcepta inſtillantem audirent: neque enim ἐν αἰνυγματι tantum, ſed plane aperteque loquebatur: quæ tamen mentis cæcitas erat, non ſatis intelligebant, aut cogitatione comprehendebant. Verſabantur illis humanarum opinionum imagines ante oculos, & in rebus etiam divinis ſibi ſapiebant, ſua interpretatione trahentes dirigentesque quo mallent, ea quæ audiebant, uſque adeo hac obcæcati ſtultitia, ut vel in vitam rediens Salvator animis illorum vix excuteret. Quam ſocordiam & dementiam non leviter ſæpe perſtrinxit; quanquam objurgationes ejus amoris erant pleniffimæ, ut qui novum ſe illis Doctorem e Cœlo miſſurum pollicebatur, qui errantes in viam reduceret, qui in omnem veritatem duceret, ac divinæ intelligentiæ luce illuſtraret. Supervenit itaque illo, quem nunc Eccleſia celebrat, die Diſcipulis Spiritus, ipſeque ſe animis illorum divinus Doctor, viſibili flammularum ſpecie, infudit. Agnoſcite novam hanc informandi rationem, qua non quinquennali ſilentio Pythagorico explorantur ingenia, ſed ἐν τῷ νῦν illa quaſi oculis cernitur ſapientia, quæ tot lingvis in τὰ μεγαλῆα Dei ſe diffundit. Fuere qui magicis carminibus in ſtatuas & imagines ſidereos ignes evocarent, ut haberent quæ conſulerent oracula; ſed divinus ille ignis ſponte ſua in vivas Dei ſtatuas, pios homines, ſedibus æthereis delabitur; vel efficacioribus precibus

de cœlo deducitur, sua intra nos oracula promulgaturus. Quemadmodum ille lucet & urit, ita geminam in animis facultatem fuscitat intellectus & voluntatis: Illius, ut contemplemur abscondita; nam in Dei lumine videmus lumen, & lucem illam, quæ in mundum venit ut illuminet omnem intellectum, quæ Via, Veritas & Vita est, luce nostra comprehendimus: Hujus, ut pietatis ardore quasi facibus quibusdam inflammati corripiamur & inenarrabiles in nobis divini Spiritus gemitus provocemus. Adeste animis auribusque, o Cives, in novum sapientiæ ludum a nobis deducendi, novoque tyrocinio imbuendi. Quandoquidem enim in hoc sapientiæ artiumque seminarium venistis, ut literis animos percoleretis, id quod palmarium in omni doctrina est, discite, ut dediscere humanam sapientiam velitis, ac divinæ vos Sapientiæ Candidatos SPIRITU SANCTO Doctore profiteamini. Primum hic ΠΑΡΑΔΟΞΟΣΟΦΙΑΝ Christianam vobis proponimus, quæ cum summa sit Sapientia, hominibus tamen Stultitiæ nomine traducitur. Amplectimini Sapientiam illam, quæ Stultitia est. Nam si Venusino Vati *Sapientia prima est stultitia caruisse*, heic ipsa Stultitia Sapientia prima est, atque alia plane via incedit, alio orbe ταῦτ' ἐγκυκλοπαιδεία decurrit. Ipsæ hujus Sapientiæ incunabula animo perpendite. Libri: perpauca illa conditur, quorum ad nostra usque tempora salva stat autoritas, cum tot Seclorum,

tot

tot philosophorum infiniti propemodum libri, vel potius Bibliothecæ cum suis autoribus pefsum iverint. Invitis, ringentibus, obloquentibus, exsibilantibus tot seculorum Scholis & Philosophis; ferrum, ignem, supplicia intentantibus Tyrannis, conjurantibus in illius perniciem integris gentibus, caput tamen erexit atque de omni hominum sapientia hæc triumphavit stultitia, ut solo illo *κρυψίω* vel æternitatis hæc Sapientia, vel Sapientia æternitatis deprehendatur, quæ Stultitiæ illo velamento majestatem suam recondit, ut altera illa humana Sapientiæ fucum Stultitiæ suæ obducit. Discamus, discamus ea in terris, quorum memoria non in terra hac tantum perdurat, sed & remanebit in cœlis: quicquid etiam stultorum turba ogganniat. Superbiat hoc Sapientum titulo Stoicorum Schola, qui se solos reges, divites, nobiles, uno Jove minores vano quodam & inutili fastu prædicabant: nam si Philosophiæ Christianæ sensu illa intelligas, *παράδοξοσοφία* laudabilis erit, quæ Sacerdotes & Reges verosque *εὐγενεῖς*, *θεογενεῖς* efficit: audite tamen ex eadem Schola principem virum, Senecam: *Si quando fatuo delectari volo, non est mihi longe querendus, me video*: qui quidem eadem stultitia hanc suam stultitiam exagitabat, qua alii suam ex eadem familia Sapientiam jaçtitabant. Accipiamus vero & largiamur illis, quam in se agnoscunt Stultitiam, magni illi simulatores, qui ad speciem potius & pompam su-

supercilioſa illa Scholæ ſuæ placita referebant, & ſub illo ſui contemptu novam aliquam gloriam venabantur. Quibus ſimiles ſunt, qui totis libris Scientias inſectantur, earumque inanes curas & vanitatem ob oculos ponunt, Sophiſtæ potius & Declamatores, quam vererum æſtimatores. Nimirum ut Diogenes Platonis faſtum alio faſtu calcabat; ita hi Philoſophorum vanitatem majori vanitate explo- dunt: Cæcitate enim illa mentis, ex quo oritur ſuperbia, ut omnes Stoici, ita etiam hi labo- rant. Quod ſi in fundo ſuo illos adoriamur, ſi ſingula illorum placita digitis dimetiamur: quis non plus *Φανταſίας* quam iudicii in illis deprehendet? Nam & ſenſibus & opinionibus & affectibus in partes diſtracti, velut turbine, implent omnia, ut quantaquanta ſit, non niſi *μετέωρε* ſit ſapientia, & quia inflat, ventoſa & procelloſa, uno verbo ſtultitia, quæ ſe ſa- pientiæ criſtis erigat, & leoninam aſinino cor- pori pellem circumponat. Sed tamen eadem cælum ſtultitia petimus Bellerophontes, qui alato Pegaso, vanis ſcilicet opinionibus confiſi, irrumpere in divinæ veritatis arcana non vere- mur, cum id quod ante pedes eſt exploratum non habeamus. Scientia Cœleſtis, quem- admodum ipſum regnum cœlorum, eſt pau- perum ſpiritu: & Gigantes illi Scholarum mi- nus hic ipſis pueris ſapiunt. Cum enim cœli portæ humiles ſint, non intrabunt Antæi, Cy- clopes, Terræ filii, ſed pueri & *αἱ παῖδες*,

in quos disciplinam suam exercet Pædagogus ille Spiritus. Immittamus nos in Philosophiæ campum, ejus faciem describere in urbe Româ nobis videtur Petronius : *Quoscunque homines in urbe videritis scitote in duas partes esse divisos : nam aut captantur aut captant : videbitis tanquam in pestilentia campos, in quibus nihil aliud, nisi cadavera quæ lacerantur, aut corvi qui lacerant.* Omnia dissensionum plena sunt. Alicubi sententiarum cadavera projecta videas, quibus incumbunt clamosi & rapaces corvi, aliis quoque in prædam cessuri. Seneca Philosophiam in Philologiam mutatam querebatur, quidni & nos Christianismum omnem in Theologiam meram commutatum queramus? Sola enim lingua diferti in sermones in disputationes de Deo abducimur, Chrysostomi interdum & aureorum verborum homines, nunquam Polycarpi, qui vita & factis verba sua obsignent & fructus aliquos ostendant. Vel etiam in cædes mutuas, quid enim aliud sunt convitia & rixæ? plusquam Cadmæi fratres exardescimus. Verum alia longe gravior pestis divinis incumbit studiis, quando eo stultitiæ etiam è Philosophorum Scholis progrediuntur homines, ut Deum laceßere ipsum non vereantur, qui summus dementiæ gradus est: nam & ipse Spiritus Sanctus illos quasi κατ' ἐξοχήν stultos vocat. Hi scilicet, cum sine Deo nil sapere possimus, cum docente Paulo, *non simus sufficientes cogitare aliquid à nobis tanquam à nobis*, adeo tamen etiam cum

cum ratione insaniunt, aut ut cum Lucretio loquamur,

*Impia amant rationis inire elementa viamque
Endogredi sceleris,*

ut vel in Deum ipsum arma sua convertant, cœlo suo dejiciant, omnem providentiam funditus evertant, Ita enim in orbe versantur, quasi Deo nihil debeant, quasi nulla sibi iurata sint

Securi quo pes ferat, atque ex tempore vivunt.
Quod si mundum hunc universum mentis acie perlustraverimus, quid sine illa Spiritus divini luce nos speremus vel suspicionibus assecuturos? Primum enim illa vincula, quibus mundus invisibilis intelligibili nectitur, nobis sunt abscondita, cum in his veræ rerum causæ delitescant: Mundum autem illum visibilem, tradidit Deus disputationi hominum; sed alterum illum intelligibilem nobis occultavit, ut itaque faciem tantum exteriorem naturæ intueamur. Et in hac facie quantillum est, quo ingenii acumine penetrare possimus, qui, ut Aristoteles ait, ὅτι μικρὸν βλέποντες sumus, ad parva & pauca respicientes in hoc universo, cum tamen, ut Plinius ait: *Naturæ rerum vis ac majestas in omnibus momentis fide careat, si quis modo partes ejus, non totam, animo complectatur.* Ne quid de eo dicamus, quam per se mens humana, ut finita, errori sit obnoxia, ob infinitas illas ad corpora relationes, è quibus suas illa opiniones colligit, ni mens illa infinita in

suum quasi ordinem redigat, ut ab illa discrepare non possit. Præterea nobis ut pueris omne ludicrum in pretio est, teste Seneca, qui in hoc naturæ theatro spectatum admissi in nugis quibusdam consenescimus, vel vanis florum coloribus, vel concharum figuris, similibusque quasi crepundiis nos oblectantes. Quod si majora animo volvimus, novas nobis opinionum chimæras fingimus, auctoritati vel nostræ vel aliorum nova idola statuimus, vastos librorum montes congerimus, in quibus ut in Africa deserta peregrinandum est; obruunt enim spiritum, nec ædificant intellectum. Exhaustat verò quis omnes humanæ sapientiæ rivulos, quid tum postea? Audiat ille Doctorem gentium Paulum: *Qui se existimat aliquid scire, nondum cognovit, quomodo oporteat eum scire.* Mensuram autem suam capit scientia ab ordine, à studio, ab intentione. Primum illa, quæ necessaria sunt præferenda sunt inutilibus & ineptis. Hic ad ἐν ἀναγκᾷον præcipue respiciendum est: Studio ferventiori complecti divina & æterna debemus, quam ea, quæ sunt humana & frivola. Si ex intentione æstimanda est scientia: facessat hinc vana gloria, non ad quæstum instituamus artes, non curiositatem nostram faturemur; sed ita operam scientiis impendamus, ut nostræ, ut aliorum saluti subvenire possimus. Nam alibi idem Paulus vetat *plus sapere, quam oportet sapere; sed sapere ad sobrietatem jubet.* Quem-
ad-

admodum enim cibus indigestus humores pravoros generat, corpus corruptioni ac morti ipsi obnoxium reddit; ita scientia, animi cibus, nisi memoriæ ventriculo, calore caritatis digeratur, per membra, pios scilicet homines, convertatur in opera moresque Christianos, vitam largiri animo nequit. Et hinc à mala illâ digestionem flatus & tormenta, cogitationes pravæ & superbæ, scrupuli conscientiæ oriuntur. Rectius itaque fecerimus, si deleamus ex animo humanarum opinionum imagines, ut suæ in nobis sapientiæ lineamenta ducat Deus. Vacui à nobis ipsis simus, ut implere nos spiritu suo Deus possit. Prostateamur doctam hanc ignorantiam, quæ omni scientia potior est; nam, quæ scholam sapit doctrina, nihil tabernaculi & sanctuarii habet: in divinis verò monimentis quicquid docetur, veritas, quicquid præcipitur, bonitas, quicquid promittitur, felicitas est. Offeramus mentes nostras Deo magistro nostro in sacrificium; nam qui cælum & terram fecit, plus habet sapientiæ, quam omnes nos Scholæ docere possunt. Offeramus cogitationes, mentis nostræ filias & pupulas, quas tenerrimo adeo affectu prosequimur, omnesque Deo in amoris ara victimas immolemus, innocentes illarum parricidæ. Plusquam Heroica crudelitas illa est, qua animos nostros in Crucifixi nostri gloriam, denuo crucifigimus, ut scire nihil aliud velimus, quam Christum, crucifixum, & per illum, doctore Spiritu,

divina myſteria cognoſcamus. O felicem Sceptiſmum, cum doctrinæ humanæ ſtultitiam probe examinavimus, ac ruditatem noſtram profeſſi Deo dignos nos reddidimus; tum enim divinæ gratiæ imber velut in pingue ſolum depluet, ut poſtquam lappæ tribulique malæ doctrinæ eradicati, feliciores uberioresque fructus proferamus. Non infundit lumen ſuum Deus, niſi in noſtræ lucis deliquio. Faſtidit illam ſapientiam Deus, quæ quaſi in ordinem hominum illum redigere vult, & noſtro modulo metiri. Nam qui ſuper omnia, ſublimia excelfus eſt, non amat niſi humilia, quæ quaſi in confinio quodam cum divinis ſunt poſita. Nihil majus ad divinam glorificationem afferre homo poteſt, quam ſuam miſeriam & humilitatem, quam Deus ipſe aſſumpſit, ut ſe coram hominibus glorificaret. Ne ipſa quidem occultarum rerum ſcientia, ut multa ſunt, quæ Deus obſignavit, ac in theſauris ſuis reſpoſuit; a vulgari intelligentia remota, ſi forte piis mentibus ſingulari gratia quicquam indulſit, tanti eſt, ut illa efferamur, divinæque felicitati propiores nos exiſtimemus. Nam cum Diſcipulis ſuis poteſtatem in Dæmonas contuliſſet Salvator, ne iſto dono ſuperbirent, hanc quaſi ἐπίπληξις ſubnectit: *Veruntamen in hoc nolite gaudere, quod Spiritus vobis ſubjiciuntur, ſed gaudete, quod nomina veſtra ſcripta ſunt in cælis.* Nimirum ſcientiæ ſublimitate ſola, vel miraculis cælos non perrumpemus; etſi tan-

tantum vere sciamus, quantum vera fide pietateque operamur, verique simus πάνσοφοι, si Christum scimus, quod melius est, quam si omnia sciverimus. Ita enim DEO placuit, ut Sapientum Sapientiam perderet, nosque per stultitiam predicationis de Christo salvi fieremus. Vidistis, Cives Optimi, cœlestem illam, quam Spiritus S. Apostolos, illi gentes docuerunt, stultitiam, quæ æterna Sapientia est, ac Sapientiam Mundi quæ vera stultitia est, ὡς ἐν τύπῳ delineatam. Ut singillatim omnia percenseatis, atque explicatius sciatis, ex illo scientiarum Orbe παραδοξοσοφίας nostræ quædam Capita proponamus. Quis est e Vobis, qui τὰ μεταφυσικά, circa illa quæ sunt versari nesciat? Vos vero primum hoc Metaphysices divinæ παραδόξου tenete. Ne esse quidem nos aliquid, imo Nihil esse. Etsi enim Novatores ita colligunt: Cogito, ergo sum: vos scitote, docente Spiritu: non cogitare nos aliquid a nobis posse tanquam a nobis. Cogita ergo an sis aliquid, an Unus? an Verus? an Bonus? Nihil ergo te esse deprehendes, & ut possis esse, labora. Voluntaria enim hac annihilatione. ἡμῶν ὄντι τῷ ὅντων nos quasi in fidem ac clientelam tradimus. Exuenda & abjicienda illa αὐτότης nostra est, ut in DEO simus, quicquid sumus; ejus intelligentia sciamus, ejus Voluntate appetamus. Ille enim, ut Scaliger in subtilitatibus suis, Exc. 365. αὐταυτὸς est, quem nullis plane vocibus intelligemus, quam iis, quæ ignorantem prætendunt nostram, & qui a nemine,

nisi a se solo cognoscitur, & a Filio, & cui Filius vult manifestare, & a Spiritu, qui scrutatur etiam profunda DEI. Utinam exuere & abnegare nos ipsos possimus, ut in Nihilum nostrum se infundat atque operetur, qui Omnia est in Omnibus: nam ut subtiliter idem Scaliger e Platoniceis eodem loco disputat: summa hæc DEI omnipotentia est, qua in non Ens agit. Sic aliquid, sic unum erimus, & illum Philosophiæ finem τὸ ἐνὸς θεῶν ἡμεῖς e Pythagoræ sententia assequemur. Nam in unione cum DEO veritas nostra, non in unione corporis consistit, sine quo etiam mens DEO unita potest consistere, & nunc in Corpore quoque illi uniari debet, ut homo, (quæ Aristotelis l. 1. Polit. verba sunt,) cum DEO τὸ γένει sit αὐτός, in quibus etiam mysteria quæfivit *Exercit. laudata Scaliger*. Nos nobis relictæ uni non sumus: Infinitos enim vultus & larvas sumimus, & quot peccata in nobis sunt, tot facies velut in theatro repræsentamus mimi & ludiones. At vero *Quo teneas vultus mutantem Protea nodo?* nisi divinæ simplicitatis vinculo constrinxeris. Imo in ipsa illa turba solitudo horribilis est, si absque DEO & lumine simus. Sic Veri erimus, qui natura nostra mendaces sumus, cum in lumine illo æterno videmus lumen, & intelligentiæ divinæ nostram submittimus, cum Spiritum veritatis, quem mundus non potest accipere, quia non videt & novit eum, accipimus. Ita denique Boni dicemur, si ab ejus voluntate, qui solus Bonus

nus αὐταγαθός, ac ipsa Bonitas est, pendebimus. Ita similes erimus DEO, si similes fiamus Θεωθεώπῳ, si totus in nobis erit DEUS, nos toti in illo, & in summo illo Paradoxo *Deus Homo, Homo Deus est*, quo salus & vita nostra continetur, Sapientiam Christianam velut in fidei quadam petra fundabimus. Hæc illa Philosophia æterna est a seculis abscondita, in quam beatæ mentes παρακύψας gestiunt, de qua nos, quoad per mentis imbecillitatem fieri potest, infantum instar balbutimus. *Ut enim se habet visus ad visibilibus summum nempe solem; sic intellectus ad summum intelligibilem Deum*, quæ Platonis aliorumque Philosophorum elegans in hanc sententiam similitudo est. Mittamus jam τὰ ἀόρατα, & in rerum naturam, qua oculis nostris patet, atque adeo in nos ipsos, qui majoris mundi quasi imaginem quandam circumferimus, descendamus. Annon lapides loqui videmur, cum hæc vobis παραδόξα depromimus? *Christianorum esse in corruptione Generationem, in Morte vitam, in ἀναστροφῇ summam intelligentiam.* Sunt vero hæc arcana & divinæ Physices mysteria. Cum enim vias suas super terram corruerit omnis caro, nulla a carne generatio est, quæ non corruptionis labem nobis affricet, atque illa mortis semina in nobis spargat. Corruptenda itaque nobis caro est, ne nos corrumpat, & in mortem æternam abducatur, jugulanda est gladio Spiritus, ut in novam vitam resurgamus, & ex ipsa morte salus nostra

renascatur. Subtrahenda paulatim corpori & sensibus mens est, ac velut ablactanda, ut divinæ menti adsvescat: ubi enim in sensuum contagio hæserimus, mira nos & naturalium rerum & nostrarum premit ignorantia: etsi sunt sapientuli, qui nihil nos scire, quam quod sensu comprehendimus arbitrentur. Relinquenda vero illa sensuum via est, ne in præcipitia nos & errores protrudat. Quæ cum incederent Gentes, etiam in sensus incurrentes Deos sibi fabricarunt, & in statuis ac idolis suis coluerunt. Ne miremini, si quemadmodum inter Italiæ Academicos quidam Insensatorum titulo signari voluerunt, nos cœlestis Academiæ candidatos Insensatos velimus. Non potes in te ipsum descendere, nisi a sensibus tuis disce-feris, qui aliorum animum impellunt, ut domi esse, seque ipsum speculari nequeat. *Quæ vero sunt hominis, nemo novit, nisi spiritus hominis, qui in ipso, est, teste Apostolo.* Itaque,

— — — *quem te Deus esse*
Jussit, & humana qua parte locatus es in re
Disce.

Memineris, nos Deo Patri luminum & Spirituum esse *συνγενεῖς*, non brutorum familiis accensenda animantia, quæ non nisi sensu & appetitu rapiuntur: ne, cum nobis ignoti, & nostræ originis sumus obliti, acerba hac reprehensione sponsus noster illam sibi dilectam animam dimittat: *Si ignoras te, o pulcherrima inter mulieres, egredere & abi post vestigia gregum, & pascere*

ſce hædos tuos juxta tabernacula paſtorum. Vindicanda potius nobis eſt illa gloria, qua DEus nos dignatus eſt: *Ego, dixi, Dii eſtis & filii excelſi omnes.* Non aſpernatus eſt humanam carnem Deus: & nos Angelorum naturam exuemus, ut in beſtias loquentes μετεμψυχώσε plusquam Pythagorica degeneremus, per quandam potius ἀποθέωσιν in Deos evehendi. In ἀνθρωπολογίας ſtudio tum demum aliquid proficiemus, ubi externum illum hominem, ſuas ſibi res habere juſſerimus. Illum qui in deliciis habet & amat, inimicum ſuum amat, non ſe ipſum; de quo veriffime dixeris, quod apud Matthæum Salvator: *Inimici hominis domeſtici ejus.* Quis vero magis domeſticus, quam qui nobiſcum una eademque in pellicula habitat, & in ſinu noſtro fovetur? Illum loco moveamus, illum occidamus, quantum in nobis eſt, nam ut eſt apud Apoſtolum, *cum is qui foris eſt homo corrumpitur, is qui intus eſt renovatur de die in diem*, atque ita Dei intra nos regnum, ipſosque cœlos excitabimus, & intra naturæ carceres, ad Deum emigrabimus. Quis porro mente comprehendat, quæ Mathematicum ſtudia & paradoxa & myſteria nobis proponant! Cum enim in abſtractis à re ipſa notionibus illa verſentur, ad rerum ſpiritualium quodammodo accedere indolem videntur. Quantum illud è numerorum doctrina παραδόξον & myſterium eſt! *Unum eſſe Trinum, & Trinum unum.* Neque enim hic de numerorum ar-

ca-

canis, & quæ in sacratiore philosophia, quam Cabalam dicimus, annorum temporumque, secreta lateant, quicquam memorabimus: quæ de re integra à multis volumina conscripta sunt. Quam & hoc in divina œconomia novum atque insolitum est: *primos fore ultimos, ultimos vero primos!* E Siderum doctrina id notabitis, *sui cœli, suorum astrorum fabros esse Christianos, quibus Agnum Signiferum secutis, non duodecim tantum, sed innumeræ illic in domo Patris mansiones designantur.* Ipse divinus Spiritus ne quidem in Dei cognitione, *αὐγεμετρήτης* nos esse patitur, & *secundum longitudinem, latitudinem, altitudinem Dei amorem metiri* docet, qui & ipsa Dei profunda scrutatur. Musicam Christianorum & concentus audietis? Ipse apud Joannem Salvator insonat: *Amen Amen dico vobis, plorabitis & lamentabimini vos; mundus contra gaudebit.* Si Cantu duro, cujus notulæ cruces ubique adpictas circumferunt *miserere* nostrum ingeminamus, in jubila quidem mundus solvitur; sed tamen *Latere* suo Angelorum respondent chori, si hanc pœnitentia peccatoribus vocem expresserit. Quis non ingens in Statica *παράδοξον* agnoscat? *Onus onere novo fieri levius, jugum altero suscepto jugo leniri, & hoc tamen solatio miseros dimittit Salvator: Venite ad me omnes qui laboratis & onerati estis & ego reficiam vos.* Quo optime Domine subsidio? quæ manu onus excuties? Immo vero respondes:

Tollite jugum meum super vos, jugum enim meum suave est, & onus leve. Hem! istud est onere levare? Est vero, Cives, nullum enim gravius mundi onere onus est, quod ad ipsos usque inferos gravitate sua deprimit, ut alterum illud contrario pondere velut in bilance posito, depressa erigit. Quos non videas sæpe Affectuum cæco furore impulsos onus sibi Ætna gravius imponere: cum nec vitæ pericula, nec supplicia, nec infamiam reformidant: modo id quod sibi proposuerunt consequantur: qui ne manum quidem vertere Dei causa sustineant ac vel minimo in his labori obnitantur. In morum philosophia quam non ad palatum sunt multis, quæ illa profitetur *περάδοξα*. Hic enim numerosa illorum seges occurrit, neque opus erit ut Stóicorum vepreta cædamus, qui magno quidem hiatu multa promittunt, sed ubi ad rem ventum est, inania ac sterilitate sua contemnenda. Vix illa volumine uno absolvi possent, si plenioribus depingere coloribus propositum esset. Quot non felicitatis formas modosque ad suum illum *εὐδαιμόνεια* produxit Stagirita! Non male & ad Christianum sensum Seneca, si meliori cultura hæc doctrina niteretur: *Bonam tibi formulam dabo, qua te metiaris, qua perfectum jam esse sentias: Bonum tunc habebis tuum, cum intelliges infelicissimos esse felices.* Conspirent licet omnia voluptatum nomina, congerantur omnes in unum fortunarum species, si absque illius notitia & amore sint, qui *παρα-
γα-*

γὰρ ὅτι est, si nulla æternæ beatitudinis spe sustententur, earum πάντες ἀπόλοιτο γένος. Verissimum enim est, quod Augustinus ait; *Prospera hujus mundi habent asperitatem veram, jucunditatem falsam, certum dolorem, incertam voluptatem, durum laborem, timidam quietem, rem plenam miserie, spem beatitudinis inanem.* Divini vero amoris & futuræ nostræ felicitatis intuitu, quicquid hic splendidum, quicquid beatum videtur, miserum est: quicquid triste, acerbum, infaustum, jucundum est. Quare divino Spiritu sanctissimaque fiducia pleni, in mœroribus nostris gaudia, in infamia decus, in cruce gloriam, in paupertate divitias, in ægritudine sanitatem, maximi Magistri nostri exemplo, collocamus. Beatos ille sua sententia pronuntiabat, *pauperes Spiritu, quoniam illorum est regnum cælorum; eos qui lugent, quoniam consolationem accipient; qui persecutionem patiuntur propter justitiam, qui probris impetuntur, quoniam merces illorum amplissima est in cælis.* Quæ cum animo reputamus, magnam hanc infelicitatem interpretabimur, si sine infortunio simus. Felices vero nos, si bona nostra novimus, habebimus, si ex ignominia honorem, e miseriis felicitatem, e tormentis solatia expectare aliquando possimus. Alii magnificentiam inter Virtutes numerent; nos humilitatem, quæ Christianorum μεγαλοψυχία est & generositas, in prima virtutum nostrarum sede ponemus: Alii populari plausu honorumque titulis pascantur: nobis

bis reperiſſa ex aheneo conſcientiæ muro Echo omnia famæ cymbala facile obtundet. Alii fortes belloque invicti ſalutentur, & de hoſtibus triumphos agitent; nobis beati erunt paſſifici, quoniam filii Dei vocabuntur. Alii amore mutuo proſequantur amicos; nos etiam, inimicos amabimus. Alii bene de ſe meritos favoribus, muneribusque complectuntur; nos odiis capitalibus nobis infeſtos etiam beneficiis cumulabimus. Cum alii a criminibus & flagitiis ſibi temperant; nos a malis etiam cogitationibus abſtinebimus: Illæ enim cum primum delectant, ad actum ipſum abducunt: actus ad conſuetudinem, conſuetudo ad obſtinationem, obſtinatione ad deſperationem, deſperatio ad damnationem. Cum alii externæ virtutis ſpeciem & colores flagitiis ſuis obducunt, ac ipſum etiam proſperum & felix ſcelus virtutem vocant, nos ſpecie vitii virtutem, dedecoris gloriam, paupertatis divitias, divini εἰρῶνες occultabimus: *quaſi impoſtores & tamen veraces; quaſi morientes, & ecce vivimus; quaſi correpti & non occiſi: quaſi dolentes, ſemper tamen gaudentes: quaſi pauperes multos tamen ditantes: ut nihil habentes, & tamen omnia poſſidentes.* Aggrediantur alii urbes, caſtella expugnent, populos invadant, ac poſſeſſione exuant: nos inter pios illos raptores erimus, per quos regnum cœlorum vim patitur, quicque ad ſe illud Achilles πάνοπλοι Spiritusque armis inſtructi rapiunt, & bonæ ſimul & ſalvificæ fidei poſſeſſores. Quam bene

vivitur, ubi sic ex raptō vivitur! Erit illud olim in cœlis nobis *πολίτευμα*: Sed & intra nos Dei regnum est. Utrobique illa Civitas Dei struitur. Et legem habemus in cordibus nostris, ab illa quæ in membris nostris est, lege dissidentem. Sed & exleges sumus, *αυτοκράτορες*, quia *Θεοκρατέμυροι* & exemplo Pauli, *sapientes Architecti* opus *συναρμολυγέμυρον* in nobis perficimus. His in nobis gradibus beata illa *παραδοξοσοφία* excreseat: sed si de τῷ τρόπῳ τῆς *ζητήσεως* quæsieris, quem ratione & oratione constare scimus, Doctorem hic τῶν *λογικῶν* ipsum ΛΟΓΟΝ habemus, & ὄργανον τῶν *ὀργάνων* ipsum Spiritum. Qui ipsa via est, & ὁδός, in suam ipse μέθοδον inducet. Qui ipsa veritas est & lux, speculationes nostras diriget, & in ἀποδείξεις: suas se Dei digitus intendet; Qui ipsa Vita est, ad vitam pie prudenterque regendam, faces præferet. Non quærit sibi hæc Sapientia nostra Rationem syllogismis armatam, argutis pictam, triumphis cathedrariis exultantem & superbam; neque enim ita γιγαντιᾶν & ampullari novit; sed fidei vinculis captivam & mancipatam; fera enim Ratio est, quæ laxis habenis evagatur, & supremæ Mentis imperium excutit. Non illa verborum lenociniis pingi gestit, suo satis cultu, id est domestico & cœlesti ornata. Spernit humanos logos æternus ille λόγος, suumque in simplicitate & in stultitia prædicationis ὕψος habet reconditum, nullis humanæ eloquentiæ spoliis poliendum: nam

nam qui humilitate se vestivit, non nisi humili
 nosci sermonis charactere cupit, ac byssina illa
 verba regiumque orationis cultum fastidit.
 Vehementius igneæ divini Spiritus lingvæ,
 quam omnium Oratorum fulmina animos per-
 cellunt, causamque suam perorant. Verum
 abripit nos altius, & quasi rerum quodam Oce-
 ano hæc παραδοξοσοφία, Cives optimi, mer-
 git. Quis enim dignis verbis hujus Sapientiae
 capita comprehendat, quæ ut ante omnia secu-
 la fuit; ita in omnem æternitatem durabit; nec
 pari passu cum hujus Seculi sapientia, quæ stul-
 titia coram Deo est, ambulat. Hæc quasi sum-
 ma doctrinæ hujus est, quam hoc ipso die di-
 scipulis Christi sanctissimus Spiritus uno mo-
 mento infudit, cui tot sermonibus per totam
 vitam suam Salvator viam straverat: quam
 illi magni Magistri sui ὑποδιδάσκαλοι in scri-
 ptis nobis reliquerunt, quam per totum ter-
 rarum orbem disseminarunt: nam ignis ille
 flammula Spiritus in cordibus illorum succen-
 sus, longe lateque hoc incendium propagavit.
 Quis non cum ipso Salvatore, in hujus myste-
 riæ contemplatione defixus & religionis quo-
 dam æstro perculsus, divinoque gaudio exul-
 tans exclamet! *Glorifico Te Pater Domine Cæli &
 Terræ, quod abscondisti hæc à Sapientibus & prudenti-
 bus, & revelasti ea parvulis: etiam Pater, & iam sic
 complacitum est coram Te.* Arripiamus illam Sa-
 pientiam parvuli, pauperes Spiritu, imo pue-
 ri, nec cum Phrygibus sero sapiamus. De-

us ipse ludum hodie aperit, & quiddam supra encyclicas doctrinas excelsius, quod stulta multitudo non capit, suam scilicet Sapientiam proponit: Hujus quendam quasi schematismum vobis o Juvenes ob oculos posuimus; quid enim potius festo hoc die faceremus? hoc quasi professorii nostri muneris sacrum specimen exhibituri, ut ipse omnium Doctorum Princeps Spiritus olim exhibuit. Socratem è cœlis in terras revocasse Philosophiam accepistis: Sed heic ipsa venit è cœlis sapientia, ad quam non quinquennali sed perpetuo silentio Pythagoræ Schola obmutescat; qua loquente, in putem se suum Democritus abscondat, Epicurus in hortos suos concedat, Diogenes dolio se suo compingat. Tenebris meris ac nebulis humana involvitur Sapientia, vel si tenui quâdam luce tingitur, *antelucanum* in divinis literis vocatur, *ὀπδὲγν* diluculum, apud Ecclesiast. *Doctrina quasi antelucanum illuminatio omnibus.* Heic vero ipsa se meridies ipsa cognitionis plenitudo ostendit. Hæc illa Sapientia est, de qua Augustinus: *quod sit contemplatio veritatis pacificans totum hominem & suscipiens similitudinem Dei.* Hæc ut uno verbo omnia dicamus, ipse CHRISTUS JESUS est, in quo omnes Sapientiæ thesauri sunt reconditi, in cujus cognitione omnis Sapientiæ mysterium reponebat Paulus, qui de se agebat, & profitebatur se nihil sapere, nihil scire nisi Jesum Christum crucifixum, cujus in cruce nostra quoque cathedram erigat.

Sa-

Sapientia. Illi enim justius elogium inscribas, quam quod Pherecydes Syrus suo inscribi sepulchro curavit: *Ἡς σοφίας πάσης ἐν ἐμοὶ γέλῃ*. Hujus doctrina illa unctio est, de qua in epistola sua prima Johannes: *Unctio quam vos accepistis ab eo, manet in vobis: Et non necesse habetis, ut quisquam doceat vos de omnibus, Et verax est, Et non est mendacium, Et sicut docuit vos, manete in ea.* Manete in ea, o Juvenes, assiduisque ab illo precibus contendite, ut & in mentes vestras oleum hoc effundat, quo ignorantia sanentur, vulnera, & mentis oculis fit pro collyrio, ut sapientia lucernam igne suo Spiritus sanctus incendat. Omnes in partes divinum illud Chrisma sapientia prudentiaque odorem sparget, odorem erga alios, sibi saporem: nam & sapientiam non male Bernhardus *saporem boni* vocavit, ut quæ à sapiendo dicitur, & verè nominis sui originem tuetur, cum *gustat, quam savis sit Dominus*, qui adeo mentem nostram se ipso implet, ut & in corporis se sensus diffundat, neque sensibus etiam nostris deprehendi recuset: Prudentia quoque pia etiam ad τὰ ἑχάτα & extrema oleum hoc diffundit, nam & de civili Prudentia Lycéi doctor, quod τὰ ἑχάτα intueatur, singularia, minuta omnia, quæ ad bene beateque vivendum conducunt. Non intelligentes enim solum sed & circumspectos vult & in omnes partes versatiles illa disciplina. Viam ad illam parandam Jacobus ostendit: *Si quis indiget Sapientia; petat à Deo.* Plus

scilicet precibus, quam lucubrationibus, vigiliis, omnique corporis ac animi contentione discitur. Via hæc, si nescitis, divina est & Regia, quam suo exemplo Regiam fecit Rex ipse Salomon, qua ad illud divinæ humanæque Sapientiæ fastigium non gradibus pervenit, sed citatis quasi pennis evolavit. Rimamini venerabundo silentio hujus Sapientiæ arcana, ô Cives, cælestes potius *παρρηδοξόσοφοι*, quam hujus mundi *δοκησίσοφοι* & Sophistæ, illis similes qui *ἐμωγράνθησαν καὶ ἐμαλαιώθησαν ἐν τοῖς διαλογισμοῖς αὐτῶν*; Inter hos quicumque deprehendemini illud Pauli *1. Cor. 3, 18.* vobis monitum dictum putate, animisque vestris altius infigite: **NE QUIS SE IPSUM FALLAT, SI QUIS SIBI VIDETUR SAPIENS ESSE INTER VOS, IN SECULO HOC STULTUS FIAT, UT REDDATUR SAPIENS.** Circumvenimus enim nos ipsos, qui sapere nos putamus ac præstigiis quibusdam sensibus nostris imponimus, inque alios eandem histrioniam exercemus. Nam vel phantasiæ variis spectris excitatis nobis aliisque illudimus; vel perturbationum tyrannide pressi nos in potestate nostra non habemus, *legem illam in membris nostris legi mentis repugnantem* secuti; Centauris quodammodo similes, qui figuram bestię humanæ quasi formæ appendicem circumportamus. Sumus quasi gemini uno in corpore: nam exterior ille homo, quem animalem Paulus vocat *cum non percipiat illa quæ sunt*
Spi-

Spiritus sibi soli sapit, neque ab interiore sub
rationis se vocari jugum patitur. Hæ sunt illæ
Araſpis Medi duæ animæ, de quibus ille ad
Cyrum, ut apud Xenophontem in Cyropædia
legimus: *Duæ, Cyre, mihi sunt animæ, hanc phi-*
loſophiam didici modo apud illum improbum ſophi-
ſtam Amorem. Nam una ſi eſſet anima, non & bo-
na ſimul eſſet, & mala: neque res pariter honeſtas
& turpes amaret: neque ſimul eadem vellet & nol-
let facere. De eodem in ſe à ſe ipſo diſſidio Pau-
lus vehementer dolet: *Non quod volo facio bo-*
num, ſed quod non volo malum, hoc ago. Evenit,
propemodum Menti noſtræ, quod Rebecca
gravidæ oraculo prædictum eſt: *Duæ Gentes*
sunt in utero tuo & duo populi ex ventre dividuntur,
populusque populum ſuperabit & major ſerviet mino-
ri. Quæ illic populorum; hic ſenſuum, & af-
fectuum in nobis concertatio eſt, & cum rati-
onis ſuæ clade conjuncta, ut major minori ſer-
vire cogatur, excuſſoque rationis imperio ſen-
ſus per vim dominantur. **NE QUIS** ergo **SE**
IPSUM FALLAT, à ſe ipſo velut ab hoſte ſibi
caveat, & quicquid Sapientiæ & virtutis ſpe-
cie blanditur, ſtatim inſultuæ ſuſpicionem vo-
cet, quicquid etiam aliorum prave ſentienti-
um ſuffragiis ornetur. In aliam itaque par-
tem declinet & ad ſecuriorem Stultitiæ viam,
ſe recipiat, ſed quæ ad veræ atque æternæ phi-
loſophiæ metam ducit. Huic vos quoque viæ
inſiſtite, ut veram illam perfectiſſimamque
Sapientiam tandem animo comprehendatis.

Quam ut obtineatis, det vobis ὁ πατήρ τῷ φω-
 τῶν & qui hodie in linguis igneis apparuit spi-
 ritus πεφωτισμένος. ἵνα ὁφθαλμοὺς διανοίας, ne
 vos alii fallant, ipsique vos fallatis. Ita tan-
 dem, qui piarum hic virginumque Musarum
 signa secuti estis, Sapientibus illis Virginibus
 accensebimini: quarum lampadas igne suo ac-
 cendit Spiritus, ut cum illis obviam eatis Spon-
 so qui in thalamum suum, æternas beatarum
 mentium sedes deducet. Hæc erit illa Aca-
 demia, in quâ summis honoribus ornabuntur
 Candidati illi, qui hic æternam Philosophiam,
 quæ mundo stultitia visa est, sunt professi. Ne-
 que tum Magistros tantum & Doctores vos ipsa
 proclamabit SAPIENTIA, sed & in filios ado-
 ptabit, cum *Spiritus Dei una cum Spiritu vestro,*
quod sitis filii Dei testabitur. Venietis hic in illud
 regnum, ubi dissipatis ignorantiae tenebris,
qualis vel quanta videri Caliculis solet, se oculis am-
 plexibusque vestris fisset SAPIENTIA. Illam
 cum nudam videre nunc non liceat, (est enim
 ut de Justitia Aristoteles, ὅθ' ἐσπερεῖ, ὅθ'
 εἴωθε ὅτ' αὖ θαυμάσιος.) saltem per colorum no-
 strorum nebulas eminus speculemur. Præci-
 piamus, o Cives, divinam illam animo speci-
 em, & simulacris saltem amores nostros sole-
 mur, usque dum e vitæ hujus caligine evocati
 æternæ luci immergamur, & quod omnis Sa-
 pientiae complementum est, τρισμέγιστον De-
 um, inter sanctissimarum mentium perpetuas
 acclamations, non animo tantum, sed & ipsis
 his

his oculis, in omnem æternitatem intueamur.
Valete P. P. ipso Pentecostes Festo Ann. clb lbc
LXXXVI.

27.

FEsti nunc aguntur dies, Cives Academi-
ci, iique toto anno latissimi, quibus ut
fecunda naturæ virtus in corpora effun-
di solet: ita olim divinus Spiritus in ani-
mos atque vertices Apostolorum se effudit, cu-
jus hodie mysterii anniversariam memoriam
celebramus. Adestote omnes, omnemque
rei sanctissimæ historiam intentis animis ocu-
lisque acerrime contemplamini. Vestra enim
res hic agitur, qui discere ex hac Spiritus S.
Schola potestis, quam brevi & compendiarie
ad sapientiam omnem via ille ducat. Accessi-
stis huc, divinæ humanæque sapientiæ thesau-
ros petitori. Habetis promicondos, fidelissi-
mos Doctores, Diribitores custodesque vestros,
qui in usus vestros omnia promunt & erogant.
Illi in hanc Spiritus divini Scholam, in extem-
porales e sacro afflatu Doctores Apostolos, in-
spicere, tanquam in speculum jubent. Ille
supremus omnis sapientiæ dispensator, opti-
mus maximus artium Magister, ut semper
per totum terrarum orbem opes suas dissemi-
navit; ita nunc visibili specie universas in A-
postolos effudit, ut præcipue illa, quæ sunt,

Spiritus intelligerent. Quo cætera omnia quæ doceri discique possunt continentur. Nulla est, quæ non ex hoc fonte inexhausto promanet scientia; neque ulla ex toto disciplinarum orbe est, quæ non divinum illum characterem circumferat. Agnoscite hoc quod in disciplinis Θεῶν est, & vel ex eo discite, quam sine Deo nil sapiamus. Quod vobis festo hoc die ἀνεγὰμια pia meditatione amplius expendendum proponimus. Nemo paulum sagacior, est, cui illud non suboleat; qui non suspitione saltem & conjectura aliqua attingat. Scilicet, ut Vulpes in fabulis, scientias tractamus. Illa pulsem vitro inclusam, cum ligurire non posset, superficiem tamen lambit. Pellucet illud quod in scientiis divinum est: sed quoniam in superficie semper hæremus; quoniam inani illo ac vitreo opinionum splendore nos oblectamus, nunquam pectus saturamus, nunquam ad fundum rerum penetrare possumus. Nimis immerfi sumus nobis ipsis, & turbæ opinionum variarum. Quod si animum paululum in se revocaremus DEOque permitteremus, & simplicissimos naturæ intueremur progressus, expeditior esset ad veritatem via, & divinæ menti nostram arctius jungeremur. In ipso illo τὸ ἐπισήμης τρεῖς, in rerum apprehensione, quæ non divina sæpe animadvertimus vestigia! Sunt qui fulminea ingenii vi omnia perrumpant, quorum animus in specula positus, uno quasi intuitu omnia simul comprehendit.

dit. Quasi non sensuum ministerio, non Syllogismorum apparatu ad intelligendas res indigerent, sed geniorum instar omnia pervaderent quasi & absorberent. Ita quæ tardius assequuntur alii, longisque præceptionibus circumducti, illi quasi volatu uno transmittunt, omniaque præcipere ipsi videntur. Vidimus ad certas disciplinas quosdam quasi divinitus incitados, ea in his confecisse spatia, ut in prodigium illa res traheretur. Fuere ad varias artes liberales, mechanicas, statuariam, graphicam, poësin, mathesin, chirurgiam, quasi a natura facti: ut nullis usi doctoribus, ipsi alias simplices, plebeji, rustici, non raro etiam oculorum ac lingvæ usu destituti, ipsos in illis rebus artifices superarent. Quin & vaticinandi quibusdam instinctum adeo efficacem fuisse accepimus, ut mera oracula fundere viderentur. Quæ omnia potestatem humana majorem & τὸ Θεῖον in ipsa discendi methodo declarant. Testatur quidem alicubi Cornelius Agrippa: *esse artem quandam, sed paucissimis cognitam, ita informandi, exornandi & illustrandi fideliem & purum hominis animum, ut ex ignorantie tenebris repente ad sapientie & doctrinarum lumen evehatur: e contrario vero aliam facultatem immundos atque incredulos, reconditis quibusdam arcanis, eodem sapientie & doctrinarum dono rursus exuendi, & pristinae suae ignorantie restituendi.* Quam si ille alios artem docere potuisset, magnus ille nobis Apollo fuisset. Nos eam rectius ab ipso illo ar-

tium omnium Parente Panfopho, Sancto Spiritu, qui hodie super Apostolorum capita se effudit, veri, illo Duce, *ὁ κύμα θεῖς & θεοδίδακτοι*, didicerimus. Veniamus ad ipsas artes & scientias, & quid in illis *θεῖον* videri possit, rimemur. Confideamus primum in puerorum subfelliis, atque inter ipsos *ἀναλφαβήτας* nos teneamus, ibique literas syllabasque aucupemur. Magnum in his miraculum est. Quot habemus artes, disciplinas, volumina, ex paucis his elementis nata omnia videmus. Est præterea philosophia quædam Alphabetaria, quæ non pueros, sed magnos profecto doctores exerceat. Notas literarum singulis gentibus familiares videamus, scribendi rationem modumque perpendamus: & primas illis animi, indolis, ideas impressas deprehendemus. Ac optandum sane esset, omnium populorum nobis characteres fuisse servatos: ita vel ex eorum collatione mutua multa abstrusa investigaremus. Quemadmodum ex punctis, lineis, circulis omnis producitur quantitas, atque ipsa corporum habitudo in iis fundatur: ita ex his characteribus, eorum simplicitate, positu, ductu, animi quædam indoles, e convenientia, quædam quasi migrationes elucent. Prima mentis porta verbum & scriptura est, qua se in aurium oculorumque sensus ingerit. In ipsis literis divinum quid latere vel ep ex agnoscimus, quod accessione literæ *He* Abramo divina virtus inspirata videbatur. Quanta sunt
in

in nomine Tetragrammato myſteria! quæ integris libris non evolvunt Cabaliſtæ. Multa de ſacris nominibus Judæi nobis narrant, quibus mirificam illi potentiam tribuunt. Ipſe Dei Filius, æternus ille λόγος, Verbi nomine vocatur, de quo Reuchlinus mira e Caballiſticis libris nos docet. Quanta cabalæ illius literariæ myſteria ſint, ii norunt, qui ſacris illis ſunt initiati. Quibus magna volumina quidam impleverunt. Mentionem facit Jacobus Sponius in accuratiſſimo ſuo *Itinerario lib. 2. p. 53.* cujuſdam Ægyptii *Check-Bouni*, qui de *virtute Verbi divini & humani* mirabilem librum ſcripſerit, in quo per varias linearum vocumque figuras, perque literarum μετὰθεſιν multa curioſa deducat. Sunt qui e nominibus & literarum numeris ita vaticinantur, ut raro fallant. Notarunt nonnulli infauſtorum nominum impoſitione fortunam hominum labefactari, eorum immutatione quoque immutari. Quidam e tetricis nominibus, quos reos criminis ſuſpicati ſunt, tales quæſtione inſtituta deprehenderunt. Ne quid de iis dicamus, qui verbis morbos curant, Salutatores dicti. Quæ omnia cum ad ſuperſtitionem ſpectare videantur, procul ab his ſacris abeſſe jubemus. Mirabilis eſt ille lingvarum diverſarum concentus, per quas ſparſa primæ lingvæ veſtigia, ut Θεῶν aliquid, non vana hariolatione venari poſſumus. Vidimus ſpiritu aliquo agitados, ignotas ſibi lingvas loqui: quod quanquam Huartus ad
fin.

singulare temperamentum; alii ad morbum melancholicum, Pomponatius, ne quid potentia ultra naturam debere videatur, more suo, in libro de Incantat. ad siderum influxus refert: absurda tamen illa & παράδοξα sunt, cum impurus ille & κακόζηλος Spiritus in illis hominibus agat, quod in Apostolis Spiritus sanctus, qui omnibus lingvis τὰ μεγαλεῖα τοῦ Θεοῦ de-
 prædicabant. In illis aliquid δαιμόνιον, ut in his Θεῖον fuit. E *Grammaticorum* Ludo ad *Oratores* transeamus. Quis non in illis aliquid divini agnoscat? Neque enim artem hanc e Sophistarum palæstris natam existimemus. Majus quid in illa elucet, erectum, gloriosum, quod ipsos animos expugnet, præclarumque rebus divinis suppeditet instrumentum. Non sunt e Magistris hominibus æstimandæ artes: divinæ illæ sunt, æternæ atque ex eodem fonte derivatæ, unde hodie in Apostolorum animos effunduntur: etsi hæ omnibus numeris absolutæ. Præcepta quæ a Magistris successu seculorum congesta sunt, veritati & naturæ conformia hos natales loquuntur. Quare ad divinos usus adhibeamus, quæ divina sunt, & quæ veritatis quasi utero, obstetricias manus admoventes Magistri in lucem protulere. Verum illud eloquentiæ ὕψος in spiritu & impetu est. Agnovit hoc e gentilibus philosophis Seneca: qui in libro de tranquillitate cap. ult. *Non potest grande aliquid & supra ceteros loqui nisi motus mens. Cum vulgaria & solita contempsit, instinctu-
 que*

que sacro surrexit excelsior: tunc demum aliquid cecinit grandius ore mortali. Non potest sublime quicquam & in arduo positum contingere, quam diu apud se est. Desciscat oportet a solito, & efferatur, & mordeat frenos & rectorem rapiat suum, eoque ferat, quo per se timuisset ascendere. Hoc est illud in Oratione quod Aristides vocat τὸ πῦρ: λόγων αὐτῇ πηγὴ μία, τὸ ὡς ἀληθῶς ἱερὸν καὶ θεῖον πῦρ, τὸ ἐκ Διὸς ἔσιν Hippocrates, cui Deus ipse τὸ θερμὸν ἀθάνατον, illud quod in homine ἡγεμονικόν est, vocat τὸ θερμότατον καὶ ἰχυρότατον πῦρ. Cicero sic latine exprimit: *Nulla me ingenii sed magna vis animi inflamat, ut me ipse non teneam.* Istud in Joanne θερμόν, istud θεῖον πῦρ antiqui Theologi observarunt: quibus ille υἱὸς ἐργνηνῆς, βεργνόφωνος & βεργνόπαις, ob incomparabilem & sublimem eloquentiam, dictus fuit. Ex hoc impetu visi sunt Oratores, citra ullam meditationem, ad dicendum profilire, in extremis periculis, in Reipublicæ necessitatibus. Vidimus Oratores sacros divino quasi spiritu ductos, extemporali eloquentia, plus præstitisse, quam elaboratis orationibus alios. Talem nobis Franciscanum illum Erasmus lib. 14. Epist. 15. depingit, cujus memorabile exemplum ab omnibus legi meretur. *Poëtas*, qui non humane, sive Deorum lingua loqui dixit, aliquid homine majus in illis agnovit: scilicet τὸ θεῖον, quod adeo in his studiis dominatur, ut sine ἐνθουσιασμοῖ illa jaceant, frigeantque. Quare & Vates dicuntur, seque

ipſos ἐνθουſιαζομένους profitentur. Quis non de furore Poetarum tam apud Poetas ipſos, quam alios legit? ſed illum divinum nomina- bat Plato, ſuntque qui peculiaribus ea de re, libris agunt. Divinus ille maxime furor, cum in hymnos divinos fertur. Plato in Dialogo, qui inſcribitur Ἴων ſive περὶ Ἰλιάδου Poefin, omnem ab inspiratione contendit. ὁ θεὸς in- quit, αὐτὸς ἐστὶν ὁ λέγων, διὰ τῶν δὲ θεύεται πρὸς ἡμᾶς. *Deus ipſe eſt, qui per illos loquitur, & nos inclamat.* Et ibidem: ἐν τῷ γὰρ δὲ μά- λις ἀνδοκῇ ὁ θεὸς ἐνδείξασθαι ἡμῖν ἵνα μὴ διαλέσωμεν, ὅτι οὐκ ἀνθρώπων ἐστὶ. *In hoc maxime Deus oſten- diſſe videtur, nobis diſputandum non eſſe, quin divina potius quam humana ſint hæc poëmata.* Hoc, in- quit, Deus eo indicare voluit, cum de indu- ſtria per ineptiſſimum poetam pulcherrimam cecinit melodiam. Quare non inepte hic Pla- to annulorum magnetis contactu cohærenti- um exemplo, hunc a divino ſpiritu per alios poetas propagatum afflatum nobis ob oculos poſuit. Memorabile in homine ruſtico Italo exemplum ætas noſtra tulit, qui nullis præ- ceptis imbutus, cum legeret Torquati Taſſi car- mina, quaſi ſpiritu quodam afflatus elegantis- ſima ſine mora fudit carmina, quæ vel ipſos ar- tifices in pudorem conjicerent. *Joannes Domi- nicus Perus* ille vocabatur, qui nullis promiſſis, ut ut ampliffimis, a Principibus permoveri po- tuit, ut ruſticis ſordibus relictis, in aulas & ur- bes concederet: beneficiis tamen plurimis af-
fe-

fectus a multis fuit. Vidit Patavina cathedra, ante non multos annos Fr. Macedum, Virum omnibus doctrinis & scientiis consummatum, ex tempore de argumentis propositis latina recitantem Carmina, eaque elegantissima, atque omni apparatu poetico instructa: quæ cultissimi alii poetæ longa meditatione vix extunderent. Poesi affinis est *Musica*, quæ sonos moderatur, affectus incutit, incusos mulcet, animosque quo vult rapit. Est sane in sonis aliquid *θεῖον*, ut ad illorum contemperationem, mirabilem sane & mysteriis plenam, totius universi mensuram veteres Philosophi inierint. Quos ubi numeris suis poeta scite & recte illigaverit, pene ad Orphica miracula patrandam aptum dixeris. *Philosophia* quæ in contemplatione rerum consistit, eo ipso nomine divini quid inferre videtur: quid enim est *θεωρεῖν*, nisi a sensibilibus animum ad *τὰ ἀόρατα* abducere? Hic principem locum naturalis philosophia tenet. In qua omnia a sublimiore principio arcessenda sunt, quam vulgo fit. Pecora sunt & fungi, qui in naturæ operibus ubique præsentem DEI manum non sentiunt. Stupida est atque iners natura, si ab illo discesserit. Nullo vinculo illa continetur, nisi ille nodos trinxerit. Quod cum agnoscerent gentium philosophi & Poetæ, qui *Jovis omnia plena* ageant: quis credat nunc reperiri homines, qui rectore destitutam, sibi ipsi hanc machinam permittant? Plus est miraculorum in natura, quam

quam vulgo credimus. Quo oculos vertimus, quo pedem movemus, in illa incurrimus. Vel in minimo insecto divinam manum deprehendimus. Omnis illa corporum membrorumque compositio, illa universi, omniumque animalium admirabilis fabrica intelligentiam & mentem operatricem arguit. Providentia ex omnibus elucet. Vel Talpam videas: omnia in illa ad suos usus comparata, oculi, aures, ungues, membra omnia. Quodcum perenderet Cardanus, mire alioquin misereque in illis *quæ Spiritus sunt* fluctuans, ac Talpa ipsa interdum cæcior: hic tamen vel a Talpa, oculos visumque recipit, cum in hunc quasi *ἐνθ' ὁρᾷ αὖτις* prorumpit: *Palam est igitur, naturam in cunctis sollicitam mirum in modum fuisse, nec obiter, sed ex sententia omnia prævidisse, hominesque quibus hoc beneficium Deus largitus est, ut causam rerum primam inveniant, particeps esse illius primæ nature: neque alterius esse generis naturam, quæ hæc constituit, ab illorum mente, qui causam eorum, cur ita facta sint plene assequi potuerunt.* Felices igitur merito vocat Virgilius, qui rerum cognoscere causas potuerunt. Sed quot illorum sunt qui cognoscunt! In nebulis toti versamur. Cum Athenienses verum Dei cultum ignorarent, τῷ ἀγνώστῳ θεῷ aram posuere. Nil temere nos dicemus, si omnia ignorare nos dicamus. Expedire in ipsis principiis nihil possumus, nisi ad ἀγνώστον aliquod, & incognitum refugiamus. Rident Lyncei nostri eos, qui ad

Quali-

Qualitates occultas confugiunt. O boni, nescitis quam vos in ipsis demonstratiunculis vestris nihil sciatis! At vero, dicitis, in ipsis minutis naturam recognoscimus, in particulas oblongas, ramosas, globosas resolvimus: nihil oculos nostros perspiciliis armatos effugiet. Sed nihilo tamen sapientiores per vos facti sumus. Quamdiu rerum mystiones ignoramus, nihil omnino novimus. Propiora illa potius prensanda sunt, quam remotiora. In illis habitat natura, moratur, palpatur: in his dispersa est, & a sensibus recedit. Si culta aliqua & elaborata cui offeratur oratio, isque in illa artificium indagaturus sit: quis propius scopum feriret? illene, qui literas & syllabas numeraret; an vero qui in partes suas, quibus proxime componitur, in enthymemata, in schemata dissolveret. Nullum est in rerum natura *Φαινόμενον*, quod expedire feliciter possumus. Vertamus in omnes partes, secemus in particulas, plusquam *κυμνωπείσαι*, hærebimus semper, & tandem in incognito aliquo nobis subsistendum erit. Quod cum videret Henricus Morus, Philosophus Anglicus, Principium liquod Hylarchicum commentus est; alii alia *ἐκ φύγεται* quæsierunt. Ac fane *θεῖον* hic aliquid subest verum illud *ἡγεμονικόν*, quod intelligit, movet, dirigit, jungit, format corpora: quo ignorato, omnia nobis ignorari necesse est. Videamus admirabilem illam rerum *γένεσιν*. Omnia mysteriis plena sunt. Ipsa illa rerum

femina divina manu in puncto aliquo & centro obfignata videntur, unde quasi ex nihili utero procedunt corpora. Nam quod in femine, *ἐνεργητικόν* est; non nisi intelligentia comprehenditur: cætera quæ oculis videmus, manibusque palpamus, parum ad corporis compositionem conferunt. In Vegetabilibus, ubi e punctulo frutex germinare incipit, cætera concidunt atque ut rejectanea separantur. Quæ in formanda porro corporis machina est naturæ solertia! qui progressus! Quos ubi attenta mente respexerimus, attoniti manus sæpe tollemus & mirabilem in operibus suis Deum deprædicabimus. Nihil nunc de iis dicemus, qui corporum *μεταμορφώσεις*, qui infinitas propemodum multiplicationes instituunt: quod in metallis a naturæ mystis factum est; nihil de corporum magnetismis & sympathicis affectionibus, quæ innumeræ in natura sunt, unde omnis illa magia oritur. Sed arcanior illa scientia in omnibus pene gentibus, a sapientioribus quibusdam custodita est, ne in vulgus efferretur. Huc omnis illa Mythologia omnia Ægyptiorum Hieroglyphica tendunt. His enim involucris divini illi thesauri teguntur. In *Mathematicis* porro scientiis, quid non divini est! Hic Numerorum doctrina primam se offert, tota merito divina vocanda. Quantæ, quam arcana numerorum potestates sint, ne in hunc quidem diem satis cognitum est. Quod cum bene nosset Pythagoras, non invenit commodiorem

rationem, qua Philosophiæ suæ secreta celaret,
 & intelligentibus tamen omnia panderet;
 quam si numeris suis, quos formales recte di-
 xeris, absconderet. Cum enim Numeri no-
 minantur, non intelliguntur nisi naturæ occul-
 tæ proportionēs, progressus, operationes, re-
 volutiones a DEO ipso definitæ. Quomodo
 non difficile admodum est omnia divinæ hu-
 manæque sapientiæ mysteria illis adumbrare.
 Non credat quis temere fieri: sonos septena-
 rio, numeros novenario absolvi: atque hinc
 per easdem ἀνακυκλώσεις in centenariis & mil-
 lenariis reduci. Illic abstrusarum rerum typi
 latent, atque iis quasi præfigurantur. In qui-
 bus, velut in tenebris palpitant, qui tamen
 quasi per nebulas vident, Autores, quorum
 le numerorum mysteriis integra extant volu-
 mina. Ἰσορθέμενα tantum illa sunt, non Φι-
 λοσοφόμενα. Radix & quasi Pater omnium
 numerorum Monas est. Prima ex illa surgit
 dyas, quæ per Triada quasi in consonantiam
 unitatem reducit. Hinc illa Τετράκτυς,
 per quam, ut rem sacram, non sine causa jura-
 nt Pythagoræi. Quinariis iisdem τετράδος,
 ἡ γὰρ αὖτις dicitur, quod ex binario & terna-
 rio, quasi ex femina & mare conflatus sit. Di-
 cimus aliis dicitur. Hinc illa πέμπτη φύσις A-
 toteli, imo & Platoni & Platonice celebrata.
 ἡ πέμπτη στοιχεῖον, πέμπτη κόσμος, χῆμα
 πέμπτη, ἄριστον στοιχεῖον appellant. Septena-
 rio omnium μυστικώτατον esse nemo nescit.

Mirabile est, quod de ejus virtute Fluddius in libro de *Microcosmi historia* tr. 1. sect. 1. lib. 1. consignavit: Ego, inquit, hominem doctissimum novi, qui, virtute hujus numeri Septenarii, cujusdam quasi oraculi adfidentia, quaestiones dubias atque ancipites resolvere non dubitavit, atque etiam de occultis tam presentibus quam futuris quodammodo divinare pollicitus est. De Geometria idem nobis dicendum est; nam & numerorum rationes lineæ & corpora sequuntur. Quare & Plato Deo dignum opus habuit, quem ille agebat perpetuo γεωμετρῆν. Circuli & trianguli arcana ne nunc quidem omnia exhausta. Quas non cruces mathematicis illa Circuli quadratura figit! Et tamen illam rerum hæc universitas quotidie nobis ob oculos ponit. Nimirum ut Deus summus omnium rerum Architectus est, qui numero pondere & mensura omnia fecit: ita illud δεχίτεκτονικὸν rebus inseruit, quod iisdem progressibus, eadem motus successione, semper operatur. Hoc perpetuum illud movens, perpetuumque mobile est. In quo inveniendo quam sudant mathematici! Optica quæ radium metitur, in ipsa quidem luce tota occupatur. Sed quamquam illa oculis omnium patet, quamquam ejus beneficio omnia apprehendimus: ejus tamen naturam, nemo tam oculatus est, qui vere indaget. Annon miraculo propius, & propemodum divinum est, per unum punctum omnium rerum ideas, cum coloribus ipsis transmitti. Nihil de speculis & telescopi-

piis dicemus, quæ omnia etiam remotissima exhibeant: sunt enim qui dari illa posse existimant: nihil de iis Baptistæ Portæ speculis, quæ recta linea in infinitum urant. Nam etsi impugnant illa multi, rationibus quidem non contemnendis: tamen ut sunt in omnibus prope modum disciplinis quædam *θauμασά*, quæ non capiunt omnes, neque scire interest: ita & hic fortassis aliqua sibi summus ille Magister reservavit. Habet Deus quædam, ut ita dicamus, reservata, ad quæ non admittuntur, nisi pauci illi, quos *ardens evexit ad æthera virtus*. Sunt in illis præcipua: Futurorum prænotio, sive illa a siderum configurationibus; sive aliunde deducatur: summi arcani physici cognitio, ac temporum accuratæ rationes, quas ille antiquus dierum, ac Pater temporum, arcano consilio, hominibus voluit esse absconditas. Etsi fuerunt nonnunquam, qui *παράκλυσαι* in illa, illo connivente, arcana conati sunt. Versamur in magna illa DEI familia, infantes alii & pueri; alii maturiore in ætate constituti: ubi illis nonnulla scire inutile non solum, sed & periculosum est; hi vero in domestici regiminis societatem nonnunquam admittuntur, ita tamen, ut occultæ rerum dispensationes ad solum Patrem familias spectent. Ille e singulis scientiis aliquod *δαίδαλμα*, *τέχνημα*, magisterium sibi seposuit, quo beat interdum filios; cum cætera illa etiam *τοῖς ἕξω* concedat. Qui *Medicam* artem profitentur, quotidie illud si-

bi Θεῶν propositum habent. Sive enim corporis structuram oculis rimantur; nihil in illa est, quod non opificis sapientiam loquatur: si-
 ve cum morbis illis res est; tot sunt illorum, formæ, & figuræ, tot in illorum causis recessus, ut sæpe illis in τῷ θεῷ subsistendum. Quod & Hippocrates vidit, & integro libro *Jordanus* exposuit. Testantur hoc prodigiosæ, quas aliqui congesserunt Historiæ, & super quibus *Mericus Casaubonus* in libro Anglica lingua scripto, de credulitate & incredulitate in rebus naturalibus, moralibus & civilibus multa, ipse tamen, ὀλιγόπῳ & disquirat. Est in ipsis remediis Θεῶν aliquid, quibus, utut efficacissimis, sæpe manum injiciunt fata. Quædam ab imperita & plebeja manu exhibita ultra fidem operantur. Vilia sæpe & contempta gravissimos & letales morbos avertent. Est ubi cæli siderumq; influxus vires medicamenti auget, suspendit, tollit. In medico quoque ipso τὸ θεῶν singularis quædam felicitas adjuncta testatur. Est in mediocriter doctis illa in indagandis morbis remediisque applicandis εὐστοχία, quæ doctissimos interdum destituit. Sunt qui medica-
 vi pollent in morbis per tactum curandis. Quod cum Regibus Galliæ & Angliæ hereditarium credatur munus, fuit tamen in Anglia *Valentinus Greatreak*, qui idem felici successu fecit, ut sunt de ea re multorum fide dignorum hominum perscripta testimonia. Ne quid de Viris dicamus, qui precibus a Deo salutem ægro-
 to-

torum impetrarunt. Procedimus ad *moralem* & *Civilem* doctrinam. Quæ quanquam in negotiis, ab arbitrio hominum pendentibus, consistere videntur, inque eorum principiis nunc adeo fluctuant nonnulli, ut pleraque *ἐπιπείσθη* illis sint, quæ sancta omnibus esse debebant: sunt tamen in illis æterna, divina, inconcussa, ad quæ hominum actiones ordinandæ sunt, vel si illæ evagantur, in ordinem rediguntur, aut eo diriguntur, potentiore manu, quo divina tendit providentia. Quoniam vero non nisi agendo virtutes nobis paramus, in ipsa illa actione *τὸ θεῖον* se maxime ostendit. Virtus quæ Heroica dicitur, divino impulsu excitatur; ac fato sæpe fieri solet, ut ad res magnas gerendas, ad regna firmanda, ad imperia amplificanda, hostes subigendos divinitus animentur, homines, incredibilia viribusque humanis majora tentantes. Hinc illæ apud Historicos, cum memorabilia facta describunt, voces: *Deo quodam assidue incitante: quodam quasi instinctu Deorum concitatus fecit: ἔκ αὖ τοῦ θεοῦ, non sine Deo.* Ipsas in nobis inclinationes, quas sentimus bono aliquo genio nobis incussas credere possumus. Quare nec obniti illis debemus, sed illorum ductum sequi. Has in Socrate occultas propensiones, quas ille in rerum agendarum consilium adhibuit, genium illum, de quo multa Plato aliique nobis narrant, fuisse, Cartesius *part. 1. ep. 15.* existimat. Quæ non male dicerentur, nisi ipsa apud Platonem Socratis verba,

quibus vocem emisſiſſe Dæmonium ſignificat, aliud teſtentur. Quod & Strozzius Cigogna, vel potius Thomas Garzonius (is enim verus autor eſt) in *Magiæ Theatro part. 1. l. 2. c. 2.* adverſus illos affert, qui dæmonium Socratis de mente ejus interpretantur. In Rebus publicis illæ politicis celebratæ ἀνακυκλώσεις, ab uno ad unum redeunt, pulcherrima hujus univerſi & naturæ imagine. Quod in Rep. Romana eleganter demonſtravit Machiavellus. Eas mutationum cauſas rationibus Muſicis & Mathematicis Plato *lib. 8. de LL.* deducit. Quicquid in civilibus negotiis etiam moliantur δωδεκάμηχανοι, & verſuti homines; intercedit eorum conſiliis, ubi minime exiſtumes, Deus, & ad ſuum arbitrium omnia componit. Non eſt, quod hic ancilia, ampullas, ſecures, palladia cœlitus lapſa, vaſa Chinenſium ænea, Reip. mutationes tinnitu, nullo externo motu incuſſo, prodentia, in divinitatis probandæ ſubſidium vocemus. De Geniis tutelaribus, præſagiis, prodigiis, oſtentis non omnia vana ſunt Hiſtoricorum documenta, quibus divini aliquid ſubefſe res ipſa loquitur. In auspicio Regio quæ non myſteria quæſivit Boclerus! De annulo ex auro, quod Chriſto Magi obtulerunt, fabrefacto, qui inter antiqua domus Auſtriacæ cimelia fuit, Lambecius *Comm. de Bibl. Vindobonenſi Tom. 1. part 1. lib. 1. p. 25.* prodidit: quod tempore belli inſolito fulgore victoriam portendere viſus fit. Qua de re ſententiam cuiq;

liberam esse volumus. Miracula Principum, qui desperato corporis vitio laborantes sanitati restituerunt, an vera, an ficta narrant Historici. Quibus etsi fraudes nonnunquam immixtæ; tamen vel affectata illa a Principibus divina ἀξιώματα illius θεῶν opinionem abesse, a Republica non debere declarant. Legimus rem Romanam in præcipitio stantem fatorum manu ab interitu sæpe revocatam; quoniam orbis imperium Romæ destinabatur. Cui Romulus vel arcano consilio, vel magica arte, ut quibusdam creditur, prælusit: cum in meditullio urbis fossam, cui mundi nomen, faciendam curaret, inque eam a peregrinis particulam terræ patriæ injiciendam imperaret. Quoties ab extremo periculo Reges divino quasi monitu revocati! victoriæ tempestatum & procellarum subsidio obtentæ! Genii ipsi in hostes pugnare visi sunt! Quibus in rebus qui nullas Fato partes tribuit, næ is ad omnes rerum sensus obsurduit, aut omnem bonam mentem ejuravit. Infinita cumulare ex omnium temporum gentiumque annalibus poteramus, si nunc rem illam ageremus. Utinam Vir rerum Civilium peritissimus, Böclerus, qui *Theatrum Fati* scribere voluit, librum illum absolvisset, magnam huic argumento facem accensam videremus In causis judicandis singularis Principum nonnullorum εὐσوخία, quæ vel sapientissimorum Jctorum peritiam antevertit, θεῶν juridicum nobis ob oculos ponit. Ne quid de

divinis in omni gente etiam barbara judiciis hic dicamus, quibus explorari reorum, deficientibus testimoniis, vel innocentia, vel culpa consuevit. In terrarum ac regionum cognitione, quod *Γεῖον* geographicum vocabimus, illud deprehendimus: certis temporum periodis, ac fatali quadam lege earum notitiam, mortalibus recludi, atque iterum insuperabiles navigantibus obices poni, ut vel improbo labore frustra quærant. Antequam Hispani in Americam Peruvianam venirent, audita è fodinis ad barbaros operarios vox fuit, quæ intactos pro peregrino populo thesauros relinquere iussit. Visæ è longinquo terræ quædam repellentibus semper ventis, adiri non possunt. Quædam etiam, si fides itinerariis habenda est, detectæ, oculos hominum fugere videntur. Illius in rebus civilibus *Θεῖς* statua Mercurialis est, & filum quasi Ariadnæum præbet *Historia*. Pulchre S. Augustinus lib. de vera religione c. 25. *Quoniam divina Providentia non solum singulis hominibus quasi privatim, sed universo generi humano tanquam publice, consulit: quid cum singulis agatur. Deus scit, atque ipsi, cum quibus agitur, sciunt; quid autem agatur in genere humano, per Historiam commendari voluit & Prophetiam.* Verum, de quo non sine causa Conringius: lib. de Civ. prudent. c. 14. queritur: perquam pauci historici illam diviniorem causam iusta commemoratione prosequi solent: quidam de industria hoc videntur agere, ut excutiant lectorum animis τὸ *Θεῖς* curam: quod

tamen Machiavellus minime omnium ceteroquin religiosus, advertere potuerit. Sed nos tandem manum de hac tabula, ad illum Dei digitum, qui hodie flammeis characteribus sapientiam suam Apostolorum animis inscribit, intendimus. Inde vos ardentissimis precibus Θεῶν illud; sine quo ἐντελέχεια sua deest scientiis, arcessite. Sedibus æthereis Spiritus ille venit, qui vos ducet in omnem veritatem & per orbium cœlestium, ἐγκυκλοπαιδείαν aliquando circumducet. Ille vos Philosophos faciet, sapientiam quæ hominibus Stultitia est, professos: Mathematicos, qui longitudinem, latitudinem, altitudinem amoris divini metiantur: Politicos, qui πολιτεύμα suum in cœlis quærant: Grammaticos & Oratores, qui aliquando ῥήματα ἀρρήτα intelligant: Poetas & Musicos, qui ἱερσαγίον suum, cum omnibus beatarum mentium choris insonare nunquam desistant. Valete P.P. ipso Spir. S. festo. Anno clb lbc LXXXVII.

ET si in toto anni Ecclesiastici curriculo, quo Θεανθρώπων nostri vita & mirabilia, opera piis mentibus in memoriam revocari solent, multa occurrunt, in quibus mens nostra defigi debet; præcipuum tamen & velut omnium divinorum operum complementum est, quo Spiritus Sanctus sub igne-

ignearum lingvarum specie in Apostolorum capita & pectora effunditur. Ille scilicet Verbi *ἐνσπρωθέν* & in cœlum evecti scopus fuit, ut lingvis igneis spiritus sui vim declararet, & nos tandem mortis ejus fructus sentiremus. Venerat Salvator in orbem, ut salutem perditam reduceret illi, qui *ἐν τῷ πονηρῷ κῆται*, ac a veteratore spiritu totus obsidetur. Quæ ejus salus cum in eo consisteret, ut veteri expulso novum acciperet spiritum, Apostolorum mentibus, quos salem terræ appellabat ipse Salvator, eum immisit, qui veterem ex Adamo hominem destrueret, novum in illis cor generaret, & cœlesti quasi fermento impleret, ut & nos eorum ministerio, eodem aliquando chrismate inungeremur. Ille ignis est, quem orbi se immissurum prædicebat Christus, ut piæ mentes divino ardore totæ incenderentur. Advertite animum, o Cives, ad mirabilis historiæ expressiora & illustriora momenta, atque ea, diligenti piaque meditatione expendite. Difugerant antea Discipuli, metu ob acerbissimum Magistri sui supplicium turbati, ac ægre in viam reducti. Nunc illis *ὁμοθυμαδὸν* congregatis & quasi comitia celebrantibus divinus ille spiritus illabitur. Qui se ipsos timore disjunxerant, eodem, postquam nova illi spes accesserat, in multitudinem, sed unam unoque, fidei vinculo conjunctam compelluntur. Postquam enim singuli multi esse desierant, omni scilicet affectuum turba ejecta, facile erat multis,

tis, in unitatem reduci, quorum sensus jam, conspirabant. Quare animis eorum præparatis supervenit ille *spiritus intelligentiæ, sanctus, unicus multiplex*, qui in Sapientiæ libro describitur. Neque enim secum hæc pugnant, unum esse & multiplicem. Unicus est spiritus. Multiplex in operibus, & ex illa multiplicitate unitas, ut ipse divino spiritu doctus Apostolus nos docet. Idem qui timorem in nobis excitat, quem *spiritum timoris* Esaias vocat, spem in nobis producit, quæ per timorem quasi intuitu collocatur, ut timor per spem, uno tamen utrinque spiritu operante, refocillatur. Idem per multitudinem & diversitatem munerum, in singulis unitatem, cum omnibus harmoniam suavissimumque concentum molitur. Id Apostolis accidit, in quos varia sua charismata effudit Spiritus Sanctus, ut vitam sanctam, agerent, miracula ederent, dæmonia ejicerent, variis lingvis loquerentur, ægrotos solo manus tactu sanitati restituerent, eaque omnia, unitate fidei, charitatis & orationis exequerentur. Poterant illi vel in silentio & secessu vivere, sua pietate in Deum conversi; sed novo opus erat spiritu, qui illos in pugnas armaret. Missurus erat illos Salvator, *sicut oves in medio luporum*: & sufficebat illis sibi relictis ovium simplicitas: Verum, quoniam cum lupis illis depugnandum erat, etiam serpentum prudentiam in illis requirebat. His sibi ducibus novum regnum erecturus erat: hos il-

ille sacræ militiæ imperatores in animis expugnandis designaverat. Qui cum scientia, virtute, felicitate, autoritate eminere debeant; divino spiritu imbui debebant, ut omnium gentium lingvis loquerentur. Quos enim animos verbis & prædicatione sibi subjicerent, qui ipsi nec lingvas scirent, neque satis prompti lingua essent? Idem sapientiæ & virtutum omnium apparatu instruxit: Ille felicitatem adspiravit, ac autoritatis suæ robore debiles animos firmavit. Nempe gradibus divinus ille spiritus procedit: neque enim omnes statim in primis, aliqui etiam in secundis tertiisque subsistunt. Sunt quos paulatim extollit; aliis panem quotidianum & primitias suas præbet; alios tota sui plenitudine saturat, ut de thesauris suis etiam aliis largiantur. Quid jam porro factum sit attendite! Repente de cælo sonus factus est. Præcesserunt tot Prophetarum voces, antequam à cælo sonus audirentur: neque animos præpararunt ad spiritum cœlestem recipiendum. Nunc sonus è cælo auditur, non è cavernis terræ, ex antro aliquo Sibyllino, aut Phœbi cortina. E terra enim ascendebat Spiritus, qui fundebat oracula, non sine fragore & mugitu, natales suos ultrò professus. Verus è cælo alio sonitu descendit Spiritus, qui Apostolorum animos implet. Valeant terreni illi strepitus, quos hie dimus, quibus aures & pectora distendimus *curvæ in terras animæ & cœlestium inanes*. In visibilibus & palpabilibus hæremus: ea quæ ante

te

te oculos & pedes sunt tantum curamus, vix-
que illud. ne cœlum ruat, metuimus. At
hic ruit cœlum, sonitu de cœlo audito, ut spes
hominum impleat, & ipse divinus Spiritus A-
postolorum mentibus illabitur, atque ita il-
labitur, ut omnium se oculis spectandum ali-
quo simulacro exhibeat. Lucem hic videmus
& ignem sub lingvæ forma. Luce opus erat,
ut *obscuratum habentes intellectum* illustraren-
tur, & perfectum illud ac immutabile sa-
pientiæ lumen obtinerent. Nimirum tene-
bræ sunt & nebulae hominum lumina. *Stul-*
tus sicut luna mutatur, inquit Ecclesiasticus.
Varium enim non constans ignorantia no-
stra lumen habet, lunari illi simile. Lucet,
Luna, sed non ardet: umbram facit, non calo-
rem inducit: resplendet quidem, sed cum fri-
gore. Abest ille ardor voluntatis, ille fervor
charitatis. In debili dubiaque, sed multis te-
nebris mista, luce torpor & frigus merum est.
Vix enim illud Simonis apud Ecclesiasticum e-
logium assequimur: *Quasi Luna plena in diebus*
suis lucet. Si qua enim luminis nostri perfectio
est, ad lunam plenam accedet, quod omne a
sole transfusum est, ab illo scilicet, *in cujus*
lumine videmus lumen. Ut enim sine solis radiis
solem non videt oculus: ita sine illo lumine,
non videt lumen intellectus. Sed & hic opaci
sui luminis præstigias immiscet sæpe Lucifer,
ut fatuos hos ignes secuti in præcipitia sæpe ab-
strahantur. Ubi veritatis aliquod lumen men-
ti tuæ illuxerit, nebulam statim Dæmon suffun-
det.

det, & falsi luminis speciem obtendet. Opus charitatis in miseros exercebis? Ille tuæ gloriæ splendorem immiscebit. Mysteriorum divinorum contemplationi lumen tuum impendes? Non aberunt meditati Satanae tela ignea. Quare id agendum nobis est, ut in solo divino lumine videamus lumen; solo illo in nobis operante, lumen sequamur. Ita non mentes tantum luce divina illustratas, & eodem igne agitas habebimus: sed & ipsæ lingvæ nobis erunt igneæ. Ignæ illæ erant in Apostolis, cœlitus inflammatae, non affectuum humanorum facibus incensæ. Frigidæ lingvæ sunt, quæ in persuasibilibus humanæ sapientiæ verbis se efferunt, sine ardore spiritus & amoris, sine luce veritatis. Illæ vere igneæ sunt, quæ e corde inflammato verba sua proferunt, animisque aliorum eundem ignem immittunt, nec simulatis motibus aguntur. Ex hoc præcipue externo receptionis suæ charactere nosci voluit Spiritus, ut in lingua & verbis se exerceat. Lingva scilicet ὄργανον ὀργάνων est in Spirit. Sancti officina: Cor enim Deo plenum non alio canali quam lingua & sermonis effluit. Instrumentum hoc DEO reddendum est, quod affectuum nostrorum instrumentum erat, ut, pro maledictis, injuriis, invidiæ & contentionis vocibus, verba charitatis & veritatis, hymni, τὰ μεγαλῆα τῶ θεῷ celebrantium audiantur. Quos cum in Apostolis audirent multi, inter illos præcipue οἱ ἕξω in stuporem rapti fuerunt,

Ju-

Judæis tantum miraculum vel non attendentibus vel explodentibus. Hic vero videte malitiæ genium, cui nihil sacri est, quæ adversus solem Deumque ipsum loquitur, ac in re manifesta cum ratione insanire gestit. Nihil agitur miraculis, ubi cor vero rerum cœlestium desiderio non animatur. Vix inventi sunt, qui cum cura & sollicitudine rem gestam perscrutarentur, præter paucos e variis gentibus hospites & peregrinos. Multi incertas ratiunculas per calumniam comminiscuntur, ut ingenio maligno & incredulo satisfaciant: Adeo scilicet perditæ pravæ illi opiniones, quibus immergi sunt, amant, ut omnes adversus veritatem sensus obdurent, omnem aditum illi occludant. Primum divini Spiritus in nobis opus est Veritatis amor. Eam inquirendo amamus, non quærendo contemnimus. Non aliter accipere mundus hospitem Deum solet. Cum primum humanam naturam indueret, Salvator, stella tuguriolo imminens natum inter homines Deum significat. Non observant tantum in Patria hospitem Judæi: Deprehendunt è longinquo Magi, & ad tantæ rei famam *Herodes Rex turbatus est & omnis Hierosolyma cum illo*: ut & è vita sublatum vellent. Perdiderunt Christum Judæi, cum tenerent; Invenerunt Gentiles, cum civibus suis ignoratū quærerent. Cum hæc perpendit S. Maximus in Homil. de Epiph. Dom. merito in hæc Verba prorumpit: *Ecce Christum qui non habent, habere volunt, & in-*

venire contendunt. *Judeus Deum suum refugit, paganus inquit. Quod proximus non agnoscit, alienus intelligit. Gentilis stellam Christi videt & venit. Judeus Christum videt & invidet.* Nunc cum Spiritus Sanctus, qui olim sub stellæ specie natum Christum indicaverat (id enim Patribus nonnullis persuasum est) sub ignearum lingvarum specie, eum in Apostolis, jam in cœlos sublatum, manifestat; quis à Judæis alios mores nisi perversos exspectet? Qui ad calumnias & convicia conversi, quas possunt, hujus miraculi luci nebulas suffundunt. Vos, o Cives, ex illa pessimorum hominum turba, secedite, & illo paucorum Consortio animos vestros jungite, qui pio stupore *ἡ μέγα λεία* & *Θεὸς* non mirantur solum, sed & lingvis spiritu divino armatis extollunt. Mature nunc, cujus spiritus filii sitis, ostendite, ut ille, qui hic in vobis testimonium perhibuit, Spiritus à severa Judicis sententia olim immunes præstet, vosque hæreditate illa, quæ filiis lucis promissa est, non excidatis. Valete P.P. KilonI, ipso Pentecostes festo, Anno clb lbc LXXXVIII.

29.

Quoties oratione publica hoc die vos compellavimus, Cives Academici, quo divinus ille pacis ac amoris Spiritus in Apostolorum vertices olim effusus est; toties nostrorum vos votorum me-

mo-

mores fuisse opinamur: qui tot jam annos illum nobis illucere diem optamus, quo Patriæ Patrum animi in æternæ fœdus amicitiae coalescant, ac post composita dissidia, nova nobis, Principe reddito, lætiorque rerum species affulgeat. Nemo e Civibus, nemo e nostro ordine fuit, qui non e superiorum annorum caligine & tenebris ad novam Reip. lucem adspirarit. Quæ enim rebus nostris salus in illa animorum dissensione speranda? quæ non mala, quæ non calamitates enervem ac suis quasi compagibus solutam Rempublicam affligent? si in eo statu, in quo infausti temporis propagatio insit, maneamus. Adhuc in cassum missæ preces, ac frustra vota publice suscepimus: quæ vel nunc tandem, cum Ecclesia illam animorum coalitionem in Apostolis ἐκκοινωνίαν congregatis celebrat, cum divini Spiritus igne, quasi torrente pectora liquantur, eo ardore, vehementiaque frequentanda sunt, ut illum Pacis spiritum, illum amoris ignem ex æthereis sedibus in nostras terras animosque evocemus. Ac sane, si quid veri mens nostra auguratur, videre nobis illum diem videmur, eumque propemodum animo præcipimus, quo nos pax aurea revifat, ut vel nunc hoc quasi εὐαγγέλιον vobis denunciatione nostra repræsentandum ducamus. Meministis, o Cives, Pacis imaginem in signis nostris ostentari, sceptris circumferri, cornu copiae præterea ornata; cum nulla nobis sit nisi a Pace & Spiritu Pacis

salus. Nihil enim nobis cum Marte negotiū est: pacifica & tranquilla studiis nostris præsumt Numina, Musæ, & Charites. Non in arena gladiatoria, sed in pulvere literario versamur: non in minacibus armis, sed in plectris, in libris, non in laureis, cruentis illis ac triumphalibus, sed in innoxiiis & eruditis nostra voluptas acquiescit, nostra otia transfiguntur. Quare ut olim in larario suo Imperatores Fortunam colere solebant: ita nos Pacem, vel potius sanctissimum Pacis Auctorem pia mente, ut ille rebus nostris adesse velit, precabimur. Et vos in magnanimitatem precum partem venire æquum est, o Cives, ut sedes, quas nobis hic fata ostenderunt, quietas esse velint, seu communem patriæ, seu studiorum causam peculiarem habeatis. Neque enim nostra a publicis omnium Civium votis possunt ac debent se jungi, qui publicæ fortunæ arbitrio vel stamus vel collabascimus. Quare, ut iterum iterumque vos moneamus, vel hoc festo die, quo triumphis efferri solet sanctus Dei populus, ob completam salutis suæ mysterium, supplicatum divino Numini ibitis, ut in Patriæ Patrum, omniumque animis, qui pacis negotio procurando adsunt pararii, regnare velit ille Spiritus, qui nos inter nos mutuis, iisdemque sibi vinculis, in æternam illam *ἐνωσιν* connectit, inque illis novi amoris igniculi hoc ventilante effervescent. Non deerit nobis rite vocatus ille Spiritus: qui ut unitate fidei & charitatis con-

conjungit, quem sibi illi populum delegit: ita res nostras dissipatas, si ab ipso non discesserimus, connectet, voluntates congregabit, & ad civilem communitatem quasi nodo vinculoque constrictos confociabit. Nam si Chærea ille Terentianus fortunam gubernatricem collaudat, quæ tot res, tantas, tam opportune in unum conclusit diem; nos meliori jure eum, tum diem laudabimus, *quem faciet Dominus*, quem non tam candido lapillo, quam suo insignitum caractere nobis ille reducet. Cui vero potius illam, quæ est in Rebus publicis, in imperiis, unitatem adscripseris, quam illi Spiritui, qui ut rudem indigestamque mundi molem in pulcherrimi corporis formam collegit, Cupidinis celestis specie à gentilibus adumbratus; ita hominum varie animatorum, mentes in unam civitatis compagem contexit. In simplicitate ac unitate ut hominum singulorum salus est, ita universitatis: quæ nisi conspiratione quadam & virtutum fideique consensu una sit ac sustentetur, in multas partes distracta collabascit, ac è sedibus suis convellitur. Totam rerum naturam cum perquirunt Philosophi, mirabilem ejus quasi concentum & harmoniam sibi deprehendere videntur. Unitatem rebus dæmæ, ac vitam illarum, quæ in unitate & adunatione consistit, simul extinxeris. Magnus ille prudentiæ civilis magister, Aristoteles maximum bonum civitatibus amicitiam esse arbitrabatur, qua seditionibus ob-

viam iretur, cum & Socrates maxime unam esse civitatem laudaverit. Quam in rem illum Aristophanis sermonem è Platonis convivio adducit, quo amantes ob vehementem amorem à Vulcano in unum corpus compingi cupiunt. Si enim ut ait Plato, Vulcanus cum instrumentis suis astaret, promitteretque se, colliquefacturum illos, ut è duobus unum efficiantur, non illi renuerent & quam maxime hoc expetere viderentur. Ac sane in Republica aliquo Vulcano, perito scilicet Legislatore opus est, qui animos hominum, quibus Aristoteles, è Socratis sententia, Deum varia miscuisse metalla ait, aurum aliis, aliis argentum æs & ferum, in massam unam conflare possit, ut auro suo minora illa & impuriora metalla contemperentur, vel in ejus quodammodo naturam transeant, aut saltem aliqua compaginatione illam Danielis statuam repræsentare videantur. Sed in civitate Dei divinus ille opifex, igne suo, quem hodie Apostolis superfudit, plumbea, ferreaque pectora, facile in aurea liquando mutaverit. Quanquam nos nunc quidvis potius aureum, quam animos esse patimur, mera ærugine, ac rubigine exesos, vel ferreos potius, ac ære triplici adversus omnia, etiam divina fulmina munitos. Nullum majus Pace bonum est, quæ velut mente sua vivunt regna, vivit Ecclesia, vivunt omnes, quos fidei unitas conjungit, vivunt singuli, per vitiorum fermenta in partes

tes non distracti. Quemadmodum enim spiritus humanus membra non vivificat, nisi unita fuerint; ita spiritus divinus nunquam nos vivificabit, nunquam inspiratione sua dignabitur, nisi pacis vinculo jungamur, nisi pacem ipsam ejusque sororem justitiam, quæ se osculantur, amplexi fuerimus. Nisi Paci locum dederimus, non erit apud nos Deo locus, qui, si Psalten Regem audimus, in *pace locum habet*; ut itaque, si à pace discefferimus, Deum ipsum à nobis exesse suasque sibi res habere jubeamus. Quare & filiorum Dei titulo excidimus, quo Pacificos salutatur Salvator, qui ipsa Pax dicitur, ac hereditatem illam abiens suo gregi reliquit, ut eam rediens aliquando in suis inveniret, sine illius possessione non, suis, sed exhæredibus, & à cælesti Hierusalem, beatæ scilicet pacis visione, exterminandis. Illius nobis æternæ pacis jactura metuenda est, si cum fratribus nostris pacem non amplexi fuerimus, quam omni contentione venerari & quærere nos divina oracula jubent. Pax est, quæ populus jungit, regna firmat, æraria ditat, familias conservat, opes custodit, thesauros congerit, civium numerum auget, justitiæ tribunalia, literis lycea, virtutibus palastras, Religioni templa pandit, atque adeo omnis felicitatis, primum humanæ, deinde divinæ cumulum abs se adducit. Quem non amabilis ejus species in sui amorem rapiat? quæ non illa vel ferrea pectora expugnet? quæ

ita hominibus proposita est, ut vel ipso bello, si aliter non licet, illam obtinere velint. Ideo enim in praelia, in pugnas descendunt, qui ad arma profiliunt, ut pacem quam ipsi velint, quo jure quaque injuria, extorqueant. At, in bello quam sunt omnia facta & horribilia! quis non ad ejus nomen expavescat! In illo malorum sentina est, jacent boni mores, triumphant vitia, conculcantur leges, homines in feras, & si quid illis pejus est, mutantur, cum pax hominem homini Deum faciat, & in animis pacificorum Deus ipse quasi in caelo suo habitet & quiescat. Quid ergo potius festo hoc die faciemus, Cives? quam ut Spiritum Pacis votis nostris ac precibus nobis exoremus: *Veni sancte Spiritus!* descende in animos nostros, atque igne tuo quicquid est simultatum & odiorum depasce, ne illa in ferales atque hostiles flammam erumpant. Incende pectora nostra, ut illa holocausti instar tibi soli deflagrent. Exuere illas vitiorum scorias ac sordes, ut in humilitatis cineres subsidant. Eximamus nos, mature, ô Cives, turbæ & in divinam unitatem recedamus, ac pace nostra, quam nobis indixerimus, publicam illam pacem procuremus. Videte qui hic sub pacis signo, in hoc Pacis theatro, togatam militiam profitemini, qui ipsas Pacis artes discitis, olim docebitis, ne per vos in cruentam Martis palæstram Pacis illa sedes convertatur, ne ex hoc velut equo Trojano ad bella & cades prodeatis. Quisque sibi per in-

te.

gritatem virtutis unus sit, ac unus cum fratribus per coagulum charitatis, ac facile cum Deo ipso in unitatem redigetur. Humana natura per unitatem in divinam assumpta est, Homo cum Deo, si sibi ille unus est, jungitur. Qui si carnem Filii edit, si sanguinem bibit, in illo manet, & ille in ipso, idemque in ipso vivit, quemadmodum Pater in illo. Homo porro cum homine per amorem mutuum unus est: quæ triplex unitas in unam illam Dei unitatem reducetur. Quare, ô Cives, id operam date, ut ex Apostoli ad Ephesios monito *solliciti servetis unitatem Spiritus in vinculo Pacis*, unitate corporis, Spiritus, fidei, spei, baptismi, Dei, velut exemplis ab illo provocati. Eveniet ita (sic auguramur,) ut quo Solymam suam divinus Psaltes excitavit celeusmate, nos Patriam nostram aliquando exitemus: *Lauda Dominum, lauda Deum tuum Cimbria, qui posuit fines tuos Pacem.* O ponat ille fines nostros, Pacem, finem votorum nostrorum, finem omnium Civium, finem Musarum nostrarum, omnium denique finium, finem æternum. Qua spe pleni illa divini Vatis verba paululum immutata Patriæ nostræ acclamamus:

Mater CIMBRIA, Te salus,

Semper Te bona PAX amet:

Et Te semper amantibus

Cedant omnia recte.

*Semper PAX tua limina
Colat, semper in urbibus
Tuis copia dextera*

Larga munera fundat.

*Dulcis Aonidum domus,
Te PAX incola sospitet,
Sedes Numinis, omnia*

Succedant Tibi fauste.

Vos hæc vota nostra, ô Cives, pleno ore, toto pectore, animo, Spiritu sequi ne desistite, ipsumque Pacis præsidem Spiritum, cui hodie sacra facimus, pietate vestra & vobis & Patriæ universæ propitium ut reddatis mementote. Valete P. P. Kiloni ipso Spiritus S. festo Anno clc lbc LXXXIX.

30.

Qui hodie celebratur festus dies, Cives optimi, effusi in Apostolos sub igne-
is lingvis divini Spiritus memoriam nobis reducit, quo velut complemento obsignatum hoc æternæ nostræ salutis mysterium est, nobisque via ostensa, qua eundem in animos nostros Spiritum evocemus, ac intra pectoris nostri penetralia divino igni perpetuos & focos & aras excitemus. Quare nunc hoc agamus festo hoc die, o Cives, ut pia meditatione tanti beneficii arcana altius ritemur, & nos quoque DEO dignos hospites red-
da-

damus, regnumque ipsi in nobis & in nos permittamus. Hæc illa VIRTUS vere HEROICA est, quæ HEROAS nos CHRISTIANOS facit, qua ultra omnia humana elati, veri *ἀντοκρατορὲς* sumus, qui & nos in potestate habeamus, & DEUM intra nos doctorem audiamus, DEUM ducem sequamur; ipsum consiliorum nostrorum socium & omni incogitatione conjunctum habeamus. Hic ille cursus in hac vita ad æternam gloriam est: in hac palæstra bene subacti tandem ultra omnes honorum titulos provecti, omnique fastigio superiores discemus.

Ἄϊέν ἀριστεύειν καὶ ὑπείροχοι ἔμμεναι ἄλλων.

Id enim heroicum est, bonæ mentis principatum tenere, & cum optimis de virtute, de vera pietate, de amore divino contendere. Hæc nobis prærogativa innoxie quaeritur, quæ in ipsa animi demissione triumphali gloria exultat. Nota sunt quæ de Heroibus tradidere veteres & Poëtæ & Philosophi, divina scilicet cum mortalibus commixtione eos natos, unde & Semi-Deos dixere, & ab iis ipsa Virtus Heroica nomen teste Aristotele accepit, qui Homerum de Hectore testem adducit:

ὃδ' ἐώκει

Ἄνδρ' ὅς γε θνητὸς παῖς ἔμμεναι, ἀλλὰ θεοῖο.

— Namq; illum haud esse putares

Mortali genitore satum, at genus esse Deorum.

Lucianus Heroem facit ἐξ ἀνθρώπου καὶ θεῶ συν-
 θεῖον. Omnes deinde Viriboni verique Phi-
 losophi cognatione quadam DEO juncti per-
 hibebantur. Eos Seneca pares & focios Deo-
 rum, non supplices Stoico quodam Thrasoni-
 smo vocat. Hoc est quod Antoninus vocat
 συζῆν θεοῖς, θεοῖς συμπολιτεύεσθαι. Huc illud
 Manili pertinet, *neminem posse reperire Deum,*
nisi qui pars ipse Deorum sit. Non potest illi, qui
 attentiore cura in veteri Philosophia versatus
 est, esse incognitum, quemadmodum illa ima-
 ginem in nobis divinam perpetuum sapientiae
 characterem constituat. Nam Plato τὴν ἐξο-
 μοίωσιν τῷ θεῷ singulis pene paginis inculcat.
 Ne Epicurus quidem alium vult sapientem,
 quam qui velut Deus inter homines vivat, ac
 Aristoteles hanc Sapientis vitam, ut solius Dei
 opus, effert: ὅ γάρ, inquit, ἢ ἀνθρώπος ἔστω,
 ὃν βιώσεται, ἀλλὰ ἢ θεῖόν τι ἐν αὐτῷ ὑπάρχει.
Non enim quia homo est sic vivit: sed quia inest ipsi al-
iquid quod divinum sit. Porphyrius quoque
 in sententiis ad intelligibilia ducentibus: τὸ
 αἰγαθὸν τῆς ψυχῆς ἐν τῷ συνεῖναι τῷ γεννήσαντι:
Bonum animi consistit in eo, si auctori suo jungatur.
 Eadem Pythagoræ sententia est: βέλτιστοι γι-
 νόμεθα πρὸς τὸν θεὸν βαδίζοντες: *Accedendo ad*
Deum efficimur optimi. Quis non illa regens di-
 vina in his tenebris lucis stricturas miretur?
 quis non ex iisdem nobiscum fontibus hæc
 hausisse veteres Philosophos crediderit? Nos
 vel crepusculo hoc moniti pleniorē illam lu-
 cem

-cem, quæ nunc undique nos circumfulget, eo
 -avidius arripiamus, quo patentioribus se radi-
 -is præsens nobis Numen ingerit. Dicebat,
 -quondam ad Samaritanam mulierem Salvator
 -noster: *Si scires donum Dei, vivam a me aquam pe-*
-teres. At nos meliora jam moniti scimus do-
 -num Dei, neque cum gentibus, τὸν αἰώνιον
 -θεόν, sed illum ἐνταρξαθέντα, ac qualem se ipse
 -nobis manifestavit, veneramur. Novimus il-
 -lud Dei donum: Novimus illum, qui datus no-
 -bis puer est, qui cruci pro nobis affixus, qui de
 -mortuis resuscitatus in cælos ascendit, ad dex-
 -tram Patris sedet, qui hodie Spiritum San-
 -ctum & cum eo divina charismata in animos
 -Discipulorum effudit. Ipse ille donum no-
 -strum est, is est qui se ipsum donat Deus, mo-
 -do nos ipsi donum hoc satis intelligamus, neq;
 -ingrata mente aversemur, aut ejus jacturam
 -per socordiam nostram faciamus. Felices olim
 -Maro Agricolas vocabat, *sua si bona norint;*
 -Felices Christiani sunt, *sua si bona norint, si*
 -donum hoc divini Spiritus intellexerint. Ut
 -ignoti nulla cupido, ita nulla æstimatio est.
 -Nam quanquam pura in luce donum illud no-
 -bis refulget, plerique tamen hominum sibi ipsis
 -nebulas offundunt, & inter vanas ac cæcas opi-
 -nionum imagines agnoscunt per umbram

Obscuram, qualem primo qui surgere mense

Aut videt, aut vidisse putat per nubila Lunam.

Si nosceremus illas virtutes, quibus ad divi-
 -nam Sapientiam pervenitur, majore illis studio

in-

incumberemus: si bonum Patientiæ nobis cognitum esset, nunquam futiles illas de calamitatibus ac miseriis nostris querelas instituere-
mus, quæ in Pietatis exercitio nos confirmant. Si humilitatis bonum intelligeremus, nunquam nos quoquam malo afflictos sentiremus. Sed nos non donum hoc satis intelligimus, nec jacturam istius doni satis animo percipimus, qui vitiorum sordibus involuti, & a Deo ipso, & a Dei dono nos sejungimus. Magna hæc infelicitatis nostræ pars est, etiam in omnibus illis, quæ nostra intelligentia assequi etiam in doctrinis conamur, quod Dei dona ignoremus. Id vel e gentilibus Plinius non ignoravit, cum in has querelas libro de Naturali historia II, 7. se diffundit: *Singula improvidam mortalitatem involvunt: solum ut intra ista certum sit, nihil esse certi, nec miseriis quicquam homine aut superbius. Adeo vera sunt illa Ennii: Incerte errat animus, præter propter vitam vivitur.* Sunt qui Socratica illa mirabilia Stoicorum, ut Tullius vocat, sectantes omnia magnifica crepent, se uno Jove minores, solos Reges, divites, nobiles jactent: & hoc tamen Dei donum ignorant. Eorum hominum Philosophiam, si vivis coloribus depingere volueris, illa Scyllæ apud Maronem facie expresseris:

*Prima hominis facies & pulchro pectore virgo
Pube tenus, postrema immani corpore pistrinx,
Delphinum caudas utero commissa luporum.*

Quid enim ab Aretalogis illis expectes præter
in-

inanes λόγος? Faceſſant illi Drances ventofa,
 illa lingua ſua! nos cor igneum ſpirituque di-
 vino incenſum in illo Sapiente noſtro requiri-
 mus, non *ρητῆρα τῶν λόγων* qui verba fundat
 ſapientia, ſed *πρῆκτῆρα τῶν ἔργων* deſideramus.
 Nihil eſt ſublime in Gigantæis illis ingeniis, o-
 mnia illa *μετέωρα* ſunt & in fumos cum ignibus
 fatuis tranſeunt. Heroicos animos divina hæc
 Spiritus Sancti palæſtra ſibi flagitat, quos in-
 gentes etiam anguſto in pectore ſæpe depre-
 hendimus. Quare qui HEROEM CHRISTI-
 ANUM aget in hoc Philoſophiæ genere ita ver-
 ſetur, ut Athenienſium morem imitatus veluti
 oſtraciſmo quodam eam e ſocietate ſua ejiciat,

Corpore majorem ridens Turbonis in armis

Spiritum & inceſſum.

ne turbas ſibi moveat, aut principatum affe-
 ctet. Quod ſi eorum, qui Sapientum nomine
 hodie ſalutari volunt & doctrinam & mores re-
 ſpexeris, tantum abeſt, ut illis inter Semi-De-
 os locus ſit, quos Heroas antiqui vocarunt, ut
 vix inter Semi-Homines numerari mereantur,
 Centauri potius & Tritones & e variis feroci-
 um animantium figuris in quandam humanam
 ſpeciem efformati. Ipſe certe Plato in Phæd.
 neſcire ſe ait, *an ſit homo, an aliqua alia fera Ty-
 phone magis multiplex ac varia.* Quid nobis fiet,
 qui a veterum illa ſchola longius in varia di-
 vortia diſtracti diſceſſimus? Magni ingenii
 Tullius dicebat eſſe *revocare mentem a ſenſibus &
 cogitationes a conſuetudine abducere*, quod primum
 in

in hoc ludo ἀνέγνα est. Nam ut erroris via varia est multisque sensuum ambagibus nos circumducit & ludit, ita propior est, quæ recta mediaque via fertur cognitio, & ad autorem potius & fontem, quam ad rivulos respectat. Præcipua hic nobis sunt effata, quibus tota hæc sapientia continetur: NIHIL ADMIRARI: NIHIL APPETERE: NIHIL METUERE. Admiratio Ignorantiæ soboles est, eademque scientiæ quædam quasi mater. In his quæ vana, & fugitiva sunt, in variis dissidentibusque placitis inepta admiratio est, in quibus qui hæret, nunquam aliquid proficiet, etsi tota vita apud illos Philosophos persederit. Sed vel in minimis nonnulla sunt, quæ mirari sapientis animus possit, & quorum causæ ab altiore origine arcessendæ sunt, ut hoc intuitu sapienter quoque omnia admirari possimus. Nihil appetere primus ad felicitatem gradus est, cum in uno illo necessario acquiescimus, nunquam a cupiditatibus in transversum abrepti, quarum e numero tres illi potentissimi dæmones sunt, hominum assidui tortores, ambitio, utilitas, voluptas. Adversus illos velut in aciem quotidie procedimus, cumque illis luctamur, quos ubi pedibus nostris subjecerimus, ipsos provocare Heroum triumphos possumus. Nihil qui metuit, omnia φοβερά infra se ponit, & omnia illa quotquot sunt fortunæ & tyrannidos μορμολίκεα contemnit. Nil eqvuleo, nil catastis, nil suppliciis in animos istos licet, qui sibi constant

stant, nunquam aliorum vel prædæ vel prædo-
 nes. Cum alii puerorum more in hoc orbe
 versantur, rixantur, tumultuantur, cum cer-
 tant inter se injuriis, suspicionibus, cum cre-
 pundiis suis lusitant, vel inanibus votis tor-
 quentur, cum pacis & belli illis vices sunt: no-
 ster ille Heros in turba quasi solitarius vivet,
 & a pia bonaque mente nunquam discedet.
 Quare *Δὲ τοῦ Θεοῦ* nos & immortales redde-
 re debemus, & nos ipsos, quoad fieri potest, a
 mortalitate vindicare, atque omnia facere, ut
 ei nostræ parti, quæ in nobis est optima, con-
 venienter vivamus. Vivemus autem, si in
 nos, si in Deum spiritumque, qui hodie effusus
 est, descendamus, ac unitatis illo vinculo veri
 Heroes Christiani jungamur. Non admittit
 Semi-Christianos illa Dei Societas, qui partem
 sui Deo, partem orbi curisque hujus mundi
 devoveant. Nihil inter cælum terramque me-
 dium est: nam vel toti cæli cives, vel toti terræ
 filii sumus. Amphibia cælo monstra exulant.
 Agite ergo, o Cives, pectora vestra Spiritui,
 qui hodie in Apostolorum vertices effusus est,
 consecrate, ut Deo pleni veros nullisque rerum
 humanarum studiis divisos HEROAS CHRI-
 STIANOS vos ostendatis. Qui huic se Do-
 ctori & Duci in ipso illo juventutis flore per-
 miserit,

Ille DEum vitam accipiet, divisque videbit

Permistos Heroas, & ipse videbitur illis.

Excipiet illum aliquando HEROUM DIVI-

NORUM, Prophetarum, Apostolorum, Martyrum chorus, & suo consortio dignum hospitem beatæ mentes adscribent, cum quibus perpetuos ille triumphos agat, & illo Regis Sacerdotisque jure æternum exultet. Valete. PP. Kiloni ipso Spiritus S. Festo Anno clb lbc XCI.

IN FESTUM S. ANGELORUM.

31.

Celebramus hodie, Cives Academici, solenne, quod Angelorum Principi MICHAELI, totique gloriosæ beatissimarum mentium cohorti sacrum, pia instituit antiquitas. Magna enim sunt & infinita beneficia, quæ quotidie divini hi apparitores in humanum genus conferunt, ut, ingrati profecto non in illos tantum, sed & in ipsum Optimum maximum Parentem simus, nisi grata ea memoria recolamus. Hi scilicet familiares sunt administri, hi atrienses cœlestes, hi legati ad hominum res moderandas è cœlo demissi, hi distributis per totum terrarum orbem muniis, regnorum præsides, gentium custodes, hominum observatores, munerum divinorum dispensatores, justitiæ executores sunt constituti. Hi ut sunt mortalis expertes con-

concretionis, ita intelligendi agendique summa efficacia celeritateque præditi divinæ propriores naturæ humani angustias ingenii longe supergrediuntur. Quæ quanquam omnia sint verissima; nam & divinis tradita non solum literis sunt, sed & gentium sanioribus philosophis magnam partem docentur; istamen profanos quorundam animos stupor invasit, ut Sadducæorum & Samaritanorum hæresin, spiritus tam bonos quam malos negantium ex Orco nobis reducant. Est vero is perniciosissimus error, eoque magis piis mentibus damnandus, quo atheismo fenestram aperit patentiorem. Hujus si causam indagaverimus duplex illa se ingeret; nam aut stupore quodam correptus crassissimaque ignorantia nube obvolutus animus ultra rerum corporearum sensum non assurgit, aut superbissima alicujus scientia persuasionem occupatus, quæ demonstrari atq; necessariis à rationibus cogi nequeunt, nec sciri nec existere posse arbitratur. Hi cum sapientem nil opinari aut credere, sed scire perfectissimis & ex sensu ipso petitis argumentis debere existiment, fidenter negant, & inter ingenii humani figmenta impudentissime numerant, quæ vel relatione accipiuntur, aut probabili argumento colliguntur. Hinc nihil tam sanctum est, quin Harpyæ istæ involent sordibusque suis inficiant, nihil tam alte positum, quin Gigantes isti sedibus suis evellere tentent. At non attendunt superciliosi isti scioli, quam parum in-

genio humano relictum sit, adeo ut misere etiam in corporum natura hallucinetur, non sentiunt, quam ipsos suos sensus non capiant. Prodeat mihi aliquis ex istorum hominum schola & rationem explicet, qua oculis & menti ingeruntur corporum imagines, qua soni aurem, gustus linguam afficiant, demonstrent mihi causam qua Magnes ferrum trahit, qua ad septentrionem convertitur, & ita quidem, ut assensum ab omnibus extorqueant. De Luce & igne mihi respondeant, cujus veram existentiam in dubium vocant isti cæculi, colorum mixturam mihi definiant, & videbimus, quam egregie causam suam sint acturi. Quis vero ferat homines illos in iis quæ ante pedes sunt ignarissimos, de rebus divinis & supernaturalibus, quarum veras dare rationes animus in corpore adhuc latitans nequit, adeo superbe dictatoria autoritate decernentes? Magnum errori huic de spiritibus patrocinium accedit ab Hobbessii illa sententia, qui in Leviathane suo, qui liber, vel ipsa arguente inscriptione, monstri aliquid alere videtur, docere non veretur spiritum in sacris non proprio sensu accipi, Angelos non esse DEI creaturas permanentes, sed vel DEUM ipsum in sacris literis notare, vel esse ideas quasdam in phantasia a DEO excitatas: si qui autem sint spiritus, corporeos eos esse debere: nullam vero in scriptis Judæorum de talibus substantiis in corporeis mentionem fieri, sed

totam illam doctrinam a Græcorum Philosophis suam duxisse originem. Quæ quam absurda sint quis non videt? nec miror sane hac etiam in parte non satis sanum esse librum, qui tot profana & pueriliter sophistica dogmata, tuetur. Quod corpora spiritibus, Patrum quorundam sententiam forte secutus tribuat, mirum non est, cum & ipsum DEUM corporeum nobis faciat, de quo tamen alibi rursus negat, ut nescias quid sibi velit fluctuante sententia: habet quoque alium popularem suum Henricum More Virum alias doctissimum sibi adstipulantem, qui in libro quem de immortalitate Animæ Anglica lingua conscripsit, ovali figura mentes separatas definit. Timidiusculè tamen ea omnia asserit, & subdubitans, inque illam potius inclinare sententiam videtur, quæ Angelos statuit esse phantasmata ex motu organorum cerebri orta. Quam ut adfirmet, omnia Scripturæ loca, quæ de Angelorum apparitionibus agunt, ad eum modum exponit. Quasi vero tenuissima spiritus substantia totam se consistere menti nostræ etiam in somnis non posset. Sunt præterea alii, a quibus non leve etiam profanæ sententiæ præfidium quaritur, illi scilicet qui omni actioni supernaturali fidem derogant, ea quæ de Sagis, incantationibus, spectris, obsessis narrantur, vel ut fabulas & inanania figmenta rident, vel ut atræ bilis effectus intuentur. Missus in lucem nuper est libellus in Anglia ab Autore anonymo, qui mira impu-

dentia omne negotium Dæmoniacum elevat, sagasque dari pertinacissime negat, ad quem tamen doctissime ab alio quodam itidem Anonymo responsum est, rationibusque luculentissimis sententia contraria adstructa. Cum obsessos peregrinis nec antea sibi cognitis loqui lingvis videmus, quis non supernaturalem aliquam causam subesse credat? at naturalem illam, si Diis placet, nos docet Huartus in scrutinio ingeniorum, quod phreneticus latinam linguam loqui possit, licet nunquam tempore sanitatis cognitam, quia temperamento cerebri naturali ob morbum quasi loco moto atque immutato fieri possit, ut hujusmodi aliquod temperamentum lapsu temporis ei succedat, quale ipse ille Latinæ Lingvæ primus inventor obtinebat. Quæ absurda profanæque sententiæ si tam facile admittantur, facillimus hinc primum in spirituum negationem inque atheismum ipsum prolapsus est. De toto hoc argumento elegantissimo libro Anglice scripto nuper egit doctissimus Mericus Casaubonus Isaacii filius, cujus hic titulus: *of Credulity and incredulity in things natural Civil and Divine, i. e. de credulitate & incredulitate in rebus Naturalibus Civilibus & Divinis*, dignissimo utique qui in Lingva Latina quoque legatur, ut pluribus innotescat. Quicquid enim e Philosophia & Historia tam antiqua quam nova depromere potuit, id omne eam in rem pro multiplici sua eruditione contulit. Sunt vero illa tanti ponderis, ut nisi quis

men-

mentis usum ejuraverit, assensione sua sit approbaturus. Ablegemus ergo, o Mei, ad infanam Epicuri scholam, e qua magnam partem & olim & nunc quoque prodire, infamia ista dogmata, quorum non pauca Johannes Franciscus Grandis doctissimus scriptor Gallicus, in præclara illa de Epicurea Philosophia dissertatione ad Petrum Gassendum scripta, in lucem protraxit. Sit sancta hæc nobis & æterna sententia, esse Spiritus ab æterno omnium rerum conditore creatos: de natura verò illorum tantum sciamus, quantum licet, quantum sacre veritati, sanæq; rationi non repugnat. Ventos eos esse ait miræ Philosophiæ faber Robertus Fluddius, & in ordinem quasi redigens ad cardines mundi janitores hos disponit. Lucis naturæ e Patribus multi, & Religionis Medici autor Thom. Broun affines facit. *Nulla, inquit, omnino creatura tantam affinitatem cum Angelorum, natura habet, quantum habet illud in sole & elementis lumen. Quod licet à nobis merum accidens audiat, cum tamen & per se subsistit spiritualis substantia est & fortasse Angelus. Finge denique lumen invisibile, id spiritus est.* Sed humani illa definire non est ingenii, quod rectius, quid non sit, quam quid sit spiritus intelliget. Sufficiet, nobis munera eorum nosse & officia, quæ hominibus præstare illos è sacris literis discimus. De Stellis Arcturus in Prologo Rudentis apud Plautum commemorat, earum esse officium, ut noctu in cælo luceant, de die inter mortales

ambulent, & jussu Jovis hominum facta, mores, pietatem & fidem noscant, tum malorum ferant nomina exscripta ad Jovem, qui bonos in aliis tabulis habeat exscriptos. Fingat hæc Poëta: at nos meliora moniti Angelos, quos & Stellas non semel aut iis similes pronunciant divinæ literæ, hoc defungi munere scimus. In eorum conspectu semper vivimus, hos factorum nostrorum observatores vitæque bene vel malè actæ testes habemus. Quare summo vobis opere laborandum est, Cives optimi, qui aliquando sanctissimis beatissimorum illorum spirituum choris immisceri & ἱεράγγελοι esse cupitis, ut mature faciatis, quæ faciunt Angeli, quod denique ascendens ille ex Oriente Angelus, de quo in Apocalypsi est, dignos vos inveniat, quorum fronti viventis DEI characterem imprimat. Vivamus ita, ô Mei, spectemusque tam diu gloriosum hoc Majestatis divinæ theatrum, in quo jam inde à cantu illo Stellarum matutinarum & antelucano filiorum DEI jubilo, tot cœlestis familiæ observavimus triumphos, donec tandem ad novissimi buccinatoris Archangeli vocem excitati, coram æterni Imperatoris solio, inter Cherubinorum & Seraphinorum totiusque cælitum exercitus perpetuas acclamations, nostra quoque æternum jubila hymnosque ingeminemus. Valete. PP. Kiloni ipsis sanctissimorum Angelorum feriis. Anno clc lxc LXIX.

32.

Quod veteri fieri instituto consuevit, ut rerum sacrarum cogitationes publica cohortatione apud vos excitentur, Cives optimi: id hodie ab nobis fieri par est: cum bonarum beatarumque mentium memoriam celebramus. Etenim si Romanus olim præco, cum res divinas facerent, suum HOC AGE insonuit; quidni & nos alta voce exclamemus? HOC AGITE, Juvenes! mittite ineptias, delete ex animo quotidianas rerum formas, cœlestes illas sublimesque animas, lucis filios, astra matutina, custodes prædagogosque vestros pia mente veneraturi. Quidni enim honore eos prosequamur? cur festum illis in terra diem inuideamus? qui unius, & quidem peccatoris resipiscentis memoriam festivis in cœlo plausibus celebrare non dedignantur. Præprimis vero, si BONAM ipsi in vobis MENTEM amatis: in vos ipsos descendite, animos excutite: utrum hanc, illic lutulentam, Porcorum aliquando inquilino Dæmoni; an aram Supremo Numini, sanctissimisque ejus ministris, castissimis mentibus, exstructam habeatis. Non amat inquinatas voluptatum sordibus animas, Animus purissimus, DEUS, & qui proximo ab illo loco sunt, Angeli. Ut enim profanis illis nulla cum DEO est communitas: ita & hos procul a se esse jubent, & a commercio suo prohibent, qui a DEO sunt ad hominum res moderandas le-

gati e cœlo demissi. Divina namque negotia apud homines procurant, illis in præsidium, custodiamque dati. Qui si infra pecudes se abjecerint, non homines amplius, sed vel im-mundi Verres, vel virulenti Dracones, vel ra-bidi Canes, vel truculenti Leones: an de be-stiis sollicitos fore creditis *Φιλανθρωπες* illos? qui cum homines quærerent; non homines, non mentes cognatione sibi junctas, sed besti-as & sterquilinia invenerunt. Hi vero omnes, ut Ducem habeant ordine suo dignum, ad am-plissimam Magni DRACONIS familiam refe-rendi sunt, e cœlo in lutum suum, in æternas tenebras, victrici Principis MICHAELIS ac commilitionum ejus manu abjiciendi. Quo magis omnibus nervis & facultatibus conten-dendum vobis est, Cives optimi, si qui inter vos nondum consilio & ratione fatis firmati: ne per malignorum hominum consilia, a pieta-te deducti, ista *παιδαγωγία* indignos vos effici-atis, atque ita certissimam perniciem sponte vestra incurratis. Vetus illa Gentilium Philo-sophorum Schola felices prædicabat eos, qui quo genio uterentur, exploratum habebant: atque in eo maximam sapientiæ prudentiæque partem collocabat. Hinc *εὐδαίμονας* vocabant, quibus bonus obtigerat Dæmon, animus scili-cet virtute perfectus: quem Genium ipsi bo-num, per morum sapientiæque culturam effi-cientes ut DEUM Ducemque sibi adesse existi-mabant. Nunc verò nobis e sanctiore philoso-
phi-

phia meliora monitis constat: quo utendum nobis sit genio: Cujus Spiritus sumus filii, aut esse debeamus. Si magnum e Gentilibus Philosophum Senecam audimus: *sacer intra nos spiritus sedet, malorum bonorumque nostrorum observator & custos, qui prout a nobis tractatus est, nos ipsos tractat*: imo vero ut sedeat in nobis laborandum est: inducendus in animum nostrum, velut, in sedes ac in regna sua DEUS est: ac aderunt nobis fidi Achates, sanctissimi Spiritus, & ipsi malorum bonorumque nostrorum observatores & custodes, qui prout a nobis tractantur, nos ipsos tractabunt. O felices nos Doctore, Deo, ac paedagogis Angelis, Discipulos! Hujus monitis, illorum exemplo fieri ἱσάγγελοι discamus. Ejus Disciplinæ primas ipse Salvator noster lineas duxit, cujus hodie Oraculum auditis: Ἀμὴν λέγω ὑμῖν, εἰ μὴ ἔρχῃτε, καὶ γένηθε ὡς τὰ παῖδια, ὃ μὴ εἰσέλθῃτε εἰς τὴν βασιλείαν τῶν ὀφθαλμῶν. Ecce vobis summam Christianæ sapientiæ, & vere analyticam DEI methodum! Reduci nos in ipsam infantiam nostram debemus, ut summum perfectionis gradum, cum ad rudimenta nostra redimus, assequamur, vere ἱσάγγελοι, cum sumus αἰεὶ παῖδες: ut in convitio Græcis objecto, Christiani triumphemus; qui cum SEMPER-PUERI sumus, plus sumus quam SEMPER-AUGUSTI, & omne honoris culmen transcendimus. Ad pueritiam nobis redeundum est: delendæ ex animo sunt vanæ illæ humanæ sapi-

pientia^æ imagines, quam crepamus Viri, sæpe
 plusquam pueri. Qui cum omnes disciplina-
 rum angulos perreptavimus, omnes Philoso-
 phorum Scholas excussimus, ac infinitam pro-
 pe librorum molem expugnâvimus, id tan-
 dem maximis laboribus nostris consequimur,
 ut magni fimus OPINATORES. Intuemini
 illa quæ ante pedes sunt, Corpora, & usu quoti-
 dianò nobis obvia: & videbitis quam prope ni-
 hil sit, quod de illis sciamus, ut ut Lyncei, acer-
 rimique speculatores; paulatim per gradus
 fugiente, ac sensibus nostris se subducente na-
 tura. A compactis solidisque, ad molliora,
 & fluxa deducimur, ab iis quæ restant, lucis,
 aeris, & subtilioris, si qua est, materia^æ indo-
 lem vix conjectando assequimur. In omnibus
 denique, rudioribus etiam corporibus, sive
 originem spectemus, sive mixtionem eorum,
 ac modorum diversitates: quam tenue hoc est,
 quod sensu nostro exploratum nos habere cre-
 dimus: in quo ipso tamen plus interdum in-
 genio suo indulgent, qui omnia vident, Scio-
 li. E quibus omnibus quid effici aliud cogi-
 que potest? quam ut P U E R O S nos esse tan-
 dem deprehendamus, ex hominum illo, &
 qui ipsos Doctores suos ludos facit, ludo, in
 Dei Scholam ablegandos. Nam si rerum, quæ
 sensibus percipi possunt, naturam ingenio no-
 stro non exhaurimus; an alio quam DEO Du-
 ce ad *αἰετὰ* illa, Spiritus, Deum ipsum, per-
 venire nos posse putatis? Nisi forte, quæ bru-

ta & infaniens quorundam est sapientia, hujus universi terminos ad humanos exigere sensus velimus, cæterorum, quæ ultra sensus nostros jacent, vel securi vel increduli. Accedite ergo, Juvenes Optimi, tum verè sapientes futuri; si in hac Dei Schola PUERI. Imo ut Boni fiatis, PUERORUM vobis induenda natura est. Qui ad aliquem in Civitate DEI locum adspirant, humili esse animo debent, mansueto, pacifico, ut Pueri sunt in innocentissima illa ætate constituti, non arrogantia vanisque persuasionibus turgidi. Quo morbo cum laborarent de primatu litigantes Discipuli, videte, quam specioso, quam arguto responso spiritus illorum retuderit divinus Magister. Cum enim Gigantes illi sibi viderentur, cælum ipsum occupaturi, ac primo illic loco futuri, Puerum illis opponit, ut contemptiore in speciem exemplo stultitiam illis exprobraret, & pariter vivam tum Sapientiæ tum Vitæ optimæ imaginem repræsentaret. Amant se mutuo Pueri, sine fuce, sine fraude: facile omnes perferunt, omnibus se dedunt, adversi nemini; nunquam præponunt se aliis, omnes æquo jure censent. Amant Parentes, iis adhærent, ab eorum complexu avelli se non patiuntur. Ecce vobis AMOREM PROXIMI, & DEI vivis depictum coloribus! quibus tanquam geminis alis ipsa cælorum adyta penetramus. Agite itaque, Juvenes optimi, mature discite: quomodo PUERI fieri ex Salva-

toris præscriptione possitis: atque hoc viri sapientis effatum vobis quoque dictum credite: MAJOR ERIS, SI MINOR ESSE VOLES. Nam sic MINIMI, in Regno Cœlorum aliquando eritis MAXIMI, ultra omnes titulos vel Eminentissimi, vel Excellentissimi Reges & Sacerdotes coram Deo in æternum. Ita vivite, ut in Dei iudicis & sanctorum Geniorum, vitæ nostræ bene vel male actæ testium incorruptorum, conspectu, semper vos vivere credatis. Exprimate illos Puerorum virtutes omni vita ac opera, ut cœlestes pædagogos, custodes vestros semper respiciatis, in suam vos aliquando familiam cooptaturos: cum Archangeli voce excitati, coram æterni Imperatoris folio comparebitis: ubi cum Cherubinis, Seraphinis, atque adeo universo Cœlorum exercitu, inter perpetuas acclamations, hymnos & jubila, immortale illud ævum exigetis. Valet denique & Vivite, ut æternum Valere Vivereque possitis. P. P. Kiloni in ipso Angelorum festo Anno clc lcc LXXVIII.

33.

Q Vandoquidem eo nunc in tempore vivimus, quo omnium animi ad pacis erecti spem optima quæque augurantur: annon intempestivi ac inauspicati feciales videbimur, qui nova vobis bel-

bella, in cœlis, ipso illo pacis regno, unde illa terris acclamabatur, olim depugnata, & nunc quoque piis omnibus renovanda, nunciamus. Celebramus hodie, Cives Optimi, prælii ejus memoriam, quod inter MICHAELEM & DRACONEM, illum cœlestis exercitus Ducem, hunc rebellium geniorum Signiferum, summa contentione commissum, illi victoriam gloriamque æternam, huic exitium æternamque peperit infamiam. Projectus enim est Draco ille magnus, serpens antiquus, qui vocatur Diabolus, olim lucis & Auroræ filius, nunc Tenebrarum Princeps, & e Lucifero larvarum lemorumque ductor Hesperus. Quis non ad casum tam præcipitem attonitus exclamet, cum Esaia: *Quomodo cecidisti de cælo Lucifer, qui mane oriebaris?* aut cum S. Bernardo: *O Lucifer, jam non Lucifer, sed noctifer, aut etiam mortifer, quomodo cecidisti de cælo?* Cecidit de cælo, Cives Optimi, quoniam ad illud adspiravit fastigium, quo sine ruina pertingere nemo potest. Deturbavit illum insanabilis illa, quam Romanæ fidicen lyra, quæ sitam meritis vocat, superbia: cujus infinita ambitio, in perduellionem erumpere consuevit. Nam cum in beatarum mentium ordine summum & dignitatis & gratiæ gradum teneret, omnesque tam potentiæ quam virtutum exsuperantia anteiret, magnitudine ista animi elatus, ad prima tendebat, cum in secundis subsistere indignum putaret. Sollicitatis itaque ad defectionem Sociis, cum hor-

horrendo scelere obsequia detrectaret, & principatus cœlestis jura invaderet, signa adversus illum omnemque, rebellium geniorum cœtum fustulit ætherei exercitus summus Imperator MICHAEL ejusque administri, præcepsque, cum omnibus affeclis datus, miram subiit *μεταμορφωσιν*. Qui suavissimo Luciferi, Stellæ scilicet, e materia cœlesti compositæ, & naturæ purissimæ, nomine olim honorabatur, nunc Draco audit, e terrestrium vaporum fuligine, temere conflatum, subito & maligno fulgore, terribile *μετέωρον*. Qui olim, Soli suo vicinus Phosphorus, pulcherrimæ ab illo lucis hauriebat radios, nunc cœlo cadens debile & malitiæ livore infectum lumen ostentat. Quo ipse Salvator noster respexit, cum apud Lucam ait: *Videbam Satanam sicut fulgur de cœlo cadentem*. Vos vero, Cives Optimi, respicite geminam, quæ hodie vobis exhibetur, tum superbix tum humilitatis imaginem, & sua utrique destinata, præmia. Illius speciem repræsentat nobis solo DEO minor Angelus Princeps, e cœlo in terras, ad inferos, & æterna supplicia projectus. Hujus typum ab oculis ponit ipse Salvator, cum puerum producit, imbellem, mansuetum, simplicem, regni cœlestis heredem, non nisi pueris aut qui illorum mores vita exprimunt, in locum perduellium Angelorum & æternæ gloriæ possessionem evocaturus. Respiciite, ad illas puerorum virtutes, Cives Optimi, easque animo induite, ut illæ vos cœlo adserant: fu-

fugite Superbiam, quæ clarissima fidera in fumos arduos convertit, mentes æthereas infra bestias abjicit, & vel Dracones vel Leones rugientes efficit. Inscribebatur olim ædium vestibulis, CAVE CANEM: Vestris hoc mentibus insculptum esto: CAVETE DRACONEM, qui cum non amplius solida ac immutabili luce inter fidera fulget: vel inter nebulas & vapores terrestres fertur DRACO VOLANS, aut speluncarum inquilinus per terras serpit, perpetua etiam nunc piis animis bella movens, vel per insidias suis partibus adjungens. Videte ne sub Magni Draconis hujus signis militetis βασιλίσκοι, Tyranni, Reguli, vel ipso adspectu homines necaturi nilque nisi venena & flammam spiraturi: Dracones vel incubi & lascivi, Heroum & Semideorum, si Diis placet, olim crediti propagatores, vel auro vestro incubantes, ut ille quondam Hesperius: Serpentes in alienis vitiis Epidaurii, in vestris Talpæ. Procul hinc omnes Boni! nam vel complexu suo necant Dracones. Redite ad bonam mentem, & ad sanctissimas illas mentes: quarum in contubernio & conspectu ita vos gerite: ut illarum satellitio in terris digni, æterna in Civitate Dei cum illis habeatis consortia. Ita pugnate, & sacra in Ecclesia hac militante bella gerite, ut post extremum illum agonem, quemadmodum pugilem generosum, qui omnes devicit adversarios, (agnoscite verba S. Chrysostomi) spectatores cum plausu consurgentes sublimem

statim excipiunt, nec terram attingere patiuntur, sed humeris sublatum innumerabilibus laudibus ornantes domum reportant: ita beatissimi illi Dei Palatini e palæstra & pulvere, ac ipso corpore egredientes victrices animas, cum plausibus & jubilis, ad beatorum concilium deducant. Valete. PP. ipso S. S. Angelorum festo. Ann. elc lbc LXXIX.

34.

Celebramus hodie, Cives Academici, solenne, quod Angelorum Principi MICHAELI, totique gloriosæ beatissimarum mentium cohorti sacrum pia instituit antiquitas. Magna enim sunt & infinita beneficia, quæ quotidie divini hi apparitores in humanum genus conferunt: ut ingrati profecto non in illos tantum, sed & in ipsum Optimum Maximum Parentem simus, nisi grata ea memoria recolamus. Hi scilicet familiares sunt administri, hi atrienses cœlestes, hi legati ad hominum res moderandas è cœlo demissi, hi, distributis per totum terrarum orbem muniis, regnorum præsides, gentium custodes, hominum observatores, munerum divinorum dispensatores, Justitiæ executores sunt constituti. Hi ut sunt mortalis expertes concretionis, ita intelligendi agendique summa efficacia celeritateque præditi, divinæ propiores naturæ, humani angustias in-

ingenii longe supergrediuntur. Quæ quamquam omnia sunt verissima; nam & divinis tradita non solum literis sunt, sed & gentium sanioribus Philosophis magnam partem docentur; is tamen profanos quorundam animos stupor invasit, ut Sadducæorum & Samaritanorum hæresin, spiritus tam bonos quam malos negantium ex Orco nobis reducant. Est verò is perniciosissimus error, eoque magis piis mentibus damnandus, quo atheismo fenestram aperit patentiorem. Hujus si causam indagaverimus, duplex illa se ingeret: nam aut stupore quodam correptus crassissimaque ignorantia nube obvolutus animus ultra rerum corporearum sensum non assurgit, aut superbissimæ alicujus scientiæ persuasione occupatus, quæ demonstrari atque necessariis rationibus cogi nequeunt, nec sciri nec existere posse arbitratur. Hi cum sapientem nil opinari aut credere, sed scire perfectissimis & ex sensu ipso petitis argumentis debere existiment, fidenter negant, & inter ingenii humani figmenta impudentissime numerant, quæ vel relatione accipiuntur, aut probabili argumento colliguntur. Nihil tam sanctum est, quin Harpyiæ istæ involent sordibusque suis inficiant, nihil tam alte positum, quin Gigantes isti sedibus suis evellere tentent. At non attendunt superciliosi isti scioli, quam parum ingenio humano relictum sit, adeo ut misere etiam in corporum natura hallucinentur: non

sentiunt, quam ipsos suos sensus non capiant. Prodeat aliquis ex istorum hominum schola & rationem explicet, qua oculis & menti ingeruntur corporum imagines, qua soni aurem, gustus linguam afficiunt, demonstrent causam, qua Magnes ferrum trahit, qua ad septentriones convertitur, & ita quidem demonstrent, ut assensum ab omnibus extorqueant. De Luce & igne respondeant, cujus veram existentiam in dubium vocant isti cœculi, colorum mixturam definiant, & videbimus, quam egregie causam suam sint acturi. Quis vero ferat homines illos in iis quæ ante pedes sunt ignarissimos, de rebus divinis & cœlestibus, quarum veras dare rationes animus in corpore adhuc latitans nequit, adeo superbe dictatoria auctoritate decernentes? Magnum errori huic de spiritibus patrocinium accedit ab Hobbesii illa sententia, qui in Leviathane suo, libro, qui vel ipsa arguente inscriptione, monstri aliquid alere videtur, docere non veretur: spiritum in sacris non proprio sensu accipi, Angelos non esse DEI creaturas permanentes, sed vel DEUM ipsum in sacris literis notare, vel esse ideas quasdam in phantasia à DEO excitatas: si qui autem sint spiritus, corporeos eos esse debere: nullam vero in scriptis Judæorum de talibus substantiis in corporeis mentionem fieri, sed totam illam doctrinam à Græcorum Philosophis suam duxisse originem. Quæ quam absurda sint, quis non videt

det? nec mirum sane hac etiam parte non satis sanum esse librum, qui tot profana & pueriliter sophistica dogmata tuetur. Hanc sententiam suam ut adfirmet, omnia Scripturæ loca, quæ de Angelorum apparitionibus agunt, ad suum sensum exponit. Quasi vero tenuissima spiritus substantia totam se sistere menti nostræ etiam in somnis non posset. Sunt præterea alii, à quibus non leve etiam profanæ sententiæ præsidium quæritur, illi scilicet qui omni actioni supernaturali fidem derogant, ea quæ de Sagis, incantationibus, spectris, obsessis narrantur, velut fabulas & inania figmenta rident, velut atræ bilis effectus intuentur. Cum obsessos peregrinis nec antea sibi cognitis loqui lingvis videmus, quis non supernaturalem aliquam causam subesse credat? at naturalem illam, si Diis placet, nos docet Huartus in scrutinio ingeniorum, quod phreneticus latinam linguam loqui possit, licet nunquam tempore sanitatis cognitam, quia temperamento cerebri naturali ob morbum quasi loco moto atq; imutato fieri possit, ut huiusmodi aliquod temperamentum lapsu temporis ei succedat, quale ipse ille Latinæ Lingvæ primus inventor obtinebat. Quæ absurda profanæque sententiæ si tam facile admittantur, facilissimus hinc primum in spirituum negationem, deinde in atheismum ipsum prolapsus est. Ablegemus, o Cives, ad insanam Epicuri scholam, e qua magnam partem & olim & nunc quoque

prodiere, infamia ista dogmata. Sit sancta, hæc nobis & æterna sententia, esse Spiritus ab æterno omnium rerum conditore creatos: de natura vero illorum tantum sciamus, quantum licet, quantum sacræ veritati, sanæque rationi non repugnat. Ventos eos esse ait miræ Philosophiæ faber Robertus Fluddius, & in ordinem quasi redigens ad cardines mundi janitores hos disponit. Lucis naturæ e Patribus multi, & Religionis Medici autor, Thom. Broun affines facit. Sed humani illa definire non est ingenii, quod rectius, quid non sit, quam quid sit spiritus, intelliget. Sufficit nobis munera eorum nosse & officia, quæ hominibus præstare illos e sacris literis discimus. De Stellis Arcturus in Prologo Rudentis apud Plautum commemorat, earum esse officium, ut noctu in cælo luceant, de die inter mortales ambulent, & jussu Jovis hominum facta, mores, pietatem & fidem noscant, tum malorum ferant nomina exscripta ad Jovem, qui bonos in aliis tabulis habeat exscriptos. Fingit hæc Poëta: at nos meliora moniti Angelos, quos & Stellas non semel, aut iis similes pronunciant divinæ literæ, hoc defungi munere scimus. In eorum conspectu semper vivimus, hos factorum nostrorum observatores vitæque bene vel male actæ testes habemus. Quare summo vobis opere laborandum est, Cives optimi, qui aliquando sanctissimis beatissimorum illorum spirituum choris immisceri & ἱσάγγελοι esse cupi-

pitis, ut mature faciatis, quæ faciunt Angeli, quo deniq; ascendens ille ex Oriente Angelus, de quo in Apocalypsi est, dignos vos inveniat, quorum fronti viventis DEI characterem imprimat. Vivamus ita, spectemusque tam diu gloriosum hoc Majestatis divinæ theatrum, in quo jam inde a cantu illo Stellarum matutinarum, & antelucano filiorum DEI jubilo, tot, cœlestis familiæ observavimus triumphos, donec tandem ad novissimi buccinatoris Archangeli vocem excitati, coram æterni Imperatoris solio, inter Cherubinorum & Seraphinorum totiusque calitum exercitus perpetuas acclamationes, nostra quoque æternum jubila hymnosque ingeminemus. Valete. PP. Kiloni ipsis sanctissimorum Angelorum feriis. Anno dñi MDC LXXI.

35.

Quando hodie Angelorum Principem, Michaëlem Christianus orbis celebrat, moris Academici memores, animos vestros ad beatarum mentium sanctam contemplationem excitamus: ut quo loco eos, qui divino nobis beneficio custodes constituti, habendi sint, accuratius vobiscum pensitetis. Quæ pietatis vestræ hic sint officia, divini vos præcones, quos & ipsos interpretes & Angelos misit Deus, vos monebunt.

Nos hac occasione ad *παράκλησιν τῶν ἀποστόλων* vos revocabimus: quam eo diligentius animis vestris inculcandam existimamus; quo frequentiores nunc prodeunt veteris Sadduceismi propagatores, & hoc pseudothyro ad infamem atheismum, & ipsam perniciem perducunt. Scilicet nova sensatorum Philosophorum secta oritur, quos brutos potius dixerimus, cum ultra bruta ipsi sapere nolint, & hominis naturam ad illam brutorum componant & exigant potius, quam ad illam spirituum: inter quos quasi medium hominem statuebant veteres Hebræi. In sensibus suis hi obstupescunt, obstinate in illos defixi: cum videant tamen quotidie, quam illorum simulacris fallantur. Nimirum oculi, qui familiam hic ducunt, cæcitatem suam vident, cum naturam luminis scrutantur. Cujus in rebus quæ materia constant, summa subtilitas est, ut uno vitri puncto mille corporum radii colligi, eorumque species in adversum parietem projici possint. Quæ cum fieri videmus, hac in imagine rerum spiritualium ideam nobis ob oculos ponere poteramus. Ipsos rerum contactus occultiores, quis tam oculatus est, ut exploret? Quis hunc in diem magneticorum pulsum causas ita investigavit, ut quiescere in illis possimus? De mirabili sonorum conciliatione & symmetria tantum animo comprehendimus, quantum auris vel oculus noster indagat: divinam enim eorum naturam, per numeros suos utcunque delineatam, non

nisi mentis suspicione attingimus. Descendamus a maximis ad minima, a summis ad infima; nihil illorum recte capimus: nam maxima & remota vastitate sua intellectus angustiam obruunt; minima exilitate sua fallunt, & quasi fuga se sensibus subducunt. Ipsa vermiculorum corpuscula cum intuemur, & puncta quasi animata, admirabili proportionem vel ipsum elephantum superantia; quis non cum Augustino (in Psal. 148.) exclamet? *Quis disposuit ista? quis fecit ista? expavescis in minimis? lauda Magnum. Qui fecit in cælo Angelum, ille fecit in terra vermiculum.* Cœlestia oculis ut ut armatis deprehendi non possunt. Quæ in terræ medullis latitant, perpetuis carceribus sunt inclusa. Quorum omniam si quæ notitia ad homines pervenit, vel conjecturis, vel relationibus Ἰωὺ Θεοδιδάκτων est propagata. In rebus quæ ante pedes sunt & in orbis hujus cortice, quam ægre quicquam deprehendimus, & velut in magna sylva non nisi muscas venamur! Et hi tamen homunciones, qui vel nihil, vel parum sapiunt, supercilio suo velut Atlante cælum fulcire, & metiri omnia non verentur. Hi dictatores de rerum natura pronunciant, ad quos scilicet respicere nos debemus plebeji, & parum emunctæ naris homines. Quando itaque vident, quam parum hic proficiant, imbecillitatis suæ & ignorantiae causam in subtilitatis materiam convertunt: ut, quod illi funditus nesciunt, exhaurire suo ingenio, & cum pulvisculo everrere.

videantur. Illi scilicet ad fundum penetrant lyncei, aliis cum vulpe Æsopica superficiem lambentibus. Tota illis corporum natura velut Penelopes tela retexitur: numerant particulas striatas, ramosas, globosas, quibus hæc omnia concreverunt, & admirandi isti effectus, velut quibusdam machinulis & rotis evolvuntur. Hinc ubi magno apparatu imaginarios istos vectes, trochleas, cuneos, spicula explicuerunt, nihil in hac universitate reliquum esse opinantur, quod non his minutiis & Philosophia mechanica expediri possit: ipsi vero velut *Θεοὶ διὰ μηχανῶν* his commentis misera ignorantia laborantibus Philosophis suppetias scilicet ferunt, etiam cælum, ut opinamur, olim sibi fabricaturi, ubi rotis suis perpetui Ixiones circumagantur. Quæ omnia etsi non contemnimus: nam indulgendum hic ingeniis, ut quibus possunt adminiculis, & quasi serperastris præeuntem naturam sequantur: ferendi tamen non sunt, qui etiam spiritualium naturam his machinulis se expedire posse arbitrantur, & eliminata divina providentia, omnia mechanica necessitate in natura fieri contendunt. Quibus ut obviam iret vir doctus Angelus, Henricus Morus, singulari libro, interveniens omnibus naturæ experimentis principium hylarchicum, omni corporea vi majus, demonstrare laboravit. Habeat has Epicureorum schola delitias, & secundum canones suos *μηχανικῶς* particularum sursum, deorsum, ad

ad latera motarum, earumque ἀλληλοτυπίαν hoc universum, componat, ut nihil ultra sensus reliquum videatur: misere ipsi tamen se, implicant, neque extricis his expediunt, nisi naturam meliorem & motricem in subsidium, vocaverint. Quod videmus accidisse Lucretio, sagacissimo hujus doctrinae interpreti, cui ipsa veritatis vis, cum videret modum particularum sine natura motrice concipi animo non posse, hæc verba extorsit:

*Quarta quoque his igitur quedam natura ne-
cesse est*

*Attribuatur, ea est omnino nominis expers:
Qua neque mobilius quicquam, neque,
tenuius existat:*

*Inde Calor Motus & Ventis æca patefias
Accipit; inde Aër, inde omnia mobilitan-
tur.*

Hanc ille instituti sui immemor Jovem Patrem Æthera vocat, unde omnes operationes naturæ occultiores eliciantur. Qui hanc doctrinam e recentioribus recoxerunt gigantum fraterculi *Habbesius* & *Spinoza*, perpetuo naturam spiritalem exilio se multasse existimant, si materiam, quæ ipsorum Deus est, etiam cogitationis capacem esse confecerint. Nihil enim illi cogitationem esse volunt, quam materiæ subtilioris ejusque particularum & motum, & ἀλληλοτυπίαν. At vero non vident illi, quibus se ipsos vinculis constringant, & quam ex arenulis suis funiculos contexant. Damus certe co-
gi-

gitationes nostras motibus quibusdam vestiri: at ipsorum vim omnem in motu solo consistere pernegamus. Si moventur in nobis particulæ illæ cogitantes, vel ab alio, vel mutuo impulsu movebuntur: nam per se moveri inepta est materia. Si e mutuo impulsu cogitatio oritur, unde affectio illa conjunctis surgit particulis, quæ seorsim & extra illam *ἡ ἐξ ἑ* spectatis non competit? Si aliunde incutitur motus, a principio omnis materiæ experte procedat, necesse est. Quod spiritus est, corpori nostro quidem junctus, sed essentia sua ab usitatis notisque naturis separatus. Ille est qui Phantasiæ imperat, ut vim suam in objecta impendat, ille ratiocinando omnia colligit, sagacitate sua prævidet præcipitque futura: ille digerit, distingvit omnia, suos cuique limites præscribit: neque tamen se ipsum satisfacit, ut oculus, qui omnia; se ipsum vero non intuetur. Quæ qui a simplici motu provenit crediderint, ut sane *Spinoza* corporis humani fabricam non divina sed mechanica arte fabricatam esse ait, a *Lucretio* antesignano suo diversum sentiunt: qui licet corpoream alibi animo naturam multis argumentis adstruxerit, sui tamen oblitus, in hæc verba erumpit:

Deniq; cælesti sumus omnes semine oriundi.

Omnibus ille idem pater est.

Quæ cum non tantum *Lucretius* *ἐν τῷ ὅλῳ* *ἀνθρώπων*, sed & alii gentiles Philosophi cognoverint: quæ nos intemperię agitant, ut animos

nostros ipsi capite damnemus? Sed fatendum est, omnino illam humanarum opinionum, varietatem, quæ non χθὲς καὶ πρῶην a musteis illis Philosophastris excogitata, sed jam ab antiquissimis autoribus proposita, non aliunde, quam ab animi humani debilitate, & rerum, divinarum excellentia proficisci. Solent vero homines ipsi, huic materiæ luto immerfi, a rebus divinis, quas sua natura vix e longinquo prospectant, facile abduci: dum quidam inter illos libenter miseri esse volunt, & mentis suæ oculos obstruunt, vel ut μύωπες non nisi in propinquo posita contemplantur. Hinc nostro seculo, quod ut Vir doctus ait, in Φθαρσίασιν atheismi incidit, nonnulli veteres illas nænias refuscitarunt, & ut superstitionem ignorantiae matrem everterent, religionis causam prodiderunt. Quare ut se ipsos ad brutorum societatem demiserant, litem etiam geniis ac dæmonibus moverunt, & velut nomina nuda, inanes umbras, ac ingenii humani commenta, cumque illis Deum ipsum e rerum natura ejecerunt. Si Plutarcho credimus, primus Heraclitus, postque eum Theophrastus dixerunt: pulcherrima quæque ignorari hominibus, quod superbia ducti nihil credere animum suum inducant, quorum manifestam rationem mens nostra non perceperit. Quibus sane partem mundi majorem pulchrioremque perire, necesse est. Ac est profecto illa arrogantia ignorantiae velamentum: dum sæpe homines, quæ ipsi

ipsi non intelligunt, ab aliis pro dubiis aut incertis insana impudentia haberi postulant, & meliora monitos stultæ simplicitatis titulo traducunt. Ita μεγαλοψυχίαν simulant, qui vere sunt μικρόψυχοι exiguum rerum temporumque ambitum intra animi sui angustiam complexi. Qui hac κενοδοξία laborant, cum causam nesciunt, ne nescire tamen videantur, nolunt id, quod vident, fateri, aut quidvis potius fingunt & vel in divinæ veritatis præjudiciū causantur. Non desunt qui vel ideo spernendam hanc de spiritibus doctrinam, & nihili habendam existimant, quod humano ingenio comprehendere non possit. Nam ut Cardanus in lib. de varietate rerum non inepte ait: *Si Dæmones nosceremus, ex eorum ordine essemus. Si enim equi percipere possent cognitionem in nobis qualis est, non jam amplius equi essent, sed homines. Stultum autem est, tantum discriminis inter mortalia videre: & inter mortalia & immortalia, non majus cognoscendi discrimen existimare. Ob id conditionem suam nos docere nequeunt plus, quam nos equos aut canes nostram.* Verum qui ita sentiunt, præclarissima simul naturæ opera spernere debent, ut contemplatione sua indigna, quia ingenii vires in iis indagandis hebetantur, aut frustra occupantur. Quod quam stultum sit nemo non intelligit. Ex adverso alii sunt, qui naturam spiritus humanam non excedere intelligentiam opinantur. Quare ne nihil dixisse videantur, extensionem illis de suo quasi largi-
un-

untur, ut ut excellentiæ ejus & divinitati nihil detractum velint. Sunt, qui integris libris, & anxie quæsitis rationibus hanc doctrinam propugnant. Quos virorum doctorum judiciis nunc quidem permittimus, & ad Petrum Petium, qui singulari de extensione animæ libro, hanc sententiam impugnavit, ablegamus. Malumus ignorantiam hic profiteri, quam ambitiosæ affectatione scientiæ ultra humanitatis limites sapere, quæ ad illam perfectionem, corporis sui vinculis constricta, non adspirat. Nisi forte Averrois amabilis infania etiam nobis placuerit, statuentis: Intellectum humanum multarum scientiarum congestione ita præparari posse, ut per se in consortium intelligentiarum veniat, iisque proxime uniatur. Cujus ille tempus definivit in lib. de Beatitudine, idque sibi in senectute post longas & continuas speculationes contigisse jactat. Quod & Plotino in vitæ ejus descript. & sibi accidisse anno ætat. octavo & sexagesimo Porphyrius, testatur. Hæc ut suavibus Platoniorum somniis accensamus: ita ex illorum & Pythagoræorum scholis non exiguum huic doctrinæ auctoritatis pondus arcessimus. Nam cum argumentationum nostrarum robur, hoc præcipue in negotio, enervari atque elidi interdum possit, non parum illud sustinetur antiquissimorum Philosophorum testimoniis. Pervulgatum apud omnes est, Pythagoram & Platonem ita de Dæmonibus philosophari, ut nullam hujus uni-

ver-

versi partem iis vacuam esse existiment, imo
 certas in classes & tribus distingvant. Quod
 cum ratiocinando illi assequi non potuerint, ,
 vero est simillimum longa & vetusta narratio-
 ne Ἰῶν Θεοδιδάκτῃ ad illos pervenisse. Neque
 dissimulat ipse Plato, cujus hæc in Timæo ver-
 ba: πῶς δὲ τὰ δαιμόνων εἴπῃν, καὶ γυνῶναι ἡν γέ-
 νεσιν, μείζον ἢ καὶ ἡμᾶς. Πιστέον δὲ τοῖς εἰρηκό-
 σιν ἔμπροσθεν. *De Dæmonibus autem dicere & eo-
 rum nosse originem, majus est, quam ut a nobis præ-
 stari possit. Fides vero iis est habenda, quæ a veteri-
 bus dicta sunt.* Apulejus quoque libro de Dæ-
 monio Socratis testatur, scripsisse Aristotelem:
 mirari Pythagoricos, si qui homo nunquam
 Dæmonem cognoverit. Jamblichus suo de
 mysteriis Ægyptiorum libro hanc de Dæmoni-
 bus bonis malisque doctrinam ita proponit,
 ut homo minime Christianus multa e Theolo-
 giæ nostræ sacrariis depromsisse videatur. Hæc
 tam luculenta documenta, ut coacervemus, o-
 pus non est: sunt enim qui dudum illa college-
 runt, inter quos principem locum merito sibi
 vendicat Steuchus. Horum testimoniorum
 evidentiam cum deprehenderent profani & pa-
 rum pii homines, calumnias etiam commenti
 sunt, quibus illorum vim subverterent, & in
 sophismatis invidiam adducerent. Pompona-
 tius, homo quidem acutus, sed ingenio suo ad
 infringendam rerum divinarum autoritatem
 abusus, iis, quos de incantationibus scripsit,
 libris in Platonem falsum hoc crimen, quasi ve-
 ne-

nenatum aliquod telum jecit: confinxisse illum suam de Diis & Dæmonibus doctrinam, cum videret Socrati exitio fuisse Deorum contemptum: & tamen de Socrate in Phædone longe, alia Plato testatur, ut qui morti Proximus societate Deorum & animarum se solatus fuerit. Ne quid de Dæmonio, perpetuo observatore & custode ejus dicamus: cui simillimam nostro tempore historiam Bodinus in Dæmonomania (lib. I. c. 2.) recenset. Sed mittamus Pomponatium, hominem in isto libro mire laboriosum, ut spirituum commercia in obsessionibus & incantationibus intervertat, & ad astrorum intelligentias & occultas naturæ vires referat, quod in inhabitatorem & τὸν ὑπερῆκτα Dæmonem rejici debebat. Quasi scilicet è sedibus suis ad turbandos homines astrorum inquilini sollicitandi sint, nec potius è vicinia subire corpora possint; aut corporea quadam vi peregrina nec ante cognita lingua, qua utuntur obsessi, cuiquam aspirari possit. Sane qui ita philosophantur, intelligendo faciunt, ut nihil intelligant: Quo enim indice nobis innotuit, alligatos esse sphaeris cœlestibus genios? elabi hinc ad res nostras emissarios, mutuos quasi orbium transfugas. Vetus hæc & jam dudum cum antiquitate sepulta doctrina, sed nuper à nonnemine resuscitata, qui stellas à geniis bonis, cometas à malis agi, aut ipsos esse malos genios, adductis etiam in suæ sententiæ firmamentum sacrarum literarum testimoniis, probare conatur.

tur. Quod re S. Augustini de Gen. ad liter lib. 1. c. 19. aliqua ex parte valere potest iudicium. *Plerumque, inquit ille, accidit, ut aliquid de cælo, motu & magnitudine siderum, &c. etiam non Christianus noverit, ut certissima ratione vel experientia teneat: turpe autem est nimis & perniciosum ac maxime cavendum, ut Christianum de hisce rebus, quasi secundum Christianas literas loquentem, ita delirare quilibet infidelis audiat, ut quemadmodum dicitur toto cælo errare conspiciens risum tenere vix possit.* Veniamus ad quotidiana & familiaria documenta, quæ quanquam ἀθε-
χνα videri poterant; in his tamen rebus, quæ ratione nostrâ satis indagari nequeunt, plus ponderis habent, quam quæ subtilissimo sunt ingenio excogitata. Quæ sacris literis consignata sunt de spirituum apparitionibus, de bonorum malorumque geniorum natura, & ministeriis, ea ante oculos vobis sunt, ac à nemine, cui quidem atheismi labe non infecta mens est, in dubium vocari possunt, aut debent. Sed seponamus ista, ne domesticis documentis adversus θεὸς ἔξω militare videamur: apud quos pietatis & sacrarum literarum veneratio non tantum in desuetudinem abiit, sed fere in opprobrium. An non habemus omni seculorum memoria, omnium annalium monumentis, à fide dignis hominibus congestas historias? quibus vel bonorum vel malorum geniorum apparitiones, magorum cum Dæmonibus commercia confirmantur, ut qui
illa

illa negare aufit, non præfictam, sed ferream frontem habere videatur. An igitur tot populi stulti dementesque habendi sunt, qui in artes magicas earumque magistros supplicia statuerunt? Tot sunt Græcorum, Latinorum, Orientalium, Septentrionalium gentium narrationes, quibus magorum per Dæmones operationes in incantationibus, deportationibus, veneficiis, præsagiis, præstigiis memorantur, quas mendacii reas peragere qui velit, adversus humanam fidem pugnam suscepisse videbitur. Quid fiet tribunalibus? quibus præsunt viri gravissimi, rerum divinarum humanarumque peritissimi, an illi fucum sibi fieri patientur, aut aliis imponent? Nimis ambitiose de se, qui ita senserit, judicat: immodeste atque impie de illis, quos in indignam hanc suspicionem trahit. Quare operæ pretium profecto fecerit, si quis earum rerum historias quam accuratissime contexat, omni illo fidei faciendæ apparatu in subsidium adhibito. Sunt enim & providentiæ divinæ, ubi illa vulgo innotescunt, vestigia, & profanis hominibus ad morum & doctrinæ emendationem manifestissima exempla. Quo consilio nuper talium historiarum syllogen non contemnendam Anglica lingua edidit *Josephus Glanville* adversus Sadducæismi veteris novique propugnatores, confutatis simul ratiunculis, quas tum *Reginaldus Scotus*, tum alii quidam ejus populares pro eo stabiliendo ad-

duxerunt. Et vero augeri infinitis modis illarum numerus possit, si quotidiana illa, à viris tamen fide dignis, de spectris, sagis narrata congerantur: ad quæ profani isti scioli vix supercilium demittunt, quæque cum anilibus fabulis explodunt. Quod cum faceret *Spinoza*, omnem veterum & recentiorum fidem infana impudentia exhibilans; movere tamen illum non potuit nigri & scabiosi Brasiliiani illi oblata species, de qua ipse narrat, malus forte Bruti illius Philosophi genius, ut nigram sibi esse animam crederet, & infami atheismi scabie infectam. Neque mirum est humanam fidem floccipendi ab illo, cui ne divina, quidem sacrosancta est. An qui Salvatoris nostri resurrectionem tot testibus probatam, tot documentis stabilitam negare audet, auctoritatem hominum etiam sanctissimorum non infringat? Vos vero, ô Cives Academici, fugite hos qui periculosis ac in religionis fraudem excogitatis argutiis usitatam de Spiritibus philosophiã eversum eunt, & quoniam humana sapientia parum hic proficimus, ad divina oracula confugite. Deo doctore accuratius naturam beatarum mentium explorabitis, & malorum opera Dæmonum damnabitis. Hoc ductore illorum ministeria vobis sociabitis; horum insidias & technas effugietis. Parum ad salutem nostram facit in illorum naturis indagandis tricarri & operose nihil agere, ut agunt omnes, qui suo genio ducti sibi sapere αὐτοδίδακτοι, quã di-

vino niti arbitrio Θεοδώρα Joel malunt. Nolite rimari altius cælestis illius aulae & Civitatis arcana: ne vel Scholasticis contentionibus impliciti parum religiose de sanctis illis apparitionibus sentiatis, vel ad Platoniorum familiaritates dilapsi, divinæ societatis affectatione, in periculosa superstitionis discrimen vos ipsos temeritate vestra conjiciatis. Revolvite animo præclarum illud S. Augustini in libro de Vita beata monitum: *Habent in epulis suis & animi quandam luxuriam, si ultra modum incas & voraciter irruant: ita enim male quodammodo digerunt, unde valetudini mentium non minus, quam ab ipsa fame metuendum est.* Vetat & Apostolus in epistola ad Romanos *plus sapere, quam oportet; jubet vero sapere ad sobrietatem.* Quæ verba cum explicat S. Bernhardus sermone 36. in Cant. *sapere ad sobrietatem, ait, est vigilantissime observare, quid scire magis priusve oporteat: tempus enim breve est: ut scias, quo ordine, quo studio, quo fine quæque nosse oporteat: quo ordine? ut id prius, quod maturius ad salutem: quo studio? ut id ardentius, quod vehementius ad amorem: quo fine? ut non ad inanem gloriam, aut curiositatem, aut aliquid simile sed tantum ad edificationem tui & proximi.* Quod si in id nervos spiritumque omnem intenderitis, ut ad hanc normam vitam exigatis, id pietate vestra consequemini, ut vel corporibus vestris immerfi, etiam cum angelorum naturam non capitis, ipsi tamen fiatis ἰσάγγελοι, animumque ab omni

materiae contagione abductum cœlestibus gaudiis imbuatis. Habebitis præterea ipsos ad divina opera Angelos pædagogos, quos hominibus custodes datos esse ajunt Hebræi & ex iis Plato; ut animalibus homines Pastores sunt, præstituti. Sin vitiorum fordibus inquinatos, sanctissimæ illæ mentes sibi suas habere jusserint, consortione illarum exclusi, malignos Dæmones consiliorum autores, scelerum adjutores, sollicitudinum focios & omni incogitatione conjunctos habebitis. His quasi perpetuis stipati confessoribus, collusoribus, compotoribus, imo ficariis & latronibus, in crimina, furias, imo ipsam perniciem detru-
demini, bonis omnibus invisi, Deo rebelles, & salutis vestræ proditores, eadem olim præmia, cum principe eorum Lucifero habituri. Mature itaque, neque sero cum Phrygibus sapite, ne in vos dici possit, illud Ascræi Vatis:

— Δίκη δ' ὑπὲρ ὑβριῶν ἴσθι
Εἰς γέλῳ ἐξελεῖσθα, παθῶν δέτε νήπιῳ
ἔγνων.

Valete. PP. KilonI. ipsis SS. Angelorum feriis
Anno clc lbc LXXXII.

36.

SI quis vobis, Cives Academici, pietatis lætitiæque sensus est, arrigite aures ad in-
usitatum, luctuosissimo hoc tempore ce-
levsima, cum salutem & triumphos vo-
bis

bis nunciamus: eo die, quo reportatæ ab inferiorum Duce Dracone victoriæ memoria celebratur, & beatarum mentium Principi MICHAELI triumphales hymnos Ecclesia occentat. Neque enim ante tot secula triumphos tantum de Dracone egit Magnus ille MICHAEL, sed quoties novos Ecclesiæ perduelles infamis ille Draco resuscitavit; toties eadem pugna recrudit, & illo ipso MICHAELE Archistratego felicissime in ipso ortu suo extincta est. Nemini vestrum incognitum, quam felici prælio ex iisdem antiqui Draconis castris, piorum hominum cervicibus superfusi barbarorum exercitus, Dei cœlitumque ope repressi, profligati & ad internecionem deleti. Sustulimus omnes manus animosque ad mirabilis victoriæ nuncium, & nunc quoque omnium jubila, triumphi, vota, auribus nostris obversari videntur. Quæ eo frequentiora per provincias, urbes, templa, atque adeo orbem universum, qua Christianus est, nunc audiuntur, quo graviora certioraque cervicibus nostris pericula imminebant. Conjuratum scilicet erat in Dei populum. Collectæ erant adversus exiguam nostrorum manum immanes copix & genere & numero firmissimæ, probe etiam auxiliis ornata; tota Asia atque ipsa in Hungariam, Europa, qua barbara est, effusa videbatur. Per omnes ejus regni partes, tanquam aliqua calamitosa tempestas pestisque, hostis ille truculentus pervaserat: excisionem,

inflammationem, everfionem, depopulationem, vastitatem, agris, tectis, urbibus intulerant. Omnia illic ad perniciem profligata atque perdita, atque ipsius jam Germaniæ in Vienna circumfessa jugulum petebatur. Quanta hic rabie, quibus furiis illa procella sævit in obsessos, quos jam spe sua illi latrones devoraverant! Nihil excogitarat in suam perniciem, male sedula hominum industria, nihil adeo fendale ex Orci penetralibus, illi novorum fulminum fabri, humani Vejoves, produxerant, quod non in miserorum tecta & capita detonuit. Desuper ipsum pene cælum globorum sulphureorum displosionibus rumpebatur: subtus e terræ cavernis ipsæ inferorum flammæ in subsidium vocatæ: latera urbis, aggeres, muros, quassabant, lacerabant, sternebant, infiniti tormentorum ictus: ut non aqua & igni, ignem enim in perniciem illorum armaverant, sed cælo ipso, quod impune tueri non poterant, & terra, cui securo fati talo insistere non audebant, imo ipso aëre & spiritu interdicere viderentur. Quis non ex his ungvibus Draconem ipsum recognoscet, quibus illi Draconis focii in Christianorum cædes se induerunt? e cujus faucibus illæ ipsæ flammæ, quibus pugnatum fuit, proruperunt. Succubuiſſet tandem vesano furori heroicus ille sub Duce incomparabili pugnantium animus, nisi ille divino præsidio munitus fuisset, Deoque subjiciente stimulos, novi in subsidium exercitus evocati.

Fatiscebant jam præsidia & faucibus urbis se,
immerferat hostis, cum peropportuna illi su-
pervenerunt fœderatorum arma. Qui etsi nu-
mero copiarum duplo pene majori vince-
bantur, & hosti omnia præter animum & De-
um favere videbantur; pares tamen generoso
consilio lacertos attulere. Excitata hic sub
maximo & invicto Rege militantium Polono-
rum virtus. Insurgebant Saxonum magni sui
Ducis vestigia sequentium animi. Hinc Fran-
corum Bavarorumque robur objiciebatur. Pu-
gnatum est minore manu adversus magnas ho-
stium legiones Marte primum dubio. Verum
sive læva mens hosti fuit, sive Deus quorum-
vult perdere fortunam, consilia corrumpit;
cessit fortitudini nostræ illius rabies, versi in
fugam exercitus, superati, profligati, ut du-
bium certe videri possit, utrum illis timor mor-
tis, an nostris amor laudis & gloriæ cursus velo-
ciores alas addiderit. Nox denique illa ipsa,
cujus imaginem illi circumferunt, Luna teste,
victoriam constituit, exspectatione omnium
desiderabilem, magnitudine admirabilem, cui
parem neque secula nostra viderunt, neque
futura temere videbunt, cujus memoria anna-
libus legetur, gloria ad posteros, ut æternum
virtutis nostræ monumentum propagabitur.
Quam utinam prosequi glorioso conatu non
desistant illustres animæ, in hos potius quam
in se, ut Cadmæi fratres tela conversuræ: ita
fiet fortassis, si divina manus his consiliis afful-

ferit, ut triumphis suis palmas, ad ipsas Jor-
 danis ripas eo loco, quo illæ quam latissime,
 efflorescunt, aliquando decerpant. Patuerunt
 hæc omnium oculis, in conspectu orbis gesta,
 omnium vocibus & lingvis decantata; Vos ve-
 ro, o Cives, qui ultra ulla quæ ante pedes sunt
 sapere jamdudum didicistis, erigite animos &
 potestatiorem manum in his lacertis, firmiter
 præsidium in hoc apparatu, plusquam fulmi-
 neanimo divinam in armis vim agnoscite.
 Non soli pugnarunt, (dabunt nobis hanc veni-
 tissimam foetissima pectora!) qui hic pugnarunt, et-
 am fortissime pugnarunt. Nam magni
 si virtutis multique e MICHAELIS nostri castris fo-
 illis etiam non intellecti adfuerunt. Hi fœde-
 rati in causa ad Deum spectante, illis animos &
 robur addiderunt: Hi grandines globorum a
 capitibus illorum averterunt: Hi ad celerita-
 tem alas, ad impetum stimulos, ad efficacitatem
 pondus adjunxerunt. Occulta sunt, sed certa
 & inevitabilia, quæ ex æterni Regis armamen-
 tario depromuntur tela, qui facit ventos Angelos
 & flammis igneas ministros suos, ignibus illis suis,
 quibus flagrant, auxiliaribus atque inexstin-
 ctis hostiles illas flammæ, cum ipsis hostibus,
 facile exstincturos. Agite ergo, o Cives Aca-
 canamus in hoc beatarum mentium,
 earumque Ducis MICHAELIS festo die, non
 Capito, sed cælo cœlitibusque lætos trium-
 phos! Quidni enim pio justoque duello saltem
 animis faveamus, vocibusque gratulemur?
 Quid-

Quidni Deo fiamus supplices, ne victricem illam causam, causam suam deferat, ut sub MICHAELIS signis militantes perpetui simus de his aliisque Draconis asseclis triumphatores. Quoniam enim cum Gigantibus nobis est bellum ἀσπρονδον, oremus illum, ut præfidiarios nobis mittat milites, qui pro aris focisque nostris excubent assidui custodes, rabiem Draconis illius, qui

Visceribus miserorum & sanguine vescitur atro compescant, adversus illa quæ undique nobis imminent pericula defendant, conatus malorum hominum reprimant & extinguant, ab insidiis adversariorum tueantur. Vitam denique nostram ita instituamus, ut his satellitibus munitum latus semper habeamus, eorumque æterno aliquando consortio frui possimus. P. P. ipsis Angelorum feriis Anno dñi lxxc LXXXIII.

37.

Tertium jam contigit, Cives Optimi, ut quoties redeunte in orbem anno, MICHAELI ARCHANGELO epinicia canit Ecclesia; toties in Christiano orbe, de Christiani nominis hostibus amplissime atque honestissime triumphatum fuerit. Quæ cum non humano consilio, sed divinitus data atque oblata beneficia fuerint: non enim integris seculis victoriæ tam multæ, tam memo-

morabiles, de hoste atrocissimo auditæ fuerunt, quam nunc aliquot annorum spatiis reportavimus: musitari illa profecto & silentio involvi non debent; sed plena manu, conspirantibus omnium animis, testibus illis, quorum hodie memoriam celebramus, commilitonibus Angelis, in luce atque oculis totius Christiani orbis, ad cælum efferenda, Deoque immortaligratiæ immortales sunt agenda. Cum ipsis annis creverunt nobis victoriæ, ex eodem agro & fundo progerminantes: illis enim in messes & vindemias exeuntibus, novis palmarum mensibus illa manus, quæ annum opibus suis coronat, arma quoque nostra ditavit. Vidimus illa vestigia rore divino stillantia: Vidimus spoliis opimis auctos gravidosque Auctumnos nostros, & ex iis, sive ab augendo, sive ab auguriis dici velit, semper augustiorem Imperatorem augustissimum, & qui cum illo arma in communi causa sociarunt. Annon primî anni victoria, qua furore Barbarorum Vienna, internecionis metu tota Germania liberabatur, tanta est, ut cum Marathonio possit comparari tropæo. Nam si illius pugnæ laudibus, qua Græciæ salus in extremum adducta discrimen, admirabili Græcorum virtute asserta fuit, satiari non potuit Græcia, ut hunc sibi eloquentiæ campum omnes Rhetorum scholæ proposuerint: ut quasi perpetuos cum nepotibus triumphos sibi ducendos duxerint Græci: quanto idem nos facere æquius est, qui sacra, libertatem,

tem, vitam, patriam, divino beneficio, Herorum nostrorum virtute incredibili servata & quasi ab inferis revocata vidimus. Intercescit ille exercituum Dominus hostilibus copiis, nos jamjam devoraturis; cujus potentissima manu rapaces illi ungves, qui jugulo prope nostro infixi erant, retracti atque præcisi. Turbavit, ille Consilii Angelus occultas eorum machinationes, qui vel ipsum Acheronta in capita innocentium movere non verebantur, ut ex ruina publica suas fortunas ædificarent. Magna hinc rerum conversio facta est, & qui a partibus nostris semel militare cœperat Deus, sequenti anno ad castella, ad urbes expugnandas, ad hostium aciem retundendam ipse quasi signum, sustulit. Quæ tertio hoc anno res, quam memorabiles gestæ fuerint, toto jam orbe decantatum est, neque in hunc diem hujus lætitiæ sensum exhausimus. Habent de quo gloriose triumphent Veneti. Neque in hoc famæ theatrum vel Poloni, quorum jam ante spectata virtus est, vel Moschi venerunt, ut exirent; a quibus splendidioris victoriæ præludia jam vidimus. Nos vero BUDÆ urbis regiæ expugnatiæ gloria propius tangit: qua non illius tantum, quæ restat Hungariæ, sed ipsius pene Byzantii claustra ulterioribus progresibus panduntur. Quæ in re quam fataliter omnia definita fuerint, vel ex eo existimare possumus: quod septimæ demum obsidioni succubuerit, toties irritò conatu antehac tentata: & quidem

eo ipso die, quo in Solimanni potestatem, ante CXLV annos pervenerat: & quo Vienna, ante biennium cum internecione barbarorum liberabatur. Non parum quoque ad orbis literati honorem & vindictam interest, supplicia, quanquam fera nunc de illis sumi, a quorum majoribus incomparabiles literarum thesauri direpti ac dissipati, quos hæc ipsa Buda olim aservavit. Extruxerat enim hic Matthias Corvinus Pannoniæ Rex Bibliothecam, cui similem Orbis Europæus non habuit, quam ille, Græcis Hebraicisque voluminibus replevit, quæ capta jam Constantinopoli aliisque Græciæ urbibus amplissimis everfis, e media Græcia immensis sumptibus coëmerat. Neque Græciæ tantum & Orientis, sed & Italiæ thesauros huc congeffit, qui Florentiæ librarios magnis impensis aluit, ut melioris notæ autores Græcos & Latinos exscriberent. Vidit illam, salva urbe, integram *Johannes Alexander Brassicanus* Jctus: cujus extat super hoc argumento epistola Salviani operibus, quæ ex hac Bibliotheca edidit, præfixa: qua acerbis ejus jacturam lacrymis deplorat, & luctuosam istius Gazæ memoriam orbi erudito commendat. Fuit illic, ipso teste, Poëtarum, Oratorum, Philosophorum atque Historicorum vis immensa, fuerunt autores Græci innumerabiles, infinita in Poetas fere omnes commentaria, nemini doctorem aut paucis omnino antea visa. Quæ cum recenset, Alexandrinæ

Bibliothecæ, ubi millia voluminum septingenta; Byzantinæ, ubi centum & viginti librorum millia incendio perierunt, jacturam, præ Budensi elevat; & in hæc tandem verba erumpit: *Ego jurejurando affirmare ausim, nos hac infelicissima ætate longè plus dispendii accepisse, quam vel cogitatione consequi, aut oratione possit aliquis exprimere.* Quare viderint sagaciores, an fides habenda sit illis relationibus, quæ Bibliothecam hanc nuper quasi postliminio nobis restitutam, atque ex ipsis orci faucibus ereptam nunciarunt, quam perditam atque deletam, esse compertissimum se habere Brassicanus testatur. Maximam ejus partem Byzantium olim translata, aliquos Codices Viennam deportatos, alios militibus direptos distractosque, certiora sunt documenta, quam ut à quocumque in dubium vocari possit. Quod si forte superstites è veteri naufragio tabulæ hac occasione servatæ fuerint, plusquam de Attalico censu & talentorum spoliis Orbi & Christiano & erudito gratulabimur, non tam Mavortios quam Apollineos, vel utriusque potius & armatæ & literatæ Palladis triumphos acturi. Ac haberet fane quod in felicitatis suæ partæ poneret Magnus & Inviçtissimus Heros LEOPOLDUS, non de suis tantum temporibus, sed & de præteritis & futuris bene meritis: qui mutos pristinorum seculorum magistros, è fœdissimis barbarorum catastis in libertatem, à tumultu & tenebris in vitam & lucem

cem, immortalis posterorum bono, non gentium tantum & monstrorum domitor Hercules, sed & Musageta evocavit. Quando ergo tam insigni bono mactata est universa Christiana Respublica, agite ô Cives, Deo immortalis supplicatum eamus, & quantas mens concipere potest, gratias persolvamus: quod Angelorum turmas in nostram causam armaverit. Hunc piis tandem precibus erogemus, ut qui nunc prædas & cruentas de hoc populo victorias reportavimus, fœcundas olim animarum messes ex iis colligamus. Respiciat illos aliquando divina misericordia, ut & illi sua bona agnoscant, & suam quoque, quæ universi orbis est, in CHRISTO JESU salutem expectent, non virga amplius ferrea coercendi, sed æterni Pastoris Pædo in unum nobiscum ovile revocandi. Et sternere illis jam viam divina providentia videtur, gliscuntque jam in illorum animis Christianæ veritatis igniculi, in lætissima olim (atque utinam jam flagrent!) incendia erupturi. Nam si Ricautio, Viro nobili Anglo, Legato, novissimo atque diligentissimo Aulæ Mahumedanæ exploratori fides habenda est, quem ista muneris dignitas facile à falsi suspitione liberat, secta inter illos est, quæ *Hætiti* nominatur. Hi Mesiam corpore humano vestitum & olim ad orbem judicandum venturum, æque ut Christiani credunt, atque adeo inter fidei suæ capita referunt, Alcorani quibusdam verbis sententi-

am

am confirmantes, quæ ita habent. *O Mabo-*
met, videbis Dominum tuum in nubibus tibi occur-
rentem. Quæ etsi de Christo publice interpre-
tari non audent, communi tamen consensu de
eo hæc intelligenda non dissimulant. Eodem
teste inter aulæ procures istiusque gentis do-
ctiores, qui *Chup Messabites* id est: *Messie parti-*
bis addicti vocantur, opinio hæc invaluit: Chri-
stum esse Deum ac orbis redemptorem: quam
ita tuentur, ut extrema potius subituri sint,
supplicia, quam ab illa discessuri. Quare in-
ter honoris titulos illis reponitur cum *Chup*
Messabisen aliquem vocant, hominem ita offi-
ciosum, ut Messie servitio dignus esse vide-
atur. Sunt porro alii, ut idem refert, *Eschra-*
kites dicti, quibus sacerdotes peritissimi accen-
sentur. Hi imaginis divinæ Trinitatisque
in Deo contemplationi totos se dedunt; rudi
exemplo lintei unius in tres plicas infracti ter-
narium in divina natura adumbrantes, ac in
attentissima Numinis speculatione summum
suum bonum constituentes. Quare nec Al-
corani admittunt commenta, nisi in quibus
cum doctrinis suis rationeque conspirant.
Quis non meliores ex illis olim Christianos,
quam nunc sunt multi, augurabitur? Nam
& sapient aliquando, licet sero sapiant, hi
Phryges, & *ψυαθεῖς* in hac schola Discipuli, &
inter vespertinos in vinea Domini operarios
aliquando comparebunt. Videmur jam no-
bis videre illa tempora, & si ad Senecæ Tragici

de novo orbe vaticinantis ἐν θρησκρασμένῳ παρθεῖν licet, pleno hæc ore prænunciamus :

————— *Venient annis*
Sæcula seris, quibus Altipotens
Vincula lucis laxet, & ingens
Pateat regnum, Christique novos
Lex regat orbes, & sit cunctis
Ultima terris.

Fiat ô Deus! adveniat regnum tuum! ut in his terris incruentos, & aliquando in cœlis perpetuos cum beatis mentibus triumphos tibi canere possimus. Valete! PP. KilonI, ipso S. MICHAELIS die Anno clb lbc LXXXVI.

38.

Qui hodie celebratur dies festus, Cives Academici, beatis mentibus a pia Antiquitate consecratus est: ut quoniam principatum in Civitate Dei tenent, cœlestis aulae proceres, nos aliquando ordinis sui socios habituri, in hac vita quasi pædagogi nostri & administri, nos & amicos hos nostros noscamus, quidve eorum beneficio debeamus homines, pia contemplatione grataque memoria præcipiamus. Nemo est e vobis, quin e sacrarum literarum fontibus rectam de Angelis eorumque natura cognitionem hauserit; nam veterem Sadduceismum, quem hodie ex orco reducere profani homines

la-

laborant, quin toto animo aversemini, prorsus non dubitamus. Quorum aures si ad divinæ veritatis testimonio obduruerunt, vel communi omni gentium consensu illi ad meliorem revocari mentem possent, si rationem sequi, aut prudentium virorum opinionibus nitari non recusent. Quæ in Gentium Theologia de Diis habentur, non possunt nisi ad mentes inter Deum hominesque medias referri. Cum enim nomen non haberent vel Philosophi vel Poetæ, quibus eas salutarent, Deorum communi appellatione usi fuerunt, cum præsidem illis Deum summum constituerent. Socratem moriturum Plato inducit, cœlestem patriam, commendantem, quæ sit e lapidibus pretiosis, Sardis, Smaragdis, Iaspidibus exstructa, ubi verum sit lumen, & quæ beatis spectatoribus habitetur, Diis scilicet, & Heroibus, quibus non nisi Angelos felicesque animas optimus Senex intellexit. Non dissimilia his Plato, Aristoteles, Tullius dixere, quæ cum alii integris libris coacervarint, intolerabilis illorum stupor est, qui doctrinam hanc ex iisdem divinæ veritatis fontibus haustam non animadvertunt. Asferendæ ergo cœlo suo sunt beatissimæ mentes, Parentis optimi maximi familiares, apparitores, atrienses, Providentiæ divinæ administratores & ad res hominum curandas legati. Hi divinæ lucis radiis immerfi undique ab illa obfidentur, aguntur, impelluntur, ut nihil velint, nisi quod illa signaverit, nulla vestigia se-

quantur, nisi qua illa præluxerit. Mutuo vero luminum appulsu eoque suavissimo, quasi vinculis quibusdam, juncti, se ipsos in infinita gaudia excitant, ex attentissima Numinis contemplatione orta, omnes quos inter se exercent amores, in divinum amorem, inexhaustum cœlestium deliciarum Oceanum, ineffabili voluptate refundunt. Huic perpetuos illi triumphos, plausus, jubila occentant, admirabilique symphonia voces per omnes orbium anfractus resultantes diffundunt. Huic Cherubini illud suum *τρισάγιον* acclamant: Huic Throni se demittunt: Huic Dominationes serviunt: Huic se Potestates omnes subjiciunt: Huic omnis cœlorum exercitus militat: Huic omnis, quam late patet hierarchia assurgit natusque ejus veretur. Huic magnus ille Consilii Angelus, Archistrategus, & Draconis triumphator MICHAEL palmas suas suspendit, & quod ab illo accepit imperium, transcribit. Nos hoc præcipue tempore & officia beatorum Angelorum eorumque beneficia, quibus humanum afficiunt genus, perpendere, idque dare operam debemus, ut fidos Achates illos, qui se ultro nobis offerunt, semper habeamus, neque illorum consortio unquam excidamus. Nec privata tantum, sed & publica nobis supplicationum causæ sunt, ob servatum ab immani Turcarum insultu Dei populum, ob victorias amplissimas reportatas, ob exutos castris hostes, & cum magna clade profligatos. Nam

An-

Angelorum a latere nostro pugnarunt Exercitus, illi a jugulis nostrorum enses amoverunt: illi panico hostibus terrore incusso, in fugam illos converterunt. Gemina Angelorum & Belli & Pacis munia sunt: ut illis omnes humanæ res temporibus distingvi solent. Neque alia Dei populum fata premunt, cui inter perpetuas cum externis domesticisque hostibus conflictationes semper vivendum est. Cum enim jam ab ipsis primordiis Luciferi ac rebellionis Spirituum copiarum adversus Deum insurgerent, potentissimis MICHAELIS ac sanctissimarum mentium armis repressæ sunt. Hinc illa bellorum in orbe semina sparsa sunt, ut quotidie etiamnum boni Angeli in aciem pro nobis, in perpetua militia constitutis, prodeant, ac militari suo officio defungantur. Lacescuntur semper ad pugnas a Draconis illa familia pii homines, & semper aliquid in orbe hoc turbabitur, ne quieti illi sint ac paci suæ permittantur. Angelorum manus populo Israëlitico, cum ex Ægypto educerentur, adfuerunt. Illæ per aspera locorum & casuum, per mare rubrum in terras promissas deduxerunt. Cum ad Jerichuntem urbem castra poneret Josua rebusque suis diffideret, ab angelo Dei ad pugnam animatus est. Angeli fuere, qui istius urbis muros pertubarum clangorem e fundamentis revellerent. Idem illi in urbibus cæteris populoque Cananitico subigendo opem tulerunt. Cum Philistæi adversus Davidem

insurgerent, gens atrocissima, hi sonitum gradientis in cacumine pyrorum excitarunt, & hostes percusserunt. Illi in castris Regis Syriae, cum Samariam obsideret, curruum & equorum tumultus excitarunt, ut turpissima fuga ab obsidione discederet. Idem Ezechiam Regem adversus Assyrii Regis Sennacheribi immanes apparatus salvum incolumemque servarunt: Hebræos a Philopatoris Ægyptii furore, & in Machabæorum præliis custodiverunt. Illi Judithæ in castris pudicitiam defenderunt, & vittricem reduxerunt. Quod si recentiorum annalium excutere historias velimus, infinita ex omni gente produci possent divinæ providentiæ exempla, quæ angelorum ministerio in atrocissimis bellis, cum omnia extrema instarent, suos quorum curam habebat, tutata est, & summis periculis eripuit. Sunt & in divina familia, si sacris oraculis sua constat autoritas, qui populis integris præfecti sunt, eorum consiliis ac bellis miscentur, ad præclara facinora impellunt, a vi injusta tuentur, in bello exeuntibus præsto sunt, Heroas in illis quasi cœlo demissos singulari virtute armant, ut felicius pugnent, urbes expugnent, hostes in terrorem conjiciant, fundant, prosternant, & qua arma sua circumferunt, palmas, laureas, victorias reportent. Sed quemadmodum pax una innumeris triumphis potior: ita pacis opera, exercentes Angeli gratiore ministerio de rebus hominum merentur. Svavissima Pacis vox est,

&

& ad illius speciem orbis universus erigitur. Quis non divinos feciales, cum Pacem terris, Salvatore nato, nunciarent, libentius, quam bella horrida bella minitantes, audiret? Quare ut Belli, ita Pacis quoque dispensatores illi sunt, omniaque ea officia mortalibus præstant, quibus pacis tempora celebrari solent. Prodeunt ex illorum ordine, qui Respublicas consiliis regunt, qui animorum ad omnes disciplinas quasi pædagogi, qui ad omnia vitæ munia recte obeunda duces sunt, & quod potissimum est, in iis se rebus magistros nobis præbent, quibus æternam salutem consequamur. Ergo non milites tantum præsidarios in illis, sed & Doctores & Ductores habemus. Sunt enim & virtute contemplativa & operativa ac artibus omnibus perfectissimi. Theologi sunt, qui divina mysteria felicius interpretantur, quia propius atque in Deo ipso intuentur. His doctoribus profecere, qui divina nobis oracula reliquere sanctissimi vates, cum illis secreta habuere colloquia, hi in somno apparuerunt, hi in loca solitaria duxerunt. Quid enim non doceant, qui jam tum a mundi incunabilis non naturalium tantum rerum, sed & divinarum conscii fuere. Cum primum e tenebris prodiret lux, jam tum Dominum Deumque suum laudabant hæc astra matutina, sub ipsam mundi auroram, & nunc in ipsa meridiana luce ac perpetua Dei visione, quo magis ad vesperam suam orbis noster accedit, divinam hanc & Æ-

ternitatis & temporis ἐγκυκλοπαιδείαν absolverunt. Jurisconfulti sunt, in quibus sol justitiæ æternam legem radiis suis depingit, quam & illi annunciant populis. Medici sunt, qui purissimæ naturæ subsidiis uti norunt, cum nos per σοχασμὸν perpetui hariolatores artem illam exerceamus. Hujus specimen in Tobia ostendit Raphaël, cui oculorum ille usum restituit. Nulla est in omni disciplinarum apparatu, qua illi non omnium seculorum doctores vincant. Politici sunt, qui non cœlestis tantum aulæ arcana dispensant, sed & régna hujus orbis moderantur, & in eum finem omnia dirigunt, quem divina providentia intendit. Oratores sunt, qui causas hominum ad DEUM referunt, ejus jussa & mandata exequuntur. Musici sunt, qui perpetuis Deum hymnis celebrant, & in divinas laudes sine ulla cessatione se effundunt. Quare, ô Cives Academici, qui animis excolendis otia vestra impenditis, id operam date, ut mentem vestram paulatim ad eorum similitudinem extolatis, qui fratres aliquando vestri & tribules erunt. Ne spernite eorum monita, cum bonæ vobis cogitationes oboriuntur, cum ad vitiorum sordes nausea excitatur. Illorum enim tacito impulsu hoc accidit. Neque aliter mentes sua cum mentibus sensa communicant. Atque sic non Doctores tantum, sed & ductores habebitis. Videte ut vita casta & pura ad *Angelos*, amore proximi ad *Archangelos*, bene a-

gen-

gendo ad *Virtutes*, triumphis de Diabolo ad *Potestates*, contemptu mundi ad *Principatus*, victoriis carnis ad *Dominationes*, iustitia ad *Thronos*, sapientia ad *Cherubinos*, charitate & amore divino ad *Seraphinos* quam proxime accedatis. Fiet illud, si Deo vos permiseritis, si ejus in vobis impetus non exstinxeritis. Ita olim, cum hic vitæ extremos dies absolveritis, mortali jam contagione liberi, splendido & triumphali vehiculo, quod cœlites, iidemque per vitam vestri satellites, comitari non dedignabuntur, inter suavissimos beatarum mentium applausus, ad beatas illas sedes evolabitis. Valete. P.P. ipso Angelorum festo. Anno clc lxxvii.

39.

Quando hodie in Ecclesia SS. Angelorum memoriam pia mente recolimus, quando eorum erga genus humanum merita prædicamus, in animum vobis revocate, Cives optimi, quod vobis ἀρεγάμα pia proposuerit antiquitas, attempta meditatione expendendum. Ad puero-
rum illa Scholas nos ablegavit, & ad eorum exemplum institueret vitam jubet, ut fiamus tandem ἱσάγγελοι, & dignissimi cœlo cives, cum per novam istam παιδείαν repuerascimus. Audite ipsius Salvatoris nostri oraculum: *Nisi*

conversi fueritis & efficiamini sicut parvuli, non intrabitis regnum cœlorum. Ergo pueros nos esse oportet, qui sumus Reges, potententes, factiosi, nobiles; Pueri erimus, qui vana scientia turgidi in omnes paedagogiam exercemus. Nisi enim pueri fiamus, ad illam Dei civitatem non adolescemus. Ergo id nobis dispiciendum est, ut pueri fiamus, ut purarum mentium iudeis, inter qua ut angeli primas, ita pueri, & pueris similes homines secundas tenent, maturæ imbuamur. Geminis itaque virtutibus nobis opus est, quarum altera intellectum, altera mores respicit, in Philosophorum Schola inauditis, SIMPLICITATE & HUMILITATE. Iis enim quasi characteribus à viris, senibus pueri; ab hominibus beatæ mentes distinguuntur: ut has propiore gradu contingere pueri; à viris & senibus multis distare, parasangis, totoque quasi cœlo disjungi videantur. Illos enim in regnum cœlorum, velut in possessionem suam evocat Salvator: quem admodum parvulis & filiis Israëlitarum, qui boni & mali discrimen ignorabant, minime vero rebellibus & refractariis patribus terram promissionis daturus erat Deus. Ac primum à SIMPLICITATE ordiamur, quæ ut plus fidei, ita plus scientiæ habet; ut illa τὸ δοκῆσαι σοφῶν sapientia plus stultitiæ & ignorantia. Pendet à Parentum, à Magistrorum ore credula, Pueritia, & fidum præceptorem nacta, simplici fide plus proficit, quam argutis disputationi-

cu-

culis magni Doctores. Qui etsi Angelicorum, Irrefragabilium, Invincibilium, Lynceorum titulis superbiunt, aut in venerando septemvirum, Græciæ sapientum, Senatu primas tenent, vel à pueris vitæ præcepta capient: ut illis quasi in disciplinam discipulos suos Salvator tradidit, quos magnos Ecclesia postea Doctores vidit. Qui se Deo Doctori permittit, eadem simplicitatis via ab opinantium turba, secedit. Nam ut non nemo è sacris Scriptoris ait: *Nihil egentius ista mente, quæ de Deo extra Deum Philosophatur*, ita in omni sapientiæ genere sine divina luce nil sapimus. Quis enim divina opera rectius cognoscet, quam qui ab ipso opifice ducetur? Cum alii vix oculis suis credunt, cum anxia & sollicita collatione verum tot ratiociniis indagare laborant: illi qui ita sunt animati, una sola cogitatione plura comprehendunt. Non vident oculis, non audiunt auribus, sed intelligentiis similes, solam operationi suæ mentem permittunt, & quoddam sibi infusum lumen incredibili voluptate persentiscunt; cum alii per tenebras ac umbras rerum, otiosi speculatores, circumducuntur. Non Aquilæ sed Columbæ alas sibi poscebat David, quibus ad rerum, cœlestium cognitionem evolaret, ac mentem tranquillaret: *Quis dabit mihi pennas, ut columbe, & volabo & requiescam?* cum mentis potius simplicitate, quam oculorum acie; morum innocentia, quam doctrinæ profundi-

di-

tate ; animi puritate , quam pennarum agilitate , ad illius sapientiæ sublimitatem se perventurum speraret. Ad quem locum apposite Ambrosius : *Intelligebat enim , quod altiora facilius penetrantur simplicitate mentis , quam levitate pennarum.* Ab hac simplicitate cum Viri , Doctores , Sapientes discedimus , fieri plerumque solet , ut cum literatis intra verba nobis subsistat , non in rem præsentem veniat sapientia , & quemadmodum , dicente Plutarcho , *apud Athenienses essent verba Philosophia , apud Lacones ipsa res ;* ita a doctis fugiat , apud idiotas habitet virtus & veritas. Videmus qui ad ravim usque de bonis moribus declamant , & ipsi perpetua vivunt Bacchanalia. Orbem Terrarum in circulos , climata , regna , flumina dipefcimus , neque quo loco animus nobis situs sit , ac ubi ille vivat , inquirimus. Omnium populorum mores , Rerum publicarum formas , populorum ingenia indagamus Politici ; & quid in sensum nostrorum Republica fiat , quæ illic bella , plusquam civilia nobis surgant , quam a nobis ipsis dissideamus , non animadvertimus. Hæc cum fieri quotidie videamus , quis non cum Augustino exclamet ! *Surgunt indocti : addimus nos Pueri : & rapiunt regnum Dei , & nos cum nostris literis ecce quomodo in carne & sanguine volutamus !* Sed tamen nec indocti illi sunt , nec pueri ; sed veri Philosophi & plusquam Viri. Verissimum enim est , quod Erasmus præfat : in paraphrasin Matthæi dicit : *Sepe numero qui mun-*
do

do contemptissimi sunt, apud Christum summo in pretio sunt: Et quos mundus habet pro doctissimis, Christo sunt Idiota. Ita scilicet res mortalium comparatae sunt. Geminæ nobis pestes animum occuparunt, quarum ille veneno infectus suos & in hac vita & post fata manes patitur: Ambitio & ignorantia. Quæ cum inter se conspirant, omnem in nobis pietatis & sapientiæ non dicam perfectionem evertunt, sed ipsa semina evellunt, igniculos extinguunt. Simulac enim ambitio ac superbia animo virus suum afflavit, statim ille nebulis obsidetur, statim illa cæcitas mentis oculo suffunditur, & velut Cæcias aliorum vitiorum nubem attrahit. Ex illo morbo ortam Philosophiæ suæ Imperfectionem, cum deprehendere fatis potuissent Gentilium Philosophi, unde illi cristas erigunt, quid habent quo gloriantur? Nam si defectus & errores suos notassent, moderatius de se rebusque suis sentire potuissent. Quare Ille Regum sapientissimus Salomon eo tandem devenit, ut hanc sapientiam stultitiam esse agnosceret, qui & ipse imperfectionem suam, *quod neque prudentiam neque sanctitatem habeat*, non dissimulat, sed pleno ore fatetur. Secundas a SIMPLICITATE HUMILITAS tenet, sed quæ simplicitati quasi innexa eam vel consequitur vel antecedit. Nullos ejus virtutis characteres norunt, nulla ejus lineamenta ducunt, qui in Gentium Scholis morum Philosophiam professi sunt. Cum enim principium ejus non cognosce-

scerent, prave omnino de ea sentire debuerunt. Inter animi enim ignavi & degeneris notas reponunt. Quare vel e solo humilitatis contemptu iudices, nullum illos vel sensum habuisse ejus felicitatis, qua fruimur Christiani. Imo vero illa ipsa animi magnitudo & sublimitas est, illa μεγαλοψυχία: quam ipsi, sed suam, e vanissimarum rerum specie ortam, extollunt; nos nostro sensu, sub humilitatis schemate, omnium aliarum virtutum matrem deprehendimus. Quæ cum oriatur e contemplatione, infinitæ magnitudinis, amoris, bonitatis, quæ in Deo est, & nostræ imperfectionis consideratione: animus quasi in se ipsum conversus, ita se divino permittit arbitrio, ut omnia humana contemnens in summo hoc bono suo unice quiescat. Illa Humilitas cum non prosterнат animos nostros, sed ultra omnem gloriæ humanæ apicem erigat, & divinæ luci immergat, quilibet videt sub humilitate ista veram animi magnitudinem recondi: qui tum demum vere jacet, si ex hoc quasi cælo suo deturbatus, turbine rerum humanarum, perpetuæ quasi mortis obnoxius, circumagitur. Illa virtus est, quæ in nobis divini spiritus igniculos conservat, iisque perpetuum fomitem subministrat, ne superbix ac ambitionis fermento mens infecta obtundatur, & e potestate Dei suaque exiens malignis geniis furiisque in prædam cedat. Ac sane quemadmodum tota Christianorum religio cum Autore suo ab humilitate ori-
ge-

genem habet, definit in gloriam: ita & vita nostrum omnium, qui sequi hunc ducem nostrum debemus, per humilitatis exilem viam irrepens, ad cœlestis gloriæ fastigium contendit. Ipse maximus Magister suo vos exemplo invitat: *Discite ex me: sum enim humilis corde.* Quibus verbis tota illa doctrina cœlestis continetur. Ille qui cœlum & terram fecerat, ille qui tot ediderat miracula, voluntaria sua humilitate nostram provocare humilitatem, nostram augere gloriam voluit. Ille in quo omnes thesauri sapientiæ reconditi erant, nil nisi humilitatem ex iis nobis commendat. Huic sceptrum sua submittant Reges & Principes. Nam & in toga purpuraque splendet humilitas: sæpe sub fordido pallio fastus regnat: credamus nos servos inutiles, etiam cum magna facimus. Nihil in nobis sine Deo magnum est, ac si quid excelsi jactamus, inertiam ac ignaviam sub illius specie abscondimus. Quem nos fortunæ cursum interpretamur, fuga est: cum extolli nos putamus, in præcipitia detrudimur. Quem animo nostro rigorem obducimus, ille ab affectuum afflatu est. In bella & pericula ruimus? non animi hæc in nobis magnitudo, sed imbecillitas est, qui nostris non contenti aliena invadimus, aut licentiæ amore & spe prædæ ac honoris ad extrema etiam pericula subeunda, impellimur. Alexander tot laureis & rebus gestis magnus annon suæ infirmitati succubuit? Qui generosum illum & omnis potentie con-

tem-

temptorem spiritum ejecit Cato, annon affectibus se suis minorem fassus est, cum hostis fere imperium non posset, quod ferre pueri mulierculæque omnes poterant. Nihil in homine tam sublime videtur, quin defectum aliquem celet: nulla tanta animi magnitudo, quin parvitas & pravitas aliqua pelluceat. Ipsa sæpe humilitatis specie etiam qui sancti videri volunt, ad superbiam tegendam abutuntur. Quo turpius esse nihil potest, cum in fraudes divina virtus convertitur. Non Tiberianæ tantum aulæ, sed & sacro interdum ordini suus Accisimus est, cum spernuntur laudes, ut eo majores reportentur: cum rejiciuntur minores tituli, ut ambitio eo securius ad omnes dignitatis gradus procedat, ubi humilitatis larva detracta immane supercilium apparebit. Quebatur de eo Ecclesiastes: *Est qui nequiter se humilitat, & interiora ejus plena sunt dolo.* Cavere ab illis jubet Apostolus in epist. ad Coloss. c. 2. v. 18. ubi esse ait, qui sibi placeant in ficta humilitate. Antiquissimum Ambitio vitium est, & cum ipsis mundi natalibus ortum, quæ Angelos in infernum detruxit; hominem Paradiso ejecit. Illi ad spectu divino non contenti ad potentiæ gloriæque fastigium adspirabant; hic ad Dei similitudinem accedere voluit. Nunquam vero forcius est, quam cum humilitate absconditur, bonisque mentibus insidias struit. Apage omnes ab humilitate dolos! exuamus illos sensus nostros, primos nostros in hoc

or-

orbe impostores! comprimamus qui in nobis
 surgunt spiritus! compeſcamus illum noſtri
 amorem, ut in Deum humillima mente fera-
 mur. *Humiliemur Deo*, (quod Eccleſiaſtæ ora-
 culum eſt) *& exſpectemus manus ejus*. Sacrifica-
 vit ſe Chriſtus Patri: Nos ipſi imitationis offi-
 cium ſacrificemus, & eam quam a ſe diſci hu-
 militatem volebat, vita ipſa piisque moribus
 exprimamus. Quod ſi Tullio iudice: *Nos e-
 rigimur, elatiores fieri videmur, humana deſpicimus,
 cogitantesq; ſupera ac cœleſtia, hæc noſtra ut exigua &
 minuta contemnimus*: quanto magis ad Deum
 converſamens ejus amore tota exardeſcat, &
 ultra omnia humana efferatur? Quæ vera in
 humilitate Magnanimitas eſt, vosque vel in
 hac vita cœli cives efficit, & beatarum menti-
 um confortio jungit. Diſcite in hac vita ex
 humilitatis magiſtro veram humilitatem: at-
 que ita diſcite, ut non in ore ac verbis, ſed in
 pectore ipſo vobis habitet: & idem olim Do-
 minus gloriæ internæ vos gloriæ poſſeſſionem
 evocabit. Valete P.P. Kiloni. Ipſo SS. Ange-
 lorum feſto Anni clb lbc LXXXVIII.

40.

Nondum, ut putamus, memoria vobis
 excidit, Cives Optimi: nunquam
 enim excidere illa debent: quanta a-
 nimi omnium formidine oppreſſi,
 2 T cum

cum intra spem metumque suspensi, nupero Vere, illam rerum, quæ tum agebantur, catastrophen expectaremus. Nuncupavimus tum in ipso Spiritus S. festo vota, precesque ad illum fudimus, ut ab omni armorum furore, nos nostraque omnia tueretur, ac pacis suæ dono bearet, vosque, ut idem faceretis, publica oratione excitavimus. Facile enim intelligebatis, quæ rerum futura facies fuisset, quæ agris vastitas, urbibus pernicies, nostro illi Musæarum domicilio calamitas inducta fuisset, si ad bella horrida, bella, quæ jam tum animo multo versabant, in publica miseria triumphos acturi, ventum fuisset. Nos tamen, ut ipsi fuimus, ita semper bono vos esse animo iussimus, & cum tanti undique terrores circumstarent, cum variis rumoribus animi hominum fluctuarent, nunquam tamen spem pacis deposuimus. Ac sane propiores periculo fuimus, quam ipsi putavimus, Imminebant jam tum capitibus nostris spissæ nubes, fulmina in caput nostrum excussuræ. Movebantur ex utraque parte copiæ, & numero & robore firmissimæ, acerrima utrinque animorum contentio flammam fumo proximam minabatur, in extrema regula atque adeo in præcipitio stare omnia visa sunt: cum non, ut in fabula, Deus è machina interveniret; sed ipse Spiritus divinus animos eo inclinaret, ut pacem præ bello amplecterentur. Quod ergo nuper vobis εὐαγγέλιον magna futurorum spe promissimus,

id

id alta nunc voce proclamamus: PACEM terris nostris divino munere redditam. Nam, quanquam ea dudum omnium sermonibus fama celebrata est, adeo tamen pulcherrimum illud Pacis nomen, tot votis expetitæ, tot precibus expugnata, amabile nobis visum est, ut etiamnum aures circumsonare nostras ipse, plaudentium vocibus aër fervere, animus denique noster illo saturari non posse videatur. Adeo nullum nobis serum pietatis officium est, in illo munere, cuius perpetuos, non nobis solum, sed & posteris fructus speramus. Quare supplicatum nunc eamus divino Spiritui, ut nobis ille proprium hoc Pacis bonum solidumque esse gaudium velit: erit autem, si reddito nobis Serenissimo Principe, ille in plenam terrarum suarum, nos in plenam Pacis possessionem mittamur. Utinam vero vel hoc Autumno dies illucescat illa, quæ ferenos ejus vultus nobis ostendat non solum, sed & in avitas sedes agrosque, non hospitem amplius, sed Dominum reducat, nosque omnes fortunæ ejus compotes faciat. Sic lætior erit illa auctumni, quam erat Veris tristissima facies, ut mutato fortunæ vultu, pulchriore Auctumnum hunc, quam vernum tempus Maro, ornare elogio possimus:

Omnia nunc rident, nunc formosissimus annus.

Sic fiet, ut & nostris ille amplexibus sistatur, & nos cum eo Pacem, cuius signum adhuc ostentavimus, non nudam ac inanem, sed illo bea-

tæ ubertatis cornu decoram gravidamque amplexemur. Sic fiet, ut quæ absente jam iterum per septennium Domino, Patria totidem strigosa Pharaonis pecora repræsentavit, illo reddito, latiore vultu niteat, ac opimior specie vetus illa macies absorbeatur. Neque erunt, nunc amplius, qui cum Virgiliano illo Menalca querantur,

Quod succus pecori, quod lac subducitur agnis,
ubi magnus noster sua per ovilia Daphnis, qui & oves, oviumque magistros curat, regnaverit. Fruamur ergo, o Cives, non tanquam horum aliquo fœtu, sed perenni & æterno Pacis bono, Pacis omnes alumni, togati, & si qua nostra est, vel sacram vel togatam militiam, sed incruentam illam, sed innoxiam, omnibus armis & triumphis potiore, professi. Quod si enim bella nobis arriserint, habemus, cum quibus manum conferamus, hostes, ignorantiam, barbariem, affectus pravos, malos mores, Dæmonem, Draconem illum veteratorem, omnesque e viperea illa ac serpentina familia sodales, quorum vindici & triumphatori MICHAELI diem hunc festum celebramus. Hoc Duce & olim in Civitate Dei pugnatum, & nunc quoque omnibus armis, telis, machinis, & eo quidem fortius pugnandum est, quo majoribus in nos copiis Draco ille antiquus insurgit. Varium enim multiplexque serpentum genus est. Ipsi, quot vitiorum fermenta in nobis sunt, tot in sinu angves fovemus. Jam pridem enim
sunt,

sunt, qui omnia in nobis vermiculis obsideri
ajunt. Est viperarum progenies, quæ ex in-
sidiis venena spargit, quæ osculis lædit, ac sub
pacis & amoris blanditiis vulnera figit. Sunt
quæ per soporis speciem occidunt Aspides,
sunt quæ perpetuam opum, libidinum, hono-
rum sitim incutiunt Dipsades. Sunt, quæ du-
plici in collo & in cauda capite præditæ Am-
phisbænæ duabus viis ingrediuntur. Sunt qui
visu ipso interficiunt, qui ipsum aërem vene-
no inficiunt Basilisci. Sunt quibus post abscis-
sa capita, nova repullulant, Hydræ, non nisi
a Christiano aliquo Hercule domandæ. Sunt
qui non nisi devoratis aliis serpentibus fiunt,
Dracones, Tyranni, qui non piorum tantum
hominum, sed & sui similibus sanguine pasti
in formidabilem corporis molem excreverint.
Quorum imaginem graphice nobis in Apocaly-
psi sua S. Johannis depinxit. Vocandus in hac
pugna in subsidium est perpetuus ille Draconis
Triumphator, MICHAEL, & quæ e cœlesti ex-
ercitu pro nobis excubias agunt, divinæ Men-
tes, ut non tantum adversus aspides & viperas,
sed & adversus ipsum, qui cæterorum omnium
familiam ducit, Draconem, quique ejus in his
terris imaginem repræsentant, Gigantes & Cy-
clopas triumphemus. Jam tot annis propitium
Dei populo MICHAELEM sensimus, illum
cœlestis militiæ Archistrategum, cujus potente
præsidio adversus barbarorum hostium insul-
tus non tantum defensi sumus, sed & splendi-

diffimos ab illis triumphos reportavimus. Semper messes nostræ, semper vindemiæ segetem ac materiam victoriarum nobis dederunt: semper fuit, quare in hoc Angelorum festo immortalis Numini gratias immortales ageremus. Quis nescit quot quantæque petitiones in Ecclesiam puriora sacra professam conjectæ fuerint? ut vitari non posse viderentur. Necebantur undique doli: vita multorum etiam principum, ferro atque insidiis appetita: pulsi in exilium, ad carceres & catastas damnati Antistites: conspirationes potentissimorum, Principum in purioris Religionis excidium, in hominum innocentum capita institutæ, ut jam in præcipitio omnia starent & ruinæ proxima essent: cum subito tot machinationibus tanta vafricie comparatis, divina providentia intercessit, ipsisque hostium faucibus eos eripuit, quos jam spe devoraverant, & ad cædem, exilia, cruces, rapinas oculis animisque designaverant. Quam atroci furore in Germaniæ nostræ viscera, ab hoste primatum Christiani nominis jactante, sævitum sit, tot urbium, oppidorum imo populorum excidia, inaudita inter Christianos imo ipsos quoque Barbaros barbarie suscepta, loquuntur. Pugnavit tamen & hic a nostris partibus sanctissimus MICHAEL, quique Christiani nominis juratos hostes non retudit tantum, sed pene evertit, etiam eorum rabiem, qui illorum ruinas suo robore fulciunt, a cervicibus nostris avertet, & nuper adeo me-

mo-

morabili Moguntia expugnatione, quasi quodam præludio victoriarum cursum ingressus est. Hunc quoque, o Cives, rebus nostris præfidem ac defensores exoremus, ut ille valida manu nos porro tueatur, proque pace & salutē nostra acerrime propugnet. Venerentur Herculem suum ἀλεξίκακον Gentiles: Vos hunc malorum propulsatorem veneramini, atque ita, eo Duce & auspice, adversus omne, vipereum genus, etiam illud, quod in sinu & visceribus vestris nidulatur, pugnate, ut cum MICHAEL, omni que piarum mentium exercitu, æternos aliquando triumphos agatis. P. P. Kilonl. ipso SS. Angelorum festo Anno clō lōc LXXXIX.

41.

Qui moralis doctrinæ scholis innutriti estis, Cives Academici, optimè meministis, disquiri hic solere: An idonei ejus auditores Juvenes sint habendi: & tantum abest, ut secundum illos sententiam dixerit summus ille è Peripato Doctor, ut hinc omnino removendos judicaret. Nam cum illa ætate sint constituti, quæ vitæ suæ modum habere nesciat, quæ cupiditatibus in transversum rapiatur, furdus ille fabulas minime narrandas existimavit: nisi forte, quod paucissimis contingit, senili prudentia juven-

tutis annos præverterint. Verum novum, plane & inauditum vulgaribus Scholis ἀκρόαμα hodie vobis è divinæ sapientiæ arcanis Salvator noster proponit. Ille enim cœlestis Sapientiæ Candidatos non Juvenes, non Senes, sed pueros requirit: adeo ut ipsos repuerascere Senes jubeat, si quidem ad regnum cœlorum aditum sibi interclusum nolint. Redeundum ergo nobis vobisque, o juvenes, in pueritiam est, non Medæ artibus, ut in fabulis est, recoctis; sed divini Spiritus ope, origini nostræ redditis: qui nos in innocentem illam pueritiam reducat, & nova generatione refingat. Multa antiqui Hebræorum sapientes de animarum ἀνακυκλώσει commenti sunt: Nam eorum, qui ex hac vita criminum sordibus contaminati discesserint, animas cœlo recipi negabant; nisi ad nova corpora postliminio reversæ omnes illas maculas & priscae vestigia fraudis sanctiore vita piisque moribus absterferint. Neque vel e Christianis nostro tempore defuere, qui revocare hanc doctrinam novisque inducere coloribus conati sunt. Sed quoniam, ut proverbio dicitur, sera mortuorum medicina est, frustra a futuris seculis exspectatur salus, quam nunc viventes oblatam aspernamur. Nobis quoque, sed meliore sensu, hoc dictum putemus:

sera nimis vita est crastina: vive hodie:

Vive hoc seculo, hoc anno, vive hodie, atque in pueritiam & ad mores vitamque sanctiorem

re-

revertere. Hæc enim vera illa ἀνακύνλωσις est, quam hodie Salvator noster nos docuit, ut ad ortum nostrum & illam pristinæ aureæq; simplicitatis ætatem, in ipso hoc temporum nostrorum cursu, revolvamur. Quare, si sapere velimus, PUERILIS illa in DIVINIS SAPIENTIA, doctore DEO nobis amplectenda est, ut sana de rebus divinis intelligentia veraque pietate mature imbuamur. Ex utraque enim vera Christiani hominis lieneamenta ducenda sunt. Ac primum quidem puerilis illa sapientia præcipue in divinis inepta ridiculaque videatur illis, qui Giganteo spiritu omnium divinarum humanarumque rerum scientiam se complexos gloriantur. Verum hos, quicumque demum illi Aretalogi & θροῦρες sint, vel cum Phrygibus sero sapere, vel nequidem ultra pueros sapere, & ad eorum scholas ablegandos existimamus. Sunt è Philosophis Virisque doctis, neque fane reprehendendi, qui pueros sibi ac naturæ suæ relictos, nondum Sophistarum opinionibus imbutos, plus in rerum naturalium principiis sapere, quam magnos Doctores arbitrantur. Videmus non exigua sæpe voluptate, quas illi de rebus ideas sibi forment, quas animis notiones imprimant: has enim quasi ἐννοίας & περιλήψεις, æternæ lucis scintillas, secum circumferunt; quæ progressu ætatis opinionum ignibus faturis, & quibusdam quasi præstigiis obnubilantur. Suæ sunt scilicet omnibus scientiis & ar-

tibus præstigiæ, in quibus hærent *μετέωρα* ingenia, quibus sibi aliisque imponunt, nubem pro Junone amplexa; & bona fide fraudes, quibus decipiuntur, in alios transmittunt. In divinis eo magis puerilis illa Sapiencia laudanda est, quò minus illa sibi sapit, sed DEO, Patri suo, adhærens, ejusque nutus observans, à via illa divina & regia ne latum quidem ungvem sibi discedendum arbitratur. Pendet ab ore Magistri sui puer discipulus, à DEI Parentis præceptis & mandatis Puer Christianus, atque illis limitibus omnem suam sapientiam circumscribit. Quæ extra illam orbitam fertur, contrario motu incedit, & quasi è centro suo dejecta errorum vorticibus circumducitur. Quare inter Puerilis hujus Sapientiae characteres referendum è monito Apostoli est: *Non plus sapere, quam oportet, & quod alio loco ille inculcat, ne prudentes simus apud nosmetipsos.* Modice itaque primum sapere, nostram deinde abjicere sapientiam jubemur. Ut in humanis & naturalibus quædam sciendi intemperies est, qua nos aliosque inutiliter fatigamus; ita in divinis sciendi intemperies cum periculo summo conjuncta est, quibus si nos lucem inferre nostram conamur, nebularum vertigine excæcamur, aut ingenii alas, quemadmodum pyraustæ, temerario ad lucem hanc accessu comburimus. Illa vera, illa puerilis in divinis Sapiencia est, quæ se DEO & luci divinæ ejusque arbitrio totam permittit. Hic

omnis illa mentis nostræ sagacitas abjicienda, omne animi lumen in accessu ipso exuendum est, ne quicquam nobis tanquam à nobis sapere velimus. Magnus ille animi morbus est, quo ultra quam par est cœlestem sapientiam *δαννσις* *Φοι* venamur: qui totum humanum genus à primis Parentibus funesta contagione infecit. Quam primum enim illi, serpentinis suggestionibus aurem commodantes, DEO pares sapientia fieri cupiebant, ab isto puerilis sapientiæ fastigio in errorem, miseriarum, tenebrarumque abyssum dejecti sunt, ut & vero rerum naturalium sensu orbarentur. Quemadmodum in Parentis sui familia vivit, Puer filius, ut jussa ejus observet, ad quosvis ejus nutus paratus, ut omnibus obsequiis amore ejus conservet, & ne vultu quidem offendant, domestica administratione securus; ita in divino amore nobis subsistendum, in divina voluntate nobis acquiescendum est, cæteraque, quæ ille voluit nobis esse abscondita, ad nos non pertinere arbitremur: ne vel providentiæ divinæ obniti, aut illam curiosiore, quam fas est, oculo rimari videamur. Si qui sunt ad intima consilia admissi Prophetæ, Apostoli, illis hanc prærogativam ne invideamus, neque pari cum illis loco esse contendamus; neque has nobis partes infano ausu rapiamus. Quare cum secreta cum DEO colloquia, oracula, futurorum prænotationem, visiones, genitorum commercia venantur nonnulli & jactant,

tant, in inextricabiles labyrinthos se ipsos im-
 mergunt, & spiritu vertiginis ducti à via λεω-
 Φόρων ad præcipitia & horrida tesqua infatuatos
 animos abducunt. Nam ut Sabini quod vó-
 lunt somniant, ita nihil tam stultum est, in quo
 non illi delirent, postquam sua semel sapien-
 tia niti, eamque divinorum oraculorum pig-
 mentis incrustare cœperunt. Malimus ergo,
 Juvenes, pueriliter sapere, quam κερνοληρεῖν:
 contenti simus hac παιδαγωγῶδη sapientiâ, quæ
 illud αὐτὸς ἔφα sibi perpetuo præfixum habet.
 Nam ut in pueris balbuties & intellectus imbe-
 cillitas grata Parentibus esse solet, suspecta
 autem, quæ ætatem illam anteverterit, inge-
 nii maturitas? ita vel DEO ipsi puerilis illa sa-
 pientia, etiam, cum multum insipientiæ, sed
 innoxia, admistum habet, non displicebit. Si
 cogitationes nostræ ad illum intelligentiæ di-
 vinae fundum non pertingant, pueros nos esse
 meminerimus, qui puerili vagoque impetu
 feramur, inque superficie rerum hæreamus:
 & puerili errori venia promptior futura est. Le-
 via sunt, quæ pueri metuunt, graviorum pe-
 riculorum nullus illis sensus est, rerum frivo-
 larum jactura cruciantur, pretiosas nihili æ-
 stimant, semper tamen ἐυέλπιδες sola spe
 animum sustentant, & Parentum amorem
 bona voluntate lucrantur: cum æqualibus ve-
 ro ita vivunt, ut nemini graves sint, mutu-
 oque se amore prosequantur. Quare & pie-
 tatis hanc regulam è puerili hac Sapiencia, Ju-
 ve-

venes, Viri, Senes nobis præscriptam censeamus, ut DEO fidem, obsequium, amorem, præstemus; omnes omnibus pietatis humanitatisque officiis nobis devinciamus. Et senes quidem præcipue, quo magis illa veteris Adami nequitia in nobis inveteravit & insedit, ut, qui temporis acti laudatores esse solemus, novas e futuri temporis pueritia spes inchoemus. Fuere inter Judæos, qui Senes eorum puerorum halitu, qui legis discendæ causa ludum frequentant, mundos conservari crediderunt, quod purior ille esset: mundi erunt Senes, qui puerili spiritu ducti, huic se sapientiæ etiam in extrema senectute totos dicaverint. Quemadmodum enim non qui multum jactatus est, multum navigavit: ita non semper diu vixit, qui diu fuit, multosque menses, annosque vacuos habuit, & ut Rex Psaltes ait, *in circuitu cum impiis ambulavit*. Nunc ergo e tot annorum sepulchro eo facilius in novam pueritiæ vitam redeant Senes, quo minus vitæ transegerunt: qui dulci fortuna ebrii, vel nullam, vel tumultuariam inter crapulæ dolores vitam duxerunt. Illic veteris Adami exuviæ in tumulto relinquuntur: hic puer Christianus, id est novus Homo, reviviscat, seque DEO Magistro in disciplinam tradat. Vos vero, o Juvenes, qui a pueritia propius abestis, in qua bonæ illa mentis aurora nitidior elucet, nondum nebulis, quæ per totum vitæ diem ex illo voluptatum & cupiditatum æstu colliguntur, obfessa, brevior ad

ad puerilem hanc sapientiam via regredi potestis. Date operam, ne inter filios Agarprehendimini: qui, ut est apud Baruchum Prophetam, *exquirunt prudentiam, quæ de terra est, viam autem sapientiæ nesciverunt.* Nihil terrenæ huic prudentiæ cum divina sapientia commercii est, quæ quoties divinæ se ingerit, eam turpimangonio adulteratam relinquit. Non novit illam puerilis, quæ simplicitatem amat, Sapientia. Qua qui ducitur, nulla ne quidem ambitione pietatis, nullo scientiæ & sanctitatis fastu laborat, nullos a piorum cœtu secessus molitur, nulla sibi regna cum Apostolis de primatu litigantibus promittit, omnes Pharisaismi colores toto animo detestatur, sed sibi Deoque vivens mortalis vitæ annos in perpetua animi tranquillitate absolvit. Quod si & vos, o Juvenes, feceritis, eritis & vos in Ecclesiæ & Reipublicæ viridariis non Platani, quæ umbras tantum inani foliorum pompa spargant, aut luminibus obsistant, sed arbores fructiferæ, quæ niala aurea ferant, unde sua feri nepotes poma decerpant. Valete & vitam puerili sapientia angelis similem, quorum hodie festum celebramus, his in terris agite, ut olim iis sociati perpetuos una cum illis triumphos agatis. PP. Kiloni, ipso SS. Angelorum festo Ann. clc lxc XC.



AD HONORATIONUM EXEQUIAS INVITAMUS.

42.

EX quo primum Sapientiæ sacrarium hoc in loco erigi cæpit, Cives Academici, vel primo hoc triennio exemplis nostris docuimus, quam conjungi cum Sapientiæ studio debeat, imo quam nihil aliud sit, ipsa Philosophia, quam mortis meditatio, qua omnis humanæ scientiæ orbis Platoni continebatur. Vix menses aliquot nascenti Academiæ effluxerant, cum primus inter Philosophiæ Professores obitu suo signum sustulit, quem subsequuti hinc tres bonarum artium Studiosi, & nunc eximius earum Magister, in tantum laudandus juvenis, in quantum pietas & doctrina intelligi possunt, quem hodie non sine magno dolore nostro componimus. Quod quamvis inusitatum videri quodammodo queat, intra exiguum hoc temporis spatium tot florentissima, in ætate juvenum spes præmaturo fato intercipi; quamvis tot Parentum & nostra everti votaluctuosum sit: ex usu tamen nostro sunt, luculenta illa exempla, monentque quam sæpe in summo juventutis decore

*Surgat amarum aliquid, quod in ipsis floribus
angat.*

Habemus nunc ipsos Discipulos nostros Doctores mortalitatis, & qui effertur hodie liberarum artium Magister unam illam & summe, necessariam moriendi artem, ut habuit semper ætate superius ingenium, mature admodum ipsa in juventute addidicit, ut ipsos capulares senes hac in schola ἀναλφάβητες e tumultu suo erudire videatur. Ita scilicet res se habent nostræ, o Cives, quod nunc & illo & nobis monitoribus discite: non nisi per mortes meras vita sapientis ducitur; nec aliter salva est sapientia, nisi qui in nobis vivit animus subducere se sensim corpori & sensibus advescat, ut demum, quæ vera vel in hac mortalitate vita est, supremæ menti jungatur. Nunquam ergo Viro Sapienti mors gravis esse potest, qui quotidie moritur & dulcissimam illam quietem & vitam, quam jam tum in ipso hoc corporis ergastulo ab eo sejunctus persentit, non cum morte commutat sed continuat, sine ullo vel mortis vel doloris sensu, quem dudum pedibus conculcavit. Enimvero, si quid recte sentimus, manu sua illuc ducunt omnes Philosophorum Scholæ, quæ in scientiis semper animum ab inferioribus illis ablaetare quasi & abducere ad ideas rerum supra omnem materiæ contagionem positas jubent. Cum orbem hunc a cælo ad terram percontamur, veritatem inter alterna Philosophorum & naturæ jurgia investiga-

tu-

turi, in puteo, ubi latitare illam ajebat Democritus, vel in sepulchris potius, quæ inhabitare is solebat, inveniemus. Cum filet Pythagoras, silentio suo morti suæ præludit, in animum suum, ad se ipsum, & ad numen suum secedens. Cum oculos excæcat Democritus, lucem hanc sibi invisam fatetur, quæ impedit, quominus ad αἰὼν ἡμετέραν illa erigatur eorumque imagines mentis oculis repræsentet. Cum in exilium abit Anaxagoras, non ab hominibus tantum & e patria urbe, vivorum, ut ajebat, sepulchro, sed & a se ipso abiit, ut ad mentem suam rediret. Ipsa ista Gymnosophistarum nuditas, non nisi terram, qua obtegeretur poscere visa est. Ipsa sapientum macies & contractus e studiis pallor docet, quam parum a cadavere distent, totaque vita moriantur. Quæcunque hic vel in utramque partem differimus, vel tricubitalibus illis commentariis operose inculcamus invitis etiam nobis istam moriendi necessitatem ingerunt, & quibusdam quasi signis ob oculos sistunt. Quanta hic contentione disputant multi, quid simus homines: aliqui etiam, an simus: nec, dum de eo cogitant, jam se fuisse cogitant? Quam belle etiam de duratione philosophemur, omnes tamen nostros conatus temporis antevertit vertigo, nec intelligimus miseri, cum præsentia semper exspirent momenta, nihil nobis esse morte præsentius, nosq; ad futuram illam vitam ipsis promovenibus fatis quasi pro-

pelli. Scilicet, quemadmodum studiorum; ita
 & vitæ ac fortunæ in Orbe hoc perpetua est ἐγ-
 κυκλοπαίδεια, qua in orbem semper acti ludos
 quosdam quasi circenses agimus: quotque hic
 nobis soles occidunt, quot anni quot horæ per-
 eunt, tot mortes vel ipsi obimus vel alios obire
 videmus. Qui quod perpetuam istam intra
 se moriendi legem non capiunt, obefioris
 sunt animi, quam ut aliquo vitæ sensu adfici-
 antur. Dum enim vel in Voluptatum orche-
 stra saltant, vel in allartis pelæstra pugnant, vel
 Fortunæ Sphæristerio ut pilæ jactantur, tem-
 pus illis non advertentibus elabitur, & vita
 perit, antequam se vivere intelligant. Alii
 Argivo illi apud Horatium similes videntur,
 qui ipsi sibi theatra & ludos scenicos gratissima,
 fingeat infania, qua adeo sibi placuit, ut ne
 grâcias quidem egerit cognatis, qui hoc ei
 mentem errore liberaverant. Longe aberat
 à perverso hoc hominum genere, & pessimos
 abs se mores detestabatur ὁ μακαρίτης noster,
 qui prudentum calculonum instar ita de vita
 ineunda, ab ineunte ætate, rationes subduxit,
 ut semper ad exitum ejus sollicite respectaret.
 Quare operæ pretium facturi sumus, si pul-
 cherrimæ exemplum virtutis ab origine sua
 ad tumulos usque deductum ob oculos vobis
 ponamus. Patrem habuit JACOBUM: Avum,
 DANIELEM, HEIDEROS: utrumque JCtum
 celeberrimum & Syndicum Civitatis Imperialis Lin-
 davi, quo in loco primum ducere spiritum cæpit No-
 ster, Anno seculi hujus supra quadagesimum quinto:

*Viros ob præclara in Remp. merita ab omnibus adama-
tos, variis ad diversos Imperii Principes & ad ipsos
Augustissimos Cæsares, FERDINANDUM II &
III legationibus defunctos, à quibus quos retulerunt
honores & titulos amplissimos, in meritorum suorum
solatium & clementiæ Imperatoriæ testimonium sibi
solis servare, quam in vana ambitionis fomentum ja-
ctare maluerunt. Mater illi fuit magnis ornata vir-
tutibus Matrona SABINA, JOHANNIS DOR-
NI, benè meriti apud Campiodunenses Consulis fi-
lia: Avia Materna ELISABETA è nobilissima
FUNCKIORUM à SENFTENOW familia ori-
unda, ut cætera præclara utique & nobilissima nomi-
na silentio prætereamus. E laudatissima hac stirpe
Noster ille genitus ab ipsa statim pueritia istos bonæ
mentis igniculos exeruit. Academiam Jenensem
XVII ætatis anno accessit, ubi à celeberrimi Theolo-
giæ Professoris NIEMANNI cæterorumque fidelis-
sima institutione solida jecit in linguarum & Philo-
sophiæ studio fundamenta, ut jam tum Magnificus
Reip. Lubecensis Consul DAVID GLOXINIUS
Jctus Celeberrimus, & HENRICUS SCHAB-
BELIUS Consul itideum Wisuariensium Amplissi-
mus, alumnorum Schabbelianorum Patroni, dignum
censerent, cui insigne illud stipendii beneficium confer-
rent. Quod cum quam optime illi collocatum vide-
rent, eum cæterorum etiam inspectorem constituerunt.
De cætero non facile quisquam igneam illam ingenii
vim, ferventissimum in literarum studia amorem ex-
presserit; quas ille tam in Gissensi quam in hac no-
stra Academia pulcherrimas spes ostenderit, quam*

ferreos labores subierit : . . . cujus testimonia supersunt Theologica Præside Professore Theologo meritissimo SIRICIO, & Philosophica Præside M. ADAMO TRIBBECHOVIO, nunc Collega nostro Clarissimo, habita in Academia Giffensi disputatio, & magna vis Excerptorum in omnibus Philosophiæ partibus, improba diligentia ab illo collecta, dum pene dies noctesque in liberis habitaret. . . . Quorum omnium nunc quoque domesticus testis est Admodum Reverendus & Celeberrimus Collega noster KORTHOLIUS cujus hospitio & informatione præcipue apud nos utebatur. Dignissimum denique Philosophiæ Candidatum se exhibuit habita eruditissima de Chiliasmo, quam ipse confecerat, disputatione Historica, præside ADAMO TRIBBECHOVIO Sac. & Civil. Historiæ. Professore, & Magisterio titulo insignitus est à DANIELE GEORGIO MORHOFIO, J. U. D. & Eloq. Profess. tum temporis Collegii Philosophici Decano. Jamque Disputationibus de immortalitate animæ, quibus Ajuncti apud amplissimum Collegium Philosophicum titulum ambire meditabatur, conscribendis manus admoverat; cum ecce vehementissima febris præclaris obstitit conatibus, & DELLUS ad æternæ veritatis scholam evocavit, ut suomet exemplo immortalitatem animæ suæ demonstraret. Quare nescio an male precari Morbo illi debeamus, qui illum & suis & nostris vinculis solvit, ut ab omni corporis & terrenarum rerum contagio solutus, quam liberrimus ad superos evolaret. Quin potius aras Divæ & Sanctæ Febri erigimus, ut illa olim Camilla, cum tanto

to illum bono beaverit, quod pii omnes unice in votis habent, ob quod tot DEO preces allegant. Illi quidem bene est, nec quidquam nostri vel luctus vel officii ad illum pertinet, nostrarum tamen erat partium, Cives Academici, exsangve illud corpusculum, in quo pulcherrimus ille animus hospitabatur, quo possumus honore prosequi. Cum ergo hora III funus efferatur, frequentes, quod extremum sodali vestro munus persolvere poteritis, nobis etiam non monentibus, ibitis exequias, quo contentius id ipsa pietas, ipsa *κατα* in vos studia, denique & communis ista, quæ inter vos omnes est conciliatio, efflagitant. PP. a. d. XXXI. Maji Anno clc lxc LXVIII.

43.

Quoties ad funera deducenda nostra Vos invitat oratio, Cives Academici; toties animos vestros recondita aliqua doctrina, excolimus: vosque quod ex usu vestro in omni vita est, ex humanorum casuum documentis discitis, quæ animo & cogitatione semper oportet habere comprehensa. Magna enim vero sapientiæ humanæ pars est, quæ metuenda sunt singulis, & insperantibus sæpe cadunt pia aliqua & divina, non solum divinare prudentia, sed ipsa hæc a-

liorum etiam exemplis & præceptionibus præcipere quasi & explorare. Et vero admonendi præcipue estis auresque vobis vellicandæ, dum eam ætatem degitis, quæ virium isto robore integroque confusa sanguine & præterea inter seculi malitiam & Voluptatum illecebras posita vix aliquam mortis ad animum admittere memoriam dignatur. Nec parum sane fructus & utilitatis ad vos ab illustribus redundat exemplis hominum, quorum virtus ab ipso lucere rogo incipit, & ab cineribus lacrymis omnium irrigatis ad seram posterorum memoriam germinare. Ex illorum numero ob oculos vobis nunc ponimus Nobilissimum Amplissimumque Virum, MARCUM Koblblad / Archivarium & Protonotarium Regio-Ducalem, quem tota nunc sibi ereptum dolenter luget Civitas, magnæ Virtutis & spectatæ probitatis hominem, quique ita vixit, ut vita ejus pro exemplo esse possit; ita mortuus est, cum viveret, ut jam cum moritur, ne mori quidem videatur. Hujus a primis adeo natalibus vitam, moresque enarrare Viri Virtus & dignitas efflagitat. Natus is est priori exeunte seculo Anno clō lō XCIX octavo & vigesimo Septembris die, Patre PAULO Koblblad / Amplissimo Prudentissimoque Urbis hujus Consule, & ob præclara in patriam merita Civibus suis celebrato; Matre vero honestissima fœmina ANNA Berendsen / Civis Kiloniensis Viri integerrimi BERNHARDI Berendsen filia: quibus ille parentibus &

& lucis hujus usuram & bonæ mentis igniculos
referebat acceptos. His cum ex sacro primum
fonte frigida suffunderetur, per ipsam serpere
infantiam, tenerrimamque etiam ætatem dif-
fundere se cœperunt. Non defuit hic optimo-
rum præceptorum diligentia, eosque sollicite
circumspexerunt semper Parentes, quibus ad
pietatem & rerum intelligentiam ducibus ute-
retur: Quæ & feliciter adeo cecidit, ut magnam
ingenii spem omnibus ostenderet & præclaros
operæ suæ fructus jam tum Parentes magna
lætitia aucti a filio sibi pollicerentur. Post fir-
matum studiorum rudimentis animum, anno
1616. ad Academiam Rostochiensem ablegatus
& JOHANNI HUSWEDELIO Professori Cla-
rissimo in disciplinam traditus eos fecit integro
biennio progressus, ut spem Parentum cumu-
latissime impleret. Excepit hinc altero bien-
nio illum vicina Gryphisvaldensis & Jcti Ce-
leberrimi MATTHIÆ STEPHANI domus &
museum; postea vero Gieffensis, in qua per
annum & quod excurrit, commoratus fuit.
Nunquam hic, quod fieri plerumque adsolet,
ad inania frivolaque abripi se passus est; nus-
quam inter homines perdendo cibos natos, po-
culorum remiges, & quibus plus palatum
quam cor sapit, ut ajebat Cato, dies vel noctes
consumere visus est: sed totis in juridicis & po-
liticis studiis habitavit, nec quicquam eorum,
quæ ornant illa quam maxime, in se passus est
desiderari. Quæ ut experientia ipsa perfice-

ret, Spiram se contulit, ubi in ipsa rerum & jurisprudentiæ luce versato multum quoque doctrinæ accessit, quam post experimenta illa iterum in Giessensi Academia & denuo in Gryphisvaldensi feliciter adeo absolvit, ut non semel a Celeberrimo JCto MATTHIA STEPHANI ad summos in Jurisprudentia honores capeffendos fuerit invitatus, quos tamen, quod a suo instituto essent alieni, modeste detrectavit. In Patriam a Parentibus suis revocato honestissime cupierunt omnes, nec aulicorum illi favor defuit, ad peritiam ejus, virtutes facillimosque mores respectantium. Quorum commendationibus id effectum est, ut Viro Nob. & Amplissimo RUDOLPHO Fausten / Archivario & Protonotario Regio-Ducali meritissimo, cum propter affectam ætatem perfungi tam gravibus laboribus amplius non posset, velut altera quædam manus jungeretur. Quo vero arctius illi se jungeret, affinitatis præterea vinculo sibi obstrinxit, domum ducendo filiam ejus carissimam ANNAM Fausten / omni Virtutum genere animique dotibus ornatissimam Virginem. Quam præclarum hoc, quam sva-ve, quam honestum cum adjuncta vitæ & curarum illa socia consortium fuerit, dici vix potest, ut se illi superstitem, nisi quod in liberis reliquum fuit solatium, ægerrime tulerit. Suscepti hinc filii duo, & quinque filiæ, e quibus filii bini totidemque filiæ dignissimis jam generis in matrimonium datæ acerbo funere ere-
ptæ;

ptæ; superstites vero tres lacrymis & mœrore continuo pene conficiuntur. Post Soceri sui excessum Successor illi constitutus Noster ea, fide ac diligentia muneris sui partes per ipsos septem & triginta annos executus est, ut perfectissimum spectatæ virtutis cumulum expleverit. Elucescebat in moribus suavitas quædam & lenitas amabilis, & in omni vita clementia atque ingenuitas: In mente illi candor, in verbis modestia, in actionibus integritas, in promissis fides, ut plane abludentem a maligni seculi nostri ingenio animum habuerit, & in nullo injurius exstiterit, nisi quod a nobis abierit. Ab erat illi fucus omnis & fumus animusque duplex & varius; namque e Pythagoræorum præcepto, qui Virum bonum esse vel fieri unum, volunt, ad simplicem justitiæ amussim omnia examinans omnibus eundem se præstitit, nihil improborum veritus calumnias, qui cum fraudibus, præstigiis, & perjuriis ipsi omnia agunt, parum efficaces habent & tardos, qui non simili fallacia erga alios utuntur. Verum aures vellicavit Pietas familiaris illi Virtus, qua in Deum flagrans & homines nihil admisit unquam, quod bonæ menti, sanctissimisque legibus erat adversum. Oborta illi jam vitæ quædam fuit societas in cadaveroso mundi spectaculo, & pulcher ille animus ad aliam illam vitam, cui nati, cui facti sumus anhelavit. Ingressus est hanc mortalitatis semitam tentabundus, & gradu suspenso quasi in cœnosa via summis pe-

dum digitis, ceu in loco Ædilem metuente incessit. Subierunt demum, cum senectute morbi, animique ægritudines, quas filii unici superstitis PAULI RUDOLPHI in Gallia peregrinantis obitu præcipue contraxerat. Ex eo enim tempore, cum fallerent illum præclaræ spes, quas de egregio juvene conceperat, cum animo deficiente, vires etiam corporis sunt imminutæ. Quare simulac portio illa pectoris ab illo fuit divulsa, pectoris angustis vehementius laborare cœpit; quasi apud se habitare non posset spiritus, ab altera sui parte magna quadam naturæ vi & propensione attractus. Quod ergo Vitæ bene peractæ gloriosum restabat corollarium, feliciter placideque, inter lacrymas suorum & preces ardentissimas exspiravit, postquam ipsum mortis suæ momentum, eo ipso die, animo divinitati jam propinquo prædixerat. Ad binos enim horæ mediæ undecimæ (eam enim nominaverat) pulsus, binis singulibus animam efflavit, simulque nonum & sexagesimum ætatis suæ & sæculi annum implevit, post magnam illam sex annuarum decadam hebdomadam septuagesimi anni sabbatum cum filio suo in cœlis celebraturus. Ceterum nos quibus triste sui desiderium reliquit, hodie hora II. ejus quod reliquum est, effermus. Agite ergo Cives Academici, & bono pioque Quiriti, qui leto jam datus est, supremum persolvite officium. Præterquam enim quod impense vos invitamus, impellere vos ipsa

ipsa beatissimi Viri ob oculos nunc posita, quamvis ex oculis sublata Virtus, ipse Familiae Generatorumque funus procurantium eximia dignitas debet; ipsa denique humanitas vestra, ne segniores in officio exequendo deprehendami, vos admonebit. P. P. sub Sigillo Academico. d. 25. Jun. Anno clc lbc LXIX.

44-

Vetus illa est hominum de miseris vitae humanae moriendiq; necessitate querela, sed stulta si Christianam sequimur philosophiam, & iniqua. Quid enim perversius est & ineptius, quam magnam DEI immutabilemque legem de moriendi necessitate latam: MORTE MORIERIS, criminari, aut inanibus prosequi lamentis? Verissimum illud esse decretum tot seculorum constat experientia, tot humanorum casuum universaeque naturae exemplis quotidie docemur. Dubitare de eo mulier prima omnium visa est in colloquio, quod cum serpente instituit; dum ait: NE FORTE MORIAMUR. Diabolus vero sua contradictione NEQVAQVAM MORIEMINI, & credulam mulierem decepit, & in extremam perniciem totum humanum genus praecipitavit. Moriendum ergo nobis est, & hanc nobiscum natam legem animadvertimus, quanquam plurimi sint quorum in animo

mo Diaboli illa vox hæret, quibus Hieronymi ista querela merito occini queat: Quotidie morimur & tamen æternos nos esse putamus. Ea enim invasit multorum animos securitas, ut ad tot funerum deductiones cæci, ad tot præficarum lessus surdi, ne meminisse quidem ejus temporis sustineant, quo e vita sibi migrandum, rigidissimique Judicis decretiora sententia exspectanda. Si per universam hanc mundi compagem oculos circumferamus, ubique rerum matri Naturæ suum parari sepulchrum videmus, quotque splendidissima illa, solis lux radios accendit, tot faces ad mortem præferre & omnia secum in occasum rapere videtur. Quin illa ipsa vita nostra continuis ducitur mortibus, dum anni annis succedunt ætasque alia ætate jugulatur, cogitationes cogitationibus interficiuntur. In miseriarum hereditariam possessionem, quando nascimur, mittimur, & ex utero tanquam e carcere quodam eductis vita hæc via est, per quam ad locum imus, in quo extremum a nobis sumitur supplicium. Quare solet Christianis animis generosa aboriri vivendi impatientia, dum mundo subducti aliam ingrediuntur vitam, morti vel in ipsa morte non obnoxiam. Numerari inter illos suo quoque jure potest Vir Reverendus & Clarissimus JOHANNES BRAUER, ad D. Nicolai hic Archidiaconus quondam vigilantissimus, quem nunc in tumulum, alterum illæ magnæ matris uterum, fe-

ferimus, a quo ad alteram illam vitam novus
cœli civis nascatur. Natus ille Parentibus hac
in urbe honestissimis spectatæque integritatis e
mercatorum ordine præcipuis, qui ortus ejus
Pythagoræ illud in memoriam Nostro revoca-
re poterat, quod tota nostra vita mercaturæ si-
milis sit publicisque nundinis, in quibus bona
sua Dii vendant laboribus. Nec immemor
ejus juvenili statim ætate ad Rostochiensē &
Gryphisvaldensē Academiam, velut ad
mercatum quendam bonarum literarum abi-
ens non exiguos inde fructus reportavit. Hinc
muneri Ecclesiastico in Exercitu Episcopi Bre-
mensis Anno 1643. admotus non ignobilem Ec-
clesiæ militantis alumnum, nec segnem in præ-
liis Domini athletam se exhibuit. Habuit cer-
te hic ob oculos sibi positam omnis vitæ huma-
næ faciem, quam militiæ similem non semel
pronunciant divinæ literæ. Quare & toto vi-
tæ suæ tempore eoque maxime, quo in Patria
sacro vacavit muneri, quod biennio post su-
scepit, Christiani militis partes optime egit.
Noverat n. quotidie sibi secum ipso in arenam
esse descendendum, cum affectibus rationis
arcem obsidentibus pugnandum, nec nisi per
intestina hæc bella salutem & victoriam obti-
nendam. In mundo perpetuam sibi palæstram
paratam vidit, ut illius tandem pertæsus ad cœ-
lestem illam Jerusalem, veræ æternæque pacis
visionem adspirarit. Triumphavit denique
postquam & mortem, quem novissimum ho-
stem

item vocat S. Paulus ardentissimo prælio, in ipsis venis, inter vitales spiritus a febre an maligna, an benigna excitato, devicerat, Placide ergo octavo Septembris die, ætatis anno septimo & quinquagesimo, postquam per ipsos quatuor & viginti annos munus sacrum fideliter gesserat, magno in civium suorum animis relicto desiderio, e vita excessit, si excedere vita dicendus, qui per mortem ad alteram vitam renascitur. Nam dubitare non solum de ejus morte cum magna humani generis matre possumus, sed & ipsam Diaboli vocem, NEQVAQVAM MORIETUR pio sensu de eo pronunciabimus. Luget tamen illum sibi ereptum uxor mœstissima, omni virtutum genere ornatissima femina, DOROTHEA Langehausen / infelicior nunc, tum quia secundum vidua (nupta enim antecessori ejus M. CHRISTIANO FREIMANNO olim fuerat) tum quia tam placidum amoris vinculum non sine magno doloris sensu rumpitur. Luget eum, eximie spei filius JOHANNES, qui Jenæ jam studiis operam navat, tresque filie, IDA, MAGDALENA ELISABETA, MARGARETA, quibus Paterni nominis memoria nunquam animo delebitur. Quare cum humanitatis leges a nobis efflagitent, ut his doloribus afflictos solemur, facere id vos, Cives Academici, aliqua ex parte potestis, si extremum officium funeri, quod hodie hora II. pomeridiana effertur, persolvatis. Quod uti vos facturos non dubita-

ta-

itamus, ita ut facere sedulo velitis, peramanter
officioseque rogamus. PP. sub Sigillo Academ.
d. XII. Sept. Anno clb lbc LXIX.

45.

SExtus jam ipse mensis exit, *Cives Optimi*,
nec ex animis vestris effluxit ejus diei ce-
lebritas, quo in ipso sanctissimi Numinis
domicilio, in ornatissimo splendidissimis
aulæis suggestu, Nobilissimo, Amplissimoque
Viro, CÆSONI GRAMMIO oblatum Ordinis
literarii principatum gratulati sumus, vota-
que pro salute ejus nuncupavimus. Circum-
sonare etiamnum aures nostras nobis viden-
tur, illi turbarum clangores, festæ plaudenti-
um voces: quas inter, purpureâ epomide, sce-
ptrisque, quæ purpurati prætulere ministri,
spectabilem domum deduximus. Nunc verò,
quam rerum sit immutata facies, tristissimum
vicissitudinis humanæ, quod ob oculos vobis
versatur, spectaculum commonere vos potest.
Quis enim fore unquam credidit? ut quem
lætabundi olim inter campani æris strepitus
ad ædem sacram deduximus, illi, cum de-
ducendus nunc denuo esset, ut eo, quem
acceperat, Magistratu se abdicaret, funus du-
ceremus. Purpurati tum præibant Pro-Recto-
rem suum Ministri; nunc illi feretrum pullati
præcedunt: Gestabant erecta Academix Sce-
ptra,

ptera, amplissimi honoris insignia; nunc inversa tenent, atque ad terram inclinata: Publicæ tum lætitiæ; nunc luctui nostro æra sonant. Tum vocum ac modulorum suavissimis concentibus festum lætumque erat templum; nunc illud planctu lamentisque triste est & horridum. Ibat tum Ipse, atque hoc ipso adire die templum debebat, inter affectatores Collegas puniceo ornatus amiculo: nunc ille, fere retro hoc recumbens, veste ferali amictus, non in suggestum, sed in tumulum, vestris, Cives Academici, humeris effertur; a nobis, non jam ut olim, exporrectis in lætitiæ frontibus, composito ad hilaritatem habitu, sed dejectis mœstiter in terram vultibus, sed facto ad squalorem luctumque vestitu deducitur. Quis præcipere cogitationibus auspiciatissimi Magistratus tristissimos hos eventus potuit? Quis ex isto, quod humeris ejus circumponebatur, ostro, velut ex ipsa suscepit regiminis aurora, has infandi doloris umbras, hanc acerbissimi funeris noctem divinare tum potuit? Nobis vero, quibus insperatum hoc objectum funus est, ut e carissimi capitis interitu, maximus oboritur dolor; ita dissimulare illum vestro in conspectu non possumus, & ut olim effusione animi lætitiæ, ita nunc ejusdem contractione ægritudinem nostram testificamur. Nullius enim e nostris obitum dolentius comploravimus, quam ejus, cui iusta hodie facimus, ejusque magnas habemus causas & justissimas.

Et

Etenim quam alii simplicem ac privatam dolendi causam habent, dum liberi parentem, uxor maritum, focer generum, affines affinem sibi ademtum delamentantur; nos publicam habemus, dum vestrum vos Doctorem, nos Collegam nostrum conjunctissimum, atque hujus amplissimi Senatus Principem nobis ereptum lugemus. Cujus in luctus societatem ipse etiam Dominus noster Serenissimus, qua fertur in nos clementia, venire dedignatus non est. Quia enim Noster hoc in regno personam ejus vivus circumferebat, nunc in ipso suo funere ejus per Legatum Excellentissimum præsentia cohonestatur. Nec postremæ hoc in luctu partes dandæ sunt amplissimo Philosophorum Ordini, tum quia propiori illi consortio juncti fuerunt; tum quia alterum hunc primo Academiae octennio Collegam letho datum vident. Primi enim illi inter nos e statione sua emigrarunt, & humanitatem profesși, nihil a se humani alienum suo exemplo monstrarunt. Cumque sub ipsa Academiae auspiciis, in Beati *Watsonii*, quæ tum parabantur exequiis parentaret *ο μακαρίτης* noster GRAMMIUS, ab ipsis fatis ad hostiam quasi succidaneam visus est designari. Vos quoque, Cives Optimi, in Doctoris vestri jactura, intimis angustis sensibus non dubitamus; cujus in ipso ætatis flore erepti, præclara præcepta in ipsa jucunditate fructuum nunc subamarescunt, dum memoriam refricant suavissimæ conversatio-

nis. Quem fide summa atque diligentia Naturæ vobis adyta recludentem rerumque causas vobis inculcantem audivistis, is nunc hoc extremo velut complemento disciplinæ suæ fundum omnem emensus est: dum in ejus investigatione spiritum ponens Naturæ debitum persolvit: quæ in puero juvenem, in juvene virum, in viro senem absolvisse, atque ultra fines suos nunc ablegasse videtur. Qui ergo scientia vos augere vivus, nunc exemplo suo potest mortuus, unde vitæ etiam rationes vos subductas habere nostra admonitione potestis. Illi quidem exiguum Vitæ curriculum Natura circumscripserat: quod, licet omne quis ævum pervixerit, ob artis amplitudinem, brevissimum Hippocrati videbatur: ea tamen doctrinæ suæ, paucorum annorum decursu, complevit spatia, ut in media ætate grandævæ etiam, artis gloriam præciperet. Editus in hanc lucem est anno a CHRISTO nato supra millesimum & sexcentessimum quadragesimo, die, Margaretae sacro, in munitissimo Holsatiæ oppido Tonninga, honestissimis parentibus, CHRISTIANO GRAMMIO, Cive ejus loci & Mercatore, ac CATHARINA, Viri Reverendi Presbyteri Milstedienfis CÆSONIS HAGGII filia, quam ille e conjugio cum Admodum Reverendi, Nobilissimi atque Amplissimi Viri CÆSONIS AB EMINGA Canonici, atque in Gymnasio Schlesvicensi Theologiæ Professoris tum meritisimi nepte suscepit. Ab his Viris

ris & doctisſimis, & Reverenda dignitate conſpicuis CÆSONIS illi prænomen impoſitum, eſt: GRAMMII nomen a prædio quodam Jutiæ GRAM, per Majores ejus, qui illic habitaverunt, & quorum accurata adeo haberi notitia nequit, in Noſtrum hunc pie defunctum traductum eſt. Primas in tenero animo bonarum artium lineas duxit, Scholæ Hufumeniſis tum temporis Con-Rector, nunc Schleſvicenſis Rector M. ABEL FINCKIUS, cujus ille fidem diligentiamque, non immemor præſtiti beneficii diſcipulus, vivus ſemper prædicavit. Ex ejus manu quaſi & ſinu Scholæ Lüneburgenſis ad D. Johannis Con-Rectori traditus profligavit indies, ac bene in literis, lingvis, artibus inchoata percoluit. Quibus optimæ indolis ſpeciminibus facile effecit, ut ſuſpicerent illum Condicipli, amarent Præceptores. Eiſdem tum literis initiabantur Generoſiſſimi Domini ALBERTI BALTHASARIS BERNHARDIDÆ Hereditarii in Wansbeck duo filii, cum GEORGIO SEGERO, Medicinæ nunc Doctore ac Phyſico Thorunenſi, ſtudiorum moderatore eo miſſi. Quorum in familiaritatem a condiciplatu ut intraret, morum facilitate, ac indolis ſuæ elegantia non difficulter effecit. Eaque arcta adeo inter illos contracta fuit, ut nec diſceſſu ſuo diſtrahi illam paſſi fuerint. Quare quem hætenus a ludo literario ſodalem in ipſa ſtudiorum incude poſiti habuerant, eum quoque in Altorfinam Academiam comi-

tem sponte sua sibi adsciverunt. Eo itaque, se trajecerunt, postquam eas, quæ interjacent urbes, natura, situ, ædificiorum pulchritudine in primis nobiles accurate perlustraverant. Hic NICOLAI RITTERSHUSII, Celeberrimi Jcti & Philologi CONRADI Filii, Juris Professoris ac Philologi clarissimi, domicilio ac convictu usi fuerunt. Cujus nomini primam suam disputationem consecrare noster voluit. Publica ille præstantissimorum Medicorum HOFMANNI & NICOLAI; privata SEGERI doctrina imbutus, non leviter timideque pulcherrima hæc studia ligurire, verum sic celeriter avidèque, quasi diuturnam explere sitim cupiens, arripere visus est. Per ipsum hic biennium commorati, perspectis prius, quæ erant in confiniis, pulcherrimis, florentissimisque Germaniæ, Bohemiæ, Hungariæ, Helvetiæ urbibus, Academiam Basiliensem concesserunt. Hic tres admodum annos Philosophiæ disciplinis, artique Medicæ Noster impendit, BAUHINI, STUPANI, ZWINGERI aliorumque Virorum doctissimorum monitis ductus. Prima illi ingenii fœtura, de Naturæ abortibus, Monstris scilicet, docta dissertatio, JOHANNES ZWINGERO obstetricante, in lucem edita est, cujus post auspiciis summos in Philosophia honores Competitorum suorum signifer ac princeps obtinuit: quibus ut ultimum accederet complementum, de rarioribus quibusdam problematibus, ipse eruditæ velitationis archi-
te-

tectus atque moderator, anno ætatis XXII. f-
putavit. Dici non potest, quam honorificis
elogiis e complexu carissimorum sibi Docto-
rum, quamque ægre dimissus Noster fuerit,
cum in florentissimam artium literarumque
matrem Galliam iter suum dirigeret. Quo per
vicinas urbes instituto, primum Lugduni ali-
quantum substitit, contracta cum Parabolano
quodam ejus loci amicitia. Hic in Nosocomi-
um, velut in Morboniam quandam se ipsum
ablegavit, ut quasi compendio quodam tot
sparsa per populos, urbes, domos morborum
mala, oculis subjiciens, altius eorum ingeni-
um penetraret, & cominus eos, in rem ipsam
deductus, aggrederetur. Hinc ad ipsam Regni
principem urbem Lutetiam contendit, notataq;
illic tam ingeniorum quàm operum elegantia,
postquam Viris illic doctissimis innotuerat, illā
Galliæ percurstationem absolvit, inque reditu
vel potius reversione sua non paucas Galliæ,
Lotharingiæ, Germaniæ urbes celebratissimas
pervidit. Cæterum quos ille hac è peregrina-
tione fructus ceperit, testari liber commen-
tarius potest, quo omnia, quæ vel in Bibliothe-
cis, vel in Museis, rariora ac singularia offen-
derat, vel è doctissimorum Virorum consue-
tudine exploraverat, diligentissime consigna-
vit. Nihil itaque amplius restabat, quam ut
publico Collegii Medici suffragio, titulisque
ordinem hunc decentibus, studiorum suorum
formam expletam haberet. Qui in Lugdu-

nenſi Batavorum Academia cupide cumulate-
que dati ſunt, poſtquam enucleatam de Syn-
cope diſputationem ingreſſus fuerat. Illis
ornatus ubi ſe Kilonium retulit, non difficul-
ter in amorem ſui pellexit Nobiliſſimam Le-
tiſſimamque Virginem, DOROTHEAM
CHRISTINAM, Plurimum Reverendi
Clariſſimique Viri M. FRIDERICI JESSENI
Paſtoris ea in urbe primarii, omni virtutum,
genere ornatiffimam filiam, nunc viduam heu!
mœſtiſſimam. Qua cum juſ ille matrimonii ca-
ſtum, legitimumque ad extremum uſque ſpi-
ritum ſanctiſſime cuſtodivit; quam tenerrime
amavit, adeo quidem, ut nunquam cum illa,
in gratiam redierit, cujus pulcherrimi amoris
viva ſpirantiaque documenta habemus, filium
unum, tresque filiolas, quibus immaturo hoc
Parentis diſceſſu, ſpes omnes proſtrata, omnia
humana quidem præſidia ſublata videntur.
Circa idem tempus, cum hoc divinae humanæ-
que ſapientiae ſacrarium in urbe ſua Kilonio
(cujus Noſter ille ſitum, ac elegantiam deline-
are juſſus erat) exſtrueret Sereniſſimus noſter
Princeps, non exiguas ejus in hoc eſſe partes
clementiſſime voluit. Nam cum Phyſiologiae
ac Graecae Linguae illi ſcholam daret, in hujus
Univerſi omniumque elegantiarum poſſeſſio-
nem vocare videbatur. Quam Spartam, qua
fide & diligentia tam publicis quam privatis
diſſertationibus exornat, pervulgatum apud
vos eſt, *Cives Academici*, nec longa ab nobis o-

ratione commemorandum. Quam jucunda cum illo Collegis consuetudo conversatioque fuerit, quam ille in omnibus vitæ partibus moderatus, honestus atque integer, & suam tractare personam & pertractare aliorum animos noverit; testari omnes possumus, quibus e prioris illius necessitudinis imagine, quæ ante oculos nunc subit, inflictum illud doloris vulnus recrudescit. Ut breviter ac luculentis Comici coloribus depingamus:

*Sic vita erat: facile omnes perferre ac pati,
Cum quibus erat cumque una, iis se dedere,
Eorum obsequii studiis, adversus nemini,
Nunquam præponens se aliis. Ita facillime
Sine invidia laudem invenit & amicos pares.*

Denique & artem illam salutis humanæ præstidem mira exercuit diligentia: cujus tot apud Viros tam nobilis quam plebeji ordinis supersunt argumenta, ut non paucis salutiferæ illæ manus non exiguis jam tum adversus morbos præliis, deque iis tropæis spectatæ, desiderentur. Sed & illi accidit, quod plerumque usu venire solet, ut lucernæ instar, quæ aliis lucendo ipsa consumitur, ipsa inter officia illa conficeretur, ac, quibus alios sæpe mortis faucibus eripuerat, sibi imbellia ac inermia arma sentiret. Cum enim paululum esset a sanitatis suæ cura omissior, ac ad medicamentorum usum segnior, procedentibus sensim, quibus debile corpus fatigabat, laboribus, ipse non advertens, & causam morbo ac fomenta fug-

gerit. Qui barbarus utique, ut barbarum, ipsi Scorbuti nomen est, cum insidiari literatis ac barbariei omnis osoribus soleat; nec Nostro pepercit, sed ipsa illius viscera, antequam idonea illi tela obverteret, occupavit. Cum illo superiore anno gravissime conflictatus vix tantillum respiraverat, cum jam per cuniculos iterum adreperet, ipsam vitæ arcem invasurus. Nam postquam & stomacho male esse cepit, illeque viribus coquendi destitutus, quiingerebantur, cibos regereret, omni hinc vitæ succo tabescente, fatuis vero humoribus ingravescentibus, nulla medicamentorum vi coercendis, animum in ipso etiam mortis articulo compositissimum, non sine maximo religionis sensu, inter lachrymas complexusque amicorum, in manum Sanctissimi Salvatoris sui die Septembris XXI. placidissime exhalavit, cum ætatis annum ageret tertium & trigesimum, muneris professorii octavum. Nos interim ex sanguine huic corpusculo extremum persolventuri officium, vestri vos, *Cives Carissimi*, commonefacimus officii. Quod quamquam vel non rogatos facturos vos confidimus: (neque enim quenquam inter vos adeo ab humanitatis sensu, ut facere nolit, alienum fore suspicamur:) ut tamen facere velitis, peramanter rogamus. Valete. P. P. Kiloni. add. V. Octob. An. clb lcc LXXIII.

46.

Quanquam usu venire rarius solet, ut florentes ætate & virium robore insignes juvenes, ad vitæ exitum sub ipsis vocentur auspiciis, non uno tamen nobis exemplo innotuit, Cives Academici,

medio de fonte Leporum

*Surgere amari aliquid, quod in ipsis floribus
angat,*

ut ista Lucretiana nunc usurpemus. Aliquoties è nostro ordine extulimus, non veteres colonos, quibus migrandi illud jus accidere poterat, sed tirones & in publico Vitæ hujus ludo nondum satis exercitados. Quare bono vestro erit, ô Juvenes, si exemplis illis commonefacti maturè & vitæ hujus & ætatis vestræ lubrica dispiciatis, animosque à mortis tempestiva accurataque contemplatione obduratos ad quoscunq; casus paratos semper instructosque habeatis. Nam ex quo tempore in lucem primum suscipimur, & cœlesti hoc spiritu augemur, cum rationis usu id nobis opera danda est, ut futura nobiscum fata commentantes hunc vitæ finem, velut metam aliquam, ad quam omnes tendimus, tota mente oculisque respiciamus. Quo plura itaque juvenes circumveniunt obstacula, quo majora affluunt voluptatum blandimenta, quibus titillantur sensus, abducuntur ab divinarum

rerum meditatione animi: eo annitendum, magis est, ne in perduto hoc otio ante ætatem consenescentes omnem bonæ mentis, vitæ mortisque sensum exuamus. Quod cum fieri sæpe viderent homines sapientes, non destiterunt salutaribus in tam proclivi erratu præceptis erigere lapsantes. Nam cum omnem Philosophiam in meditatione mortis consistere, judicarent, æquum esse crediderunt, ut iis studiis intenti, sumus autem omnes, quotquot bonam mentem profitemur, quotidiana mortis imagine animum pascere, & à rerum caducarum contubernio sejunctum ad divina, æterna & immortalia excitarent. Quo eventurum arbitrati sunt, ut in sublimitate cœlestium rerum defixi tota mente suavissimas voluptates contrectarent, rerum humanarum, & fortunarum contemptores non tantum, sed & triumphatores. Nam prout vel metus mortis incutitur, vel spes æterni boni ostenditur: ita è duplici affectu suus quemque fructus, sua utilitas consequetur. Impiis mortis prodest memoria, ut à vitiis abscedant. Infelicibus, ut à molestiis & miseriis liberentur: Probis, ut in promissæ sibi salutis spem erigantur: sapientibus, ut humana hæc & fortunæ bona nihili esse intelligant, & divinis illis posthabenda. Ad omnes denique summa, hæc redundabit utilitas, ne immemores & imparatos inveniat ille, qui è statione sua seu tirones, seu veteranos evocat Imperator. Quam
ob

ob rem felices æstimandi sunt, qui vel bono suo genio ducti longissime quasi è specula supremam hanc tempestatem provident: vel morbis longinquis quotidie moniti in fatali lectulo, quasi in tumulto, se ipsos ad placidam illam quietem componunt. Inter eos in singulare exemplum commemorari potest optimus eximiusque Juvenis, cui funus hodie deducimus. Vixit enim ita, dum vixit, ut ex moribus ejus suavitas: actionibus virtus, & probitas: studiis diligentia & optima indoles elucesceret: & cum diuturno gravique morbo tentatus semper vitam extrema per omnia duceret, ardentissimam omnibus pietatem, probaret. Editus in lucem noster ille JOHANNES LINDEMANNUS est d. XXI. Febr. Ann. clc lcc LIII. à Parente cognomine, Amplissimo Prudentissimoque urbis hujus Senatore, & Matre MARGARETA, JOANNIS GABELII, Notarii publici filia. Non attinet recensere hic Avos & Proavos honestissimos, ignota vobis nomina. Id certe ut notum in hac urbe omnibus est, ita præcipuis laudibus efferendum est, fuisse Optimi Parentis Optimum filium. Plerumque enim Parentum bonorum indolem ostendunt liberi, & cum in ea velut in speculo quodam se intuentur Parentes, incomparabilis illa animo voluptas oritur, quem non capiunt homines, quibus geniales has delicias natura invidit. Non immerito itaque de tali filio gratulari sibi poterat Pa-

Pater, quem sua sponte ad honestissimas artes optimaque studia excitatum videbat. Postquam itaque primas in Patria Schola lineas duxerat, Anno ætatis XVI. prudentissimo sane, consilio Lubecam misit, ut rudimenta domi inchoata illic sub clarissimis doctõribus perficeret. Nam cū Magnificus ejus urbis Magistrat⁹ semper in id laudabili cura incubuerit, ut Viros singulari eruditionis laude conspicuos juventuti formandæ præficeret: & ex eo bonarum literarum seminario præclara semper prodierint ingenia: rectissimè profecto & providenter à Parente hæc primordia studiorum, à quibus pendent cætera, sunt instituta. Quis enim non Phidiam potius aut Polycletum, quorum spectata sapientioribus peritia est, in fabricandis Hermis adeat, quam aliquem ex illo genere, qui, ut est apud Venusinum Vatem,

*Æmilium circa ludum faber imus & ungues
Exprimet & molles imitabitur ære capillos,
Infelix operis summa, qui ponere totum
Nesciet.*

Qua diligentia fundamenta illic jecerit, & quibus artibus se ad palæstras majores firmarit, ex eo postea patuit: cum jam patiens pulveris atque solis in latissimos Musarum campos, in ipsam Academiæ lucem, prodiret. Nam cum divino & Principis nostri beneficio faciles sibi ad omnia doctrinæ genera aditus patere in Patria intelligeret, noluit apud externos anxie & fastidiosè quærere: ut solent quibus domesti-

ca sordent, & omnia ignota magnifica sunt: quod in conspectu ejus positum in sinum atq; amplexum incurreret. Quoniam itaque ad juris scientiam applicabat animum, quæ illi cognatæ sunt disciplinæ in societatem ab eo cooptatæ sunt. Eas avide arripuit, doctoresque earum Viros celeberrimos magno semper in pretio habuit. Memini ipse, cum a me privatim elementa juris doceretur, agili ingenio ita omnia complexum, ut non exiguam optimorum successuum spem jam tum mihi ostenderet. Eandem postea telam in Academia Regiomontana pertexuit, ubi integro triennio commoratus in hanc exercitationem ita studiose se dedit, ut a Præceptoribus laudaretur, æqualibus exemplo præiret. Domum revocatus Anno clc lbc LXXV. mense Novembri, ut & rebus suis consulere, & sumptuum faceret difficillimo isto tempore compendium, accepit, quæ apud Amplissimum Virum HENRICUM Gulmen / Reg. Maj. Daniæ Commeatum Præfectum generalem & Quæstorem Pinnebergensem illi conditio oblata est. Nam liberis ejus præfectus, ratione, consilio, præceptis ita mores eorum formavit, ita studia eorum ordinavit, ut ægerrime a se demitteret. Sed pertinacior atque adeo in ipsis illi hærens visceribus morbus laboribus ejus a primis statim mensibus manus injecerat: & quanquam cum illo per intervalla utcunque in gratiam redierit, cœperunt tamen ignes ejus suppositi

cineri doloſo reviviſcere, & per totum corpus fatale ſpargere incendium. Quare ut in filii valetudine accurarent atque advigilarent magis pii providique Parentes, domum ſub hujus anni initia reduxerunt. Ex eo tempore ſemper amplior factus morbus: cumque lenta illi tabe omnes corporis vires affigerentur, nequicquam valentibus, quæ ad vim ejus infringendam adhibebantur remediis, circumſpectis rebus omnibus rationibusque ſubductis Ipſe Noſter omnium cogitationum ſuarum hanc ſummam fecit: diſcedendum ſibi eſſe ex hac vita. Quod itaque reliquum ſibi erat in vita hac mortali temporis, omne illud in acerrima atq; attentiſſima cogitatione rerum cœleſtium poſuit. Cumque omnem ſibi diluxiſſe diem ſupremum crederet: intra illud tempus bis cœleſti pabulo animæ ſuæ proſpexit, ut ſpiritus divino robore increſceret, quo magis decreſcebat ex ſangve corpusculum & concidentibus ſucculentis partibus in Spiritum ipſum quaſi extenuari aut cum ipſo exire videbatur. Cum jam omnia ad finem ſpectarent, ipſo S. Johannis feſto die, & nomen illud ſuum & vitam poſiturus, tertium divino cibo recreatus ſub noctem poſtridie inter preces & lacrymas parentum ac fratrum placida & benigna morte expiravit, cum quartam ſeculi partem, ipſos XXV. annos, vel integro illo, ſi Deo ita viſum, non indignus, abſolviffet. Mortalem ſe genuiſſe novit optime mœſtiſſimus Parens: &
cum

cum in filio vivam mortis imaginem sibi intueri toto hoc tempore visus sit, nunc eo æquius feret casum, quo illi minus improvius atque inopinatus accidit. Vos, o optimi Juvenes, qui spes inchoare longas sæpe soletis, exemplo hoc sapere discite: atque in ipso ætatis flore, novissima hæc cogitate. Quoniam autem hodierno die terra condetur, quod ejus reliquum est, supremum Sodali vestro persolvite officium. Quod eo facietis promptius, quo impensius vos invitamus, ipsaque humanitas, siquidem humani nihil alienum a vobis esse creditis, vos vehementius impellit. P.P. Sub Sigillo Acad. d. III. Julii. An. clb lbc LXXVII.

47.

INter illa, quæ in vita obvenire nobis bona solent, nihil lætius exoptatiusque est, quam si cum pia pudicaque conjuge s(v)aviter viventes, dignam nobis sobolem, domus nostræ præsidia & firmamenta suscipiamus. Quid enim dulcius est, quam illa amoris casti *ἐλέποντα μαρτύρια*, spirantes & vultus & animi nostri imagines, quotidie intueri? ex Dei & sapientum præscripto teneram formare indolem, explorare experimentis, excitare, igniculos, quibus optimæ naturæ vis effervescat, & hac assidua conversatione, veluti cum animæ nostræ partibus arctius conjungi, inque il-

illas per novam aliquam μετεμψύχωσιν immi-
 grare & quasi transfundi? ut in iis, ipsi post fa-
 ta nobis superstites, reviviscere videamur.
 Quæ cum recogitamus,prehendimus nihil
 illo Amore, quo charitates nostras prosequi-
 mur, esse exuperantius: itaque nihil dolore,
 illo acerbius, qui a tam arcto complexu nos
 divellit: qualem in supremis nostrorum neces-
 sitatibus persentiscimus. Quod si enim mors
 ipsa partium solutio est: (nam quæ juncta in-
 ter se sunt, perpetuo durare illo in statu neque-
 unt:) nec illa sine dolore: quid animi paren-
 tibus fore creditis? si ipsius animi sui, non a
 corpore, quæ tolerabilior videri poterat, sed a
 sui partibus, liberis, disjunctionem, vere,
 vel exanimes vel semianimes, experiantur.
 Utinam testari illud exemplo suo non posset,
 Vir Admodum Reverendus & Excellentissimus
 CHRISTIANUS RORTHOLTIUS. SS. The-
 ol. hac in Academia Professor Primarius ac ce-
 leberrimus, Collega noster conjunctissimus,
 quem in maximum, e suavissimæ filiolæ obitu,
 luctum conjectum nunc esse meministis. In il-
 lum quidem non inermem atque nudum istius
 mali vis se superfudit: habet enim domi in ar-
 mamentario suo parata ad profligandos hos in-
 sultus arma, non Vulcania, non Achillea, aut
 qua Peleus sibi placebat machæram, verum τὰ
 ὄπλα τῆς Φωτὸς, καὶ τὴν μάχαιραν τῆς πνεύμα-
 τος: ut nos qui consolari illum cupimus, su-
 perfedere hoc labore possimus, ne clava Her-
 cu-

culem juvare videamur. Quoniam vero prima in hoc conflictu coitio solet esse periculosissima: non enim semper cum telo sumus, aut ad depellendos inopinatos ictus satis instructi, vel voce nostra ad motus illos compescendos excitabimus, atque adeo vel memorem monebimus. Amavit filiolarum suarum optimus Parens, quo affectu nihil tenerius est: sed & illam amavit DEUS, atque suam esse, summo illo patriæ potestatis jure, voluit magnus ille Parens. Quam ergo iniquum imo impium esset, nostrum hunc amorem & Divinum illum, quasi adversis inter se frontibus committere, ac cum DEO in certamen descendere. Amat, quos in familiam suam cooptat Deus: & nos quidem, si non degeneres sumus Summi Genitoris filii, si illum amamus, & ipsum, quo nostros prosequitur, amorem amare debemus, de divino erga nos amore hoc ipso quasi certi & securi, cum amoris nostri etiam sui esse vult pignora, & liberos nostros, velut obsequii an amoris nostri obsides exposcit. Quid enim? ac hereditatis illa præceptione angere æquum est ejusdem familiæ pleno jure heredes? an Deo beneficia nobis præstita, nostram an nostrorum salutem, fortunas exprobrabimus? Dabatur hæc a DEO Parentibus suis DOROTHEA ELISABETA (id enim puellæ nomen erat) Anno clc lxc LXXI. d. 4. Junii. Divinum illi munus accipere sibi visi sunt, idque operam dederunt, ut proles sua a primis ungviculis & veræ pietati

ti & virtutibus illum sexum ornantibus affve-
 fceret, atque amabile illud DOROTHEÆ no-
 men in animum, in mores, in vitam ipsam,
 quantum per ætatulam istam licebat, conferret.
 Quam in curam præcipue incubuit tam corpo-
 ris quam animi dotibus præstantissima Mater,
 ANNA KIRCHHOFIA, tam propaganda so-
 bole, quam ejus cultu procurando felicissima
 femina. Neque enim exigua hæc aut conte-
 mnenda fortuna Marito accedit, cum copiosa
 illum prole beat uxor favissima: qualis nostra
 hæc, cui vel ideo prosperitatem hanc indulgit
 Deus, ut tot experimentis in liberorum educa-
 tione spectata, novos usque, non suæ tantum,
 sed & æternæ familiæ heredes sufficeret. Ac
 volupe sane est intueri, quam pares illi & æqua-
 les amoris sui fructus perceperint, & pares eo-
 rum partes per quandam velut *trovopiac* præce-
 perit Deus. E decem enim quos hætenus al-
 ternante quasi fortuna, in lucem ediderunt, li-
 beris, pari ad sexum numero distinctis, infan-
 tulum primo HENRICUM CHRISTIANUM,
 & nunc puellam DOROTHEAM ELISABE-
 TAM, velut utriusque sexus primitias recepit
 Deus. Quas ipsi invidere, qua fronte ausint
 Parentes: cum & major illis pars salva sit: & e
 pueris non confirmatoris ætatis aliquem, sed
 a partu recentem: e puellis vero eam sibi vin-
 dicarit, quæ continuis agitata morbis quotidia-
 na pene morte perire videbatur. Huic (ut ad
 illam redeamus) Avus paternus obtigerat,
 CHRI.

CHRISTIANUS KORTHOLT, Civis Burgen-
sis in Insula Femaria primarius. Avia Paterna
femina ornatissima DOROTHEA PECHLI-
NIA, Avus maternus etiamnum superstites
HENRICUS KIRCHHOF Civis Rostochiensis
spectatissimus, & primariae Aedis sacrae Curator
industrius: Avia materna ANNA Blüten / o-
mni virtutum genere conspicua matrona.
Quibus honestissimis utique natalibus optime
augurari Nostrae licuisset, nisi cœlitum genti
suaeque Civitati jam dudum Deus illam desti-
nasset. Quare cum miseram & lenta tabe in-
fectam vitam per ipsos septem annos traxisset,
quandam spirantis mortui effigiem referens,
tandem hebdomadico illo anno peracto, ac o-
ctavo nondum impleto, atque adeo breviorē,
annorum via, & velut saltu, ad cœlum prope-
ravit, Anni clc lcc LXXIX. mensisque Fe-
bruarii die IV. hora X. vespertina, redonanda
DEO suo DOROTHEA, atque idem illud no-
men, cujus in fastis nostris pene eodem tem-
pore celebratur memoria, fastis cœlestibus, il-
lis Æternitatis tabulis ac libro Vitæ illatura. Se-
quatur ergo nunc Agnum illa suum Agna, Vir-
ginem Sponsum Virgo, Virginumque sanctis-
simarum, quas *illustriorem portionem gregis Christi*
Cyprianus vocat, sodalis pulcherrimos Deo
hymnos occentet: quæ hic inter nœnias, quas
ad somnum sororculæ suæ conciliandum, ipsa
ferali illo somno componenda, atque adeo ipso
in mortis cantillabat articulo, exspiravit. Ejus

quod reliquum est hodie hora II. efferetur. Quare Vos, Cives Academici, adhortamur, ut dulcissimæ puellæ exequias decenter ac prolixè exequi velitis, idque efficere, ut e pietate vestra Collegæ nostro, Præceptori vestro aliqua dolorum fomenta accedant. P P. add. XII. Februarii Ann. clb lbc LXXIX.

48.

Quartum ordini nostro, Cives Optimi, intra XIV. hos, quibus Academia stetit, annos, vulnus infligitur: cum Admodum Reverendus & Amplissimus Vir PAULUS SPERLINGIUS SS. Theol. Doctor, Professorque meritissimus, Collega noster honoratissimus, ac Præceptor non vester tantum, sed totius olim Holsatiæ laudatissimus, luctuoso nobis funere effertur. Nam quamquam Viri illius mors nec ipsi immatura, neq; nobis improvisa cecidit: frustra enim ab illo quatuor annorum, in extrema hac ætate, morbo continuo uno, salutis aliqua viriumque recuperatio sperabatur: dissimulare tamen & publicum & nostrum dolorem non possumus, cum insignia Viri illius merita maximæque doctes animo obversantur. Quis enim, cum in mentem venit illius temporis, quo Juventutis Patriæ Rex quidam & Imperator, artium ac lingvarum commune oraculum colebatur, non in-

intelligat, omni laude, prædicatione, literis monumentisque decorandum esse optimum. Senem nostrum: Cujus in sinu primum enutritæ Musæ, in hanc tandem Civitatem suam, immigrarunt. Quod si dignas Præceptoribus gratias referri non posse judicavit, qui orbem terrarum nominis sui gloria impleverat Alexander; quo honore, quibus præmiis ornandum existimatis Viri istius memoriam? qui non suæ tantum gentis homines, sed & externos, sed & Principes ac illustres, atque adeo eximios omni ex ordine, & hoc amplissimo quoque Collegio, Viros sibi habuit obnoxios: nam & illi, quorum celebrata spectataque omnibus eruditio felicissimam Magistri sui culturam ostendit, suam nunc recordationem ejus habent, & æternos se ipsi debitores profitentur; Quo magis vestri hoc officii est, Cives Optimi, versare nobiscum in animo splendidam doctrinæ imaginem, ut qui scientia sua vos auxit vivus, nunc etiam exemplo suo erudiat mortuus: cum illum πολλῶν ἀνδράξιον ἄλλων in hac vitæ suæ veluti tabula depictum exhibemus. Ut enim multa hæc habet insignia & memorabilia; ita vel ex ipsa eorum narratione ad ornandum juvandumque vitæ usum non pauca deprometis. Nihil magis ad vitæ felicioris auspicia facit, quam bene nascendi fors, quæ & NOSTRO obtigit, ut eo se nomine beatum non immerito sæpe prædicarit. Nam & florentissima Viris, opibus, commer-

ciis, literis Germaniæ Civitas HAMBURGUM illum in lucem edidit, ANN. clb lbc v. IX. Novembris die, ac Parente natus est, qui ut vivendi fuerat, ita & bene vivendi autor futurus erat. Non tam de filio sibi nato gratulabatur Philippus, quam de oblato filio suo Aristotele, quem vel Regiæ nativitatis gloriam post sapientis disciplinæ fortunam putasse accepimus. At NOSTRO, ut Parentis, ita Præceptoris Optimi, cui similem Germania tunc vix habuit, cum ipso natali sidero felicitas adfulsit. Fuerat ille Flensburgensis primum, hinc Hamburgensis Scholæ per ipsos triginta annos Rector, ac Eloquentiæ præterea in celebratissimo ejus urbis Gymnasio Professor meritissimus: Cujus eludo velut ex equo Trojano gregatim procedens, per omnem Germaniam, Daniæ, Holstatiam, Sveciam, virorum doctorum populus diffundebatur. Postquam ad sacrum regenerationis lavacrum, hereditarium illi a Patre, & Avo, Consule Eckernfordensi PAULI nomen inditum est, una cum ipso patriæ virtutes transfusæ videbantur. Omni primum opera studioque tum Pater ejus optimus, tum Mater, omnis generis virtutibus ornatissima, & honestissimo edita loco Matrona ANNA KRANENBERGIA, allaborarunt, ut ab ipsis ungviculis ad veræ pietatis sensum formaretur. Ubi primum in sinu parentum infantia suæ quinquennium absolverat, in altero tantum per sagacissimi ingenii sui velocitatem profligavit, ut

ut per septem quos vocant Scholæ Hambur-
gensis Classēs ad primam, undecimum tum a-
gens ætatis suæ annum, Patre studia ejus or-
dinante, penetraverit. Heic velut in bonæ
mentis officina Græcis Latinisque literis non
perfusus illi sed tinctus fuit animus, cum in au-
tores utriusque lingvæ optimos tanquam in
possessionem suam missus, omnem veteris sa-
pientiæ fundum mature occupavit, & variis o-
randi argumentis primum sub Parente, inde
sub præstantissimis ejus successoribus M. ZA-
CHARIA SCHEFFERO, Rectore, & M. JO-
HANNE STARCKIO, Con-Rectore, quorum
publica hodieque exstant Scholasticæ industriæ
Specimina, latinæ eloquentiæ facultatem exer-
cuit. Firmati illi jam tum ad graviora onera
læcervi videbantur, sed Parentis sui consilio ad
Academias prius ablegatus non fuit, quam in
Patriæ suæ Gymnasio auspiciis Clarissimorum
Virorum D. PETRI LAUREMBERGII Physicæ
ac Matthesios, Fratrum WERENBERGLO-
RUM, JACOBI præcipue, Logicæ ac Metaphy-
sicæ, M. ZACHARIÆ SCHEFFERI, Philoso-
phiæ Practicæ, M. HENRICI RUMPII Orien-
taliū Lingvarum Professoribus omnem disci-
plinarum orbem confecisset. Quas avidissime
ille arripuit, cum & in animo præcepta utilis-
sima meditatione continua frequentans ex in-
tervallo regustaret, & jam publice jam priva-
tim cum commilitonibus suis argumentis pu-
taret. E quibus principes tum erat HENRI-

CVS Langerbeck / cujus postea illustre in Sere-
 nissimorum Ducum Luneburgensium aula no-
 men fuit, & BARTHOLDVS Möller / ad sum-
 mum in Patria urbe Magistratum evectus: quo-
 rum illi e condiscipulatu suavissima viventi su-
 peraret memoria. Tot ille artibus ornatus co-
 piosusque venit in Academiam Rostochiensem
 Anno clc lxc XXIII. ut qui pleraque eorum quæ
 illic doceri potuit, animo præceperat, nunc
 decurso semel spatio a calce ad carceres revo-
 candus. Aderant illi consilio ac patrocinio suo
 M. JOHANNES HVSWEDELIVS, Parentis
 sui quondam Discipulus & in Hamburgensi
 Schola Collega conjunctissimus, quem ille
 Patris loco semper habuit: D. PETRVS LAU-
 RENBERGIUS, quo ille in Gymnasio Præce-
 ptore usus fuerat, D. JOHANNES TARNO-
 VIUS, D. JOACHIMUS STOCKMANNUS
 & ipsi olim in Sperlingiana studiorum incude
 positi. E Theologis præcipue PAULUM TAR-
 NOVIUM, & JOHANNEM QUISTORPIUM
 Doctores Ducesque sibi elegit. In JOHANNIS
 vero TARNOVII familiaritatem penitus intra-
 vit, ut per integrum dimidiatumque annum,
 ipsi συμπρωτης atque adeo contubernalis fue-
 rit: quo ille signifero magnos in divinarum re-
 rum, sanctæque lingvæ studiis processus effici-
 ebat: Cæteros vero omnes JACOBUM FA-
 BRICIUM, JOANNEM BACMEISTERUM,
 JOACHIMUM JUNGIIUM Medicos Philoso-
 phosque præstantissimos, & quos non? animo
 fin-

singulari & voluntatis inclinatione in se propensos habuit. A THOMA LINDEMANNO Antecessore celebratissimo, filiis suis moderator constitutus, ita se tractavit, ut amore ipsum, prosequeretur Parens, & illi non poenitendos istius magisterii fructus ceperint. Quamdiu vero apud illum se sustinuit, nihil ipsi favius fuit consuetudine, quam cum nobilissimis eruditissimisque convictoribus quotidianam, habuit, in quibus JANUS GEBHARDUS, Heidelberga una cum GRUTERO aliisque, præclaris viris pulsus, exin vero, Historiarum in Academia Gröningensi Professor, pulcherrimis ingenii monumentis nobilitatus, præcæteris nominandus. Cum itaque speciminibus tam publicis quam privatis, disputando scilicet ac docendo per tres & amplius annos laudem sibi famamque parasset, discessuro ab Academia Patribus cupientissimis Græcarum literarum professio, cum HUSWEDELIUS ad Scholæ Gymnasiique Hamburgensis Rectoratum evocaretur, oblata fuit: quem tamen ille honorem Parentis sui consilia suamque modestiam secutus deprecari maluit. Neque enim ipse metam illam ea ætate (quæ vix tertium impleverat septennium) assecutus sibi videbatur, quam tetigisse tamen omnes judicabant. Dum revocatus ne hyemem otio & silentio transigeret, Metaphysicis Astronomicisque Scholis, ac crebris Disputationum exercitiis juventutem ejus loci tam Academicam quam Gy-

mnasticam exercuit: Anno vero clb lbc xxvii: cum novo vere in Batavorum Academiis excurrit, ut Orientales literas, quarum ille Hamburgi sub M. RUMPIO, Rostochii sub MARTINO TROSTIO telam feliciter ordiri visus est, sub FRANCISCO GOMARO, SIXTINO AB AMAMA, CONSTANTINO L' EMPEREUR, quique primo nominari loco debebat, JACOBO GOLIO, atque quibus Viris! pertexeret, summamque illis manum adjiceret. Lugduni ubi majoribus quasi theatris propositæ scientiæ in luce, oculisque universi orbis celebri doctorum fama ac multo nomine effulgebant, Deos quasi indegetes salutavit: JOHANNEM POLYANDRUM, Magnificum tum temporis Academiae Rectorem, ANTONIUM WALÆUM, ANTONIUM THYSIUM, ANDREAM RIVETUM, DANIELEM HEINSIUM, JOANNEM GERHARDUM VOSSIUM, GILBERTUM JACCHÆUM, FRANCONEM BURGERSDICIUM, CASPAREM BARLÆUM, PETRUM CUNEUM, ADOLPHUM VORSTIUM, æterna ad fastos & posteros nomina. Quorum è doctissimis colloquiis, (quod compendiarie & secretioris disciplinæ genus esse non ignorant, qui altius ista arcana rimantur) ut fructus ille cepit uberrimos, ita amplum ipsi fuit eorum laudibus gravissimisque judiciis honestari. Ejus rei illi documenta data maxima sunt, cum HEINSIO, at quo judice! è
flo-

florētissimo illo doctissimorum juvenum cœtu designatus fuit, qui illustrissimo Senatus Regii Parisiensi Præfidi MEMMIO, commendaretur, ut in Rethorum Græcorum monumentis recognoscendis operas cum ipso jungeret, ac à bibliothecis ipsi esset, LUCÆ HOLSTENII hac in provincia successor futurus. Nihil accidere ipsi gloriosus poterat, siue Patronum, siue commendatorem, siue decessorem ejus resperis: quæ ut singula dignitatem amplissimam conciliare apta erant; ita mirifice illam augebant universa. MEMMIO nihil fieri poterat humanius, qui ad natalium fortunæque splendorem, interiorum literarum adjungens cultum, omni ope gratiaque illas cum illarum cultoribus fovebat, ornabat, ipseque vicissim ab iis ornabatur. Neque enim dissimulanda Gallicæ illa gentis decora sunt: nam cum cæteræ è manibus dimittant, aut in quotidianis vulgaribusque tracentur, sola propemodum ingenii & literarum gloriam, illustrium Principumque Virorum ordini vindicatam, tuetur & conservat. Hærebat lateri ejus affixus, Noster, perpetuus in quotidiano familiarique doctorum Virorum congressu, in publicis conventibus, in mensa, in via comes: hæsissetque diutius, tum suavissima honorificentissimaque conversatione, tum amplissimo stipendio illectus, nisi religioni suæ insidias metuens honestam modeste petere missionem maluisset. Non sine liberali honorario ac via-

co dimissus, cum in Patriam remigraret, illic advenientem rapida febris excepit, eoque inclementior, quod pauciores haberet dies *μὴ ἔ-
πας* quam *μὴ ἑώρας*, ut apud Gellium ex Hesiodo Phavorinus jocatur. Cujus ille furori ægre tandem ereptus ubi confirmaverat, per hyemem anni cl^o l^oc XXVIII, & alterum solidum, ne defidiosa sua esset permanfio, Latinae Eloquentiæ ludum aperuit, & ex umbra illa in solem produxit juvenes, qui publice de rebus lectissimis verba faciebant. Quæ cum mirifice placerent peritisimo istarum rerum judici JOACHIMO JUNGIO, tum Gymnasii Reçtori dignissimo, ejus commendatione effectum est, ut de Eloquentiæ professione ipsi deferendâ, eoque in emeriti Patris locum sufficiendo inirentur consilia. Illa verò ut ortæ inter Regem Daniæ, Civitatemque Hamburgensem dissensiones turbarunt, Bordsholmenfis Gymnasii cura, cui jam destinatus ille erat, pacatiora requirere tempora videbatur: iter, in Daniam facere instituit, ubi veteres Patris sui Amicos THOMAM FINCKIUM, ejusque generos Clarissimos, CASPARUM BARTHO- LINUM, ERASMUM BROCHMANNUM, OLAUM WORMIUM Hafniensis Academiae Professores: Soranæ verò JOANNEM CLÜ- VERUM, MEURSIUM, LAURENBERGIUM, eximios omnes magnosq; Doctores in percur- satione ista salutavit, cumque iis amicitias vel contraxit, vel instauravit. Inde in Belgium Galli-

amque Orientalium literarum amor retraxit, quarum admirabili cupiditate erudita cum JACOBO GOLIO, GABRIELE SIONITA, quo ille familiariter Parisiis usus fuerat, commercia ita ipsum accenderant, ut non leviter illa ligurare, quod facere malunt plurimi, sed devorare videretur. Vidit illustres Galliae Academiæ civitatesque, totamque adeo Galliam pervidit, non tam qua lutea lapidea, aurea & argentea, sed qua humana fuit & literata: Jamque Italiam petiturus erat, ni atrocis pestilentiae fama illum monuisset, ne in Morboniam voluntate sua rueret. Per Angliam itaque domum adeo attemperate rediit, ut Pater ejus charissimus, tribus jam annis septuagenario major, in complexu ejus extremum vitae spiritum ederet. Quo composito, Rostochiensensem iterum Academiam adiit, ut literariam illic palæstram juventuti aperiret. Dum in eo consilio est, mittuntur ad illum à Serenissimo Luneburgensium Principe AUGUSTO (cujus sancta omnibus est memoria) literæ, ipsius manu exaratæ, quibus ad filii nati majoris RUDOLPHI AUGUSTI educationem ac informationem evocabatur, magnifico ab illo ARISTOTELIS cognomine, cohonestatus. Quæ quam ipsi feliciter prospereque cesserit, res ipsa docuit: ipseque Serenissimus Princeps, ad Reipublicæ gubernacula accedens, insigni & nunquam satis deprædicanda pietate ostendit. Nam & li-

te-

literas ad ipsum dedit infra principale illud fa-
 stigium depreſſas, quibus *Virum de ſe optime me-
 ritum, adeoque uſq; Chariſſimum, & ab antiqua
 educatione ſuum* incredibili humanitate appellat,
 & memoriali ſententia, quæ annum ſcriptæ E-
 piſtolæ clō lōc LXIX, continebat, obſignavit:
*Deo & bonis præceptoribus non poteſt reddi æ-
 q̃viva lens*, quaſi rem annalibus dignam, aut
 non niſi cum ætate ac vita exeundam Præce-
 ptoris memoriam ſapientiffimus Princeps judi-
 carit. Ut nihil jam de præmiis, quibus illum
 ampliffimis ſæpe beavit, dicamus. Poſtquam
 eo in officio pene triennium conſumſerat, ad
 Bordſholmenſis Gymnaſii rectionem a Sere-
 niſſimo Holſatiæ Principe ſollicitatus, anno
 clō lōc xxxvi, provinciam ſibi delatam unaque
 Paſtoris Eccleſiaſtici munus, cui Reverenda
 Præpoſiti dignitas poſtea acceſſit, aggreſſus eſt,
 atque illic fortunarum ſuarum ſedem conſtitu-
 it, ducta Anno clō lōc XLIII. in uxorem Nobi-
 liſſima & lectiſſima Virgine AGNETA CA-
 THARINA, Admodum Reverendi Eccleſia-
 rum Holſaticarum Præſulis JACOBI FABRI-
 CII filia, nunc vidua eheu! mœſtiſſima. Quo
 ex matrimonio ſuperſtites Filia ornatiffimæ
 ANNA CATHARINA Reverendo Paſtori
 Elmschenhagenſi CHRISTOPHORO LAN-
 GIO nupta, & Virgo AGNETA ELISABE-
 TA Parentis ſui obitum deplorant: nam duo
 ipſius Filii, & una infantula immaturo ac acer-
 bo funere abrepti ſunt. Hic velut in regna
 ſua

sua vocatus, primas Reipublicæ partes, quæ in juventutis recta educatione ponenda sunt, dignissimus illarum moderator jure suo occupavit. Hic ille, si quid e vero trahunt fabulæ, e lapidibus homines, e lignis hermas formavit: feroces spiritus domuit Hercules: bonos in corpora sua Genios induxit, signante viam caduceo, Mercurius: non corporum, non fortunarum, quibus Reges dominantur, sed animorum Imperator. Quam ad præclara studia mentes excitavit! quo eloquentiæ succo orationem imbuit! quo ardore ad nobilem ingenii doctrinæque contentionem tam cupidos quam segnes accendit! quos per Romæ Heladosque campos circumduxit! Nunquam exemplo suo ipse defuit, sive soluta sive ligata, oratione quid expediendum esset: cujus illi tam prompta facultas fuit, ut ad prisca purique sermonis, tam Attici quam Romani genium, castigata ipsi verba quasi sponte sua promanarent. Denique in id omni cura incubuit, ne quis a palæstra sua ἀπάλαυσθαι in Academias prodiret. Quo cum ventum est, illi ut Phidiæ signum simul aspecti & probati sunt, idque accuratissima disciplina consecuti fuerunt, ut, cum alii per sublimiora studia repere, hi volitare viderentur. Hactenus egregie ipse munere suo defungebatur: verum cum de commutando in Academiam Gymnasio agerentur consilia, ad antiquitatum sacrarum professionem Theologicam a Serenissimo Principe designa-

ba-

batur, & magna illam fide ac diligentia postea administravit, Auditorum suorum desideriis semper intentus, eorum commodis utilitatique vel suo cum incommodo serviens. Nobis cum illo gratissima semper fuit consortio, ut qui a nemine officiorum promptitudine vinci se passus est: sive quid ex instructissima sua bibliotheca, ipse *βιβλιοθήκη ἐμψυχῶ*, depromeret: sive alias negotiorum procuraciones deposceret. Quatuor ab hinc annis longinquo implicitus morbo, ne in lectum quidem conjectus a statione sua discedere voluit, auditorum, ubi per morbi inducias licuit, spes ac vota impleturus. Sustinuerunt ejus impetum eximiorum Medicorum, primum CASPARIS MARCHII *τῶ νῦν ἐν ἀγίοις*, hinc JOHANNIS DANIELIS MAJORIS remedia efficacissima, ac ipse quotidie remissius placatiusque has calamitates tulit. Sed expugnavit tandem imbecillum corpus mali pervicacia, animo interim ad preces & divinas meditationes evigilante. Ideoque mature extremi itineris viatico instructus pios cum Reverendo Ecclesiæ Antistite sermones sæpe miscuit, decretoriam illam horam, quæ abeundum sibi vita esset, impavido animo expectans. Tandem in ipsa Paschatos vigilia, febris illi superveniens quasi diem dicere cepit, quæ vires redeundo semper acquirens ipsa Quasimodogenitorum Dominica, quasi alteri modo vitæ genitum, hora pomeridiana IV, illo ætatis, ut Parenti olim, ita & sibi fatali anno

LXXIII. rebus humanis exemit, cum prius ardentissimis suspiriis egressuram e corpore suo animam DEO commendasset. Cui æternum ille bene esse jubeat. Vos vero, *Cives optimi*, si quid ejus unquam dulce vobis fuit, si quis pietatis in Præceptorem sensus superest, ultimum humanitatis illi officium exhibere, & ea, quæ par est, frequentia ejus cohonestare exequias non detrectabitis. PP. in Acad. Kiloniens. d. VIII. Maji Anno clb lbc LXXIX.

49.

Est illa, Cives Optimi, bonorum malorumque, quæ in vita nobis obveniunt, inter se affinitas, ut mutua illorum damna sint, mutuæ utilitates, sibi que ex intervallo, vel luctus vel gaudii segetem & materiam ministrent. Quemadmodum enim *medio de fonte leporum*, ut venustissimus ille Romanorum inter Philosophos Poëta, & inter Poëtas Philosophus cecinit, amari aliquid surgit: ita ex ipsa fortuna miserrima & luctuosissima, e fatali calamitatum caligine lux aliqua salutis, velut e Chao suo dies, ex insperato emergit. Quod quanquam sylvestris illa & ex se nata Gentilium Philosophia perspexit: sunt enim in medio pulcherrimæ Virorum gravissimorum voces, qui ad minuendas vitæ molestias, fomentis hoc e fonte petitis utuntur; longe ta-

2 Z men

men certiora, ac sanctiora profitetur, quæ auctore Deo nobis tradita est sapientia. Ex hac scilicet Schola prodeunt non illa Socraticorum, aut Stoicorum mirabilia, sed Christianorum παραδόξα. stulta quidem illis visa, qui Φάσκειντες εἶναι σοφοὶ ἐμωράνθησαν, æternæ tamen & arcanae veritatis plenissima: ex infamia gloriam, e doloribus & lacrymis gaudia, e paupertate divitias, e morte denique ipsa vitam ac salutem nobis expectandam. Alia omnia docent, qui e Philosophorum Scholis bonorum rationem subducunt: quam multa enim ad perfectam εὐδαιμονίαν connumerantur! at felicitas nostra eaque vera ac unica sua e malorum gradibus capit incrementa: adeo quidem, ut & ipso illo malo, quod Φοβερότατον vocaverat Philosophus, nihil accidere nobis svavius possit: cum extrema illa summaque nostra εὐδαιμονία, per quam æternum nobis bene erit, in illo versetur. Quæ ut omnium insidere animis, omnium personare aures, implere pectora debent: ita præcipue illorum mentibus inhærescere, qui sacrorum antistites, religionis interpretes divina hæc dogmata quotidiana meditatione perpendunt, & perpetuis cohortationibus segnes hominum animos ad hanc disciplinam impellunt. Quæ aliis plerumque ex occasione subrepere solet novissimorum consideratio, ea illis familiaris, domestica est, & cum viva quasi mortis imagine inter expirantium gemitus, in ipsa doctrina oculis il-

illorum obversatur. Vel ultima illa Oratio, quam ad populum habuit Beatus noster Senex, cui hodie exequias ducimus, jam tum semianimis ac in limine mortis constitutus, & quasi extra se positus, cum corpore vix bene consisteret, sensus ipsi jam vacillarent, pleno tamen spiritu effusa, e Psalmi XC. commate XIII. illam Auditoribus suis *ἐὺ θάνατον* proposuit, ac cygnea ipsi jamjam morienti cantio fuit. Qui tum extrema viventis de morte præcepta, audivistis, & ab ore quasi vaticinantis pependistis, nunc exemplum mortui intuemini, & ad signa, quæ ipse Antesignanus noster sustulit, convolate Ecclesiæ militantis tam tirones quam veterani. Hujus Viri, quo conspectior sit virtus & pietas, juvat vitæ ejus quantum fuit brevi percurfatione recognoscere. Editus in lucem *ὁ Μακαρίτης* noster est Kiloni Anno seculi hujus XIX. XXII. Mensis Augusti die, Patre M. ANTONIO BURCHARDO, primum Pædagogii Stetinenfis, quod bonis artibus literisque semper floruit, Professore Clarissimo; hinc Ecclesiæ Marianæ Lubecensis Diacono, ac tandem Kilionensis Pastore gravissimo. Cujus supersunt præclara doctrinæ specimina, luculentus in Aphthonii Progymnasmata Commentarius: Ut vel hinc conjicere possimus, qua fortuna noster exciderit, cum ipsi sexenni puero paternam illam curam & *παίδευσιν* fata eripuerunt. Mater omni virtutum genere ornatisima URSULA, AN-

DREÆ Maken / Civis & Mercatoris Kiloniensis, qui ipsi avus maternus fuit, Filia. Avus paternus ANTONIUS BURCHARDUS Civis Lubecensis primarius: Avia Paterna MARGARETA SCHRADERIA. Avia Materna SOPHIA CARNARIA, D. MATTHIÆ CARNARII Archiatri Gottorpiensis Soror unica. Proavi Materni fuerunt MATTHIAS Maken / Consul Sunderburgensis, & JOHANNES CARNARIUS Medicinæ Doctör, Ducis Holsatiæ ADOLPHI Archiater, & Canonicus Slesvicensis. Hos ille majores, laudatissima nomina ostentare potuit, quorum in ipso rediviva virtus jam tum primæ ætatis igniculos excitabat. Mature itaque a provida Matre, quæ statim ab utero divinis illum rebus consecraverat, optimis Magistris in disciplinam datus, DAVIDI FICKERO Rostochiensis, SAMUELI PRÆTORIO Utinensis postea Ecclesiæ Pastori, M. ZACHARIÆ MOSERO Scholæ Kiloniensis Reçtori: quorum ille ductu solida lingvarum jecit fundamenta: quæ perfecit postea Celeberrimi nostri SPERLINGII, *ἄνθρωπος ἐν ἀγίοις*, incomparabilis illa cura & industria, tot Viris doctissimis spectata, tot nobilitata documentis. Nam cum Serenissimus Princeps & Dominus FRIDERICUS illum inter alumnos suos relatum Bordsholmensi Gymnasio expoliendum dedisset, per ipsos quatuor annos & ingenii bonitate & progressionem discendi adeo se Doctöribus suis probavit,

ut

ut dignus omnibus visus fuerit, qui cum septem commilitionibus aliis in Academiam Rostochiensem Anno clō lbc LXXXIX. ablegaretur. Illic tres annos solidos, jam tum animo ad majora firmatus, sublimibus impendit scientiis. Cum enim ignea mentis vis ad cœlestia semper adspiraret, præ cæteris Philosophiæ studiis, siderum contemplationi ac secretiori ejus doctrinæ animum applicuit, cujus insignia in feriniis ejus adhuc asservantur specimina: id tamen semper operam dedit, ut illa τ̄ ὁρατ̄ *θεωρεῖα* simul ad τὰ ἀρετὰ abduceret. Divinarum enim rerum studiis se immergens, toto pectore ita amplectebatur, ut solum id negotium ageret, id universum hauriret. Domum itaque Anno clō lbc XLII. reversus in palæstram sacram ipse descendit, & in lucem produxit eloquentiam non populo tantum sed & optimis quibusque probatam. Ejus dulcedine ita afficiebatur Generosissimus Dominus HANSUS RANTZOVIVS Hereditarius in Salzau, ut lauto stipendio conduceret, qui jam ætate confecto a concionibus esset. Verum, cum bellicæ tempestates huic consilio intercederent, Lubecam velut in portum quendam secessit: ubi M. SIRICH, Pastoris ejus urbis Primarii, & optime de Ecclesia omnibusque bonis meriti Viri, qui paterno illum affectu amplectebatur, commendatione benigna effectum est, ut HENRICUS BREMERUS spectatissimus illic Mercator filiorum informationi præfi-

ceret. Cum variis animi dotibus per hæc tempora inclaresceret, respicere illum cœpit Patria: nam elapso biennio Anno clb lbc XLV. Amplissimi hujus urbis Senatus literis evocatus, XVIII, Mensis Augusti die in M. CHRISTIANI FREIMANNI locum substitutus est Ædis Nicolaitanæ Ecclesiastes. Quod ille munus quanta fide quanta sollicitudine obierit, omnes norunt, idque argumento est, quod e tertiis ad secunda & prima productus per honorum sacrorum gradus adscendit. Nam JOHANNI BRAUERO, Archidiacono inde Successor datus, & ante biennium Dn. FRIDERICI JESSENI S S. Theol. D. & Pastoris Primarii partes illi oblata: quorum si annorum summam subduxeris quintum ille trigesiumque in ministerio divino complevit. Quo quantum honori ipsius ac venerationi accesserit, illi optime judicant, qui tanti muneris dignitatem suo æstimare pretio didicerunt. Nam si Regem ποιμένα λαῶν Homerus vocat, eoque præ cæteris ornat elogio: quid ni splendidiore titulo ποιμένα ψυχῶν efferamus? quem regio etiam caractere Deus insignivit. Ab aris ad focos veniamus: nam ut illis operatus est ea qua debuit fide & pietate: ita & horum, ut bonum decet Patrem familias, curam habuit. Quare ut & ipse typum exprimeret amoris mystici quo Ecclesiam prosequitur Christus, e Servatoris monito, pio puroque amore complexus est letissimam Virginem, ANNAM, JOHANNIS

Langemacken / Archidiaconi Collegæ filiam; Quo ex matrimonio XIV. liberi prodierunt, ut ea felicitate illam in Poëtarum fabulis decantatam Nioben æquasse svavisissima uxor visa sit. Sed perierunt ipsis pulcherrimæ in herba menses: nam quem fata tantum illis ostenderunt, elegantissimi ingenii puer, ANTONIUS sexto, & alter JOHANNES quinto ætatis anno, non sine magno Parentum dolore vita exierunt. Natus major filia URSULA, & altera ANNA DORORHEA virtutibus sexum hunc decentibus ornatissimæ, Reverendis Clarissimisq; Viris, illa M. GABRIELI WEDDERKOPFIO ad D. Nicolai Ecclesiastæ nupta: hæc M. MARTINO BÜTZERO ad ædem Spiritus S. Pastori desponsata. Natus major filius BERNHARDUS in Academia Rostochiensis studiis gnaviter incumbens, jam tum optime se ostendit & vergentis ad maturitatem ingenii præclara documenta edidit. Reliqui vel teneriore in ætate adhuc constituti, vel fato suo in ipsa infantia defuncti. Verum ut nimium fœcunde raro diuturnæ solent esse arbores: ita & hæc tandem partui ultimo immortua in cœlis promissa πολυτοκίας præmia adepta est. Quam familiaris suæ lacunam explevit postea ducta in Uxorem Virgine Nobilissima, ANNA CATHARINA, Viri nobilissimi & Excellentissimi CASPARIS MARCHII Med. D. ac Professoris ejusdem in hac Academia Primarii, exinde vero apud Serenissimorum Electorem Brandebur-

genssem Consilarii & Archiatri amplissimi filia dilectissima: Cum qua ipsum septennium mira animorum consensione morumque suavitate exegit, triplici præterea puerperio, unde unus superstes est CASPARUS, fœcundum. Nunc illa in acerbissimum hunc luctum conjuncta orbitatem suam deplorat, quam solatio suo sustentet, qui afflictis omnibus præsidio est Spiritus. Restat itaque ut è thalamo in fatalem lectulum & in tumulum ipsum vitæ ejus cursum deducamus. Cum ille valetudine ad declinantem ætatem prospera usus fuisset, ante biennium morbo pectoris difficillimo vix eluctatus pertinacis marasmi semina in debili corpusculo circumtulit: ut ipse summum sibi diem & ineluctabile fatum, ex quo inclinatae semper in deterius principia valetudinis sensit, auguratus fuerit. Quæ ipsum divinatio non fefellit: nam ante tres circiter hebdomadas, cum lateris sinistri debilitatem, capitis vertiginem, memoriæ defectus insignes notaret, paralyticus affectus ipsi primum adrepere cœpit, ut nec manus sinistra nec pes recte officium facerent. Nihilo tamen secius quamdiu lingua valuit, sola pene voce & spiritu infirma illa latera sustentante, statione sua, vel stans pede in uno discedere noluit, habuitque orationes ad populum gravissimas, in quibus nulla animi fugientis vestigia auditorum aliquis deprehendit. Ex illo vero tempore uno quasi ictu ad casum dari omnia visa sunt. Nam
in-

ingravescens illum morbus lecto affigebat, nihil proficientibus, quæ Vir Celeberrimus & Collega noster honoratissimus Dn. D. JOHANNES DANIEL MAJOR adhibebat remediis, quorum è prioribus morbis vires ipse, perspectas satis habebat & exploratas. Igitur manum jam injicientibus fati, ab humanis ad divina præsidia se totum convertit, & cum salutari viatico devotam Servatori suo animam instrui curasset, mitioraque insultantis morbi intervalla suspiriis, precibus, piis ad uxorem, Liberos Generos alloquiis extraxisset, tandem XXIX Mensis Augusti, atque adeo septimo ab natali suo die, pertinaci & fatali sopore in ferreum illum perpetuumque concedente placide animam exhalavit. Qua in re memorabilia sunt statuta illa & divinitus quasi ordinata tempora: nam idem mensis & pene dies, qui vitæ intulit, sacerdotio admovit, & moriendi necessitatem LX ætatis anno definivit. Qui enim supersunt natali suo dies, residuas jam ante extinctæ flammulæ scintillas nominare possumus. Agnovit & pene animo hujus vim fati præcepit o *Μανὰς* noster. Exstant enim super hoc argumento versiculi quidam ab illo scripti non incompti nec inelegantes, quos è scriniis ejus hic proferemus:

*Augustæ luces, celebrati Caesaris astro
Dilecti Soles, memorandi ab origine nostra
Et Fatis! adeo sapientis sanctio Cæli*

Augustumque decus; nostrisque exercita fatis

Sæpe dies Mensem notat & conscribit Amicum!

Cæterum nos beate defuncto augustos & magnos menses, vel ipsam potius æternitatem gratulamur: Viduæ, Liberis, Generis, Fratri optimo nunc in lamentis luctuque jacentibus, divinam illam opem apprecamur, quæ labantes confirmet, afflictos erigat, & efficacissimis remediis exulceratos animos refocillet. Vos, vero, Cives Optimi, qui toties verba è suggestu ad vos facientem audivistis, sequimini, etiã nunc ad tumulum præeuntem, & quem vivum spirantemque olim *εὐθυνασίας* Magistrum habuistis, nunc mortui mutique Doctoris exemplo sapere discite. Quocirca cum hodie hora II. pomeridiana efferetur, & Viri hujus virtus mereatur, ut cumulate ipsi præstetur officium, etiam vos atque etiam adhortamur, ut supremum illi honorem frequentes persolvatis. Facietis non solum, quod vestri est officii, sed & dolorem ac ægritudinem eorum, qui hac calamitate fracti sunt & confecti vestra humanitate non leviter mitigabitis. P. P. d. IX. Sept. Anno clb lbc LXXIX.

Nunc tandem eo in tempore versamur, Cives Academici, quo, post compositos belli tumultus, ac reductam pacem

cem, redditumque terris suis Serenisimum, nostrum PRINCIPEM, omnia primis his nundinis ad lætitiā potius, quam ad lacrymas & luctum spectare videntur. Confluit flos gentis, universa Holsatiæ Nobilitas, tam pacis quam belli arribus incluta: veniunt ad sacra hæc Mercurialia, mercesque varias comportant institores: adsunt, qui pecunias fœnore auctitant, nomina exigunt, vetera expungunt, transcribunt, nova contrahunt. Quibus qui destinantur occupationibus, (nam omnes in longitudinem consulunt) non facile cogitant, & sibi imminere fatale, illud & horribile carmen: ἀπόδοτε τὸν λόγον τῇ οἰκονομίᾳ σ8. Nam & magnus ille Paterfamilias, qui annos numeravit nostros & menses, imo & ἔργα καὶ ἡμέρας notat, decretorium illum diem designavit, quo talentorum nobis creditorum rationes exposcit. Cum nos horrea complemus, nummos congerimus, regna nostra miramur, ac ipsi nobis hoc plaudimus celeusmate: Αναπαύεσθαι, Φάγε, πίε, εὐφραίνεσθαι, nobis non advertentibus terribilis à tergo subrepat apparitor, è vita, vel prima illa nocte, discedendum monet. Sumus & nos hunc in orbem velut in mercatum, aut perpetuas nundinas missi; totaque nostra vita, si Pythagoram audimus, mercaturæ similis: è veteris vero Poëtæ sententia, ipsi Dii institores sunt, qui omnia vendunt laboribus: Summi autem Doctoris & Salvatoris nostri consilio, ita mercatu-

tura nostra exercenda, ut *χρύσεα χαλκείων*, pro-
 perituris mundi opibus, pretiosum illum uni-
 onem comparemus: ita pecuniæ dispenfan-
 dæ, ut thesaurum in cœlis nobis colligamus.
 Venire nobis, inter mercantium strepitus,
 nummorum tinnitus, illa in mentem debent,
 Cives Academici: & exemplo vos suo docebis,
 qui hoc ipse tempore è vitæ statione vocatus
 decessit Nobilissimus Amplissimusque Vir
 DN. GEORGIUS Sülzberger / Urbis hujus
 Consul per ipsos novem annos meritisimus.
 Cui cum funus hodie ducendum sit; Vitæ e-
 jus historia vobis, pro more veteri, ante ocu-
 los ponenda est. Editus ille in lucem est, in
 patria hac sua urbe, quinto hujus seculi anno,
 Parente, Viro Integerrimo honestissimoque
 HIERONYMO, Gemmario, ac Cive hujus lo-
 ci primario, Matre lectissima, ac virtutibus
 sexum illum ornantibus conspicua MAGDA-
 LENA, celebratissimi Gemmarii Antvverpi-
 ensis, GEORGIO DE VEEDIS filia, qui Avus
 illi maternus fuit. Avum Paternum habuit
 Nobilissimum Amplissimumque Virum,
 CHRISTOPHORUM Sülzberger / in celeberrima
 Imperiali Civitate, Augusta Vindelico-
 rum, Senatorem: Aviam Paternam, vel ipso
 nomine suo satis Ornatam LUCRETIAM.
 Avia Materna fuit MAGDALENA Sub-
 mans. Ut ab optimis illi Parentibus bona
 indoles ingenita fuit, ita mature satis se
 exeruit, accedente disciplina ac præceptorum
 in-

industria. Sub quibus ut præclara jecerat fundamenta, anno ætatis nono & decimo, in celeberrimam Rostochiensẽm Academiam missus est, ut juri civili operam daret. Florebat enim tunc temporis Professoribus celeberrimis. Quorum ductu & auspiciis cum in Jurisprudentiæ duceretur penetralia, brevi tempore magnos in ea progressus fecit. Illos ut ornaret amplius, vicinam Gryphisvaldensium Academiam adiit, ac tandem Regiomontanam. Assiduũ se Doctoribus discipulum præbuit, quibus ut horas, ita privato studio dies impendit, & palæstræ simul forensis, quæ Regiomonti in primis aperiri publice solet, exercitia usibus suis accommodavit. His in Academiis per undecim commoratus annos in patriam rediit, ut de re sua familiari cum tutoribus transigeret. Ubi tum ob præclaras ingenii dotes, morumque suavitatem, facile in sui amorem pellexit Virginem lectissimam, Spectatissimĩ, gravissimique Viri, COSMI STEVENII, Senatoris Kiloniensis, filiam unicam. Cum vero negotia quædam necessaria in Borussiam & Poloniam revocarent, amorum suorum complementum in reditum, quem paucis mensibus circumscripserat, distulit. Verum cum circa hæc tempora affligere patriam bellicæ inciperent tempestates, & curationes tamen illæ implicatum ac constrictum, ultra tempus sibi præstitutum tenerent, pauci illi menses in ipsum solidum sexennium

extracti sunt. Quo elapso, ut vere tandem domi, & apud se esset, domum rediit, domumque duxit tot annorum Sponsam, anno clc lxc XLIX, ut & cum pace reducta ad amores suos redire videretur. Quam suave, cum illa vitæ focia, fuerit ipsi per XXV. annos connubium, non facile dici a nobis potest: quod & liberis utriusque sexus fuit fecundum. Quinque enim suscepti ex illo: at ex iis duo priores vivi lucem non aspexere: duo alii, & ex iis virgo tam formæ elegantia quam virtutum sanctimonia laudabilis, ac jam marito matura, in primo ætatis flore, de vita decesserunt, stetitque tandem per unum HIERONYMUM, hac in Academia Juris Studiosum, & post mortem etiam stabit patrii nominis memoria. Quo ille postea in orbitate ac viduitate sua se solatus est unice, speque de illo concepta senectutis suæ fovit ægritudinem. Reficit enim animam Patris fugientem filii amor, tenet, mulcet, resuscitat. Quod honores & *Μακαρίῃ* attinet, per gradus illi processerunt. Nam primum in XVI. Virum ordinem cooptatus, hinc Civium Orator, & ex illo tandem Senator Anno clc lxc LXIV. Camerarii dignitatem biennio post, & ipsum tandem Consulatum Anno clc lxc LXXII. ingressus est. Quæ fide, dexteritate, prudentia hic seu aliosque tractaverit, norunt cives. Neque enim nostrum est fucata aut ambitiosa oratione extollere, quæ illorum animis infixæ sunt. Mirae-
rat

erat, ut notum omnibus, & αὐτοχθων in illo
humanitas, quæ non contemnenda profecto
virtus magno rebus agendis sæpe adjumento
est, & occultis quibusdam illecebris hominum
animos demulcet. Corpus ipsi firmum obti-
gerat, quod ad extremam usque ætatem nun-
quam gravibus tentatum morbis fuit. Supe-
rioris tamen anni autumno, cum calculi dolo-
res signum tollerent, hunc quasi ducem suum
morbi affinitate illi juncti secuti sunt: e quo-
rum longinquitate paulatim recreato meli-
scule quidem fuit, ut sacris interesse, ac præ-
esse consiliis aliquoties potuerit. Sed ut pla-
ne valeret, senectus ingravescens, quæ ipsa
morbus est, non permisit. Ideoque sub nundi-
narum initium, recrudescente & vires ab ipsis
induciis fumente morbo, debilitate subita tota
ejus vis illum adorta est, ut quanquam bene
sperare jubebant, quæ efficacitate sua se com-
mendabant medicamenta; natura tamen suæ
succumbens moli, eventu optato non respon-
derit. Ad Deum itaque se convertit, cum de
corporis salute jam conclamata essent omnia,
de animæ salute unice sollicitus. Illi seriis eam
precibus commendavit, ac XXIII. Januarii die,
vinculis suis solutam, & quasi manumissam,
Domino Servatori que suo tradidit. Ejus quod
reliqum est hodie hora II. effertur. Vos ve-
ro, Cives Academici, ad quos nostra hæc spe-
ctat oratio, ut quam cumulatissime extremum
illi honorem præstare velitis, rogamus. Me-

retur Viri virtus, jubet pietas, svadet humanitas, ut frequenter ejus celebretis exequias, commilitonis vestri dolorem hoc etiam officio solaturi. PP. die XXX. Januarii Anno clc lbc LXXX.

51.

Disputatum jam olim a nonnullis fuit: an in Matronis quoque publica oratione celebrandis virorum occupari facundiam honestum decorumque videri possit. Neque enim defuere morosi virtutum censores, qui vel in optima muliere ne mediocres quidem laudes deprehendere sibi visi sunt. Stagirita certe noster virorum virtutes operaque honestiora quam feminarum habet, hasque illis ipsa natura meliores: ne quid de iis dicamus, qui in omnes sine discrimine, convicia, dicteria, sannas spargere non verentur. At æquior tamen humaniorque illorum sententia est, qui sexui molliori amplius aliquid indulgendum rati, vel simulacra virtutum pro veris collaudant, quo conspectior esse solet, si qua in illo labes apparet: vera autem animi & industriæ ornamenta majoribus quam in virili præconiis extollunt. Quare & apud acerrimos morum censores Romanos increbuit illa invaluitque consvetudo, qua illustres feminae non secus ac viri fato functi publicis laudibus ho-

honorabantur. Quod & in more positum sagacissimæ Chinenfium genti traditur; apud quam prudentiæ civilis non minima pars est, & ad publicam disciplinam ac vitæ honestatem insigne auctoramentum, ferri laudibus feminas virtutibus conspicuas, mactari honoribus, ornari monumentis post mortem, pro meritorum magnitudine, amplissimis: ut pulcherri-
mis excitatæ Matres exemplis non se tantum ad optimos mores, sed & liberos, quorum prima in illarum sinu educatio est, ad præclaram indolem Reipublicæ profuturam, componant. Recte itaque ad illorum exemplum, elogiis etiam nostris celebramus feminas præstantissimas, quæ ex vita discesserunt: ut ab illius sexus speciminibus vel cum pudore suo discant viri in vitæ rationibus subducendis negligentiores. Solent feminae, si quæ corporis eximia specie, ut pleræque, præ viris sunt insignes, tacita quadam vi illorum in se oculos convertere. Cui si pulchrior animus divini illius pulchri quasi lux & scintilla sociatus fuerit, eo vehementius in sui venerationem mentes omnium rapiet, quo fulgentiores e venusta facie virtutis spargi radii solent, ac altiores in illarum animis illa radices figit. Nam cum illa in sexu hoc singularis est, longo post se viros intervallo relinquit, cujus innumera ab omni ævo extant documenta. Ideoque non in scite, a Poetis virginea exprimi forma solent, quas quasi Deas aut Ideas nobis repræsentant Vir-

tutes: ac si tum demum, cum sub illa specie apparent, omnibus sint numeris absolutæ. Quando itaque, Cives Academici, ad quos nostra hæc spectat oratio, hodie præstantissimæ matronæ funus ducitur: ad tristissimum mortalitatis exemplum, & præclarum publici elogii argumentum respicite. Nos quidem labore nostro eo invitius defungimur, quo immaturior ipsi mors, acerbior Marito jactura, accidit: cujus dolorem ex arcta illa animorum conjunctione vitæque usu facile ipsi æstimabitis. Vos autem exemplo hoc commonefacti mature sapere, atque ex vivorum numero, antequam moriamini, exire discetis, cum in summo ætatis vigore fata non opinantes comprehendere videatis. E vitæ vero cursu, quem pie defuncta tenuit, etiam aliqua, quæ ex usu vestro sint, deprometis. Edita in lucem est, quæ nudius nonus ex hac vita decessit, Nobilissima Lectissimaque femina, URSULA Gaussten/ Nobilissimi Amplissimique Collegæ nostri Dn. JOHANNIS PHILIPPI ROSMANNI, J. U. D. ejusdemque Professoris, ac Academiæ Secretarii Conjux dilectissima Anno clc lxc XXXVI. duodevigesimo Octobris die, Patre Viro spectatissimo, JOACHIMO Gaussten/ Cive hujus urbis primario, ac Ædis Nicolaitanæ Curatore jurato: Matre ANNA, THOMÆ Röpffens/ eximii itidem mercatoris, filia, femina virtutibus sexum illum decentibus ornatissima. Avus Paternus fuit Vir Amplissimus Dn. RU-
DOL-

DOLPHUS Faust / Archivarius & Proto-Notarius Provincialis Regio-Ducalis meritissimus: Avia Paterna fuit LUCIA, Nobilissimi Dn. JOACHIMI Reichen Reg. Maj. Dan. Consiliarii gravissimi filia. Avia Materna, ANNA Langemacken. His orta majoribus, post sanctissimum regenerationis lavacrum, mature in tenera ætate igniculos solertis animi exercuit, : Cui in Parentum sinu enutritæ instillabatur pietatis, virtutum virginearum, bonorumque morum, cum rei familiaris scientia, amor. Qua cultura quantam profecerit, maturior ætas ostendit. Nam cum ab obitu carissimæ suæ conjugis, quæ pie defunctæ amita erat, Nobilissimus Amplissimusque Vir, Dn. JOHANNES de LENGGERKEN, Consul hujus urbis hodie meritissimus, nunc, ob ereptum & orbitatis & senii sui solatium, in luctum gravissimum conjectus, hanc domus suæ rectioni præficeret, tanta diligentia ac sollicitudine rebus ejus curavit, ut heredem instituere, imo in filiam cooptare Anno clc lcc LXXI. non dubitarit. Quem & ipsa, dum viveret in adoptivis constituta sacris, non adscitium, sed verum ac genuino affectu Patrem invenit: ut ille filiam tanquam ex se genitam deplorat, ac in nepte sua infantula imaginem matri suæ superstitem intuetur. Nam in matrimonium data Collegæ nostro Dn. D. JOHANNI PHILIPPO ROSMANNO Anno LXXII. die XVI. Septembris, talem se erga maritum, amore, obsequio, officiis, per ipsos

novem annos gessit, ut satis ostenderet, quantum maritalis flammæ pectore suo clausum haberet. Cujus testes geminæ filiolæ, quarum altera ipso in partu suffocata, altera quatuor cum dimidio annos nata jam ab ipsis ungviculis in florentissimam indolem adolescit. Qui autem ipsi superstes est maritus tanto afflictus & prope confectus luctu est, ut ipsi se superstitem vix meminerit. Valetudine, qua olim satis firma usa fuerat, quasi prostratis uno ictu viribus excidit; & vegetum validumque corpus in causarium in ipso ætatis fastigio degeneravit. Quo cum per aliquod tempus luctata, quintodecimo hujus mensis die de membrorum omnium doloribus conqueri cœpit. Vocati statim in consilium Medici præstantissimi nulla artis suæ præsidia intenta reliquerunt. Sed valentior morbus fuit, qui per insidias & cuniculos subrepens ipsam vitæ arcem omni furore suo & obsedit & expugnavit. Inter illos tamen conflictus cum fugientis jam jam animi vestigia ipsa deprehenderet; mature salutari viatico ad cœlestem patriam ex hoc tumultu tendentem instruxit. Per quietem verba vocantis audire sibi visa, ac vigilans cœlorum apertorum speciem ante oculos sibi versari falsa est. Quibus illa visis velut stimulis excitata in preces ardentissimas solvebatur, hymnos etiam mortuales, ipsa funeri suo præfica, velut cygneum aliquod melos clara voce cantatura, nisi monita fuisset, ut viribus parceret & sub-

mis-

missius sonaret. Quod cum faceret, inter hæc cogitata, sensim ac placide vitam posuit, cum ad annum quartum supra quadragesimum illam produxisset. Exuviis tumulo condendis dies iste dictus est. Vestrum itaque est, Cives Academici, extremum pie defunctæ persolvere officium. Quod ut sponte vestra faciatis, quanquam ipsa humanitas imperat: tamen ut facere velitis, rogamus, ac memores etiam monemus. P.P. XXX. die April. Anno clb lbc LXXX.

52.

FUnus iterum vobis indicimus, Cives Academici, ex hac ipsa tabula, unde *ἐγγαγή* *ἡμετέρας* Scholasque nostras denunciamus. Quod cum facimus, plenius aliquid & melius Chrysippo & Crantore dicimus, & in altioris sapientiæ penetralia vos immittimus. Omnium scilicet doctrinarum complementum fastigiumque est *εὐθανασία*, quæ nunquam accommodatius quam exemplis docetur ac discitur, quamque Stoici, Stobæo in Eclogis teste, *τὸ σπυδαίων* propriam esse dixerunt. Pauci sunt vel ex ipsis sæpe Doctoribus, qui ad hanc metam respiciunt: ad quam tamen oculo irretorto collineare omnes debent. Nostis quam sollicitè in fabulis Terentianus ille Demea rem suam agat, cujus plenæ sapientia voces sunt:

Nil prætermitto: consuefacio: deniq;

Inspicere tanquam in speculum in vitas omnium

Jubeo, atq; ex aliis sumere exemplum sibi.

Idem & facere Christianos Patres familias longe æquius est, qui præter vitas etiam in mortes omnium tanquam in speculum inspicere atque hinc exemplum sumere sibi jubeant. Instillent hoc liberis parentes, ut ab ipsis ungviculis atque adeo a cunis tumulos meditentur, & vitam suam omnem nihil aliud, quam μελέτην λύσεως, uti Gregorius Nazianzenus ait, esse existiment. Quem Philosophiæ fundum quo maturius occuparunt, nondum profundius terreno huic ~~luto~~ immerse mentes, eo minus mortem φοβερῶτερον illud, ut Aristoteles, vel Φρικώδες αἶσος κακῶν ut Epicurus vocabat, expavescent. Quod iis accidere solet, qui vel inter quotidianas rei familiaris curas in diem vivunt, nec consulunt in longitudinem; vel fortunis voluptatibusque ebrii, nunquam crapulam hanc, nisi cum extrema nocte ferreoque sopore edormiscunt. Qui vero in mundum hunc tanquam in carcerem se conjectum intelligunt, gravem sibi potius ipsam vitam, & in illa omnia dura sibi proposita sentiunt. In luto hic hæremus, in sylvis, inter spelæa ferarum vivimus, exilio perpetuo multati. Ideoque ortum suum respiciunt homines pii, animumque ad æternæ sedis quietem ex his turbis subductum componunt, quando extremam illam horam, quam πύλην τῆς ὀνίως ζωῆς Clemens Ale-

Alexandrinus vocat, votis impatientibus expectant. Quod si Pythagoræi illis qui Philosophiæ studiis animum procoluissent, bonam spem superesse existimant; si Socrates in Phædone τὰς καλὰς ψυχὰς cum optima spe hinc discedere credidit: quid de iis dicturi sumus, qui ad Salvatoris sui præscriptum vitam instituentes, se totos in virtutum sacrarum exercitio contriverunt. Qua illi spe pleni, qua animi lætitia elati ex hoc ergastulo, ex hac miseriarum nube, ad æterna gaudia prorumpent, in ipsa morte διδάσκαλοι: εὐθυμίας, tranquillitatis præceptores, ut eos appellat Chrysostomus? Cogitanda hæc nobis quotidie sunt; sepulchra præ oculis præ pedibus locanda, cadaverum horror animos luxuriantes compescat, æternorum gaudiorum promulsis fatiscentes animos recreet, ut e quotidiana mortis Schola ad vitam proficiamus. Exemplà nobis quotidiana versantur ob oculos, & intra duos menses, e nostro ordine, Conjugum propemodum συναποθνήσκόντων. Extulimus medio hujus anni Vere maritam, & sub ejusdem anni ipsumq; ætatis suæ solstitium excessit maritus; cui funus hodie ducimus, cujus Vitæ historiam ὡς ἐν κεφαλαίῳ vobis recitamus. Natus est Vir Nob. & Amplissimus JOHANNES PHILIPPUS ROSMANNUS, J. U. D. & Prof. Extraordinarius, Academiae item Secretarius. Anno clc lxc XLII die XXIX. Junii Patre ECCARDO, Præfecturæ Bordsholmenfis Subquæstore, Ma-

tre fœmina ornatissima ANNA Kielmans / quæ
superstes filii mortem turbato mortalitatis or-
dine deplorat. Avus ipsi Paternus DETLE-
VUS. Avia Paterna ANNA Nam. Avus Ma-
ternus REIMARUS Kielman. Avia Materna
COECILIA Neymanns. His ortus ὁ μακαρί-
της noster Parentibus, postquam Christianis
sacris initiatus, statim ab ipsa infantia pietati
virtutibusque excolendis operam dedit sub
Præceptoribus domesticis. Post hæc tenerio-
ris ætatis quasi πρῆγυμνάσια celeberrimum
tum temporis Bordesholmenſe Gymnasium
adiit, quod auspiciis τῶ νῦν ἐν ἀγίοις PAULI
SPERLINGII magis magisque efflorescebat.
Hinc Lubecæ biennium studiis operam dedit,
unde in Academiam Giessenſem concedens al-
terum illic biennium explevit. Anno ſeculi
huius LXII. illud ſapientiæ ſcientiarumque o-
mnium toto orbe ſpectatiſſimum emporium,
Lugdunum Batavorum ſalutavit, atque illic
in ſinu Muſarum per ipſos tres annos commo-
ratus, laborum ſuorum ſpecimen exhibuit.
Nam de Jurè Emphyteutico Diſputationem,
ipſe conſcripſit, & Præſide Jcto celeberrimo
Dno. a THIENEN defendit. Poſtquam itaq;
hactenus intra privatos parietes ſteterat ejus
induſtria, tandem & ex umbra in lucem prodi-
re voluit, cum primum viciniſſima nobis Orbis
Europæi regna Galliam & Angliam perlustra-
ret, & domum redux Anno LXVII. huius A-
cademiæ Secretarius conſtitueretur. Acces-
ſit

fit postea Anno LXXII. Doctoris titulus, & cum ipso Professio Juris & quidem Institutionum extraordinaria data est. Conspirarunt illis honoribus etiam amores. Nam in fortunarum subsidium & complementum, eodem die cum ille Cathedræ sisteretur Doctor, domum ipsi ducta est Nobilissima lectissimaque Virgo URSULA Fausten/ Civis Kiloniensis primarii & Aedis Nicolaitanæ Curatoris jurati, JOACHIMI Fausten filia, ante duos ipsi menses acerba morte erepta. Duæ ex hoc matrimonio ipsi progeneratæ filiolæ, quarum altera ipso in partu suffocata, altera ANNA MARGARETA, quadrima puella, utriusque Parentis præsidio jam orbata. Magna erat hæc fundi ejus calamitas cum Uxorem sibi carissimam, in ipso ætatis fastigio interemptam videret. Cujus ille desiderium cum non ferret, habitantem in lubrico laxoque corpore animam, per continuum istum mœrorem, paulatim vinculis suis solvit. Continua illi cum corpore ipsa pene mole sua spiritum suffocante lucta fuit; unde graviter, cum ex una hac molestia complures orirentur morbi, sæpe decubuit. Et nunc postremo cum præter luctum acerbiorum, qui solus conficere illum poterat, accederent itinera ob æstum solis hoc tempore flagrantissimum illi periculosa, hospitantem in visceribus morbum domum reportavit. Statim itaque e curru in lectum deportatus vires corporis in dies singulos imminui sensit. Quæ cum certissima

ipſi eſſent mortis iſtantis indicia, neque remediis locus eſſet amplius, ad animæ Medicum confugit, ac ſalutari viatico inſtructus, itinere in Patriam cœleſtem ſe accinxit. Ardentisſimæ ejus preces: manus verſus cœlum porre-ctæ: ſuſpiria e pectoris penetralibus, ex ipſius animæ quaſi fundo ducta: geſtus in moribundo etiam ad religionem compoſiti. Omnia in illo pietatem, etiam cum ſpiritus deficere videbatur, ſpirabant. Cum ex eo quæreret Myſta, qui ipſi adſtabat, quaſi Ερμῆς Ψυχάγωγος divinusque apparitor: an cupide & libenter hinc diſcederet: Ego vero, reſpondit, animo æquo, imo gaudenti ac lubenti diſcedo, Paulinum illum adjiciens: *Cupio liberari a corpore, & mortis hujus: Cupio diſſolvi & eſſe cum Chriſto.* Quibus ille ſanctiſſimis meditationibus immerſus, placide tandem e vita hac deceſſit XX. die Junii annos natos. XXXVII. Quandoquidem ergo ejus quod reſtat hodie hora Ila efferetur. Vos, Cives Academici, ad funus deducendum invitamus. Quod ut facere velitis & communia, quæ alter alteri debemus officia, & ipſa humanitas pietasque eſſagitare videntur. P. P. KilonI, d. XXVII. Jun. Anno clc lbc LXXX.

53.

Qui in hunc orbem immiſſi ſunt, plerique ita vitam inſtituunt, ut perpetuam ſibi illam velint, ac ultra naturæ ſuæ ſortem, & fati leges animo ex-

excurrant. Adeo nihil est nobis, hac luce, hac vita, hoc spiritu carius; felicesque nobis videmur, si quod datum est vitæ, vel inter turbines & tempestates, quoquo modo traducamus, ac animum hunc in custodia corporis retineamus. Quotidie nova vivendi consilia capimus, & de fatiis nostris ratiocinamur. Nulla dies ita sera est, quæ non in longitudinem consulat, & annos novos sibi promittat. Pro vita una tot haurimus calamitates, & quasi parturimus: pro illa DEO vota facimus, opes congerimus, terras mariaque circumcursumus, sudamus, algemus, totque nos curis & vigiliis frangimus. Hæc una scilicet tanto apparatu consiliorum & certamine digna: cum nihil illa sit levius ac infirmius: nostræ autem tam vehementer contentiones tanquam *συναμαχίαι* esse videantur. Ad mortis vero umbram ac nudum nomen quam pallemus, trepidamus, nec animo tantum commovemur, sed etiam, toto corpore perhorrescimus! Adeo iniqui sumus rerum æstimatores, neque suo pretio, sed pravis hominum opinionibus omnia metimur. Nihil habet profecto mors, quod horrendum sit. Quis enim nolit ex ergastulo in libertatem, e mari turbulento & naufragiis infami in portum, ex ærumnis ad quietem, e tenebris in lucem contendere? Sed ea est hominum *διὰ θεοῖς*, ita animati omnes sumus, ut ea quæ ante pedes sunt, quæ capiti cervicibusque nostris incumbunt, tantum videamus, & quod præsens tanquam

quam in manum datur bonum, jucundum habeamus. Quæ enim votis desideriisque nostris blanditur, utut bracteata felicitas, eo tamen quod blanditur, placet, ac fallaci illa specie, vivos videntesque circumducit, umbram pro Junone sæpe amplexos. Pauci sunt, qui futura cogitent & præsumant, ac æternitatis illa, spe erigantur: cum illa nobis per omnem vitam volvenda sint, ac tota mente contrectanda. Colligendus intra se mature est animus, ac cogitationibus nostris cœli munimenta perumpenda. Illic quasi in domicilio suo & arce locandus ille spiritus, est, quem inde corpusculi nostri inquilinum accepimus. Delendæ ex animo sunt quotidianæ illæ rerum mortalium formæ ac imagines, & posito hoc sensuum tirocinio, ad infinita illa, æterna, & ultra mortalitatis contagionem sublata, mens avocanda est. Quare talaria videamus, & evolemus, antequam luto hoc, utut aureo, merfi pondere moleque nostra opprimamur. Non alium se gesfit, cum viveret, cui hodie funus ducimus. Nam nec seniles illi tantum, sed & viriles illi curæ fuerunt, ut se seculo eximeret & æternitati etiam in temporis hoc decursu vindicaret. Non enim acerbis tantum casibus, quibus hæc expofita vita est, monitus, sed & morborum crebris, sub extremam ætatem insultibus exercitatus, minime ἀπάλλαις & ad illam Dei Civitatem miles accersit. Quam enim futura secum commentatus fuerit, vel ex eo appa-

paret, quod vitæ historiam ipse diligentissime
consignaverit, & e divinis D. Pauli Oraculis
illustri illo, quod Epistolæ ad Romanos XIV.
capite, commate VII. VIII. & IX. legitur, pane-
gyrin illam exequialem suam ornari voluerit.
Jam dudum ab ipso hæc mysteria edoctus erat,
quam non nobis, sed Domino vivamus ac mo-
riamur, ejusque jussu e statione nostra disce-
damus. Juvat e commentario ejus hic excer-
pere, quæ ipsemet notaverat. Natus itaque
est Nobilissimus atque Amplissimus Vir. DN.
JOHANNES deLENGERKEN quinto ineun-
tis hujus seculi anno, sub ipso Solis in signife-
rum ingressu, XII. scilicet Martii Mensis die,
in antiqua illa Saxonum gente, quæ ut Martia
virtute olim Romanis formidata fuit, ita e Ger-
maniae populis prima renascentium literarum
gloriam occupavit: unde per totam dehinc
Germaniam, Belgiumque propagata est. O-
snabruga patria ipsi urbs, quæ in lucem dedit,
& Christianismi sacris initiavit. Pater AME-
LINGUS deLENGERKEN, Urbis istius Con-
sul Amplissimus: Mater, CATHARINA
Schlaffs. Avus Paternus ipsi cognominis JO-
HANNES deLENGERKEN, Senator Osnab-
rugensis spectatissimus, cujus frater AME-
LINGUS hic Kiloni consulatum gesit. Avia
Paterna REGINA Hönemans / JOHANNIS
Hönemans / Senatoris Osnabrugensis filia. A-
vus illi Maternus, Nobilissimus Amplissimus-
que Vir, GERHARDUS Schlaff/Philosophiæ
&

& Juris utriusque Licentiatus, Consul patriæ urbis & Consiliarius Provincialis, cui una cum cæteris Consulibus celeberrimus Saxoniae nostræ Historicus D. DAVID CHYTRÆUS tertium & vicesimum Saxoniae suæ librum inscripserat. Avia Materna SUSANNA Gerenbergæ / CHRISTOPHORI Gerenbergæ / Senatoris ac Secretarii Osnabrugensis filia: E tam præclara stirpe degener nasci non poterat furculus, nec e tot Consularibus ac Senatoriis familiis proletarium aut plebejum aliquid emergere. Quare providi piique parentes operam dedere, ut ludo literario in patriæ urbe ab ipsis ungviculis indoles illa exerceretur, & digna majoribus palæstris tirocinia poneret. Neque enim defecerat, quæ a literarum *παλιγγενεσία* ad hæc tempora perducta fuerat provida Scholarum per Westphaliæ administrationem, unde AGRICOLA & ERASMUS prodierunt, communes Germaniæ & Belgii Doctores, ac Orbis Eruditi, quasi Heroes quidam & Principes: & integer postea hominum doctorum populus, præclaris omnes & amplissimis per Germaniam honoribus ornati. Postquam itaque Noster solida literarum in Schola Patria fundamenta jecerat, anno ætatis vigesimo in celeberrimam Academiam Rostochiensem concessit, ut exedificaret, quæ feliciter instituerat. Ut enim prima illa lineamenta in Scholis ducta sunt, ita studiorum se in Academiis facies vivique colores produnt. Illic Juris scientiæ applicuit ani-

animum, & per ipsos quatuor cum dimidio annos ita excoluit, ut ex illa studiis optime inchoatis robur & firmamentum circumponeret. Nam Scholis tam publicis quam privatis, doctisque velitationibus se ipsum aliosque jam satis ad palæstram illam armatus, exercuit. Sub autumnum Anni clō lōc XXIX. Rostochio Lubecam vocatus, per annum illic substitit, clarorum doctissimorumque hominum familiaritate usus & consortio. Quo factum est, ut cum de doctrina ejus ac moribus optimis fama passim spargeretur, Beati quondam Aulæ nostræ Cancellarii DN. NICOLAI Jungeni filius unicus ipsi de manu, quod ajunt, in manum traditus fuerit. Illum in Wittebergensem Academiam deduxit, ubi per annum moratus, in Scholis Jurisprudentiæ Wesenbecianis legum ancipites vias rationesque & pro omnibus & contra omnia disputandi quotidiana exercitatione percepit. Cum vero a primo illo Lipsiensi prælio Anno clō lōc XXXI. cum autumno pestilentia Academiam internecino morbi genere depopularetur, ex illa tum temporis quasi Morbonia in vicinam Lipsiam confugit. Sed & hic illi in omnem magni terroris acceptum, quod una nocte, intra urbem, sanguineo tincti colore fontes visi sunt. Ideoque Gryphisvaldiam se recepit: sed quia bellicæ illic tempestates Musarum regno solitudinem & vastitatem intulerant, Rostochium adiit, & veteres illic lares suos saltavit. Hinc a-

mi-

micorum svasu Hamburgum Anno clō lōc XXXII. petiit, ibique pragmaticorum sacris & causis orandis se totum impendit. Quod cum eligeret vitæ genus negotiosum, domesticas, quibus fori tædia interpungeret, ac molestias solaretur, delicias quæsiuit, ac invenit facile, Uxorem dilectissimam, CATHARINAM GERTRUDEM, pie defuncti, GERHARDI Schröders / Canonici Lubecensis, filiam unicam, cumque illa Lubecæ IX. Junii die, Anno clō lōc XXXIV, nuptiarum solennia celebravit. At Hamburgi, ubi forensibus negotiis animum adjecerat, ac ante aliquot annos Vicarii apud Capitulum beneficio auctus fuerat, fortunarum suarum figere sedem constituit. Sed visum aliter fatis fuit. Vix enim quatuor inter primos illos thalami lusus menses excefferant: cum ipsis ejusdem anni Kalendis Octobribus, e recentibus tori gaudiis ad Agni nuptias illam mors evocavit. In hac viduitate ac solitudine sua biennium integrum consumsit. Quo elapso, Anno clō lōc XXXVI. V. Octobris die Virginem ornatisimam lectissimamque LUCIAM, RUDOLPHI Fausten / Protonotarii & Archivarii Provincialis meritissimi filiam altero sibi matrimonio junxit. Qua occasione factum est, ut per foceri sui commendationem inter Dicafterii Provincialis Advocatos fuerit cooptatus. Quam ob causam sedes domiciliumque suum Kiloni collocavit, ædesque suo sumptu exstructas Anno clō lōc XLIII. inhabitare,

cœpit. Sed inauspicato hæc demigratio instituta fuit. Vix enim annus intercesserat, cum bellica e Septentrione tempestas illum hic in loco Martis injuriis opportuno deprehendit, ac repentina illa vi perculit & afflixit. Nam ipse una cum aliis ex Equitum & doctorum virorum ordine, (qui jam fati concesserunt,) Anno clō lōc XLV. in arce Kiloniensi per XVI. dies captivus detentus fuit, usque dum Serenissimo Principe urgente e carcere dimitteretur. Sed cum istis se procellis committere diutius consultum non existimaret, & vel intestina fraude, vel vi aperta gererentur multa; itineribus deviis Hamburgum, velut ad asylum quoddam, cum uxore sua dilectissima confugit. Quæ turbæ postquam compositæ, Kilonium rediit, & Anno clō lōc XLVIII. Senatorio hujus urbis consilio admotus toto illo tempore prudentis consideratique hominis persona digna gessit, ac civilem se admodum egit. Enituit certe egregia in illo virtus, ea in provincia naviter fatis versato. Clavum enim semper rectum tenere assuetus a concredito sibi munere oculos nunquam dejecisse visus est, in rebus expediundis acer & industrius. Est hominum genus, qui ad excogitandum acutissimi, ad audendum impudentissimi, ad efficiendum acerrimi, ingenii multiplicis & tortuosi, intemperiarum & negotiorum pleni: quorum a moribus longe aberat Noster: nam probitatem ac ingenuitatem omni acumine versuto,

vaframentis præstigiisque forensibus antiquiorem habuit. Qua animi rectitudine ut gratiosus apud Collegas & Cives semper fuit: ita, facile obtinuit, ut Consulatus illi dignitas Anno clō lōc LXIV. Februarii VI, magno illo memorabilique Græcorum fastis, si Æliano credimus, die deferretur. Cujus particeps esse non potuit, quæ superiore anno, die Aprilis XXI. extremum in mariti complexu vitæ spiritum Uxor ediderat. Non fuerunt illi sine omni turbine & nebula usque ad Consulatum, traducti anni. Novis n. belli furiis agitatus Septentrio Anno clō lōc LVII. has quoque terras flammæ vicinitate corripuit. In fuga itaq; salutis suæ præsidium iterum quærere coactus, postquam annum hic unum suspensio inter, spem metumque animo exegerat, Lubecæ quasi e specula & securo secessu barbarum istarum spectator fuit: cum tamen istius exilii sui penes se solatium haberet, suavissimam conjugem. Qua postea privatus omnes vitæ annos in orbitate sua, fidei tamen amorisque conjugalis pristini non immemores transigere decrevit; Ne quid tamen Res familiaris detrimenti caperet, curarum domesticarum sociam elegit, URSULAM, JOACHIMI Faustæ qui beatæ Uxoris suæ frater erat, filiam. Quæ cum ter gravissime decumbenti conjugii summo studio semper præsto fuisset, ac dexteritatem probasset, jacentem fovisset, hoc quasi adminiculo bis erectam ac refocillatam: tam insigni

fi-

fidei non vulgaris experimento incitatus, illam in senectutis suæ solatium ac firmamentum, jam tum designavit, si conjugii expertem ducere vitam sibi proposuisset. Non displicuit ipsi tamen postea initum cum JOHANNÉ PHILIPPO ROSMANNO, Academiae tum temporis Secretario, hinc Juris Doctore & Professore Extraordinario connubium: cujus die XVI. Decembris Anni clc lbc LXXII. hic publice celebrata sunt solennia. Quoniam vero Anno clc lbc LXX, die XX. Decembris illam bonorum, quæ in Holsatia possidebat, heredem scripserat, die XVII. Augusti anni sequentis adoptaverat: eadem domo mensaque cum filia generum adoptivum accepit, comiterque ac benigne semper habuit. Vixerunt itaque una, usque dum fati aliter visum. Nam quam ille sibi heredem destinaverat, quam filiam dixerat, a qua senectuti suæ præsidium speraverat, illa Parentem suum in hac mortalitatis lege explenda prævit, ac XXII. Aprilis die superioris anni, e domo illa paterna elata, e thalamo amplexibusque mariti in tumulum illata est: a qua ille tam ægre divelli potuit, ut XX. Junii die uxorem via illa sequeretur. Alia itaque rerum suarum consilia inire cō Managjns noster coactus. Nam per mortem Adoptivæ testamenti tabulis prioribus everfis, novas confecit, ne quis post mortem suam locus litibus aperiretur. In Consulatu illo, cui admotus erat, ita se ipsum aliosque ac rempublicam

tractavit, ut ubique & virtus & opera ejus eniteret. Cujus extrema in difficillima illa Patriæ nostræ tempora inciderunt, quibus pene omnem succum sanguinemque pristinae felicitatis amisimus. Non defuit tamen, quamdiu per valetudinem licuit, consilio, quo rebus turbulentis ac pene profligatis succurreret; cum interim plurima rei familiaris ex acerbissimis tributis naufragia faceret, ac plagas etiam suas, inter gravissima & mortifera Reip. vulnera acciperet. Ex quo vero pedem domo efferre senectus & valetudo prohibuit, quibus potuit rationibus, vel intra ipsos parietes, atque adeo lectulo suo consilia fidelia deliberantibus dedit: remittente tamen per inducias morbo, nonnunquam in publicum prodiit, ac senatui consultanti vel praefuit vel interfuit. Gravescebat ejus cum superioris anni exitu valetudo. Mense enim Decembri novis insultibus tentatus, cum extremum corpusculo tot morbis concusso admoveri arietem, seque ad finem mortalitatis pervenire persentisceret, de divino Numine sibi propitiando laboravit unice. Cum itaque salutari medicina animæ prospexisset, altero statim die in fatalem illum lectulum conjectus, unde tandem in sepulchrum elatus est. Assidue ipsi inhærebant febres, quarum vim cum amoliri exsucca jam & effœta natura non posset, accedente etiam diarrhœa, spiritusque superstites dissipante, instar lucernæ humore defectæ jamque extremum

mum lumen spargentis, defæcatos, & a corporea contagione, continuis febrium flammis per purgatos animi igniculos Patri illi Luminum reddidit, & velut victimam immolavit. Neque magna vi in distrahenda a corpore anima opus erat, quæ ab illius interiore recessu evocata in labris jam hæere videbatur, præsertim cum preces ad DEUM funderet. Quamdiu decubuit, plagas a DEO immissas silentio tulit, nec vultu aut gestu dolorem ullum prodere visus est. Nam divinæ se suaque omnia, voluntati permittens, cum vel vivere vel mori suo se Domino, non sibi, sciret, ejus vel stare vel cadere arbitrio paratus fuit, & prout visum esset summo Imperatori, vel manere, velestatione sua discedere. Sed videbatur tamen ad æternam illam quietem sponte sua ferri animus, quam ille jam spe præceperat, cujus desiderio plus quam morbo ipsoangebatur. Omnia humana levia ducebat præ æternis illis & immortalibus, quæ statim fordebant, frigebantque, postquam cœlestium cupiditate flagrare cœperat. Non semel optavit, ut rebus sibi humanis ante nundinarum tempus exesse liceret, cum ad heredes suos familiaria illa, quæ solent tum frequentari, negotia transire, mallet, quam illis nunc amplius distineri. Libros nocturna diurna que manu volvit, qui *Εὐδαιμονία* Christianam ipsum docerent, quamdiu per sensuum vigorem licuit. Quando ipse oculis uti suis ac voce non potuit, alios

rogavit, qui legerent preces, ac verba præirent: quibus ille non aures solum lubentissime commodavit, sed & fugientis jam animi vestigia, retraxit, ut fatis pressum caput ad dulcissimum JESU nomen erigeret. Sexto ante beatum, suum excessum die iterum impetrata peccatorum venia sacro-sancta cœna Dominica usus fuit, atque ex eo tempore cum fatalem illam, horam appropinquare animadverteret, nihil ipsi longius fuit quam ut videret illum cœlestis Sponsi quasi proxenetam & nuncium; Divini verbi præconem, supremi illius agonis parastam: qui precibus suis alloquiisque firmaret, qui sitientem animam limpidissimis illis Israël fontibus refocillaret. Cumque in his meditationibus totus esset, die Januarii XXV, quo divina lux olim Saulum circumfulgens, & cœlestis Academiae tirocinio imbuens, in Paulum commutavit, hora XIIa, postquam LXXV. annos, decemque menses fecisset, vivere desuit, vel potius æternam illam vitam, novos natales suos ingressus, inchoavit. Æternum illi bene sit, cujus etiam post fata nominis apud nos supererit memoria. Quandoquidem vero hodie hora II. exequiæ ipsi parantur. Vos, Cives Academici, rogatos volumus, ut extremum hoc beato Dn. Consuli officium haud gravate velitis persolvere, & funus frequenti comitatu exequi & honestare. P. P. Dominica Erro Mihi. Anno clb lbc LXXXI.

54.

QUamquam multa nos circumvenire mala incautos solent: multi undique affligunt dolores: nam in rerum hoc perpetuo fluxu ad scopulos aliquando ut impingamus necesse est: nulla tamen gravior incutitur plaga, quam cum filios, domus nostræ præsidia atque firmamenta, ante diem efferri videmus. Ut enim tenerrimus ille amor est, quo in carissima thalami pignora, ipsa nostra viscera, ac animæ nostræ partes rapimur: ita vulnus est acerbissimum, quo animus pervellitur, quo a nobis ipsis divelli videmur, cum ab ipsis divellimur. Qui amoris fomites sunt, iidem dolorem ipsum in nobis incendunt. Sive enim animo nostro obversetur, quod nati sint e nobis; multo ægrius ferimus jacturam tam gravem, quam si membro aliquo mutilemur: Sive educationis illam curam, qua nulla esse svavior potest, respiciamus; fatendum est nulla re moveri magis angique animos nostros posse; quam si virtutum nostrarum imagines oblitteratas, si bonæ mentis messem in herba suffocatam, omnemque spem occisam videmus. Sive posteritatis habeatur à nobis ratio: de nominis nostri generisque memoria sublata querimur, atque una cum liberis, in quibus vivere poteramus, periisse nobis videmur. Nihil denique est, omnium illorum, quæ hominibus sancta caraque sunt: nulla tanti sunt, quantacun-

que etiam fortunæ blandimenta: ut præclari
 istius boni, quod è liberorum educatione per-
 sentiscimus, elevare opinionem possint. Mi-
 rum itaque non est, si, cum animo illa pervol-
 verit, intimis sensibus angatur Magnificus,
 Nobilissimusque Dominus SAMUEL RA-
 CHELIUS, Reverendissimi, Serenissimi que
 Principis nostri Consiliarius, ac Eiderstaden-
 sis Præfectus, Collega quondam noster hono-
 ratissimus, qui maximæ spei filium, immatu-
 ra sibi morte nunc ereptum luget. Videmur
 nobis ex ore ejus audire, quæ disertissimus
 quondam Orator Himerius funebri illa lauda-
 tione in filium Rufinum protulit lamenta, con-
 signante ista in Bibliotheca sua Photio: *Ἡγνόουν
 ὁ δείλαιος ἀντὶ μὲν λυγρῶν ἀνιστάς σοι τάφους
 ἀντὶ δὲ οἰκιῶν, ῥύμβους καὶ χώματα· ἀντὶ δὲ πλῆ-
 τος καὶ χλιδῆς, ἱεραγικώτατα δῶρα τῇ ἐν ἀνθρώ-
 ποις, ἐνθάφια: Nesciebam infelix pro balneis me-
 tibi sepulchrum, pro domibus bustum, & tumulum,
 pro divitiis & pro voluptate funeralia, quæ homini-
 bus omnium tristissima sunt, erigere.* Nos quidem
 dolori illius non intercedimus: sunt enim i-
 pfi dolendi causæ & multæ & gravissimæ: sed
 tamen ex ipsa illa commemoratione & vulne-
 ris istius refricatione remedium dolori quæri-
 mus. Accidit enim nonnunquam, ut ipsa
 calamitatis nostræ accuratior meditatio ani-
 mum demulceat, ut quod incussum nobis est
 vulnus, dum scalpello ampliatur, vel acerbi-
 us tractatur, eò facilius cicatricem obducit.

Nam

Nam nec exiguo ac levi solatio est genuisse, filium non degenerem, quique, cum vitæ ulterioris in his terris particeps non esset, novam illam ac æternam in Civitate Dei ingressus sit. Ut magnis excidere ausis non inglorium est; ita præstantissimi boni jacturam fecisse, non omnis solatii expers, cum vel sola istius memoria possessionisque pristina gloria non parum recreemur. Vobis verò, Juvenes optimi, eo lubentius inspicienda hæc exempla, proponimus, quo longius à meta illa vos abesse creditis, ut has vitæ nostræ necessitates variosque casus, etiam in vegeta illa ætate mature vobiscum commentari discatis. Quemadmodum itaque ad honorem pie defuncti, ita ad vestra interest commoda, fisti vobis atque ob oculos poni, hæc mortalitatis humanæ theatra. Natus est ὁ μακαρίτης Noster, Juvenis Nobilissimus, PETRUS GEORGIUS RACHELIUS, Helmstadii Anno clb lbc LXIV. die XVIII. Martii, Patre, Magnifico, Excellentissimoque Viro, Dn. SAMUELE RACHELIO, Academiae tum Juliae, ac postea Nostræ Professore celeberrimo, ac Collega honoratissimo, nunc Reverendissimi ac Serenissimi Principis Cimbrici Consiliario ac Præfecto Eiderstadenfi: Matre vero Nobilissima CATHARINA URSULA Nothschröders / quæ Kiloni d. XXV. Aug. An. clb lbc LXVII diem suum obiit. Avus ipsi Paternus fuit, Vir Pl. Reverendus M. MAURITIUS RACHELIUS, Ecclesiæ

Lundinensis apud Dithmarfos Pastor Primarius: Maternus, Vir Nob. & Spectatissimus JOHANNES Nothschröder / Quæstor Poppenburgensis in Ducatu Brunsvicensi: Proavus Paternus, Vir Prudentissimus & Integerrimus, JOACHIMUS RACHELIUS, Senator ac Camerarius Oppidi Malchovii in Ducatu Megapolitano. Proavus Maternus: HENRICUS Nothschröder / Senator Oppidi Wattenzen / in Ducatu Brunsvicensi. Non poterat à tanto Parente, tam præclara Matre & honestissimis his Majoribus ingloria prodire progenies: nam & in ipsa illa tenerrima ætate jam tum, amplissimam optimarum virtutum spem ostenderat. Statim à puero ab ipsis incunabulis pietatis in illo bonæque doctrinæ igniculi excitati, per Parentes, & qui ipsi dabantur ad Virtutem Duces, Præceptores lectissimos. Elucescebat in illo liber & ingenuus animus & ad præclara quæque factus. Observasses vel in ista ætate honesta, recta, laudabilia, decora, quæ speciem aliquam τὸ καλὸν jam repræsentabant. Inest quibusdam ingeniis sua quædam singularis & nativa bonitas, tantopere Illustri illi Angliæ Cancellario, Baconi, in Sermonibus suis de rerum interioribus, deprædicatà: qua illa sponte sua sine stimulis, monitis, præceptis, sine pœnarum & verborum acerbitate omnia virtutis industriæque ornamenta sectantur. Ex adverso alii sunt, quibus ingenii quidem

ce-

celeres sunt motus, ad ex cogitandum acuti, memoriam firmi atque diuturni: sed refractarius in illis animus, ferox, pervicax, turbat omnia, & inconsiderato impetu evertit. Melioribus istis ingeniis accenseri Noster poterat, quem integerrimum semper imperiisque suis obedientissimum deprehenderunt Parentes: ut vel hinc conjicere liceat, quam illos tam cari capitis jactura remordeat. Tonningæ apud Parentes, in medio studiorum suorum cursu, febris tentari cœpit pertinaci ac diuturna, cujus vi morbi tandem consumptus est. Mature itaque Pater, ne sub palustri illo cœlo altius radices febris defigeret, in Academiam Kiloniensem una cum fratribus illum ablegavit, ut tenuioris salubriorisque usu aeris morbo paulatim subtraheretur fomes. Sed accessit postea ad febrem quotidianam morbus aquæ intercutis, qui à levibus primo initiis, vix Parentibus animadversis, aut in periculi suspicionem tractis, tacitis subdolisque progressionibus augebatur. Quod cum animadverteret Parens, ab inferioris Saxonix Comitibus redux, duorum hic Medicorum fidei & solertiæ illum commendavit. Quare nihil opis artisque suæ vel Celeberrimus Dn. D. JOHANNES DANIEL MAJOR, Collega noster honoratissimus, vel Experientissimus Dn. D. Langemaech / in morbo illo oppugnando prætermiserunt. Sed frustra quidem illi contravim gravitatemque ejus contendebant, exhau-

hausta jam tum per quartanam semestrem & huic succedentē quotidianam & hydropa corpore, omnibusque naturæ viribus everfis. Cum itaque fatalem sibi horam imminere & persentisceret & divinaret Noster: definitum enim, à fatis obitus sui diem mente & cogitatione prospexit: missis omnibus, ad Deum & divinarum rerum meditationem se totum convertit. Parenti ille suo carissimo, cum ante, mensē ad illum inviseret, supremum vale, dixit, hāc in vita non amplius illum visurus. Nihil itaq; vel spei vel rei terrænæ quod moraretur, supererat. Vocatus ad illum divinus Orator atque internūncius animum deprehendit in doloribus intensis constantissimum, & cœlestis gratiæ sitientissimum. Refocillatus itaque divino cibo preces ad Deum fudit ardentissimas, horam illam acerrime exspectans, qua ad Autorem suum naufraga ē corporis illo sui diluvio enataret anima. Illa vero inter, ministeria, amplexus, lacrymasque fratrum, salutis suæ portum die XXVII. Septembris hora VIII. attigit. Æternum bene ille sit! Parentem vero Nobilissimum solatia illa erigent, quæ ē divinæ humanæque sapientiæ fundo jamdudum præcepit. Habeat ille nunc apud Deum fidei suæ amorisque in illum perpetuum hunc velut obsidem filium, in cœlestem, familiam summo vel imperii vel patriæ potestatis jure cooptatum. Vos autem, Cives Academici, ad quos nostra hæc spectat Oratio,

rogamus hortamurque, ut exuviis ejus, quæ
tumulo hodie inferentur, vestræ mortalitatis
memores, extremum persolvere officium,
velitis. Quod cum ipsa humanitatis ratio,
tum Celeberrimi in hanc Academiam Paren-
tis merita jure quodam efflagitare videntur.
Valete. P. P. Kiloni d. V. Octobris Anno clb lbc
LXXXI.

55.

QUod Hebræorum nonnullis in usu po-
situm esse accepimus, ut primo ine-
untis anni die sepulchra adeant,
mortalitatis sibi memoriam sub an-
ni auspicia refricaturi: id nos quoque, Cives
optimi, primo hoc anni mense facimus, cum
ad Viri Optimi funus deducendum vos invita-
mus. De Celtis memoriæ prodidit in libro de
anima Tertullianus, eos ad virorum fortium,
busta pernoctare consuevisse, quod inspirari si-
bi abditarum rerum cognitionem, ex illa cum
mortuis conversatione, crederent. Rectius
nos piorum hominum monumenta, ut Scho-
lam nobis apertam lustrabimus, ut in rem qua-
si præsentem deducti mature sapere, non tardi
utilium provisos, discamus. Nulla se effi-
cacioribus exemplis ingeret animo doctrina,
juventuti eo diligentius inculcanda, quo se a
fatis suis abesse longius existimat. Qui in hac

ἐν θανάσιος schola γηράσκει πολλά διδασκόμε-
 νος, optime tempora & studia sua collocavit.
 Non invitamus autem ut præficas ad lamenta
 ingloria, quibus nihil in piorum exequiis opus
 est, qui mediis in triumphis extremum vitæ di-
 em obierunt, & triumphales potius hymnos,
 quam tristes a nobis elegos expectant. Quod
 si olim de se vana laudum suarum gloria elatus
 Ennius:

Nemo me lacrumis coret, ne funera fletu

Faxit, cur? volito vivu' per ora virum.

Quanto rectius mœrorem & nœnias ab exequi-
 is suis proscribent viri pii, qui non tam per ora
 virum volitant, quanquam & æterna justî est
 memoria, quam ante ora Dei in æterno ipsius
 conspectu versantur: nobis hic ad Babylonis
 flumina sedentibus, & luto nostro immerfis.
 Nobis hic inter belluas, vel sterquilinia potius,
 qualia hominum inquisitor reperiēbat Dioge-
 nes, vivendum est. Obsidemur undique furi-
 is, & si aliunde non est, certe a nobis ipsis im-
 minet nobis periculum, qui hostes nostros in
 sinu gestamus, & blanditiis nostris fovemus.
 Vix pedem movemus, & in laqueos & casses in-
 cidimus; vix oculos flectimus, & formarum il-
 lecebris irretimur; vix manum vertimus, & ir-
 ruenti ponderi succumbimus. Dabimus ita-
 que operam, ut mature animum a mortalium
 rerum contagione abstractum, ad cœlestia ex-
 citemus, & per funera piorum, velut viva spi-
 rantiaque documenta, æternæ sapientiæ præ-
 lu-

Judia nobis præfiguremus. Exclamabat Zenone diem suum obeunte Rex Antigonus: *Quale theatrum amisi!* Cum enim eo familiariter usus egregias in ipso animi dotes suspiceret, totam ipsius vitam, ut qui virtutum chorum, vivus circumferebat, theatrum appellabat, idque nunc sibi ademptum dolebat. Quidni idem in Virorum piorum demigrationibus nos dicamus? *Quale theatrum amisimus!* Imo potius: *Quale theatrum nunc panditur!* Illud enim non prius, quam ab hac mortali scena discessum est, aperitur, tumque latius effulget, cum extremo illo agone, vitæ fabulam bene absolvimus. Nec perire illud potest, quod continua hominum memoria renovatur, & in Dei & beatarum mentium conspectu, ad viventium imitationem proponitur. Præclarum & vobis, Cives Academici, theatrum explicuit, qui vita jam discescit Nobilissimus Amplissimusque Vir, Dn. GEORGIUS GREENIUS J. U. L. & Archivarius ac Protonotarius Provincialis Regio-Ducalis meritissimus, Vir, quod ultra omnes titulos est, morum probitate & integritate conspicuus. Magnum hoc laudis & virtutum theatrum est, in hoc pessimo & virtutum sterili seculo, Bonum audire omnibus, quem licet rusticiores, e pessimorum scilicet ingenio, titulum, omnibus præferre pompis & triumphis non dubitat Seneca. Natus itaque ὁ παναγῆτης noster est Lubecæ Ao. clō lōc XXXI, Martii XIII. die, Patre Viro spectatissimo & integerri-

mo

mo HANSO GREEN, Mercatore primario; Matre honestissima & sexus sui virtutibus ornatissima EMERENTIA KIRCHMANNIA, Viri Celeberrimi, JOHANNIS KIRCHMANNI filia. Avus ipsi paternus fuit GEORGIUS GREEN; Avia ANNA Meystets: Proavus, JACOBUS GREEN. Avia materna EMERENTIA Schelen/ Proavus maternus GERHARDUS KIRCHMANNUS, Proavia GESA Dreyers: honestissima, & apud Lubecenses spectatissima Civium nomina. His natum Parentibus, his ortum majoribus non destituebant bonæ indolis & mentis semina. Quæ ubi primum exerere se cœperunt, excolendum optimis artibus & lingvis hunc animum suscepit Avus in hac palæstra πολλῶν ἀντὶ ἀξιοῦ ἄλλων, KIRCHMANNUS. Cujus viri quanta fama, apud Germanos exterosque fuerit, nemo in bonis literis versatus ignorare poterit; ut in felicitatis suæ parte maxima reputare debeat Noster, hoc Avo, tot Mercuriorum Polycleto & Phidia, prima illa bonæ mentis, lingvarum artiumque lineamenta duxisse. Ex hujus officina in alteram illam Bordsholmensensem concessit, cui tum præerat optimorum ingeniorum Prometheus sagacissimus SPERLINGIUS. Totum in hac palæstra, hoc duce, quadriennium consumpsit, unde in Academiam Rostochiensem, postquam jam suo niti remigio poterat, non ut ἀπὸ ἡνέες νεοσσοὶ vulgo in præcipitia ruere solent, evolavit. Hic Jctorum Celeberrimorum pri-

primum Dn. D. SCHUCMANNI, hinc Dn. D. REDEKERI opera usus, solida jecit Juris Romani fundamenta, quæ in Altorffina Academia, sub LUDWELLI, Viri Clarissimi, auspiciis, perpetuus ipsius domesticusque auditor, ac postea in Academia Julia perfecit: ut, tandem publico legitimæ scientiæ specimine in Academia Rostochiensis proposito, disputatione sc. inaugurali de *Sententia* honores doctoris capef-
fendi licentiam, cum omnium applausu obtineret. Post absolutum studiorum suorum in Academiis curriculum, illam orbis universitatem, ut peregrinator & κοσμοπολίτης, adiit, ut ex usu ipso doctrinæ caperet incrementa, & quasi gemino hoc cardine eruditionis suæ sphæram firmaret. Postquam igitur Argentorati per aliquod tempus substitit, Gallicum iter ingressus est, & Lutetiæ Parisiorum annum integrum explevit. Quantum illic elegantium ingeniorum operumque fuit, id omne pervidit, & tantum peregrinæ venustatis admisit, quantum Germanicam virtutem non infringeret. Bonis itaque moribus optimisque virtutibus ornatum cum viderent omnes, factum est ut Regii Cancellarii Dni LENTENII filius ipsius fidei committeretur, quem ille per Germaniam, Galliam, Italiam fidus ejus Achates, atque in hoc cultiorum Europæ gentium theatro, spectatorem circumspectum circumduxit. Neque intra Europam ille peregrinandi ardor substitisset, sed in ipsum orientem pertendisset,

nisi anno cdo lbc LXIX. domum revocatus, & Spartam Archivarii Provincialis, & cum illa thalamos sibi paratos invenisset. Ergo ut intra domus angustiam Orbis hujus ἐγκυκλοπαιδείαν compingeret, domum duxit Nobilissimam elegantissimamque Virginem, Viri Nobilissimi & Amplissimi D. MARCI Røhlblad/ Archivarii & Protonotarii Provincialis, decessoris sui filiam, nunc viduam eheu! mœstissimam. Quam placide cum illa ætatem exegerit norunt omnes, & ipsa testantur conjugalis amoris ἐλέγοντα μαρτυρία, utriusque sexus proles ornatissima, e quibus supersunt ANNA EMERENTIA, CHRISTINA, MARCUS HUGO, dulcissima thalami pignora: nam LUCIA MARGARETA mature fati concesserat. Hic denique vitæ ejus cursus fuit, ut nusquam offenderit, nemini gravis, moribus commodus, officiis promptus, animo sincerus, fide spectatus, ad nullos fortunæ vultus vel superciliosus vel querulus, omnibus denique vitæ partibus moderatus, secum potius habitans, quam extra se quærere se laborans. Levibus quidem initis morbus ipsi procescit, sed in corpore causario & cacochoymo altius figens vestigia. Ex esu acidorum non tamen immoderato, ante hos XIV. dies, flatibus & doloribus torqueri cœpit. Quibus altera, statim die, febris continua & mali ominis, e fomite suo occulto in flammam prorumpens, succcescit, quæ quietem ipsi turbavit, & vires statim dejecit. His ut-

cun-

cunque reductis, venam ipsi secari consultum visum fuit. Parum ipsi sanguinis, sed informis & degeneris extractum, ad cuius *αἵματι* corrigendam, & suspecta miasmata ipsi impressa, ope balsamicorum & expellentium eliminanda, nihil eorum, quod factu opus fuit, intermissum est. Sed quarto die febris adeo recrudit, ut vires omnes fatali quasi ictu prosterneret, ipseque tandem sub his insultibus, accedente gravi syncope & post horas aliquot, catarrho suffocativo, divino antea viatico instructus, inter assiduas adstantium preces, piam illam animam, in manus divinas, XVIII. sc. Januar. die, annos quasi LII. natus, resignaret. Bene sit animæ beatissimæ; Bene viduæ liberisque tam gravi plaga percussis, quæ Mariti Patrisque jacturam acerbis lacrymis deplorant. Cæterum ejus quod reliquum est, hora illa hodie efferetur. Ad funus itaque deducendum, cum nostra nos invitet pietas, vos quoque Cives Academici operam dabitis, ne quid officii humanitatisque in vobis desideretur. P P. Kilon L. d. XXVIII. Januar. Ao. cl. lxxiii.

56.

QUam ex hoc loco philosophiam, quoties occasio tulit, Cives optimi, vobis proposuimus, mortis scilicet meditationem, ejus illustre exemplum

nunc ob oculos sistimus, quo nulla præceptionum vis validius segniores animos permoveat atque impellat. Nam cum ad externa & aliena funera vos sæpe vocavimus; domestico nunc & propiore Commilitonis vestri casu ad hanc beatæ *ἐὺθανασίας* scholam invitamini. E Plinio didicistis: *vestem a tineis non attingi, quæ fuerit in funere*; Vos itaque date operam, ut animo vestro intaminatam istam pietatis vestem mature circumponatis, quæ quotidiana mortis meditatione, velut odore quodam funere imbuta, tineas & vermiculos scelerum, qui animum rodunt, non tam facile admittat. Pauci sunt, qui hic sibi semitam sapiunt: nam in luto hærent plerique, & voluptatibus curisque suis lacertos non erigunt, ac cælestia vix per nebulam intuentur. Quam trepidant hic, quam horrent etiam illi, qui voce & supercilio metum omnibus excusserunt Achilles *πάνοπλοι*! Quam nihil hic sapientia præsidii sibi relictum sentit! Quam sibi ipsis diffidere incipiunt illi, in quibus alii spes suas posuerant, quibus vota sua consecrarant, à quibus fortunas suas & ornamenta expectabant! At vero qui unum illud necessarium attenta cogitatione semper contemplantur, & hoc sibi in omni vita propositum habent, ut metam illam, ad quam omnes collineare debemus, assequantur, facile ex animo delent terribilem mortis imaginem, & lætiores illam animo mortis speciem induunt, cum assiduis meditationibus de illa philosophantur. Neque enim, quod En-

ni-

rianus ille Neoptolemus agebat: paucis hic
 philosophandum. Neoptolemi illi sunt & ti-
 rones, qui ita judicant, licet annis Nestorem
 superent: at veterani sunt, qualis ὁ μακάρης
 ἡς noster, qui in florente etiam ætate hanc
 philosophiam ἔργα καὶ ἡμέρας sibi esse voluit.
 Non insperata illi mors venit, sed jamdudum
 animo præcepta, & quasi in societatem vitæ
 admissa, effecit, ut vix se corpore exui senti-
 ret. Justorum illa mors serena semper facie
 apparet. Quare cum D. Johannes Mortis e-
 quum χλωρὸν describit, non sine causa fortas-
 sis eâ voce utitur, quæ & *pallidum* & *viridem*,
 significat. Est scilicet quibusdam mors palli-
 da, tetrica, fordida, quos vitia sua decolorant,
 & hoc metus colore, ut alterius mortis Can-
 didatos tingunt. Est viridis illa piis beatis-
 que mentibus, quæ virentes, sicut palmæ, hoc
 bonæ spei colore saturatæ, dulcem & jucun-
 dum ex hac vita abitum fortiuntur, in cælo lau-
 reis immortalibus ornandæ. Qui nostrum hunc,
 cui funus hodie ducimus, propius norunt (no-
 runt autem omnes boni bonum, docti doctum,
 pii pium) tot optimis artibus arctissimo vincu-
 lonexam pietatem in ipso illo ætatis lubrico de-
 prehenderunt. Ex quo enim ille nobis innotuit
 Albo Academico inscriptus, ita studiorum & vi-
 tæ suæ cursum instituit, ne vitæ libro nomen ex-
 pungeretur, ita illum ἐγκυκλοπαιδείας orbem
 decurrit, ne extra pietatis & bonæ mentis or-
 bitam deflecteret. Cum Philologiam secta-
 retur, cum Philosophiæ operam daret, sedu-

lo cavit, ne ad præcipitia illorum deduceretur, qui ἐμωρᾶν θησαν καὶ ἐμαλασιώθησαν ἐν τοῖς διαλογισμοῖς αὐτῶν. Ut multa hic logorum plena observavit, ita ab iis sibi temperans, unum illum atque æternum ΛΟΓΟΝ menti infixum habuit semper, quem cum seria pietate coleret atque amaret, quem cum sapientiam Patris sui è Numinis æterni Schola didicisset, ita scholarum se deliciis tradidit, ut se & cœlestis Academiæ Philologum & Philosophum esse meminisset. Natus est Bords-
holmi, in ipso Musarum Cimbricarum sinu (illic enim tum temporis bonæ literæ & artes florebant) Anno clc lxc LIII. d. XII. Febr. hora XII, medium cœli culmen tenente, sole, quod Astrologorum filii, si cætera signa non abnuerint, felicitatis non leve præsagium esse existimant. Pater ipsi fuit ECCARDUS, Præfecturæ Bordesholmenfis subquæstor, Mater femina ornatisima ANNA KIELMANNIA, cui alterum in hoc filio sibi erepto vulnus inflictum est, eoque gravius, quo firmitus senectuti præsidium a virtute ejus speraret. Avus ipsi paternus DETLEVUS; Avia paterna ANNA Nam. Avus maternus REIMARUS KIELMANNUS, Avia Materna COECILIA Neumanns. His ille ortus parentibus ab ipsis statim ungviculis animi indolem ostendit, quæ præclara quæque polliceretur. Quare sub præceptoribus domesticis, qui hodie muneri Ecclesiastico præfunt, eos in pietate & literis progref-

gressus brevi temporis spatio fecit, ut Anno cl
Lc LXIII. Bordsholmensi Gymnasio, felici il-
li tot Mercuriorum officinæ formandus trade-
retur, Serenissimi Principis munificentia inter
alumnos cooptatus. Verum cum Kilonium,
Musæ Cimbricæ coloniam ducerent, splendi-
diore Academiæ dignitatis titulo cohonestan-
dæ, per quadriennium JOHANNE BACH-
MANNO, qui nunc in Schola Neomonafteri-
ensi informationi juventutis præest, feliciter
usus, anno ætatis XVII. postquam Pater cha-
rissimus ipsi fato ereptus, Lubecam concessit.
Illic in disciplinam datus JOHANNI POL-
TZIO Viro Clarissimo, solida utriusque lingvæ
jecit fundamenta. Erat enim Viro illi singu-
laris in bonis autoribus enucleandis industria,
judicium de iis acerrimum, Græcarum & lati-
narum literarum accurata peritia. Quales cum
rariores hodie in Germaniæ scholis sint, & *vix*
totidem, quot Thebarum porte vel divitis ostia Nili,
merito de felicitate illa sibi gratulari poterat.
Noster, quod in Virum illum incideret, qui
non præpostera, ut plerumque nunc fit via du-
ceret sed λεωφόρον bonarum literarum viam
ad artes sterneret. Postquam triennium in li-
teratissimo hoc consortio exegerat, Rostochi-
ensem Academiam Anno LXXIII. salutavit,
totoque biennio philosophicis studiis incubu-
it, quorum specimen, disputationem de *Un-
vocis* sub M. FRANCISCI WOLFII, Logices
Professoris clarissimi præsidio habitam, sed cu-

jus ipse Autor fuerat, evulgavit. In Jenensem hinc Academiam Anno LXXV. abiit. Totus illic in Philosophicis Theologicisque studiis habitavit, cujus inexhaustæ propemodum diligentiae supersunt documenta, tot Collectanea, Scholæ Professorum publicæ, privatæ, ut vix credibile sit, unum his omnibus scribendis hominem parem esse potuisse. Qualem se in Kiloniensi nostra gesserit, nemo ignorat: Superiores observantia, æquales officiis, omnes studiis obsequiisque suis sibi reddidit, obnoxios. Sæpe cum maxima animi voluptate controversias tam Theologicas quam Philosophicas in publicis subselliis accurate vertillantem audivimus. Adeo omnibus ille ad optima studia præfidiis instructus, nihil in se quod ornare & commendare illa poterat desiderari patiebatur. Nemo è nostro ordine fuit, qui laurea Philosophica non dignissimum judicaret, quam ille nunquam ambivit, discendi potius secuturus modestiam, quam docendi inanem pruritum, quo jejuna præ cæteris ingenia nunc maxime laborant, ostentaturus. Audivimus & è cathedra sacra ad populum verba facientem, nec eloquentia, quæ Oratorem sacrum decet, destitutum, & pietatis præterea æstu flagrantem. Illam in quotidianis habebat exercitiis. Nam ter in die divinum præstabat officium, preces non matutinas tantum & vespertinas, sed & meridianas statis ad Deum horis ablegans. Quare nulla illi in per-
ti-

tinaci morbo impatientia animum dejecit, sed semper sibi similis, ac τετραγών, omnes illos insultus mira constantia excepit: cum nihil accidere sibi posse, quod divina voluntas non decreverat, jam secum constitutum haberet. Corpus ipsi ab ineunte ætate causarium obtigerat, quod gravissimis sæpe morbis concussum, ægre per Medicorum singularem peritiam mortis faucibus ereptum est. Superiore anno, mense Septembri in itinere vehementissima illum febris aggressa est, quam vomitus continui sanguinisq; profluvia comitabantur, cujus furori quidem celeberrimorum Medicorum remedia obicem per intervalla posuere: sed id tantum effecerunt, ut viribus per illas quasi inducias resumptis atrocior rediret, ac tandem beatissimam illam animam è debili & extenuato corpusculo, anno ætatis trigesimo ejiceret. Fortissimum in decretoria illa pugnâ athletam, nullis elogiis satis deprædicandum, qui ipsi adfuit, verbi divini præco,prehendit. Adeo ille sacro viatico instructus, spe divina plenus, omnia consolationum argumenta animo præceperat, ut lacrymas illi excuteret, ipse vero lætam quoque ac exporrectam in macie illa frontem, & cœlestibus gaudiis ebrium animum ostenderet. Quemadmodum scilicet qui felicitis Arabiæ littora, præternavigant, odorum dulcissimorum auris, quas è myrrhiferis & id genus cæteris arboribus à terra ventus devehit, permulcentur: i-

ta illæ quæ Paradisi oram jam legunt animæ, pietatis quodam odore fragrantissimo correptæ, corporis evelli claustris gestiunt, jamque amœnitatem illam persentiscunt. Gratulemur itaque & triumphos potius, quam lessus victori illi canamus, cui post depugnatum, hunc agonem æternæ illa gloriæ corona nunc imponitur. Exuvias ejus, hodie tumulo hora II. mandabimus. Quibus ut vos, Cives Academici, extremum perolvere velitis officium, sedulo vos hortamur. Æquissimum enim est, ut qui sub eadem mortalitatis lege vivitis, eam, quam ab aliis ordinis vestri civibus expectatis, huic quoque tribui, imo antesignano vestro pietatem præstetis. P.P. Kiloni d. 18. Nov. Anno clb lbc LXXXIII.

57.

SI quid est in variis rerum humanarum casibus, quod pungere animum doloris acerbitate possit; nihil profecto est quod magis illum angat & affligat: quam si altera sui parte, Uxore scilicet dilectissima, mul-
 etetur. Quid enim si a bonis illis qui animum ornant discesseris, Viro Civique bono magis optandum est, quam perpetua vitæ socia, quæ rem familiarem consiliis juvet, res secundas ornet, adversas soletur, curarum omnium, particeps non in sinu tantum, non in oculis,
 in

in osculis, in amplexibus hæreat, sed in animo ipso habitet, & mirabili quadam amoris μεταμορφώσει in Viri se ingenium ac indolem induat. Eam vero ubi consecutus fuerit, & hac quidem parte florere fortunas suas intellexerit, quid animi ipsi fore putabitis, si inopinato aliquo casu, a latere socia, ex oculis carissima, imago, ex ipso pectore anima avellatur? Qui fulmine se percussos vident, qui procellis repente ortis in scopulos naufragium facturi, illiduntur, quibus intra latera sic versatur, vix tam horrifico pavore percelluntur, quam qui ita se quasi medios discerpi sentiunt. Faceffant itaque hinc naturæ illi perduelles, qui in femineum sexum injurii, infami sarcasmo, nunquam nisi cum efferuntur, bonas & laudandas esse feminas clamitant, vel mala ipsi matre orti, vel e terra cum fungis nati, aut e sterquilinio effossi. Gratuletur sibi Senex ille Terentianus, eoque se felicem nomine prædicet, quod nunquam uxorem domum duxerit: Alius elogio hoc inter tumuli titulos triumphet, quod nunquam lateri suo junctam uxorem habuerit. Vivunt nonnunquam in hoc orbe homines, neque vivendi rationes bene subductas habent, sed vel stultis suis consiliis vel vagæ arbitrio fortunæ totos se permittunt. Quorum dicteria si quis pro oraculis habiturus sit, aut eos, qui ex suo ingenio alios judicant, audire velit, nã is multo illis stultior dicendus esset. Cujus enim fidem sequatur, aut periculum in suos

usus vertat? cum ipsi illi qui has sententias pronunciant, nunquam maritorum sortem experti, nec fravitates nec molestias eorum degustarint. Quemadmodum ergo homine imperito nihil est injustius, ita inexperto nihil stultius, si tamen ad suum arbitrium illa referat, suisque alios stare judiciis velit. Altius illa divinæ vocis efficacia animis hominum hæret, quam ut nefariorum hominum vocibus & cavillis expungatur. Illud maneat atque fixum sit, quod neque mutari neque moveri potest, ut naturæ instinctu ad has delicias impellimur, ita majorem vix posse felicitatem alicui contingere viro, qui castam & virtutibus spectatam & sui amantissimam conjugem quasi sortito datam, acceperit. Neque enim temere & cæco quodam impetu ad hæc sacra provolandum est, in quibus sui erga homines amoris imaginem existare voluit, qui se Ecclesiæ suæ Sponsum, nomine illo *χαρμεσάτω*, appellari voluit, Salvator noster Christus. Quid mirum itaque, si hunc dolorem amissæ conjugis ipsis osibus, medullis, pectorique inustum sentiat Vir optimus, quem hoc nostro officio solamur? Nam quis ab omni humanitatis sensu ita derelictus, ut indolentiam in simili casu justo adeo mœrori præferre malit? præsertim cum ex ipsa jacturæ gravitate luctus se accendat, & nunc demum bona sua intelligat rectius, cum ea quæ in potestate habuit, amisit. Etsi illam etiam cum viveret, omnibus officiis profecutus est, ut bo-
ni

ni mariti partes quam cumulatissime expleverit, fide, blandis moribus, & omni illo, quo vinculum hoc constat, amoris coagulo. Verum fortiter & εὐσوماχως ferenda hæc sunt mala, quibus nullo humano consilio prudentiaque obstrui potest. Quis enim fatorum vias intercluserit? Quis in Dei manu se suaque omnia reposita esse nescit? quis ejus obluētari decretis aufit? ita enim divinæ voluntati nostra accommodanda est, ut nihil nobis displicere debeat, quod ipsi placuerit, ut hæc demum bona nostra existimemus, quæ in malorum numero nos in cælesti hac pædagogia inexercitati & ἀπαλάσσοι homunciones referre consuevimus, ut salutem ab illa manu, etiam cum vulnera infligit, exspectemus. Nata nostra est CHRISTINA Anno clō lbc LX. die Maji XXXI, imminente hora XIa, quo Christi in cælum ascendentis memoria celebrabatur. Patre Nob. & Amplissimo DN. ÆGIDIO HENNINGIO. Regiæ Maj. Danic. & Serenissimi Principis Cimbrici Negotiorum Curatore, & matre Ornatissima ANNA, Viri Nob. & Amplissimi DN. JOHANNIS Dancſwert / Serenissimi Principis Cimbri- ci negotiorum Curatoris ac Senatoris Hambur- gensis filia. Avus Paternus ipsi fuit DN. STE- PHANUS HENNINGIUS, Præfecturæ Kilo- nienſis & Bordsholmenſis Quæstor ſpectatiſſi- mus: Avia Paterna, ANNA Holſten / Avia Materna, GERTRUDIS von Langen / feminæ honeſtiſſimæ. Proavus ipsi Paternus, Vir Pru- den-

dentissimus fuit Dn. CHRISTOPHORUS
HENNINGIUS Consul Plönenfis: Proavia,
DOROTHEA Szeßen. Proavus maternus,
DANCKWERTUS, Consul Hufumensis fuit.
His illa in lucem edita Parentibus, statim ab i-
pfa ineunte ætate, bonæ mentis pietatisque
igniculos ostendit. Ea enim ingenii indolis-
que felicitas erat, ut parentum ac magistro-
rum præcepta ipsa præverteret, & illud quod
in se erat *ἡγεμονικόν* potius quam aliorum du-
ctum sequeretur. Est quibusdam insita atque
nativa bonitas, quo charactere verè divino
insigniti, præferendi sunt cæteris, qui vel pœ-
næ metu perterriti, vel exemplis aut præmiis
inducti, bonitatem aliquam ostendunt potius
quam præstant. Tractabiles illi, omnes &
omnia perferre & pati, omnibus se dedere,
consvenerunt, nemini molesti, erga omnes
etiam cum suo detrimento benefici: cum alii,
à quibus illa animi virtus exulat, in alia omnia
præcipites ferantur, cujus malignitatis primus
gradus inutilem ac odiosam morositatem, pra-
vam adversandi libidinem & similia vitia gi-
gnit, quibus primum *δυσάρεστοι*, cum ipsi
boni ac faciles esse, ac aliis benefacere no-
lint, eo tandem prolabuntur, ut ne alios
quidem patiantur esse bonos, vel illorum
bonis contristantur. Mira erat NOSTRÆ
ab ipsa infantia ad vitæ extrema Bonitas,
eximia præterea corporis specie ornata.
Nam virtutibus illis & moribus prædita, quos
in

in virgine optare delicatus etiam formarum spectator possit, facile in amorem sui pellexit ex Itinere Gallico reducem, Nobilissimum DN. PAULUM Rohlsblad / & fortunæ & ingenii bonis instructissimum, quem eadem, morum similitudo, quo nullum est tenacius in amoribus conciliandis vinculum, commendabat. Cum illo nuptias Anno clc lcc LXXVIII. d. XXIII. Januarii celebravit. Nihil ad hujus matrimonii felicitatem addi poterat, quod amoris virtutisque illicio sustentabatur. Ut enim in alio sua quemque natura delectat, ita nunquam, qui ex animorum pulcherrima conspiratione oritur amor, potest esse injucundus. Certabatur mutuis utrinque officiis. Ille velut cœlo lapsum in thalamum pignus intuebatur: illa ea fide, eo studio complexa maritum est, ut aliis sui sexus illustre relinquat exemplum. Ita denique ambo vixerunt, ut nunquam ingrati redierint. Quatuor quoque liberorum patrem fecit, quibus unus secundo loco natus superstes ÆGIDIUS. Quem cum tenerrime, amaret dum viveret, adeo ejus curam morti vicina sepofuit, ut patri illam alacri & prompto animo resignaret, sibi trium in cœlis liberorum jus nunc in solidum, ut ajebat, vindicatura. Nondum sextus annus in felicissimis his amoribus exierat, cum suppressione urinæ (Ischuriam Medici vocant) laborare cœpit. Deliberatum super isto morbo a medicis peritisimis fuit, eaque adhibita remedia, quibus, si natu-

ræ vires respondissent, fortassis optatus non defuisset eventus. Sed calculus renibus impactus, quasi obice posito, effecit, ut omnis ille humor intra corpus concluderetur, animamque tandem, aliis quoque symptomatibus accedentibus, intercluderet. Mature itaque ad Deum se convertit, in hoc corpusculi sui diluvio naufragium factura. Postquam enim, sanctissimo illo viatico animam instruxerat, inter ardentissimas preces, & suorum lachrymas, in cælestem illum portum enatavit, cum ætatis suæ annum tertium & vicesimum cum dimidio absolvisset. Bene sit animæ candidæ, in cœlis jam triumphanti! Ejus exuvias hodie hora illa tumulo mandabimus. Vos itaque, Cives Academici, ut extremum frequentes persolvere velitis officium, peramanter invitamus. Meretur non solum pie defunctæ virtus, & Vidui mœstissimi pietas, sed & ipsa humanitatis lex efflagitare videtur. PP. d. XVI, Dec. A. clb lbc LXXXIII.

58.

QUod iis evenire solet, qui tranquillo in mari, cum nullæ cœlum prætexunt nubes, nulli navim jactant, fluctus, placidi & secundi vela implent favonii, ante oculos jam portus versatur quod derepente tamen, medio & felici in cur-

curfu, fubitis turbinibus infufcato aëre, inopinata aliqua procella deprehenfi, præfens naufragium intuentur, omnisque confilii inopes in ipsis rerum extremis, nec mente sibi nec fenfibus fatis constant; id accidiffe non, ita pridem Senatori Urbis hujus Graviffimo DN. PETRO ARPENIO dixerimus, CIVES ACADEMICI, cum ex ulnis, finuque ipfo, è præfentibus thalamis gaudiis, in tumuli perpetuam noctem abrepta dilectiffima Conjux, eo ipfo tempore, quo amoris conjugalis gemino pignore quartum jam matris præstaret officium, & ad Genethliorum feftivitatem omnia fpectarent. Adeo

— *medio de fonte leporum*

*Surgit amari aliquid, quod in ipsis floribus
angit,*

& vel in fuvaviffimis deliciis pœnas acerbiffimas perfentifcimus, ipsisque amorum facibus rogos nobis incendimus. Nemo magis, CIVES ACADEMICI, hujus doloris gravitatem animo aflequetur, quã qui ipfe in fimili calamitatis palæftra exercitatus, eandem intra latera fua ficam adaâtam olim fenfit. Quæ enim mala! quam poft brevia gaudiorum fpacia! quam fubito! quam in loco alieno! quam in ipfo fpei apice, noftrum illum opprefferunt! ut qui vix per luftrum integrum maritus fuerat, cum quartum jam fe patrem falutari videret, converfa è veftigio fcena, Viduum jam ante fe factum deprehenderet, quam Patris

gaudia ad animum posset admittere, quæ & ipsa è prolis alterius in ipso partu extinctæ jactura temerata matris illam mortem inauspicato omine quasi præsignificarunt. Qui à divisione viduum dici voluerunt, singularem huic voci vim in doloris hujus expressione constituerunt. Quod si enim, ut in Medicorum scholis traditur, in solutione continui dolor corporis consistit; quid magis Conjugibus continuum est? neque enim contigua tantum sibi corpora habent, sed in carnem unam, in eadem viscera, in easdem fortunas, in unum animum coalescunt. Quis vero major possit suboriri animis, quam ex illa ἀναλυσὶς dolor? cum & corpora à se abscedunt, & ipsi animi diffinduntur, & omne quod in arcto hoc vinculo, in hac validissimi amoris compage continuum est, non tam solvitur, quam falce quadam diffecatur. Plutarchus fane in quaestionum Romanarum libro longe miseriores cælibe esse judicat illum qui uxorem amisit, & hanc præterea addit rationem: ὁ μὲν τὸ γεγαμηκός οἶκός τε λείπει· ὁ δὲ τὸ γήμειον, εἰς ἀποβαλόν, ἔκ αὐτῆς μόνον, ἀλλὰ καὶ πεπηρωμένον. *Qui uxorem duxit, ejus domus perfecta est, qui ductam amisit, ejus non imperfecta modo, sed & mutilata est familia.* Quid enim magis truncum in familia esse possit, quam cum in domus negotiis procurandis marito perit manus altera, in utilium provisione alter eruitur oculus, in onere ferendo alter vel humerus vel

vel pes subducitur : cum non tam capite quam anima ille minuitur, cum præsidio & solatio suo excidunt liberi, quos immaturo hoc exitu mater reddidit miseros, ipsa sua fœcunditate infœcunda; tota denique domus in vastitatem quandam & orbitatem est conjecta. Cum in simili casu Macrinum suum consolaretur Plinius: *Habet, inquit, Macrinus grande solatium, quod tantum bonum tam diu tenuit* (tenuerat per triginta novem annos) *sed hoc magis exacerbatur, quod amisit. Nam fruendis voluptatibus crescit carendi dolor.* Imò vero brevior hic gaudio magis exacerbatur dolor. Quo majus enim desiderium accendit temporis brevitatem, cum carendum illa felicitate est, quam nobis ostenderunt tantum fata, & cujus possessio per diuturnitatem nondum inveterata, vel cujus tantum promulsæ captus, saturatus vero nondum animus; eo magis ab illa recente memoria recens semper dolor est, ut cum maturitatem temporis amor non est affecutus, in doloris gravitate & diuturnitate acquiescat. Altius hæc vulnera sedent, quam ut levi aliqua cicatrice obducantur, aut quotidianis illis consolationum remediis convalescant. In obitu Amici confidenter quidem Seneca Epist. LXIV. *Si quis dispoliatus amissa unica tunica, complorare se malit, quam circumspicere, quomodo frigus effugiat, & aliquid inveniat, quo tegat scapulas, nonne tibi videatur stultissimus? Quem amabas extulisti, quare quem*

ames. Arctior illa consuetudo, penitusque animo insculpta est, quam ut ejus memoria, tam cito deponi oblitterarique possit. Alit vero noster non intermorituram Conjugis suæ recordationem, & nunc absentem quotidie cogitatione sua complectitur, perpetua hæc vulnera habiturus. Nos quoque hoc extremum ipsi persolvimus officium & vitæ ejus imaginem vobis ob oculos ponimus. Nata est ELISABETA nostra XVIII. Maji Anno clc lxc XLIX. Patre, DN. NICOLAO Holst / Urbis hujus quondam Senatore Prudentissimo, Matre, ANNA, DN. THOMÆ Eggers / Advocati Provincialis & Judicialis Filia. Avus ipsi Paternus fuit DN. HENRICUS Holst / Consul hujus Urbis amplissimus, Avia paterna, CATHARINA Senatoris DN. GEORGH WESLINGII filia. Avia Materna ELISABETA, DN. RUDOLPHI Fausten / Protonotarii & Archivarii Provincialis Filia; Proavus Paternus, DN. NICOLAUS Holst / Ædis Nicolaitanæ Curator Juratus, Proavia DOROTHEA Selemans / Proavus Maternus, HANSUS Eggers / supremus rei frumentariæ Curator in Provincia Tunderensi. His orta Parentibus & Majoribus, id operam dedit semper, ut eorum insisteret vestigiis, iisque moribus animum advesceret, qui in sui amorem facile pellexerunt, Virum Nobil. & Prudentissimum, hujus Urbis Senatorem gravissimum DN. PETRUM ARPENIUM. Fuere illis serena Con-
ju-

Jugii fata, & mutuuis amorum officiis & illi-
ciis condita. Cujus svavisfima superfunt,
documenta, è conjugali quadriennio tres su-
perstites liberi, filiulus PETRUS FRIDERI-
CUS, filiola, ANNA ELISABETA & quæ fatali
hoc puerperio matri supervixit, CATHARINA
ELISABETA. Nam prima filia ELISABE-
TA CHRISTINA fatis altero post nuptias an-
no concessit, & filiulus, qui cum sororcula,
sua gemino partu prodiit, in ipso partu extin-
ctus, & matri forte mortis causa exstitit. Nam
cum in prædium suum Wisch habitatum,
concessissent, & jam propinqua partitudo ap-
peteret, è Fridericopoli vicina spectata fatis
in his rebus Obstetrix filiulam primam in lu-
cem produxit vivam. Verum cum matrem,
è primis laboribus fatiscentem novi par-
tus dolores iterum invaderent, jam suis ipsa
viribus diffidere cœpit. In ipsa itaque ortu
occasum suum filiulus invenit. Mater vero
viribus consumptis, cum sinistri quid metue-
ret maritum à se dimittere noluit. Cum itaque
noctem transegisset, tandem sub horam
quintam matut. lipothymia subita cor-
repta, preces illi & divinum JESU nomen ac-
clamante marito, ad quod tamen annuere, o-
culosque aperire visa est, placide III hujus
mensis die, ætatis anno XXXV, exspiravit.
quam hoc quasi fulmine prostratus mariti a-
nimus sit, facile quivis abs se intelligit. Nam

nenunc quidem suum satis dolorem capit, & ad primos plagæ hujus ictus totus stupet. Verum illi divini spiritus solatia precamur: Nam his potissimum remediis animo exulcerato subveniendum est. Quod si nec illa fastidimus, quæ moralis inculcat sapientia, optimum hic magistrum habemus Senecam, qui in libello de remediis fortuitorum, inter cætera, huic quoque malo, jacturæ sc. Conjugis, medicam adhibere manum non neglexit. Vos vero CIVES ACADEMICI, non parum Vidui mœstissimi ægritudinem levabitis, si exuviis beate defunctæ, quæ hodie hora II. efferentur, frequentes extremum persolveritis officium. Quod ut facere velitis, & ipsa humanitatis lex requirit, & nos, si memores monere fas est, nostra hac oratione hortamur. P.P. d. XI. Maji Anno clb lbc LXXXIV.

59.

ET si quotidianæ sunt & in omnibus triviis cantatæ de molestiis hujus Vitæ querelæ: ea tamen in tempora nonnunquam incurrimus; quæ sepultam secundis rebus earum memoriam resuscitant, & in attentionem illarum contemplationem deducunt. Nam ut se fortunæ facies nobis obvertit, ut se dant humanæ vicissitudines: ita magno supercilio ac cervicibus sumus; vel intra pelliculam

nostram queruli fatorum acerbicatem deploramus. Ac evenit sæpe, ut ea calamitatum multitudine circumveniamur, quæ ita animum debilitent & frangant, ut ipsam nobis vitam acerbam putemus. Huc illa Tragici spectant.

ELECT. *Concede mortem.* CLY. *Si recusares darem.*

Rudis etiam tyrannus morte qui pœnam exigit.

ELECT. *Mortem aliquid ultra est?*

CLY. *Vita si cupias mori.*

Quæ autem vita sùavis esse possit, cum inter perpetuas molestias, inter concursus plorantium ac tempestates querelarum, illa ducenda est: cum inter fluctus & procellas malorum civilium, inter tot aliorum naufragia, nostrum quotidie exspectamus. Ideoque ubi finum nobis aliquem aut portum aperiri videmus, quis navem suam non subduxerit? quisve saltem tabulis fractis salvus exire, si possit, non laboret? Cum Ciceronem suum solatur Sulpicius, filix mortem lugentem, inter præcipua consolationum argumenta affert: non pessime cum iis actum, qui in turbulento Reipublicæ tempore mortem cum vita commutant, & hac levissima pœna ex hoc theatro discedunt. *Quid enim est, (merito enim hæc Sulpicii verba nostris temporibus accommodaveris) quod hoc tempore ad vivendum magnopere invitare possit? quæ res? quæ spes? quod animi solatium?* Cicero ipse

cum Consolatoriæ Luceii respondet, qui literarum amœnitatem illi commendarat, illas ipsas sibi exprobrare ait, *quod in ea vita maneat, in qua nihil insit, nisi propagatio miserrimi temporis.* Et hæc sane, quæ ipsis, etiam nobis subrepere cogitationes possunt, cum adversis exercitiis, ingruentia omni ex parte tædia nulla elidere arte possumus. Quorum cum tanta moles etiam nos propemodum oppresserit, quid mirum, si sub illo pondere Noster *ὁ μακαρίτης*, qua parte rebus civilibus ille admotus fuit, fatisceret. Divisas enim habemus molestias, & aliqua tamen calamitatis, quæ omnes premit, contagione contaminamur. Illius ubi semel animo infedit memoria, jacet ille, ac tacita emaciatus ægritudine in se ipsum spiritu quasi suffocato subsidit. Quo fit, ut illa e vita exitus illis propemodum optabilis sit qui inter perpetuas animorum cruces, ac quotidianas mortes illam ægre sustentant. Etsi Christianis hominibus, sua quadam ratione mors nec optanda, nec timenda, ac interdum maximopere expectanda ac metuenda videatur. Noster sane, beatæ memoriæ Consul, vel eo nunc nomine felix æstimandus est, quod mediis e turbis ereptus, postquam terra illi sordere cœperat, beatæ cælitum regna immigravit. Ejus vitæ historiam, cum funus ejus hodie deducitur, promovere, vobis, CIVES ACADEMICI, proponimus. Natus est Nobilissimus & Amplissimus Vir, DN. MICHAEL PEZOLDUS, Consul hujus Urbis

gra-

gravissimus Anno cl^o l^oc XXVIII. in Barbya
urbe, quæ inter Magdeburgum & Serveſtam
prope Albim ſita eſt, Patre Cognomine Sena-
tore ejusdem urbis prudentiſſimo: Matre, fe-
mina ornatiffima ANNA, DANIELIS Pfeiſ-
fers / Civis & Mercatoris ibidem ſpectatiſſimi
filia. Avus illi Paternus fuit HANSUS PE-
ZOLDUS Mercator Oxſurdenſis: Avia Mater-
na, primarii ibidem Civis filia. His ille ortus
parentibus honeſtiſſimis, & quod illis ad lau-
dem ſatis eſt, germanarum virtutum homini-
bus: quas ut ille ab iis hereditarias accepit, ita
ut aliis ornaret, & ipſi omni cura providerunt,
& noſter omni conatu ſuo jam ab ineunte æta-
te laboravit. Ubi ergo in patria ſchola pietatis
& prima literarum partis tyrocinia poſuerat, &
in Aſcherlebienſi ſchola poſtea amplius perfi-
ceret, in celeberrimo Hallenſi Gymnaſio, ſub
ſpectatiſſimi in arte Didactica Maſtri
GVEINZII auſpiciis elegantium ſtudiorum pa-
læſtram ingreſſus, & peracto ibi triennio in
Scholam Brunſvvicenſem, cui tum Rector Vir
doctiſſimus M. GUNZELIUS præerat, conces-
ſit. Unde feliciter abſolutis iis quæ ad *paſſionem*
Humaniorum literarum ſpectant, probe jam
prius ſubacto, ut decebat, ingenio, fœcundam
illam divinarum humanarumque ſcientiarum
matrem totoque orbe decantatiſſimam ACA-
DEMIAM JULIAM, non jam ut tyro, ſed ut
veteranus ingreſſus eſt. Hic cum jurispruden-
tiæ ſtudio per ipſos tres annos operam omnem

impendisset, & quidem sub Doctõribus celeberrimis, ab excellentissimo Serenissimi Ducis Gvelferbytani, DN. AUGUSTI Confiliario, DN. HEILANDO, ad filiorum suorum informationem illinc evocatus, apud illum plurima quæ ad usum forensem spectabant, observavit. Hinc Kilonium pervenit, & postquam biennium hic quoque in informatione exegerat, fvasu amici, eo confilia sua instituit, ut sedes sibi quietas in Urbe hac quæreret. Ducta itaque Anno clõ lbc LVI, d. Octob. 27. in Uxorem, plurimum Reverendi Pastoris DN. JOHANNIS Langemacse filia, virgine ornatisima, duos ex illo matrimonio auspaticissimo filios filiasq; suscepit, e quibus major natus filia & filioli gemello partu editi morte prærepti. Una ex illis superstes carissima Patri filia, Virgo florentissima hanc optimi parentis jacturam, unicum suum præsidium ac solatium, acerbissimis nunc lacrymis deplorat. Rupto hoc brevis quidem, (quinquenne enim fuerat) sed felicissimi Conjugii vinculo, Anno clõ lbc LXV. altero sibi matrimonio junxit Virginem lectissimam, DN. HENRICI ARNOLDI, quondam hic Cantoris, relictam filiam, MARGARETAM. E quo cum tres filii unaque filia progeniti, duo tantum supersunt filii, alter natus major, alter junior: qui nunc in his ipsis exequiis, summa animi ægritudine, paternum funus comitantur. Ut ad pie defunctum redeamus, totus ille ad palæstram forensem se contulit eaque peri-

ri-

ritiæ juridicæ, imo & prudentiæ civilis specimina ostendit, ut primo in Senatorem, & hinc, Anno cl^o l^oc LXXX. in Consulem hujus Civitatis cooptaretur. Qua se hic fide gesserit, qua Cives modestia tractarit, quam æquus erga omnes fuerit, optime Cives norunt. Etsi enim, ut vulgato verbo dicitur, ne Jupiter quidem omnibus placet, & in publicis negotiis quorundam offensiones evitari non possunt, id tamen ille operam dedit semper, ut nullam de se querendi causam relinqueret. Morbus denique illum XVI. Julii die in lectum conjecit, postquam aliquot jam annos in corpore, toroso & succipleno asthmate Scorbutico laboraverat. Et hunc forte sibi ipse contraxerat, cum per intempestivam in ferventissimo hoc æstu & in sudoribus pectoris nudationem, transpirationi viam occluderet. Consultus statim, qui ipsi Medicus ordinarius erat, Nobil. & Experientiss. DN. D. PFENNINGIUS, qui & venæ sectione & aliis remediis morbo obviam ivit. Illum cum necessarium iter avocaret, Collega noster honoratissimus DN. D. MAJOR in consilium adhibitus, e signis quibusdam statim, instare extrema animadvertit, deque eo mature amicos sed clanculum monuit. Accesserunt deniq; in corpore cacochymo quædam ex intestinis ebullitiones pravorum putriumq; humorum, unde factum, ut ignis ille naturæ paulatim extinctus, illeque cum jam totum ad cœlestia se convertisset, animamque Deo commen-

mendasset, inter preces & lacrymas suorum d. XXVII. Julii, hora I. anno LVI. pie placideque discesserit. Quando ergo hodie ejus quod reliquum est efferetur, Vos, Cives Academici, tum mortalitatis vestræ memores, tum humanitate vestra ducti, extremum ipsi persolvite officium. Meretur Viri virtus, & ipsa hoc pietas efflagitat. PP. d. 3. Augusti Anno clc lcc LXXXIV.

60.

QUod apud moratiores gentes semper, in usu fuit, ut qui virtute cæteris præstarent, post obitum variis honoribus, præmiis, statuis, panegyricis, imo aris, & templis, si merita responderent, ornarentur; id in Christiano quoque populo factitatum antiquitus fuit, neque nunc in desuetudinem abiit, ut piorum hominum memoria, quo exemplo posteris esset, omni monumentorum genere honestaretur. Quot non sunt SS. Patrum sermonibus celebrata eorum nomina! quo instituto quamdiu ostentatio simulatioque abfuit, nihil laudabilius honestiusque, nihil ad Ecclesiæ utilitatem salutaris excogitari potuit. Nam & stimuli animis his virtutum imaginibus injecti, ut recto tramiti insisterent, & fibulæ pravis cupiditatibus impositæ, ut vel ignominia metu in ordinem

nem redigerentur. Quorsum hæc nostra spectet oratio, facile, ut arbitramur Cives optimi conjicietis. Excescit ante hos septem dies e vivis Vir ista pietate istis Virtutibus ac moribus nobis jamdiu spectatus, ut in hoc tam laudabili funere nostras quoque voces audiri debere putaremus. Neque enim a quoquam rogati, sed sponte nostra atque ipsa pietate impulsī hoc ipsi persolvendum officium decernimus. Quod si splendorum & opulentorum hominum mortes statuis, elogiis, lessibus celebramus, si insignia, si marmora, si vexilla suspendimus, in quibus plus pompæ interdum ostentatur quam virtutis ostenditur: cur non Christianum Heroem (quidni enim ita vocemus?) qui se omnibus nobilitatis titulis, omni fortunæ splendore, omnibus bonis exuit, ut castam integramque pietatem servaret, omni honorum genere decoremus? cujus mors ita gloriosa est, ut præ omnibus sit concupiscenda, tantumque venerationis habet, ut præ illa omnia & tropea & Mausolea & quicquid inanium ornamentorum & phalerarum est, contemnenda esse videantur. Recognoscite itaque nobiscum, Cives Academici, magnum illud, quod Vir optimus circumferebat exemplar, cujus vitæ cursum qua possumus ratione vobis delineabimus. Natus Noster ille est illustri generosaque familia Anno clb lbc XII. die XXIII. Septembr. in prædio avito Curonix Goldingen / Patre Generosissimo DN. HANSO CHRISTIANO à
NEM-

NEMMITZ, Domino hereditario in Goldingen/
Matre Generosissima DN. SOPHIA AMALIA
MOIDELIA e Comitum stirpe oriunda. Pater
Imperatori militavit, eique suis sumptibus e-
quitum loricatorum legionem conduxit, quæ
hodieque nomen illud paternum retinet.
Primam familiæ originem ad CHRISTIA-
NUM MAXIMILIANUM NEMMIT-
ZAKI referunt, qui illustri gente è Per-
sia oriundus, cum in aula magni Ducis Mo-
scoviæ è cognatis ejus aliquem rixa inter,
illos suborta, interfecisset, Viennam Anno
clo ccc secesserit, ubi is rei accipitrariæ & Ve-
naticæ cognitione eam Imperatoris sibi be-
nevolentiam conciliavit, ut nobilitatis ipsi
nova insignia, Canum sc. trium venaticorum
cum Corona septem ardeæ pennis ornata ul-
tro largiretur. Eluxit in nostro prima statim
ætate optima indoles, quam ut omnibus arti-
bus excolerent Parentes, omni opera labora-
runt. Nam & lingvis & studiis & omni exer-
citorum genere juventutem ejus optimi Præ-
ceptores ornarunt. Anno ætatis XVII. Aca-
demiæ Francofurtanam una cum Ephoro
adiit, ibique publicæ Disputationis specimen
dedit. Hinc in Wittebergenfi, Jenensi, Lipsiensi,
Leidenfi, Academiis sane celeberrimis vixit.
Lovani quoque substitit, ubi in notitiam Bur-
gundi cujusdam, ejus scilicet, cujus apud
Cl. Borrichium libro de Ortu & progressu Chi-
miæ mentio fit, incidit, qui magna ipsi na-
tu-

turæ mysteria ostendit, quorum ille per ætatis juvenilis incuriam tum temporis rationes penetrare non potuit, maturiore vero ætate tam splendidam e manibus occasionem dimissam impense doluit. Ex Argentoratensi Academia, ubi per aliquod tempus postea commoratus est, in militiam ivit. Hinc illustrissimi Principis de Effenberg/ Cubicularius per biennium fuit. Tandem in superiori Carinthia Anno dñi lxx XLVI. nobili familia natam DN. ANNAM BARBARAM STEINBERGERIAM matrimonio sibi junxit, fuitque Hereditarius in Dalsstein. Hic fortunarum & fatorum sedes quietas & perpetuas se inventurum speraverat. Sed vix XII. anni elapsi erant, cum horribilis illa Reformationis tempestas omni illum dignitate quam habebat e nobilitate provinciali præcipuam ac omnibus fortunis deturbavit. Omnia enim, quicquid habuit fundorum, agrorum, fodinarum, opum relinquere & vitam ipsam profundere maluit, quam ut a religionis integritate vel latum ungvem discederet. Vix se ungvibus illorum eripuit, nam cum insequerentur fugientem armati equites, solo viæ divortio, quasi Deo ducente atque iter designante, e manibus ipsorum se evolvit. Quam præsentem Dei manum non sine lacrymis, sed majore animi gaudio narrare & prædicare nobis sæpe solebat, In Saxoniam itaque primam, illam purioris religionis matrem, delatus cum frustra per Saxoniorum Principium literas

Imperatoris gratiam imploraret, tandem in
Holsatia nostraque Kilonio exilii sui quasi cer-
tā sedem invenit. Ejecta itaque ex animo omni
vana titulorum specie totum se divinæ provi-
dentia permisit, atque ut se discipulum ejus
fisteret puerorum ingenuorum informationi,
operam impendit, ad quam Scholam tumidos
& de primatu rixantes discipulos Christus ab-
legaverat. Sibi itaque patientia Gymnasium,
his pietatis ludum instituit, ut ipse in illa a pu-
eris proficeret. Inter quos per ipsos XXIV annos
cum consenuisset, tandem circa Michaelis Fe-
stum, quo ipsius Salvatoris nostri oraculum:
*Nisi eritis sicut pueri, non ingredimini regnum
cælorum:* in Ecclesiis explicari solet, placidam
illam animam è puerorum ludo in cœlestem
Academiam transtulit. Et hoc divinitus ita
factum fuisse conjicere possumus. Nam cum
hac ætate animo & corpore fatis vegetus se-
nex, se post Michaëlis Festum scholasticis
laboribus ob ingravescentem ætatem valedi-
cturum prædiceret, intercessit huic consilio
DEUS illumque eo ipse ferme die ad se e-
vocavit. Cæterum omnium ille hominum
favores facile honestate illa animi, suavibus
temperatisque moribus, & infucata pietate
sibi conciliavit. Laudanda sunt Amplissimi
Senatus, honestissimorum Civium, etiam in
funere ejus procurando beneficia. Non de-
fuerunt è Nobilium, è sacro ordine, qui con-
siliis, ope operamque juverunt. Nos quoq;
in

in ordine Academico hunc quasi familiarem nostrum, convivam, congerronem semper habuimus. Sermones cum illo de pietate, de bonis moribus, de naturæ arcanis, quorum ille minime ignarus erat, sæpe miscuimus. Officiis denique, quibus potuimus, necessitati ejus subvenimus. Quoties ille in sinus nostros animi sui curas effudit! Quoties ipse misérias suas hoc suavissimo conversationis fomento solatus est! Dignum certe memoratu est, quam ille sæpe in summis angustiis Dei opem senserit: Urgebat illum aliquando extrema necessitas, ut ex urbe hac demigrandum sibi duceret. Jam certum ipsi erat consilium, & eo ipso momento ex improvviso Serenissimi nostri Principis advenerunt literæ clementissimæ, quibus privilegia ipsi concessa fecerunt, ut priorem mutaret sententiam. Laborabat aliquando circa festum Paschatos extrema inopia: Nullus illi oculos supererat: In ædem itaque sacram ivit illo die, quo mors Salvatoris nostri celebratur, & ad Deum preces ardentissimas fudit: Finitis sacris, ut animi nebulas dissiparet, in nemus sub-urbanum deambulatum prodiit; Quid fit? Venit ad illum homo ignotus epistolamque porrigit statimque se subducit. Resignat ille literas & sex septem nummos aureos illis inclusos videt. Ille in hoc quasi cœlo lapsum munus intuens Deoque gratias agens domum lætus exultansque rediit, & uxorem liberosque fatiscentes novo insperato-

que solatio hoc erexit. Longum esset narrare omnia, quæ ex ore beati hujus Viri sæpe audivimus. His aliisque exemplis firmato nulla supervenire calamitas tam acerba potuit, ut a meta sibi proposita oculos dejiceret. Vivebat ille Deo & sibi, positoque fortunæ splendore, spretisque mundi illecebris, bonam mentem, animi quietem cumque illa misérias omnes & extremam paupertatem tanquam delicias suas amplectebatur. Quare facilis ipsi vitæ hujus jactura fuit: Nam morbo ante mensem implicitus langvore illo senili sensim contabuit, ut vix mori se sentiret. Sæpe confabulationibus, cum morbus aliquantum remitteret, detinebat amicos lecto assidentes, nonnunquam, jocos candidos, ut erat cum gravitate facetus, velut Socrates e vita exiturus, immiscebat. Præsentis ubique animi erat, & ad mortis memoriam hilarem ac exporrectam frontem ostendebat. Non vel ratio, vel sensus, vel verba nisi cum ipso extremo spiritu defecerunt. Quem cum emigrare jam animadverteret, monuit, filium, ut pedes ipsi extra lectum protenderet, & cum vocibus illis: *Domine Jesu commendo tibi spiritum meum*, animam piissimam simul efflavit, quarto post Natalem LXXII. die. Bene sit animæ candidæ, cui jam decretoriam sententiam pronunciavit ipse Salvator: (Matth. 19. v. 29.) *Omnis qui reliquerit domum vel fratres, aut sorores, aut patrem aut matrem, aut uxorem, aut libros, aut agros, propter nomen meum, centu-*
plum

plum accipiet & vitam eternam possidebit. Lugent tamen ejus mortem Vidua liberique superstitēs, qui nunc in novam calamitatem conjecti, cum extremis necessitatibus conflctantur. His quoque subveniendum est & pietatis præstanda officia. Qui itaque pietate ducuntur, nec opibus destituuntur, favore suo alienæ opis quam maxime egentes complectantur. Magnatum est, quos munerum suorum dispensatores constituit Deus, de thesauris suis admetiri piis hominibus, quibus ad vitæ sustentationem opus esse filiis suis judicat benignissimus Pater. Nobis vero qui fratrum sororumque fortunam labantem communi pietate fulcire debemus, hoc agendum est, ne sub paupertatis onere bonæ mentes fatiscant. Quæ in illos conferentur beneficia, ita dabuntur, ut majori cum fœnore ad Dominum sint reditura. Neque enim steriles pietatis causæ sunt, sed largissimum habent remuneratorem: qui ut suos non deserit, ita nec illos qui suis cupiunt voluntque unquam deesse volet. Quandoquidem vero hac vespere exuviæ viri beati in tumulum inferentur, vos qui e Civibus nostris Viri hujus virtutes suo æstimare pretio novistis, extremum illi honorem persolvite, quod non tam a nobis rogati quam pietate vestra ac humanitate ipsa compulsi facietis. Valete.
PP. Kiloni d. III. Octobr. Anno clb lbc LXXXIV.

ET si sunt, qui vel nullas in muliebri sexu virtutes agnoscunt, vel ut exiguas aut fucatas contemnunt, vel saltem intra domus suæ parietes sepeliendas esse existimant; audiendi tamen illi minime sunt; præsertim cum major in feminis, ubi in mentes bene educatas incidit, virtus sæpe deprehensa fuerit, eaque animi constantia, ut viris ipsis longe antecellerent. Ideoque in publicum gloriæ theatrum etiam illæ produci omniumque sermonibus celebrari debent, eoque magis, quo infirmior ille sexus validioribus ad virtutem stimulis moveri debet, atque ut pudor illis incutiatur, qui e viris infra muliebrem inconstantiam se demittunt, & illud ipsum Virtutis nomen, quæ a Viris ita appellata fuit, imo ipsam humanitatis speciem exuere videntur. Laudanda itaque illa Romanorum consuetudo est, qui non Viros tantum meritis insignes, sed & vita bene acta illustres matronas publico præconio honestandas esse decreverunt. Quidni itaque pulcherrimum hunc morem imitemur Christiani, qui non castitatem tantum, non modestiam, prudentiam, frugalitatem, omniaque industriæ ornamenta in feminis laudare possumus, sed vitæ etiam sanctitatem & religiosissimum divini Numinis cultum, quem præ ipsis etiam viris sacri annales summis in cælum laudibus extulerunt. Non sunt profecto dissimulandæ eximiæ virtutes Matronæ illius,

us, cui hodie exequias paramus, quibus si O-
ratorum more immorari, easque omnibus ver-
borum sententiarumque luminibus ornare ac
illustrare velimus, in uberrimum copiosissi-
mumque dicendi campum immitteremur.
Nunc cum brevi oratione nobis ac titubanter,
& strictim attingenda sint omnia, ut solent qui
vitæ memoriam in transcurso exponunt, in so-
la ejus vita, sine fūco, a quo ipsa viva quam
longissime abfuit, ac sine omni ornamentorum
apparatu recensenda nos tenebimus. Quod
si Marcellæ, Fabiolæ aliarumque viduarum
præstantissimarum laudes ab Hieronymo de-
cantari merebantur, si neque nostra ætate,
illarum gloria conticescit; hujus quoque ma-
tronæ funus, quæ pietate animi, quæ continen-
tia, (neque enim post mariti mortem ulli alii
viro nubere voluit) ad illas comparari poterat,
quibus possumus officiis ornabimus. Nata ita-
que pie defuncta nostra ANNA CATHARI-
NA Gryphisvaldiæ est, Anno recuperatæ
gratiæ clc lbc XLVII. die XXIV. Novembris,
paulo ante quintam vespertinam, Patre Nobi-
lissimo & Experientissimo DN. CASPARO
MARCHIO, Medicinæ Doctore celeberrimo,
primum in Academia Gryphisvaldensi Ma-
thematicum, hinc Medicinæ & Mathematicum in
Academia Rostochiensis, postea in hac nostra
Kiloniensi Medicinæ Professore primario, ac
Serenissimi Principis nostri, & tandem Poten-
tissimi Electoris Brandenburgici Archiatro,
3 E 3 qui

qui Berolini Anno cl^o l^oc LXXVII. diem obiit, tum ob insignem artis Medicæ peritiam, tum, ob alias eximias virtutes non Principibus solum, sed & Collegis suis, in quorum animis ejus hæret memoria, atque adeo omnibus, cum quibus vixit, acceptissimus. Mater ipsi fuit, egregia atque in sexus sui exemplum nata Matrona CATHARINA SCHMIDIA, cui ante, hos decem annos hic extremum honorem persolvimus. In Pietate atque cultu divino illa, flagrantissima, in fide erga Maritum spectatissima, in re familiari administranda solertissima, in libris educandis sollicitissima, erga omnes officiosa, in miseros benigna, ut modestiæ, prudentiæ, frugalitatis, humanitatis laudem apud omnes inveniret, & consummatum bonæ matris familias exemplum ostenderet. Avus illi Paternus fuit, Vir Pl. Reverendus & Clarissimus Dn. M. CASPARUS MARCHIUS Pastor ac Præpositus Penckumensis in Pomerania. Avia Paterna ANNA Krügers. Avus Maternus Vir Spectatissimus JACOBUS Schmid / Pharmacopæus Gryphisvaldensis : Avia Materna MARGARETA Locferwigen/altero postea matrimonio FRIDERICO DEDEKINDO, Philosophiæ in Academia Gryphisvaldensi Professori Clarissimo juncta. Proavus Paternus LUITIE Krüger / Civis & Mercator Primarius Stetinenfis. Proavia Paterna SIBYLLA Berends. Proavus Maternus JOACHIMUS Schmid / Pastor Westerhusensis prope Stargar-

gardiam: Proavia Materna ELISABETA Eggers. Abavus Maternus AMBROSIUS Schmidt Mercator & Civis Stargardenfis: Abavia Materna e Rungiorum celebri in Pomerania familia nata. His illa orta majoribus, his nata parentibus, ab ineunte ætate virtutum & pietatis stimulos, velut a fideribus quibusdam natalitiis, incussos fenfit. Non potuit ex illo Matris optimæ ludo domestico prodire, nisi ad omnes virtutes, & bonos mores composita mens, quam suo illa exemplo formavit, monitis salutaribus expolivit, atque ita perfecit, ut ex ipso ejus vultu pudor, modestia & quicquid virtutum est, quæ virginem ornare possunt, efflorescere videretur. Educata illa in carissimæ matris sinu fuit, plane eo modo, quo Catullus suam illam Virginem describit:

*Ille flos qui in septis secretus nascitur hortis,
Ignotus pecori, nullo contusus aratro,
Quem mulcent auræ, firmat Sol, educat imber,*

Multi quem pueri, multæ optavere puellæ.

Illa tot dotibus ornata in matrimonium data, est Viro Pl. Reverendo & Clarissimo Dn. MATTHIÆ BURCHARDO, Pastori ad D. Nicolai meritissimo, cui illa in omnium sanctorum festo, Anno clc lbc LXXII. desponsata, utpote beatitudinis Christianæ characteres, de quibus in Ecclesiis eo tempore agi solet, felici auspicio in thalamum ejus illatura, nunc eodem pene, tempore summum æternæ felicitatis apicem,

consecuta. Vixerunt illi animis ita conjuncti, ut nulla unquam dissensionis nubecula hanc pacatarum mentium serenitatem turbarit. Venerabatur illa maritum, ejusque rem familiarem domumque administrabat optime, liberorum educationi non ut noverca, sed ut mater, benignissima præerat. Ipsa quoque ex hoc Conjugio quatuor suscepit liberos, e quibus supersunt duo filii CASPARUS & CHRISTOPHORUS MARTINUS, post mortem Patris in lucem editus, qui matris suæ jacturam, quantum ætatis admittit ingenium, nunc deplorant. Nondum enim sextus annus exierat, cum in cœlestem patriam evocato marito carissimo, illa in viduitatem atque solitudinem conjecta fuit. Heic illa turturum castissimum genus imitata, fidem viro integram servare voluit, ut ne morte quidem ejus hoc rumpi vinculum, permitteret, quemadmodum illa Pompeji Cornelia, quæ, ut graphice Lucanus describit,

— — *seivum arcte complexa dolorem*
Perfruitur lacrymis & amat pro Conjuge luctum.

Vidisses in ea characterem Viduæ ab Apostolo expressum, *quæ sperat in Domino & instat in orationibus nocte ac die.* Qua illa pietate in Deum, qua morum facilitate in homines fuerit, nostra oratione commemorari non debet, cum omnibus præclaræ ejus virtutes perspectæ exploratæque sint. Corpus, quod illi a natura non satis firmum & e primo puerperio causarium fu-

fuit, per subitam quandam & inexpectato quodam casu consternationem elapsa ætate, in febriles effervescentias dispositum, diuturna tandem febris tertiana exarserat. Accedebat illi calculi pertinacia, familiare malum. Qui morbi, cum viribus debilitatis semper ingravescerent, continuo vomitu ac urinæ per octo dies suppressione ita confectum hoc corpusculum est, ut, cum ne Hercules quidem, adversus duos, ut veteri verbo dicitur, medicamenta tandem, utut validissima, tot malis tandem succumberent, illaque piissimam animam, mente ad Deum sublata, inter preces lachrymasque adstantium die XXVI. Octobris hora X. vespertina efflaret, cum annos pene XXXVII. fecisset. Bene precemur Matronæ optimæ, quæ ut viva verum virtutis exemplum circumtulit: ita nunc quoque post fata in animis nostris vivere debet, ut extremos illi honores, quos virtus ejus promerita est, quam cumulatissime persolvamus. Qui supersunt ex illa liberi, quem illa habuit, quem illa precibus suis conciliavit, Deum sibi habebunt propitium, nulla in re necessitatibus illorum defuturum. Illius jam capiti parata est immarcescibilis illa corona, quæ non e pensilibus Babylo-niæ hortis, non ex Alcinoi viridariis, non Hesperidum e lucis, sed e cœlesti Paradiso ipsi ple-ctitur; imo ipsa jam corona est, atque inter illa diademata, quæ Salvator noster in Apocalypsi in capite habere dicitur, de qua illud Esa-

ia non immerito jactaveris: *Eris corona gloria in manus Domini & Diadema regni in manu DEI tui.* Quandoquidem vero ejus quod reliquum est hodie hora II. efferetur, Vos o Cives Academici, si quis pietatis, si quis virtutum sensus est, si qua humanitatis cura, non tam oratione nostra admoniti, quam vestra voluntate adducti, extremum ipsi persolveretis officium. PP. Kiloni. d. 2. Nov. A. clb lbc LXXXIV.

62.

CUm toties ad funera eorum deducenda nostra vos invitarit oratio, qui vel ætate præcipitata diem suum obierunt, vel in medio annorum cursu vitæ suæ exitum invenerunt; novo nunc exemplo ad exequias florentissimæ pudicissimæque Virginis, vos vocamus: quæ in ipso vitæ limine, cum annos illos attigisset, quos florem ipsum vocat Parmeno Terentianus, & qui jam virum exspectare poterant, ex ipso matris charissimæ sinu abrepta, castissimam illam animam efflavit. Magna virginitatis apud omnes gentes veneratio fuit, magna castitatis pudicitiaque existimatio; quam si in suis ita extulerunt Gentiles, ut veluti cœlo lapsas pio etiam cultu prosequerentur, quæ hanc profitebantur: si sacris suis præfecerunt, atque homine majores crediderunt: quid nos non faciemus, qui ab
il.

illo nomen accepimus, quem Virginitatis filium SS. Patres appellarunt. Quo beatior itaque pie defunctæ nostræ excessus censendus est, quæ illibatum illum simplicemque animum, nondum duplicitate aut varietate illa, quam ex adultioris ætatis ac conversationis humanæ figuris induere ille solet, in diversa distractum, aut à prima sua origine longius remotum, non cupiditatum mortalium illecebris inescatum, sed mentem omnino virgineam, in cœlestis sui Sponsi manus, sinus, amplexus dedere non recusavit. Etenim propius à beatarum mentium indole & consortio absunt, qui in tenera illa ætate à prurigne & ardore vitiorum immunes, cogitationum quandam temperiem & ætheream tranquillitatem persentiscunt: quibus desideria cœlestia voluptatum scintillas & fomites antequam in aperta, incendia erumpant, depascunt. Quam ob causam templum Dei & Spiritus S. domicilium virginitatem D. Athanasius vocabat, in quam ille, qui primus castitatis signum sustulit, omnibus virtutum ac cœlestium Charitum choris stipatus descendit. Nimirum quod de margarita dicit Plinius: *Dos omnis in candore*, id de MARGARETA nostra dici potest, cujus animam virginearum ille virtutum candor, qui è cœlesti roris influxu propagatur, ita imbuit, ut dulcissimum illud irrorantis Dei commercium etiam in extremis vitæ suæ sentiret, ejusque fulgorem MARGARITA quasi in magnetem

tem quendam versa sequeretur. Quod si enim vera sunt, quæ de unionibus rerum naturalium scriptores narrant, reperiri inter illos, qui Regis quoddam, veluti apes, instar habeant; cujus Conchæ, ubi capta fuerit, totum margaritarum examen circumfundatur: nostra quoque hæc MARGARITA ad illum Margaritarum Regem, cœlestem Sponsum, conversa, illiusque amabili specie pertracta, ut gemma aliqua in ipsius diademate comparet, quæque olim à Deo parentibus data fuit DOROTHEA, nunc se ipsam DEO reddidit. Juvat vitæ obitusque historiam, velut speculum aliquod vobis proponere: neque vel puella hac magistra, in hoc mortalitatis ludo vos profecisse pœnitebit. Nata est Kiloni nostra hæc DOROTHEA MARGARETA Anno clc lxx. d. II. Martii, Patre Nobilissimo, Amplissimo, & Experientissimo, DN. CÆSSONE GRAMMIO, Med. D. Phyc. & Græc. Ling. Professore in hac Academia celebratissimo, Collega quondam nostro honoratissimo, Matre Nobilissima omniumque Virtutum genere ornatisima Matrona DN. DOROTHEA CHRISTINA. Avus illi Paternus fuit Spectatissimus, Integerri-
 musque Vir PETRUS CHRISTIANUS GRAMM / Civis & Mercator Tönningensis. De cæteris paterni stemmatis majoribus, è Jutia oriundis, qui à prædio GRAMM, nomen suum acceperunt, cum nihil in schedis

B. Dn. Parentis consignatum sit, silentio hic prætermitti debent. Avus Maternus ipsi fuit Admodum Reverendus, Nobilissimus & Amplissimus DN. FRIDERICUS JESSENIUS, SS. Theol. D. & Facult Theologic. in hac Academia Assessor, Pastor ad D. Nicolai primarius, Vir ob pietatem singularemque eruditionem omnibus spectatus. Avia fuit Nobiliss. & Letissima DN. ANNA MOLDENITIA. Proavus ipsi fuit Vir Prudentissimus & Amplissimus DN. FRIDERICUS JESSEN, Senator & Camerarius Hufumensis, Proavia, Ornatissima Matrona DN. CHRISTINA EMYNGA. His orta parentibus & majoribus id operam ab ipsis ungviculis dedit, ut honestissimos natales & pietate & virtutibus omnibus, quæ in sexum illum cadere poterant, ornaret. Primum in ipsa domestica Parentum Schola, in ipso matris sinu educata, tum a præceptionibus tum ab exemplis illorum hominum bonorum morum lineamenta duxit, quæ cum annis paulatim ita excreverunt, ut vel in tenera hac ætate etiam majores natu superaret, & vel viris incutere pudorem posset. Matrem ut tenerrime amavit semper, ita nunquam offendisse illam visa est. Artibus quibus erudiri puellæ ingenuæ solent sedulo incumbens, quod reliquum habuit temporis non ineptiis, aut deliciis, ut solent quæ ad seculi genium institutæ mature vultum, habitum, linguam, animum ad morum illecebras componunt, sed lectioni sacrorum libro-

berorum ac pietatis exercitio impendit. Quam
attenta sacris contemplationibus fuerit vel
hinc patet, quod sacrum Codicem novies per-
legerit, ut omnibus numeris absolutam lecti-
onem haberet, & hac ἐγκυκλοπαιδεία exacta,
hoc numerorum orbe impleto, in æternitate,
ῥήματα ἄρρητα audiret, jamque VERBUM ipsum
cujus tantum sonum hic perceperat, illic pro-
pius videret, ac mente ipsa contingeret. Qui-
bus illa meditationibus immersa tantum in Phi-
losophia illa, quæ in mortis meditatione Plato-
nicis consistere dicitur, profecit, ut a rebus
mortalibus paulatim animum abducens jam-
tum cœlestis vitæ gaudia præcipere videretur.
Ipsa enim cum optime valeret, nec ullo morbo
tentaretur, brevi sibi mortem instare prædixit;
Sed matrem clam haberi voluit, ne tristitia eam
ob causam affligeretur. Itaque vel hæc ipsi vir-
ginitatis præmium divinatio fuit, ut de Sibyllis
loquitur S. Hieronymus. Circa VII. aut VIII.
hujus mensis diem febricula corripit cœpit; quæ
mitior primum ex indole temporis verni æsti-
manda videbatur. Sed inusitatus circa vespere-
ram indies recurrens langvor cum svavi deli-
rio, & habitu vultus funestum aliquid minitan-
te, Inquietudo continua, agrypnia, aliaque,
quæ accesserunt interioris corruptionis indicia
spes inchoare longas vetuerunt: neque præ-
stantissima medicamenta morbum infringere
potuerunt. Quare cum nihil præter beatum
ex hac vita discessum, quem dudum præsen-
rat

rat, optaret, generoso animo mortem contempnit, & divinæ voluntati se totam permisit. Scire enim se aiebat pandi sibi per mortem adiuturum ad vitam æternam. Precibus continuis ardentissimisque in Salvatorem suum erigebatur, in quem toto animo defixa quasi cum triumpho quodam, totaque deliciis cœlestibus ebria, ex hoc mortalitatis theatro, Annos XV. nata, discescit. Bene sit animæ candidæ, quæ nunc inter Virginum beatarum & purissimarum syndone vestitarum choros æternum triumphat: ut nulla jam Matri, fratri, sororibus mestissimis dolendi causa relicta esse videatur. Quandoquidem vero hodie ejus quod reliquum est tumulo finitis sacris inferetur, ipsaq; humanitas & pietas efflagitat, ut quibus possumus officiis exequias ejus cohonestemus, agite Cives Academici, & in hac florentissima ætate mortalitatis vestræ memores, præeunti ad tumulos Virgini frequentes vos præbete comites, & vel ejus exemplo discite, quam in ipsis vitæ primordiis sæpe exitum inveniamus. Quo magis opera vobis danda est, ut ad hanc Philosophiam, quæ in mortis meditatione consistit, vel puellæ hujus exemplo animum generosa quadam pietate mature instituatis. Valete.
P. P. Kiloni. d. XXII. Martii. Anno clc lcc LXXXV.

Quoties ex hoc vitæ theatro aliquis de-
 cedit, Cives Academici, statim cum
 ipso, qui exhalatur, spiritu vel be-
 ne vel male actæ vitæ fama se dif-
 fundit: ut non immerito Solon neminem an-
 te obitum suum beatum dicendum pronuncia-
 rit. Cum enim in vitæ cursu multa sæpe ex
 transverso incidant, quæ a recto virtutis tra-
 mite abducant, ut boni interdum esse per ma-
 litiam aliorum nequeant, qui sua indole non
 sunt mali; ita maiorem gloriam merentur, qui
 ad quosvis casus & eventus inconcussi ani-
 mum illum *τελειόγωνον* ubique ostendunt. Qui
 cum in publica luce agant omnia, omnium
 oculis observentur, tum demum publica po-
 puli censura vel laudabuntur vel damnabun-
 tur postquam fabulam illam suam peregerunt.
 Quare eleganter Siracides justorum mortem
 cum suavissimis odoribus componit, qui lon-
 ge lateque sparguntur; cum melle, cuius dul-
 cedo in omnium ore est; cum musica, quæ con-
 vivarum omnium auribus excipitur. Quasi
 scilicet ita in succum sanguinemque illis con-
 versa bonitas fit, ut non mente solum compre-
 hendatur, sed ipsis quoque sensibus obverse-
 tur: cum ex adverso *Impiorum nomen*, ut Sapi-
 ens in Proverbiis ait, *putrescat* ac cum cadavere
 suo brevi tempore cum omnium averfatione
 exolefcat. Imo vero adeo emunctæ naris non-
 nulli sunt, ut cadaverosæ vitæ odor etiam ante
 fa-

fata subolere illis incipiat, & post fata vel ex ipsis mausoleis, e marmoribus pretiosis, e titulis amplissimis foetor ille spiret & cum illis per secula ingravescat. Quo magis opera danda omnibus est, ut vitam ita instituant, ne cum foetore e scena discedant, ne sui nauseam in animis & in ore omnium relinquant: cum, ut verissime Sidonius ait, *Improborum probra ut praconia bonorum immortalia mancant.* Ideoque id agamus, ut in omni vita boni potius, quam potentes, factiosi, nobiles, magni & illustres non solum videamur, sed & simus. *Magno, inquit Seneca, impendio temporum, magna alienarum aurium molestia laudatio haec constat. O hominem literatum!* (Addimus generosum, fortunatum, divitem!) *Simus hoc titulo rusticiore contenti, O VIRUM BONUM!* Rusticum enim titulum vocat, qui postquam ab urbanis, ab aulicis fastidiri hominibus coepit, ad rusticos hominesque simplices, unde prima ejus origo, rediit. Nam & in maximis olim elogiis veteres Romani & Viri boni & Boni Agricolaë titulum ponebant. Diferte Cato in proœmio de re Rustica ad filium: *Virum bonum cum laudabant, ita laudabant, bonum agricolam bonumque colonum videri, amplissime laudari existimantes, quem ita laudabant.* Non potest cuiquam major obtingere gloria, quam si VIRI BONI titulum hinc abstulerit, qui omnibus triumphis & præconiis major omnia titulorum firmata supergreditur. Cum enim cæteri omnes vel ab autoritate, vel muneris di-

gnitate, vel potentia & fortunis dependeant; hic ab animo proficiscitur, & bonæ mentis characterem ostendit: quo qui insignitur, quandam divinæ mentis imaginem repræsentat. Quare & Lacones olim Virum Bonum divinum vocabant. Jure in illorum numero recensemus Nobilissimum & Prudentissimum DN. PETRUM von Horn/ Senatorem hujus urbis meritissimum, germana fide & candore commodisque moribus Virum, & omni ex parte BONUM. Quam cum ipsi lauream suspendimus, illi plus decoris hac commendatione accedit, quam si pro nostri seculi indole & supercilio omnia illi titulorum aplustria suspendamus. Quod inter maxima elogia funeralia Marito suo Aimilio Valerio in honoribus Ædilitiis mortuo posuerat Antonia Frontonia Conjux, cum HOMINEM BONUM vocaret, ut memoriæ prodidit Gruterus in æterno Inscriptionum opere p. CCCXLIX. idem & nostro huic beate defuncto tum Vidua mœstissima, tum omnes BONI adscribent. Nunquam illum, vel offensa alicui gravem, vel technis & artibus suspectum, vel ulla re molestum, illi cum quibus versatus est deprehenderunt. In Senatorio munere gravem, circumspectum, industrium, prudentem tum Collegæ tum Cives etiamnum deprædicant. Hujus viri ut eo conspectior virtus sit, vitæ historiam ob oculos ponemus. Editus in hanc lucem est Patre Nobil. & Prudentissim. DN. HILDEBRAND O von Horn!

Horn / Quæstore Præfecturæ Reinbeck / Matre Nobil. & Ornatissima DN. ANNA, Spectatissimi Viri GEORGII Tücke / Mercatoris Kilonienſis Filia. Avus Paternus fuit Integerriſmus Vir PETRUS von Horn / Avia METTA Coppunſ / Proavus ipſi fuit HILDEBRANDUS von Horn / qui ſuperiore ſeculo, cum gravis illa Bataviæ tempeſtas incubaret, ob religionem puriorem in exilium actus, in Holſatia quietam fortunarum ſuarum ſedem invenit. Ideoque vel eo nomine felicem prædicabimus beate deſunctum, cujus familia, ſi diviſ promiſſis fidem habere volumus, quicquid bonorum e divina manu exſpectare poterit, vel in ſuis nepotibus ſperabit. Nam vel centuplo fœnore, & in natiſ natorum & qui naſcuntur ab illis jacturam quam ſui cauſa facimus, ſe compenſaturum ſpondet Deus. Avia Materna illi fuit SALOME HENRICI TELEMANNI filia, notiſſima olim nomina & per honeſtiſſimorum Civium cognationes & affinitates hic diſfuſa. Hiſ ortus Parentibus & majoribus bonam indolem & probitatis ſuæ ſpecimina ſtatim ab ineunte ætate oſtendit, mature artibus illis, quibus imbui pueritia ac adoleſcentia ſolet, eruditus. Habuit ille Præceptores domeſticos, in Latinis literis, quas poſtea in Schola Hamburgeniſi & Bremenſi ſub peritiſſimis magiſtris diligenter percoluit. Firmata jam ætate primum venit in familiam AULÆ MARESCHALLI apud Reverendiſſimum & Sereniſſimum Bremen-

sem Archiepiscopum, postea Regem Daniæ potentissimum FRIDERICUM III. gloriosæ memoriæ: cujus postea ministerio admotus, per ipsos XXIX. annos, in variis negotiis regis expediundis & administrandis, summa fide & integritate versatus fuit, multis tamen gravibusque molestiis ut fieri solet nonnunquam implicatus. Tandem vero quietius vitæ genus eligens Kilonii domicilium fixit, ac in urbis hujus Senatum cooptatus, fidem & prudentiam Collegis probavit, Civium amorem facile in se convertit. Conjugium cum Nobil. & omni virtutum genere ornatissima Matrona DN. CATHARINA Büllen / Mercatoris Kiloniensis primarii filia ipsi auspiciatissimum fuit, & per XXXV. annos mira animorum consensione ita firmatum, ut nihil ipsis acerbius jam acciderit, quam cum ab amplexu tam arcto tam diuturno jam divulsi; ut ille in animo conjugis superstes esse; hæc a se ipsa exivisse videatur. In his vitæ suæ bonis nullum illi jucundius unquam fuit, quam quod a filio unico HILDEBRANDO habuit solatium. Etsi enim quatuor ipsi liberi morte præmatura abrepti, unus tamen superstes, qui instar omnium fuit, effecit, ne reliqui desiderarentur. Quod si Solon Tellum Atheniensem eo nomine felicem prædicabat, quod filios bonos & honoratos habuerit: Si Homérico Hectori illud unice in votis fuit, ut Astyanacta suum se meliorem ac præstantiorem vivus videret; quo animum ejus gaudio perfusum

Tum creditis? cum filium, quem oculis suis
cariorum habebat, in cuius educationem &
studia omnes, quos poterat, sumptus impen-
derat, tam pulchre spes suas non tantum im-
plere, sed ultra fidem superare videret. Non
intelligunt, quam alte in animum iste volu-
ptatis sensus penetret, nisi qui similem fortu-
nam experiuntur. Videbat ille puerum, ado-
lescentem, juvenem ad omnes ingenii elegan-
tias factum, qui mira ac inusitata felicitate,
quod diuturno labore aliis discitur, intra bre-
ve tempus exhauriret. Quo factum, ut ea
ætate qua studiorum cursum vix absolvere,
alii consueverunt, ille summis legationum
negotiis à Reg. Maj. Daniæ admoveretur. E-
triennali ille legatione Moscovitica nuper re-
dux, cum quartana semestri pene confectum
parentem diu expectatus hospes amplecte-
retur, adeo sua præsentia senis animum ere-
xit, ut relicto lectulo quasi revivisceret, ac
minus sentire febris furorem videretur. Ve-
rum cum Filium post octiduum negotia alio
vocarent, statim ex absentia ejus pejus habe-
re cœpit. Ad Deum itaque totum se conver-
tit, cumque vitæ & fortunæ suæ cursum ex vo-
to se confecisse existimasset, divino viatico in-
structus, inter preces & uxoris lamenta LX. æ-
tatis anno animam placide efflavit. Quando
itaque hodie ejus quod reliquum est, tu-
mulo inferetur, Vos, ô Cives Academici, ut
extremum illi persolvere humanitatis offici-

um velitis, rogatos volumus. Meretur Viri
 virtus, quæ nunquam pulchrior quam in oc-
 casu esse consuevit. Præterea communis à
 nobis omnibus efflagitat pietas, ut eorum fu-
 nera, qui quasi antesignani viam ad cœlos præ-
 ivere, non tam luctu & lacrymis, quam hono-
 ribus prosequamur. Valete P. P. Kiloni. Kal.
 Apr. Anno clō lōc LXXXV.

64.

Quoniam eo in tempore versamur,
 Cives Academici, quo reviviscunt
 omnia novosque spiritus sumunt,
 totaque rerum natura foliis flori-
 busque vestitur, fructus aliquando lætissimos
 datura; quotidiana tamen ob oculos ex hac
 vita decedentium exempla omnibus horis nos
 fato nostro maturos testantur. Quemadmo-
 dum enim per hortos & agros jam segetes in
 herba extinctas, jam flores Aquilonis sævitia
 decussos, jam arbores ipso suo succo strangu-
 latis; ita quosdam à matris uberibus depulso,
 in ipso limine vitæ exclusos, ac in pleno juven-
 tutis vigore marcescentes videmus. Adeo
 vel ipse Aprilis, qui ab aperiendo nomen inve-
 nisse creditur, cum naturæ promptuaria in u-
 sum mortalium aperire, in succos & humo-
 res plantarum exhaurire deberet; terram in
 sepulchra pandit, hominumque corporibus
 pascit. Et si enim

O-

Omnia nunc rident & formosissimus annus,
 lacrymis tamen & lamentis multorum nunc
 domus perstrepunt, & mœroris non unam
 speciem repræsentant. Itaque qui Veneri olim
 dicabatur mensis, quod amore nunc omnia
 exardescant, non raro ad Libitinæ etiam offi-
 cia invitat. Meministis, Cives optimi, ali-
 quoties jam hoc Vere funerali oratione à no-
 bis fuisse compellatos. Nam & Virginem flo-
 rentissimam, & Sexagenarium Senem intra a-
 liquot hebdomadas extulimus, ne quid de iis
 dicamus, quibus sine parentationis nostræ offi-
 cio funus duximus. Nunc iterum nos ad tu-
 mulum vocat Nobilissima honestissimaque,
 Matrona, DN. ANNA MARGARETA, Viri
 Nobilissimi & Amplissimi DN. JOHANNIS
 HENNINGII, J. U. D. Provincialis, tum qua-
 tuor Civitatum, hujusque Urbis Syndici me-
 ritissimi, Uxor dilectissima, & plane in sui se-
 xus exemplum nata. Quæ, cum hodie tumu-
 lo componitur, quod Clytemnestra apud Eu-
 ripidem Agamemnoni, è feretro marito oc-
 centare poterat.

Fugata thalami fœdere ut conjux tibi

Fuerim fidelis, ipse testari potes.

Scis quam pudica dixerim, quam sedulo

Tuos penates auxerim, ut letus domi,

Aut si exiisses, non minus felix fores.

Rara est maritis conjugum istiusmodi

Captura: pravas facile ubivis reperies.

Nihil enim omisit, quo bonæ tueri uxoris ti-

tulum posset: ut eo quidem nomine felicem se merito prædicare potuerit maritus, qui conjugem illam habuit generis claritudine insignem, moribus gravem & virtutibus spectatissimam, domus suæ præsidium, familiæ incrementum. Quod si Gallorum proverbio non feliciter natus dicitur, qui non est feliciter maritatus, non est quod fata aut genialia sua fidera accuset Maritus, cui faustissima sane hac parte auspicia affulserunt. Non tam fortunis, possessionibus, genere, gratia, quamquam & his illa florebat, quam ingenio censeretur merebatur. Vere enim de se, quod Alcumena illa apud Plautum, gloriari poterat.

*Non ego illam mihi dotem esse duco, quæ dos
dicitur,*

Sed pudicitiam, & pudorem, & sedatum cupidinem,

*Deum metum, parentum amorem & cognatum
concordiam,*

*Viro morigera atque ut munifica sim bonis, pro-
sim probis.*

Nihil de pietate, integris illibatisque moribus nunc dicemus, qui nemini è nobis sunt incogniti. Domesticis virtutibus ita mariti rebus præfuit, ita suo consilio ac prudentia illis prospexit, ut non modo non detrimentum caperent, sed omni ex parte florent. Quis nescit rem familiarem prudenti Matrefamilias, velut altera quadam columna niti? Viros Aristoteles

les ajebat in re domestica quæstores esse, feminas custodes quæditorum. Nisi uterque, mutua opera conspiret, frustra erunt omnia, ac magis interdum bona uxor, præ Viro in domus suæ commoda vigilabit, quæ, ut ait Sapiens, *semitas domus sue considerat*. In liberis educandis formandisque quam sollicita, quam sedula fuit! Sunt enim & hac in re potiores interdum matris quam patris partes. Dum enim pater domo abest, dum negotiis immergitur, illa domi affixa, ac velut in specula posita & in omnes liberorum mores intenta, quævis vel agenda vel omittenda designat. Illa providet ne domi mala nascantur semina, ne foris inferantur, cavet. Neque imitabatur illarum mores, quæ de animis ornandis parum sollicitæ, corpus tantum & membra polire docent, quibus gravius hoc piaculum forte videatur,

Dente si nigro fieret, vel uno

Turpior ungue

puella, quam si animo nequitix maculæ insideant. Solent plerumque male audire matres, quod filiis præcipue fomenta voluptatum suppeditent nimia indulgentia, qui cuticulam quidem curare discant, quid vero intus & in cute animus faciat, parum pensi habeant. Non erat ex illarum genere nostra: neque enim ex illius disciplina domestica unquam pravis iudiciis & opinionibus imbuti fuere, sed bonæ mentis igniculos, ut frequentior matrum cum liberis est conversatio, bonorum præceptorum

instillatione fovit: in omnibus certe potius ad mentis quam corporis culturam respexit, idq; operam dedit, ut avitum suæ stirpis decus etiam in illos derivaret. Nata illa fuit Itzehoæ Anno clb lbc XL. d. XIX. Febr. Patre Magnifico Excellentissimoque DN. ERICO MAURITIO primum in aula Plönenfi, hinc Gottorpiensi Consiliario, tandem Reg. Maj. Dan. Regiminis consiliario ac Ducatum Schlesvvigæ ac Holsatiæ Vice-Cancellario, magni nominis meritorumque Viro. Mater ipsi Matrona Nobilissima DN. MARGARETA, Viri Plurimum Reverendi & Clarissimi DN. M. NICOLAI Georges / per XLII. annos Ecclesiæ in Neuenbrock Pastoris meritissimi filia: Quæ cum extremam senectutem suam, filia in vicinia viventis fortunis solari debuisset, nunc illam sibi turbato mortalitatis ordine ereptam acerbissimis lacrymis deplorat. Nam filium ERICUM, Jurisprudentiæ solidioris scientia, & variæ eruditionis dotibus insignem Virum, magnum Academiae nostræ ornamentum in qua ille Collegii Juridici primatum tenuit, dudum illustris Camerae Imperialis dignitas, illi solatium, nobis decus nostrum, invidit. Avus illi Paternus fuit. Nob. & Prudentissimus DN. OTTO MAURITIUS, Senator Itzehoënsis; Avia Paterna, Nobil. & Ornatiss. DN. REBECCA Brockdorffen / Qui illi utrinque majores fuere, plerique vel Senatoria, vel Consulari dignitate floruerunt, ut vel hinc præcipuo apud suos loco fuisse appa-

pa-

pareat. Non potuit, qui è præclara stirpe, propagabatur furculus degeneris succi fructus edere. Ideoque statim prima ætate, pietatem, castitatem, mores virgine dignos &

— — *generoso incoctum pectus honesto*
ostendit, & in mariti thalamum has dotes, omni dote potiores intulit, quocum illa per ipsos XXII. annos conjunctissimo matrimonio vixit, atque ita vixit, ut nulla unquam dies desiderium, quod in animo ejus reliquit, exstingvat. Nam sincero illum amore semper coluit, matronalem ubique gravitatem, sed sine supercilio præ se tulit, ac sermonis & ornatus parsimonia, in qua mulieris ornatum consistere Demochares judicabat, se commendavit. Domus suæ negotia, non cum illa tam dividere, quam in unam rejicere poterat Maritus, cum ipse, vel alibi negotia sua curaret, vel domi aut in curia civilia ipsum officia tenerent. Adeo apum instar, quas nunquam inficientes dicebat Varro, quod ageret, semper quæsit, nunquam minus desidiosa, quam cum domi suæ desideret. Superstites ex illo matrimonio Filii duo, tresque Filia, quarum una ANNA DOROTHEA, Nobil. Prudentissimoque DN. GOTHOFREDO PROSPERO JOHANNI HELDEN, Senatori hujus urbis ac Dicasterii Provincialis & Aulici Advocato, in matrimonium data est. Qui Matris charissimæ obitum omnes nunc lacrymis justoque comploratu prosequuntur. Excessit illa e vivis nullo graviore,
mor-

morbo oppressa. Nam cum obstructionibus per aliquot dies laborasset, ita præter omnium opinionem vis mali aucta fuit, ut citius mors ejus instans quam ipse morbus deprehensus fuerit. Cum itaque frustra adhiberentur medicamenta, totam se DEO permisit, cœlestibusque epulis satiata, placida morte, inter suorum preces & lacrymas, exspiravit. Maritus vero, cui illa nunc ex oculis sublata, memoriam ejus dulcissimam animo reconditam servat. Qui magnum hoc solatium suum interpretabitur, si vos, Cives Academici, ad funus beatæ suæ uxori hodie hora II. ducendum frequenter confluxeritis. Quod cum commune a vobis efflagitet pietatis officium, nos ut facere velitis peramanter vos rogamus. PP. Kiloni. d. XXI. April. Ann. clb lbc LXXXV.

65.

ET si ita in orbe hoc vivendum est, quasi extremum quemvis diem duceremus; neque ullo tempore exuenda est mortalitatis memoria: excitari tamen conspectioribus exemplis solemus, quando illa & frequentius ob oculos versantur, & in viris dignitate aliqua conspicuis exhibentur. Vix mensis abiit, cum voce publica funus ex nostro ordine indiximus: nunc ex amplissimo Urbis Senatu primarius Consul, Vir & meritis & eruditione

&

& animi integritate omnibus spectatus excessit, hodie tumulo inferendus, si quid præter inanes exuvias inferri sepulchro potest. Satis enim sua virum hunc probitas a morte & oblivione vindicat, neque mortis illum comes gloria destituet, cui vitæ socia virtus fuit. Nobis quoque ille magnum sui desiderium reliquit; qui, ut in statione sua in qua positus fuit, honeste & industrie semper se gessit, ita nunquam nostro ordini gravis fuit: verum, ut inter benevolos animos maxima est cognatio; ita amore omnes complexus est, & quibus potuit officiis sibi obstrinxit. Quare cum etiam nos in luctus hujus partem venire æquum est, o Cives Academici, vos etiam officii vestri memores vos ostendetis, ut extremum pie defuncto honorem exhibeatis, ejusque exequiæ, quantum in vobis est, sint ornatissimæ. Quandoquidem vero ille vivus multis exemplo fuit; nunc in mortuum, qui fortunæ suæ & prudentiæ curriculum absolvit, intuemini, atque e vitæ historia, quid ex usu vobis esse possit, discite. Natus est Nobilissimus & Amplissimus Consul Dn. JOHANNES FUCHSIUS Anno clb lbc XXXI. die Decembr. XXVIII. in Thuringiæ Urbe Schölen / quam celeberrimi Jurisconsulti MATTHIÆ BERLICHII natales nobilitarunt, Parente ejusdem urbis Consule cognomine, Matre URSULA, Viri Reverendi JOHANNIS LEUPOLDI Pastoris Prignizensis filia. Majores, cum ipse defunctus non satis haberet co-

ignii-

gnitos, neque anxie inquireret, quia Pater, immaturo illi fato ereptus, atque ipse in prima juventute extra patriam viveret, hic memorare non possumus. Neque enim in illis, sed in virtute sola & bona mente gloria est, &

— — — — *perit omnis in illo*

Gentis bonos, cujus laus est in origine sola.

Satis illi ad virtutem & fortunam fuit, iis progenitum esse parentibus, qui & exemplo & præceptis adolescentiam ejus regerent, & bonis literis mature erudiendum curarent. Nam postquam prima in patria Schola tirocinia posuerat, Naumburgensem Scholam decimo & sexto ætatis anno adiit, in qua quinquennium quasi Pythagoricum, a præceptorum suorum ore pendens, exegit. Hinc in Magdeburgensi Schola in clarissimi tum temporis Rectoris Danielis Clasenii, postea in Academia Helmstädiensi Antecessoris incluti, disciplinam venit. Qui vir ut erat tam varia eruditione quam Jurisprudentia ornatisimus, quod optimis ingenii monumentis ostendit: ita ad solida in studiis fundamenta ponenda autor illi signiferque fuit. Exacto triennio in Academiam Jenensem concessit, atque ad Jurisprudentiæ studium animum applicuit. Vivebant illic tum temporis Jcti præstantissimi UNGEBAUR, RICHTERUS, STRAUCHIUS, STRUVIUS, à quibus ille scholis qua publicis, qua privatis institutus est, atque eas in legum scientia radices egit, quæ postea in hac ipsa urbe in flores fructus-

Etusque sese diffuderunt. Nam ex Academia huc concedens invitatus a viro quodam primario est, ut filii sui studiis præesset. Quem ubi è privata sua disciplina Anno 1659. in Academicam palæstram miserat, se in forensē palæstram contulit, atque Kiloni fortunarum suarum sedem Anno 1660. fixit. In hac ille & vicinis urbibus causarum patronum egit, & præclara jam tum in peritia juris specimina dedit. Quoniam vero sine vitæ socia vita, præcipue pragmatica, ipsi acerba futura esset, eam sibi uxorem elegit, quæ & svavitate morum aspera clientum litibus tempora ipsi demulceret, & prudentia œconomica rei familiari præesset, pulcherrimisque virtutibus tam thalamum quam domum ornaret. Fuit illa, honestissimi hoc in loco Civis, LAURENTII Muzenbechers / Filia MARGARETA, nunc tristissima ex illius immaturo obitu vidua. Cum illa nuptias 22. Sept. die Anno 1662. celebravit, atque ex svavissimo illo amoris consortio, decem tori conjugalis pignora vidit: è quibus quinque filii, LAURENTIUS, JOHANNES, HANSUS JACOBUS, MATTHIAS, CASPARUS HEINRICUS, tresque Filiae MARGARETHA OLEGARDIS, URSULA DOROTHEA, ANNA BARBARA superstites. Filius LAURENTIUS studiis Academicis hoc in loco initiatus est, jamque Berolini degit. Filia MARGARETA OLEGARDIS Consiliario Archiatroque Serenissimi Electoris Branden-

denburgici D. CASPARO MARCHIO
in matrimonium elocata est. Hujus ille for-
tunas cum firmatas vivus videret, non exi-
guo id solatio & gaudio fuit: quippe cui
vita imbecilla & morbis oppleta spes inchoa-
re longas non permetteret. Cæteri qui per
ætatem ad metam votorum aspirare nondum
possunt divinæ providentiæ & fatorum arbi-
trio se nunc relictos vident. Quos una
cum Matre reliquisque Cognatis divino suo
spiritu summum Numen erigat atque confir-
met. Anno 1664. ab hujus urbis Senatu in Se-
decim virorum Collegium cooptatus est, in quo
civitatis jura pro virili sua defendit, ejusque
commodis prospexit. Anno 1673. Senatorum
ordini adscriptus fuit, ac judicii inferioris &
Ædis Nicolaitanæ cura illi commissa. Quam
ille in Senatu consiliis promptus, in Judicio fi-
de ac æquitate spectatus, in sacris procuratio-
nibus attentus fuerit, Civium esto judicium,
qui vel negotiorum spectatores fuere, vel e
quotidiano rerum usu omnia rectius pensita-
re noverunt. Anno 1680. à Reverendissimo &
Serenissimo Principe nostro ac Domino Fisci
Advocatus in utroque Ducatu constitutus fuit:
unde gravis illi adversaria sæpe parata, ac mul-
tæ simultates, partim obscuræ, partim apertæ
fufcipiendæ. Accessit denique Anno 1682. ut
per gradus ipsi fortuna cresceret, in honorum
complementum Consulatus hujus urbis. Qua
in dignitate positus honestatis sibi rationem
præ-

præcipuam habendam duxit, ne quid civitas detrimenti caperet, ne ex alienis injuriis ipsi laudæ res essent. Cum enim, Seneca teste, sua etiam togatis sint latrocinia, ne illorum reus dici posset, sedulo cavit. Via enim λεωφόρῳ incessit, neque eorum Jctorum mores imitatus est, qui vel in causis liquidissimis, fontibus apros & floribus austros immittunt. Majorem ille ad negotia jurisprudentiam, quam vulgo formularum cantores solent, attulit, fidem quoque, quam alba vestis non variegata, delectat, ut depingit Symmachus: Et quemadmodum Medicus Homero πολυφάρμακῳ laudatur, Miles in bello πολυγύμναστος; ita & ille in arte sua πολυγνώμων multique consilii merito laudandus fuit. Nam in jurisprudentia, quod præcipue πραγματικόν est, & illam facultatem animi πραγματικὴν arguit, foro uti didicit: id est, ad Holsatiæ forum jura ac leges applicuit. Testantur libri ab illo editi de *Inventario* & de *Solemnibus Appellationum*, ac supersunt plures, quos ipse in usum filiorum magna industria conscripsit. In his est *Præctica Formularis Holsatica ad ordinem Institutionum Juris congesta*, & *Introductio in Processum Holsaticum* in libros 4. tributa, quorum 1. de Processibus Holsaticis omnium judiciorum, item Recessuum dispositionibus. 2. de partibus processus ejusdem specialibus, 3. de Processibus in causis quibusdam propriis, 4. de Processu criminali, ordinario, inquisitorio, & bannitorio, eleganti & concinno ordine

ne agitur. Adjiciuntur formulæ ad singulos processus aptatæ. Norunt JCTi quanta olim, in formulis cura, ne dicam superstitio fuerit. Et est earum usus ad *ἐμπειρίαν* forensem, si legibus ac rationibus, ut hic fit, fulciatur, maxime commendandus. Quare magnopere profuturi hi libri sunt non tantum iis, qui tyrocinia in Judiciis Holsaticis posituri sunt, ut minime *ἀπάλαιστοι* ad hanc palæstram accedant, sed & exercitatoribus, qui *παραγματοί* observata è multorum annorum experimentis (nam in his dies diem docet) in rem suam vertent, atque in lucro deputabunt. Nam ut fabricando fabri, militando milites, ita agendo fient JCTi. Ipse ille tantæ tamque multiplicis eruditionis helluo Grotius, cum naturalia gentiumque jura æterno opere explicuisset, Jurisque Civilis Oceanum emensus fuisset, introductionem tamen in Jus Processumque Batavum scribere voluit, ut facem accenderet in patrio foro versantibus; nequis Diogenes in media luce accensa lucerna quæreret. Ad hujus exemplum *ὁ μακαρίτης* Noster introductionem in Processum Holsaticum adornavit, quam licet ipse editioni vivus non destinavit, & in quibusdam fortassis extrema manus non accesserit; tamen ut in lucem mittatur, omniumque usui pateat, digna est. Gratulatus illi jam tum viventi fuit Epigrammate Encomiastico MORHOFIUS noster, quod cum in laudem beati Viri ejusque operis scriptum

ptum sit, hic loco minime alieno apponemus:

Ipsa Themis cæca est. Si Dux sit cæcus ad illam,

Si lippus, luscus; non via recta fori est.

Cæcus enim cæcum ducit per opaca clientem,

Cui pes, mens lingua est cæca; oculata manus.

Sed cæcis oculos, lippis collyria confert

FUCHSIUS, & causis invigilare docet.

Qui nunc ergo oculis oculatos pluribus armat;

Cæcos esse Duces, qui vetat, Argus erit.

Ita ergo vitam suam transigebat ὁ μακροίης
Noster. Hæc ipsi ἔργα καὶ ἡμέραι fuere. Nam
quæcunque consiliis publicis rebusque foren-
sibus subducere poterat tempora, ea studiis
impendit, atque in his honestissima sibi otia
quæsit, in se ipsum, à tribunaliū strepitu sece-
dens. Ita viventem comitati semper sunt morbi,
nec à latere ejus unquam fere discesserunt, vel-
uti lictores quidam fasces & secures semper ex-
pedituri, adeo ut ex eorum satellitio nunquam
non mortalitatis suæ imago illi ob oculos versa-
retur, & Medici semper haberent, in quo ar-
tem & industriam suam exercerent. Nam ut
salus publica Consulis, ita Consul Medicorum
ope semper indiguit. Ita comparatæ sunt res
hominum, ut nunquam desint incommoda ac
adversitates, cum quibus conflietandum. Si
fundatissima valetudo est, calamitates nos va-
riæ provocabunt: si corpus imbecillum, mor-

borum agmina incurrent, atque in societatem
 suam etiam alia malorum genera pertrahent.
 Inter τὰ φοβερά morbi sunt, & τὸ φοβερώτατον
 mors est. Ut adversus illos feliciter pugnemus,
 Medicorum arma in promptu sunt: qui ut ex
 Hippocratis præscripto χαρίεντες esse debent,
 non φοβεροί: ita τοῖς φοβεροῖς commode oppo-
 nentur. Corpus ipsi gracile ad cholericam dia-
 thesin inclinans, neque abfuit ille in varias se
 morborum figuras induens Proteus, Scorbutus.
 Quare: quemadmodum ruinosa domus, ubi
 non putes, vitium contrahit; ita in causario
 corpore ubique morbi, fallentibus vestigiis,
 serpent. Primus hic fulcra labanti valetudi-
 ni supposuit generi beatus Parens, noster,
 quondam Collega CASPARUS MARCHIUS,
 postea potentissimi Electoris Brandenburgici
 Archiater, à quo in successorem illa devoluta
 cura fuit, jam ingravescens morbis opero-
 fior. Ille per ipsos quasi XIV. annos in uno
 hoc ægro experimenta cepit: quid edaces cu-
 ræ, animus turbatus advires infringendas pos-
 sint, in exili corpusculo jam ad contabescen-
 dum pronò. Cui accesserunt turbulenta tem-
 pora, in quæ consulatus ejus incidit, itinera
 multa, quæ vix ossibus hærentem ita defatiga-
 runt, ut ad retinendum in illo domicilio spiri-
 tum omnes machinæ adhibendæ fuerint. Ex
 his fontibus propullularunt, corporis lassitudo,
 diuturna pectoris angustia, lipothymix gra-
 ves & palpitationes cordis in multas horas pro-
 tra-

tractæ; Tusses cruentæ, ventris tormina, spasmi laterum, vomitus biliosi, ac plurima, alia, quæ superiore autumno illum omnino confecerant, nisi per singularem Dei gratiam ex ipsis mortis faucibus creptus ad se rediisset. Sed elusit tandem omnem humanam operam illa morborum turba, qui circa hoc solstitii tempus recruderunt, ut omnia extrema imminere viderentur: nam lethalis marasmus, accedente inexpugnabili faucium siccitate & caloribus hecticis ingravescentibus, succo vitali paulatim absumpto, animum jam ad cœlestia inter tot æstus suos anhelantem, die 14. Julii expulit, illeque sede sua receptus de humanæ vitæ miseriis jam triumphos ducit. Jam pridem ille se inter tot morborum insultus ad extremum illum agonem armaverat. Nam, compositis rebus suis omnibus, sanctissimo vitatico instructus divinis contemplationibus se totum immergit, atque ita inter adstantium preces piam animam efflavit. Vos, ô Cives optimi, ad quos nostra hæc instituta est oratio, perpendite humanos animo casus, vestræque ipsi mortalitatis memores extremum pie defuncto persolvite officium. Effferentur ejus hodie hora II. exuviae tumuloque inferentur, quas ut frequentes comitari velitis, peramanter vos officioseque rogamus. Ipsa vos pietas incitat, ipsa illa communia humanitatis officia hoc à vobis requirunt. Valete. Per scriptum si-

gnatimque Kiloni. d. XXIV. Julii Anno cl
bc LXXXVII.

66.

SI quis humanitatis vobis sensus est, Cives Academici, ut esse sane iis debet, qui humanitatis studia, qui divinam humanamque sapientiam profitentur: si divinitatis æternitatisque curam omnem non abjecistis, (meliora enim de bonæ mentis cultoribus auguramur) ad novum Commilitonis vestri funus, non fuistis tantum, sed & omnibus bonis luctuosum animum advertite, ut quid ex usu vestro sit, hoc exemplo mature discatis. Ita scilicet plerumque comparatum est, ut sero sapiamus Phryges, tardi utilium provisores, Epimethei potius quam Promethei, dum diem ex die, de crastino securi, trahimus, vanissimis consiliis, molitionibus horas, annos, lustra transigimus, & male subductis rationibus de fatis nostris ratiocinamur, eaque nostro arbitrio disponimus. Præcipue vero, ætatis suæ vitio, spes inchoare longas juvenes solent, cum multis se paraſangis a meta fatali abesse existimant, non nisi extrema senectute occupanda. Accedunt voluptates, quæ in vegeto corpore regnant, & quasi Lethæo poculo, eam quæ in animis superest, cœlestium rerum memoriam extinguunt. Quare obniti illis ætatis suæ incita-

ta-

tamentis debent, qui animi curam habent, meliora melioribus magistris moniti, aut à Deo ipso docti, ut statim in vitæ primordio, quamprimum sapere incipiunt, de exitu cogitent, ut summam illam philosophiam, quæ in beata morte consistit, animo comprehendant, ac fera illa & novissima tempora ante ætatem *ὀψυα-
σῆς* non fera sapientia præcipiant. Adeo a teneris advescere multum est, etiam iis in rebus & curis, quas ad senes in pingvi illo otio nostro male feriat, ablegare solemus; cum earum quotidiana commentatio vera illa Christianæ prudentiæ femina in animis spargat, quæ crescentibus annis altas radices agant, & in ramos se fructusque diffundant. Nihil vero acriores animo stimulos subdit, quam si varia periculorum exempla humanorumque casuum documenta proponantur, quibus sancta ea habenda esse doceamur, quæ ad animum raro admittere solemus. Et nunc, Cives Academici, triste vobis exemplum, sed ætati vestræ salutare objicitur, cum in ipso flore, annis juvenilibus in virilem ætatem exeuntibus, quibus honorum fastigia adire, thalamos nobis adornare solemus, ex hac vitæ statione evocatur, Nobilissimus DN. JACOBUS HENRICUS GUDIUS, non nomine tantum, sed & re ipsa Bonus. Jam in eo erat, ut studiorum suorum uberrimos e Jurisprudentiæ fundo fructus reportaret, cum mors illum inopina oppressit & spes amplissimas evertit. Nos vitæ ejus histo-

riam, ut hoc saltem illi officium præstemus, vobis ob oculos ponemus, & vel myrtos & cypressos, cum laurus non liceat, ei suspendemus. Editus ille in hanc lucem est Anno cl^o l^o LVIII. d. XI. Junii, ab ipso solstitio solstitiali, quasi fato destinatus, Patre Viro Integerrimo Spectatissimoq; BARTHOLOMÆO Gude/ Mercatore in hac urbe præcipuo & Ædis Nicolaitanæ Curatore Jurato, cujus hodieque superest, ut Viri Civisque boni, memoria: Matre honestissima ANNA MAGDALENA, ex HOLSTIORUM genere prognata. Paternus ipsi Avus fuit Prudentissimus Amplissimusque Vir JACOBUS Gude/ è Senatorio apud Rendsburgensis ordine: Maternus, Spectatissimus HENRICUS Holste/ hujus loci Mercator: Avia Materna, MAGDALENA, e MULLERORUM familia. Proavos a Patris parte habuit Virum Prudentissimum & Amplissimum MICHAEL EM Gude/ Senatorem Rendsburgensem, & Virum Reverendum BARTHOLOMÆUM Opperman/ Archidiaconum apud Rendsburgenses vigilantissimum: a Matris parte Virum Nobilissimum & Amplissimum, HANSUM Müllern/ hujus urbis Consulem. Nolumus cæteris recensendis immorari, quorum Rendsburgi & Kiloni spectata fatis atque a longo tempore inveterata nomina, nostra quoque memoria celebrantur. His ille Parentibus, his Majoribus ortus bonæ præclaræque indolis in ipsa pueritia specimina

ostendit. Nam cum deprehenderent in illo
tum Parentes tum Magistri ingenii solertis in-
dicia: illi idoneis præceptoribus formandum
tradidere; hi optimis doctrinis animum, ut,
fœcundum uberemque agrum excoluerunt.
Non destituit illorum vota, sed cumulatissime
implevit, & post tirocinia posita, Academia
patriæ sacris anno ætatis XVII. initiatus est.
Quanta ille diligentia studiis optimis incubue-
rit, testari possunt, qui e nostro ordine ad illa
formanda ac expolienda consilia operamque,
impenderunt. His ille munitus, sexto post
anno, iter Gallicum ingressus est, ac Lutetiæ
per aliquod tempus substitit, ut in publico hoc
orbis theatro, in quod omnium hodie oculi
convertuntur, scenarum civilium fabricam,
ingeniorum, morum, artium, armorum, com-
merciorum quasi quandam officinam intueretur.
E Gallia redux Angliam perlustravit, in
eaque Oxonium, splendidissimum illud Mu-
sarum non domicilium, sed regnum: neque
enim in illa urbe habitare tantum, sed regnare
illæ videntur. Per Batavos tandem in Patriam,
ad pristina studia rediit, & ad Jurisprudentiæ
fontes, velut diuturnam explere sitim cupiens
iterum accessit. Huic enim se studio totum,
tradidit, ejusque curriculum optimo ductore,
Collega nostro honoratissimo, DN. NICOLAO
MARTINI, Jcto in hac Academia celeberrimo,
quater, ipso teste, absolvit. Scilicet cum vul-
gari verbo *δὲς καὶ τοῖς τὰ καλὰ agenda sint*;

ille ter quaterque ad eandem redire palæstram voluit, ut omnibus numeris absoluta dici possent, quæ ille tractanda studia suscepit. In hoc tam felici studiorum cursu jam metæ admotum mors immatura aggressa est. Nam cum causarium ipsi corpus a matre ad apoplecticōs affectus prona obtigisset, sæpius habitus corporis plethoricus simile quid ipsi minabatur. Ac prodromum hujus sui fatalis morbi ante annum habuit, diuturnum periculosumque morbum, a quo convaluit. Sed elapso mense Octobri & Novembri male habere cœpit a cordis angustiiis, vomitionibus violentis, tensionibus in cervice & artubus, stupore gravativo, similibusque motiunculis, ut sibi ipsi vix constaret, & ægrum tamen corpus, inter opera & officia quotidiana, traheret. Nam modo urgebat, modo quiescebat morbus: sed maxime inchoabatur & repetebat d. IX. & X. Decembris, & lecto affigebat, tandem in lateris dextri paralyfin resolutus. Pugnatum est potentibus adversus morbum atrocem medicamentis, sæpeque signa quædam convalescentiæ se ostenderunt, sed suspecta Medico visa & infida, qui jam tum in initio morbi sinistra omnia auguratus est. Ergo fallaces illæ induciæ in graviores confictus & tandem extremum agona exierunt. Nam die XX. Januarii hora illa pomeridiana, postquam animam a vitiorum sordibus cœlesti pharmaco purgatam Deo suo commendarat, e vivis excessit, velut rectius loquamur, in-

ve-

veram illam viventium patriam concessit. Vivat ille nunc & beatis majorum suorum mentibus additus, cum omni cœlitum exercitu triumphos perpetuos ingeminet. Hic ille ad vitæ fontes, ab ipso Agno pastus, immortales ex ipsa vitæ arbore fructus decerpit; dum nos voluptatum hujus mundi lacunis ebrii, ac luto nostro immerfi hæremus. Precabimur corpori ejus levem terram, qui dum viveret gravis nemini fuit, & illum bonæ indolis characterem, ab ipso illi ortu cumque nomine ipso impressum, vita, moribus, studiis, officiis exhibuit, ut nunc quoque in Manibus ejus, quos antiquo illo nomine Bonos dicebant Romani, eam bonitatem merito prædicemus. Quandoquidem vero exuviae ejus crastino die hora II. pomeridiana tumultu inferentur, Vos, o Cives Academici, ultimum commilitoni vestro, nobis etiam non monentibus, persolvete officium. Quem ad ædem sacram, lauream, si vixisset, inde studiis reportaturum, comitari poteratis; nunc ad tumulum comitari ne gravemini; è quo ille vos docere & vitæ præcepta suppeditare videtur. Plus est in istis exemplis Philosophiæ, quam in sexcentis Chrysippi & Crantoris libris, qui Philosophia sententia, ignava opera mille virtutes crepant, & ingenii tamen animique pravitate in præcipitia convertuntur ipsi, aliosque malis exemplis in devia abducunt. Invitant vos communia humanitatis officia; Quis enim illa non præstet mortuo, quem

quem omni honore prosequi pietas ipse juss-
rit, socium aliquando nostrum in Civitate Dei
futurum, & in illa sapientiæ cœlestis regia ve-
ram non simulatam philosophiam professu-
rum. Magna præterea Fratri, cæterisque
Cognatis, in acerbo luctu, levatio erit, si af-
fectum vestrum in beate defunctum frequenti
præsentia vestra ostenderitis. Quod ut face-
re velitis, nos quoque etiam memores mone-
re, ac cohortatione nostra impellere volui-
mus. P.P. Kiloni d. XXVIII. Jan. Anno clb lbc
LXXXVIII.

67.

ET si pervulgata maxime de vitæ hujus
brevitate ac miseriis querela est, & quo-
tidiana nobis exempla eas ob oculos po-
nunt; ea tamen animis hominum ob-
repat earum oblivio, tantaque illi socordia ob-
sidentur, ut surdis fabulas narrari videamus
cum ad vitæ finem expendendum, lethargo in
soporem dati excitantur. Qui fortuna suf-
fragante res maximas consecuti opibus cir-
cumfluunt, honoribus florent, omnibusque
adversus temporum injurias præsidiis sunt,
muniti, quasi callum quendam menti suæ ob-
duxerunt, ut deliciis suis immerfi, inutilibus-
que curis sepulti, nunquam, & ne moniti qui-
dem expergiscant. Vos plerumque ô Juvenes,
ea,

ea ætate, qua sanguis integer est, genua virent, latera & lacerti firmantur, dum multæ magnæque spes vota vestra auferunt, non mortis magis occursum, quam cœli lapsum extimescendum putatis. Quare ingerenda vobis mortalitatis illa monita sunt, quibus sapere mature discatis, & quicquid ex usu vestro est, animo præcipiatis. Per totam hanc rerum naturam oculos circumferte: nihil est, quod non singulis momentis inconstantiam suam loquatur, & quadam quasi moriendi necessitate, qua rerum vices distinguuntur, vestræ morti præluat. Sed caligant ad hujus universi conspectum mentis oculi, & qui ab ornatu nomen invenit mundus, inani splendore eos vobis præstringit, ut quasi fascinati, illa pictorum pergula, in qua veri nihil, omnia ficta, imponat. Si histrioniam & præstigias suas Orbi huic detraxeris, fœda omnis ejus facies erit & horribilis: Sola enim ejus specie miseri tenemur, in illa hæremus & stupemus, usque dum sero tandem stultitiam nostram deprehendamus. Sunt qui campos Elyfios, Thessalia Tempe, Adonidos hortos, sylvas lucosque Deorum animo concipiunt; & falsa hac visione se aliosque oblectant: sed prudentiores & qui sapientiæ ac pietatis specillis oculos amarunt, in horrido deserte se versari intelligunt, in hanc quasi insulam deportati, & perpetuo carcere delitescentes. Quæ hic nobis ostenduntur, deliciæ ac voluptates, imaginariæ sunt, neque

que quicquam in se habent, quod pectus fatu-
ret, sed colore tantum & fuco blandiuntur.
Arrident illa nobis Iridis instar, quæ cælo nu-
bilo & ridet & lacrymatur, varietate quidem
& percussione in omnes se colores diffun-
dens, omniumq; oculos mirabili spectaculo in
se convertens; sed quæ fugitivo lumine semper
moribunda deficit, ac in ipso propemodum a-
spectu evanescit. Chrysostomus suis illas co-
loribus depingit; *Etiam si divitias objeceris, si glo-
riam, si delicias, sive aliud quodcunque ex iis, quæ
magna esse videntur: figura tantummodo sunt, non
ipsius, quæ in rebus est demonstratio, persona quædam
scenica, non subsistens rerum substantia.* Hæc si a-
nimo perpenderitis, nihil in fugacibus falla-
cibusque bonis, nihil in vobis ipsis, nihil in
ætatis flore, nihil in robore vestro præsidii vo-
bis esse deprehendetis. Sed fieri plerumque
solet, ut cum enthymematibus & exemplis ex-
pugnare animos eloquentiæ magister doceat,
omni enthymematum apparatu minus, quam
exemplis proficiamus. Insident illa Oratoris
etiam optimi animo, neque in audientium ani-
mos transfunduntur, ut increpatione illa, qua
Salvator usus ad discipulos fuit, hic nobis quo-
que utendum sit: *ὦ ἀνόητοι Ἰσραὴλ ὅτι ἐλαττέτε τὴν καρ-
δίαν τὴν πίστευν!* aut cum Propheta hæ querelæ:
Quis credit prædicationi nostræ? ingeminandæ.
Certe qui hodie effertur, Collega noster, cele-
berrimi Parentis & Collegæ filius, in ipso æta-
tis flore, cujus ille solstitium nondum attigerat,
at-

atque adeo in vitæ hoc suæ vere, optimi Paren-
tis, dulcissimæque Conjugis amplexibus ere-
ptus, plus suo exemplo, efficacior è sepulchro
nunc, quam e Cathedra mortalitatis magister
vos docebit. Qui cum Oratoriæ sacræ profes-
sor hic esset constitutus, ut in illa plura nunc
didicit, ad scholam illam, qua ἀρχαῖα πρῆματα do-
centur admissus, ita plura nunc tumulo hoc
compositus silentio suo loquitur, quam sexcen-
tis præceptis vivus doceret. Nos pro more no-
stro extremum hac oratione illi persolvimus
officium, vobis proponimus exemplum, ne,
in vitæ limine positi, in ætatis robore confisi
spes longiores inchoetis, sed ut in his auspici-
is etiam novissima meditari velitis. Natus fu-
it ὁ μακαρίτης noster Collega JOHANNES
GEORGIUS WASMUTHIUS, Patre MAT-
THIA WASMUTHIO, Theologiæ Professore
celeberrimo, cui eo minus titulorum nunc su-
spendimus, quo magis virtus & fama ejus apud
nos, totoque orbe literato pervulgata est. Illi
quantum vulnus hac plaga inflictum sit, vos
qui paterni amoris aliquem sensum habetis, fa-
cile judicabitis. Nam cum omnes pene in
filio spes repositas haberet optimus Senex, an-
nis ingravescentibus, & e gravi morbo prope-
modum extrema minantibus, factum est, ut
dum in temporum calculo ponendo ille labo-
rat, filius tempori ereptus, fatis & æternitati
velut hostia succidanea immolaretur. Mater
ipfi fuit in pietatis singulare exemplum nata.

DO-

DOROTHEA TARNOVIA, quo elogio omnia quæ hunc sexum ornant, continentur, Viri magnorum in Theologia meritorum, & in Academia Rostochiensis Professoris celeberrimi, JOHANNIS TARNOVII filia, ut sacrum utrinque genus omnia illi auspiciatissima sponderet. Avus illi Paternus GEORGIUS WASMUTHUS, Civis Kiloniensis integerrimus: Avia, ANNA, MATTHIÆ ZOEGÆ, Nobilis Romani filia, qui fortunis domesticis relictis puriora nostræ Ecclesiæ sacra, ab Ecclesiastæ, Aulico Schvverinensi STAMPENIO, postea ejus Socero, meliora monitus, amplexus fuit. His ille Parentibus Rostochii, Anno clc lvc LVIII. d. Nov. XVI. matutino partu in lucem editus, matutina fata, expertus, in ipso virilis ætatis ortu, anno scilicet trigesimo, ne vitæ suæ quidem meridiem absolvit. Præclara ille etiam in tenera ætate boni ingenii signa ostendit, optimis usus ad linguas Latinam, Græcam, Orientales Præceptoribus, primum, M. JOHANNES BAUDEWINO, jam Pastore Stralsundensi meritissimo, hinc HENRICO OPITIO, Orientalium nunc literarum Professore celeberrimo. Quibus Patris postea diligentia accessit, qui bonos in eo colonos imitatus, id egit, ut ex arbore, quam ipse plantaverat, bona cultura, præmaturos aliquando fructus decerperet. Non fefellerunt suæ Parentem spes & vota. Postquam enim Anno ætatis XVII. Albo Academico inscriptus, Theologicis ac Philologicis stu-

studiis, sub moderatoribus Viris Celeberrimis, CHRISTIANO KORTHOLTIO, CHRISTOPHORO FRANCKIO, & HENRICO OPITIO se addixerat, qua publicarum, qua privatarum lectionum auditor; disputatoriis quoque palæstris se exercuerat: honores philosophicos XXII. ætatis anno, habita de *Jejuniis Hebræorum* inaugurali disputatione, HENRICO OPITIO tum temporis Decano, reportavit. Ad Theologica postea studia majore se ardore convertit, ita tamen ut Philosophica studia, non negligeret. Nam de unione personali sub præsidio D. KORTHOLTII, Magnifici nunc Academiae nostri Pro-Cancellarii, publice respondit, ipse vero Præses primum de *cognitione Dei naturali*, hinc de *Philosophia in genere & de motu locali* disputavit. Quibus speciminibus ut famam sibi excitavit, ita facile invenit in Nobilium ordine, qui ipsum filiis ephorum optarent. Primum ille REVENTLOVII, hinc BAUDISSIONUM studia nobili homine digna moderatus est. Unde ipsi apud agnatos generosos favor, qui facile, accedente etiam Patris commendatione, à Serenissimo Principe Philosophicæ Professionis spem ipsi impetrarunt. Quo factum, ut Homiletices, quam vocant, Professionem à Principali gratia reportarit, postquam Homileticas tabulas à se conscriptas Serenissimo ejus Nomini inscripserat. In ordinem ergo Professorium d. XIII. Octobris An-

ni LXXXVI. receptus pro virili sua, ut Spartam, quam nactus erat, ornaret, annifus est. Cui fini Apparatum Practicum è Parentis consilio elaborandum suscepit, ejus propediem specimen de *Jesu in horto, in cohorte, & in morte* daturus. Sed intercesserunt istis conatibus facta, quæ Academiae Professore, Parenti filium, Uxori charissimæ maritum desideratissimum eripuerunt. Vix enim decem menses in Conjugio exegerat; quod ille XV. Julii cum nobilissima præclarisque virtutibus ornata virgine AGATHA, Viri plurimum Reverendi BERNHARDI OLDERMANN, Præpositi quondam in Everfchopf & Utholm filia inierat. Quæ nunc mortem ejus immaturam inconsolabiliter luget. Morbus illi lente primum subrepfit, occulto quodam contagio, ut videtur, ortus, cum ille in loco, ubi pustulæ pueriles grassabantur, versaretur. Horror, capitis dolor, conatus vomendi, spirandi difficultas, principio neglectius habita signa, tandem morbum ipsum ostenderunt. Diarrhœa primum, sed tamen mox sedata, febris deinde acrior, & epileptici insultu accessere, partim è præpedita perspiratione, partim è terrore dormienti superveniente orta symptomata. Quo factum est, ut pertinaciæ morbi medicæ manus tandem succumberet: illeque, postquam ex illa mentis emotione, in qua nihil inconditi dixit, sed amabile JESU nomen semper

per in ore habuit, iterum ad se rediret, inter preces, quas ipse recitabat, & alii verbis præibant, animam jam aliquot ante morbi insultum diebus cibo cœlesti refocillatam d. XXVI. Aprilis hora VI. matutina placide exspiravit. Deus Patrem ex hoc in expectato casu tanquã fulmine prostratum divini spiritus robore erigat, bonoque publico fervet: Conjugi quoque mœstissimæ gratia sua adsistat. Quod reliquum ejus est, hodie hora II. efferetur. Vos igitur, ô Cives Academici, ut extremum pietatis officium Professori vestro persolvere velit, peramanter rogamus. Præterquam enim quod ipsæ humanitatis leges id requirunt, acerbissimos optimi Parentis dolores hoc affectu vestro non parum levabitis. P.P. d. VI. Maji Anno clc lcc LXXXVIII.

68.

ET si quotidiana ac perpetua hæc in Scholis Christianorum, in sacris ad populum sermonibus doctrina est, de non deponenda mortis nostræ memoria; non tamen fastidium ejus capere quenquam debet, sed novis illa præceptis & exemplis semper resuscitanda est. Quo magis enim in diem vivimus, factorum nostrorum incuriosi, eo magis unus & extremus ille dies, qui vitam nostram bene vel malè actam terminat, nobis

proponendus est. Quod si illi qui stadia currunt, non in via hærent, aut objecta quadam specie revocari se à cursu patiuntur, sed ad metam præfixam semper adspirant, neque ab illa oculos dejiciunt: multo magis nos ad Christiani hominis extremam metam toto illo vitæ cursu adniti debemus, atque unicum hoc nobis agendum est, ne nos imparatos & ἀπαλαίςτος supremus ille agon deprehendat. Quis militem ferat, aut eo nomine dignum existimet, qui ditibus ac opulentis stipendiis conductus ad pugnam animum effeminatum, manus desides, nullos nervos, nulla arma adferat? Et nos inter tot voluptatum, tot sensuum, tot affectuum insidias, tot Orbis & Dæmonis insultus & pericula, ignavo torpore diffuentes, compressis manibus sedebimus; neque ad palmam illam in medio positam oculos convertemus? Perpetuos in corpore nostro circumducimus melioris sapientiæ monitores morbos: tot habemus omnium seculorum, dierum, horarum testes, qui nobis illud μέμνησο ἀνθρώπων ὅτι ὢν inculcant: omnis non sacrorum tantum librorum, sed & gentili-um pagina clamat: *Morieris*: ante oculos ducuntur funera: sub pedibus patent sepulchra, è quibus ipsa illa ossa, ipsi cineres merito sacrum illum & salutarem horrorem nobis incusserint. Nulla denique dies est, quæ aurem obliviosis non vellicet, quæ omnem horam ut

su-

supremam illuxisse non prædicet: Quo magis nobis nullo non tempore matura mors, præfente animo, & fide ac pietate armato exspectanda est. Etsi enim de acerba morte queri plerumque homines solent, qui res magnas spe & animis moliuntur: etsi quoque in illo, quod hodie ducimus, funere non reprehendenda, multis hæc lamentatio videtur, parum tamen illa animo vel Christiano vel philosopho attendenda est. *Hoc quod inter primum & ultimum diem jacet, aiebat Seneca, varium & incertum est: si molestias æstimas, etiam puero longum: si velocitatem; etiam seni angustum.* Addamus nos: Vita hæc, si inter virtutes ducitur, ne in puero quidem brevis est: si inter flagitia consumitur, vel decrepito seni brevis, nec vita quidem est, ut qui nunquam cœperit vivere, nisi cum se vitiorum sordibus eripuit, & in lucem ex hoc sepulchro asseruit. Nisi quis proximam ætatem virtutis ac pietatis studio occupaverit, senectus non nisi malorum & dolorum sentina est, quæ mortem non prospicit tantum, sed & respicit: cum mors quotidiana sub vitæ specie nobis subrepat, & per vitæ detrimenta sua ætati incrementa accedant. Neque enim extremus halitus mortem nobis facit, sed perficit: ut extrema in clepsydra stilla non illam exhaurit, sed omne simul ante defluvium. Accedit quod quæ immatura sæpe nobis mors videtur, revera oportuna sit. Neque enim nos hariolari possumus, quibus casibus bonos homines divi-

na sæpe manus præripiat. Ac valent quoque hic illa Publii :

Mori est felix, antequam mortem invocet :

Dum vita grata est, mortis conditio optima est.

Videmus in Virorum illustrium felicitate reputatam fuisse mortis festinationem. Quam in Pompejo à Vellejo & Juvenali optatam legimus; in Crasso à Cicerone laudatam. Illum enim feliciorum illi judicant, si ante bella civilia decessisset in Campania: Hunc Tullius *cum vitæ flore, tum mortis oportunitate, divino consilio & ortum & extinctum* prædicabat. Sed hæc in civili fortuna solatia sibi habeant Rerum publicarum Principes & magnorum consiliorum architecti. Alia Christianis vita est, alia, neque à gentiliū Philosophorum lacunis hausta, sunt solatia, qui quamcunque sibi mortem, etiam in puerili ætate opportunam, judicant, qua ad æternam illam vitam aditus est. *Quotidianus nobis, è Præcepto Ambrosii, est usus affectusque moriendi, ut per segregationem à corporis cupiditatibus, Anima nostra se discat extrahere, & tanquam in sublimi locata, quo terrene adire libidines, & eam sibi glutinare non possint, suscipiat mortis imaginem, nec pœnam mortis incurrat.* Nunquam ergo intempestiva Christiano homini mors esse debet, sed expectata semper & jamdudum quasi è specula prævisa adveniet, si vel maxime in florida illa & vegeta ætate occupaverit. Quare nec acerbior ille casus videri debet

bet, Amplissimi Consultissimique Viri DN. GOTHOFREDI PROSPERI JOHANNIS HEIDEN, Senatoris de hac urbe meritissimi, & Advocati toties in palæstra publica spectati: cui in ipsa virili ætate, in medio vitæ fortunæque cursu, fata manum injecerunt. Adeo nullum domi consilium adversus mortis insidias Senatori fuit: neque Patrono ulla in die, extremo illi dicto vel exceptio vel dilatio profuit. Vos hoc, o Juvenes, vobis exemplum ob oculos ponite, ne aliqua ætatis prærogativa mortis ab insultu immunes vos esse existimetis: atque è vita ejus optimisque moribus quod ex usu vestro sit depromite. Editus ille in lucem est, in Westphaliæ urbe Herfordia, Anno clb lbc XLVIII, qui ob Pacem Germaniæ a diuturno bello restitutam merito memorabilis est, XVII. August. die, Patre BERNHARDO, Serenissimi Electoris Brandenburgici Quæstore, in Sparbergenfi & Ravensbergi diœcesi amplissimo; Matre EVA CATHARINA, Viri Generosi, BERNHARDI DETHERINGI, in WesterHereditarii, filia. De cæteris Viri beati majoribus, etsi ipse aliqua consignarat, nihil tamen inter schedas & scrinia ejus investigari potuit. Neque ea de re magnopere solliciti nunc erimus, cum ex eo tempore, quo nobis innotuit, in bonæ mentis insignibus & natales suos & majorum indolem satis delineaverit. Venit in hanc urbem, Anno clb lbc LXVIII, quæ ipsi ad studiorum & fortunarum cursum,

signum fustulit. Primum illi Academia & celeberrimi in illa Jurisprudentiæ Doctores fontes illos juris aperuerunt, ad quos ille, ut diuturnam explere sitim cupiens, accessit, tantumque ex iis hausit, ut in causis orandis feliciter operam poneret. Igitur Anno LXXIV. Prudentissimi hujus urbis Senatoris, Viri ob probitatem optimosque mores spectatissimi, ANDREÆ ELLRODDII filiam CATHARI-
NAM in matrimonium duxit, sed non nisi quinquennium cum ea exegit. Natus è dulcissimo conjugio filiulus brevi mortalitatem explevit, & insecuta illum mater est. Postquam Anno LXXXIII. XXV. Februarii die in Senatum cooptatus est Noster, secundas nuptias, cum SIBYLLA URSULA, PETRI EMMER-
WALD, Serenissimi PRINCIPIS Plönenfis Quæstoris in Glucksburg, filia celebravit. Verum cum improlis conjugii vincula immaturo hujus quoque Conjugis obitu rumperentur, ad tertios ille amores transiit, atque in illis & vitæ & fortunæ suæ cursum peregit. Jungebatur illi Viri Nobilissimi & Amplissimi DN. D. JOHANNIS HENNINGII, Provincialis, quatuor urbium & hujus urbis Syndici meritissimi, natu major filia, ANNA DOROTHEA; cujus matrimonii ut felicissima fuere auspicia; ita tristi nunc exitu acerbum illud luctuosumq; fuit. Vix ille quinque annos his in amoribus absolverat, cum jam metam se contigisse videret: Nam qui fulserant antea sereni dies,
ni-

nigerrima & ferali tempestate, velut nocte, quadam, occultati, & omne illud gaudium, conturbatum fuit. Adoriebatur illum XXVI mensis elapsi die morbus, qui in febrem ardentem exiit; quæ cum ille ad Vltum Julii diem conflictatus animam suam in divinas manus hora Vltæ verspertina resignavit, postquam illam eo ipso die divino pabulo recreaverat. Sic XL. ætatis anni ipsi impleti in hoc vitæ eremo fuere, ut nunc inoffenso pede ad beatam illam promissionis terram transiret. Gratulemur animæ beatæ de superatis vitæ hujus scopulis, & quantum in nobis est, ad eundem portum enitamur. Vos vero, ô Cives Optimi, mortalitatis vestræ etiam in hac vegeta ætate memores vos ostendetis, si ad humanitatis officium exuviis ejus, quæ hodie terræ inferentur, persolvendum, frequentes confluxeritis. Quod etsi ipsæ pietatis leges à vobis requirunt, vos tamen invitatione nostra, ut faceretis, rogatos volumus. Magnum præterea in luctu suo, Vidua, Socer, cæterique affines ex hoc vestro affectu levamentum sentient. Valete P. P. Kiloni d. VIII. Julii. Anno clō lōc LXXXVIII.

Quod olim sapienti consilio tam apud Græcos quam Romanos institutum fuit, ut publico elogio ornarentur, ac in conventibus publicis celebrarentur, qui vel pro patria rem bene gesserant, vel de salute publica quacunque ratione bene meriti fuerant; id in Republica quoque literaria fieri æquum est, si qui doctrina insignes viri, cæterisque in exemplum nati virtute sua omnium in se oculos converterint. Cum enim virtuti debeat laus, & ut quisque maxime boni est particeps, ita laudabilis maxime sit, publiceque intersit eorum omnibus memoriam ante oculos poni: & pietatis & prudentiæ legibus conveniens est, si digna virtutum præconia ad posteros transmittantur. Nam si quis absurdis & insanis laudibus virtutes mediocres, vel vitiis pluribus conspersas, aut vitia virtutum fucō incrustata in cœlum extulerit: nã ille, præterquam quod se ridiculum aliis præbet, & in Rempublicam esset injurius, & virtutum pretia turpi mangonio dehonestaret. Quis non cum magna animi voluptate legat, quæ apud varias gentes virorum doctorum elogio quibusdam notata sunt; præsertim si id quod res est dicatur, sine fucō ullo, sine verborum pigmentis & præstigiis, non dissimulatis etiam, si quæ sunt (ut nihil ab homine humani alienum est) erratis, levioribus, gravioribus, unde quid in omnes partes valeat, velut è penu
qua-

quadam sibi prudentes Viri depromant. Idem quoque nobis jam ab ipsis Academia natalibus propositum fuit, ut virorum insignium, bene de Academia, bene de orbe literato meritorum memoria omnibus etiam per nos ipsos innotesceret. Nam etsi suis ipsi coloribus mentem optime in moribus, in scriptis pinxerint: æquissimum tamen erat, & humanitatis leges efflagitabant, ut modestis, & quantum sine ostentationis suspicione, in re nostra licet, eximiis laudibus à nobis cohonestarentur. Inter varios fortunæ insultus, quibus Academia hæc sæpe conflictata est, non levis illa virorum doctissimorum jactura fuit, quos vel alii lautiore fortuna proposita evocarunt, vel facta ipsa nobis eripuerunt. Jam plures ex eorum numero composuimus felices & virtutibus suis meritisque spectatos, qui primi ad hanc Musarum coloniam deducendam ante hos XXIII. annos signa sustulerunt. Qui superfuerunt adhuc ex illo ordine, totidem quot

Thebarum portæ vel divitis ostia Nili,
novam hanc in viri celeberrimi jactura plagam acceperunt, dum ipsi ad eandem metam continuo ætatis decursu deflectunt. Meministis, Cives optimi, sublatum nunc nobis esse tristifato Virum maxime reverendum & celeberrimum DN. MATTHIAM WASMUTHIUM Doctorem & Professore Theologum, & inter Academia nostræ decora & ornamenta merito numerandum, & eo quidem tempore, quo
ma-

magna operis ejus Chronologici expectatio eruditiorum suspensos maxime animos tenuit. Nunc ille quoque vixit, &

quem dederat cursum fortuna peregit,
 ab ipsis temporum annalibus destitutus, quos restituere ille tot curis vigiliisque suis laborabat. Non ille quidem acerbo, (quarto enim ultra sexagesimum annum excessit) sed luctuoso suis nobisque funere hodie effertur, & quo conspectiora ejus merita sunt, eo sollicitiorem vitæ suæ enarrationem exigere à nobis videtur. Primum in hac ipsa urbe spiritum hausit ὁ μακαρίτης noster, Anno clō lbc XXV. d. XXIX. Junii. Pater ipsi erat Civis honestissimus GEORGIUS WASMUTHIUS, Mater ANNA, MATTHIÆ ZOEGÆ Nobilis Romani, à Pontificiis ad puriora nostra sacra per Ecclesiasten Aulicum Meclenburgicum Dn. JOHANNEM STAMPENIUM, postea focerum suum, conversi filia. Cum vigorem animi, ac vividum ingenium mature satis ostenderet M. VICOSTADIO, Kiloniensis Scholæ Reçtori, in disciplinam datus est. Posito hic primo in literis tirocinio, eodem anno, quo Pax Germaniæ restituta, non sine felici omine, Academiam Wittebergensem, & maturo consilio adiit. Neque enim, qui pravus hodie multorum mos est, cruda in Academiam studia intulit, sed ad tertium & vigesimum ætatis suæ annum Latinas Græcasque literas ita excoluit, ut in utraque lingua, & libero & ligato sermone feliciter omnia expri-

primeret. Quo exemplo utinam sapere discat
juventus, vel potius deliri Parentes, qui, cum
Græcam ne à limine quidem salutarint, & in
Latina vero vix ultra prima rudimenta profe-
cerint, ad Academias tamen & graviora studia
rudes filiorum animos extrudunt, ut è trunco
ficulno & inutili ligno repente fiant alati & pe-
tasati Mercurii. His igitur geminis quasi alis
suffultus, facile aquilæ instar illum artium or-
bem pervolavit, quem ceteræ testudines, vel
nunquam vel agre perrepunt. Audivit hic in
arte eloquentiæ, magnum Germaniæ nostræ
decus, BUCHNERUM, in Logicis & Meta-
physicis SCHARFFIUM, in Physicis SPER-
LINGIUM, in Lingvis Orientalibus SENNER-
TUM, in Theologicis CALOVIIUM & MEIS-
NERUM, statimque hic ingenii, & eruditio-
nis suæ publica specimina extare voluit. Pri-
mum itaque de *Philologiæ præstantia ac necessitate*
orationem publice recitavit, quam eruditam
& luculentam, uti ipsum literatissimum juve-
nem, testis omni exceptione major BUCH-
NERUS vocare non dubitavit. Hinc de *Theo-*
logia Naturali, de *Bonitate Transcendentali*, quas
ipse elaboravit, theses sub præsidio Adjuncto-
rum TRENTSCHII & BILEFELDII habuit,
& his quasi præludiis dignissimum se iis hono-
ribus ostendit, quos in Philosophia Decano
SENNERTO, lingvarum Orientalium Profes-
sore celeberrimo, hodieque Academiae Witte-
bergenfis Seniore venerabili, biennio post im-

petravit. Sub cujus præsidio idem disputationem super Psalmum primum à se conscriptam publice ventilandam proposuit. Cum itaque sine cortice jam natare posset Noster, suis quoque auspiciis quædam aggressus est. Nam de *Integritate & authentia sacri fontis Hebræi* bis Præses disputavit, aliosque Scholis privatis docendo, & eruditionem & famam mirum in modum auxit. Cum intra hos carceres plenus illi ad eruditionem cursus esset, ampliora sibi spatia ipse institutis ad alia loca peregrinationibus proposuit. In illustri Lipsiensi Academia celeberrimum HULSEMANNUM cæterosque illic Theologos, in Batavis insignes Philologos GOLIUM, COCCEIUM, GENTIUM salutavit, & è conversatione cum illis familiari, quod summum ad perficiendas doctrinas adjumentum est, Orientalium literarum peritiam magis magisque exornare & perpolire visus est. Ejus ille documentum primum dedit, cum Amstelodami *Grammaticam Arabicam plenam & methodicam* ederet. Perlustratis pulcherrimis ad Rheni tractum urbibus Argentoratum pervenit, & ad SCHMIDII ac beati DANHAUERI clarissimorum Theologorum colloquia sæpe admissus fuit: cumque Philologiæ Hebræicæ studio maxime duceretur, quod Basileæ celebrabatur omnis literaturæ Hebræicæ oraculum, BUXTORFIUM, minime sibi prætereundum existimavit. Cujus ex humanissima conversatione quantum profecerit,

rit, grato saepe animo agnovit. In Patriam hinc reversus *Θεός καὶ Πρώτος* primum è veteri ritu sibi salutandos auspicii gratia censuit. Nam, Serenissimi tum Principis Divi FRIDERICI laudes luculenta factaque oratione ita persecutus est, ut & Principi literatissimo & omnibus eruditis quasi aliquo Phidiae signo se probaverit, ipseque jam Academiae Holsaticae, quam animo versabat maximus Princeps, Professor designaretur. Quibus consiliis cum multa eo tempore intercederent, ad Serenissimum Principem Meclenburgicum, GUSTAVUM ADOLPHUM, commendatitiae illi datae sunt, quibus id effectum est, ut Logices Professioni, in Academia Rostochiensis tum vacuae, admoveretur. Quam ille pro virili Spartam ornavit, ita ut lectionibus privatis Hebraicas literas, quibus praecipue se consecraverat, non negligeret. Unde ipsi, quod omnium in manibus versatur *Hebraicae Grammatices, Accentuationis & Vindictiarum* opus, natum fuit, magnamque famam excitavit. Cum itaque Anno LXV. quod intra Divi Parentis vota substiterat, effectum daret Filius Serenissimus, nunc Princeps noster Clementissimus, novamque in patria urbe Academiam erigeret, ad Orientalium lingvarum Professionem, velut ad quoddam suum regnum è Rostochiensis Academia, paterni promissi memor, evocavit, ubi praeterea summos in Theologia honores munificentia Principis obtinuit. Qua ille fide, qua
in-

industria in hoc velut theatro quodam se spectandum omnibus dederit, notius est, quam ut nostra oratione demum debeat recenseri & exaggerari. Accessit illi postea Anno LXXV. Theologica Professio. Verum cum ex opere Astronomo-Chronologico, cui se immerferat, labores illi crescerent, Orientalium Professione se abdicavit. Quas ille curas, quas vigilias in hoc opus impenderit, credi vix potest. Improbo enim ac plane internecino labore, pluribusque, quam quibus Troja expugnata est, annis, hanc velut Penelopes telam semper texuit, ut, tanquam alter Ixion rotis & orbibus suis illigatus, propemodum in pœna & supplicio reputare potuisset, nisi inexhausta veri cupiditas animum illi in tam vasto opere sæpe fatiscentem refocillasset. Laudanda sane in illo Viro fuit summus ille abdita penetrandi ardor, quorum ille desiderioangebatur. Erat illi ingenium acre, calidum, vehemens, incredibilis in laboribus assiduitas, pertinacia ferrea, qui genium sæpe suum fraudaret, somno detraheret, amœnitates vitæ pro nihilo duceret: modo sibi in literis & in studiis habitare liceret, atque id quod sibi venari proposuerat, aliqua velut indagine, ex aliquo latibulo erueret. Occasio illi ad hoc opus è LXX. hebdomadam Danielis calculo suppeditata perhibetur, ne quis illis qui

— — *aliena negotia curant*
Excussis propriis

accensere posfit. Maximis certe semper ingeniis digna habita fuit, quæ in temporum emendationem cura impenditur, quam aliqui è certis naturæ & historiæ characteris finis, aliqui è secretis numerorum proportionibus, ac seculorum revolutionibus in sacro Codice signatis quæsiwere. Non est à vero alienum, ut singulis hominibus, imo & corporibus, suæ sunt divina providentia definitæ periodi, ita hujus Universi machinæ ab æterno illo Architecto esse præfinitas, quas arcano consilio ita abscondidit Pater ille temporum & antiquus dierum, ut vix ulli, nisi quod hariolando ille & conjectando assequatur, quicquam indulserit. Fuere qui è temporum, quæ in sacro Codice notantur, calculo mystico novam emendandorum temporum rationem invenisse sibi visi sunt, Beroaldus, Heinlinus, & nuper in Chronologia, quam vocat, infallibili Ravius. Verum cum nec illi omnibus dubiis satisfacerent; fortasse & ingenio liberalius indulgerent: ita torfit optimum nostrum Senem harum rerum investigatio, omniaque finxit, refinxit, ut se rem omnem confecisse persuasissimum haberet. Non ignorant, qui artis ejus interiora rimati sunt, quantis difficultatibus hic omnia obsideantur. Si ad ipsa, unde omnis ille calculus procedit principia venimus: quis hætenus accuratum conditi mundi tempus nos docere potuit? quis Christi annum, mensem, diem natalem ad certum temporis articu-

lum reducere potest? Nam fane integris libris dubia illa ventilantur, ac Josephus Scaliger solius Dei esse ait certum hic diem definire. Quare prodigio proximum videtur, quod se tabulis suis indagasse, beatus noster WASMUTHIUS, magna rerum suarum fiducia nobis testatus est, testanturque alii, qui ejus rei experimenta ceperunt. Nam assumpta certa anni quantitate, positoque mundi conditi principio, ita continuo illo tenore anni decurrunt, ut, quod ipse vivus sæpe narravit nobis, omnes lunationes, æquinoctia, eclipses veterum, novorum temporum admirabili concentu conspirent, quem accuratissimum emendandi temporis characterem divinitus docebat Scaliger. Quo argumento motus Excellentissimus DN. OLIVEKRANTZIUS, maximæ Svecorum Reginae CHRISTINÆ hoc ita commendavit opus, ut regali plane seq; digna munificentia tabularum in se editionem suscepit. Ac fervebat jam opus, & sub prælo sudabant tabulæ, cum ipsum ab hoc cursu temporum Æternitati assereret Deus, & spei publicæ hic quasi obex poneretur. Non deerunt, ubi lucem opus viderit, pii eruditique censores: ne nos domestico testimonio jactantius aliquid dixisse, aut immaturo præjudicio orbis eruditi suffragia præcipere videamur. Hæc illa animi, quatenus ille eruditus est, ornamenta fuere, & quibus orbi literato innotuit: nunc morum pietatisque lineamenta in illo notabitis.

tis. Nihil potuit illo fieri svavius. Nam omnibus, præcipue discipulis auditoribusque suis, facillimum se semper præbuit, ut nihil adeo in oculis suis bonæ eruditionis reconditum haberet, quod non cum omnibus sine invidia communicaret, imo tardioribus obtruderet; boni certe fideique Doctōris partes cumulatissime implevit. Id singulare in illo eximiumque fuit, quod effusus in omnes esset, qui ope ejus indigerent, miseris, etiam suo cum detrimento, subveniret, neminem à se tristem dmitteret, omniumque, quibus bene vellet, causam ut suam ageret. Multa sunt memorabiliaque ejus in pauperes liberalitatis exempla, cum furtim sæpe & per insidias nescientibus & non petentibus beneficia obtrufit; ut non raro ejus bonitate indigni quoque homines abuterentur. Neque enim facile animo ejus infidebant suspiciones, cum ex ingenio suo ac bona fide alios æstimaret. De Pietate, qua in Deum ferebatur, quæ omnium virtutum complementum est, & si quæ sunt, humana errata facile tegit, quantus hic nobis dicendi campus esset, si quæ & ipsi novimus, & narrata nobis ab aliis sunt, exigua complecti charta possemus. Non prætereunda & illa nobis sunt, quæ in fortunæ bonis numerari solent. Obtigit illi uxor plane ad mores ejus facta, & ut nomine, ita verè re ipsa DOROTHEA, Celeberrimi Professoris in Academia Rostochiensis Theologi filia. Singulari enim

pietatis exemplo omnibus fuit, quo è matri-
 monio duo illi filii superstites fuere: quorum
 alter JOHANNES GEORGIUS, vivente Pa-
 tre in Professorum ordinem cooptatus, imma-
 turo suo obitu magnum illi vulnus infixit; al-
 ter vero MATTHIAS, Medicinæ Candidatus
 è Lipsiensi Academia huc accessit, ut extremum
 Patri pietatis officium persolveret. Postquam
 illa acerbo ipsi funere erepta, ad altera sacra
 connubialia transiit, ducta uxore M. SI-
 GISMUNDI PHILONIS Schellhammers/
 Hamburgi quondam ad D. Petri Archidiaco-
 ni relicta filia, GERTRUDE, quæ nunc, post-
 quam XVII. cum eo annos exegit, Vidua mœ-
 stissima raptum ex amplexibus maritum cha-
 risimum deplorat. Morbus ipsum diuturnus
 à bona & per totam vitam commoda valetu-
 dine invasit, cui ille assiduis laboribus, nullo
 plane recreationis intervallo intercisis, forte
 jam à multis annis fomitem subministraverat.
 Ita scilicet res sunt comparatæ illorum, quibus
 hoc vitæ genus vel ratio vel fors objecit, ut ta-
 cita quadam & svavi *ἀντοχρεία* se ipsos con-
 ficiant. Nam dum nimis meditationibus à
 corporis ministerio avocant spiritus: dum im-
 moderata discendi cupido coquit versatque
 pectus, singuli de natura illorum dies & ho-
 ræ aliquid limant ac decerpunt. Toto pene
 anno morborum quædam syndrome Beatum
 nostrum Senem oppugnaverat, magna Viri-
 um dejectio, perpetua stomachi fastidia, im-
 pe-

pedita concoquendi facultas ac propemodum
 extincta, vomitiones crebrae & vehementes, *ἀ-
 γρυνία*, is quæ ipse per se morbus est, Senectus.
 Quæ omnia continua quasi tabe Spiritum ad
 extremum usque mortis articulum sibi con-
 stantem, ferventissima in Deum pietate velut
 alis quibusdam elatum, non tam excluderunt,
 quam lentis quasi vestigiis exeuntem, imo e-
 volare paratum, die XVIII. Nov. hora III. pom.
 velut è vinculis dimiserunt. Memorabilia
 sunt notatuque dignissima, quæ paulo ante
 beatam mortem jam intra temporum æterni-
 tatisque confinia posito exciderunt, quæ ple-
 nius ab aliis sunt narrata, uberiusque qui ipsi
 adfuit Verbi divini præco ex ambone sacro ex-
 ponet. Nos nunc, quod nostri est officii, e-
 jus quod reliquum est, sepulchro suo hodie
 inferemus. Vos quoque, Cives Optimi, vel
 nobis non monentibus, extremam Præcepto-
 ri vestro pietatem, ea qua par est frequentia,
 exhibebitis. P. P. d. IX. Decembr. Anno cl
 bc LXXXVIII.

70.

Quartum jam intra annum ex Academi-
 co ordine funus ducimus, Cives o-
 ptimi. Nam pene ipso die, quo pri-
 marius in hac Academia Antecessor
 signum sustulit, sublatuè Philosophorum,

nobis ordine est Admodum Reverendus Amplissimusque Vir DN. GEORGIUS ERNESTUS HELDBERG, SS. Theol. D. & Logices ac Moralis Philosophiæ Professor celeberrimus, Collega noster honoratissimus: cum medio tempore WASMUTHII, Pater & Filius, excesserint. Primæ Jurisconsulto partes datæ sunt, ut vel sic Antecessoris nomen tueretur: nam, pridie exeuntis anni octogesimi septimi mortalitatem explevit. Æstas deinde ac autumnus, illa filium, hic Patrem, illum è Philosophorum subselliis, hunc è Theologorum ordine nobis abstulit. Illos felices composuimus; restat nunc, qui in mediæ ætatis cursu, cum ipso anno, tribus ante novi anni exorsum horis, exspiravit, novum non annum, sed seculorum myriadas in cœlis auspicaturus, cui hodie extremum pietatis officium persolvimus. Immaturo quidem ille & acerbo funere, cum Academiæ, tum Uxori dilectissimæ, & Fratribus amplissimis, reliquisque cognatis & affinibus sublatus est; ac longiore sane vita dignus ipse videbatur, si annorum tantum numero vita hæc æstimeretur. Verum ut ille dudum tum philosophiæ moralis, tum cœlestis doctrinæ præceptis domi didicerat, non humana & peritura felicitate, sed virtute ac pietate vivendi nobis rationem constare, ita & nos vel nunc illo monitore sapere discamus, ne vel illum non suo nobis tempore ereptum queramus, vel ipsi in præsentis vitæ bonis ita acquiescamus, ut, si
ab

ab illis avocemur, fata de injuria nobis facta, accusemus. Ea mentis nostræ cæcitas est, ut sæpe intelligendo nil intelligamus, & voluntate nostra nobis ipsi deesse videamur, cum ea misere concupiscimus, quæ cum detrimento nostro & gravissimo periculo conjuncta esse, novit, qui suos res nostras arbitrio moderatur Deus, & in filiorum salutem vigiles semper oculos intendit. Scilicet ut multis fera mors magnæ infelicitati fuit, ita in felicitatis parte, non minima sæpe est, si quis mature fatis isti rerum & negotiorum turbæ, quæ aliquando nos in vitæ propagatione oppressura sit, eximatur. Quid enim habet hæc, etsi vel secula excedat, vitæ; quam ut patentior nobis fortunæ campus aperiatur, in quo illa ad nos vel aperta vi opprimendos, vel per insidias evertendos omnes suas machinas intendat. Quis sibi illum temporum cursum adeo certum promiserit, ut non in aliquo offendat, cum semper objiciat nobis aliquid fortuna, quod nos quasi in specula sollicitos teneat, ad evitanda quæ nos circumstant incommoda, aut impendent. Cum principem apud Christum locum ambirent duo fratres, nescire illos, quid peterent, respondit: quod & nobis dictum existimemus, qui illo Doctore dudum novimus, non in illis, quæ vulgo bona haberi solent, divitiis, robore, potentia, longiore vita veram felicitatem consistere, ut illorum causa magnopere torqueri, aut ea anxiiis supplicibusque votis

precari debeamus. Si incolumi regno vivis quinquaginta filiis cecidisset Priamus, beatissima ille morte è vita discessisset, quæ ipsi in extrema senectute miserrima contigit. Si Neapoli, cum graviter ægrotaret, diem obiisset, Pompejus, in amplissimis fortunis occubuiisset, qui postea miser omnique potentia exutus, hostili manu interemptus est. Quod si ex voto vel nostro, vel eorum, quibus ille carus maxime fuit, vel denique ex meritis & virtutibus, quibus ille & se & Academiam ornabat, vita, *ut Manajis* nostri definienda; quis non illi spatia quam longissima designaverit, ut pleniore ille cursu ad gloriam contenderet, nobis uberiores virtutis ejus haurire fructus licuisset. Sed nunc ille in medio vitæ suæ tempore plus vitæ implevit, quam alii multo longiore annorum via assecuti sunt. Nos ejus historiam, ut mori apud nos recepto satisfiat, ob oculos vobis ponemus. Natus est Anno clc lxc XLI. d. V. Septembr. Cellæ, in Ducatu Lunæburgico, Patre Nobilissimo Amplissimoque Viro, HENRICO HELDBERGIO, Serenissimi Principis Lunæburgici olim Feudorum Secretario & Archivario; Matre omnium virtutum genere ornatisima, ERMEGARDE, HENRICI LEINEMANNI, Civis Cellensis Primarii filia. Avus illi paternus fuit CHRISTOPHORUS HELDBERGIUS, Civis & Mercator Ulzensis primarius. Avia ANNA Mausals / Proavia ANNA Sinneberges. Avia illi materna fuit MAR-

MARGARETA Sildebrand8: Proavus mater-
nus DIEDERICUS Maus8 / Civis Primarius
Ulzenfis: Proavia, BARBARA Meiners8. His
natus honestissimis & parentibus & majoribus
bonæ indolis semina secum ex utero tulit, un-
de præclari aliquando fructus prodirent. Eo
ipso die, quo sacris Christianis initiatus est,
mater ejus diem suum obiit, & è vita excessit,
cujus ille beneficio primum spiritum hauserat.
Jam tum in tenera ætate bonæ & erectæ mentis
indicia dedit, quæ ut magis magisque tum vir-
tutum, tum artium præceptis excoleretur, ad
Scholam Misniæ Electoralem à Parente ablega-
tus est, ubi per triennium, eoque amplius,
indefessum se in studiorum lineamentis du-
cendis & assiduum præbuit. Hinc ad Ducalem
Luneburgensium Scholam, abiit quæ tunc tem-
poris in Cœnobio Walckenridensi instituta Ma-
gistris peritissimis florebat. Hic ubi optima
studiorum fundamenta jecerat, amplissimis à
Præceptoribus suis elogiis dimissus, exacto pe-
ne biennio, Anno LXI. magnam illam bona-
rum artium & morum matrem Academiam
Juliam, dignissimus illa Civis salutavit, post-
quam scholasticis ante palæstris bene se firma-
verat. Usus est illic Viri Celebratissimi, GER-
HARDI TITH, SS. Theol. D. & Professoris
contubernio. Hic ille se totum divinæ huma-
næque sapientiæ studiis consecravit, longe
à pravo illorum more remotus, qui bonæ men-

tis officinam in plusquam militaris licentiæ sedem convertunt,

Sponsi Penelopes, fruges consumere nati.

Facile enim Virorum illic celeberrimorum favorem optimis sibi moribus paravit, quorum felicissimum est cum bonis artibus & literis contubernium. Male habitat doctrina, quæ in malam mentem incidit, & magnum aliquando Reipublicæ, magnum Ecclesiæ malum minatur, si autoritas postea malitiam armaverit. At nostro ad bonam mentem bona sanaque doctrina accessit. Nam divino illi beneficio obtigit, ut illos haberet in illustri Academia, Magistros, qui non è lacunis, sed è vivis plenisque fontibus omnia propinarent, illoque recentem testam odore imbuerent, quem in gravioribus postea studiis fervaret. Illos, qui *sincerum cupiunt vas incrustare*, ineptos novitatis affectatores quam maxime averfabatur, postquam tres & amplius annos hic exegerat, specimine publico diligentiam suam probavit. Disputationem enim de quæstione illa: *An pneumatica sit peculiaris & à reliquis disciplinis, præsertim à Metaphysica distincta scientia vel disciplina*, à se elaboratam, sub Præsidio M. ANDRÆ FROLINGII, tum Logices Professoris Ordinarii, postea SS. Theol. D. & Professoris ac Superintendentis, publice habuit, & è Patria Academia distedens domi per biennium substitit. Hinc Anno LXVII. cum fratre ANTONIO GEORGIO, nunc Parentis sui in munere

re

re illo aulico successore dignissimo, in Academiam Jenensem se contulit, ubi Anno LXVIII. honores Philosophicos Brabeuta Philosopho celeberrimo DN. D. BECHMANNO impetravit, qui ipsi non sine singulari honoris prerogativa dati sunt. Nam inter XXIII. juvenes secundum locum tenuit, cum primum vir in munere scholastico quondam constitutus occuparet. Nil attinet recensere præclara illa, quibus eum celeberrimi Dn. Professores ornarunt, elogia. Nam singularem in illo eruditionem modestiæ, pietati, bonisque moribus junctam omnes certatim collaudarunt. Percrebuerat tum fama Academiae novæ Holsaticæ, quæ & ipsum Kilonium evocavit. Quod ille iter fatis quasi viam monstrantibus ingressus est; quæ sedes illi quietas hic ostendere videbantur. Primam ergo hic famæ fortunæq; aleam jecit, cum elegans argumentum publice disputandum ut Præses proponeret, *de primo complexo totius cognitionis humanæ principio*. Id ille triplici velitatione, docta sane & ingeniosa, persecutus est, ac postea multis accessionibus locupletavit, integrum *de primo cognoscendi principio theoretico & practico* librum aliquando editurus; cui tamen ultima nondum manus admota est. Collegia quoque ipse, amplissimi Collegii Philosophici indultu, instituit. His ille præludiis cum se majori palæstræ aptum ostenderet, Anno LXXII. Philosophiæ Moralis Professionem, à Serenissimo Principe nostro

fi.

sibi demandatam auspicatus est, cui postea Anno LXXV. Logices Professio accessit. Patientissimus illi & eruditionis & famæ campus datus est: geminis enim disciplinis omne propemodum intellectus humani negotium, quatenus & θεωρία & πράξις consistit, complecti videbatur. Cum in Logicis τέρπον τῆς διδασκίας doceret, cæterarum quasi architectus videri poterat, quibus illa disciplina stylobatas, trochleas, vectes supponit. Morum doctrina non Theologiæ solum & Jurisprudentiæ viam sternit, sed & per omne vitæ genus immensa utilitate longe lateque diffunditur. Ad utramque ille disciplinam non volaticam, tumultuariam, aut è Novatorum compendiis raptim corrasam eruditionem attulit, sed ingenii perspicacitatem, promptam judicandi solertiam, veterum Philosophorum doctrinis innutritā, ac optimis magistris perpolitam. Nulla major ingeniorum pestis est, quam, quæ hodie dominatur, extemporalis docendi discendique ratio: qua hesterni discipuli in crastinos doctores mira μεταμορφώσθι abeunt, cæci canum festinantium catuli. Nemo nunc veræ sapientiæ succo alitur, ut in virile ejus robur adolescat: multis satis est illo vel tingi vel aspergi: aliqui vel afflatu absolvi velint. Noster ut in omni vita verum magis, quam veri speciem sectatus est, ita modestis & plenis hac viā quā grillatoriis incedere vestigiis maluit, ab omni theatro apparatu alienissimus. Paucos ille di-

discipulos solida doctrina subactos, levi & circulatoria quadam percursatione circumactis semper prætulit. Quare in docendo fidem, industriam, ἀκρίβειαν omnem adhibuit, & ita quidem semper in opere suo versatus est, ut fundum veri penetraret, omnia exhauriret, omnesque boni Doctoris partes cumulatissime impleret. Moliebatur ille omnibus numeris absolutum opus Logicum, toto illo tempore ipsi exasciatum, cujus editionem jam tum animo versabat. Verum immatura illi mors consilia abruptit ultimamque operi limam invidit. Erunt fortassis, qui in isto librorum Logicorum numero carere orbem literatum hujus accesione potuisse existimabunt. Sed rectius judicabunt, qui miram quorundam, vel jejunitatem, vel ineptam Φιλονομίαν non ignorant. Sunt qui infinita propemodum quisquiliarum mole doctrinam illam onerarunt. Qua deterriti nonnulli, cum ingenio non destituerentur, & aliquem ex eo factum fumerent, præterea antiqua omnia tanta cura elaborata, tot seculorum suffragiis firmata, stulta quadam novitatis prurigine fastidirent; omnes propemodum philosophandi rationes conturbarunt, & quæ anxie in incomparabili suo Organo, magna ingenii solertia, illorum studiorum Pater & Princeps Aristoteles digesserat, illi quasi in antiquum chaos revo-carunt. Inter hos Noster quasi medius, vetusta cum novis conferens, & accurata omnia,

lance expendens, præcipue illis è Schola Cartesianæ magistris novitatis sæpe larvam detraherat. Qui cum nec veteres, neque nostræ ætatis ea in re Doctores legerent, multa sibi nota invenisse visi sunt; quæ vel dudum aliis & uberius & doctius excussa, vel ipsa statim fronte inscitiam produnt. In iis tamen aliquo illi numero *Autor artis cogitandi* habebatur, ut qui in paucioribus à regia via deflecteret, sæpe quoque dissentienti rationibus non levibus duceretur, & quibusdam non spernendis inventis artem locupletaverit, in plurimis tamen aliter sensurus, si nostrorum ille hominum scripta, lection sua dignatus fuisset. Derodoni ut insigni nugatori bonam mentem precabatur. In Gassendi quoque Exercitationibus Antiperipateticis ineptias tanto Viro indignas prehenderat, cujus juvenilis scripti senem postea, ut accepimus, pœnituit. Sed istius quidem integri operis spe excidimus: quo ille absoluto, eandem in Philosophiæ moralis perfecto systemate adornando ordiri telam sibi proposuerat. Nondum enim iis fundata principiis, iis circumscripta limitibus vastissima doctrina est, ut una perpetuaque se διοικήσει oculis eruditorum sistat. Ne quid dicamus de profanis & flagitiosis dogmatibus, quæ in illam à malis hominibus invecta sunt, ut vel eam ob causam Hercules aliquis, monstrorum domitor, & sordium repurgator illi exoptandus sit. Id certe operam dedit Noster, ut recta & plana via juven-

ventutem, non per præcipitia duceret. Accedebat ad sana philosophemata vita Philosopho digna. Frustra enim præceptis & sententiis disertis sumus & canori, si non ipsa vita & facta verbis responderint. Quos enim mores docebunt ipsi vappæ & nebulones? quæ honestatis lineamenta duxerint, qui ipsi ne pilum, quidem viri boni habent? Etenim si minus idoneos Philosophiæ moralis auditores pronunciabat Aristoteles juvenes, qui vitæ modum non tenent, cupiditatibus in transversum rapiuntur: quid Doctoribus facias, in disciplinæ, quam profitentur, opprobrium natis, & qui ultra pueros & juvenes in vita delirant? Noster non Philosophum se tantum, sed & Virum bonum, cui omnis illa Philosophia servit, semper ostendit. Quod rectissimum erat, honestum, laudabile, decorum, ille omni in vita quærebat, quibus poterat beneficiis, officiis, ejus ope qui indigebant, sibi devinciebat. Ubi fides ejus requirebatur, nunquam illa claudicare visa est: neque personatus ille in virtutis via, in qua multi histrioniam nunc exercent, ambulavit. Quoties magistratum Academicum gessit, ita juventuti præfuit, ut nec nimio rigore severius quicquam statueret, neque per turpem socordiam disciplinam omnem, vinculis suis solveret. Collegis suis amore & dexteritate spectatus fuit: In negotiis gerendis quid illo laboriosius? quid magis sollicitum, magis exercitum dici aut fingi potest? In

Con-

Conversatione ut *paucorum hominum & mentis* bene sanæ erat, ita amicitiae sanctum semper nomen habuit. Pietate vera Deum complexus, hac quoque parte bonorum se morum Doctorem ostendit. Cum enim virtutum omnium familiam ducat Pietas, Philosophi moralis nomine dignus non erit, qui suas illam sibi res habere jusserit. Svavissimum illi cum Conjuge vitæ consortium fuit. Anno enim LXXVIII. Kalendis Octobribus domum duxit Nobilissimam variisque virtutibus ornatisissimam Virginem, ANNAM, Nobilissimi, Amplissimique Viri DN. CASPARIS à DEGINCK, Senatoris quondam Lubecensis, optime meriti, filiam, cum eodem die summis in Theologia honoribus ornatus esset. Illa nunc à decennalis thalami gaudiis in gravissimum luctum conjecta tam cari capitis jacturam acerbè deplorat. Cui divini Spiritus gratia adsistat, quæ afflictam excitet, & dolorem omnem abstergat. Levamento illi summo in hac ægritudine erit, quod non Academia tantum in partem luctus veniat, sed & ipse Serenissimus Musarum nostrarum Stator, Princeps clementissimus, ProRectori Academiæ Legati vices demandarit, ut sua quoque per illum præsentia exequias cohonestaret. Ut ad vitæ ejus catastrophën veniamus, Valetudine usus est non satis firma. Causarium enim corpus arthriticis subjectum doloribus illi à Patre quasi traditum fuit. Vicibus quidem illi suis redierunt; sed

sed nullæ ab illis metuebantur insidiæ, quæ jugulum peterent. Elapsa æstate pejus habere cœpit. Nam pene cum continua diarrhœa ipsi conflictandum fuit, quæ viscerum debilitatem arguebat. Hac sedata postea dolores intestinorum recruderunt, qui illum velut eqvuleo torquere videbantur. Crevit interdum ab ipsis induciis vis morbi, interdum ille remittere novasque ostendere spes cœpit, quas falsas fuisse tristior postea docuit eventus: cum latentis in visceribus ulceris suspicio accederet. Mira illi in his tormentis animi constantia, illisque superior mens divino ardore plena in Salvatoris sui amplexus ruebat. Quare nil attentissima sollicitudine, nihil remediis etiam optimis actum fuit. Nam ultimo Decembris die, sub vesperam, adeo ingravescere cœpit morbus, ut placidissima morte, integroque sensuum vigore, animam Deo reddiderit. Nos ejus exuviis hodie funus paramus. Ideoque rogatos vos volumus, ut extremum Præceptori vestro officium, ea qua par est, frequentia persolvatis. Ipsa illa, quam ὁ μακαρίτης noster professus est, bonorum morum doctrina hanc a vobis pietatem atque humanitatem efflagitat. Magno præterea & Viduæ mœstissimæ, & affinibus solatio erit, si in partem quoque luctus vos venire, vestraque exequias præsentia cohonestari intellexerint. Valete P. P. d. XX. Jan. Ann. clb lbc LXXXIX.

Quo rariora in vestra illa ætate, Cives optimi, eorum exempla sunt, qui è medio illo vitæ cursu atque adeo ab ipsis pene carceribus ad metam præcipiti fato rapiuntur; eo vos attentiore cura hæc versare animo debetis & quotidiana contemplatione ob oculos ponere, ne vobis quasi per insidias extrema illa hora incautis & imparatis, ac aliud agentibus obrepat. Quod si enim illi qui in statione sua à summo Imperatore positi sunt, nunquam ita certo in loco pedem figunt, ut non ad primos ejus nutus ab excubiis, è castris, ex acie discedere, aut quo ille evocaturus sit, abire parati sint: id à nobis quoque in hujus vitæ militia fieri æquum est, ut quovis tempore, seu veterani, seu tirones ad jussum Domini emigremus. Optime ergo rebus suis consulat, qui ita vitæ suæ rationes etiam in juventute subductas habebit, ut præsentibus utens semper quidem consulat in longitudinem, ita vero in longitudinem consulat, ut fati quasi præsentis extrema sibi repræsentet, & quamvis horam sibi supremam diluxisse existimet, à quovis rerum fugitivarum momento æternitatis curam suspendens. Non ignoratis notari hæc familiaria ætati vestræ vitia, quæ cum tota in lubrico posita sit, in vitia facile flectatur, utilium sit incuriosa, cupiditatibus abripiatur, omnia audeat, sibi ipsi sapiat, magnos spiritus gerat, monitores aspernetur: ut

ut eam ob causam à Philosophiæ moralis scho-
lis excludendos atque arcendos esse juvenes
magnus è Peripato Doctor existimarit. Qui-
bus si illi idoneos se auditores non præstiterint,
facile vel ipsi, quid de sublimiore illa & divina
sapientia futurum sit, judicaveritis. Quare,
eo majoribus laudibus efferendi sunt, qui con-
versis in virtutes ætatis suæ vitiis, ejus torrenti
mature obniti cœperunt, quo difficilior illa lu-
cta est, ac validioribus æstus ille repagulis co-
hiberi debet. Præclarum ejus non ita pridem
exemplum documentumque dedit Nobilissi-
mus literatissimusque Juvenis CAROLUS
MÖRING, eximium ordinis vestri decus, quod
in primo ætatis flore vobis ereptum est, & cui
hodie exequias paramus. In ejus vitam velut
in speculum inspicite, & maturos ætatis fru-
ctus etiam in juvenili illa ætate animadverte-
tis, ejus quoque exemplo non feram illam
Phrygum, sed præmaturam annosque præve-
nientem sapientiam discetis. Nam quanquam
majorum autoritate commovetur præcipue &
excitatur juvenus, fortioribus tamen stimulis
vel æqualium vel minorum virtutes impel-
lunt. Quemadmodum olim Athenis natum
fuisse in aliqua felicitatis parte reputatum fuit:
ita nostrum hunc in amplissima celeberrimaq;
urbe Dantisco in lucem editum inter prima e-
jus auspicia censeretur debet. Hæc ut commer-
ciis opibusque floruit, ita literarum gloriam
exemplis ad omne ævum duraturis illustravit,

& dignum iis pretium semper statuit, eoque exemplo quasi signum sustulit, quo juvenum spes incenderentur, ut præclaros magna-que patria dignos se ostenderent. Habuit certe Noster à Patria urbe Patronos, qui ejus studia foverunt, plurimos, qui beneficiis stipendiisque juverunt; eorumque ille memoriam ut sanctam semper habuit: ita tum præcipue, cum morti vicinus esset, erga populares suos amplissime prædicavit, & multis ab iis precibus contendit, ut, cum ipse vivus gratias agere non posset, saltem in Sermone parentali extremum hoc grati animi monumentum extare vellent, ejusque ad suos reversi testes benignique interpretes essent. Optimi illi honestissimique, & quod omnes titulos superat, pii obtigere Parentes, FRANCISCUS CHRISTOPHORUS MÖRING Civis & Mercator, Mater virtutibus omnibus spectatissima CONSTANTIA von Zitteren / præcipui quondam Mercatoris Dantiscani WILHELMI von Zitteren & ANNÆ von Juncferen filia, filio nunc suo, à quo senectutis præsidium sperabant, turbato mortalitatis ordine superstites, & in extremum super improvise filii obitu mœrorem conjecti. E-luxit in ipsis pueritiæ annis optima indoles, quæque ad magna contendere posset, si bonis artibus & literis fulciretur. Itaque post pietatis curam, quam primam semper præcipuamque habuere Parentes, ut via expeditissima ad doctrinas sibi necessarias duceretur, omni ope-

ra allaborarunt. Nam postquam Stargardiæ Polonicam linguam perdidicerat, quæ Borussis ad omnia patriæ suæ negotia quasi domestica & subsidiaria est, Ludo literario Gedanensi adscriptus est, in quo ille omnium Collegarum palæstris exercitatus probeque subactus solida fundamenta jecit, ut ita per gradus ille studia emensus, non desultorio quodam impetu, media transcendendo ac summa imis continuando, qui mos nonnullorum esse solet, repentina ac tumultuaria studia in cathedras & forum propellentium, pervagatus fuerit. Magnam in his fidem ac diligentiam Præceptorum WAGNERI, KRUGII, WEBERI gratus memorque discipulus semper prædicavit. Ex hoc circum jam patiens pulveris atque solis, totque speciminibus spectatus, plenis passibus ad patentissimum Gymnasii campum contendit, in quo ille ad omnes, qui illic panduntur, studiorum fontes, quasi diuturnam explere sitim cupiens accessit. Hic ille Doctores ejus Gymnasii celeberrimos velut totidem Oracula in consilium adhibebat, ab eorum ore pendebat, à latere eorum non discedebat, ab his non auribus modo, verum & oculis ipsis (ut Plinius loquitur) discere paratus. Habuit ille in Theologicis SCHELGWIGIUM, in Historicis HOPPIUM, jam urbis Syndicum, in Humanioribus TITLUM, in Linguis Orientalibus ROSTEUSCHERUM Seniore & Rabbi JOHANNEM SALOMONEM, in Philosophicis BÜCHERUM,

jam ad D. Catharinæ Ecclesiasten, & ROSTEUSCHERUM juniorem, quorum jam fama pridem scriptis doctissimis celebratur, doctores, & qui ad optimas ac præclaras doctrinas quasi manu per certa vestigia ductitarent. Hi ratione, consilio, præceptis juventutem ejus foverunt. Hi studia ejus ordinarunt; hos ille, velut parentes suos amavit, coluit, observavit. Ex his illum arcte familiariterque diligebat, ὁ νῦν ἐν ἀγίοις TITIUS, non patriæ tantum sed & publico orbis literariæ bono ereptus. Cum enim in elegantioribus literis, eloquentia, poeti, in quibus ille regnabat, profectus ejus videret, illum, ut surculos manu nostra plantatos fovere solemus, varia doctrina percoluit, omnes ei loculos reclusit, & novis semper ingenii pensis, ut reliquis comilitonibus exemplo esset, ejus ardorem & ingenium, additis laudum stimulis, velut quodam poppysmate, provocavit. Orationes ergo tam soluto sermone, quam pedibus vincto habuit, quibus doctorem virorum plausus reportaret. Non vero in illis tantum substitit ὁ μακαρίτης Noster: Sed

Floriferis ut apes in saltibus omnia libant,
 Ita & ille è cæterorum informatione ad suam utilitatem omnia retulit & ex illorum fontibus quæ potuit in suos rivulos derivavit, idque egit ut ex omnium semente ipsi messes nascerentur. Testantur hoc luculenta ejus specimina, dissertatio de obligatione hominis erga DEUM
 sub

sub præsidio ROSTEUSCHERI, aliaque ex
Epist. ad Tit. cap. 3. commate 10. & 11. *de hereti-*
cis fugiendis sub præsidio D. SCHELGWIGH
publice ventilata, è quibus non exiguam sibi
laudem comparavit. Hæc inter studia cum o-
cto anni ipsi interfluxissent, tam *præclaris speci-*
minibus firmati, ad Regiomontanam tandem
Academiam Anno clc lbc LXXXVIII. mense
Februario primum se contulit, sed statim se-
quente anno, cum conjunctissimum sibi Ami-
cum ad Academiam Kiloniensem abiturum in-
telligeret, comitem se illi junxit, perque Ste-
dinum, Stralsundiam, Gryphisvaldiam, Ro-
stockium, Lübecam, quibus in locis, præci-
pue Academicis, Viros celebriores salutavit,
d. XVIII. Maji Kilonium itineris sui metam, at-
tigit. Hic civium Academicorum ordine re-
ceptus facile invenit, qui bonæ menti bene cu-
perent, inter quos primo loco numerandus est
Magnificus Academiæ nostræ Procancellarius
Dn. D. KORTHOLTUS, Professor Theologiæ
primarius, à quo multa in illum beneficia col-
lata sunt. Adeo grato animo agnovit illa *ὁ μα-*
καρίτης noster, ut cum ipse vivus illum decla-
rare non posset, saltem in parentalibus suis hæc
commemorari peteret, ne vel ingratus mori vi-
deretur, & vel fiduciario officio hoc se nexu li-
beraret. Civibus quoque hujus urbis, bene
de se meritis publicas eo nomine gratias agi
voluit. Accidit postea ut plurimum Reveren-
do Viro Pastori Ecclesiæ Nicolaitanæ primario

Dn. M. JOACHIMO GIESIO tum suis virtutibus tum Amicorum commendatione innotesceret eorumque consilio Generosi Adolescentis CAII von THIENEN educationi præficeretur. Qua ille fide & industria rem suam egerit, quibus monitis & consiliis teneram hanc indolem duxerit, & illa quæ supersunt informationis specimina loquuntur, & ipse, qui hanc præceptoris sui jacturam deplorat, discipulus testatur. Quas ille vacuas ab his laboribus horas habuit nullas sibi vacuas indulgit, sed omnes vel Professorum lectionibus publicis & privatis vel suis meditationibus impendit. Ejus diligentia hæc supersunt documenta: disputatio *de Alexandro Papa Octavo Pseudonymo* sub Dn. KORTHOLTI præsidio ab ipso propugnata, & altera *De Supplicationibus sacris quæ e suggestu fiunt*, ad ductum cap. 5. commat. 14. Epist. Jacobi, instituta, Carmen præterea Heroicum quod de JOHANNIS FRIDERICI Saxonici Electoris æternæ memoriæ virtutibus prope ad finem perductum, sub auspiciis D. MORHOFII publice recitare constituerat. Sed hujus aliorumque laborum ducta lineamenta ultima illa rerum linea mors interrupit. In his ille studiis juvenilem ætatem transegit: Sic ille nocturna diurna que manu libros versavit, ut quod alii commestationibus tempus, ille lucubrationibus insumeret, plane ab illo Pamphili Terentiani ingenio alienus, de quo ipse Pater ineptus gloriatur:

Horum ille nihil egregie præter cætera

Studebat, & tamen omnia hæc mediocriter.

Multi enim qui in Academias veniunt, & tales sibi Simones Parentes velint, & Sofiæ consilia non inviti audiverint, qui Patri adstipulans arbitrabatur, *adprime in vita utile esse, ut ne quid nimis.* Doctum ergo, omnibusque illis artibus, quæ juvene ingenuo dignæ sunt, perpolitum vidimus: Nunc pium quoque videamus. Nisi enim Pietas studia nostra duxerit manca, mutila clauda, cæca erit omnis sapientia, omni illo mentis lumine, quod à Patre luminum venit destituta, & in præcipitia delabetur. Qui in contemplatione rerum & in hac universi compage ad pulvisculum usque & minutias omnia rimaturi vel fortunæ vel mechanicæ necessitati omnia subjiciunt, nihil causæ primæ arbitrio permittunt: Qui omnes honesti & virtutis rationes imaginarias habent, næ faciunt intelligendo ut nihil intelligant & cum ratione insaniant, aut insanientem & flagitiosam sapientiam ad posteros propagent. Longe ab illorum hominum doctrinis & moribus aberat, Noster ille, pietatem, quam ore profitebatur, quam è præceptis Doctorum hauserat, non summis in labris natantem, non in chartis exaratam, sed animo impressam circumferens, & ad vitæ usum, moresque Christiano homine dignos sanæ doctrinæ dogmata convertens. Testimonium ejus perhibere possunt, qui e Senatu Academico illum familiarius norunt.

Testis ipsi domesticus est Plurimum Reverendus Hospes, Dn. M. JOACHIMUS GISÆUS, in cujus ille conspectu & consortio vixit, quem ille Parentis loco veneratus est, Deum pro beneficiis sibi exhibitis remuneratorem in ipso mortis articulo illi precatus. Testari denique vel ipsa cathedra ecclesiastica, ipsæ ædes sacræ possunt, quæ toties orationibus ejus piisque doctrinis personuere. Neque enim æri tinnienti similis, solo tantum sono & verbis disertus declamator fuit, ut illi qui philosophia piæque sunt sententia, ignava opera, sed veritate spirituque verba obsignavit. Ab istis virtutibus & moribus quos non Ecclesia fructus sperare potuisset? si longius vitæ curriculum ipsi fata indulgissent. Neque enim, ut multi divina servitia ore professi è perpetuis Bacchanalibus ad vineam Domini, à ganeis & popinis ad aras procedunt, inter illos deprehensus unquam fuisset Pastores, qui primi Ovili suo scabiem inferunt, & velut Lupi in prædam feruntur. Jamque aditus illi & janua ad sacrum aliquod munus patefacta videbatur, cum DEUS illum repente ex hac vita ad sua regna evocavit. In febrim enim incidit, quæ levior quidem primum visa neglectiusque ab ipso habita incontinuum ardentemque abiit, cui omnis illa remediorum efficacissimorum vis succubuit. Statim illi extrema animus præfagiit. Quare, ingravescente morbo, in animæ salutem omnes suas cogitationes cœlesti viatico à plur.

Re-

Reverendo Dn. M. GABRIELE WEDDER-
KOPFIO instructus convertit, atque adeo ve-
rum Theologiæ se cultorem, vel, ut rectius
loquamur, doctorem ostendit, omnia illa tem-
porum intervalla, quibus illi mentis usus inte-
ger esset, precibus ardentissimis, meditationi-
bus cantionibusque sacris occupans, & à plu-
rimum reverendo illo hospite suo, assiduo in
extremo illo agone parastata, multum adjutus.
Vel extrema illum hora, qua vita excessit, stre-
nuum in hac pugna athletam invenit: nam,
integra ratione, plenisque sensibus divinæ se,
voluntati tradens ex monito Pauli 2. *Tim. II, 8.*
Christum crucifixum memoria usque ad extre-
mum vitæ halitum tenuit, & hæc sibi verba in
orationis funebris argumentum esse voluit, ut
vel è sepulchro ac feretro, tanquam è cathedra
veram illam Theologiam, quæ in memoria JE-
su Christi meritique ejus apprehensione con-
sistit, superstites docere videretur. Vixit er-
go ac beatam illam candidamque animam, XX.
Februarii die intra nonam decimamque matu-
tinam efflavit, postquam quartam seculi par-
tem annos scilicet XXV. mensemque ac diem
unum hic in terris impleverat, nunc quod illi
ad plenam ætatem deest æternitate compensa-
turus. Vixit ille, sed ita vixit, ut etiamnum
vobis post fata perpetuo exemplo vivat. Vos
o Cives, siquidem mortalitatis memoriam non
exuistis, extremum commilitoni officium eo
promptius persolvete, quo arctius & ipsa hu-
ma-

manitatis officia & commune illud societatis
vinculum vos obstringit. Valete. PP. Kiloni.
d. XV. Martii Ao. clb lbc XCI.

72.

Qui ineunte vere ad funus commilito-
ni ducendum vos invitavimus, nunc
ipso solstitio ad Doctoris vestri exe-
quias vocamus, qui in medio vitæ
cursu, ipso ætatis suæ solstitio nobis ereptus
magnum sui desiderium in animis omnium
reliquit. Vixit ergo fuitque Nobilissimus Am-
plissimusque Vir M. DANIEL HASENMÜL-
LERUS, Græcæ & Orientalium Lingvarum,
Professor celeberrimus ac Collega noster hono-
ratissimus, cui optime de his studiis merito
longiora vitæ spatia optassemus. Sed quod
commune literatorum fatum est, ex ipsa illa,
studiorum suorum assiduitate immaturam si-
bi mortem acceleravit, aliisque lucendo, lu-
cernæ instar, ipse consumptus est. Fit enim
plerumque ut sedendo, meditando, scriben-
do, vires omnes à corpore ad animum evoce-
mus, ac nudum omnium morborum petiti-
onibus latus ostendamus: qui eo majori agmi-
ne in ipsam vitæ arcem incurrunt, vel sensim
& non animadversi per cuniculos irrepunt.
Ita regnare intra viscera nostra hostem poten-
tissimum tandem sentimus, ubi excubitores i-
sti

sti spiritus intus revocati portas illi apertas reliquerint. Quemadmodum scilicet qui nisu suo non abluetur, torrente tandem abripitur: & ferrum sibi relictum rubigine exiguo tempore conficitur, quod in omnes partes motu continuo versatum cum levi partium suarum jactura vel integra secula vicerit: Ita corpora nostra per quietem illam praesidiis suis nudata exanimari sensim & fatiscere incipiunt, cum spiritus illi nostri quotidiano quasi in secessu vivunt, & suas sibi res relicto corporis ministerio habere videntur. Nos nunc quod possumus extremum Collegae nostro Doctorique vestro officium persolvimus, & quam in ejus funere plagam Academia accepit, quem ex obitu ejus inopinato dolorem maestissima Vidua, quem fratres & cognati sentiunt quomodocunque solamur. Natus ille fuit Anno clc lcc LI. Eutini d. III. Julii. Patre Plurimum Reverendo VITO HASENMÜLLERO Ecclesiae Eutinenfis Pastore per XXIV. annos optimè merito, ac Matre omnibus sexum hunc ornantibus virtutibus conspicua MARGARETA Nobilissimi ac Reverendi Viri VOLKMARI FRANZII, Canonici Eutinenfis filia. Avus ipsi paternus fuit Vir Spectatissimus VITUS HASENMÜLLER Ecclesiae Trommersheimensis Praefectus: Avia MARIA ZWICKERIA, MICHAELIS ZWICKERII Hereditarii in Langensfeld filia. Avia Materna fuit MARGARETA, NICOLAI Jägeri / primum

mum per XX. annos Palæo-Crempensis, hinc per XXVII. annos Eutinenſis Paſtoris filia. His majoribus & Parentibus ortus Noſter, ac Chriſtianifimi ſacris initiatus bonæ piæque mentis ſemina mature oſtendit. Nam cum ſacrum illi naſcendi ſorte genus contigerit, ac auſpicato ipſi DANIELIS nomen impoſitum: quodam quaſi omine ad interpretis ſacri munus à fatiſ ipſiſ deſtinatus videbatur. Elucebant in puero modeſti mores, bona in- doles, ingenii mira felicitas, quæ omnia per- rumperet, ſuiſque ſe Præceptoribus probaret: quos primum Eutinenſi in ludo naſtus eſt in Scholaſtica illa palæſtra optime exercitatoſ GEORGIUM LAUTERBACHIUM & FRI- DERICUM COGELIUM. Hi fundum illum bene percoluerunt bonæq; doctrinæ artiumq; ſemina ſparſerunt, quæ in ampliffimas poſtea meſſes ſucceſcerent. Quæ initia ubi felici- ter proceſſerant, fundamentiſ bene jactiſ ad vicinam Scholam Lubecenſem Anno ætatiſ XV. tranſlatus in NOTTELMANNI, POL- TZII, BRÜGGII Optimorum Clariffimorum- que Virorum diſciplinam incidit, eoſque progreſſuſ fecit, ut primo ſtatim anno varia eruditioniſ ſpecimina oſtenderet. Hinc Anno cl. l. c. XXX. ad Academicam lucem è pulvere Scholaſtico adſpirans Patriæ ſuæ Athenas, omni ſtudiorum genere florentiffimas adire & hic in medio poſita, quam foriſ fugientia captare maluit. Scholarum ergo tam publicarum quam pri-

privatarum assiduus auditor fuit, ac imprimis in lingvarum Orientalium studio, cui se præcipue addixerat, fidum nactus Doctorem, Virum, dum viveret, Celeberrimum D. MATTHIAM WASMUTHIUM, familiarissime illo usus. Nam domo ejus exceptus, ab ore ejus pependit, & in illo Phidiam, qui hunc Mercurium sculperet, invenit. Toto hic quinquennio commoratus Anno clō lbc LXXV. Lipsiensem Academiam adiit majore illic theatro ingenii sui dotes positurus. Eo ergo venit, gratus acceptusque omnibus, Professoribus amatus, æqualibus omni doctrinæ ac virtutum genere spectatus, jamque suo remigio nitens sine cortice natare cœpit & Lingvarum Orientalium Scholas ipse instituit. His gradibus paulatim ille ad fastigia adscendit, ac primum dignissimus ille Professoribus celeberrimis visus est, qui summos in Philosophia honores capefferet. Illi in ipsum Anno clō lbc LXXVII. magno applausu collati sunt, iisque quasi in complementum postea elegans de *Lingvis Orientalibus* disputatio, ipso Præfide habita, accessit. Adeo Nostrum loci hujus celeberrimi amœnitas, ista doctissimorum virorum consuetudo & familiaritas, ille favor omnium, qui optime ipsi cupiebant, ceperat, animumque ejus deliniverat, ut proprias hic sibi domos sedesque quietas, si fatis ita visum fuisset, optaverit. Sed aliter consilia illa ceciderunt. Nam à Patre charissimo, cui senectus ipsa jam morbus es-

esse coeperat, domum revocatus, omnem, quæ foris ostendebatur, spem patrio mandato postposuit. Domum ergo rediit a Patre ingenti gaudio exceptus, qui in illo domus suæ & cathedræ sacræ præsidium ad extremum vitæ spiritum habuit. Cum enim viribus corporis jam imminutis lecto sæpe æger decumberet, Filius in sacro munere vicem ejus explebat, ac præterea generosorum juvenum nonnullorum informationi admovebatur. Hæc inter è vita excedit Pater Anno clō lbc LXXXII. huic Filio suo cæterisque ejus fratribus divinam gratiam omniaque illa, quibus paternus animus ornatam prolem suam velit, bona precatus. Verum toto tamen illo anno matri ex illo obitu & morbis afflictæ adfuit, nec à vicaria illa in Orationibus sacris habendis opera decessit. Re familiari hinc recte curata ad Academica & Musarum sacra illorum amore ductus quasi postliminio rediit. Kilonium ergo primam studiorum suorum matrem revisenti Græcæ Lingvæ Professio tum vacua à Reverendissimo & Serenissimo Principe demandata est, ac biennio post Anno scilicet clō lbc LXXXV. d. III. Febr. Nobilissimam lectissimamque Matronam ELISABETAM, Spectatissimi Tonningæ Senatoris ÆGIDII HARMENS filiam, Pl. Reverendi Viri JOHANNIS MÖSINGII Pastoris Tönningensis Ecclesiæ bene meriti relictam viduam, in uxorem duxit. Quo se amore Nobile illud conjugii par complexum fuerit, quam se veræ

pietatis affectusque documentis provocari, nemo inter nos ignorat. Omnibus enim numeris absolutum charitatis exemplum sibi toto hoc quo una vixerunt septennio aliisque dederunt, eo colligati uterque vinculo, quod non sine summo dolore ruptum nunc vidimus. Nec infœcundus ille amor, etsi eo infelix fuit, quod gemina proles, filius primum, dehinc filia, statim in ipso vitæ exordio finem ejus invenerint. Unica nunc illi filia superstes quam jacturam in Parente suo fecerit, tum demum intelliget, cum ad annos maturiores pervenerit, ubi matri charissimum hoc amoris pignus, ut maxime optamus, fata salvum esse voluerint. Addita postea ex obitu Beati WASMUTHI Hebrææ & Orientalium Lingg. Professio ipsum, quasi in fundi sui possessionem & velut in regnum quoddam suum vocavit. Nam cum in WASMUTHI locum surrogaretur Collega noster honoratissimus Dn. OPITIUS, ille locum vacuum occupavit. De ejus industria, fide, dexteritate testantur ejus discipuli & quæ supersunt, diligentiae specimina, libelli ad erudiendam in his studiis juventutem Grammatici. Vitam ita instituit, ut ob commodos mores, officia, studia Collegiis esset acceptissimus: nunquam enim cum quoquam vel simultates aluit, vel ulli mortalium gravis fuit: prudentiam in Magistratu Academico singularem ostendit: pietatem quam multi lingua circumferunt, animo proscribunt pessimi simulatores,

ille factò potius ipso exercuit, quam inani apparatu ostentavit. Quoties ad populum, verba fecit, prompta illi decora ac flexamina fluebat oratio, & quæ omnium plausus ferret. His cum ille animi dotibus floreret, corpus quoque, si ab externo habitu judicandum, robustum, vegetum, nervosum ei datum videri poterat. Sed quæ ille morborum semina jam ab aliquot annis aluerit, recurrens per anni vices gravissima pectoris angustia, crebra animi deliquia, cordis palpitationes, lassitudo membrorum, & Scorbutica totius corporis intemperies testabatur, & ipse postea tristis docebat eventus. In his tamen insultibus, qui vel suffocationem ipsi minari videbantur, ille tamen, ubi remiserant paululum, sperni vultu simulans firmiorem se, quam revera esset, ostendebat. Hinc Vires ejus, accedente studiorum assiduitate, quotidie retro labi cœperunt, neque totius triennii opera à medico restaurari potuerunt, gliscente intus tabe quadam, quæ omnes vires tacite consumeret. Tanta denique virium defectio fuit, ut extremis illis septem hebdomadibus, non sine vigiliis plurimis, lecto illi decumbendum fuerit: unde in Pede toto tumor aquosus scorbuticus illi natus, qui sine nulla tamen repulsione sensim dissipatus fuit; supra vero genua sanguis extravasa propulsus musculis continuo acerrimoque dolore incubuit. Non profuit hic quicquam

quam singularis illi tum Medici, tum Chirurgi industria, verum animo tandem spirituque deficiens cum extrema instare sentiret Noster, coelesti viatico instructus inter preces ardentissimas animam XXIX. Maji placide efflavit, postquam XXXIX. annos ac XI. fere menses impleverat. Quando ergo ejus quod reliquum est tumulo hodie inferetur, Vos ô Cives, extremum hoc persolvite Doctori vestro officium funusque ea qua par est, frequentia, deducite. Facietis, quod communia tantum humanitatis officia, sed ipsa pietas & quam pie defuncto debetis, observantia à vobis requirunt. Valete. PP. d. IX. Jun. Anno clc lxc XCI.



PUBLICA ACADEMIÆ NEGOTIA VARIA.

73.

CUm in nupera Homagii festivitate carmen aliquod Acrostichon *Serenissimi Principis* Honori inscriptum, tabulæ huic publicæ affixum fuerit, subjiciebatur quidem censuræ meæ, quæ publice mihi demandata est, carminis ejus impressio vel prima vel secunda. Ego autem cum plurima

in eo carmine offenderem, quæ vel limatas aures, vel doctos lectores offendere poterant, notavi tamen tantum exstantia quædam, & intolerabilia in quantitatibus errata, misique ad Typographum, ut de illis corrigendis moneret Autorem, quandoquidem mihi tum negotiis aliis publicis occupato, illa emendare nec vacabat, nec ratio carminis facile admittebat. Me tamen invito factum est, ut nihil in illo carmine mutatum fuerit, vel quod festinatio nimia, tum Autoris, tum Typographi, vel quæcunque alia ratio impedimento fuerit. Post impressionem & divulgationem Carminis, schedula quædam, quæ grandia illa & decumana vitia nugacissimis nugis & insulsis rationibus contra meam censuram defendebat, ad manus meas pervenit. Mihi vero quamvis ridiculus fuerit primum visus hic conatus, mirari tamen jam satis non potui Defensoris istius vel temeritatem vel impudentiam, qui in re manifeste falsa jactare se etiam Apologia sua ausus est. Cum vero hocce facto non levis injuria, non tam mihi, quam muneri meo, quod publice sustineo, illata sit, ad Reverendum Concilium detuli negotium, cujus decreto mihi jam, ut publice vitia illa demonstrem, quæcunque pro illis afferuntur discutiam, & impressionis dissensum publico hoc scripto significem, injunctum est.

I. Prima in *Dynasta* producebatur, quæ corripienda erat. Omnium illorum vocabulorum, quæ

quæ à δύναμις descendunt, prima perpetuo brevis est, testibus Poetis, quotquot sunt, Græcis omnibus, testibus omnibus quantitatum, elenchis. Hypercriticus tamen noster videtur ex illa ratione sibi colorem quærere, *quod vocalis (υ) sit anceps*. Videtur fane ille nescire in Græcis, quæ ne pueri quidem ignorant. Anceps dicitur vocalis, non quod in singulis vocabulis pro arbitrio vel corripitur possit vel produci, sed quod jam in hac jam in illa voce vel corripatur vel producat, prout Autoritas definiverit. In illa voce vero, in qua corripitur, necessario corripitur, in qua producit, necessario producit, nisi alia autoritas ancipitem fecerit. Monendum tamen hic de errore Smetii, qui falsam lectionem istius Sapphici ex Thyest. Senec. v. 603. citat: *cuncta Dynastas metuantq; casus*. Nam Delrio ibi legit *divitias*, alii *divinas*. Scaliger vero & Lipsius, quos sequitur Farnabius: legunt *divinat*, quæ & à plurimis editionibus probatur lectio.

II. Prima in *Pericles* producebatur, quæ corripere debebat. Hypercriticus autem ille ita: *Prima in Pericles natura sua longa est, cum dicatur ἀπὸ πείρας καλῆς*. Tantæne intemperie fanum caput agitant? Citatur tamen Svidas nugarum illarum autor, in quo ne γρῦ quidem ea de re. Quis ferat tantam impudentiam? *Pericles* ipsa Græca vox est περικλής id est valde celebris & gloriosus. Inde fit περικλῆς. Primam autem in περὶ qui brevem esse negaverit

aut in fanit, aut in Græca lingua plane hospes est. Pers. sat. 4. v. 3. manifeste corripit.

Quo fretus, dic hoc, magni pupille *Pericli*.

III. Prima in voce Ducis producta est. Adeo frontem omnem abjecit ille Defensor ut & hoc per Diaστοlen esse factum defendat. Insaniam helleboro purgandam! putat sibi hoc concessum esse, quia *amplius Scholaris puer non sit*, quod, si vel Imperator Romanus vel Pontifex esset, facere non posset. Poterit ille dehinc tanquam novus aliquis Dictator Reip. Poëticae omnes Poëtarum autoritates pro lubitu refingere, vel omnem omnino Poësin, numeris, pedibus, & metris suis solve. Juvat tamen etiam addere profundæ ejus critices horribile secretum: *Hoc, inquit, vocabulo Ducis retento cæsura Hepthemimeris in voce majestatica debebat præscindere pedem præcedentem, quo prolongatione Syllabæ brevis Lector induceretur morula quadam in illa in admiratione subsistere ad intimius penetrandum virtutes tanti Ducis. Tanti est sapere!*

IV. Prima in voce *Xenocratis* producta est, quæ corripitur. Ancipitem defensor esse dixit respectu diversæ originis vel à ξένῳ vel à ξένῳ. Ridiculum profecto commentum! Poëtica necessitas aliquando addit (i) ut syllaba longa fiat, & sit ξένῳ. Ergo etiam prima in ξένῳ produci debet. Eadem ratione aliquis dicat: prima in *Olympus* longa est, quia Po-

Poëtæ Græci nonnunquam dicunt ἔλυμπα. Prima in *monachus* longa est, quia Poëtæ interdum pro μέν dicunt μὲν. Addit ille: Imo ego ignoro quis eam unquam corripuerit. Disce ergo, si ignoras. En autoritatem Græcam! Homer. Odyss. ξ.

Ἀλλὰ διὰ ξένιον δέσας, αὐτὸν τ' ἐλεήσας.

En Latinam: Martial. XIII. 3.

Omnis in hoc gracili Xeniorum turba libello.

V. Prima in *Danaidum* male producitur. Nullus unquam Poëta vel Græcus vel Latinus primam in Danao vel inde descendentibus produxit. Ille vero defendere videtur, vel quod peregrina vox sit, & proin pro arbitrio vel corripienda, vel producenda, qui tamen gravissimus & intolerabilis error est, vel quod descendat à voce Dan vel ἀποτὸς ζῆν Dorice ζαν. Memini me hæc legere in Philippi Cluveri Germania, ubi de Danis agit. Sed hæc nihil neque ad Dionysum neq; ad Danaum, & si quàm maxime essent nondum tamen probata est productio primæ. Expresse corripitur apud Senecam Herc. fur. v. 756.

Urnasque frustra Danaides plenas ferunt.

VI. Iterum producebatur prima in voce DUCI. Causatur hic Defensor ille incuriam Typographi & omissam esse encliticam que. Credat qui volet. Error idem fuit, qui ante, quod plurima docent argumenta.

VII. Secunda in Andabata male producta

est. Græcum est *Ἀνταβάτης* ab *ἀντα* contra, cu-
jus ultima semper corripitur & *βαίνεαι*, ire.
Hæc sunt, quæ in Carmine desideravi, &
quæ contra Hypercrylici illius censuram ex
hoc publico loco monere debui, tum ut
publicæ, & meæ consulerem autoritati: tum
ne alii, ad quos vel Carmen hoc, vel ejus
defensio perveniet, si non adeo rei Poëticæ
periti sint, ad falsa inducantur, & ut demum
dissensum meum publicè contestarer. Valete.
Dabamè Museo meo. XVI. Maji Anno 1662.

74.

EX quo huic Sapientiæ Augustali & com-
muni Musarum hospitio nos præfecit
Serenissimus Princeps, id nobis curatum
fuit sedulo, ne quadam in parte detri-
menti quid caperent literarum studia. Nam
vel exemplis vos impulimus, vel consiliis dire-
ximus, vel monitis armavimus, vel honorum
præmiis provocavimus, vel frigidam suffudi-
mus, vel faces admovimus: ut vel in istis ini-
tiis inter vos videamus, qui in immatura ætate
maturam aliquam sapientiam polliceantur, i-
psoque in flore ætatis ingenii fructus osten-
dant. Nunquam, quantum in nobis fuit, ab
excolendis animis vestris animos, à subsidiis
ferendis manus, ab oneribus portandis hume-
ros subtraximus: neque adeo inter spinas ceci-
de-

derunt sapientiæ semina, ut omnis adolescen-
di spes præcluderetur. Ejecimus omni cona-
tu mollem illam desidiam, ignorantie magi-
stram, ingeniorum noctem, & vivi hominis
sepulturam, cæterasque fatales literarum pe-
stes, quæ in ipsius Sapientiæ cor veneni vires
spargere, atque adeo ipsum Cimbriæ Cor A-
cademiam poterant affligere. Cor Cimbriæ di-
co Academiam. Quemadmodum enim ab illo
in connexa membra: ita ab hac in vicinos ar-
tus, & in totum Patriæ corpus distribuuntur,
sapientiæ fontes. Quod si recte prima san-
guinis officina cor creditur; etiam hæc nostra,
est, quæ & in ipsis rudimentis suis, & nullo non
tempore primigenii sui sanguinis flores in-
prætextas, epomides, purpuras, infulas, to-
gas, augusta sapientum pallia, diffundit. Cor
Cimbriæ est, cujus gemino tubere aquis suis
circumfuso, velut bicolli inter Castalias undas
Parnasso, foveantur & pascuntur Musæ. Cor
illud est, quod non solum in oculis geritur, sed
& cordi est, atque intra ipsos pectoris sinus
concluditur Serenissimo nostro Principi; cui
Cordi nos lingvas nostras (insolubili naturæ
nexu junctas) perenni vinculo copulabimus,
ut lingvis publicis promamus, quæ corde no-
stro agitamus. Atque ex isto Corde istum sa-
pientiæ fontem ac succum hætenus traxistis,
ex isto sanguine vestræ tingentur infulæ, o Mu-
sarum corcula, o Mei, quos cordata eruditio
& Virtus, ut solida & succiplena Cordi nostro

membra adjunxit. Erigite animos, qui istud studiorum stadium feliciter decurritis: palma vobis suspendetur. Exporrigite frontem laureis nostris ornandam. Explicate brachia: sisto vestris amplexibus illam animorum magistram, morum moderatricem, Virtutum matrem, scientiarum & honorum omnium dispensatricem SOPHIAM. Adeste digni Helenæ hujus proci: sed abeste Parides & raptores: abeste Joves, vel sub Tauri specie Europam hanc avecturi, vel sub Cygni lenocinantis forma infidias Ledæ huic structuri; vel lascivi Satyri habitu Antiopæ huic vim illaturi, vel denique aurei imbris illapsu Danaëa hanc corrupturi. Neque enim vel vi, vel cuniculis & clandestinis infidiis istis amoribus se insinuabunt Veneri nepotuli: nec conciliatricibus hic opus, nec lenonibus: sed sine dolo & fraude, nec nisi bona mente inscenduntur castissimi thalami hujus Amasiæ, quæ nuda, & vel fordido palliolo satis decore tecta, nullis fucis ornata, nullis pigmentis incrustata, non meretriciam, sed sinceram & honestam frontem ostentat, sine cultu pulcherrima, sine illecebris jucunda, sine deliciis delectabilis, sine colore speciosa, sine venere venusta, ipso suo neglectu pretiosa, ipsa suavitate gravis, sine ortu veterrima, sine occasu novissima, sine incremento maxima. Aspiciate vero illam, quæ non è Veneris concha prodit, non in splendidissimis ædibus regnat, sed secum habitat, ubicunque habitat: quippe

pe cui vel Empusæ cavea, vel Trophonii antrum, vel Egeria Vallis, vel Cumana rupes, vel Diogenis dolium gratius domicilium præbeant, quam Præneste Neronianum, arces regiae, & quaecunque palatia magnifica. Sedet illa procul ab omnium hominum conspectu, in aliquo Democriti puteo, in aliquo angulo, erudito suo pulvere squalida: Odit enim delicatulos istos atomorum hostes, pulveris literarii impatientes. Intuemini illam, cui non inter comas aurum vel argentum ludit, non Punica in malis mala, non in labris rosæ; quæ non unguentis delibuta, sed sudore pulvere commixto oblita; cuius genæ pro cerussa loligine tinctæ; quæ non alieno incedit cothurno, sed suo graditur focco, non cervices rotat, non gradus frangit. Videte illam incompto vultu, oculis reconditis, macie deformatam, cuius à mortuorum conversatione facies pallida & cadaverosa: Videte chartas nocturna diurna que manu volventem, ungves præmordentem, caput scabentem, & à sua velut sede ingenium provocantem. Cui vero non forma hæc inusitata & venerabilis, quali Deorum imagines, quas jam ipsa vetustas commendat, apparent, sacrum horrorem amoris mistum incutiat, quem non maiestate ista summa percellat? Et quærit illa sibi non Pamphilos aliquos, non Narcissulos sui idololatrias & parasitos, non Cyparissi de gente nepotes, non aliquos è myrotheciis depromptos Ganymedes, non ista
de

de Pario marmore signa, quæ Pygmalionis cu-
 jusdam expectent oscula, non byssinos istos
 candidatos & holosericos Heroas, qui vel heri
 vel hodie ex ovo prodierunt. Nam & illa sibi
 hanc legem posuit, ut paribus nubat: qui au-
 tem Dex nostræ pares esse possunt, animo to-
 to dispares & diversi? Qui placere isti potue-
 runt illi quæ feminarum in morem comtos vi-
 ros viriliter odit; cui magis arrident tetrici isti
 Catones, qui nunquam rident; ad cujus pala-
 tum & ingenium illi demum sunt, qui malunt
 bene sapere, quam bene olere. Non vestis illi
 virum facit: nec è cristis & phaleris eqvum, aut
 è vagina gladium æstimat. Novit illa scilicet
 rarum esse ingenio cum genio contubernium:
 non bene convenire calamo cum calamistro,
 albicantibus istis à Creta populis cum pulvere
 literario: frustra superstitionem corporis ele-
 gantiam jactari, ubi animus in sordibus volu-
 tatur: frustra plumbeo capiti, ut in sublime
 feratur, pennas induci, quæ dextram magis
 decerent. Non vel Adonis aliquis, vel Hy-
 las, vel Endymion, vel Hyacinthus ejus me-
 rebitur basia, vel amplexibus ejus fovebitur.
 Finge vultum immanem, barbarum, torvum,
 qui nubiferum Apenninum exæquet, qualis ru-
 entem in prælia taurum deceat; si intus bona
 mens habitet, omnibus formis, quas vel inge-
 niosa fingit fabula, vel solertissimus pictor pin-
 git, anteponet. Finge aliquem τετραγωνο-
 πῆγος πρὸς, & quadrato capite deformem: non di-

displicebit, si rotundo ore loquatur, si intus animus sit teres atque rotundus, vel etiam *τετραγώνου*, quali Virum Bonum forma venerabantur veteres. Non illa naso adunco suspendit nasatos Chrysippos: non Carneades lucos hircus transversis intuetur: non ridet lacrymosos Heraclitos: non fastidit ructantem cæpas Pythagoram: non Speusippi tussim, non Biantis gibbum, non Æsopi strumam, non Lycei barbas & supercilia dedignatur: cum Pittaco ipsis sepulchris immoritur: cum Diogene dolium volvit, omnibus Bacchi do-
liis præferendum: cum Apolline bubulco Thessalo boves pascit & rusticatur: cum Aristotele inter cruentas pecudum lanienas versari non erubescit: cum Protagora abit in exilium: Democrito occæcato se totam sistit, videndam: Epictetum claudicantem suffulcit: latis Platonis humeris fulcitur: Gymnosophistis se nudam præbet conspiciendam. Datur cœlestis illa Venus, non lætitiæ datori Baccho, non Marti magnanimo, non saltatori alipedi Mercurio; sed claudo alicui & tetrico Vulcano in matrimonium. Præfertur, molli Cytharæ sono candentis ferri stridor, suavissime harmoniæ inconditi malleorum tumultus, hortorum deliciis spelunca Lemnia, mollibus favoniis spirantes follibus auræ, laureis, hederis, myrtis, palmis virentibus atricarbones. Quo illud significatur, non in otiiis aut in somno dormientibus obvenire, aut in-

ter pocula infundi sapientiam, non choreis & tripudiis in orbem actis orbem istum scientiarum absolvi aut metam optatam obtineri: sed inter malleos & incudes versari, ferro & face armari, sudoribus diffluere, obscuris speluncis cum Pythagora concludi, multa lucernarum fuligine pasci, loligine & atramento notari prius debere, qui album SOPHIES calculum expetunt, ut denique tot machinis, tot subsidiis, tot instrumentis veri fiant fortunæ, Vitæ & Rerum publicarum Fabri. Multæ noctes illi vigilandæ, qui Amasiæ hujus noctes & splendidiorum gloriæ diem promerebitur. Chartis prius impallescet, qui erubescere vult nostro murice: à mortuis tacita petat suffragia, ut vivorum acclamationes audiat: domi affixus sedeat, ut per ora virum volitet: lucernas consumat, ut faces gloriæ pascat. Et talibus quidem facilem se præbebit Domina illa nostra SOPHIA, DOMINA, inquam: sed quæ in liberos homines exercet imperium, & cui servire summa libertas est. Clementissimam se illis exhibebit REGINA illa, quæ ipsis Regibus imperat, cui ipsa illa Virtutum Regina & Regum Virtus Justitia famulatur: quæ in Aristotele Alexandro, in Xenophonte Cyro, in Chirone Achilli jura & leges præscripsit: cui Darius in Demodocho, Scipio Africanus in Xenophonte sceptrum & fasces submiserunt: quæ in Ægyptiorum Sacerdotibus, Persarum Magis, Gallorum Druidibus ad imperii gubernationem

macula sedit, & divina omnia humanaque temperavit. Ab iis adorari se patietur DEA nostra, quæ homines reddit divinos per humanitatis studia & mortalibus immortalitatem largitur. Quæ Themis in foro, Bellona in sago, Irene in toga, Ceres in Agris, Thetis in mari, intra sidera Uranie, inter Amicos Charis nominanda. Cujus numine vivunt imperia, deliquium passa & jam pene sepulta quasi postliminio in vitam revocantur. Ejus igne Prometheæ statuae animantur. Ea animis prudentiam, prudentiæ consilia, consiliis moderationem, moderationi constantiam subministrat. Illa ipsa invadit sidera inter divina consortia; terras perambulat bonorum omnium promiconda: in ipsis terræ visceribus gemmas & aurum rimatur: è mari profundo opima Neptuni spolia reportat. Nemo ergo de dote Amasiæ hujus dubitet, quæ omnes Naturæ thesauros possidet sola & opum acquirendarum artes profitetur, cujus solertia æraria implet Principum, arcas & crumenas Mercatorum. Adeste ergo SOPHIES cultores & amatores indefessi, ambite virtute vestra & meritis hujus Deæ & Domine nostræ connubium, me pario: sed ut pro dote afferatis bonam mentem & eruditionem, quo pretio vos quam maxime ornabitis & commendabitis. Ruite in amplexus ejus, quæ magnetica sua virtute vel ferreos ad se animos rapiat. Carpite castissima illa basia merum nectar & ambrosiam spirantia.

Capite pileos libera Capita, quibus liber est animus, sed tamen hic honeste *γυναικὸς ἑταῖρος*. Firmabimus nos annulo pronubo, isto æternitatis symbolo, hoc vestrum cum Dea conjugium, quod illud præ humanis istis habet præcipui, ut non ipsa morte solvatur; sed ex ipso rogo illustres gloriæ faces accendat, inque ipso immortalitatis sinu perenne Mausoleum fortiatur. Valete. Dab. e Museo meo d. 23. Jan. clb lbc LXVII.

75.

Cum omnibus illis, qui in societatem aliquam coierunt, ea sedulo opera danda sit, ut ad legum præscriptarum placita vitam, quantum possunt, instituant; tum iis præcipue, qui literariæ Reipublicæ Cives salutari cupiunt, omni est contentione laborandum, ne eas transilient lineas, quibus non tam legum severitas, quam ipsa bonis artibus & mentibus familiaris honestas eos circumscripsit. Cum enim illic multitudo imperita & rudis ferisque non absimilis passimprehendatur, & in ordinem tamen hominum prudentia & legum pœnarumque necessitate redigi possit; hic autem homines ipsis divinæ & humanæ sapientiæ præceptionibus ad omnem honestatem humanitatemque instruuntur; his certe nemo promptius vitæ sectari veritatem de-

deberet, aut morem bonis gerere moribus, quorum custodes legum habemus sanctiones. At vero ita nunc comparatum est, ut vel in ipsa, vilissimorum hominum fece & colluvione majorem erga leges & magistratus reverentiam & honesti curam passim animadvertas, quam apud bonam partem eorum, qui doctrinae & humanitatis studia prae se ferunt. Quam communis est Academiarum morbus, ita nec lo nos immunes agnoscimus, quibus in n posita sunt exempla eorum, qui ab es legum habenis ferociores sumunt animos & impotentiores. Quorum in numero jure quidem optimo Te O. v. H. K. B. reponere possumus: quamdiu enim apud nos es commoratus, pene nulla turbarum scena hic potuit adornari, quin in ea tuae si non potissimae, saltem aliquae partes fuerint. Eorum omnium justum tibi exactis nostris texere indiculum, & velut in speculo hoc ponere ob oculos possemus, nisi bene multa sint & apud nos pervulgata omnia essent & decantata. Jam tibi cum Commilitonibus tuis; (ut praecipua tamen tibi ingeramus) jam cum Civibus oppidanis rixae, vel tua culpa quaesitae; vel levi occasione susceptae. Aliquoties Duella divinis humanisque legibus prohibita, insuper etiam habito Pro-Rectoris interdicto vel instituisti ipse, vel savor eorum & administer fuisti. Conviciis innocentes proscidisti, tela etiam & fustes intendant. Fores Civis injuriosis tibi vocibus salu-

tati violenta manu impugnasti, ut alia petulantia tua specimina fileamus. Accidit denique nuperrime, cum celebrarentur in loco publico nuptiae, & lapidum jactu fenestrae frangerentur, dum tuus qui forte nuptiis intererat commilito prospiciens, injuriosis vocibus fenestrarum impugnatorem impetit, ut tu in via deprehensus, non sine magna violentiae publicae in fenestras à te intentatae suspicione, injuriam ad animum revocares: cumque is tibi satis se purgaret, ad Duellum tamen non attento gravissimo serenissimi & Clementissimi nostri Principis edicto, non ita pridem promulgato, eum sollicitares. Sufficiebant profecto illa severissimae etiam relegationi: nos tamen eam, tibi mitissimam dictavimus, quam & ipsa lenitas nostra in multam non adeo gravem commutavit, qua non duellum tantum, sed alia, etiam haecenus impunita delicta lueres, ea tamen lege, ut illa non soluta, relegationis sententia revivisceret. Quoniam vero abitum te meditari cognoveramus, Arresti etiam vinculo, ne antequam poenae satisfactum esset, discederes, adstringebaris. Quid vero Tu? Scilicet cum in beneficio deputare lenitatem hanc nostram debuisses, ea turpiter adeo es abusus, ut rupto Arresti vinculo clanculum te poenae subduxeris. Quasi vero leve sit & exiguum ipsam Jurisjurandi religionem fallere, Magistratus sui jussa & decreta ludos jocosque facere: nisi forte, quae solet esset perditorum quorum-

rundam hominum infania, ipsius tuæ malitiæ publicos triumphos in Relegationis elogio ducere gloriosum tibi duxeris, tuoque ingenio dignum. Quare ne maleferiatorum tuique similium irreverenti petulantia pedibus imposterum conculcandam substernamus ipsi auctoritatem publicam, Te O. v. H. K. B. ob tot, enormia facinora, quandoquidem ultro hanc in Te pœnam provocasti, ad ipsum triennium relegamus, & ex hac Academia abesse jubemus. Danda enim nobis opera est, ne pessimo tuo exemplo in transversum abripiantur, qui intra modestiæ & officii limites consistunt, quique pœna sibi irrogata (quod optimum esse publicum existimamus) doceri poterunt sancta ea credere, quæ à Te sunt violata. Vos vero cæteri, qui estis inter nos boni & honesti, tales esse, & amoris humanitatisque officia mereri pergite: si qui mali & similia forte peccaturi, similes vel graviores etiam pœnas expectate. P.P. Kilon. in Consistor. d. 28. Maij. A. 1669.

76.

EX quo præclaram divinæ humanæque sapientiæ officinam divinæ gloriæ, nominis sui immortalitati Patriæque commodis hoc in loco consecravit Reverendissimus Serenissimusque Princeps CHRISTIANUS ALBERTUS, Dominus noster Cle-

mentissimus, in ea gravissimis clarissimisque Doctoribus ornanda multam magnamq; semper curam habuit, à quibus ad humanitatem & vitæ usum formarentur ingenui juvenes, hisque velut Ducibus per diffusum istum scientiarum orbem circumducerentur. Hujus tanti beneficii, Cives Academici, abunde estis memores, dum quotidie aures vestras istæ Doctorum voces circumsonant, præclarisque vos præceptionibus instruunt: neque, si velit, hoc quorundam ex animis delere malitia, potest, cum Principalis illa undique elucens Clementia, novo iis semper exemplo se ingerat, & ob oculos omnium versetur. Ejus nunc iterum specimen exhibuit Serenissimus Princeps, dum Amplissimum Jctorum ordinem, qui per discessum Nobilissimi Consultissimique Viri HENRICI MICHAELIS, Jcti Clarissimi, nunc Amplissimi Reip. Lubecensis Syndici, aliqua nec certe vulgari sui parte, fuit imminutus, redintegrait. Ad ordinariam enim Codicis professionem, quæ hætenus ab ejus abitu cessaverat, Nobilissimum & Amplissimum Virum, MAGNUM WEDDERKOP, Jctum præclarum & in antiquissima Heidelbergensi Academia per ipsum quinquennium Feudorum publicique juris professione magna cum laude functum clementissime vocavit: quam quidem præclare illum ornaturum minime dubitamus. Nec invitus ille datam sibi spartam suscepit; quanquam

ægre tum à Serenissimo Electore Palatino, tum à Collegis suis dimitteretur: nec vel amplissimorum oblatione munerum ab suo se instituto, patriæ ductus amore, passus est dimoveri. Cæterum publicas ille Lectiones suas (quod felix faustumque sit!) crastino die Hora X. Oratione de Moraliū Corporum Unione auspiciato ordietur. Quod quidem argumentum, de quo bono, ut arbitror, omine verba facturus est, dum cum Corpore Academico coalescit Collega noster adeo eximium est, ut vel me non monente ab se impellere vos ad audiendum illum posse videatur. Quanquam & tum humanitatis tum obsequii vestri pars sit, præsentia Collegæ aut Amico benevolentiam; frequentia vero & auscultandi diligentia Doctori fidem observantiamque primo hoc specimine testificari. Quod ut facturos vos esse, non dubito, ita ut facere sedulo velitis omni à vobis studio contendo. P.P. Kiloni. sub Sigillo Academia. a. d. 7. Jul. A. clb lbc LXIX.

77.

NUnquam mihi, Cives Academici, lætior illuxit dies, quam iste, quo extremum vos alloquor, Magistratu meo me abdicaturus. Nam quamvis morose de vobis querendi causas non habeam, plurimorum certe singularia perpetuaque adver-

sus me studia deprehenderim; insuaves tamen incidunt sæpe occupatiunculæ, & liticulæ ab ingenio meo alieniores, quibus cum ex muneris necessitate vacandum, tot præclaras perire horas necesse est, quæ in studiorum vestrorum commoda utilius forte poterant impendi. Cum ergo abeunte jam æstate, abeundum mihi etiam officio sit, successorque perendie, ipso scilicet Academiae nostræ Natali, publice nominandus Admodum Reverendus & Amplissimus Vir, DN. PAULUS SPERLING, SS. Theol. D. ejusdemque Professor Ordinarius optimeque meritus, nec non Facultatis suæ h. t. Decanus, & Præpositus per Holsat. Ducal. officii vos vestri monere duximus, ut frequentes ad ornandam hanc Panegyrim compareatis, leges more recepto recitandas patienter audiat, votaue & preces humillimas pro Academia, ejus Serenissimi Auctoris, novique Prorectoris salute DEO allegetis. Requirit id præterea reverentia, quam optimo Seni, communi Holsatiæ per tot annos Præceptori, Musarumque nostrarum, quæ in sinu ejus enutritæ huc tandem duxere coloniam, cuidam quasi Parenti, jure quodam debetis. Sed & vos cæteri, qui favore vestro literas literatosque prosequimini, Generosissimi, Clarissimique Viri, non committetis, quæ humanitas vestra est, ut aliquis Musarum sacris splendor absentia vestra decedat. Dabimus vicissim operam, ut, gratum & memorem erga omnes & singulos a-

ni-

nimum, observantiamque nostram omni studio affectuque testemur. PP. in Illustri Christian. Albertina, quæ Kiloni Holfatorum est a. d. III. Octobr. Anno à nata salute clc lxc LXIX.

78.

Tantum abest, ut nostra, seu paterna admonitio, seu justa & severa Citatio Tibi, D. J. a. L. B. parendi religionem ac comparendi in nostro Judicio attulerit; ut ne per literas quidem vel pervicaciam negati obsequii excusaveris, vel pœnam, quam ignorare non poteras Te alias non evasurum, deprecandam Tibi duxeris. Tuo nimirum ipsius judicio jam condemnatus, pœnam omnem, quam multis nominibus es promeritus, secura expectatione præcepisti ac præsumfisti. Quod vero judicium tua in te occupavit Conscientia, cujus magna vis est, & magna quidem utramque in partem, quæque contra Te & ætrix est, & testis, & judex, id nisi nos approbantes exsequeremur, nostram non lenitatem solum, sed etiam socordiam, cujus tamen conscii nobis esse nolimus, ipse accusares. Foremus enim publicæ proditores causæ; nisi labantem disciplinam, quantum in nobis est, sustineremus, digna in eos, qui mala præbent, exempla, animadversione. Ne vero indicem delictorum Tibi denuo contexamus, aut fa-

miliares illas technas, omniaque petulantia, irreverentia, ac contumacia tua specimina, quibus auctoritatem Magistratus conculcare, decreta ejusdem ac sententias, interpellando, tricando, negando, excipiendo, toties eludere es ausus, figillatim recenseamus: saltem, novissimum tibi crimen, ut ab uno omnia discantur, ob oculos ponimus; quod sacro Arresti vinculo, quo Te ob tot facinora, & hinc dictatam mulctam aliquam constrictum noras, rupto, violata data fidei religione, fuga poenae te subduxisti, in extremo hoc malitiae tuae complemento quasi triumphum acturus. Quare ob enormia haec facinora Te D. J. à L. B. proscribimus, & ea lege ex Academia hac CHRISTIAN-ALBERTINA relegamus, ut ne intra quinquennium ad Kiloniensis agri fines revertare. Cæteroquin eam Tibi adprecamur mentem, quam in posterum Deo, Patriæ, Parentibus, cognatis, bonis omnibus, tibi denique ipsi probare aliquando possis; ne ulterius provocata Divini Numinis ira, felicitatem, quam his in terris sperare poteras, una cum æterna vita amittas. Quod reliquum est, Vos, CIVES Academici, quos pietatis & modestiæ studium tenet, ac obsequii gloria delectat, optimis cœptis constanter inhæsurus speramus. Si quos vero perverse agendi, lasciviendique libido incensit, huic nuncium ut continuo remittant, nec quidquam cum ea commercii habeant, serio monemus; ne,
si

si Legibus obsequium denegent, suoque magis quam alieno sapere periculo velint, paribus aut majoribus etiam pœnis involvantur. P. P. sub Academia Sigillo a. d. III. Kal. Dec. A. C. clb lbc LXIX.

79.

QUamvis eximiae Virtuti nullo opus sit præconio, suisque ipsa radiis splendeat; in oculos tamen hominum ut incurrat sæpe digito monstranda aliisque in exemplum ponenda est. Illam non ita pridem in Viro Reverendo ac Clarissimo DN. JOHANNE CHRISTOPHORO DÖLE-RO, Pastore apud Estenses in Ducatu Bremen- si, dignissimo suspeximus. Venit ille ad nos modestus honorum petitor, exploratusque a Collegis singulis ea dedit ingenii, diligentiae bonæque mentis specimina, ut expectationem nostram non æquarit tantum, sed & superarit. Nobis certe non obscurum strenue in literis bonisque artibus transactæ ætatis præbuit argumentum. Quare & dudum illi promeritam laurum suspendere, eosque honores, quos ipse quidem modeste ambire voluit, jure quodam sibi debitos efflagitare poterat, conferre conspirantibus omnium suffragiis non dubitavimus. Quos illi proprios auspiciatosque, Ecclesiae vero salutares auguramur. Horum nos testes

his literis profiteamur, omnibusque & singulis egregias Viri hujus meritoque ornatas elogio dotes, justo pretio exhibemus æstimandas. P. P. KilonI, sub Collegii Sigillo Anno 1673.

80.

G Ravissime Auribus nostris accidere, quæ tam diu ordinem vestrum exercuerunt odia, neminem latere potest, qui intellexerit, ne quidem post tot preces & interpositam magistratus auctoritatem, turbarum & insolentia factam esse remissionem. Nos vero etiam existimamus, proxime à ruina sua abesse, qui non contenti honestiore ulciscendi via, suis ipsi manibus, ferro, sclopetis, denique servilibus plagis, quæ tamen in auctores quoque suos redundant, ad vindictam utuntur. Hæc pridem facta esse, nemo non dolere potest; nemo non execrari; quæ tamen toleranda essent, si in unum duntaxat & alterum reciderent: at nunc quum in totas tantum non cohortes, in societates serpsisse contagio videtur, quis ferat, adeo contra jurisjurandi fidem, legum sanctimoniam, Magistratus reverentiam, in propria favire viscera, cædem & sanguinem spirare, quos morum & studiorum æquale certamen conciliare dudum debuerat. Nullum dubium est, quin ordinem ipsi vestrum, contemptissimis ver-

verberibus & fustium experimento apud bonos omnes & Magistratum infametis. Pernicies illa est societatis, quando ad duorum jurgia omnes concitantur, & ex privata communem faciunt causam, inauspicati alii aliorum arbitri. Quod cum indecorum nobis visum sit, vestris omnium commodis & societati infestissimum, providere tandem debuimus, ne proserpens inde contagio, morum & studiorum, semitam plane everteret, nostramque Academiam in ultimum conjiceret discrimen. Sane, quam nuper adeo firmam putabamus, & auspiciis vertentis anni munitissimam societatem, illam ad ineuntis anni ceremonias elapsam esse de manibus, quis non paulo cordatior deploret? Scitis tamen & oppido scitis, nulla hæc nostra culpa fieri, nisi ipsa lenitas culpæ accenseatur, quam adeo intemperie sua damnant nonnulli, ut vel invitos ad severiorem pœnam provocare ultro videantur. Ne itaque paterna semper lenitas & admonitio ludibrio habeantur, in remedium adferimus hanc ipsam indictionem, & tandem aliquando legum nostrarum fidem vero rigore probaturos nos esse, serio ex hac tabella promulgamus, carceres, relegationes, & quidquid est pœnarum, in ultionem advocantes. Quod si quis etiam sprete auctoritate nostra, quæ si unquam, hoc periculoso saltem tempore servari incolumis debet, nundinarum harum securitatem, conventuum pacem, militum, ad-

adventantium stationes, importuno ausu turbaverit, eum, præterquam quod alienis manibus discerpendum se præbeat, & ludibrio vel militari aut servili exponat, etiam legibus nostris severissime damnatum iri, hoc est, quod iterum atque iterum vobis significamus. Ut jam nemo amplius dolere debeat ad sensum, rigoris per ipsa vitia expressi, nullo se exemplo, nullo monito absterritum, in pœnam incidisse, cujus crescentem gravitatem, non leviter aut temere, sed post ultro citroque habitas deliberationes, ex re esse Academiæ nuper admodum judicavimus. Valete. P. P. Kiloni sub Sigillo Academiæ, d. 9. Jan. Ann. clc lxc LXXVI.

81.

QUamquam bonæ menti, pietati optimisque artibus & moribus dicatæ sunt Academiæ: ea tamen nonnullorum in illas venientium improbitas est: ut, ubi semel juris, pudoris officique repagula perfregerunt: nihil illis amplius sanctum religiosumque sit. Unius apud nos mensis civis fuisti, C. B. H. & multorum annorum æquasti flagitia unus, imo superasti. Hæc exigui temporis opera diesque tibi fuerunt, imo & noctes: nam & illas amasti, non Atticas, sed Bœoticas, sed Baccho madidas, & Stentoreis
cla-

clamoribus infames. Vel una illa nuper apud sociennum tuum comeffatio, perditorum hominem morum arguit. Nam Lapitharum convivii simile quid molitus, quicquid comminui perdi que poterat menfarum, fellarum, vitreorum scyphorum fregisti, perque fenestram projecisti: denique, quod inauditum, spurcitiae genus est, etiam oleto convivas tuos, Harpyiarum instar, beare, & red hostimentum hoc relinquere hospiti non es veritus: sed qui museum suum in sterquilinum verti adeo ægre non tulit, ut ipse turpissimo facinori symbolam quoque suam adjecerit. Hinc in plateas itum est eodem furore; quique stabat ibi currus, hinc illinc agitatus, in partes distractus, cujus tu rotas solus in loco, quo homines ad infamia supplicia damnati statui solent, posuisti: quasi dignum illic virtutum tuarum theatrum habiturus. Ubi tu potius Diogenis meministi debebas, qui cum videret adolescentem lapides in talem locum jacentem: *Euge*, inquit, *puer! attinges aliquando hunc scopum*. Qui vitæ honestatem bonosque mores amant, ad conspectum eorum locorum horrent, quæ tu, quasi triumphali curru in solium hoc evectus, conscendere veritus non es. Neque substitit hic furor tuus: valvas fenestrarum vi revulsas in puteum injecisti: canem ante fores domini excubantem gladio confodisti. In iudicium vocatus reverentiam erga Magistratum omnem exuisti: quin ipse relegationis pœnam, qua-

quasi per jocos & ludibrium, poscere à nobis, velut in præmium, es visus, homo perditus & impurissimus. Tu quoque O. W. B. H. frequentior hætenus cauponarum quam collegiorum hospes: cum, ob duellum, & injurias in commilitonem per noctem publice sparsas, ad carceres damnatus esses: à recenti reatu, neq; adhuc per pœnam abolito, ad nova processisti crimina. Nam spurcitiarum in comestationibus mutuis, cum altero socienno tuo institutis, pars magna fuisti: imo exemplo tuo illum invitasti: ut te ab illo in aliorum flagitiorum partem pertrahi passus es. Quoniam ergo spes bonæ frugis de vobis nunc quidem superest nulla, velut purgamenta & quisquiliæ cœtu nostro ejicimus. Ideoque Te C. B. H. ad sex annos: Te O. W. B. itidem H. ad duos annos relegamus: Vosque hodie ante solem occasum hinc exesse jubemus. Providendum nobis est, ne quid malis moribus pessimisque exemplis respublica nostra detrimenti capiat: ne Magistratus legumque conculcetur autoritas. Præterea vester ille flagitiorum cursus hoc obice sufflaminandus erat: ut resipiscere tandem, & ad bonam mentem, à qua dudum exulatis, nostra hac relegatione in viam ordinemque redacti, redire aliquando possitis. P. P. in Consistorio Academico d. III. Novembr. Anno clb lbc LXXX.

Cum omnibus malis remedium sit; nullum esse improbitati ajebat Gregorius Nazianzenus. Id experimento certissimo nunc cognovimus. Nam cum spes nos teneret: fore, ut hac animadversione nostra devii horum hominum à virtute animi in viam reducerentur: tantum absuit, ut pœnitentiam ullo signo testati fuerint: ut potius, ex insanis insaniore redditi, in sententiam dictis acerbioribus debaccharentur: in viis, in circulis profanas ac injurias voces evomerent: & secum quoque comites, ne soli in malam rem irent, abducerent. Mala scilicet mens, malus animus: unde nihil unquam boni expectes. Hac tam nefaria ausa graviore pœna coërcenda erant. Ideoque annos priore sententia definitos ampliamus, & Te C. B. ad ipsum decennium, Te O. W. B. ad quinque annos hinc exesse jubemus: & ut exemplo aliis sit, typis decretum nostrum evulgamus. P. P. d, XIII. Nov. Anno clc lcc LXXX.

82.

Ipse nunc annus est, & perendinus qui imminet dies insignis memoriam victoriæ reducit, quam à Christiani nominis hoste, omnium seculorum lingvis deprædicandam, Imperator noster augustissimus, ejusque Parastatæ, Heroes incomparabiles, divinis auspiciis reportarunt. Nam si quis ab omni ævo memorabilis Austriacæ genti, si quis Germano populo, si quis universo denique,

orbi Christiano illuxit dies, secundus ille septembris est, quo non de regionibus & agris, non de fortunæ spoliis; sed de libertate, de religione, de salute nostra certatum, de hoste immanissimo triumphatum est. Itaque merito tum omnium lingvæ in júbila solvebantur, quorum animi consternatione dejecti, præsens sibi exitium ominabantur: unde divina manu erepti non annuos sed quotidianos ducere triumphos debent. Duillii, qui primus è navali adversus Carthaginienses victoria triumphaverat, tantum fuisse gaudium Florus memorat, ut non contentus unius diei triumpho per vitam omnem, ubi à cœna rediret, præluere funalia, præcinere sibi tibias jussisset, quasi quotidie triumpharet. Quanto vero major in hac tam incredibile, tam admirabili victoria quotidie triumphandi lætandique causa est, qua omnium salus continetur, cujus fructus ad universum orbem Europæum pertingit. Hujus gaudii & fructus ad se quoque pertinere partem Illustris Naturæ Curiosorum per Germaniam Societas arbitrata est. Quæ cum pulcherrimo instituto, ad naturæ secreta altius rimanda operas jungat, & ad has pacis artes cum autoritate tractandas Augustissimi & Invictissimi Imperatoris LEOPOLDI clementissimo præsidio fruatur; facile, quantum etiam hac victoria suis utilitatibus prospectum sit, intellexit. Quæ enim ipsis fortuna, quæ res, quæ spes, non salvo Augustissimo illo suo

Capite. Nam hoc se titulo à Societate sua salutari clementissime permisit, eique primum Illustrissimum, & tam belli quam pacis artibus inclutum Heroem ac Dominum: Dn. Raymundum Comitem Montecuculeum, atque ubi ille fatis concesserat, Reverendissimum, atque Celsissimum Electorem Moguntinum protectores constituit. Ne quid nunc de variis in Societatem collatis beneficiis dicamus: nam ut narratum nobis est, & selectorum cimeliorum icones æri incisas, ad illam misit, & torquibus aureis nonnullos è sociis ornavit, & amplissima præterea privilegia promisit. Quare cum lætandi gratulandique causas non communes, tantum, sed & proprias easque gravissimas haberent, pietatem suam ac devotissima testaturi officia, Nobilissimum & Celeberrimum Virum DN. JOHANNEM DANIELEM MAJOREM, Professore Facult. Medicæ primarium, Serenissimi nostri Principis Archiatrum, nostrum ab ipsis circiter XX. annis, & Academiae incunabulis Collegam conjunctissimum, & suæ Societatis nostrumque insigne decus, delegerunt: qui augustissimo Imperatori Dominoque LEOPOLDO de represfis hostibus, liberata Vindobona atque Germania, publico societatis nomine gratularetur, ac pro salute ejus, pro triumphis perpetuis vota nuncuparet. Quas cum in se partes lubentissime Collega noster honoratissimus suscepit, eo ipse die, cujus tantum beneficium est, ut nul-

la unquam ætas non meminisse debeat, die scilicet Martis proximo, hora X. hujus victoriæ magnitudinem publica oratione celebrabit, suum illud Epiphonema, quo annus signatur, ingeminaturus:

*VIVat LeopoLDVs & feLIX sVIs
IMperet!*

Quando itaque & eruditione Collegæ Clarissimi dignam, & submissæ venerationis affectu plenam orationem expectamus omnes, Vos Hospites omnium ordinum honoratissimi, Vos, Cives Academici, ut orantem audire, cumque ipsius votis vestra quoque pro aris & focis nostris, pro armorum nostrorum felicitate, pro omnium denique salute conjungere velitis, peramanter invitamus serioque adhortamur. P. P. Kiloni d. XXXI. Aug. Anno clb lbc LXXXIV.



PROPRIO NOMINE EDITA NONNULLA.

83.

Nulla in toto Philosophiæ latifundio divinior censeretur debet ars, quam Poëtica, non tam pars ejus, quam ipsa.
Phi-

Philosophia, imo ejus parens & domina, quam illa longe vetustiore esse, præclara oratione demonstrabat Maximus Tyrius. Plato Ποῦν ὁ ὅλον vocabat, quod ambitu suo omnia comprehenderet. Antiquissimi Philosophi duo constituerunt, ad quæ omnia reliqua referrent: Deum & Poëtam. Illius officium est, perpetuo agere; hujus, imitari. Ille ex nihilo producit; & hic ex nihilo Pegafos, Chimæras & Centauros sibi fabricat. Accedit, quod ad hanc artem Deo præceptore Poëtas usos fuisse, omnis existimaverit Antiquitas, discipulos autem nullos reliquisse, quod non nisi divino instinctu doceri potuerint; nec successores, quia pares non invenerint. Non desunt tamen, qui & divinissimæ huic arti suam affricent scabiem. Jam miseri illi pedum ferruminatores illam involant, & Augusto hoc nomine se venditant vix Apollinares lixæ. Eundum in nervum est miseris vocibus, idque obtorto collo, ad metra sua tanquam ad triremes damnantur. Atque tunc magni sibi & vulgo videntur Poëtæ, & Phæbéas illas frondes jactant, qui Orbilii ferulas non effugiunt. Inde fit, ut tantum ineptiarum chartis illinatur quotidie, ut illis portandis vix molaris sufficiat asinus. Tam fertile nunc est seculum, ut & Eunuchi gignant, & mulæ pariant. Sed & Poëtæ ipsi, qui nomen hoc merentur, inter se dissident, & suos patiuntur manes. Alii indomito nimis feruntur spiritu; alii tumorem quendam affectant,

aut in luxuriam abeunt; alii ignava quadam
superstitione se premunt & poësi suæ

— — — deducunt cibum:

Tametsi bona est natura, reddunt curatu-
ra junceam.

Tam scilicet diversa, & pro geniorum varia-
te varia illa est, ut certis illam regulis & limi-
tibus coërcere difficillimum semper visum
fuerit. De Poësi autem ipsa loquor non de
μετρητοία. Est enim hæc minima & ignobilior
ejus pars, quamvis nec pro parte agnoscat A-
ristoteles. Pauci sunt, qui tentarunt hæc;
nulli, qui pertentarunt. Tentabimus jam &
nos, quid ingenii nostri tenuitas hic conferre
possit. Aperio enim Studiis hujus amatori-
bus COLLEGIUM POETICUM THEORE-
TICO. PRACTICUM, in quo non solum in-
timiora quædam artis illius *πλασματικής* arca-
na, & nostras etiam observationes non paucas
pando, sed & ad præsentia statim deduco exem-
pla, & mihi, & Dñn. Collegis, (si ita placue-
rit) elaboranda. Atque ut sciant illi, qui hac
nostra uti opera amant, quid sibi promittere
debeant, summa ejus capita adscribere non
pigebit. Cum Metrica ipsa mihi nihil erit,
negotii, quæ privata exerceri industria melius
poterit. Quare & malletm Auditoribus in his
mediocriter instructis uti, quamvis & plane in
literatura poëtica *ἀμύστοις* utiliter his interesse
liceat, cum hæc nostra tam ligatæ quam solu-
tæ eloquentiæ facem præferre possint. Dua-
bus

bus itaque partibus, absolvam collegium; *Generali & Speciali*. In *Illa*: De Inventione & de Elocutione Poëtica agam. Proponam jam (I) Præcepta & Axiomata generalia in Carmine scribendo observanda. (II) De Inventionibus Carminum. Et illæ sunt Poësi vernaculæ; vel communes. De Vernacula hic: & hæc est FICTIO variæque ejus species. (III) De Verisimilitudine, ejusque variis speciebus. (IV) De tribus Fictionum affectionibus. (V) De Fontibus Fictionum generalibus: Consentaneo & Dissentaneo. (VI) De Specialioribus, ubi varia, de Comparationibus, Exemplis, Descriptionibus &c. (VII) De Fictione figurata: ubi de Idolographiis Virtutum, Vitiorum, Regionum, Fluviorum &c. Singulis praxis adjicietur (VIII) De Fictione instituenda circa classes rerum, animatarum, inanimatarum, necessariarum, indifferentium, & quocunque respectu consideratarum. (IX) De Ratione concipiendi materiam Fictione idonea exprimendam. (X) De Inventionibus communibus, ex Locis Dialecticis. (XI) De Inventionem inartificiali: ubi multa de Poëtarum Imitatione aliaque ad exornandum carmen facientia. Atque hæc de Inventionem. In *Elocutione* disseram (I) De Literis, quid illæ conferant ad artificia Poëtica; (II) De Dictionibus, illarum selectu, ubi & de Patronymicis & eorum usu. (III) De Dictionum adjunctis; Epithetis; illorum fontibus, delectu, usu

fu & abusu. (IV) De Dictione composita: Phrasi sc. quâ illa ab Oratoria differat, illarum poëtica Syntaxi, variatione, amplificatione, & elevatione. (V) De Dictione arguta: ubi de Fontibus acuminum; & Sententiarum in Carmine usu & abusu. (VI) De Dictione Figurata: ubi de Metaphoris, & illarum audacia, & de singulis figuris, quantum illæ ad ornamentum carminis faciant. (VII) De Connexionibus, Digressionibus, Comparationum formulis. (VIII.) De Principiis in Poësi metricis, & de artificiis per illa in Carmine obtinendis. (IX) De Stylo poëtico & Characterè carminis Epici, Elegiaci, Lyrici. Hæc in Parte Generali. In *Speciali* ad praxin ipsam descendemus. Incipiemus autem (1) ab *Epigrammatibus*, quorum fontes & exempla affatim dabimus. (2) *Emblematibus*, hic modum monstrabimus, quo res quævis ad significationem figuratam possit traduci, Pro exemplo ibi tum erit Ciconia. (3) *Hieroglyphicus*, *Ænigmatibus* & aliis, item Anagrammatibus. Deinde recta pergemus ad Laudes rerum & factorum, & omnia, quæ huc pertinent. Propemptica, Gratulatoria, Epithalamia, Epicedia, & alia, quorum delineationes generales dabimus, & ad circumstantias applicabimus. Demum annectemus aliquot consilia pro adjuvanda re poëtica. Atque hac forte ratione pertractabo Collegium. Vos vero, Nobilissimi Dn. Studiosi, cum intelligatis, non sine maximo me-

meo labore hæc à me suscipi, dabitis & favore
& frequentia vestra operam, ut me operæ
meæ non pœniteat; sic & ego vicissim operam
dabo, ut nec vos temporis & impensæ pœniteat.
Rostochii 15. Decemb. die, Anno 1661.

84.

AUro notandus est, qui hodie nobis fe-
liciter illucet Chryfogoni, id est, aurei
partus dies. Quo olim nomine salu-
tatum Augustum legimus, illum au-
reæ pacis restauratorem optimum, illum Ro-
manæ gloriæ Statorem maximum. Et sane, si
aurea quædam in ferreo hoc seculo liceat ca-
ptare vel omina vel nomina, insigne felicitatis
argumentum quis crediderit, quod aureo hoc
die in auras prodierit aureus iste ferrei Septen-
trionis ocellus, Magnus Maximi Parentis Fili-
us, orbis delictum, Serenissimum Sveciæ Sidus,
& si vota fatis accesserint, aurei seculi restitu-
tor CAROLUS XI. Aureorum sane verborum
nuncius iste erat, cum Divo ejus Parenti inter
armorum strepitus, tubarum clangores, hosti-
um clades, militares laurus versanti, de nato
sibi filio fama adferretur exoptatissima. Effun-
debatur tum in plausus Septentrio, qui Philip-
po foris pugnanti domi Alexandrum aliquem
genitum credebat, qui jam tum in infante Re-
gia ista CAROLI GUSTAVI auspicia venera-
ba-

batur, qui solo illo, quasi cœlis lapsō & divinitus concessō pignore acerbissimam postea Maximi Parentis jacturam solabatur. Nec dignius fane & illustrius tum dari argumentum poterat, quod occuparet doctissimorum Virorum industriam, calamos fatigaret, & omnium vel balbutientium ora solveret. Nec aberant hic χρυσόστομοι, aurei scilicet oris Oratores χρυσόφωνοι nostro deprædicando. Crescunt jam cum ipsa ejus ætate gaudia Civium, non solum, sed & exterorum, qui quoties felicissimam ejus diei memoriam pia mente, recolunt, toties spes vota sua supergressas, & nova Virtutum Regiarum incrementa sentiunt, quos non tam ab annis (ea enim in non adulto jam adultæ,) non tam ab institutione, quam à sanguine & ab utero traxisse visus est. Omnes certe pectus amorī, animum lætitiæ, linguas præconiis, manus plausui consecrant. Salutant istum novum monstris domandis natum Herculem, vocant Majorum compendium, Posterorum exemplar, publicorum votorum metam. Exosculantur in isto vultu, in istis ocellis Charites, venerantur hic Veneres illas, sed tamen ferreo Marti junctas. Neque enim semper inter ferreos homines aureo licet esse Principi: est, ubi ferrum ipsa Virtus & seculi malitia postulat, ut pretiosior tum nominari Princeps debeat, si ferreus, quam si aureus. Ferrea illi vel in ipsa hac ætate placet justitia, quæ aureos imbres in sinum Astrææ labi non

patitur. Cenomannorum ritus mihi hic in-
mentem: qui quoties Regiæ dignitatis simula-
chrum exprimere vellent, oculo duplex sce-
ptrum: alterum aureum; ferreum alterum,
supponebant, quorum illud in bonos, hoc in
malos vibrandum. Nec valde abludit LUDO-
VICI IX. Galliarum Regis Symbolum, ut ut,
non adeo ingeniosum, qui medium inter duas
columnas aureas se pingi voluit, varia armo-
rum suppellectile ad pedes adjecta, cum inscri-
ptione: *Hercule major erit*: ut significaret, non
auream semper, sed & ferro armatam debere
esse justitiam. Ita ergo χρυσέγονος iste Prin-
ceps aureus est, ut possit debeatque esse ferreus,
qui tamen & ferreos & plumbeos hominum a-
nimos in aureos mutare poterit μεταμορφώσει
plus quam Chimica. Tantæ sunt Virtutes ex
minoris etiam ætatis maxime, ut in stuporem
conjiciant omnes. Mihi certe dum istarum
laudibus immoror, animus, nescio quo Nu-
minis afflatu, tactus in istos numeros erumpit:

*Magna Patris Magni soboles, de Sidere
Sidus,*

*CAROLE de CAROLO deque Leone
Leo.*

*Magne Palatino Leo Svecice junctæ Leoni,
Quiq; unus gemini corda Leonis habes.
Quantus ab ungve solet nosci leo, quantus
ab armis;*

Tantus ab ungviculis nosceris, ecce! Leo.

Non tamen sola domi suæ & in sinu gaudet, Svecia, aut de tanto sibi Rege gratulatur: nam & in partem gaudiorum jure suo admittetur, Cimbria, quæ se Matrem ejus gloriatur. Accedent etiam Musæ Nostræ, nunc quoque Magno isti Nomini affines, quibus ea in festivitate silendum neutiquam fuit. Est inter earum filios Præstantissimus & præclaræ spei juvenis CHRISTIAN JOHANNES CHARISIUS, Pomeranus, qui egregio conatu, prima, in novo hoc Musarum sacrario, primus exhibebit Regi suo Clementissimo Pietatis & obsequii devotissimi specimina, in Panegyrica Oratione, super Natali ejus Augustissimo docte conscripta, quam cum ipso hoc die, quo publica habetur disputatio, non possit, die XXVI. Novembris qui erit proximus Lunæ dies, hora ante meridiem IX. recitare constituit. Huic ergo festivitati, ut ea, quam nobis promittimus, benevolentia, interesse velint *Auditores omnium Ordinum Honoratissimi*, est, quod majorem in modum, ea qua par est observantia, studiose contendimus. Dabam è Museo meo. d. XXIV. Novembris, ipso isto Natali Regio. An. LXVI.

85.

EA est Principum super communem hominum sortem evektorum conditio, ut in illustri loco positi omnium oculos in se convertant, omnium animos ad se rapiant; non secus, ac Sol ipse, cum salutares in orbem hunc effundit radios, omnium animos erigit, omnium vultus serenat. Nec reperientur nunc, credo, ingratisimi homines, qui soli dicant convitia, quod populos quosdam fecisse testatur Plinius; vel iis non multum dissimiles Majestatis & Potestatis in terris Divinæ contemptores, qui in sacra ista capita mordaces & scelestas lingvas stringant, in quorum cultum omnium saniorum gentium consensus conjuravit. Quæ enim esset vel impietas vel malitia, illa quæ sunt optima & pulcherrima, quorum numero etiam Principes veniunt, quæ sua natura religiosam aliquam venerationem mentibus injiciunt, & vel ab invitis extorquent, non amare, non laudibus extollere, idque voce ipsa confiteri, quod intus mussitat veri consciamens, & honestas ipsa dictitat. Non est, quod magnopere hic moremur, quæ vulgo de Principibus spargi solent dicteria, inter quæ non postremum est illud Mimici cujusdam scurræ: *Bonos Principes vel annulo posse inscribi*; nec, quæ in adversum solent objici, infamia inter Romanos Cæsares nomina, Neronēs, Caligulas, Claudios, improborum decora, proborum dedecora, illustria marmoris pro-

probra, monstra, quæ Roma fecundiore pro-
ventu, quam ipsorum monstrorum genetrix A-
frica, protulit, quos nihil aliud peccasse dicas,
quam quod nati fuerint, nihil rectius egisse,
quam quod obierint. Fuerint sane inter illos,
qui, ut pudorem exuerent, purpuram indue-
rint, non alio quam civium sanguine tinctam;
qui cives presserint, ut aurum exprimerent, im-
perium mutant in emporium, Patriæ non
propugnatores sed expugnatores; qui in toro
vigilarint, ut sterterent in throno, muliebrium
libidinum victimæ, fœminis viri & viris fœmi-
næ: nunquam tamen defuerunt illustria omni-
um seculorum exempla, & vel nunc in ferreo
nostro aurea supersunt nomina, nec in poste-
rum de humano genere desperabimus. Non
est quod de alienis sumus solliciti: nam vel sola
domestica testimonia hic rem omnem confici-
ent. In eo scilicet ab omni ævo felicissima fuit
Cimbria nostra, quod inter tot alia bona, quæ
largissima manu divina illi concessit benigni-
tas, illos semper habuerit Principes, qui boni-
tate & felicitate summa omne mortalitatis fasti-
gium supergressi, virtutumque magnitudine
& nominis gloria orbem universum ad invidi-
am generis humani impleverint, ut vere hic,
quod ille de bonis Principibus, invertere lice-
at: *Malos Principes Cimbro posse vel annulo inscri-*
bi. Adeo hic sincera, Regia, & quæ in pro-
verbium abiit, Cimbrica bonitas & virtus sem-
per sceptrum gessit, quæ per tot Majores ducta
nunc

nunc in CHRISTIANO ALBERTO, isto orbis delicio, publicæ salutis Vindice, Musarum, Statore Optumo Maxumo, Pio, Augusto, Felici, Incluto altissimas radices egit, eaque incrementa sumsit, ut addi ad perfectionem illam nihil posse videatur. Celebrantur jam ista omnia gentium lingvis, publicisque seculi suffragiis æternitati consecrantur, ut à nobis nihil addi debeat, quam, quod ad sublimes istas virtutes colendas restat, religiosum silentium, quo solo nunc in ista infantia pie diserti esse possemus, nisi ingratum illud multis videri possit, & injuriosum. Et videbatur tale Generoso Juveni, magno aliquando illustris suæ familiæ ornameto, GERHARDO à BINDER DONS / qui quanquam ad commendationem tanti Principis, meritaque ejus ergo mortalium genus immortalia deprædicanda parum se conferre posse crederet, id tamen pietati dandum arbitrabatur, ne inter tot acclamationes & vos omnium solus siluisse, aut publicam istam felicitatem dissimulasse videretur. Non possum non summis efferre laudibus egregium illud Generosi Juvenis consilium & illustrem conatum, quod primus ille è Civibus suis & ex erudita Cimbrorum Nobilitate compareat, prima, in novo hoc Musarum sacrario, Principi nostro Serenisimo exsoluturus vota, & devotissimi obsequii specimina oblaturus. Quod ejus institutum, sive pietati erga Principem, sive præclaræ ambitioni adscribamus, me-

merebitur certe favorem omnium, & vestrum quoque, *Lectores omnium Ordinum honoratissimi*, in audienda illa Oratione Panegyrica, quam in laudes Serenissimi Principis elegantissime, summoque studio abs se conscriptam, proximo Jovis die, VI. Decembris, hora ante meridiem nona, recitabit. De quo eo minus dubitabimus, quo magis humillimus vester erga Principem affectus efflagitare videtur, ut vota nostra pro ejus salute fundenda, communibus omnium vestrum votis & precibus adjuvetis. Valete. Dabam è Museo meo. d. II. Decembr. A. cb lbc LXVI.

86.

Vetus illa est & ab omni ævo recepta consuetudo, quod Viros nos magna in Rempublicam merita nobilitarunt, vivos, etiam post fata animis nostris colore lingvisque soleamus eorum laudes de-prædicare. Hinc & inter duodecim tabularum antiquissima instituta lex fuit de honoratorum virorum laudibus in Concione memorandis scripta; quo nomine salutabantur, qui Rempublicam feliciter gesserant consiliis, victoriis illustres, aut quocunque demum modo Patriam sibi meritis obstrinxerant. Eorum in numero referri optimo quidem jure & Viri literati Piique debent, à quibus major fortassis re-

redundat in Patriam utilitas quam maleferi-
torum quorundam hominum superba sibi i-
gnorantia persvadet. Quare laudabili non
solum consuetudine hac inductus, sed sua e-
tiam pietate incitatus eximius liberalium arti-
um Magister NICOLAUS Nothelffer / Norim-
bergenfis, Viri dum vivere celeberrimi JOH.
MICHAELIS DILHERRI, Theologi, Philolo-
gi, Polyhistoris Clarissimi vitam, virtutes,
mores, doctrinam, Oratione docte ab se con-
scripta, proximo Saturni die hora X. matutina,
si dederit DEUS, in Auditori Majori prosequen-
tur. Vastissimum fuit Viri ingenium, quod
per omnia Theologiæ, Philosophiæ, Philolo-
giæ spatia diffusum felicissime variis in omni
divinæ humanæque sapientiæ parte functio-
nibus admovebatur. Verum frustra à nobis
hæc dicentur, cum luculentius ipsa parentan-
tis oratione singula recenseantur, ad quam au-
diendam Amplissimos Collegas, Cives Aca-
demicos omnesque literarum fautores huma-
nissimè invito. Cum enim illum Pietas, qua
in Patronum, imo Parentem suum flagrat,
ad dicendum impellat; vos ad auscultandum
memorabile Viri exemplum, quo compendio-
sius, quam præceptis docemur, invitet. Quo
& gratam vobis celeberrimi Viri memoriam
esse, nec parentaturi vobis pietatem impro-
bari ostendetis. Valete. Dab. è Museo d. 18.
August. Anno 1669.

Cum utriusque Eloquentiæ tam liberæ quam pedibus victæ studia fidei meæ à Serenissimo Clementissimoque Principe commissa fuerint; eam mihi ipse legem dixi, ne à concredito mihi munere oculos dejicerem, aut præter negotium in alienis rebus quam meis curiosior quicquam agerem, provinciam vero mihi traditam pro virili ornarem. Etenim præceptiones non solum vobis dedi lectissimas, viamque regiam ad masculam ac succiplenam veterum Eloquentiam, monstravi, sed & si qua à doctissimis viris prodita, vel nostra animadversione perspecta fuerunt, vulgo non cognita, vel, quæ invidia nonnullorum est, celata, proferenda ac patefacienda quam diligentissime curavi. At vero cum sine exercitio jaceant propemodum, frigeantque omnia præcepta: quanquam eo nunquam vel muneri meo vel vobis petentibus defuerim; stimulos tamen & calcar monitione hac publica addere institui, si qui sint, qui rogati sua sequi commoda malint exercitationibus oratoriis diligentius incubituri. Pessimam, ne quid dissimulem, in nonnullorum animis hæret opinio, quasi obturbent hæc studia aliis, quæ πρὸς ἀλλοτρίον addiscuntur; cum nulla magis juvent & exornent. Quales, tantum abest, ut stylum sæpe, (quod Venusini Vatis præceptum est) ut ne manum quidem illorum causa vertere dignentur. Sed eos quidem
su-

fuis relinquamus moribus ac ingenio. Πολ-
 λοὶ ἐν Ἀρκαδίᾳ βαλανηφάγοι. Vos vero, Juve-
 nes optimi, qui quid ex usu vestro sit rectius
 nostis, si Ducem Doctoremque vestrum non
 spernitis, consilium institutumque, in quo
 nunc sum, salubre vobis ac frugiferum depre-
 hendetis. Scholas scilicet oratorias, binis per
 hebdomadam horis, quas ipsi designabitis, in
 ædibus meis institutam, lectissima ad oran-
 dum argumenta, tum ex historiis, tum è civili
 moralique sapientia deprompturus. Quæ a
 vobis elaborata, censura nostra perpoluta, au-
 diri publice ac legi aliquando typis descripta,
 mereantur. Quæ in re cum præter emolumen-
 tum vestrum, honestæ etiam gloriæ cupiditas
 excire ac peragitare animos vestros debeat, i-
 psi, opinor, quid statuendum vobis sit, nobis
 etiam non monentibus dispicietis. Proximo
 Mercurii die IIa pomeridiana de hora commo-
 da deligenda deliberabimus. Valete. Scribeb.
 a. d. xxviii. Aprilis Ann. clb lbc LXXII.

88.

CUm omnes eos, qui commodis nostris
 consulunt, charos habere, hos laudi-
 bus ferre, mactare honoribus sole-
 mus; tum eos præcipue, qui custodes
 gubernatoresque populorum quasi divinitus
 dati Res communem utilitatem continentes, o-

omniaque, sine quibus nec salva esse salus publica potest, regunt, movent, moderantur. Hos five ipsi Reges fuerint, five eorum administri, Viri sapientissimi, vivos quidem amore summo atque observantia; mortuos etiam divinis honoribus non paucæ olim gentes coluerunt, ne magni adeo longique boni memoriam, ad sempiternas seculorum ætates propagandam, unius ætate hominis haberent circumscriptam. Ac ipsi adeo Reges, qui se Virorum prudentiæ morum consiliis permittentes gloriosi laboris eos socios confortesque voluerunt, tantum abest, ut gloriam hanc illis inviderent, ut omni potius studio ac conatu ad amplissimum fortunæ fastigium productos, velut vivam prudentiæ imaginem, pene in solio suo collocarent. Nec immerito quidem: cum iis quasi genio quodam, aut altera quadam mente inspirati, adeoque voluntate, consiliis, natura ad civilem communitatem conjuncti in unam coaluisse personam viderentur. Si Platonis Scholam interrogemus, Regem illa nobis formabit, duplici mente præditum: quo illa, poëtismo quidem ad significandam muneris istius majestatem; nos ad rei veritatem convenientius uti possimus. Hanc ut duplicatam, etiam ipsi agnoscamus, nihil vetat; alteram, scilicet ejus, qui summæ rerum præest; alteram ejus, qui ministrator ad eadem sedet gubernacula, sed eas inter se necessitate quadam junctas, ut uno per has ambo contineantur.

com-

complexu, nec hic ab illo divelli possit, quem consiliorum autorem, sollicitudinum socium, omni in cogitatione habuit conjunctum. Quam auspdatum sit fueritque semper regiae potentiae sapientiaeque, sive in uno, sive in duobus consilii voluntatisque communione, conjunctis contubernium, ejus imaginem nobis exhibent fabulae; fidem faciunt Historiae. Hydram aggressurus Hercules Iolae ministerio; Ulyssis consilio Diomedes; Nestoris prudentia Agamemnon, Rex ille Regum Homero vocatus, utitur: qui nil adeo à Diis optabat, non imperii potentiaeque incrementum, non excidium Asiae; quam ut decem sibi daret Nestores: quo omnem votorum suorum summam complexus sibi videbatur. Quot supersunt, ne longius arcessamus, illustria hujus rei in Historia Romana exempla? Annon eos quos in societatem consiliorum adsciverant Imperatores Romani, amicos suos, familiares, Parentes, Reipublicae custodes ac conservatores, periculorum, bellorum, victoriarum socios, non latenter, aut furtive, ac in angulo, non ad aurem; sed in luce & in oculis civium, in conspectu urbis amplissimique Senatus, & quasi in aliquo orbis terrarum theatro, cognomentis profecto honestissimis appellarunt? Annon statuas illis juxta suas erigi curarunt? Annon in nummis monumentisque publicis eorum imagines suis junctas circumtulerunt? Sed quid vetera ac peregrina sectamur, rerum nostra-

rum incuriosi? cum domi nobis nascantur, exempla, illustriora profecto, quam ut ab illis lucem mutuentur: nobiliora, quam ut à quocumque ignorentur: celebratiora, quam ut nostra vel eloquentissimorum hominum præconiis requirant. Quis est, qui Illustris Excellentissimique Domini JOHANNIS ADOLPHI KIELMANNI A KIELMANSECK, nomen, non Cimbris tantum, sed exteris etiam cognitissimum ignorat? Quis non redivivum in isto vultu Nestorem aut Mæcenatem sibi intueri videtur? Quis non sub ista fronte quantæcunque etiam fortunæ capacem habitare animum fateatur? Quis inter nos, quis inter vicinas ac remotiores etiam gentes ignorat, quot quantasque res ille gesserit, omne in ævum victuras, omnium ingenia fatigaturas, ex qua à Divo FRIDERICO, ac SERENISSIMO DOMINO Nostro, CHRISTIANO ALBERTO, velut, quædam eorum dextella, in consiliorum ac rectionis societatem assumptus est. Quibus id præcipue effecit, ne tempora hæc prioribus inviderent, feris etiam nepotibus eorum simulachrum absolutissimum transmissura. Quis in multis inveniat temere, quæ in Uno Viro & Virtutis & industriæ & fortunæ reperiuntur, ornamenta? Si Eloquentiam quæras, illam animorum expugnatricem, illam consiliorum reatricem; Herculem non Gallicum, ut est in fabulis, sed Cimbricum, qui velut catenulis quibusdam aures mentesque trahat & impelat:

lat: si agendi vim ac efficacitatem singularem plane & divinam; Briareum aliquem centenas operi manus expedientem: si alacritatem ac vigilantiam; Argum aliquem centenis oculis tum Domini tum nostræ salutis prospicientem admiraberis. Illam vero excelsi animi prudentiam, tantæ molis, & majoris quoque capacem, quis animo se assequi, quis verbis exprimere, posse confidat? Sive enim exploret fata, quo præitura sint; sive eorum benignitatem sua sollicitudine adjuvet; nihil est tam impeditum, quod eorum favore non conficiat; nihil tam arduum, quo non pertingat; nihil tam firmum, quod non perrumpat: nihil tam profundum, quod non emetiatur. Quæ omnia ut sunt numero infinita, magnitudine immensa, ac exigua aliqua efferri oratione nequeunt, animo tamen comprehensa habemus ac memoramus, cum tanti Herois laudes luculenta doctissimaque oratione celebraturus est SIMON HENRICUS MUSÆUS, præstantissimus eximiusque Juvenis, &, quod ad laudem illi satis est, paternarum Virtutum æmulus. Quem enim omnes veneramus, in quem oculos patria universa convertit, quem quasi cælo lapsum palladium intuemur, cujus beneficiorum ad omnes fructus pertingunt: ejus uti omnibus ob animos versari debet memoria: ita peccare se Noster existimavit, nisi & ipse aliquo documento pietatem suam adversus illum publice profiteretur. Qua in re cum summopere lau-

dandus sit, non possumus, quin & Vobis, *Le-ctores Omnium ordinum honoratissimi*, institutum ejus commendatum eamus, quod favorem certe vestrum & plausum meretur. Quare ut ad audiendam Orationem, quæ die Mercurii hora ante meridiem nona recitabitur, frequentes adesse velitis, non adeo nos rogamus (quamquam & hoc facimus) quam ipsa KIELMANNIANI nominis gloria, immortalia illa in Cimbriam universam, Academiam, Civitatem, merita efflagitare videntur. Valete PP. a. d. Octobr. XII. A. clb lbc LXXIII.

89.

Quam publice utilia sint, ac in omnes partes valeant illa orandi exercitia, non ignorant, nisi qui hebetes plane sunt & impoliti, aut imprudentes rerum æstimatores. Etenim cum tantum animo comprehendamus, quantum verbis apte efferre possumus: quis nisi mentis inops omnem verborum curam abjiciendam esse existimet? quis rerum intelligentiam consequi se posse confidat, nisi eloquentiæ præsidio armatus ad studia literarum venerit? Cui omnia illa bono addiscentur, si vel accommodato ad docendum sermone uti quis nescierit, vel ad Reip. negotia tractanda admissus, elinguis, infans accesserit? Quam ob causam apud sapien-
tis-

tissimas gentes, Græcos & Romanos, ludi instituti fuerunt, in quibus fictis simulatisq; argumentis animi atque ora juvenum formabantur: Viri etiam, imo Consules & Senatores, quotidiana hujus artis tractatione, ut se perfecterent, allaborarunt. Ejus studii quam late, pateant commoda, vel ex eo, nisi stupidi omnino sumus, deprehendere possumus, quod sub eloquentiæ regno omnes disciplinæ & literæ cum ipsis Rebus publicis efflorescere & quasi reviviscere cœperunt. Cujus rei non tantum manifesta, tum apud Græcos, tum apud Romanos sunt exempla: sed & superiorum temporum barbaries & calamitas nos docuit, quam infeliciter majoribus nostris elegantioris hujus doctrinæ contemptus cesserit. Olim cum vigerent illæ artes, quanto splendore simul & pietate fulgebant in Ecclesia apud Græcos Basilii, Gregorii, Nazianzenus ille & Nyssenus, Chrysostomi, Cyrilli: E Latinis Tertulliani, Cypriani, Hieronymi, ut sexcentos alios prætereamus: qua autoritate regnabant in tribunatibus Papiniani, Modestini, veneranda illa nomina quorum umbram vix præstant, qui hodie cum bonarum artium contemptu triumphant leguleji. Illos sanctissimos utique & eloquentissimos in Ecclesia Viros excepit postea genus hominum agreste, fraudulentum, barbarum, superstitiosum, inepti è claustris Postillatores: è quibus qui cæteris ar-

gutiores videri volebant, ipsis Theologiæ & Philosophiæ sacrariis se ingesserunt,

— — — — — *Ult Austri.*

Floribus & liquidis immissi fontibus Apri.

Quorum temporum inscitia ne nunc quidem satis deplorari potest. Hos è Jctorum familia insecuti sunt rudes illi & inepte seduli glossatores, & qui illis pejores sunt Rabulæ, solis litigandi artibus omnem Jurisprudentiæ fundum circumscribentes. Sed bono nostro & universæ sapientiæ fato accidit, ut excitatis elegantioribus, per insignes Viros, studiis, revivisceret sanior Theologia & Philosophia: alia facie, appareret Jurisprudentia, à Budæis, Alciatis, Hotomannis, Cujaciis, Augustinis luci suæ restituta: ac omnes adeo artes cum ipso seculo renascerentur. Quam felicitatem ne ipsi & nobis posteris eripiamus, opera nobis danda est, ut elegantiores tueamur artes, quarum princeps eloquentia est. Eam omni studio & industria graviter excolamus, cujus fructus in templa, in tribunalia, in Aulas, in Scholas, in populos, tam pacis quam belli tempore longè lateque diffunduntur. Non ignarus utilitatum istarum Nobilissimus Eximiusque Juvenis BALTHASAR SELO/ Dithmarsus, cum ad rerum civilium doctrinam applicare, animum decreverat, ut mature iis artibus, sine quibus illa sustineri non potest, advesceret laudabili profecto consilio Eloquentiam, pro illo quo in literas rapitur impetu, præ cæteris

ris omni studio tractandam suscepit. Cujus ille insigne specimen daturus, instanti hujus mensis die VI. hora IX. matutina de NECES-SARIIS IN AULA LITERIS, doctam elaboratamque orationem remoto libro commentario habiturus est. Ad quam audiendam, ut non sunt quotidiana apud nos hujus industriæ exempla: ita frequentiore vestram, *Lectores Omnium ordinum honoratissimi*, præsentiam nobis pollicemur: Omnes, ea qua par est observantia & affectu rogamus, ut benevolam dicenti dare operam, & ad summa tendenti stimulos favore suo addere ne dedignentur. P. P. a. d. Febr. II. Anni clc lcc LXXIX.

90.

SI qua humanarum rerum est veneratio, nulla, certe, si à Deo discesseris, major est, quam quæ Viris Principibus debetur; quorum incolumitati civium militans præsidia, autoritati præsto sunt obsequia, salutis omnium conspirant vota. Prudenti itaque consilio, ut pleraque, ab Ægyptiis, illa Regii muneris instituta fuit disciplina, qua ad majestatem virtuti jungendam Principibus; civibus ad amoris & venerationis invitamenta præverunt. Nam inter ἑγχα καὶ ἡμέρας Principum, quas illi, teste Diodoro, velut in tabula consignatas habebant, præcipua hæc fuerunt:

Deducebatur singulis diebus in ædem sacram Rex, insignibus Regni splendidoque habitu decoratus. Peracto rite cultu divino solennem recitabat pro salute Regis precum formulam Sacerdos. Inde virtutes ejus verbis, quod potuit, ornabat, non dissimulatis etiam, si quæ fuerant erratis: sed rejecta in pravos consiliorum architectos culpa. Prælegebantur hinc de præstantissimorum Principum factis & consiliis sacri commentarii. Quo velut quotidiano virtutum ludo in stituti Reges, officiis suorum civium vota vincere, & morum exhaurire exempla allaborarunt. At Cives Reges suos non secus ac indigetes, & velut summo Numine datos rerum arbitros, adorabant, cumque uberrima ab ipsis ad homines derivarentur beneficia, animos eorum quasi ex mente divina decerptos colligebant. Qua pulcherrima autoritatis & obsequiorum, è virtute mutua orientium, conspiratione, felicissima ipsis fuit, ac reliquis gentibus in exemplum posita Respublic. Non itaque vel vanæ assentationi, vel ambitioni illa Panegyricorum vetus imputanda consuetudo est: sed subfuit laudabilis huic consilio astutia: ut objecta virtutum specie stimuli quidam animis impingerentur, quibus ad amorem earum pertracti, nunquam à regia illa via deflecterent. Ne, quid de ipsa pietate dicam, qua commendabant se regibus cives & officium in beneficii materiam convertentes, suos è Regia gloria fru-

fructus persentiscebant. Fuit, ut vidimus, Ægyptiis quotidiana Principum celebratio, ac ad eorum exemplum à nobis quoque instituenta. Sed vel annua saltem sit, cum quotidiana esse non possit: quanquam hæc intra animos nostros, Principum optimo CHRISTIANO ALBERTO, non ephemera, non horaria pietas, sed ultra secula duratura succrescit. Redit crastina luce natalis Serenissimo Domino nostro dies. Quæ cum prima sit, unde ortum reliquæ trahunt, honorem merebitur palmarium. Perculit ejus diei & ipsius Serenissimi Principis religio præclarum præstantissimumq; juvenem NICOLAUM NICOLAI Hufumensem Holsatum, eoque adduxit, ut quam meditatus est in Reverendissimi Serenissimi que Principis Domini nostri Clementissimi, laudes, Orationem doctam splendidoque auditorio dignam, cras, III. sc. Februarii die, hora X. matutina publice recitandam susciperet. Meretur hominis virtus minimeque vulgaris in humanitatis studiis, multis jam ab annis, spectata eruditio, vestro singulari favore atque officio ornari. Quare vos omnes, *omnium Ordinum hospites honoratissimi*, ea qua par est observantia obnixè rogatos volumus, ut huic interesse festivitati, eamque vestra illustriorem reddere præsentia velitis. Imo vero tantum abest, ut precaria hæc velitis nobis exhibere officia, ut potius eo cupidius nostra impleturi sitis vota, quo vehementius communia in Do-

mi-

minum Clementissimum studia vos impellent, ut preces nostras pro ejus salute fundendas, communibus omnium vestrum votis & precibus adjuvetis. Valete. Dabam è Museo meo d. II. Febr. Ao. clb lbc LXXXII.

91.

Est ille seculi nostri morbus, ut qui Philosophiæ sacris imbui cupiunt, non ab ipsis fontibus illam arcessant, sed jejunam quandam & volaticam discendi rationem, solida veterum doctrina explosa, consectentur. Neque defunt ad prærupta illa & interrupta studia cæci cæcorum duces, qui ut ipsi velut canes è Nilo, ex hoc sapientiæ Oceano, raptim aliqua hauserunt, & primoribus labris degustarunt; ita alios per eadem littora, velut Abaridis sagitta instructi protrudunt. Quare qui è ludis istis compendiariis prodit discipulus, si philosophiæ orbem universum, cum illis alatis Mercuriis suis semel pervolitarit, totque annorum labores improbos in menses aliquot contraxerit: *momento temporis exit Marcus Dama*, ad infulas & cathedras ablegandus. Cum Patrum nostrorum memoria reviviscerent artes & bonæ literæ, unius disciplinæ campi patientiores in certos quasi fundos tribuebantur, & stipendiis amplissimis conducebantur, qui partes unius disciplinæ publice docerent, ut

eo

eo solidiora essent discentium studia, & omni ex parte firmarentur. Sed nunc sæpe fit, ut unus magistri, nec alias otiosi, leve & tralatitium negotium credatur tota Philosophia. Nam tumultuaria aliqua τὸ ὅρων explanatione res omnis absolvitur, & nonnunquam hic contingit, quod Græcorum adagione dicitur: ὄνω τις μὴ θοὺν ἔλεγε; ὁδὲ τὰ ὅττα ἐκίνει. Hinc illam studiorum maciem ad publica negotia adferre videmus homines semper juncceos, nunquam succiplenos. Quotus nunc est ἐ Philosophantium ordine, qui veterum philosophiam vel à limine salutavit? Prout enim illis aptum est & commodum, novo alicui magistro & uni se mancipant, nunquam in hoc Philosophiæ orbe vel κοσμοπολίται, vel cives, sed vel advenæ, vel inquilini. Erat vero altius ex omni seculorum memoria repetendum, quibus progresibus artes erui cæperint, quam per mundi ætates à prima illa origine in varietatem opinionum discriptæ fuerint Barbarorum & Græcorum Scholæ: ne ad novas opiniones, quæ è veterum cineribus resuscitatæ, velut ad oracula respiciamus. Ita enim semper ille doctrinarum orbis procescit, ut qui primum divina disciplina ducerentur homines, reliquarum gentium quasi pædagogi divinitus constituti, suis artibus moribusque illas imbuerent. Quæ ubi in hoc sapientiæ ludo profecerant, alios rursus populos habuere discipulos, inque eos doctrinæ rivum

vum derivarunt: sed de quo Horatianum illud
usurpaveris:

Cum flueret lutulentus, erat quod tollere velles.

Nam & in hoc Sapientum regno, & doctrina-
rum illa successione contingit, (liceat mihi πα-
γωδῆν!) quod de universo humano genere i-
dem Vates Venusinus pronunciavit.

Ætas parentum pejor avis tulit

Indoctiores, mox daturos

Progeniem insipientiorem.

Quæ omnia cum secum reputaret præstantissi-
mus & eximiæ spei juvenis, PETRUS ANTO-
NIUS BURCHARDUS, laudabili consilio, ita
ad philosophiæ studia animum applicuit, ut
non in illis tantum, quæ heri nudiusque terti-
us in scenam producta fuerunt, hæreret, sed
& antiquorum sacraria philosophorum accu-
ratiore oculo perlustranda sibi crederet. Quam
ob causam vastissimum de veterum philoso-
phorum sectis argumentum in Dissertationem
contraxit, non contemnendum eruditionis &
diligentiæ specimen exhibiturus. Quam cum
publice d. xv. Febr. hora X. matutina recitatu-
rus sit, nullis nostris vel lituris interpolatam,
vel accessionibus locupletatam; *Omnes omnium*
Ordinum hospites honoratissimos, ea qua par est ob-
servantia rogatos volumus, ut sua hunc actum
ornare præsentia & novos ad majora currenti
stimulos favore suo addere ne dedignentur.

Da-

Dabam è Museo meo d. XI. Febr. Ann. clō lbc
LXXXIII.

92.

CUm ii, qui literarum studiis incumbunt, metam sibi certam præfixam habeant, eam certe non attingent, si compressis manibus sedentes nunquam sedant in viam: verum omni conatu hoc illis agendum est, ut stadium hoc decurrant & palmam sibi propositam consequantur. Alacri itaque animo res suscipienda est, non detrectandi labores, qua data porta ruendum est, removenda obstacula: neque committendum, ut vel segnities vel voluptas illis obrepat & asperata palma excludat. Sunt enim studiorum præmia tam splendida, tam dulces harum utilitatum illecebræ, ut vel Herculeos labores allicere solarique possint. Nam ex ipsius laboris gravitate crescit earum jucunditas, ut molestiæ ipsæ non modo non contemnendæ, sed vel ob dulcem earum memoriam ultro expetendæ videantur. Sunt vero in medio posita literarum præmia, quorum spes invitat, quorum intuitu nulli labores subterfugiendi: ac si injuria hominum illa subriperentur, sibi ipsæ in mercedem cedunt & æterna voluptate animos pascunt. Neminem itaque ab instituto suo laudabili dimoveat, si viderit forte non virtuti & bo-

bonæ menti, non optimis artibus, sed ignorantia, sed sceleri præmia constituta: si pedibus conculcari viderit eruditos ab hominibus, quos brutis propiores facta ostenderent, nisi species homines mentiretur. Felices olim pronuntiabat Dux Mediolanensis, qui aureis purpureisque retibus piscarentur, id est: qui auro suo sapientum & doctorum hominum sibi jungerent consortia. Verum, ut nunc sunt secula, quibus per tumultum, furorem & libidinem aguntur omnia, tantum abest, ut aureis retibus trahantur eruditi; ut potius in ferreæ necessitatis & angustiarum retia compingantur. His tamen periculis & necessitatibus firmum & constantem animum opponere debent, qui literis se addixerunt. Quos ut suo velut celestimate excitaret Nobilissimus ornatissimusq; Juvenis Dn. HENRICUS DEEEN / Ditmarfus, doctam ac bene commentatam de DIFFICULTATIBUS ET FRUCTIBUS STUDIO-
RUM Orationem d. XII. Julii hora X. ant. recitabit. Nimirum his quasi præludiis voluit, primum spectari optimus Juvenis, longe ab illorum moribus abiens, qui se ad majores palæstras inermes protrudunt. Signum itaque sustulit, quo ad illas evocaret, classicum cecinit ad hæc stadia perniciores cursu transmittenda. Vestrum est favere honestissimis conatibus, *Hospites omnium ordinum honoratissimi*, quos si non displicere vobis frequenti vestra præsentia ostendetis, etiam ipsi currenti, ad illa quæ re-
stant

stant spacia conficienda stimulos & calcaria,
admovebitis. Vos vero, Juvenes lectissimi,
ista adhortatione firmati, quam nondum in-
gressi estis, vel nunc demum suscipere & in-
gredi studiorum rationem non detrectabitis:
qui vero viam jam vobis aperuistis, ut quam
bellissime decurratis, enitemini. Dab. Kilo-
nI. d. VIII. Julii Ao. clb lbc LXXXIII.

93.

Magna Eloquentiæ & Historiæ affinitas
est: mutuas enim operas jungunt,
& civili prudentiæ quasi alæ geminæ
adsistunt, quarum illa remigio feli-
citer orbem suum decurrit. Historia eventuum
exemplis velut telis quibusdam oratorem ar-
mat, & oratoris vim omnem in subsidium vo-
cat, cum res gestas ornare describit, & ex ipsi-
us prudentiæ penu depromptas operi suo con-
ciones immiscet. Historia rerum aliquam syl-
vam subministrat oratori fabro, quam ille in
varios usus fingat atque refingat. Cum itaq;
Eloquentiæ & Historiæ geminæ atque sororiæ,
ut ita dicam, partes mihi sint injunctæ, id sem-
per operam dedi, ut earum disciplinarum inte-
riora pro virili excuterem, eaque Auditoribus
meis inculcarem. Publicis enim privatisque
lectionibus, toto hoc, quo docui tempore, E-
loquentiæ tam solutæ quam ligatæ partes ita

explicui, ut quæ ab aliis omiſſa, vel leviter tractata, mihi præ cæteris excolenda ſumerem. Nam vel *Oratorem Civilem* præceptis exemplisque lectiſſimis exhibui, vel totam *Charactero-graphiam*, ſive de *Stylo* doctrinam, vel *Pathologiam Oratoriam*, vel de *Arguta diſtione*, de *Excerpendi ratione*, de *Argutis Thematibus ſacris eruendis*, de *Epistolis ſcribendis*, de *Inventionibus Poeticis*, de *omni tam Latina quam Germanica Poëſi*, ea propoſui, quæ publicam aliquando lucem, ſi ultima illis limæ acceſſerit, non ſpernendo ut puto, juventutis fructu videbunt, modo Deus vitam valetudinemque firmam conceſſerit; & bonis conatibus non interceſſerint horum temporum difficultates. Quæ ad Germanicam Poëſin ſpectant, jam tum à me in anteaſſum data ſunt, eaque *Latinorum Carminum* plenior editio ſequetur. In *HISTORIA*, ex quo Eloquentiæ profeſſioni illa juncta fuit, ea præ cæteris ſpectavi, quæ & civilis uſus eſſent, & ab horum temporum viris doctiſſimis nove obſervata, vel etiam prætermiſſa, aut mea induſtria, ut ſe interdum aliqua obtulerunt, notata. *Hiſtoriam* itaque vel univerſam propoſui, vel eam, quæ à *Caroli Magni imperio* ad noſtra ſe tempora extendit, vel *Taciti* quædam commentationibus illuſtravi: unde nonnulla ſuo quoque tempore ad editionem ſeligentur. Neque literariam hiſtoriam prætermiſimus, cujus bonam partem lectionibus publicis de *Re Bibliothecaria*, privatis de *Notitia Autorum* expedi-

divimus. Et hunc campum vastum fane & diffusum, intra tres annos proximos, operoso fane labore bis decurrimus. *Naturalem quoque Historiam*, ut hodie illa tot observationum fecunda messe ditata est, tentavimus. Quæ omnia, ubi paulo diligentius tractata, & continuis accessionibus perculsa fuerint, prælo, Deo ita volente, subjicientur, præsertim, cum non defint, qui ad editionem eorum maturandam impellunt, viri doctissimi. Hic laborum Academicorum cursus hætenus nobis fuit, à qua non deflectemus, quam diu vel valetudo, vel temporum iniquitas consilia nostra non destituet. Quoniam vero inter schedas nostras non pauca sunt privata industria nobis congesta & notata, quæ ordinariis nostris destinari lectionibus non possunt, versantur enim in argumentis remotioribus, id nunc consilium arripui, ut, quia & illa in usum tum juventutis nostræ tum publicum cedere possunt, illorum autem prælectionibus à via λεωφόρω, quam ingredi in publica informatione debemus, abducimur, singulis hebdomadis lectionem, quam Acroamaticam vocare licet, habeamus. Proponemus iis argumenta selecta, è quibus illud de PATAVINITATE LIVIANA, quod ad utramque nostram Spartam ex æquo spectat, primum nunc producemus. Ejus prima lectio proximo Martis die hora IXa ante-meridiana habebitur, quam reliquæ suis singulæ hebdomadis sequentur. Ubi hoc argu-

mentum exhausimus, vel de *Meritis Germanorum in re literaria* dissertatio, vel *ἱστορικὴ καὶ* *Jurisprudentiæ Romanæ*, vel de eo quod in disciplinis divinum est tractatio, & plura alia illud excipient, quæ hic enumerare ambitiosum forte videri queat. Si denique continua ista & per plures lectiones deducenda argumenta defecerint, nunquam nos destituent singularia, ex historia civili, naturali, literaria, & omni philologia deprompta: quorum elaborationi ut majorem operam impendimus, ita ad editionem aliquando procurandum seponemus. Vos modo honoratissimi Dnn. Auditores, quorum ego commoda unice respicio, id operam date, ut novos usque diligentia nostræ stimulos subjiciatis. Quod ad ordinarios nostros labores attinet, & quidem historicos, proximo die Jovis hora IXa publice *introductionem in Historiam* calamo excipiendam dabimus; privatis lectionibus ad historiam universalem, si Dn. Auditores ita velint, reversuri. In Oratoriis nova Rhetorices Elementa in tyronum non solum, sed & adultiorum gratiam concinnabimus. Nam cum libelli compendiarii, quos hætenus quidem vidimus, præcipua Rhetorices parte, enthymematum sc. inventione manci sint & mutili, & vero diffusi tum Aristotelis tum Cl. ejus interpretis *Schraderi*, qui præ cæteris diligentius in hac doctrina versatus est, commentarii pro usu juventutis prolixiores videantur, in compendium rem omnem contrahemus, ut
hæc

hæc velut lineamenta habeant eloquentiæ tam civilis quam sacræ cultores, ad quorum ductum orationis corpus efforment. Denique & figuras & quicquid ad ornatum orationis spectat in concinniores ordinem redigemus. His lectionibus pomeridiana illa destinata est, quarum initium proximo die Jovis fiet. Privatum, ubi lectiones de *amplificanda oratione* absolverimus, Scholas *Oratorias Practicas* instituemus. Verum de his ipsi, quod visum fuerit, statuetis. De me omnia, quæ commodis vestris, vel vestro vel meo judicio, inservire poterunt, expectare vos jubeo. Id saltem strenue laborabo, ut vobis fidem operamque meam, quam maxime fieri potest, probem, & orbi literato, nostrum hoc, qualecunque etiam fuerit, rem & vestram & communem juvandi studium innotescat. Dabam è Museo meo d. II. Septembr. Anno clb lbc LXXXIII.

94.

Tertius jam annus est, ex quo respirare, depulsis à jugulo suo telis, Germania cœpit. Neque enim ignotum cuiquam est, aut unquam ex animo tantæ rei delebitur memoria, quam divino beneficio, adversus barbarorum furorem, liberata Vindobona, vita, salus, libertas, Civium asserta sit. Itaque postquam semel Deus nos respexerat,

eodem victoriarum cursu fortuna nostra processit. Perrupti illi obices, expugnata castella, fusi exercitus, ac Buda regia Hungariæ sedes sexies frustra tentata, septima hac & fatali quasi obsidione eodem quo Vienna die liberata est, expugnata in nostrorum manus pervenit. Ut vel ex eo appareat, nihil hic temere, vel sola virtute militari factum, quanquam hæc summa ac incredibilis fuit, sed factorum, occultis consiliis rem eo fuisse deductam. Erectus est totus, quæ patet, orbis Christianus ad hoc *εὐαγγέλιον*, & ad se hos pertinere triumphos existimavit. Ubi non jubila & tripudia audita! Qui populorum, urbium plausu! Quam innoxiiis ignibus lusitatum est! Quæ Deo immortalis supplicationes decretæ! Quorum in gaudiorum societatem etiam Musas nostras admitti æquum est. Excitavit hujus lætitiæ sensus eximium præstantissimique ingenii juvenem ANTONIUM BURCHARDUM, ut publici gaudii argumentum in ingenii & pulcherrimorum conatuum occasionem converterit; Nam cum dies festus eam ob causam a Serenissimo Principe, Domino nostro clementissimo indiceretur, statim id cepit consilii, ut publicæ gratulationi ipse quoque accederet. Quare intra paucos dies orationem suo Marte concinnavit non solum, sed & memoriæ mandavit, quam die XVII. Septembris hora X. recitaturus est. Maluit enim properata pietate in recenti gaudio paulum ferventior, quam se-

ro officio segnior & remissior videri. Quandoquidem ergo & publica hæc causa per se invitat, & præclari juvenum conatus favore omnium digni sunt; ideoque *Auditores omnium ordinum honoratissimos* ad publicam hanc panegyrim, præsentia sua cohonestandam, ea qua par est observantia invitamus. Aderit oranti chorus Musicus, qui gratis vicibus intervalla dicentis interpunget. Amant enim alterna Camænx, præcipue in tam illustri argumento, in quo non voce tantum dicentis aures impleri, sed & cantu numerisque mulceri; & ad lætitiæ sensum animi omnium impelli debent. Dab. è Museo meo d. XV. Sept. Anno clc lcc LXXXVI.

25.

CUM in Republica omnium consilia, opera, labores eo tendere debent, ut salus publica in tuto collocetur; tum id maxime opera danda est omnibus, ne ab Honesti via *λεωφόρω* ulla in re deflectant. Etsi enim mutuis utilitatibus sustententur Societates, illæ tamen honestate tanquam spiritu & vita animari debent. Itaque quicquid Reipubl. bono sapimus, quicquid domi forisque agimus, id hoc charactere insignitum se ostendat. Jam olim in Stoicorum Scholis disputata hæc definitaque fuere: Quicquid honestum fit, id utile censeretur, nec utile quicquam, quod

non honestum sit, habendum esse. Adeo in-
nexa illigataque hæc sibi voluere Philosophi,
ut nulla ratione honestatem ab utilitate sejun-
gendam putarent, atque uno utramque nomi-
ne appellarent. Solet vero illud quod Hone-
stum dicitur, quibusdam quasi gradibus distin-
gvi. Est enim aliud perfectum numerisque
omnibus absolutum, quod cum ipsa virtute,
pari gradu procedit: aliud vero commune seu
populare, quod honesti similitudinem habet:
& neutrum cum utilitate ita contendere debet, ut
emolumentis nostris sit posthabendum. Ali-
ud vero in ambiguo positum ab utilitate inter-
dum superatur, vel eam sequitur. Ideoque
bene prospiciendum est illis, qui ad Reip. cla-
vum sedent, ne prudentiam civilem alia quam
honestatis lege definiant: tum vero demum,
utilitatis rationem sectentur, cum vel obscura
vel fucata honestati species accedit. Multo
minus audiendi sunt cum perniciosis senti-
entis suis, illi qui nulla honestatis habita ratione,
sola utilitate omnia in Republica metiuntur,
& ad hanc tanquam ad metam semper prospe-
ctant, neque ullam nisi quæ cum utilitate con-
juncta sit, prudentiam esse arbitrantur. Hos
docta oratione retundere conatus est Præstan-
tissimus optimæque spei Juvenis, MICHAEL
HENNINGIUS WEDDERKOPFIUS, qui ele-
gans hoc in exercitationem primam Academi-
cam sibi argumentum proposuit: QUOD HO-
NESTAS OPTIMA SIT PRUDENTIA. Quo-
ni-

niam ergo die XXI. hujus mensis, hora X. illam publice orationem memoriterque recitaturus est, ad hanc panegyrim *Omnes omnium Ordinum Auditores honoratissimos* officiose atque peramanter invitamus. Quos si ex voto faventes frequentesque Noster ille nactus fuerit, de beneficio maximo sibi gratulabitur, novosque ad majora stimulos sibi addi sentiet. Nos orationem doctis auribus non omnino indignam spondemus, ut non adeo male horam positura sint, quam illi oranti indulserint. Dab. è Museo meo d. XVI. Jan. Anno clb lbc LXXXVII.

96.

Cum plures imperandi formæ sint: nam vel unus; vel uno plures; aut multi populos regunt: disputatum jam olim fuit, & nunc quoque disquiri solet: cui inter illas formas principatus debeatur. Nam ut plerique animati sunt; ut suis vel cupiditatibus vel utilitatibus ducuntur: ita temere interdum cupideque decernunt. Quare inter tot diversa hominum vota, quælibet illarum ab his laudabitur; ab illis culpabitur. Unius imperium antiquitate cætera vincit: nam ad Dei *πρωτογενεος*, ad Parentis familiam moderantis componere exemplum consueverunt, qui decentius de humana natura sentiunt. Illi enim vel humana divinis miscen-

do è cœlo natales ejus arcessunt, vel saltem ordinis sui fines non egrediuntur. Qui nihil a se belluini alienum existimant, ovium bouumque greges, cum suis pastoribus hic adducunt: quibus ad primatum ejus è natura stabilendum

Venit & Ulpilio, & tardi venire bubulci.

Ac sane, cum barbari rudesque homines primum in ordinem redigendi sunt; cum fundanda imperia: omnia rectius unius, Heroica virtute præditi, imperio perficientur. Si difficultatibus extremis remedium quæritur; unus erit Θεὸς ἀπὸ μηχανῆς, qui res lapsas restituat. Cum vero jam tum optimis institutis firmata est Respublica; cum opibus floret, civibusque rerum usu exercitatis: emancipari quasi gestit populus, & ad majorem vel libertatem vel æqualitatem adspirat. Quare, naturæ quodam instinctu, has imperiorum ἀνακυκλώσεις in Rebus publicis observamus: ejusque insigne exemplum gens Romana ob oculos ponit. Pessum ivissent res Romanæ, nisi plurimum prudentia iis nutantibus subvenisset: iique ipsi Rempublicam evertissent; nisi in imperii societatem etiam populus admissus fuisset. Cum & ab illis turbatum esset, omnia discordiis civilibus fessa in unius potestatem redierunt. Qua iterum subruta, cum alia ratione Roma non posset; affectato in animos homi-

minum per religionem imperio, etiamnum, veteris gloriæ umbram tuetur. Hanc ob causam, quod rerum ex vices essent, & motibus facile concuti posset: non unam imperii formam; sed illam, si monarchia esset, plurimum; si aristocratia vel politia, unius imperio temperatam, ad diuturnitatem sapientes magistri commendarunt. In omnibus reipublicæ conversionibus, libertatem æqualitatemque semper cives sibi propositam habent, ad quam naturæ quodam impetu aguntur. Quare si illarum cum potentia æquilibritas quædam & 1004 *voûia* institui potest; recte se habere & firmo omnia talo stare videntur. Quem cum in Aristocratia & Politia finem præ cæteris obtineri posse multi existiment; cum in illis commercia, literas, artes florere videant, Respublicas (hoc enim nomine appellant) in cælum laudibus extollunt. Illorum sententiam Nobilissimus Eximiusque Dn. JOHANNES ERNESTUS SCHRÖDERUS Gedanensis, suo quoque calculo comprobavit: qui die Martis hora Xa orationem de *Magnificentia Rerumpublicarum* (ita enim ipse inscripsit) habiturus est. Nam cum in patria honesto loco natus, multarum in Germania Belgioque Academicarum hospes, eruditionis suæ publicum edere specimen vellet: illud sibi delegit, quo erga Respublicas omnes affectum, erga Patriam pietatem suam ostenderet. Cum enim Respublicas generatim

ac universe laudat; eodem penicillo, iisdem coloribus patriam depingit: quæ sub Serenissimi Polonorum Regis auspiciis, pleno liberarum Civitatum jure gaudet. Quid enim in illa urbe non magnificum est? quæ opibus, civibus, consiliis floret, & literarum gloria ad omne ævum duratura illustratur. Qua cum ille patria non indignum se civem præstet: nam & domi præclari Doctoris disciplina ad literas elegantiores formatus; & aliis quoque in Academiis, & in hac ipsa iisdem se totum studiis tradidit: dignissimum certe Musæ nostræ judicarunt, quem in cathedra Oratorem admitterent; quem ipsi, *Hospites omnium Ordinum honoratissimi*, de nobili argumento verba facientem libentes frequentesque audiretis. Quocirca omnes ea qua par est observantia studioque rogatos volumus: ut sua hanc panegyrim præsentia ornare ne dedignentur. Mutuis provocari ingenia officiis debent: Nam ut *stantes in curribus Æmiliani* spectatorum plausibus animantur: ita & hi ad eadem spatia & curricula conficienda illorum exemplo invitantur. Dabam è Museo meo. d. III. Aprilis Anno cło lcc LXXXVII.

97.

ANnus jam abiit, ex quo de Regia urbe
BUDA, felicissimis Augustissimi Im-
peratoris LEOPOLDI auspiciis re-
cuperata festum hic diem celebravi-
mus; & nunc etiam hic annus nova memora-
bilis victoria gloria insignis, ut communes Or-
bis Christiani plausus tulit; ita & à Musis no-
stris solenne efflagitare officium videtur.
Nullus scilicet sterilis nobis annus elabitur;
sed ut messium, ita victoriarum labor in orbem
redit, ac autumnos singulos novis semper tri-
umphis auctos videmus. Quam divini Nu-
minis admirabilem benignitatem qui non gra-
to animo agnoscit, nã is ab omni non pia tan-
tum, sed & bona mente derelictus &, qui lu-
cem hanc & solem adspiciat, indignus est.
Nam certe sublimioribus stimulis hic animos
nostrorum concitatos, & terribiliore quam hu-
mana manu hostes impulsos, quis inficias ive-
rit? præsertim cum paucæ nostrorum manus
validissimas hostium copias, non vi tantum sed
& dolis & machinationibus usas, non profliga-
runt tantum, sed & ita retuderint, ut præter
tristes imbellis turbæ reliquias nihil hostibus
superfit, omni præterea apparatu bellico, omni-
bus castris, commeatu, gaza exutis. Atque
ut divino hæc gesta impulsu appareat, conspi-
rantibus quasi in idem temqus fati navali &
terrestri prælio à Venetis tota propemodum
Peloponneso iidem hostes feliciter expulsi.
Cu-

Cujus Victoriæ bono cum non illi tantum, qui pugnarunt, & quorum auspiciis pugnatum est; sed universa propemodum Europa, nosque ipsi fruamur: nam triumphorum illa gloria facile clandestinas aliorum molitiones exstinguit: etiam in Holsaticis Athenis lætantium voces exaudiri æquum erat. Excitatus ergo laudabili conatu fuit Præstantissimus & Eximie spei Juvenis MICHAEL HENNINGIUS WEDDERKOPF, ut luculento aliquo specimine pietatem suam publice testaretur. Nam in laudem admirabilis hujus victoriæ orationem comptam & elaboratam d. XX. hora X. memoriter habiturus est. Ad quam panegyrim frequenti sua præsentia cohonestandam omnes omnium Ordinum Auditores honoratissimos ea, qua par est, observantia ac humanitate invitamus. Nam præterquam quod præclari juvenum conatus virorum doctorum favore sustentandi & in majus extollendi sint, ipsa hujus Victoriæ memoria per se excitare animos omnium debet, ut qui ante in publica fama plausus suos sponte ostenderint, nunc quoque nostra cohortatione impulsæ in nostræ lætitiæ partem venire non dedignentur. Dabamè Museo meo d. XVIII. Septembris Anno clc lcc LXXXVII.

Cum Reipublicæ conservandæ præcepta tradit optimus civilis prudentiæ magister Aristoteles, prudenter ille Reipubl. custodes monet, ut ad ἡὰ μὲν ἀνὴρ animum advertant, ne quid detrimenti Respublica capiat, aut ejus compages, ubi in cumulum excreverint, labefactetur. Etsi enim Prætor modicum non curat, ut Jurisconsulti docent, curare tamen præ cæteris Reipublicæ moderatores debent, in qua errores etiam leves semper gravioribus viam sternunt. Scilicet quemadmodum natura ita comparatum est, ut in corporum genesi à minimis processus ad maxima instituatur, ita & in eorum destructione à minimo, quod vix advertas, corruptionis semina se primum insinuant, totam illam massam suo tempore, ubi vires ceperint, depopulatura. Athleticæ valetudinis corpora, ubi spiritus vitales vel parum veneni hauserint, nisi salutaribus remediis excusseris, cum tempore prosternentur. Leviculo primum, errore in calculo admissio, quicquid subduxeris erroneum erit. Animum ergo & oculos omnes in partes versabit prudens præteriti & futuri temporis arbiter, Vir Civilis & Reipublicæ gubernaculis admotus, ut ex Architectonicæ artis regulis omnium rationem ineat, nihil curvum mutilumque in hac compage admittat: qui sibi suæque arti dictum,

pu-

putabit, quod de rerum genere dixit Lucretius :

— *Ute in fabrica, si prava est regula prima,*

*Normaque si fallax rectius regionibus exit;
Et libella aliqua si ex parte claudicat hilum,
Omnia mendose fieri atque obstipa necessum
est,*

*Prava, cubantia, prona, supina atque absorta
tectata,*

*Jam ruere ut quaedam videantur velle, ru-
antque,*

Proditâ judiciis fallacibus omnia primis.

Nam sane & in Republica, si quid pravum, distortum, nec satis aptum est, error errorem trudet, & varam vibria sequetur, usque dum mole ruat sua, quod male junctum, & caducis parietibus superstructum est. Vidit hujus utilitatem argumenti Nobilissimus & Eximius Juvenis CHRISTIANUS ALBERTUS SCHMIDT / Schlesvicensis idque sibi præ cæteris elegit, in quo ingenii vires periclitaretur. Quoniam enim civilia sectatur studia, quibus aliquando Rempubli- cam ornaturus est, hoc sibi DE MINIMO IN REPUBLICA NON NEGLIGENDO Thema publica oratione pertractandum, è patentissimo illo campo seposuit. Quo labore cum pro ingenii sui viribus laudabiliter de-

defunctus sit, perendie, die sc. XX. Jan. hora X. in Auditorio publico orationem illam ex memoria recitabit, è minimis magna minaturus. His enim auspiciis ingredi hoc iter maluit, in minimis primam quæsiturus laudem, ut majoribus cum tempore progressibus viam sterneret, & Nobilissimæ suæ familiæ aliquando decori ac ornamento esset. Ad hanc ergo Orationem audiendam *Omnes omnium Ordinum Auditores honoratissimos* ea qua par est observantia & humanitate invitamus. Magnum ille beneficium interpretabitur, si frequenti præsentia hanc panegyrim ornaverint. Quod ut facere haud gravate velint, nos quoque omnes, magnum ipsi calcar, ad persequenda strenue, quæ egregie cœpit, favore suo addituros, diligentissime rogamus. Dab. Kiloni è Museo meo d. XVIII. Jan. Anno clb lbc LXXXVIII.

CUm è Sophistarum ludo aliquando prodiret, qui Justitiam publica oratione celebraturus esset, objectum ipsi fuisse accepimus, acta illum agere, qui

Rem nulli obscuram, neque nostræ vocis egentem,

commendatum iret, suaque pulchritudine, satis ornatam, panegyricis illustrare coloribus, atque adeo Soli facem accendere laboraret. Nec male quidem illi judicarunt, cum in illa hominum societate vivere se crederent, quibus mens læva non esset, & quales Diogenes accensa lucerna, in ipso foro, Athenis quæfiverat. Quemadmodum scilicet parricidio pœnam nullam legislator, statuerat, ne atrocissimi sceleris suspicio cuiquam suboriretur: ita illi ne laudandam quidem Justitiam existimarunt, ne in disputationis discrimen præstantia ejus adduceretur. Ac sane eo insanix processit nonnemo inter illos Sophistas, qui τὸν ἥττω λόγον κρείττω ποιῶν gloriæ sibi ducebant, ut Justitiam publica declamatione non solum stultitiæ convicio infectaretur, sed eam, ut Reip. noxiam, ex illa ejiciendam omnibus argumentis contenderet. Qui quidem ad illorum accedere Æthiopum insaniam videtur, quos Solem orientem conviciis & maledictis proscindere tradunt Historici: à quo tamen omnis vita nostra, omnis frugum ubertas, velut inexhausto fonte promanat. Neque defunt hodie, si non facie, animo tamen nigri tenebriones, minime certe inter Lucis filios reponendi, quam splendidis etiam titulis populo imponant, qui quanquam profiteri publice non audent, intus tamen & in cute cum Sophista illo sentiant, omnique opere juratos se justitiæ hostes

ostendant. Non sustinent hujus Divæ splendorem Noctux, præ qua ἡ δὲ ἑσπερίς ἡ δὲ ἑὼς ἡ τὴν Λαυμασός, quo illam elogio Aristoteles ornavit: sed potius cum Viro illo bono Horatiano, qui ubi clara voce Janum Patrem & Apollinem, audiente populo, vocaverat, tacitis tamen precibus Lavernam sibi faventem optarat, hæc apud se quotidie mussitant:

— — — pulchra Laverna,
*Da mihi fallere, da sanctum justumque vide-
 ri,
 Noctem peccatis ac fraudibus objice nubem.*

Quare non immerito, jam dudum terris profugam & cælo receptam Astræam fabulati sunt Poëtæ: &, ut nunc sunt tempora, quibus omnia pene vitia triumphant, mirum videri non debet, si, ut omnibus virtutibus, ita quoque Justitiæ de Patrono laborandum sit. Hujus se Divæ amore perculsum ostendit Generosus Juvenis, HENRICUS à BUCHWALD, Eques Holsatus, qui postquam studiorum, quæ hominem nobilem ornant, fundamenta prima illa ætate, quæ plurimis otio & socordia transit, feliciter jecerat, præcoci quidem, sed non immaturo ingenii partu, orationem de JUSTITIA Felicitatis Civilis fundamento, enixus est. Enimvero laudanda hæc est generosi Juvenis industria.

qua ille, velut primitiis quibusdam & auspi-
ciis, maturioris ætatis messes uberiores, ma-
gnas Generosissimi Domini Parentis spes,
quasi repræsentare videtur. Scilicet,
ut Aquilinarum pullorum acies ad solis lu-
cem exploratur: ita Noster quoque ad Divæ
Astræ radios firmare ingenii aciem voluit,
ut virtuti, quæ cœli filia est, Principum ama-
fia, nobilissimarum mentium Regina, matu-
re consvesceret, eamque sibi propitiaret.
Nihil enim magis nobilem animum quam
Justitiæ amor ornat, quo à plebeja ac in vitio-
rum sordes abjecta humilitate, velut nota
quadam gentilitia, ille sejungitur. Quan-
doquidem ergo Orationem suam XXV. Febr.
proximo sc. Martis die, hora X. matutina,
memoriter pronunciaturus est; ut frequentes
adesse, ac benignas oranti aures præbere
velint, *Hospites omnium Ordinum honoratissimi*,
est quod peramanter officioseque rogamus.
Excitandi optimorum Juvenum animi favore
nostro sunt, ut ad ea, quæ restant, spatia ala-
crius conficienda, majus illis calcar addatur.
Valete. Dab. è Museo meo. die XXIII. April.
Anno cl^o l^o XC.

EST illa animis hominum insita sciendi cupido, ut præsentium non tantum, & præteritorum cognitione pasci velint, sed & abdita ac à vulgari sensu remota, & futura velut indagine venentur, eorumque pernoscentorum ardore angantur & torqueantur. Quæ etsi quædam ingenii nostri intemperies dici potest; non tamen ad eo reprehendenda est, aut illi in nobis igniculi restringendi, modo non extra orbitam ferantur, aut eos invadant limites, quos humanæ intelligentiæ attingere fas non est. Neque enim ferenda est illorum improbitas, dicam an infania, qui ad rerum occultarum scientiam obtinendam

Flectere si nequeant superos, Acheronta movebunt,

& quasvis artes, quæ vel à profana superstitionum hominum industria excogitatæ, vel longa à malis geniis propagine derivatæ sunt, in subsidium adhibebunt. Quantus hic nonnullorum labor est, qui cælum terræ, summa imis, sacra profanis, divina dæmoniacis miscant, ut aliquam rerum sibi negatarum notitiam alicunde extricent. Sunt qui ex astris de suis & aliorum fatis ratiocinantur, qui ab eorum configuratione spes metusque suos sus-

pendunt, & velut ex specula quadam omnium rerum vicissitudines se prævidere posse, arbitrantur. A cælo ad elementa procedunt ostiatim per omnes naturæ tribus arcana sua rimaturi. Jam ignem, lucem, aëra sollicitant, plusquam Lyncea perspicacitate illa deprehensuri, & vel fumos ipsos, nebulas in pariete pictas, in speculationum suarum consilium adhibent. Alii ab aquis fluctuantibus sibi certi quid pollicentur: terræ pulvere, per puncta impressa, rerum eventus designant. Omnes animalium classes hæc divinandi licentia pervagatur, ut & in viscera eorum sæviat, nec manes quietos patiatur. Nam vel aves, ut secretorum divinorum conscias, vates illi explorant, vel in sordidis animalium extis sua arcana legunt, vel denique à mortuis ac pridem defunctis oracula expectant. Cæterarum, quæ ex omni propemodum re & instrumento capiuntur, divinationum genera, & fere infinita sunt, quis recenseat? E numeris, literis, nominibus, sordibus, pelvi, cribro, cera, plantis, fructibus, ex sexcentis aliis aliquid curiosuli isti exsculpere sibi videntur, quo istam sciendi, ut ita dicam, ingluviem & orexin, quasi furfuribus & carduis pascant, nunquam ita saturandi, quin nova his *Εὐλαμία* excitetur. Verum relinquamus has delirantibus ingeniüs ineptias. Non defunt suæ quoque Sapientibus divinationes, quas illi animo per omnia scientiarum arcana

cir-

circumducto præcipiunt, & velut ex penu instructissima quasi quidam promicondi depromunt. Insunt quædam rebus, negotiis, actionibus *τεμπήρια*: sunt quidam hominibus, ratione ingenii, indolis, patriæ, fortunæ, conditionis, affectuum characteres, vulgo quidem non satis observati, sed qui prudentibus & rerum usu exercitatis statim in oculos incurrant, unde illi eventus & successus confiliorum colligant, & velut oracula quædam simplicioribus promulgent. Sed illa non quotidiana intelligentia & communi pervulgatogue vitæ usu comprehenduntur, at emunctioris naris homines requirunt, qui omnia etiam minima possint *ἐξ ἀναδίξαι*, qui singula vestigiis odorantes ad ipsum tandem cubile persequantur. Fuit hæc Averrois sententia non solum, sed & Plotini; multarum scientiarum congestione ita intellectum humanum præparari posse, ut intelligentiis cœlestibus conjungi videatur, quod in senectute demum post diuturnas speculationes contingat. Et hi quidem suo per nos sensu abundent; non tamen omnino reprehendendi. Nam quo magis se fœculenta corporis & humorum mole liberat animus, præcipue in iis qui morti sunt vicini, toto illo sedimento suo, pravorum affectuum fomite in præceptis actis & subjugato, accedente præterea continua *θεωρία* vel rerum usu, diviniore quasi luce circumfundi videtur, ut, quod de Geniis dicere solent.

lent philosophi, non per longinquas ratiocinationes, sed quasi per induitum omnia etiam abdita, longinqua, futura comprehendat. Et hac sane, ni fallor ratione propius semper ad τὸ Θεῖον, quod in omni sapientiæ parte elucet accedimus. In rebus civilibus earumque prudentia tot ejus rei documenta sunt, ut uberrima ejus argumenti, si quis falcem illi suam immittere velit, seges futura sit. Quare laudandus maximopere est Eximius Præstantissimusque Juvenis, BARTHOLOMÆUS, JOH. OTTO HANNEMANNUS, qui luculento de *Divinatione Civili* specimine, Oratione ab se elaborata, suum in hoc argumento mihi ingenium & diligentiam probavit, & Parenti optimo, Collegæ nostro honoratissimo, spes amplissimas ostendit. Quamcum ille crastino die, hora X. publice memoriter recitaturus sit, *Omnes omnium Ordinum Hospites & Auditores honoratissimos*, ut adesse frequentes velint, officiosissime rogatos volumus. Dabimus operam, ne in ingratos hoc collatum beneficium videatur. Valete. Dab. è Museo meo. d. XIX. Martii Anno clb lbc XC.

Quemadmodum non ita pridem JUSTITIAM in theatrum produxit, Generosus Juvenis, & in ea omnem Reipublicæ felicitatem sitam esse ostendit; ita nunc Germanus ejusdem frater, Generosus Juvenis CASPARUS à BUCHWALD, Eques Holsatus, Germanam Justitiæ sororem TEMPERANTIAM suis quoque coloribus depictam daturus, animi corporisque robur illa conservari, publica memoriterque recitanda oratione contendet. Pulcherrimas sibi uterque amasias, ut splendidis natalibus ortas, ita suis dignissimas elegerunt, quarum illi honorem & decus propugnarent, patrocini-umque adversus belluas sub humana pelli-cula latitantes susciperent. Ac laudandi sane vel ideo honestissimi eorum conatus sunt, quod in juvenili ætate constituti, earum spectatores formarum audire malint, quæ non cum Venere è maris spuma ortæ, sed cælo originem debent, ac potius quotidianas illas delirantis seculi formas ex animo delere as-vefcant, non tantum idonei Moralis Philo-sophiæ auditores, quos Juvenes esse negabat

Aristoteles, sed & ejusdem & virtutum publici Præcones. Sunt scilicet gemini illi cardines, quibus Reipublicæ Sphæra volvitur, JUSTITIA & TEMPERANTIA, quæ sibi virtutes iis sunt innexæ vinculis, ut in conservanda publica salute mutuas omnino operas jungant. Quemadmodum enim hæc providet, ne per cuniculos vel *ψευδόθυρον* irrepant hostes, pravæ cupiditates: ita illa domestico legum præsidio omnia munit & coercet. Quod si temperantia bene partes suas egerit, parum quod agat, habebit Justitia, illius custodia ab omni insultu secura. Cum enim cupiditates malas Temperantia extirpat, fundum illa subtrahit, in quo radices figit injustitia: fomitem extingvit, unde incenduntur pravi affectus & flagitia, fontem illa obstruit, unde

mille nocendi artes & fraudum nomina mille

nova semper successionem propullulant. Ubi corporis voluptates animique motus semel in ordinem redacti sunt; nullis jam pœnis, vinculis, laqueis ad eos compescendos Justitia indigebit. Ubi vero affectus & libidines dominantur, luxu omnia diffluunt, avaritia

fe-

fervent pectora, fulcienda injustitiæ præsidio intemperantia est, ut novi semper cupiditatibus fomites subministrantur. Utinam vero surdo orbi non narrentur fabulæ! qui nunc quidem totus ἐν τῷ πονηρῷ κῆραι, injustitiæ ac intemperantiæ quasi diluvio immersus. Quos enim non voluptatum ille torrens abripit? quæ non amplius pedissequæ sed duces naturæ sunt. Quis nunc vel de pago aut vico dixerit? quod de Romana Republica Tertullianus in Apologetico, nulla per sexcentos annos illic visa adulteria. Quis cum Curio rapis velit, esse contentus, ut spernere Samnitum aurum possit? quis non omni potius, & quod non ostenderunt, auro emunctos ad raparum prandia dimitteret? Videmus multis servire ventri ingenium, qui spongiarum instar implentur ut depleantur, ac deplentur ut impleantur. At longe sapientius Spartani quæ sibi à Thasiis mittebantur, cupedias & varia potus genera, Plutarcho teste, in servos suos distribuerunt, servilibus ingeniis aptiores has gulæ delicias rati, quam liberis hominibus, voluptatum imperio non subjiciendis. Serviunt scilicet, & quidem nequissimam servitutem, serviunt, quibuscunque etiam titulis ornentur,

tur, quacunque vel purpura vel toga vesti-
antur, qui cupiditatibus & voluptatibus se
manciparunt. Animam siccam sapientissi-
mam Heraclitus olim dicebat, dixerim ego &
iustissimam: Nam non sapientiæ tantum, sed
& Iustitiæ mater Temperantia est. Non ma-
le dixerim etiam Pietatis: neque enim frustra
Sanctissimus Salvator τὴν σωφροσύνην nobis
commendat, scil. ne nos minus paratos & ad
pietatem minus intentos decretorius ille dies
deprehendat. Nulla denique Reipublicæ pars
est, nullus ordo, qui non temperantia fulcia-
tur, & quasi nervis quibusdam solidetur.
Nam quemadmodum in uno illa homine vi-
gorem, vivacitatem, ingenii subtilitatem, se-
datos mores generat: ita in universæ Reipu-
blicæ corpore singulorum hominum cumula-
ta illa virtus ad Reipublicæ felicitatem conspi-
rat. Quid? quod nec ab ipsa militia, in qua
tamen per vim pleraque agi consueverunt,
omniaque in omnes licere multi existimant,
abesse temperantia potest, sed præcipuus illi
locus relinquendus est, etiam in hostili solo.
Quam ob causam inter eximias Pömpeji, feli-
cissimi Imperatoris, virtutes, nihil adeo ex-
tollit Tullius, quam illam morum innocentia-

am,

am, temperantiam, continentiam, quod non avaritia ad prædam, non libido ad voluptatem, non amœnitas ad delectationem illum revocarit: quod signa, tabulas atque ornamenta, quæ alii tollenda arbitrabantur, ille ne visenda quidem sibi existimarit. Quo factum est, ut bellum piraticum, quod tot annis tot Imperatores fatigaverat, ille ineunte vere susceptum, media æstate confecerit; ut provinciæ & socii velut è cœlo delapsum intuerentur, hostes vero tanti viri virtutibus ultro se submitterent. Verum cum tota in hoc argumento versetur *Generosi Juvenis* oratio, nolo vos morari amplius, aut paulo intemperantius de Temperantiæ laudibus præfari. Quare ut X. April. proximo scilicet Jovis die, hora X. frequentes oranti adesse, vestraque illum excitare, benevolentia velitis, *omnium Ordinum Hospites & Auditores Honoratissimi*, peramanter officio-seque rogatos volo. Vos certe, o Juvenes Nobilissimi huic causæ quam maxime favere æqvum est: quibus inter Musas & Charites, hæc quoque Diva Σωφροσύνη dulcis illa ingeniorum nutricula, Bonæque mentis soror, & comes omni affectu ita colenda est, ut omni-

omnia voluptatum & cupiditatum irritamenta,
tanquam Circes veneficia, Sirenum cantus,
scopulos & præcipitia vobis fugienda existi-
metis. Valete. Dabam è Museo
meo. die VI. April. Anno
clb lbc XC.

F I N I S.





a32101



003407226b

